

**R.P. LAURENTIJ
DE PORTEL, ...
RESPONSIONUM
MORALIUM
TOMUS...**

Lorenzo Portel, Josè Maria
Fonseca de Evora



RENTU
E PORTEL


32 ~~N~~ e 19

I

ESPONSIONE M


TOMO SECONDO

EDIZIONE SECONDA



AVVENT
LAVRENTI ARNAV

M. DC. XLII
CON PRIVILEGIO REGIO



32.7.19

II

R. P. LAVRENTII
DE PORTEL,
ORD. P. N. FRANCISCI
DE OBSERVANTIA,

Prouinciæ Algarbiorum in Portugallia quondam
Ministri Prouincialis, & Lectoris Theologi
in eadem Prouincia,

RESPONSIONVM
MORALIVM
Tomus Secundus.




*Cum duplici INDICE, vno Casuum, altero Rerum
& verborum copioso.*

EDITIO NOVISSIMA.



LVGDVNI,
Sumptibus LAVRENTII ARNAVD.

M. DC. XLIV.
CVM PRIVILEGIO REGIS.



SERIES

Casuum qui in hoc libro
discutiuntur.

CASVS I. **D**E professione cuiusdam Nouitij olim
professi in alio Ordine. fol. 1

- | | | |
|-----|--|-------|
| 2. | De eadem professione appendix. | 45 |
| 3. | An Bulla Cruciate profit Religiosis quoad confessio-
nem. | 49 |
| 4. | De eadem Bulla Cruciate pro Religiosis. | 62 |
| 5. | Soluuntur obiectiones circa eandem Bullam. | 74 |
| 6. | An Iubilaeum possit quis lucrari non habens Crucia-
tam. | 86 |
| 7. | De secunda indulgentia Cruciate post medium an-
num concessa. | 93 |
| 8. | De venditione cuiusdam agri cum circumstantia
vsure. | 97 |
| 9. | De locatione reddituum cuiusdam commende. | 108 |
| 10. | De quodam voto facto per iracundiam. | 117 |
| 11. | De Missis relictis quibusdam clericis soluendis in fru-
ctibus cuiusdam agri. | 123 |
| 12. | An possint Religiosi ministrare Eucharistiam in
Oratoriis. | 128 |
| 13. | De reuocatione privilegiorum viue vocis oraculo. | 142. |
| 14. | Reclamatio cuiusdam Religiosi circa suam professio-
nem. | 162 |
| 15. | De institutione cuiusdam maioratus. | 181 |
| | ẽ 2 | 16 De |

Series Casuum.

16. De Religioso culpato in quadam visitatione.	191
17. De donatione facta intuitu matrimonij.	196
18. De quodam legato relicto in testamento nullo.	204
19. De emptione cuiusdam officij Notarij secularis.	
211.	
20. De emptione emphyteusis, vulgò praxo.	218
21. De reelectione Guardiani ultra tres annos in eodem Conuentu.	228
22. De Missis dictis à Religioso prohibito.	234
23. Quid significet in symbolo Apostolorum ille articu- lus: Sanctorum Communionem.	238
24. De restitutione rei inuenta in manu latronis.	248
25. An Minorita possit facere eleemosynam absque li- centia Pralati.	252
26. De subrogatione cuiusdam officij.	256
27. De quadam professione dubia, vel nulla.	261
28. De Religioso propinante venenum suo Pralato.	271
29. De Aduocato seculari respondente ad processum fa- ctum per quemdam Prouincialem.	281
30. De ingressu in clausuram Monialium.	299
31. An Prouincialis possit transferre Monialem ad aliu Conuentum, ut sit ibi Abbatissa.	310
32. De Religioso indebitè promotò ad Ordines.	316
33. De venditione rei habentis onera imposita.	321
34. Appendix ad casum de priuilegijs vine vocis ora- culo.	325
35. An possit expelli ab Ordine Religiosus nimis ebrio- sus, & in hoc nimis scandalosus.	329
36. De quodam Religioso reclamante intra quinquennium.	
331.	
37. De factura, & utilitate testamenti.	339
38. An Religiosus possit reuocare testamentum factum in nouitatu.	345
39. De	

A P P R O B A T I O.

NOs infrà signati Doctores Theologiae almae facultatis Parisiensis, Tomum secundum Responsionum Moralium R. Patris LAURENTII DE PORTEL Ordinis Minorum, diligenter examinavimus, nihilque reprehensione dignum reperimus. In quorum fidem nostrum chirographum apposuimus. Lugduni die 14. Octobris 1642.

Fr. STEPHANVS MOLIN,
Carmelita.

Fr. M. MICARD, Gardianus
Conuent. S. Bonauenturae.

e SV MMA

SYMMA PRIVILEGII

Regis Christianissimi.

LUDOVICVS XIII. Dei gratiâ Galliarum & Nauarræ Rex Christianissimus, singulari Priuilegio sanxit, ne quis per vniuersos Regnorum suorum fines, intra decē annos, à die finitæ primæ impressionis computandos, imprimat, seu typis excudendum curet, & vanalem habeat librum qui inscribitur, *Responsionum Moralium Tomus secundus: Authore FR. LAURENTIO DE PORTEL, Ordinis Minorum*: præter ANTONIVM BERTIER, Bibliopolam Parisiensem, aut illos, quibus ipsemet concesserit. Prohibuit insuper eadem auctoritate Regiâ omnibus suis subditis, eundem librum extra Regni sui limites imprimendum curare, vel quempiam, vbicunque fuerit, ad id agendum impellere, ac instigare, sine consensu dicti ANTONII BERTIER. Idque omne sub pœna sex mille librarum, vti latius patet in litteris datis Parisiis 14. Nouemb. 1642.

Signatum, DENISOT.

*Desit excudi hac prima Editio, die
8. Decemb. 1643.*

PRæfatus ANTONIVS BERTIER ius omne suum, atque huiusmodi priuilegium transtulit, & cessit LAURENTIO ARNAVD, vt secundum ipsius tenorem eo fruatur; prout ex mutuo super id conser-to instrumento, patet.

SERIES

Series Casuum.

79. De ancilla cuiusdam Monialis.	647
80. De uxore occidente maritum suum.	649
81. De testamento cum clausula, quod uxor non nubat.	660
82. De decimis petitis à quodam commendatario.	662
83. De renocatione cuiusdam testamenti.	667
84. De dote matrimonij, & obligatione denunciationis.	671
85. De rebus pertinentibus ad usum cuiusdam Monialis.	680.
86. De quodam furto, & consultatione diaboli ad illud detegendum.	685
87. De dote, & donatione omnium bonorum.	689
88. De diuortio inter duos coniuges.	695
89. De homicida professò in quadam Religione.	699
90. De statuto cuiusdam Ordinis de non recipiendis descendentibus à Iudeis.	705
91. De permutatione cuiusdam beneficij.	715
92. De Religioso applicante ad seruitium Commissarij Cruciate absque licentia.	705
93. De quodam Vicario Generali excommunicante Religiosum exemptum.	627
94. De donatione facta ab Episcopo suis consanguineis.	740.
95. De professione Nouitie, pro qua maior pars Conuentus non dedit suffragium.	750
96. De sponsalibus quibusdam, & matrimonio.	764
97. De quadam muliere baptizante filium suum.	768
98. De ieiunio Religiosorum.	771
99. De dote promissa à patre Iudeo pro filia Nouitia.	773.
100. De uxore cuiusdam Iudei pro sua medietae bonorum.	780
101. De	

Series Casuum.

101. De quodam clerico indebitè ordinato.	785
102. De alio clerico malè ordinato.	791
103. De donatione facta Monasterio pro ingressu, & professione Monialis.	797
104. De Religioso adeunte Generalem absque licentia Prouincialis.	805
105. De parrono Monialium presentante Nouitiam.	810
106. De foemina intrante clausuram Monialium ob metum mortis.	816
107. De Capuchis non obligandis ad processiones.	823
108. De donatione Episcopi pro maritandis consanguineis.	828
109. De quodam delicto facto de nocte.	836
110. & VLT. De privilegiis concessis vna vocis oraculo, an hodie valeant.	840

Series Casuum.

VI

39. <i>De Pralatura, vel officio obtentis in Ordine, simonia- cè.</i>	350
40. <i>Appendix ad casum pracedentem.</i>	354
41. <i>An Pralatus regularis possit absoluerè subditum a simonia in Ordine, & casibus Bullæ Cœna.</i>	359
42. <i>De quadam superstitione particulari, & de super- stitione in communi.</i>	367
43. <i>An malefica denuncianda sint coram Episcopo, vel coram S. Officio.</i>	371
44. <i>De indulgentiis confraternitatis Chordigerorum Pa- tris Francisci.</i>	378
45. <i>An confessarius teneatur admonere pœnitentem ali- quid inuincibiliter ignorantem.</i>	382
46. <i>De quadam promissione pro contrahendo matrimo- nio.</i>	392
47. <i>De confessione, & communione indebitè factis in Quadragesima.</i>	398
48. <i>De obligatione Religiosi expulsi ab Ordine circa ob- ligationem diuini officij.</i>	405
49. <i>Notationes circa dispensationes obtentas.</i>	410
50. <i>De confessario absoluerè suum complicem, cum quo peccauit.</i>	427
51. <i>De institutione cuiusdam capellania cum certo one- re.</i>	433
52. <i>De commutatione cuiusdam legati pij.</i>	439
<i>Appendix ad pracedentem casum.</i>	443
53. <i>De quodam delicto facto intra Ecclesiam.</i>	469
54. <i>Quid debeat restituere homicida heredibus defun- cti?</i>	473
55. <i>De quodam patre cogente filiam ad ingressum mona- sterij.</i>	482
56. <i>De electione Abbatis dubia ex parte Pralati eligen- tis.</i>	492

Series Casuum.

57. De dispensatione in quodam statuto prouinciali.	493
58. An Prælatus possit punire certum delictum secretum subditi?	495
59. De restitutione cuiusdam usura.	501
60. De restitutione iurantis falso in iudicio, & ad id alios inducente.	506
61. De acceptatione duorum officiorum incompatibilium.	514.
62. An S. Ioseph fuerit viduus ante desponsationem cum Deipara matre.	525
63. An Beata Anna habuerit tres maritos	531
64. De professione Nouitia facta absque prævio examine Episcopi.	538
65. De quadam emphiteusi.	544
66. De paroco non comitante defunctos ad Ecclesias Regularium.	559
67. De donatione facta à quodam Religioso.	563
68. De filio familias eligente sepulturam.	567
69. De Nouitio mortuo extra Conuentum in domo patris.	571
70. Dubia circa quoddam testamentum.	673
71. De collatione sacrorum Ordinum sede vacante.	588
72. De apostata Religioso exeunte ad succurrendum matri pauperi.	595
73. De quodam rebaptizato.	599
74. De electione cuiusdam Prælati localis.	608
75. De presentatione cuiusdam capellania.	614
76. De Abbâtissa admittente seculares intra clausuram.	620.
77. De quadam Nouitia iussa recipi de mandato Papa.	631.
78. De quodam putante se bis contraxisse matrimonium.	641.



Ad pium Lectorem.

DIVVS Paulus 2. ad Corinth. 11. dixit Corinthiis: Vtinam sustineretis modicum quid insipientiae meae: sed & supportate me. Quod si Paulus plenus sapientia infusa, qui vidit arcana verba, & iuxta D. Petrum scripsit epistolas secundum datam sibi sapientiam à Deo, talia de se verba protulit. Quid faciam ego miser homunculus, ô pie lector, nisi dicere tibi: Sustine hoc modicum insipientiae meae, & supporta me, patienter legens contenta in hoc rudi libello. Modicum est totum, quod illo continetur, fateor. Sed memini, Deum Exod. 25. praecepisse ut omnes illius populi offerrent aliquid pro ornatu, & fabrica Tabernaculi: siue aurum, siue argentum, aes, byssum, purpuram, & pilos caprarum. Itaque acceptabat Deus pilos caprarum, ex quibus fiebant operimenta ad cooperiendum tectum Tabernaculi ad propulsandos imbres. Tabernaculum Dei est anima hominis, in qua Deus habitat. Alij Doctores pro ornatu huius animae scripserunt, & scribunt libros, qui sunt aurum,
à 2 argentum

argentum, byssus, & purpura. Ego ex insipientia
mea ad defendendum anima tabernaculum ab im-
bribus peccatorum, ac dubiorum offero tibi Lector,
hoc modicum, & hos pilos caprarum: imitare
Deum qui latus modica acceptat. Et memento di-
xisse Poëtam quendam, Forſan & hæc olim me-
minisse iuuabit. Forſitan in hoc modico libello
aliqua inuenies, quæ aliquando pro iuuandis ani-
mabus prodeſſe poterint. Quod ſi euenerit, ex nunc
reſero ad laudem omnipotentis Dei qui uiuit, &
regnat in ſecula. Amen.

APPRO



R. P. LAVRENTII
DE PORTEL
 RESPONSIONVM
 MORALIVM
 TOMVS SECVNDVS.

CASVS PRIMVS.

*De quadam professione Nouitij professi in qua-
 dam Religione, qui recepit habitum in
 Ordine Patris nostri Francisci.*



etrina Religiosorum.

I Casus iste fuit : Quidam Religiosus professus in
 A quadam

argentum, byssus, & purpura. Ego ex insipientia
mea ad defendendum anima tabernaculum ab im-
bribus peccatorum, ac dubiorum offero tibi Lector,
hoc modicum, & hos pilos caprarum: imitare
Deum qui latus modica acceptat. Et memento di-
xisse Poëtam quendam, Forsan & hæc olim me-
minisse iuuabit. Forsitan in hoc modico libello
aliqua inuenies, quæ aliquando pro iuuandis ani-
mabus prodesse poterint. Quod si euenerit, ex nunc
refero ad laudem omnipotentis Dei qui uiuit, &
regnat in secula. Amen.

APPRO



R. P. LAVRENTII
DE PORTEL
 RESPONSIONVM
 MORALIVM
 TOMVS SECVNDVS.

CASVS PRIMVS.

De quadam professione Novitij professi in quadam Religione, qui recepit habitum in Ordine Patris nostri Francisci.



VIT iste casus publicus in tota Olyssipone, imò & ferè in toto regno. Et quia casus difficilis est, & ex illius resolutione possunt colligi multa documenta pro soluendis dubiis professionis nullæ, libuit hîc inserere pro doctrina Religiosorum.

I Casus iste fuit : Quidam Religiosus professus in
 A quadam

quadam Religione approbata, de licentia sui Prælati generalis recipit habitum Nouitij in quodam conuentu P. N. Francisci. Et mense vndecimo nouitiatus, Prælatus conuentus congregatis capitulariter omnibus Religiosis conuentus, excepit suffragia, illisque recensitis, & examinatis, maior pars communitatis suffragata est contra Nouitium, ita vt illi deesset maior pars suffragiorum. In quo casu statutum generale Ordinis Minorum disponit, vt Nouitius statim expellatur ab Ordine sine recurſu ad ſuperiorem: & ſic de facto Guardianus Nouitium expulit à conuentu ſine habitu Franciſcano.

2 Nouitius appellauit ad Prouincialem; eoque adiuto, Prouincialis eundem reſtituit ad habitum Minorum, eumque repoſuit in alio conuentu prouinciæ minus capaci, diſponens vt in hoc ſecundo conuentu continuaret nouitiatum, vt computato tempore nouitiatus in ſecundo conuentu cum tempore nouitiatus prioris conuentus admitteretur ad profeſſionem in ſecundo conuentu. Hoc vbi primum innotuit Guardiano prioris conuentus, à quo fuit expulſus, recurrit ad Commiſſarium generalem ſuperiorem ipſius Prouincialis: qui Commiſſarius acceſſit ad priorem conuentum, à quo fuerat expulſus, & per ſe ipſum excepit ſecundâ vice vota, ſeu ſuffragia ſingulorum Religioſorum: & denegata ſunt Nouitio multo plura ſuffragia, quàm fuerant denegata in prima vice. Ita vt ſerè ex tribus partibus ſuffragiorum pluſquam duæ partes Nouitio fuerint denegatæ.

3 Quo viſo prædictus Commiſſarius priorem expulſionem approbauit, & per literas patentes mandauit Guardiano ſecundi conuentus, vt Nouitium prædictum ſtatim expelleret à conuentu, illique habitum

bitum nostrum auferret : inhibens simul , ne eundem Nouitium amplius ad habitum , vel professionem admitteret , protestando quod si secus faceret , professio foret nulla. Et sic Nouitius fuit expulsus à secundo conuentu cum habitu suæ prioris Religionis. Nouitius tamen appellauit : idem etiam Commissarius per particulares litteras monuit Prouincialem , illique mandauit ne prædictum Nouitium ad habitum admitteret , neque ad professionem , cum eadem protestatione.

4 Nouitius sic expulsus à secundo conuentu , mansit cum habitu suæ primæ Religionis, in domo cuiusdam secularis per quinque menses. Quibus mensibus transactis , contigit vt vacaret officium Commissarij generalis ; illóque officio vacante , Prouincialis idem per litteras suas remisit prædictum Nouitium antiquum ad eundem conuentum secundum , iniungens Guardano dicti conuentus , vt denuò conuocaret Religiosos illius , & exciperet suffragia singulorum pro dicti Nouitij professione. Cúmque maior pars conuentus pro illo suffragata fuisset , Guardianus ex mandato Prouincialis admisit prædictum Nouitium ad professionem , de qua est quæstio. In quo secundo conuentu non fuit Nouitius per mensem integrum ; defuerunt enim sex dies ad mensem integrum : atque ita nouitiatus illius in primo , & secundo conuentu non fuit annus integer , sed defuerunt illi sex dies ad annum integrum nouitiatus , sic interrupti , & interpolati.

Quo supposito , quæruntur duo. Primum, *An prior expulsio à primo conuentu fuerit iusta , & licita ?* Secundum , *An prædicta professio facta in secundo conuentu , concurrentibus prædictis circumstantiis , fuerit valida ?*

5 Quod attinet ad primum Quæsitum, videtur quod prædicta expulsio à priori conuentu fuerit iniusta, & proinde nulla. *Primò*, quia in prima receptione suffragiorum in primo conuentu, examinatis suffragiis susceptis per fabas in vrna, inuentum est vnum suffragium supra numerum Religiosorum suffragantium: cum enim suffragatores essent, verbi gratiâ, centum, inuentum est vnum suffragium supra centum: & proinde illud suffragium excrescens, & abundans videtur reddere suspectam, imò nullam receptionem suffragiorum, vt pote factam per animum maleuolum alicuius suffragatoris. *Secundò*, quia ante receptionem suffragiorum, (ait Nouitius) aliqui Religiosi sollicitarunt alios Religiosos, vt Nouitio suffragium negarent: quæ sollicitatio videtur esse conspiratio quædam, & subornatio: facta autem per conspirationem, vel subornationem sunt nulla, vel saltem annullanda. *Tertiò*, quia prædictus Nouitius in prima expulsionem conuentus primi, statim appellauit ad Prouincialem ob causas proximè dictas, & illius appellatio non fuit recepta; cum sit de iure communi ciuili, & canonico, imò & de iure naturali, quod debet appellans audiatur,

Conclusio prima.

6 **E**Xpulsio istius Nouitij à primo conuentu, cui defuerunt suffragia, fuit valida, & licita. Probatur, quia facta secundum legem valida sunt, & licita: argumento sumpto à contrario sensu per regulam iuris in 6. vbi dicitur: *Quæ contra ius fiunt, debent utique pro infectis haberi.* Ergo à contrario sensu, quæ secundum ius fiunt, debent pro validis haberi. At ista expulsio

expulsio facta fuit secundum statutum Religionis Minorum, in quo præcipitur vt si Nouitius ad professionem non habuerit vltra dimidiam partem suffragiorum, statim expellatur ab Ordine, idque absque vlllo recurſu ad superiorem: ergo illius expulsio à primo conuentu fuit valida, & iusta. Neque obstant tria argumenta in oppositum adducta, ex quorum solutione præſens conclusio amplius confirmata manebit.

7 Ad *primum argumentum* dico, quod illud suffragium excreſcens in prima receptione suffragiorum supra numerum suffragatorum, non annullauit suffragiorum receptionem, seu electionem. Probo imprimis per regulam iuris in 6. dicentem: *Non præstat impedimentum, quod de iure non sortitur effectum.* At illud suffragium superabundans non sortiretur effectum, siue daretur pro Nouitio, siue contra illum: ergo non præbuit impedimentum electioni. Probatur minor, quia Nouitio denegata sunt vltra decem suffragia supra dimidiam partem communitatis: ergo illud suffragium abundans illi non nocuit. Noceret quidem si supra medietatem communitatis negantis suffragia illud vnum votum excreſceret, & electio, seu expulsio penderet ab vno tantum suffragio: quod secùs accidit. Idem probari potest ex alia regula iuris in 6. dicente: *Vtile non debet per inutile vitari.* At illa negatio suffragiorum multò vltra dimidiam partem suffragiorum fuit utilis conuentui; ergo non debet vitari per illud suffragium inutile creſcens supra numerum suffragantium. Probatur hoc ipsum optimo exemplo adducto à Rodriguez tom. 3. *addit. ad sum. cap. 148. conclusione 2.* vbi, postquam quæſiuit an fuerit valida electio, in qua duo, vel tres ex-

communicati suffragati fuerant, qui suffragium dare non poterant; respondet hæc verba: *Si excessus suffragiorum ex parte electi fuit tantus, quod licet cum illis iungantur suffragia excommunicatorum, & inhabilium manet sufficiens numerus ad validitatem electionis, electio valida est secundum ius.* Et citat in margine cap. *Cum Vintoniensis*, de electione. Quod optimè quadrat ad præsens intentum, vbi illud suffragium crescens, additum aliis nihil obesset.

Hoc denique colligitur ex Camillo Borello *tom. 1, Decisio tit. 30. num. 307.* vbi docet quod si plures iudices ordinarij sententiam tulerunt, & vnus eorum, erat inhabilis, sententia valida est, & citat ad hoc Hostiensem, Anton. de Butrio, Panorm. Felinum, & alios, cuius rationem ibi assignat similem rationi supra à nobis proximè datæ.

8 Ad secundum argumentum, Respondetur Primò non constituisse de subornatione, nec de conspiratione contra Nouitium ante receptionem suffragiorum: imò potius per testes iuratos constitit quod pro fauore illius facta fuit subornatio. Secundò respondetur, quod dato, quod aliqui Religiosi ante suffragiorum receptionem sollicitassent alios Religiosos, ne darent suffragium Nouitio, illa non fuit subornatio culpabilis, & impediens; sed fuit admonitio bona, & necessaria. Pro quo noto cum Rodriguez *tom. 2. qq. 9. § 6. art. 1.* quod est duplex subornatio in electionibus, vna illicita, & mala: altera licita, & bona. Subornatio mala est quando persuadetur vt eligatur indignus; vel ne eligatur dignus: & hæc subornatio est prohibita in iure. Subornatio bona est quando suadetur vt eligatur dignus; vel ne eligatur indignus: & hæc subornatio nec est prohibita, neque mala; imò est bona, & lauda

laudabilis, vt ibidem probat Rodriguez. Quo supposito, Dico prædictum Nouitium habuisse defectus morales, imò & naturales in sanitate, & viribus corporeis, ita vt non posset vitam ordinariam Ordinis Minorum tolerare in vestitu, & potu, nec proinde ducere vitam communem. Cum ergo inhabilis esset ad seruandam vitam in Regula præceptam, non fuit culpabilis subornatio, neque prohibita, sed potius bona, si aliqui Religiosi aliis persuaderent ne illi darent suffragium, eo quòd esset inhabilis ad Religionem: imò qui id persuaderent, bene facerent in bonum Religionis. Neque item hæc persuasio ad negandum suffragium prædicto Nouitio dici potuit conspiratio: Nam, teste Petro Vendrameno *Addition. ad Repertorium Inquisitorum*, verbo, *conspiratores*, ex leg. 1. §. *Cum patronus ff. de offic. præfekt.* sic definitur conspiratio: *Vt tunc dicatur conspiratio quando aliqui cum inimicis meis cœunt improbè in meam perniciem.* Nota verbum, *improbè*: ad conspirationem enim requiritur, vt multi cœant *improbè*, & iniuste in malum alterius. Si enim probè, & iuste id faciant, non dicetur conspiratio, sed potius zelus bonus. Et proinde citato loco idem Petrus Vendramenus dicit aliquando conspirationem accipi in bonam partem, pro quo citat duas leges iuris ciuilis, & Ciceronem 2. de off. dicentem: *Magnas utilitates adipiscimus conspiratione hominum, atque consensu.* Cum ergo, vt dixi, hic Nouitius haberet defectus; & inhabilis esset ad seruandam regulam fratrum Minorum, non fuit conspiratio facta contra illum suadere fratribus ne pro illo ferrent suffragium, illud enim suadentes non improbè fecerunt, sed probè, & cum zelo ne admitteretur ad Ordinem inhabilis.

9 Ad *tertium argumentum* respondetur, appellacionem Nouitij nihil obstare. *Primò*, quia appellauit à mero executore: Guardianus enim illum expellens à primo conuentu fuit merus executor legis, seu statuti Ordinis iubentis expellere Nouitium, pro quo maior pars conuentus non suffragata fuerit. A mero autem executore non potest appellari, nisi excedat modum executionis, vt habetur cap. *Quoad consultationem, de re iudicata*, & cap. *Sub illo. 2. q. 6. §. Sunt quorum*, & per alios textus citatos à glossa in cap. *Pastoralis, de offic. & potest. indic. deleg. §. Cum autem*, verbo, *Et si sciat*. *Secundò*, quia in substantia ista appellatio fuit appellatio à lege, vel à pœna legis: appellatio autem à lege, seu à pœna legis non valet, cum à lege iusta non possit appellari, iuxta Panormit. *super cap. fin. de constit.* vbi ait quod ab statuto non potest appellari. *Tertiò*, quia illud statutum Ordinis iubens expelli Nouitium, pro quo maior pars conuentus non est suffragata, tollit appellacionem Nouitij. Cum enim iubeat illum expelli absque vllò recurſu ad superiorem; per hæc verba interdicit appellacionem Nouitij. Nam appellatio definitur quod sit recurſus ad superiorem, &c. Si verò dicas statutum Ordinis non posse tollere appellacionem, quæ est de iure naturali. Respondetur, quod vniuersitates, seu communitates, quæ superiorem non habent, benè possunt condere statutum omni appellacione remotâ circa res, quæ sunt ipsius communitatis. Sic tenet Camillus Borellus *tom. 1. Decision. tit. 3. num. 1234. cum seq.* vbi citat *dum* leges iuris ciuilibis, & Bartolum, Rolandum à Valle, Afflictum, Franchis, Losæum, & alios. Quod fundatur in hac ratione: nam ego possum rem meam non dare, nisi cum certa conditione. Communitas etiam

res suas non vult dare nisi sub certa conditione: quâ conditione non extante, potest non admittere appellationem, vel replicam. Iam verò Religio Minorum condens illud statutum, vt non detur professio Nouitio, cui maior pars conuentus suffragia denegauit, sed expellatur absque appellatione, est communitas non habens superiorem, nisi Papam; & disponit de rebus suis, idest de professione, quam dare potest, vel negare: ergo potuit illud statutum facere. Confirmatur hoc exemplo clarissimo, sumpto ex Concilio Tridentino *sess. 25. cap. 19. de Regular.* vbi statuit, quod si aliquis Religiosus professus prætendat probare suam professionem fuisse nullam, eo quod facta fuerit per metum, vel ante legitimam ætatem, talis reclamans non audiatur, nisi reclamauerit ante quinquennium transactum à die professionis. In quo verbo, *Non audiatur*, denegat appellationem iam professio non reclamanti ante quinquennium. Hæc autem negatio appellationis, teste Sanchez *lib. 7. de matrim. disp. 3. q. 1. num. 19.* inducta est à Concilio ob bonum commune Religionum, ne aliàs Religiosi post decem & plures annos lites mouerent contra Prælatos circa valorem suæ professionis, & sic turbarent pacem Religionis. Quid ergo mirum si Religio P. N. Francisci faciat statutum, vt Nouitius non habens maiorem partem suffragiorum conuentus, statim expellatur, omni appellatione remotâ, cum hoc cedat in bonum commune Religionis? Nam aliàs quicumque Nouitius cui conuentus suffragia denegaret, posset lites mouere contra conuentum, prætendens sibi iniuste fuisse negata, & sic pacem Religionis turbaret. Vltimò responderi potest ad hoc tertium argumentum, hanc Nouitij appellationem fuisse friuolam, & sine fundamen-

to, vt constat ex solutione horum trium argumentorum: iudex verò non tenetur admittete appellationem friuolam, cap. *Cum appellationibus*, de appell. in 6.

QVÆSITVM II.

An professio facta in secundo Conuentu fuerit valida?

10 **A**Ntequam ad secundum quæsitum principale respondeam, Præmitto primò ex Concilio Tridentino *sess. 25. cap. 15. de Regular.* Nouitium non posse admitti ad professionem nisi steterit per annum vnum in probatione nouitiatus, & quòd professio antè facta sit nulla. Secundò Suppno in Ordine P. N. Francisci dari statutum generale, quo statuitur vt annus nouitiatus sit continuatus sine inter-
p-datione: ita quod si Nouitius exierit à conuentu aliqua ex causa, quæ non sit translatio ad alium conuentum cum habitu, & postea redierit, non computetur illi tempus, quod antea in probatione stetit, sed denuò annum probationis incipiat. Quod statutum probabo infra esse de mente Concilij Tridentini. Tertiò Præmitto Prouincialem, Guàrdianum secundi conuentus istius Nouitij post expulsionem à primo conuentu, fuisse inhibitos per particularem inhibitoriam Commissarij generalis tunc regentis, ne prædictum Nouitium expulsus à primo conuentu ad professionem admitterent, cum protestatione quod professio aliàs facta, foret nulla. Quartò Præmitto, quod in Ordine Minorum datur statutum generale, per quod præcipitur, vt si aliquis Religiosus appella-
uerit ab aliquo Prælato inferiori ad superiorem, iu-
dex

Index ad quem fuerit appellatum, non procedat ad causæ cognitionem, nisi prius iudex à quo fuit appellatum, transmittat processum causæ, seu informationem; vel si ipse appellans processum præsentauerit. Si verò secus Prælatus, ad quem appellatum est, fecerit, omnia sic per ipsum facta, sint irrita. Quod in substantia est, velle, vt Prælatus ad quem appellatur, non procedat in causâ nisi prius audierit Prælatum, à quo appellatur, vt infra ostendam decretum esse à iure canonico, & à Concilio Tridentino. Hoc posito, sit secundâ conclusio principalis in hoc casu.

Conclusio secunda.

II **I**sta professio facta in secundo conuentu cum circumstantiis suprà positis *num. 1. & seqq.* fuit omnino irrita, & nulla. Hoc probatur euidenter ex quatuor præmissis in numero proximè præcedente. Primum est, quod ex Concilio Trident. citato *cap. 15.* decernitur vt Nouitius stet in probatione per annum; quod omnes Doctores explicant debere esse annum omnino integrum: ita vt sit annus computandus de momento ad momentum, id est, ab hora, in qua suscipit habitum, vsque ad horam, in qua fit professio: & ex consequenti si deficiat vnus tantum dies, professio erit nulla. Ita tenet Sanchez *lib. 2. de matrim. disput. 24. num. 16.* citans textus, & Doctores: idemque tenet ibidem *num. 22.* Idem tenet Azor *tom. 1. lib. 5. c. 28.* vbi probat ex iure; quod quando lex requirit aliquod tempus, & loquitur cum præpositione, *Per, vt, per* vnum annum, vel mensem, talis annus, vel mensis debet esse completus; ad quod citat legem *Non putabam,* & legem *Si annos;* ff. *de condit. & demonstr.* Idem tenet

net Bonacina *tom. 1. q. 2. de clauis, puncto 10. difficult. 2. §. 2. num. 1.* & Suarez *tom. 1. de Relig. lib. 5. cap. 15. n. 1.* ait, annum nouitiatus ita debere esse integrum, & computandum de momento ad momentum, vt si illi desit vna tantum dies, professio secuta sit nulla; pro quo ipse citat Sanchez à nobis suprà citatum *lib. 2. disput. 24.* At huic Nouitio defuerunt tres dies, vt minimum, ad annum completum nouitiatus, computato tempore nouitiatus primi conuentus cum tempore nouitiatus secundi conuentus: & præterea defuerunt illi sex dies, quos consumpsit adeundo Prouincialem, vt constat ex processu. Neque obstat quod ipse responderet, se suppleuisse illos dies in tempore quinque mensium, per quos stetit extra conuentum secundum, præcedente etiam appellatione: Nam appellatio reponit omnia in antiquo statu. Non obstat, quoniam in primis illud poterit intelligi de appellatione licita, & vera, non verò de friuola, & nulla, qualem diximus hanc fuisse suprà, in *tota solutione ad 3.* Secundò respondetur quod annus nouitiatus debet fieri in habitu Religionis, & sub obedientia Prælati, vt statim dicam in secundo præmissio, seu fundamento. At iste Nouitius per illos quinque menses, per quos mansit extra secundum conuentum, neque habuit habitum Religionis Minorum, neque ibi fuit sub obedientia Prælatorum Ordinis, imò fuit exclusus ab obedientia nostri Ordinis. Vide infra *num. 14.*

12 *Secunda* causa nullitatis istius professionis sumitur ex secundo præmissio supraposito, quod scilicet annus nouitiatus debet esse continuus, & non interpolatus. Nouitiatus verò iste fuit interruptus per quinque menses, ac proinde non fuit continuus. Quòd verò annus nouitiatus debeat esse continuus, sine interpo-

terpola

terpolatione, vltra dictum statutum Ordinis, tenet Nauar. *consilio* 52. *tit. de Regular. num.* 2. Henriq. *in sum. lib.* 13. *cap.* 40. §. 2. Flaminio *de Resign. q.* 13. *num.* 11. Farinac. *tom.* 1. *Decis. Rota, decisione* 125. *num.* 2. citans text. & Doctores. Bonacina *tom.* 1. *titulo de clausura quest.* 2. *puncto* 10. *difficult.* 2. *q.* 2. *puncto* 10. §. 2. *n.* 3. citans Couar. & Gutierrez, & Sanchez *lib.* 5. *Decalogi cap.* 4. *n.* 10. vbi pro se citat 24. Doctores Iuristas, & Bonacina citato loco dicit interpolationem duorum dierum vitare integritatem, vel continuationem anni: iste verò interpolauit per quinque menses. Et quod maius est, Nauar. *tomo de consilijs consilio* 37. *de Regular.* ait se vidisse in tribunali sacre Pœnitentiariæ declarari nullam professionem cuiusdam Nouitij, qui fuit in quodam conuentu per decem menses, à quo exiuit, & postea iuit ad alium conuentum eiusdem Ordinis, vbi mansit Nouitius per duos menses, & fecit professionem cum suffragiis totius conuentus: & ait Nauarrus prædictam professionem fuisse iudicatam nullam in prædicto tribunali. Præterea Farinacius *in suo* 4. *tomo declarationum Cardinalium tit.* 12. *decis.* 202. & Marzilla *in tomo declarationum Cardinal. lib.* 1. *tit.* 12. *de Regular. super cap.* 16. *Concilij Trident. de Regular. sess.* 25. citant ambo quandam declarationem Cardinalium, dicentem, quod annus nouitiatus debet esse continuus, non interpolatus, & quod ad hoc nullum priuilegium suffragetur. Itaque sunt hac de re duæ declarationes; vna Pœnitentiariæ relata à Nauarro; alia Cardinalium citata à Marzilla.

13 Ex secunda verò declaratione Cardinalium relata à Marzilla dicente, quod ad hoc nullum priuilegium suffragetur, manet impugnatum quod pro se respondere potest Nouitius, videlicet Iulium Secundum concessisse

cessisse priuilegium praelatis Minorum, vt possent recipere ad professionem Nouitium, qui exiuit ab Ordine, & postea rediit, non obstante interpolatione, dummodo postea compleat annum nouitiatus. Hoc non obstat, quia tale priuilegium abrogatum est per dictam declarationem Cardinalium, dicentem, quod nullum priuilegium ad hoc suffrageretur. Adde quod licet non extaret talis declaratio Cardinalium, praedictum priuilegium Iulij II. abrogatum est per Concilium Tridentinum, vt probat Sanchez *lib. 5. Decal. cap. 4. num. 35.* per rationes ibi allatas. Idem tenet Villalobos *2. p. sum. tract. 35. difficult. 15. num. 9.* Et in particulari dico quod nostra Religio Franciscana renuntiavit huic priuilegio Iulij II. quod sic probo: Nam in compendio Mendicantium verbo *Generalis §. 24.* Leo X. concessit Generali nostri Ordinis, quod de consensu capituli generalis possit statuere ne Religio vtatur aliquibus concessionibus Papalibus sicut sibi visum fuerit. Cum ergo capitulum generale Segouiae statuerit, quod annus nouitiatus sit continuus, & non interpolatus, per hoc statutum, seu factum, renuntiavit clarè dicto priuilegio Iulij II. licet statutum non dicat clarè quod Religio tali priuilegio renunciat. Nam renuntiatio non solum potest fieri verbo, sed etiam facto contrario, vt doctè probat Azor *tom. 2. lib. 7. cap. 19. q. 2.* ad quod ponit multa exempla renunciationis facta solo facto sine verbis, & affert Doctores, & textus. Cum ergo illud statutum Ordinis Segouienae, sit factum contrarium priuilegio citato Iulij II. clarum est Religionem per tale statutum renunciasse dicto priuilegio. Neque facit contra hoc quod refert Nauarrus consilio 4. de Regular. vbi refert quendam Nouitium fuisse in quodam conuentu

uentu solum per mensem cum dimidio mensis, inde-
que exiuisse de mandato Prælati ad facienda certa ne-
gotia extra conuentum, quibus finitis rediit ad con-
uentum, & fecit professionem validam. Non obstat
quoniam Nouitius ille, de quo loquitur Nauar. exiuit
cum obedientia Prælati & cum habitu Religionis, &
proinde manens extra conuentum cum habitu Ordini-
nis, & sub obedientia Prælati, non interpolauit an-
num nouitiatus. Noster verò Nouitius per quinque
menses mansit extra conuentum sine habitu nostri
Ordinis, & exclusus ab obedientia Ordinis per Com-
missarium generalem.

14 Hic recurrit occasio addendi illud quod suprà
promisi in fine *num. 11.* videlicet quod annus noui-
tius, vt sit integer, debet fieri totus nouitiatus cum
habitu Religionis, & sub obedientia Prælati. Tenet
hoc expressè Syluest. verbo *Religio 5. q. 5.* Azor *tom. 1.*
lib. 12. cap. 2. q. 9. Rodr. *tom. 3. qq. 9. 15. art. 9.* Sanchez *lib. 5.*
Decalog. c. 4. num. 29. & alij multi graues Doctores, quos
citat, & sequitur Bonacina *tom. 1. tit. de clausura, q. 2.*
puncto 10. diff. 2. §. 2. num. 5. vnde præsens Nouitius, de
quo agimus, cui ad annum integrum defuerunt dies
citati suprà *num. 4. & 11.* non potest allegare pro se,
quod illos dies deficientes ad integritatem nouitia-
tus suppleuerit validè tempore quinque mensium, qui-
bus mansit extra conuentum: mansit enim sine habi-
tu Religionis, & sine obedientia Prælatorum, &
proinde sic existens non potuit integrare, seu supple-
re tempus requisitum ad integritatem anni. Equipa-
rantur enim in hoc integritas anni, & continuatio an-
ni, vt vtraque fieri debeat cum habitu, & obedientia
Ordinis; & hoc deducit Bonacina *num. 5. proximè ci-
tato ex Concilio Trident. citato cap. 15. de Regular.*

Quod

Quod verò obiicitur pro Nouitio, quod per illos quinque menses extra conuentum mansit, præcedente appellatione, & sic non amisit ius ad professionem; iam ad propositum est suprà numero 11. Quibus adde quod licet appellatio conseruet appellantem in statu antiquo, non tamen dat ius appellanti circa futura, nisi postquam fuerit iudicatum per iudicem *ad quem*, appellationem fuisse iustam. Hic verò Nouitius quando fuit expulsus à secundo conuentu per sententiam Commissarij generalis, & appellauit ad P. Generalem Ordinis, neque illius appellatio fuit acceptata, neque fuit declaratum ab aliquo Prælato Generali iustè fuisse appellatum: imò post secundam expulsionem à secundo conuentu Prælatus generalis per suum iudicem delegatum sententiam tulit, professionem prædictam fuisse nullam.

15 Tertium præmissum positum suprà numero 10. continet *Tertiam* causam nullitatis istius professionis. Admissa est enim professio à Guardiano secundi conuentus de mandato Prouincialis, cum ambo per particularem inhibitoriam essent antea inhibiti, ne prædictum Nouitium post secundam expulsionem à secundo conuentu amplius reciperent ad habitum, vel professionem, cum protestatione, quod secus factum foret irritum, & inane, sicut constat ex processu, quâ inhibitione interpositâ constat & Prouinciali, & Guardiano secundi conuentus ademptam fuisse iurisdictionem dandi habitum, vel professionem valide prædicto Nouitio. Nam inhibitiō iudicis superioris aufert iurisdictionem iudicis inferioris, & quidquid facit iudex inferior inhibitus contra inhibitionem, dicitur nullum, & attentatum. Sic docent communiter Doctores, Riccius 1. p. *decisionum decisione* 214. citans

rans Piguerium : idem tenet Camillus Borellus *tom.2. decis. decisione, seu tit.35. n.82.* vbi citat ad hoc quinque capitula iuris Canonici, & quatuor graues Doctores, vt proinde non sit necessaria vltior probatio. Et quamuis non essent prædicti textus, & Doctores, nobis Minoritis sufficiebat decretum Nicolai tertij in cap. *Exijt, de verb. significat, in 6.* vbi decernit quod licet Prouinciales, iuxta nostram regulam habeant iurisdictionem ad recipiendos Nouitios : posse tamen Generalem Ordinis prædictam iurisdictionem illis coarctare sicut viderint expedire. At Commissarius generalis, qui Prouinciali, & Guardiano secundi conuentus inhibuit, ne illum ad professionem admitterent, habebat in hoc regno omnem iurisdictionem, & authoritatem delegatam Generalis. Et præterea habuit iustam causam ita inhibendi, quia plenè informationem acceperat de insufficientia Nouitij. Imò addit Sanchez *lib.5. Decalogi cap.4.num.71.* quod non solum Generalis Ordinis, sed etiam Prouincialis absque priuilegio potest mandare Prælato conuentus ne admittat ad professionem talem Nouitium, si Prouincialis habeat iustam causam. Quod si Prælatus localis secus faciat, ait Sanchez professionem fore nullam, etiamsi Prouincialis in sua prohibitione non addat decretum irritans. Probat hoc Sanchez clari, & efficacibus rationibus : inter quas ponit hoc exemplum. Nam licet parochus habeat iurisdictionem ordinariam ad coniungendos aliquos matrimonio : hoc non obstante potest Episcopus prohibere parochi ne illos matrimonio iungat ob causam, quam Episcopus habet iustam. Quod si parochus non obstante Episcopi prohibitione illos ad matrimonium admittat, tale matrimonium erit nullum ex defectu

iurisdictionis in paroco. Eodem modo, quamvis Prælatus localis, & Prouincialis habeant iurisdictionem ordinariam ad dandam professionem Nouitio, si tamen Prælatus generalis ob iustam causam illis prohibeat ne talem Nouitium admittant ad professionem, illique secus fecerint, professio erit nulla ex defectu iurisdictionis illis ablata per inhibitionem. Quod vero facta per iudicem inhibitum, vel prohibitum sint nulla, vltra Doctores citatos id asserentes, Probatum hac ratione Theologa: nam inhibito suspendit iurisdictionem iudicis inhibiti, & proinde inhibito est quasi quædam suspensio partialis: constat verò, quod si suspensus exerceat officium à quo suspensus est, illius factum est irritum, imò & punibile, vt Doctores dicunt in materia de censuris, & Guardianus secundi conuentus, inhibiti, & prohibiti facere, id est, admittere dictum Nouitium ad professionem, nulliter fecerunt, vtpote carentes, quo ad hoc, iurisdictione.

16 Neque obstat contra hoc, quod allegatur; videlicet, dari in nostro Ordine statutum generale decernens, quod mortuo, vel vacante officio Prælati, mandatum prius ipsius Prælati sit irritum, & vires non habeat. Quando verò illa professio facta est in secundo conuentu, cessauerat officium dicti Commissarij generalis, & proinde cessauerat officium, & mandata illius, videlicet inhibito de non admittendo illo Nouitio ad professionem. Non obstat, quia illud statutum, quod cessante Prælato cesserit illius mandatum, intelligitur de mandato simplici, & ordinario, non verò de sententia lata à Prælato præcedente. Si enim intelligeretur de sententia lata à Prælato præcedente, pareret inquietudinem, & turbationem magnam in

Reli

Religione, vt constat. At mandatum, seu inhibiti-
 Commissarij generalis præcedentis, non fuit manda-
 tum purum, sed fuit sententia lata cum cognitione
 causæ; accessit enim ad primum conuentum, vnde
 Nouitius fuerat expulsus, & per modum visitationis
 cepit informationem casus: & iterum audiuit suffra-
 gia singulorum Religiosorum, & tunc fecit prædi-
 ctam inhibitionem Guardiano secundi conuentus, &
 Prouinciali, ne prædictum Nouitium ad professio-
 nem admitterent: quod in rigore, & in substantia
 fuit ferre sententiam, & non simplex mandatum. Et
 quod dicta inhibitiō Commissarij, fuerit sententia,
 patet ex definitione sententiæ posita à Cuiacio Iu-
 rista, quam refert Camillus Borellus *tomo 2. decis. tit.*
30. num. 14. quæ sic habet: *Sententia est decisio iudicis*
super re controuersa habens rei absolutionem, vel condem-
nationem; quod contigit in hoc casu; præcessit eni-
 cognitio causæ, & secunda receptio suffragiorum;
 & tunc declarauit Commissarius primam expulsio-
 nem à priori conuentu fuisse validam, & iustam: &
 super hoc fundatus fecit prædictam inhibitionem.
 Adde quod præcessit querela primi conuentus exhi-
 bita Commissario quæ habuit vim accusationis ne-
 cessariæ ad proferendam sententiam.

17 In quarto præmisso, seu fundamento supra po-
 sito continetur *Quarta* nullitas istius professionis. Ha-
 bet enim Religio statutum generale, quo cauetur vt si
 Religiosus appellauerit, Prælatus ad quem appellaue-
 rit non procedat in casu, nisi prius audito Prælato,
 à quo fuit appellatum, sibi que transmittatur proces-
 sus à dicto Prælato: & si hoc non præmisso Prælatus,
 ad quem appellatur, processerit ad causæ cognitio-
 nem, vel aliquid decernat, omnia inde secuta irrita

censeantur, & nulla. Quod statutum desumptum est clare ex iure Canonico, *cap. Ecclesia lib. 2. de elect.* Et clarius in *cap. venerabilibus, de sententia excommunic. in 6.* in quo cum quidam appellasset ab Episcopo ad Archiepiscopum, respondit Papa his verbis: *Quod conueniendus est ipse suffraganeus* (id est, Episcopus, à quo appellauit) *coram Archiepiscopo, quia ipsius interest defendere causam suam.* Idem ferè iisdem verbis decernit Concilium Trident. *sess. 24. cap. 20. de reform.* vbi postquam docuit quomodo, & quando appellari debeat, ab Episcopo ad Archiepiscopum, & quod iudex ad quem appellatur non cognoscat de causa, nisi prius audito iudice, à quo appellatur, ponit Concilium hæc verba: *Eodem Episcopo prius admonito: Et si quid ei pro causa instructione videbitur, possit iudici appellationis significare.* Et sunt alij multi textus, & Doctores affirmantes. At in isto casu Nouitius appellauit à Guardiano primi conuentus, & à primo conuentu; & Prouincialis ad quem appellauit, non audiuit Guardianum primi conuentus, neque ipsum conuentum, vt possent significare causas, ob quas expulsus fuit Nouitius, sed conuentu, & Guardiano non auditis, Nouitium expulsum recepit ad habitum, & professionem in secundo conuentu: ergo talis receptio, & professio fuerunt irritæ, utpote factæ contra tot iura, & contra clarum citatum statutum generale Ordinis. Ad idem facit lex istius regni *lib. 3. ord. tit. 68.* vbi traditur forma appellationis, & mandatur vt coram iudice, ad quem appellatur, compareat appellans, & pars appellata, & vterque exhibeat causas appellationis, & causas defensionis. In hoc verò casu Guardianus, & conuentus prior, à quibus fuit appellatum, non potuerunt offerre causas suæ defensionis, quia
non

non fuerunt citati, neque auditi à Prouinciali cum Nouitium ad habitum secunda vice recepit, neque quando illum ad professionem admisit.

18 Neque obstat quod Prouincialis pro se adducit, quod scilicet ipse antequam reciperet Nouitium ad habitum, & professionem in secundo conuentu inquisiuit, ac recepit testes aliquos in secreto, de quorum testimoniis sibi constitit in receptione suffragiorum primi conuentus interuenisse subornationem, & conspirationem contra Nouitium, & alia quæ pro se illi Nouitius allegauit: ob quæ testimonia Prouincialis ad habitum, & professionem Nouitium admisit. Non, inquam, obstat, quia hoc non fuit audire Guardianum, & primum conuentum à quibus fuit appellatum, sed audire Nouitium appellantem, & causas illius solius, non verò causas ipsius primi conuentus. Oportuit verò iuxta tot iura citata, audire conuentum, à quo fuit appellatum: & ad hoc necessarium erat vt Prouincialis accederet ad primum conuentum, & in forma visitationis de casu inquireret, sicut ego vidi fieri in hac prouincia in casu omnino simili, qui talis fuit. In quodam conuentu denegata fuit maior pars suffragiorum cuidam Nouitio ad professionem: Guardianus contentus inhærens supracitato statuto Nouitium expulit à cōuentu. Nouitius expulsus adiuit prælatum generalem Ordinis per modum querelæ, & appellationis. Hic Prælatus commisit causam cuidam Religioso graui eiusdem prouinciæ, mandans vt adiret conuentum, à quo Nouitius fuit expulsus, vt conuentum visitaret, & à singulis inquireret de moribus, & vita Nouitij, & causas cur illi suffragia dederint, vel negauerint; & ita factum est. Et iuxta resultantia ex visitatione Prælati generalis tunc disposuit. Et



hoc fuit audire conuentum, & Guardianum, à quo Nouitius fuerat expulsus. Quod idem debuit fieri in isto casu, si Prouincialis volebat iura, & statuta seruare.

Vidimus huc vsque quatuor causas nullitatis istius professionis adeò claras, & efficaces, vt vna tantùm illarum sufficeret ad prædictam professionem annullandam. Nunc addo paucas alias, quæ licet non sint ita euidenter, nimis tamen coadiuuant ad dictam professionem infirmendam.

19 *Quinta* ergo ratio contra professionem, est, quod cum Commissarius ad Prouincialem scriberet statim postquam Nouitium expulsus recepit ad habitum in secundo conuentu, & à Prouinciali quæreret causas cur illum sic expulsus receperit: Prouincialis respondit se desistere ab illa causa. Et quamuis assignauerit aliquas causas admissionis, dixit nihilominus se à causa desistere, illique renunciare. Ita secretarius Commissarij scripto testimonio firmavit. Quâ desistentiâ, & renunciatione non obstante, postea idem Prouincialis, vacante officio Commissarij, & Nouitio manente extra conuentum sine habitu nostri Ordinis, Prouincialis eundem Nouitium tertio recepit ad habitum, illumque admisit ad professionem. Constat autem quod postquam aliquis per scripturam publicam fecit desistentiam, & renunciationem circa aliquod opus, vel actum, non potest postea validè ad prædictum actum redire sine nouo titulo, vel iurisdictione superioris. Ita probat Nauarrus in cap. *Si quando, de Rescriptis*, num. 23. in *Aetuario*, ponens hæc verba. *Per renuntiationem perditur titulus, cap. quam periculosum 7. q. 1. & l. quæritur §. Si venditur, ff. de Edific. &c.* At in hoc casu postquam Prouincialis renunciaisset causæ;

causæ, admisit prædictum Nouitium ad habitum, & professionem, ac proinde admisit illum non habens iurisdictionem, quam abdicauerat à se per renunciationem, & amiserat per inhibitionem Commissarij, durantem etiam post vacationem officij illius, vt probatum manet in præcedentibus.

10 *Sexta* ratio est, quia quando Nouitius fecit professionem in secundo conuentu, iam non habebat licentiam Prælati suæ primæ Religionis ad professionem emittendam. Quod probatur, quia in illis quinque mensibus, per quos Nouitius mansit extra nostrum Ordinem, & sine habitu nostro in domibus secularibus, Prælatus illius Nouitij prioris Religionis fecit diligentiam ad prædictum Nouitium comprehendendum, & ad suam priorem Religionem reducendum. Bis enim Prouincialis illius primæ Religionis, mandauit illum quærere, & comprehendere in duabus ciuitatibus, maximè in vna, in qua Nouitius manebat absconditus in domo cuiusdam viri nobilis, qui Nouitium abscondit, noluit illum tradere suæ primæ Religioni, quod ægrè tulit Prælatus suæ primæ Religionis, vt constitit ex propria epistola ipsius. Ex quibus duabus diligentis factis à Prælato primæ Religionis circa comprehensionem illius post expulsionem à secundo conuentu nostro, clarè constat Prælatum suæ primæ Religionis reuocasse licentiam, quam illi dederat ad profitendum in nostro Ordine. Nam, sicut suprà diximus ex Azorio, renunciatio potest fieri absque verbis, sed cum facto contrario. Quod si Prælatus primæ Religionis per illos duos actus perquirendi, & comprehendendi illum, reuocauit illi licentiam datam ad profitendum in nostra Religione, non potuit Nouitius validam professionem emittere

in nostro Ordine absque licentia Prælati suæ primæ Religionis : nam sua prima Religio habet priuilegium Papæ , ne ullus Religiosus illius transeat ad aliam Religionem sine licentia sui Generalis, vel Prouincialis, cui Generalis id commiserit. Quod autem mandatum, siue licentia reuocetur solo facto contrario absque verbis, probatur exemplo Testatoris conditoris testamentum. Si enim quis faciat prius vnum testamentum, & postea in fine vitæ faciat aliud secundum testamentum contrarium primo, per illud testamentum secundum contrarium censetur reuocari prius testamentum, etiamsi testator in secundo testamento non exprimat verbis, quod per illud secundum reuocat primum : ita Doctores communiter in materia de testamentis, maxime Iulius Clarus *lib. 3. sententiarum*, §. *Testamentum*, *quæst. 99. num. 1.* Clarè ergo constat Prælatum primæ Religionis facto contrario, bis quærendo Nouitium ad reducendum illum ad suam primam Religionem, reuocasse licentiam, quam illi dederat ad profitendum in nostra.

21. *Septima ratio esse potest, quoniam suffragia ad professionem Nouitij in secundo conuentu, possunt dici dubia, & suspecta : primò quia Guardianus conuentus secundi erat valde affectus, & amicus Prouincialis, & alterius grauis Religiosi, qui nouitium mordicè defendebant : & ita Guardianus prædictus facile poterat inducere suos subditos paruoris conuentus ad danda suffragia prædicto Nouitio. Secundò principaliter id probatur, quia Nouitius in secundo conuentu, in quo professionem emisit, non mansit ante professionem vno mense integro, per quod breue tempus non poterant Religiosi illius conuentus perfectam lumere notitiâ, & informationem naturæ, morum,*

rum, & conuersationis illius, sicut habuit primus conuentus, à quo fuit expulsus, in quo moratus est per menses vndecim; & in quo viuebant Religiosi seniores, doctiores, & magis zelatores boni communis Religionis, quam erant Religiosi secundi conuentus, qui illi ad professionem suffragia dederunt. Constat autem ex Doctoribus communiter, quod Concilium Tridentinum assignans Nouitium annum integrum nouitiatus, habuit respectum, & intentum, vt per annum integrum posset Nouitius experiri asperitates vitæ Religiosæ: & per eundem annum posset Religio experiri mores Nouitij, & conditiones illius. Quos mores, & consuetudines non potuit experiri conuentus secundus, in quo iste Nouitius non mansit integro mense, vt patet ex supradictis, & ante vnum mensem experientiæ admisit illum conuentus secundus post quinque menses, quibus mansit extra conuentum sine habitu, & sine obedientia Prælatorum. Ex quibus constat suffragia denegata Nouitio in primo conuentu fuisse plura numero, & grauiorum Religiosorum in ætate, litteris, & zelo, quam fuerint suffragia illi data in secundo conuentu, qui mores illius per paruum tempus infra mensem fuit expertus. Quantum verò attendenda sit qualitas eligentium, seu suffragantium, videatur capitulum *Ecclesia, de electione*, il 2. vbi Papa cassauit electionem factam à septemdecim, & approbavit electionem factam à quatuordecim, eo quod illi quatuordecim suffragatores erant seniores, & concurrebant in illis potiores qualitates; & in nostro casu suffragia ad professionem fuerunt plura numero, vtpote fere centum, & Religiosorum, qui erant doctiores, seniores, & habebant experientiam Nouitij per menses vndecim: suffragia

verò ad eandem professionem in secundo conuentu fuerunt pauciora numero, videlicet quinquaginta. Et suffragati sunt in illa Religiosi minus docti, minus senes, minus zelatores: & qui Nouitij qualitates, nec per vnum mensem explorauerant. Finis autem Concilij Tridentini assignantis annum integrum ad nouitiatum est, vt Religio habeat tempus ad explorandos Nouitij mores, & qualitates. Consonat cum hoc statutum generale Ordinis titulo de Nouitiis, quo præcipitur, vt Nouitius ad professionem non admittatur, nisi ex tribus partibus conuentus habeat pro se duas partes suffragiorum. Si verò contingat quod habeat pro se maiorem partem communitatis, vtpote vnum suffragium supra mediam communitatem, & non habeat duas partes suffragiorum totius conuentus, tunc Prælatus considerato zelo, & qualitatibus suffragiorum, decernat secundum Deum quod melius viderit expedire. Ex quibus omnibus colligitur in hoc casu standum esse suffragiis primi conuentus receptis ad professionem; non verò suffragiis secundi conuentus receptis ad eandem professionem. Et proinde professionem factam cum suffragiis secundi conuentus fuisse nullam, & pro nulla declarandam, sicut de facto declarata fuit.

*Respondetur rationibus pro parte
Nouitij adductis.*

22 **P**ostquam Nouitius in secundo conuentu professionem emisit cum prædictis circumstantiis, primus conuentus, à quo primò fuit expulsus per modum appellationis, recurrit ad Prælatum generalem Ordinis, qui statim commisit causam cuidam alteri

alteri Prouincialis eiusdem Ordinis, illum constituens iudicem delegatum in causa, cum potestate plena inquirendi, & sententiam ferendi. Prouincialis delegatus venit ad primum conuentum, & coepit de casu inquirere. Primus conuentus pro se constituit procurationem in causa contra Nouitium, quemdam Religiosum grauem eiusdem conuentus primi. Prouincialis delegatus citauit, & fecit comparere coram se Nouitium taliter iam professum, illique exhibuit articulos resultantes ex processu, mandans vt ad propositos articulos responderet in ordine ad sententiam proferendam. Nouitius pro se multa friuola respondit, quæ ferè omnia iam impugnata manent in supradictis sufficientissimè. Ne tamen aliquid omitteremus in hoc casu, ad singula singillatim sic respondemus.

23 Allegauit ergo primò quod procurator primi conuentus contra se assignatus, non poterat esse procurator in ista causa, eo quod erat incola primi conuentus, & suffragium tulerat, quando in primo conuentu recepta sunt priora suffragia ad suam professionem: sic enim maneret testis, & procurator simul, quod in iure non permittitur. Dico primò quod per hanc tam friuolam exceptionem, coniici potest quàm friuolæ aliæ illius obiectiones sint. Respondeo secundo procuratorem istum benè potuisse exercere officium procuratoris, non obstante quod suffragium dederit in prima receptione suffragiorum primi conuentus. Nam ferre suffragium in electione, neque est esse iudicem, neque testem, vt patet. Nam ferens suffragium non profert sententiam, neque audit partes. Item dans suffragium non est testis, cum non recipiat iuramentum, quod est de essentia testis; quid ergo impedit

impedit quò minus ferens suffragium possit esse procurator in causa, in qua dedit suffragium? Prohibet quidem ius ne aliquis possit esse simul iudex, & testis: sed hic procurator neque fuit iudex, neque testis. Addo quod etiam si iste procurator esset clarus inimicus Nouitij, non poterat illum repellere ratione inimicitiae. Nam accusatori non potest opponi exceptio inimicitiae, cum ut plurimum accusator non sit amicus accusati, & accusator non sit testis, neque iudex. Et eadem de causa non poterit opponi procuratori accusatoris, quod sit inimicus recusantis. Facit ad hoc optimè quod tradit Mascardus *tom. 2. de probation. concl. 951. num. 9.* ubi ait, quod ille qui fuit iudex in vna causa, potest, finitâ causâ, per appellationem, esse procurator in eadem causa, vel Aduocatus post appellationem. Et citat Mascardus quandam decisionem Rotæ, & Speculatorem, idem affirmantes.

24 Obiicit secundò Nouitius, quod in receptione suffragiorum primi conuentus, à quo fuit expulsus, inuentum est vnum suffragium crescens supra numerum suffragantium, per quod videtur fuisse nulla, vel suspecta talis electio, seu suffragiorum receptio. Ad hanc obiectionem iam supra responsum est *num. 7.* ubi clarè probauimus per tale suffragium excrescens non fuisse nullam talem suffragiorum receptionem. Quibus nunc addo, quod ad tollendum illud dubium Commissarius generalis, qui tunc erat, venit ad eundem primum conuentum, & in propria persona, secundâ vice suffragia recepit exactissimè sine eo quod aliquod suffragium cresceret, vel deficeret. Imò tunc plura suffragia sunt denegata Nouitio, quàm antea in prima receptione suffragiorum facta per Guardia-

num

num eiusdem primi conuentus. Et sic non habet locum dicta obiectio de suffragio excreſcente.

25 Tertiò obiiicit quod in primo conuentu recepta ſunt aliqua ſuffragia ſecretò in cubiculis aliquorum Religioſorum, qui non deſcenderunt ad capitulum in clauſtro, quæ ſuffragia videntur ſuſpecta. Reſpondetur id nihil obſtare, eſt enim conſuetudo antiqua Religionis vt in recipiendis ſuffragiis Nouitiorum præſes capituli mittat duos, vel tres Religioſos ſcrutatores ad Religioſos ægrotantes in valerudinario, & ad ſenes graues, qui non ſolent deſcendere ad capitulum, & ab illis vota recipiant pro Nouitio, cum magno ſecreto: & illa ſic afferentes mittunt in urnam ſuffragiorum. Cùm enim prædicti infirmi, & ſenes habeant ſuffragium in illa ſuffragatione, & non poſſint venire ad capitulum, neceſſariò illorum vota ſunt audienda modo prædicto. Pro quo etiam facit alia conſuetudo Religionis, per quam ſi aliquis Religioſus paulò ante receptionem ſuffragiorum pro Nouitio exit à conuentu non reuerſurus tempore, quo ſuffragia recipienda ſunt, prædictus Religioſus exiens relinquit ſuum ſuffragium ſcriptum in ſchedula, quod poſtea connumeratur cum cæteris ſuffragiis conuentus, & ita prædictus Religioſus dat ſuffragium in abſentia. Imò eſt maius, quod dicitur in cap. *Quia propter, de elect.* videlicet quod poteſt vnus elector abſens, qui non venit ad electionem, committere alteri electori præſenti in tali electione, vt pro ſe abſente ferat ſuffragium in dicta electione, & quod tale ſuffragium erit validum. Quod à fortiori valebit in ſuffragiis receptis pro Nouitio datis à Religioſis ægrotis, vel à ſenibus eiusdem conuentus, qui ſunt in valerudinario, vel cubiculis eiusdem conuentus, &
non

non possunt ad capitulum claustrum descendere commodè.

26 Quartò obiicit, quod in receptione suffragiorum primi conuentus interuenit subornatio, & ferè conspiratio contra se. Ad hanc obiectionem iam supra sufficienter respondimus *num. 8.*

27 Quintò obiicit, quod statutum nostri Ordinis supracitatum decernens vt Nouitius, cui defuerit aliquod suffragium infra medietatem conuentus, statim expellatur absque recursum ad superiorem, per hæc verba statutum non prohibere appellationem: possunt enim Religiosi etiam appellare iuxta Bullam Gregorij XIII. quam citat. Ad hoc iam responsum est supra *num. 9.* Et circa illud quod ibi dictum est posse Religionem facere statutum, circa res suas, per quod prohibeat appellationem; addi potest hoc exemplum. Si aliquis possideat rem clarè alienam, sed bona fide, idque per tempus sufficiens ad legitimam præscriptionem: transacto illo tempore, non datur vero domino rei illius actio, vel appellatio contra dictum præscribentem, vt notum est in iure, & in praxi. Et interdicitur talis appellatio propter bonum commune, ne quotidie moueantur lites ad vindicandas res antiquissimas. Eodem modo potest Religio condere statutum circa res suas, per quod interdicit appellationem ob commune bonum Religionis, cum cæteris quæ dixi citato supra *num. 9.* Bulla verò Gregorij XIII. quam citat, non est contra nos, quia in illa Papa concedit, vt Religiosi possint appellare à sententia lata per iudicem cum processu, & à iudice grauante iniuste. In illa verò receptione suffragiorum primi conuentus non interuenit processus, neque factum est illi grauamen iniustum, quia executio legis

gis neminem grauat, cum cæteris dictis eodem *num. 9.* Addo quod citata Bulla Gregorij XIII. non prohibet reiici appellationem friuolam Religiosorum, quæ de iure communi Canonico potest reiici, vt suppono clarum in iure communi canonico, & ciuili. Et ista appellatio fuit friuola, vt patet ex supradictis à nobis, & ex infra dicendis. Addo ex Suarez *tom. 4. de Relig. lib. 2. de ingressu Societatis cap. 2. num. 4. & seqq.* vbi quærit, an quoddam statutum suæ Religionis, quod non videtur conforme iuri communi, sit licitum? Respondet, prædictum statutum factum fuisse à viris Religiosis, & doctissimis, & esse in praxi: neque credendum est tot, ac tantos viros errasse in statuto condendo, & seruando. Et addit Suarez, quod Papa Paulus III. confirmauit constitutiones suæ Societatis, *hactenus factas, & faciendas* in posterum, dicens quod prædicta statuta suæ Societatis facienda, eo ipso *Authoritate Apostolica confirmata censeantur.* Quo priuilegio nostra Religio per communicationem gaudet. Et proinde dico, prædictum nostrum statutum de expellendo sic Nouitio absque recurſu ad superiorem, factum esse in capitulo generali, & seruatum in praxi à viris valde doctis, & Religiosis, quos non est credendum errasse. Et præterea dictum statutum confirmatum esse per dictum priuilegium Pauli III. Et ad idem intentum videatur Suarez citato loco *n. 5. fol. 433. col. 1.* vbi ponit alia ad hoc intentum conducentia.

28 Sexto obiicit, quod ille in anno nouitiatus primi conuentus vixit laudabiliter. Ad hoc respondetur, quod habuit defectus sufficientes ad suffragia illi deneganda, eo modo, quo suprà dixi *num. 8.* & constat ex visitatione primi conuentus facta per secundum Prouincialem delegatum in hac causa.

29 Septimò obiicit, quod Guardianus primi conuentus non poterat illum expoliare habitu, eo quod appellauerat ad Prouincialem, qui poterat acceptare appellationem à Guardiano. Et addit quod eodem modo appellauit in secundo conuentu, quando ab illo fuit expulsus de mandato Commissarij. Ad primum horum responsum manet suprà numero 9. vbi abundè probaui potuisse, ac debuisse Guardianum primi conuentus post negationem suffragiorum, illum à conuentu expellere, erat enim Guardianus merus executor legis, & à mero executore, siue à lege non appellatur, vt copiosius dictum est citato num. 9. Ad secundum dico multò minùs potuisse appellare in secundo conuentu, quando Commissarius generalis eum iussit expelli: nam Prouincialis, qui illum primò restituerat ad habitum, inualidè restituit, cum non audiuerit primum conuentum, à quo appellauit, sed eo non audito processit in causa, & habitum restituit: quæ omnia inualida fuerunt non audito conuentu, & Guardiano, à quo appellauit, iuxta dicta suprà num. 17. & seqq.

30 Octauò obiicit, quod quando in primo conuentu Guardianus, & Discreti illum expulerunt à conuentu, ipse petiit ab illis, vt sibi darent scripto testimonium suæ appellationis, & illi dare noluerunt; ac proinde Prouincialem adiuit. Ad hoc respondetur primò, oportere vt huius petitionis denegatæ ille testes adducat: nam ipsi soli non est credendum in propria causa. Secundò respondetur, quòd, supposito quod Guardianus, & Discreti primi conuentus non tenebantur acceptare appellationem supradictam, propter citatum recursum prohibitum in sæpius citato statuto, non tenebantur etiam dare testimonium appellationis

pellationis non acceptatæ. Respondetur tertio hoc testimonium Guardiani, & Discretorum circa appellationem negatum, illi non nocuisse, cum Prouincialis illius appellationem acceptauerit absque illo testimonio, illumque in statu pristino reposuerit. Neque item denegatio illius testimonij, circa appellationem facta à primo Guardiano, & Discretis, fecit, vt præcedens habitus priuatio, & expulsio fuerit iniusta, & inualida: iam enim prius facta fuerat secundum statutum & legem, & proinde validè & iustè. Respondetur quarto ex Quaranta *in sua sum. Bullarij*, verbo, *Archiepiscopi*: vbi citat quandam declarationem Cardinalium, dicentem, quod si appellans asserat sententiam, aut appellationis exemplum culpa iudicis, vel actuarij habere non potuisse, non ideo recipienda erit appellatio: sed iniungendum est illis, ad quos spectat, vt appellationis exemplum tradatur. Quod à Prouinciali non fuit obseruatum.

31 Nonò dicit Nouitius, quod Prouincialis non tenebatur in prima appellatione à primo conuentu audire Guardianum, & Discretos eiusdem conuentus, eo quod iam functi fuerant suo officio iudicandi in illa causa. Ridicula sanè responsio. Nam licet illorum iurisdictio cessauit, ita vt non possent amplius esse iudices in illa causa expulsionis: numquid cessauit ius Canonicum, & Tridentinum, & statutum Ordinis, clarè disponentia vt iudex ad quem appellatur, teneatur audire iudicem à quo, & processum illius expectare? sicut fusè multis probatum est suprà *num. 9.* videantur ibidem dicta. Et quantum ad id quod dicit, statutum Generale Ordinis *tit. de Nouitijs*, committere Prouinciali, vt quando Nouitio defuerint suffragia ad professionem, faciat secundum Deum,

C quod

quod melius videbitur expedire : malè citat , & malè intelligit statutum. Nam quando ibi statutum id committit arbitrio Prouincialis , clarè loquitur quando Nouitius pro se non habuit , ex tribus partibus communitatis duas partes : sed habuit aliqua suffragia ultra dimidiam partem communitatis : tunc enim committitur arbitrio Prouincialis ad quem mandatur in illo casu recurri , vt faciat quod viderit secundum Deum expedire. Si verò Nouitius pro se non hubeat aliquod suffragium ultra dimidium communitatis , tunc statutum id non committit arbitrio Prouincialis , sed expressè iubet illum excludi à conuentu , absque recurso ad Prouincialem.

32 Decimò allegat pro se quod professio sua in secundo conuentu fuit valida, eo quod fuerat iam restitutus ad habitum per Prouincialem , & continuabat nouitiatum in secundo conuentu de mandato illius. Ad hoc patet responsio ex dictis *in proximo numero precedente, & in num. 9.* Nam Prouincialis illum secundò admittens ad habitum , non audiuit conuentum primum à quo appellauit ; & proinde acta sequentia fuerunt nulla iuxta suprà citata. Professio autem facta in secundo conuentu fuit nulla, quia facta fuit stante inhibitione factà à Commissario generali , vt fusè manet probatum suprà *num. 15. & sequentibus.* Et quoniam pro se sæpius Nouitius allegat quod conuentus , à quo appellauit, tenebatur mittere processum intra 30. dies ad Prouincialem. Responderetur primò hoc locum habere potuisse quando appellatio foret acceptata , & non esset friuola. Hæc autem appellatio fuit friuola , & reiecta , vt patet ex dictis. Secundò responderetur Prouincialem id non expectasse , quia intra quindecim dies Nouitio habitum restituit in secundo conuentu,

uentu, non expectans processum primi conuentus. Tertiò dico quod licet primus conuentus non miserit processum, tenebatur Prouincialis illum petere, & sine illo non procedere in causa, vt clarè constat ex capitulo *Venerabilibus*, & Tridentino supra citatis.

33 Vndecimò dicit : quod quando Commissarius generalis misit inhibitoriam Prouinciali, ne illum reciperet ad habitum, iam ille erat vestitus habitu, & sic iam inhibitoria non habebat locum. Respondetur, quod si per hoc allegat possessionem habitus, mala possessio non est possessio, vt dicitur in iure, sed intrusio. Hæc verò secunda habitus restitutio fuit facta contra statutum Ordinis, & contra iura supra citata dicentia, quod iudex appellationis nihil innouet antequam audiat iudicem à quo. Addo, quod si hæc eius responsio esset vera, probaret etiam quod prædictus Commissarius non posset postea illum à secundo conuentu expellere, eo quod iam esset habitu Religionis indutus, quod est falsum.

34 Duodecimò ait, quod quando dictus Commissarius iussit illum expelli à secundo conuentu, iam non erat iudex causæ, quia iam fecerat desistentiam, dicens se ab illa causa desistere. Iudex verò per desistentiam, seu renunciationem, desinit esse iudex. Respondetur, dictum Commissarium nunquam destitisse à causa, vt constat ex testimonio scripto illustrissimi Domini Collectoris, quod seruatur in processu : in quo prædictus Dominus fidem facit, quod prædictus Pater Commissarius à causa nunquam destitit : imò potius eundem Dominum dicto Commissario mandasse vt in causa procederet.

35 Decimotertiò ait, quod Pater Commissarius cum iuit ad conuentum primum pro sumenda informa-

tionem, & recipiendis secundis suffragiis, nec dixisse in capitulo se ad id habuisse auctoritatem Domini Collectoris, & proinde inualidè processisse. Friuola omnino responsio. Nam dictus Commissarius ex officio id poterat abundè facere: erat enim delegatus ad vniuersitatem caufarum per Patrem Generalem constitutus in toto regno, & præterea fuerat ad id requisitus à primo conuentu, ac proinde quoad hoc non indigebat auctoritate Domini Collectoris, ex eo maxime in ista causa non fuerat appellatum ad dominum Collectorem, nec proinde causa ad eum fuerat deuoluta, vt posset Commissarius cum ipsius licentia in causa se intromittere. Quod insuper addit, debuisse prædictum Commissarium prius monere, & audire Prouincialem, antequam dictus Commissarius in primo conuentu suffragia secunda, & informationem reciperet. Respondetur, quod Commissarius hoc non omisit: imò prius Prouincialem monuit vt sibi causas remitteret, ob quas Nouitium expulsus iuxta Ordinis statuta, secundò ad habitum admiserit, vt constat ex processu. Imò facit contra Nouitium, quod Prouincialis renunciauerat causæ, dicens quod illam remittebat ad Commissarium: & dictus Commissarius acceptauit desistentiam, & renunciationem Prouincialis, vt patet ex eodem processu: & ex consequenti non poterat postea Prouincialis procedere in causa cui renunciauerat: nec proinde potuit postea prædictum Nouitium ad professionem admittere in secundo conuentu, sicut admisit post causam à se renunciata.

36 Decimoquartò addit quod est consuetudo Religionis, quod quando suffragia pro Nouitiis recipiuntur, ponitur vna separata extra capitulum, ad quam accedentes

accedentes Religiosi iniiciunt fabam nigram, vel albam, & sic suffragantur liberè secundum suum arbitrium. At Commissarius quando recepit secunda suffragia in primo conuentu, posuit ante se urnam, in qua iniiciendæ essent fabæ, & dabat unicuique Religioso in propria manu vnam fabam nigram, & alteram albam, vt ex illis iniiceret in urnam, quam vellet, & alteram reponeret coram se in altera urna non approbatiua: in quo videtur & electionem publicasse, & ferè libertatem suffragandi ademisse. Respondetur neutrum illorum ibi interuenisse. Non primum, quia ex eo Religiosi in capitulo non videbant pro quo suffragium dabatur, neque ipse Commissarius id sciebat, & proinde electio non publicatur, seu vota suffragantium non publicantur. Addo quod ista receptio suffragiorum non est electio vera, propriè loquendo, vt debeat esse secreta, ita quod nomina suffragantium non publicentur, quin potius consuetudo fuit antiqua Religionis, vt Nouitiorum vota sine fabis reciperentur; sed dicebat propriâ, & altâ voce quilibet Religiosus; *Do illi suffragium*, vel *Nego illi suffragium*. Non item per id quod fecit Commissarius vim inferebat libertati suffragandi: quia non dedit vnam tantum fabam cuilibet, sed duas, albam, & nigram, vt quam vellet iniiceret. Sed vsus fuit illa exacta cautela, ne posset in illa votorum receptione excrescere aliquod votum, sicut contigerat in prima suffragiorum receptione.

37 Decimoquintò allegat se annum nouitiatus non interpolasse per illos quinque menses, quos mansit extra secundum conuentum. Rationem assignat, quia mansit ibi sub obedientia Prælari, qui erat Prouincialis: & quod ibi per quinque menses agebat suam causam, & negotium. Ad primum respondetur, quod

si per illos quinque menses manebat sub beneplacito Prouincialis : at manebat sine obedientia, imò contra obedientiam Commissarij generalis , qui illum ab Ordine expulerat. Item mansit sine habitu nostræ Religionis, cum sit de essentia nouitiatus vt fiat sub obedientia superioris, & cum habitu Religionis, vt suprâ manet probatum *num. 14.* ex multis Doctoribus : quibus adde Suarez *tomo 3. de Relig. lib. 5. de ingressu Ordinis cap. 13. num. 3.* vbi citat Gloss. Turrecrem. Syluest. & Angelum, & ait colligi ex cap. *statuimus*, de regul. Idem tenet Lessius *lib. 2. de statu Religioso dub. 7. §. Tercio hanc*, & Sanchez *lib. 5. Decalog. cap. 4.* vbi citat alios *num. 27.* Rodrig. *tomo 3. qq. q. 15. art. 9.* & Rodriguez iunior in *suis resolutionibus resol. 101. num. 43.* Ad id verò quod ait quod per illos quinque menses extra secundum conuentum agebat suum negotium, & prosequabatur causam suam. Respondetur primò quod in quinque mensibus poterat adire Romam, & in quinque diebus poterat adire Collectorem huius Regni : & ipse neque à Collectore, neque à Summo Pontifice impetrauit recursum. Imò neque hodie post nouem menses ab vltima expulsionione Ordinis facta per sententiam Prouincialis, prosecutus est appellationem; neque impetrauit aliquem recursum Apostolicum. Quæ sunt clara signa appellationis desertæ. Sicut tradit Mascardus *tom. 1. concl. 117.* cum aliis ibi : vbi dicit appellationem censerì desertam quando per appellan-tem stetit, quòd litis certamina non terminentur. Quod item ait appellationem suspendere omnia, & reponere appellan-tem in statu antiquo, se verò appellasse ab expulsionione primi, & secundi conuentus. Respondetur quod attinet ad appellationem quando fuit expulsus à primo conuentu, iam manet responsum su-
prâ

prà num. 9. vbi vidimus illam appellationem fuisse nullam. Quod attinet ad secundam appellationem, quam fecit expulsus à secundo conuentu, dico, quod hanc appellationem non poterat illi acceptare Prouincialis, cum esset inferior Commissario generali: inferior enim non potest acceptare appellationem factam à suo superiore; neque ipse Nouitius vltimò citatus à Prouinciali delegato ostendit quismam iudex superior acceptauerit suam secundam appellationem, neque quomodo illam fuerit prosecutus per quinque menses. Adde quod appellatio in secunda expulsionem à secundo conuentu, fuit omnino nulla, eo quod iam tunc non erat Nouitius verus. Nam Prouincialis cum illum secundò recepit ad habitum in secundo conuentu, id non potuit validè facere non audito Guardiano primi conuentus cum suis Religiosis, vt *suprà* manet probatum *num. 17.*

32 Decimosextò respondet litem hanc iam fuisse iudicatam, & terminatam à Prouinciali prouinciæ, qui professionem approbavit, & est Prælatus ordinarius, & sic negotium transisse in rem iudicatam. Nihil minus. Nam conuentus primus, à quo fuit expulsus, statim appellauit à Prouinciali, cum restituit habitum Nouitio secundâ vice in secundo conuentu, & appellauit ad Commissarium generalem Prælatum superiorem legitimum, qui acceptauit appellationem, & processit in causa. Item post factam professionem in secundo conuentu, primus conuentus statim recurrit ad Generalem Ordinis, qui acceptauit appellationem, & dedit iudicem delegatum in causa. Quo modo ergo potuit transire in rem iudicatam resolutio litis, quam dicunt terminatam fuisse à Prouinciali à quo bis fuit appellatum iustè, & validè, & appellationes

fuerunt receptæ? Nam vt sententia dicatur transire in rem iudicatam, necessarium est quod ab illa non appelletur, & quod non sit lata contra ius. A decisione verò Prouincialis fuit bis appellatum. Et præterea illa facta fuit contra tot iura suprâ citata à *num. 11. sum seqq.*

39 Decimoseptimò allegat Nouitius, quod Commissarius non potuit auocare ad se causam à prima instantia à Prouinciali, qui illi habitum restituerat in secundo conuentu inhiibendo ne dictum Nouitium ad habitum restitueret, iuxta Concilium Trident. *cap. 20. de reform.* prohibens ne superiores auocent causas in prima instantia. Respondetur, prædictum Commissarium post restitutionem habitus factam à Prouinciali in secundo conuentu, scripsisse ad Prouincialem, vt sibi mitteret causas, ob quas prædictum Nouitium ad habitum restituerit, vt patet ex dictis. Per hoc autem mandatum non auocauit Commissarius causam à prima instantia, sed solum accepit informationem negotij. Et postea visâ nullitate causarum, allatarum à Prouinciali, mandauit Nouitium ab Ordine expelli, & amplius ad habitum non admitti. Secundò respondetur, potuisse Commissarium absolute prohibere ne Prouincialis prædictum Nouitium ad habitum, & professionem admitteret, in quocumque statu Nouitius existeret. Probatur *ex cap. Exijt, de verb. significat. in 6.* vbi Papa Nicolaus III. concedit Generali Ordinis Minorum, vt possit restringere Prouincialibus iurisdictionem recipiendi Nouitios, ponens hæc verba: *Sicut viderit expedire.* Si ergo Generalis potest Prouinciali mandare ne recipiat Nouitium antequam Nouitius Religionem ingrediatur, à fortiore potuit Commissarius generalis mandare

Prouin

Prouinciali ne reciperet ad habitum illum qui fuerat expulsus à Religione ob defectus, & iuxta Ordinis statuta: sic enim Commissarius generalis videt expedire. Constat autem quod prædictus Commissarius generalis habebat in hoc regno totam Generalis iurisdictionem. Tertiò respondetur, & clariùs, quod Commissarius generalis in illa inhibitione non auocauit causam in prima instantia, sed post sententiam definitiuam Prouincialis. Cùm ergo Prouincialis Nouitium ad habitum restituerit post expulsionem à primo conuentu, & post appellationem, per hanc habitus restitutionem, Prouincialis in substantia sententiam definitiuam tulit in causa, quia in hac causa de nullo alio quærebat, nisi de spoliatione habitus facta à primo conuentu. Et ab hac sententia definitiua Prouincialis appellauit primus conuentus ad Commissarium. Et sic Commissarius non auocauit causam à prima instantia, sed à sententia Prouincialis, à quo à se fuerat appellatum.

40 Decimooctauò allegat, quod Prouincialis potest sequi partem minorem in suffragiis datam pro Nouitio & sic constare ex statuto Ordinis. Item ait, quod Prælatus solum tenetur audire suffragia conuentus pro Nouitio, sed non tenetur illa sequi, illisque non obstantibus in contrarium potest Nouitium ad professionem admittere: quia inquit suffragia pro Nouitio sunt solum consultiua, non verò decisiva. Ad horum primum dico in nostris statutis circa hoc solum dari statutum in titulo *de Nouitiorum votis*, §. *Si autem*, in quo decernitur, quod si Nouitius ex tribus partibus conuentus habuerit quidem suffragia ultra medietatem conuentus, sed non habuerit duas partes ex tribus partibus conuentus, in tali casu poterit Præ-

latus dispensare secundum Deum iuxta zelum, & qualitatem suffragatorum. Si verò maior pars conuentus pro Nouitio non fuerit suffragata, statim Nouitius à conuentu expellatur. Quod statutum nihil fauet Nouitio, sed repugnat; neque aliud statutum ostendetur in quo dicatur id quod prætendit Nouitius. Ad secundum, quod ait, Prælatus non teneri sequi suffragia data pro Nouitio, sed solùm audire; dico quod est dictum falsum & ferè temerarium in materia Religiosa. Teneatur enim Prælatus sequi suffragia conuentus pro Nouitio, vel contra Nouitium, ita si illum admittat ad professionem absque maiori parte suffragiorum conuentus, professio futura sit nulla. Scio aliquos paucos Doctores olim fuisse illius opinionis, quod Prælatus non teneretur sequi suffragia data pro Nouitiis, sed solùm audire. Huius opinionis fuit olim Rodriguez *in sum. verbo Nouicios, cap. 8. concl. 8.* sed de hac opinione ipse se retractat *tom. 3. qq. 9. 17. art. 3. & 7.* dicens quod si Prælatus non fuerit secutus maiorem partem suffragiorum conuentus in suffragiorum receptione, professio erit nulla. Idem tenet Sanchez *lib. 5. Decalogi cap. 4. n. 65. & n. 63.* citat Doctores pro se. Assignat ibi Sanchez hanc rationem: quia licet præses non teneatur sequi consilium consulentis, tenetur tamen sequi consilium collegæ, qui sibi datur vt collega. At suffragatores conuentus, non solum sunt consulentes cum Prælato, sed etiam collegæ cum illo, in suffragiis dandis. Hoc ipsum tenet expressè Nauar. *tom. consiliorum consilio 62. de Regular.* asserens non posse Generalem Ordinis facere professionem cuidam Nouitio sine consensu maioris partis conuentus. Idem tenet ipse Nauarrus *eodem titulo, vt lite pendente, consilio ultimo, num. 12.* vbi citat glossam *cap. final. de Regular.*

gular. in 6. quam glossam ibidem dicit recipi à septem graubus Canonistis, quorum nomina apud Nauarrum videri possunt. Denique hoc ipsum tenet nouissimè Suarez tom. 3. *de Religione lib. 5. de ingressu Religionis, cap. 10. num. 8.* vbi postquam probat, quod suffragia pro Nouitiis non solum sunt consultiua, sed decisiua, ponit hæc verba. *Imò rarò, vt existimo, inuenietur Religio, in qua receptio sit facienda cum suffragijs capituli, & illa recipiantur tantùm vt consultiua, & non etiam vt decisiua.* Sic ille. Addo quod opposita opinio esset causa multorum abusuum, & scandalorum. Ex illa namque sequeretur, quod si maior pars conuentus suffragia denegaret Nouitio inhabili, scandaloso, & defectuoso, posset nihilominus Prælati localis illum ad professionem admittere cum scandalo communi conuentus, & cum damno notabili Religionis; quod nullo modo est admittendum: nam scandalis obuiandum est, vt ait Sixtus in Extrauaganti *Graue nimis, de Reliq. & vener. Sanctorum.* Et absurda vitanda sunt, cap. *cum inter priorem, de except. & cap. dudum, de præbend.*

41 Vltimò facit contra Nouitium, quod licet ille appellauerit etiam à secunda expulsionem à secundo conuentu, hanc tamen appellationem non est prosecutus quinque menses, quos mansit extra secundum conuentum. Quod si respondeat, in Clementina, *sicut appellationem, de appellat.* concedi vnum annum appellanti ad prosequendam appellationem. Ad hoc respondemus primò, quod illa concessio anni ad prosequendam appellationem, non est substantia iuris, sed apex iuris, vt idem Papa Clemens V. declarauit in Clementina *sæpe contingit, de verb. signif.* dicens: *Inter apices iuris censentur dilationes.* Et proinde illa dilatio anni ad prosequendam appellationem, est apex iuris.

iuris. Constat verò ex priuilegio Bonifacij VIII. nostro Ordini concessò, quod nostra Religio in causis Religiosorum non tenetur seruare apices iuris, sed solam substantiam iuris. Nec potest esse intentio Sum. Pontificum, vt Religioso appellanti detur annus ad prosequendam appellationem: sequerentur enim inde multa inconuenientia, & inquietudo magna Religionum. Sufficiet ergo Religioso appellanti dare tempus sufficiens ad arbitrium boni viri ad prosequendam appellationem. Hic verò Nouitius habuit quinque menses post appellationem factam in secundo conuentu, in quibus abundè poterat adire Romam, vel habere recursum Sum. Pontificis: & nihil horum fecit. Videatur glossa in *Clementina citata, si appellationem*, in verbo, *Colligo*, vbi multa congerit dicens, quod si appellans non prosequatur appellationem, sententia præterita transit in rem iudicatam, ac si nunquam appellatum fuisset. Adde quod illa prima appellatio facta in secundo conuentu, cùm appellauit à Commissario generali illum expellente à secundo conuentu, fuit clarè friuola & nulla, ob multas causas iam supradictas, & proinde non indigebat tempore ad prosequendam appellationem.

Quia tandem Nouitius ait multos, & graues Doctores per scriptum testimonium approbasse suam professionem, ac dixisse fuisse validam. Dico non minores numero Doctores, nec minus doctos approbasse quod dicta professio fuit nulla, quorum Doctorum nomina citare omitto. Hoc vnum tantum aduerto, quod Doctores præcipui viuentes, à quibus Nouitius consilia impetrauit, sunt Iuristæ, & sæculares, vnus præcipuè, cui nimium fudit. Et ad hoc ego dico, quod licet illi sint doctissimi in euoluendis suis textibus
vtriusque

utriusque iuris, tamen in causa professionis Religiosæ, non habent experientiam sicut Religiosi, qui fuerunt lectores Theologiæ, & sciunt priuilegia Religionum, & statuta earum, quæ ut plurimum ignorant Doctores Iuristæ: & aliquando illis proponuntur falsæ informationes.

C A S V S II.

De eadem professione.

A P P E N D I X

Ad casum primum.

*Qui debeant esse iudices huius nullius
professionis?*

FACTâ professione istius Nouitij in secundo conuentu à Prouinciali inhibito, Pater Generalis Ordinis ad querelam primi conuentus, commisit causam alteri Prouinciali eiusdem Ordinis tanquam iudici delegato, ut causas nullitatis inquireret, & sententiam definitiuam proferret. Ex ista delegatione ortæ sunt duæ quæstiones. Prima, quia instabat Nouitius quod in iudicanda illa vltima causa nullitatis professionis, cum Prouinciali delegato, debeat assistere simul Prouincialis ordinarius prouinciæ qui Nouitium ad nouitiatum primò, & secundò, & ad professionem admiserat in primo, & secundo conuentu. Probabat ille, quia in causa nullitatis professionis, cum Ordinario est iudex superior professi, ut clarè dicitur

in

in Concilio Tridentino *sess. 25. c. 19. de Regular.* At Prouincialis prædictus est verus superior prædicti Nouitij: ergo ille debuit causam iudicare cum Prouinciali delegato.

2. Ista quæstio facilè repulsa est: & dictum fuit quod Prouincialis ordinarius, qui Nouitium ad habitum & professionem admiserat cum illis defectibus, de quibus in primo casu, non poterat esse iudex in causa nullitatis istius professionis. Constat clarè, quia cum in ista sententia iudicandi essent defectus, & nullitates, quæ in professione concurrerunt; & horum omnium causa fuerit præteritus Prouincialis ordinarius qui ad habitum, & professionem admiserat: non poterat Prouincialis esse iudex in propria causa, seu iudex suorum defectuum. Sequeretur enim, quod posset esse simul iudex, & reus: contra expressum capitulum *Nullus 4. q. 4.* vbi dicitur, quod in iudicio quatuor personæ distinctæ debent interuenire, ita distinctæ, vt vna non possit simul esse alia, videlicet iudex, reus, accusator, & testis. Prouincialis verò præteritus, & Ordinarius, erat in hac causa reus, utpote cuius defectus iudicandi erant: ergo non potuit esse iudex in illa. Ad id verò quod adducitur ex Concilio Tridentino, responderetur, patere solutionem ex ipso Concilio: loquitur enim clarè quando nullitas professionis iudicanda committitur Ordinario, id est, Episcopo. In hoc verò casu, nullitas professionis non est commissæ Episcopo à prælato generali Ordinis, sed alteri Prouinciali extraneo, sicut poterat facere, & proinde Prouincialis ordinarius, qui ad habitum, & professionem admiserat, non poterat esse iudex in causa cum esset propria sua causa. De quo videatur Valerus Cartuxanus *lib. de differentiis vtriusque fori,*
verbo,

verbo, iudex, *differentia* 9. Addo quod cùm hæc causa esset delata ad prælatum generalem Ordinis per appellationem primi conuentus à Prouinciali; non poterat iam Prouincialis esse iudex causæ, cùm esset iam iudex à quo appellationis. Constat verò quod iudex, à quo appellatur, non potest amplius esse iudex in causâ appellata, maximè quando superior iudicis quo, acceptauit appellationem, vt contigit in hoc casu.

3 In hac materia pro Nouitio aliqui dixerunt validitatem istius professionis iudicandam fuisse à solo Episcopo ordinario Nouitij, pro quo adducta est quædam declaratio Cardinalium paucis abhinc annis decreta in hunc modum super hoc casu simili. Quidam vir matrimonio copulatus cuidam fœminæ, sciens illam sibi fecisse adulterium, dimisit illam, & abiens in regionem remotam sumpsit habitum cuiusdam Religionis, & in illa professionem emisit. Procedente tempore, iste sic professus, antequam illam Religionem intraret, habuit copulam carnalem cum quadam muliere. Coniux prima hoc sciens accusauit illum coram suo prælato regulari, qui illum spoliavit habitu Religionis, iniungens, vt ad suam vxorem rediret. Casus delatus est ad sacram Congregationem Cardinalium, qui declararunt vt Episcopus vxoris causam iudicaret. Et solum Episcopum iudicem causæ constituerunt, non verò superiorem Religionis. Et sic videtur faciendum in nostro casu, qui videtur omnino similis. Responderetur hunc nostrum casum esse omnino dissimilem illi casui Cardinalium: nam in illo casu professio coniugati, causa erat prima, & præcipua matrimonialis, fecerat enim ille diuortium auctoritate propriâ, absque sententia Ordinarij, & præterea post adulterium vxoris ipse etiam adulterium commi

commisit ante ingressum Religionis, propter quod ius perdidit accusandi vxorem, & faciendi diuortij, & sic causa præcipua erat matrimonialis. Constat verò quod causæ matrimoniales ad solum Episcopum pertinent, non ad prælatos regulares: vt constat ex cap. *Accedentibus, de excess. prælatorum*, & cap. *Multorum* 35. q. 6. causa verò professionis erat ibi quid consequens, & accessorium, pendens à causa matrimoniali. Et proinde iudicatâ causâ matrimoniali, decisa manebat causa professionis, iuxta regulam *Accessorium, de reg. iuris in 6.* cùm ibi notatis à glossa citante duas leges dicentes quòd *perempto principali, petit accessorium*, & proinde meritò DD. Cardinales illam causam soli Episcopo commiserunt tanquam iudici causarum matrimonialium. In nostro verò casu non controuertitur causa matrimonialis, sed solius professionis Religiosæ, quam iudicare potest prælatus regularis: & proinde non fuit committenda soli Episcopo.

4. Secundò fuit obiectum, quod saltem in isto casu Episcopus debebat iudicare causam istius professionis cum Prouinciali delegato, iuxta Concilium Tridentinum *sess. 25. c. 19.* vbi expressè iubetur quod si aliquis prætendat probare suam professionem fuisse nullam, proponat causas nullitatis coram suo superiore, & ordinario. Respondetur ibi Concilium solum loqui de volente exire à Religione ob nullitatem professionis. Et in nostro casu agitur de volente manere in Religione, & probante quod professio fuerit valida, qui duo casus sunt nimis diuersi, & proinde statutum in vno, non tenet in alio, cùm à separatis non fiat illatio. Huius rei causa potest assignari: quia liberare professum à votis solemnibus post professionem emissis, est res grauissima, & magnâ discussione indigens,

indigens, & proinde in hoc casu voluit Concilium assistere Episcopum cum Prælato regulari. In secundo verò casu quando quis vult probare se esse Religiosum, & obligare Religioni, cùm sit casus minùs grauis, & minùs periculosus, non videtur requiri assistentia Episcopi, sed solius Prælati regularis.

5 Post expeditum hunc casum, libuit hîc inferere rem nouam positam à Bonacina *tom. 1. tit. de clausura, difficult. 3. n. 2. fol. 522.* vbi ait quod quando iuxta Concilium Tridentinum Episcopus, & Prælatus regularis debent iudicare nullitatem professionis, ibi per Prælatum Religionis non intelligitur Prouincialis, sed Prælatus localis, qui admisit Nouitium ad professionem, vel successor istius Prælati localis. Nomine verò Episcopi intelligitur Episcopus illius diœcesis, in qua Nouitius ante nouitiatum domicilium habebat. Hoc apud alium Doctorem non reperi. Et puto quod praxis stat in contrarium: & quod Prouincialis id debet iudicare, cùm sit absolutè superior prouinciæ. Et quod Episcopus, in cuius diœcesi reclamatur, id poterit iudicare, & quod non sit ad eundem Episcopus, in quo Nouitius antea habebat domicilium; id enim praxis non obseruat.

CASVS III.

Vtrum Religiosi per Bullam Cruciatæ possint eligere confessorem, & absolui à reseruatis.

1 CASus iste quinque antea annis magnam habuit alterationem in hoc regno, & magnam
D causauit

causauit perplexitatem Religiosis vtriusque sexus. Fuerūt enim editi aliqui tractatus impressi à personis doctis, in quibus constanter affirmarunt posse Religiosos per Cruciatam eligere confessorem, & absolui à reseruatis per statuta suæ Religionis. Quinimo Commissarius generalis Cruciatæ per edicta publica affixa ad fores Ecclesiarum idem declarauit, posse Religiosos vti Cruciatâ quoad illa duo; & sub pœna excommunicationis reseruata Summo Pontifici, præcipiebat Prælati Religionum ne suos subditos in hoc directè, vel indirectè impedirent quominus dictâ Cruciatâ vti possent quoad illa duo. Quod autem dictus Commissarius generalis possit declarare dubia eiusdem Bullæ, & quod illius declarationi standum sit, tener Henriquez *tom. 1. sum. lib. 7. cap. 29. §. 3.* postea crescente querela, & supplicatione Religiosorum apud Sedem Apostolicam, D. Papa Vrbanus VIII. particulari Bulla in hoc prouidit, cuius tenorem hîc apponere libuit, quia multum inseruit pro tollendis multis difficultatibus præteritis, & futuris. Bulla ergo talis est.

*Innouatio constitutionis felicitis recordationis
Clementis Papæ VIII. super Bulla Cru-
ciatæ, & Regularibus quoad sacramen-
tum Pœnitentiæ.*

Vrbanus Papa VIII. ad perpetuam rei
memoriam.

IN specula Militantis Ecclesiæ, nullo licet meri-
torum suffragio diuinâ dispositione constituti, &
attentè

attentè considerantes sacros Regularium Ordines
tantas Ecclesiæ Dei omni tempore utilitates attu-
lisse, ut ad eas conseruandas, & instaurandas Ro-
mani Pontifices prædecessores nostri magnam iure
optimo diligentiam semper adhibuerint; dignum,
quin potius debitum reputamus, ut eorundem Pon-
tificum vestigijs inherentes, ad ea pastoralis vigi-
lantia partes iugiter intendamus, ut in eisdem Or-
dinibus regularis obseruantia facta, tectâ conserue-
tur: & si quæ illi obesse dignoscuntur, opportuna
constitutionis ministro salubriter remoueantur.
Aliàs felicitis recordationis Clementi Papæ VIII.
prædecessori nostro per procuratorem generalem fra-
trum de Monte Carmelo nuncupatorum. Exposito,
quod cum in Bulla Cruciatæ sanctæ & alijs priuile-
gijs ab Apostolica Sede concedi solitis detur facul-
tas eligendi confessarium idoneum, ab Ordinario
approbatum, qui possit Christi fideles absoluerè à
casibus, Ordinario, & Sedi Apostolicæ reseruatis: Re-
ligiosi prædicti Ordinis, seu eorum nonnulli, etiam
prædictis facultatibus uti præsumebant in detri-
mentum eorum regularis disciplina. Quare idem
Clemens prædecessor suâ perpetuò valiturâ consti-
tutione declarauit, facultatem, & concessionem san-
ctæ Cruciatæ, & aliorum indultorum prædictorum,
quantum ad prædictum articulum eligendi confes-
sarium, & absoluendi à casibus reseruatis, non ha-
bere locum in fratribus, & sororibus Monialibus

quorumcunque Ordinum, & Congregationum cuiusvis instituti Mendicantium, & non Mendicantium, tam in prouincia Hispania, quàm extra eam ubilibet constitutis, neque eis suffragari: sed eiusdem Clementis prædecessoris intentionis fuisse, quod iidem fratres, & moniales quantum ad sacramentum Pœnitentiæ seu confessionis administrationem dispositioni suorum Prelatorum subiecti essent, prout in dicti Clementis prædecessoris in simili forma Breuis desuper sub die 23. Nouemb. anni 1599. pontificatus sui anno octauo, expeditis litteris, quarum tenores præsentibus pro expressis haberi volumus, plenius continetur. Nihilominus, sicut nobis, non sine animi molestia, innotuit, nonnulli Ordinis fratrum Predicatorum professores prætextu Bullæ eiusdem sanctæ Cruciatæ, ac dictorum indultorum, Confessorum eiusmodi, qui eos, ut præfertur, absoluat, eligere posse prætendant, & forsân eligant ad præsens, postquam litteræ nostræ sub die 14. Iunij anni 1624. pontificatus nostri anno primo, super facultate eisdem Regularibus confessarium ad effectum huiusmodi eligendum ad quinquennium tunc proximum concessâ, emanatæ, pridem ab uno, & ultra expirauerint, in maximum status, & Regularis obseruantia præiudiciũ. Nos, præmissis, quantum nobis ex alto conceditur, obuiare, ac felici tam eorundem fratrum Predicatorum, & B. Mariæ de Monte Carmelo Religiosorum, quàm omnium,

nium, & quorumcunque aliorum cuiuslibet Ordinis, Congregationis, Societatis, & Instituti, etiam speciali mentione, & notâ digni, utriusque sexus, tam Mendicantium, quàm non Mendicantium statui, atque directioni, & aliorum Christi fidelium salutem consulere volentes, præfataque Clementis prædecessoris declarationi inhaerentes, illamque tenore præsentium innouantes, ac quatenus opus sit ampliantes; motu proprio, & ex certa scientia, ac matura deliberatione nostris, deque Apostolica plenitudinis potestate, concessionem sanctæ Cruciatæ, quæ respectu facultatis huiusmodi etiam laicis, & clericis secularibus cuiuscumque status, gradus, & qualitatis, & conditionis, etiam speciali notâ dignæ, quoad casus reseruat, etiam in Bulla Cænæ Domini (heresi exceptâ) contentos, non nisi in foro conscientie, non autem in foro externo suffragatur, aliorumque indultorum huiusmodi, quantum ad prædictum articulum eligendi Confessarium, & absol- uendi à casibus reseruatis, etiam in Bulla Cænæ Domini contentis, cum fratribus, & Monialibus prædictis fratrum Predicatorum, ac aliorum quorumcunque Ordinum, & Congregationum, societatisque, & instituti prædictorum, Mendicantium, & non Mendicantium, tam prouinciæ Hispaniæ, quàm extra eam, ubilibet constitutorum, locum minime habuisse, neque habere, neque illis ullo modo suffragari potuisse, neque posse; excepto dumtaxat

illo quinquennio, quo litteræ nostræ huiusmodi, ut præfertur, durauerunt; siquidem die, 14. mensis Iunij 1629. proximè præteriti, iam expirauerunt. Sed nostra intentionis fuisse, & esse, quod ydem fratres, & Moniales, quantum ad sacramentum Pœnitentiæ, seu confessionis administrationem, ordinariæ dispositioni suorum prælatorum, & Sedi Apostolicæ quoad sibi reservata subiecti sint, earumdem tenore præsentium declaramus, De cernentes, præsentibus nostras litteras de subreptionis, vel obreptionis, aut nullitatis intentionis vitio, seu nostra aut alio quocunque defectu, à quoquam impugnari non posse. Sicque & non aliter, in omnibus, & singulis præmissis, per quoscunque iudices ordinarios, & delegatos, etiam causarum, palatij Apostolici, Auditores, ac sanctæ Romanæ Ecclesiæ Cardinales: etiam de latere Legatos, ac Sedis Apostolicæ Nuncios, ac Cruciatæ Commissarios, & quosuis alios quauis authoritate fungentes, sublata eis, & eorum cuilibet quauis aliâ iudicandi, & interpretandi facultate, & authoritate, interpretari, ac iudicari deberi: ac irritum, & inane si secus super his à quoquam quauis authoritate scienter, vel ignoranter contigerit attentari. Non obstantibus præmissis, ac omnibus, & singulis illis, quæ in prædictis Clementis prædecessoris concessa sunt non obstare, ceterisque contrariis quibuscunque. Quibus omnibus, & singulis illorum omnium, & singulorum tenores præsentibus

pro

pro sufficienter expressis habentes, illis aliàs in suo robore permansuris, hac vice dumtaxat specialiter & expresse derogamus, cæterisque contrarijs quibuscunque. Ut autem presentium tenor omnibus innotescat, volumus eas in valuis principis Apostolorum Basilicæ, & in acie campi Floræ de Vrbe, ut moris est publicari, ipsasque sic publicatas omnes, ac singulos ubique existentes ita afficere, ac si omnibus personaliter intimatæ essent. Quòdque presentium transsumptis, etiam impressis, manu alicuius Notarij publici subscriptis, & sigillo personæ in dignitate Ecclesiastica constitutæ munitis, eadem prorsus ubique fides adhibeatur, quæ presentibus ipsis adhiberetur, si forent exhibitæ, vel ostensæ. Datum Romæ, apud S. Mariam Maiorem sub annulo piscatoris die 19. Iunij 1530. Pontificatus nostri anno septimo.

M. A. Maraldus.

Notanda quædam super Bullam proximè positam, valdè necessaria.

Circa præcedentem Bullam, & illius textum occurrunt aliqua consideranda pro aliquibus dubiis resoluendis, & pro aliquibus confirmandis.

1 Primò enim notandum venit Papam bis in hac Bulla dicere, quòd sit in præiudiciũ Religionum, si Religiosi per Cruciatam eligant confessorem, & absoluantur à reservatis. Primò ibi : *In detrimentum eorum*

regularis disciplina. Secundò ibi : *In maximum status, & regularis observantiae praeiudicium.* Consistit verò hoc praeiudicium primò in eo quod si Religiosi per Cruciatam possent eligere confessorem, & absolui à reseruatis quoties vellent, ista facilitas veniæ præberet occasionem sæpiùs, & faciliùs committendi grauià peccata in detrimentum ipsorum, ac sæpiùs Religionis. Nam facilitas veniæ incentiuum præbet delinquendi, vt habetur expressè in cap. *est iniusta* 23. q. 4. ex D. Ambrosio, & cap. *vt clericorum*, de vita, & honestate clericorum. Et hic est finis Matris Ecclesiæ, quem habet in reseruatiōe aliquorum casuum grauiorum, vt scilicet difficultas obtinendæ absolutionis sit quasi frænū ad non peccandum. Hac de causa in Bulla Cœnæ Domini certa peccata grauiissima reseruantur soli Papæ, vt difficultas adeundi Romam pro illorum absolutione compescat homines ab illorum patratiōe.

2. Noto, id quod dicitur in ista Bulla D. Papam Urbanum VIII. concessisse vt Religiosi per quinquennium possent eligere confessorem, & absolui à reseruatis, hanc, inquam, concessionem non fuisse publicatam in Portugallia, (quo ego sciam) sed fortè solum fuit pro Italia.

3. Redeundo verò ad id quod dicit Papa esse magnum praeiudiciū Religionis eligere Religiosos confessorem per Bullam, & absolui per Bullam, dico id maximè habere locum in Monialibus, quæ si per Cruciatam id possent facere, sequeretur vt plurimum magna inquietudo, & infamia monasterij. Possent enim hac occasione petere confessorem longè distantem à suo monasterio, qui in itinere, & in mansione facere deberet expensas à Monasterio soluendas: possent

possent item petere confessorem, ex quo resultaret infamia Religionis habentis regimen illarum Monialium. Vidi ego in facti contingentia antequam publicaretur hæc Bulla D. Urbani, & vigeat illa falsa opinio, quod Religiosi possent uti Cruciatâ quoad illa duo hîc prohibita, vidi, inquam, in quodam conuentu Monialium religiosissimo, quandam Monialem nolentem confessionis sacramentum à suo proprio confessore recipere; petiisse sibi dari vnum ex duobus, quos petiit, quorum alter distabat ab illo conuentu per viginti leucas; alter erat Religiosus alterius Ordinis, qui si veniret, redundabat in dedecus Religionis illius, cui Monialis erat subdita. Quod magnam in illo conuentu causauit inquietudinem. Sequerentur etiam alia absurda, quæ omitto. Absurdus autem obuiandus est, ut dicitur in cap. *Inter priorem*, de exception. & cap. *Dudum*, de præbend. in 6. & alibi sæpe.

4 Noto, quod Papa in ista Bulla expressè dicit, Religiosos non posse absolui à reseruatis virtute Cruciatæ, siue illa reseruata sint in sua Religione, siue reseruata in Bulla Cœnæ Domini, à quibus reseruatis in Cœna Domini clerici & laici sæculares per eandem Bullam possunt absolui. Exemplum sit: Si lapsus carnis, vel furtum notabile sint casus reseruati in vna Religione, ab his non potest absolui Religiosus per Cruciatam, ut patet. Item si Religiosus committat aliquod delictum ex illis qui reseruantur in Bulla Cœnæ; exempli gratia, si libros hæreticorum scienter legerit, à qua excommunicatione clerici, & laici per Cruciatam possunt absolui, ab hac tamen excommunicatione Religiosi non possunt absolui virtute Cruciatæ. Sic expressè decernit Papa in hac Bulla

paulò ultra medium. Vbi postquam dicit, laicos, & clericos sæculares posse per Cruciatam absolui à reſeruatſ contentis in Bulla Cœnæ Domini in foro tantùm interno, exceptâ hæreſi : *Subdit ſtatim de Regularibus, dicens de illis : Quantum ad prædictum articulum eligendi confeſſarium, & abſoluendi à caſibus reſeruatſ, etiam in Bulla Cœnæ Domini contentis, cum fratribus, & Monialibus prædictis, locum minimè habuiſſe, nec habere, &c.* Vnde Religioſus qui talem librum prohibituſ legerit, non poteſt per Cruciatam ab iſta culpa abſolui, ſed debet recurrere ad ſuum prælatuſ, vel ad habentem illius commiſſionem; quem prælatuſ ſuppono poſſe abſolvere ſubdituſ ab hoc reſeruatſ, & ab aliis contentis in Bulla Cœnæ, exceptâ hæreſi, ut dixi in primo tomo dubioruſ Regulariuſ, verbo, *Prælati poteſtas ad abſoluenduſ*, num. 22. & ſeq.

ſ Aduerto etiam, Papam in hac Bulla bis dicere quod à tempore Papæ Clementis VIII. nunquam potuerunt Religioſi per Cruciatam eligere confeſſorem, nec à reſeruatſ abſolui. Ait hoc Papa primuſ ibi loquens de Clemente VIII. dicens de illo : *Sed intentionem illius fuiſſe quod idem fratres quoad Sacramentum pœnitentiæ, &c.* Declarat inſuper Papa in hac Bulla, quòd Cruciatâ, quo ad illa duo prohibita Religioſis : *Locuſ non habuiſſe, neque habere in Religioſis: neque ullo modo eis ſuffragari potuiſſe, vel poſſe.* Vnde clarè dicit quod ſaltem à tempore Clementis VIII. qui ſimilem Bullam edidit anno 1599. non potuiſſe Religioſos uti Cruciatâ quo ad illa duo prohibita, ita declarante Papâ in iſta Bulla. Vnde conſtat non potuiſſe Commiſſariuſ generaleſ Cruciatæ anno 1621. declarare, & præcipere prælatis regularibus ne ſubditos impedirent quominus per Cruciatam eligerent confeſſo

confessorem, & absoluerentur à reseruatis. Nam inferior non potest declarare legem contra expressam declarationem superioris: sicut nec inferior potest condere legem contra legem superioris: Clementina, *Ne Romani*, de election.

6 Hinc non leuis, neque contemnenda oritur quaestio: an scilicet illi qui à tempore Clementis VIII. vsque ad hanc Bullam D. Urbani, vel post illam virtute Cruciatæ elegerunt confessorem, vel à reseruatis sunt absoluti, si sint Religiosi, teneantur repetere, & iterare sic factas confessiones? Et est validum argumentum quod teneantur. Nam licet prædictas confessiones fecerint bona fide, talis bona fides non sufficit. Nam bona fides potest excusare à peccato operantem cum bona fide. At bona fides non dat iurisdictionem illi qui non habet iurisdictionem, vt patet. Et Summus Pontifex in hac Bulla in verbis suprà citatis clarè docet quemlibet confessarium electum à Religioso virtute Cruciatæ non habere iurisdictionem ad absoluendum, neque illam habuisse à tempore Clementis VIII. Constat verò apud omnes, quod actus pendens à iurisdictione si fiat sine tali iurisdictione, est nullus: vt si confessor non approbatus, & carens iurisdictione absoluat aliquem nihil faciet. Et ob hanc vrgentem, & claram rationem, ego intellico quod prædicti Religiosi, qui à tempore Clementis VIII. virtute Cruciatæ elegerunt confessorem, vel absoluti sunt à reseruatis, tenentur prædictas confessiones iterare. Scio tamen quod Bonacina
tomo 1. disp. 5. de Sacramento pœnitentiæ q. 7. §. 4. num. 4.
dicit, quod sacerdos, qui opinionem habet probabilem de sua iurisdictione ad absoluendum, potest absolutionem conferre, etiam si fortè adsit opinio probabilis

babilis in contrarium : nam interueniente probabili opinione , Ecclesia supplet iurisdictionem , iuxta legem *Barbarius ff. de offic. prætoris, & Lessiũ, Reginald. Suarez , Henriquez , & alios tres Doctores , quos ibi citat. At à tempore Clementis VIII. vsque ad hanc Bullam D. Urbani , fuerunt Doctores habentes opinionem , quod possent Religiosi per Cruciatam eligere confessorem , & absolui à reſeruatis : quibus accessit declaratio Commissarij generalis Cruciatæ idem mandantis, & declarantis, ob quæ videtur posse quietari Religiosos, qui à tempore Clementis VIII. Cruciatâ vsi sunt quo ad illa duo , cùm ob prædicta possent habere opinionem probabilem se sic posse facere. Quibus tamen non obstantibus ego non acquiesco, neque auderem prædictos Religiosos à scrupulo liberare , neque à confessionibus iterandis : moueor , quia contra expressam Bullam Clementis VIII. & contra istam D. Urbani non potest dari opinio probabilis, imò non potuit dari opinio probabilis contra expressum Papæ mandatum. Clemens verò VIII. clarè, & expresse prohibuit ne Religiosi Cruciatâ vterentur quo ad illa duo. Et D. Urbanus VIII. in hac Bulla declarat Clementem VIII. sic disposuisse , eiusque dispositionem nunquam cessasse : vt constat ex verbis istius Bullæ, vbi Papa dicit , *Se cum animi molestia audisse aliquos Religiosos vti Cruciatâ , quo ad illa duo , non obstante prædicta Bulla Clementis VIII.**

7 Dato ergo quod aliquis scrupulum non deponat: quæris quid faciet Sacerdos , qui electus fuit confessorius à Religioso, vel illum absoluat à reſeruatis virtute Cruciatæ, sciens nunc id facere non potuisse ? Ad hoc respondeo ex Reginaldo *tomo 1. lib. 8. n. 29. & 30.* vbi quærit quid facere debeat confessorius , qui pœnitentem

nitentem nulliter absoluit propter casum reservatum, quem habebat, vel simile impedimentum? Et respondet Reginaldus cum aliis ibi citatis: primò, quod si talis confessarius probabiliter timet scandalum si conueniat pœnitentem, vt quia is conquesturus est de eo, quod reuelet confessionem suam; debet illum relinquere, & Summo Sacerdoti Christo committere. Si verò nullum notabile scandalum Sacerdos timeat, debet conuenire pœnitentem, & docere grauem errorem in audientia suæ confessionis interuenisse, ideòque petere vt velit iterum sibi confiteri, vel facere sibi potestatem, vt sub sigillo confessionis ipsum de veritate admoneat. Et in tali casu, addit teneri pœnitentem consilium sacerdotis capere: aliàs culpa sacerdotis in pœnitentem transfundetur. Si verò pœnitens acquieuerit, ait Reginaldus cum Victoria, quod satisfaciet pœnitens, dicendo: Confiteor de omnibus peccatis, quæ tibi in tali confessione aperui; & declaret si quæ alia peccata commisit: quia in illa confessione contigit talis defectus, ex quo fuit inualide. Vide alia ibidem apud Reginaldum *num. 32. & 33.*

8 Noto præterea hanc Bullam D. Urbani fuisse expeditam motu proprio, & ex certa scientia, ac de plenitudine potestatis. Quæ tria verba in paucis Bullis Pontificiis inuenientur, & valde ostendunt robur, ac firmitatem, quam illi D. Papa conferre voluit. Nam vt Doctores dicunt, in materia priuilegiorum, vnum solum verbum ex his tribus, si ponatur in confirmatione priuilegij, dicendo, *ex certa scientia*, confirmat illud omnino: quanto magis addendo, vt hîc additur: *Motu proprio, & de plenitudine potestatis.*

9 Derogat Papa in hac Bulla quibuscumque contrariis, dicens: *Quorum tenores presentibus habemus pro expressis*

expressis sufficienter. Quæ clausula, & reuocatio vim magnam habet, vt enim præter alios. tradit Riccius tom. 2. *suarum decis.* 4. part. *decis.* 949. quando princeps in sua lege reuocatoria dicit: *Quorum tenores habemus in presentibus pro expressis*, inter alios effectus, factos ab illa clausula, est hic vnus, vt derogat, & abroget priuilegia, & indulta habentia clausulam derogatoriam ad futura priuilegia.

10 Aduerto vltimo in hac Bulla Papam dicere, quod ex die qua illa publicata fuit Romæ, mense Iunio anni 1630. obliget vbique in omnibus regnis, & in omni Ecclesia, etiam absentes ac si illis personaliter fuisset intimata: propter quæ omnia, nescio quid possit vlteriùs desiderari ad Bullæ istius confirmationem, & corroboracionem: vel quomodo de illius valore possit dubitari.

C A S V S IV.

Respondetur aliquibus obiectionibus, quibus de valore istius Bullæ dubitatur.

NON obstantibus claris & efficacibus verbis, & clausulis prædictæ Bullæ, non defuerunt aliqui, qui scripto, & verbis de illius valore dubitantes, dixerunt illam in Hispania non abrogare priuilegia Cruciatæ, ac proinde Religiosos posse vt priuilegio Cruciatæ, quoad illa duo eligendi confessorem, & vt possint absolui à reſeruatis, cum illud priuilegium sit concessum omnibus Christi fidelibus in Bulla Cruciatæ. Probabat hoc Author cuiusdam tractatus impressi multis rationibus, quarum potissima, & Achil-

les

les erat hæc. Nam (aiebat) Rex Hispaniæ habet priuilegium Papæ cum pacto, & contractu oneroso, ex quo contractu Rex singulis annis soluit Romæ duodecim millia ducatorum aureorum, vt dicunt esse notorium. Priuilegium verò datum à principe per modum contractus onerosi, non potest reuocari, vt Doctores dicunt in materia de priuilegiis. Et dato quod posset à principe reuocari tale priuilegium, annullando contractum, debebat Papa facere expressam reuocationem talis priuilegij, dicendo, *non obstante priuilegio Regi Catholico à nobis concessò*, quod Papa non fecit in hac Bulla, neque alius Papa in aliqua alia Bulla. Ad hoc citabat ille Author multos textus, & multa futilia congerebat. Et ad probandum quod nullus Papa hætenus reuocauit dictum priuilegium Regis Catholici per modum contractus onerosi, *in num. 16.* illius tractatus, affert quamdam responsionem datam à D. Papa Urbano VIII. (non refert in quo anno, neque ad cuius instantiam:) qui Dominus Papa cum rogatus fuisset an per Iubilæa generalia à se suo tempore concessa, fuisset suspensa Bulla Cruciatæ, dicitur Papa in hæc verba respondisse: *Nos quibus præcipuè curanda sunt ea, quæ ad fidem Catholicam tuendam, & adiuuandam Domino aliquando propagandam, pertinent: Quique eo animo, eaque voluntate nunquam fuimus, vt indulgentiæ, facultates, concessiones, & indulta quæcumque intuitu dictæ expeditionis, & Cruciatæ impedirentur, aut reuocarentur, declaramus, &c.* Hoc est præcipuum illius tractatus argumentum præter alia leuiora, quæ infra videbimus, & soluemus. Nunc verò ad hoc tantum argumentum contractus onerosi respondebo.

i Ad hoc igitur argumentum constanter, & indubitanter,

bitanter dico, inter D. Papam, & Regem Catholicum non dari contractum onerosum, licet Rex de redditibus Cruciatæ soluat Papæ singulis annis prædictam pensionem. Imò censeo talem propositionem esse dignam censurâ, & correctione, vt infra dicam fusius. Moueor ad hoc primò, quia non bene, nec piè sonat hodie in auribus Catholicis asserere quod Papa in concedendis indulgentiis, habet contractum onerosum, cum Rege Hispaniæ (pecuniarium scilicet duodecim millium ducatorum.) Probatum hoc, nam hæretici huius temporis, maximè Caluinus, teste Bellarmino *tractatu de indulgentiis lib. 2. cap. 2.* dicunt (falsò tamen) quod indulgentiæ in Ecclesia Romana seruiunt ad emungendas pecunias; cùm verò nos teneamur non dare occasionem erroribus hæreticorum: hæc propositio, dicens, *Papa in concedendis indulgentiis Cruciatæ habet contractum onerosum pecuniarium cum Rege Catholico*, fauet illi errori hæreticorum. Et proinde videtur omnino damnanda, vel saltem reiicienda. Pro quo consideranda sunt illa verba D. Pauli 2. *ad Corinth. 6. Nemini dantes ullam offensionem, vt non vituperetur ministerium nostrum.* Item illa *ad Titum 2. Verbum sanum, & irreprehensibile, vt is qui ex aduerso est vereatur, nihil habens dicere de nobis.*

2. Secundò probò quod Papa imponens Regi Catholico certam pensionem pecuniæ in redditibus Cruciatæ soluendam pro fabrica templi D. Petri Romæ, in hoc non contrahat contractum onerosum cum Rege Catholico; probò, inquam: nam contractus non initur inter duas personas nisi quando vtraque persona dat, vel promittit id ad quod aliàs non erat obligata, vt patet in contractu emptionis, & cæteris. At quando Papa dat, vel dedit Regi Catholico redditus Cruciatæ

Cruciata non tenebatur illos dare, & potuit non dare: ergo ibi non facit contractum: neque Rex Catholicus soluens illam pensionem de redditibus Cruciatæ sibi liberaliter concessis, dat aliquid de suo. Imò potest ac debet Rex soluens hanc pensionem dicere Summo Pontifici illud quod Salomon 1. Paralipom. cap. 29. dixit Deo: *Tua sunt omnia, & quæ de manu tua accepimus, reddimus tibi.* Consumo hoc exemplo clarissimo. Concedit Papa alicui quoddam beneficium, verbi gratia, Episcopatum, idque liberaliter, cum posset non concedere: & simul in redditibus Episcopatus imponit Episcopo pensionem pro aliquo opere pio, vel pro aliqua persona graui, & paupere sustentandam quotannis: quis dicet Papam in hoc facere contractum onerosum cum tali Episcopo? Idem omnino cernitur in pensione posita à Papa in redditibus Cruciatæ, quod poterat non dare Regi Catholico, & imponit illam pensionem pro opere pio, vt videlicet pro fabrica Templi D. Petri. Tertiò probatur, nam dato, & concessio, quod in hac materia interuenerit prædictus contractus inter Papam, & Regem Catholicum, erat omnino necessarium videre formam concessionis, quâ Sum. Pontifex dicitur concessisse Regi Philippo II. redditus Cruciatæ. Debit enim ad interuentionem contractus dicere in illa: Concedo tibi redditus Cruciatæ pro expeditione belli contra infideles, & simul me obligo ad concedenda priuilegia Cruciatæ etiam Religiosis, & nunquam me illis prohibiturum vsum talis Cruciatæ. Et præcedente tali clausula, vel conditione, foret talis contractus, & non posset postea Papa oppositum licitè facere. At talis clausula, vel conditio non intercessit, non enim solet Papa ligare sibi manus ad futurum: sin minus osten-

datur talis concessio cum tali clausula Ergo Papa prohibens Religiosis vsum Cruciatæ quo ad illa duo, non violat contractum onerosum cum Rege initum, cum Papa non se obligauerit ad Cruciatam concedendam etiam Religiosis cum præiudicio Religionum. Addo, quod prædictus Rex Catholicus Philippus II. & successores sciunt, vel scire debent, quod Religiosis interdictum fuit vti Brila Cruciatæ quoad illa duo, vt in particulari interdixit Leo X. fratribus minoribus, earumque Monialibus apud compendium Mendicantium verb. *Cruciata*, §. 5. & ibidem §. 2. cum ibi citatis, & in eodem compendio verbo, *Absolutio ordinaria quoad fratres*, §. 16. Idemque fecerunt alij successores Pontifices circa alias Religiones. Scientes ergo, vel debentes scire Reges Hispaniæ has prohibitiones Pontificum factas Religiosis circa Cruciatam, & nihilominus acceptantes redditus Cruciatæ cum illa pensione, cedunt iuri suo, si quod habent, imò non habent nec possunt conqueri de Papa, quod Religiosis interdicat vsum Cruciatæ, quoad illa duo. Declaratur exemplo emptionis, & venditionis. Nam licet venditor teneatur manifestare emptori defectum occultum rei venditæ, non tenetur tamen manifestare emptori defectum publicum rei, quem defectum ipse videt, vt cum communi probat Azor *tom. 3. lib. 8. c. 23. §. His positis*, citans D. Thom. Cum ergo sit publicum Religiosos per multos Pontifices fuisse prohibitos ne Cruciatâ vterentur quoad illa duo, non possunt Reges Hispaniæ conqueri, eo quod hodie Papa illis idem prohibeat, etiamsi prædictus contractus onerosus in hac materia interuenisset, vt patet ex proximè posito exemplo venditionis.

3 Cum ergo constet ex prædictis, quod inter Papam

pam & Regem circa priuilegia Cruciatae non sit contractus onerosus, sed solum priuilegium gratuitum, benè, ac licitè id potest à Papa reuocari: nam princeps potest reuocare priuilegium, quod dedit subdito, interueniente causa iusta, vt fusè & efficaciter citans multos probat, Suarez *tom. de legib. lib. 8. c. 37. num. 7. & seqq.* Vt autem Papa reuocet hoc priuilegium Cruciatae quoad Religiosos, datur causa iusta, illa scilicet, quam suprà diximus, præiudicium magnum Religionum. Neque est necessarium quod ista causa sit vniuersalis pro tota Ecclesia, vt contendit Author tractatus contrarij, sed sufficit quod sit causa publica tangens omnes Religiones, quæ sunt melior pars Ecclesiæ. Neque Suarez loco citato requirit quod ad hoc sit necessaria causa ad totam Ecclesiam pertinens.

4 Quartò sic arguo. Multi Romani Pontifices, etiam recentiores, vt Clemens VIII. & D. Urbanus VIII. scientes redditus Cruciatae à Sede Apostolica concessos esse Regi Catholico pro expeditione belli contra infideles; nihilominus id scientes prohibuerunt Cruciatam Religiosis quo ad illa duo, vt patet ex Bulla Clementis VIII. & Urbani VIII. At non debemus cogitare quod tales duo Pontifices errauerint in facto, vel quod ignorauerint se posse facere talem reuocationem Cruciatae quoad Religiosos, vel denique quod voluerint violare contractum onerosum, si daretur, & ad illum se obligatos intelligerent. Nam si bene præsumendum est de quocumque iudice, multo magis id debemus præsumere de iudice omnium iudicum, qui est Sum. Pontifex, cuius decreta debemus venerari, & non condemnare: iuxta illud quod dicitur in cap. *Absit* 11. q. 3. vbi Papa Anterus sic ait. *Absit vt quidquam sinistrum de his arbitremur, qui Apostolico gra-*

dui succedentes, &c. Et in cap. *Nemini* 17. q.4. dicitur: *Nemini est de Sedis Apostolicæ iudicio iudicare, aut illius sententiam retractare permissum.* Maximè cum Papa habeat omnia iura in pectore, ut dicitur cap.1. de *constit.* & hoc modo argumentandi, videlicet: *Papa hoc iam fecit: ergo potuit facere;* utitur Sanch, lib.8. de *Matrim.* disput.8. num.7. in medio. Suarez tom.3. de *Relig.* lib.6. cap.16.num.6.cum aliis ibi citatis, ad probandum quod possit Papa dispensare in voto solemnī castitatis, ut possit Religiosus professus contrahere matrimonium. Et sic arguit ibi Suarez. Papa hoc iam fecit, & dispensavit cum aliquibus Religiosis ut nuberent:(quos Religiosos ibi refert Suar.) ergo Papa id potuit facere. Nam, ut proximè citato loco ait Sanchez, in dubio pro gestis Papæ præsumendum est, qui in Ecclesiæ gubernatione ducitur ab Spiritu sancto, Nam aliàs possemus arguere aliquando Papam, vel de malitia, vel de ignorantia, quod esset temerarium affirmare.

5 Quintò id ipsum probatur clavis exemplis, potuisse scilicet Papam de redditibus Cruciatæ quasi lædere Regem Catholicum in illa pecunia, quæ obvenitura erat si Religiosi Cruciatam acciperent quoad illa duo, talēque pecuniam à Rege auferre, etiam si illi deberetur ex ullo titulo, idque pro causa iusta. Probatur exemplo clarissimo. De iure diuino, saltem positivo, & secundum aliquos, de iure naturali est, ut solvantur decimæ Episcopo, & ministris Ecclesiæ, tanquam ministris publicis, qui orant, & laborant pro Ecclesiā Dei, ut tradit inter alios, Azor tom.1.lib.7. cap.34. §. *In his igitur.* Et tamen hoc non obstante, Papa cum sit dominus, & supremus dispensator omnium bonorum decimarum, potest, imò de facto iubet aliquando ut aliquæ decimæ non solvantur Episcopo,
vel

vel clericis, sed soluantur alicui monasterio, vel commendatario, vt patet experientiâ : ergo à fortiori id poterit facere Papa in redditibus Cruciatæ, iubendo indirectè ne Religiosi Regi Catholico aliquid soluant pro Bulla Cruciatæ, cum tales redditus Cruciatæ non debeantur Regi Catholico ex iure naturali, vt patet, neque ex iure diuino, sed ex pura liberalitate Summi Pontificis. Secundum exemplum fit : Papa potest auferre beneficium Ecclesiasticum iam obtentum à beneficiario, ita vt factum valeat : sicut habetur in cap. *per principalem*, cum gloss. *ibid.* 9. q. 3. per cap. etiam *In memoriam*, dist. 19. & alios textus, & Doctores citatos ab Azor. tom. 2. lib. 6. cap. 35. §. 24. Ergo poterit etiam Papa auferre à Rege ius aliquod si haberet, vt sibi Religiosi soluerent redditus ex vsu Cruciatæ quo ad illa duo prohibita : qui redditus non sunt beneficium Ecclesiasticum, neque ad illos Rex habet ius, nisi ex Papæ liberalitate.

6 Neque obstat responsio authoris tractatus oppositi, dicentis, quo ad hoc vt Papa reuocet dictum priuilegium Regis concessum per contractum onerosum, non sufficere quod Papa prohibeat Religiosis accipere Cruciatam quoad illa duo : sed necessarium esse, quòd Papa clavis verbis exprimat se ad hoc reuocare priuilegium Regi concessum per contractum onerosum. Non obstat primò, quia iam probauimus euidenter hîc non dari contractum onerosum inter Papam, & Regem, & proinde non est necessaria specialis illa reuocatio. Secundò dico quod in citata Bulla D. Urbani VIII. satis euidenter reuocatur illud priuilegium, si extaret. Nam in illa Papa dicit : *Non obstantibus contrarijs quibuscumque, quorum tenores hîc habemus pro expressis.* Quod verò hæc clausula sufficiat

ad reuocanda omnia priuilegia in contrarium, præter opinionem communem Doctorum fatetur ipse Auctor tractatus contrarij, num. 5. Et est hoc adeò verum quod teste Reginaldo tom. 1. num. 239. lib. 13. cum Syluest. Panorm. Tabiena, si priuilegium prius habet clausulam, vt non possit reuocari à successore per verba generalia plenissima, qualia sunt ista: *Non obstantibus quibuscumque priuilegijs, etiamsi de verbo ad verbum de illis facienda sit mentio.* Nihilominus prædictum primum priuilegium posse validè reuocari per secundum priuilegium, vel secundam Bullam Papæ successoris, continentem verba generalia reuocatoria plenissima, per quæ satis constat de intentione principis volentis ipsum reuocare. Assignat rationem Reginaldus, quia cùm priuilegia in facto consistant, ideòque Papa possit illa probabiliter ignorare, impossibile est vt de omnibus faciat specialem de verbo ad verbum mentionem: sicque Papæ adimeretur potestas reuocandi quæcunque priuilegia. Facit ad hoc quod Papa præcedens non potest ligare manus Papæ successoris, neque illi potest præscribere modum quo debeat priuilegia antecessorum reuocare. Satis ergo est, quod Papa successor in sua reuocatione priuilegij præteriti, ponat verba clara, euidentia, & efficacia, per quæ ostendat mentem suam esse reuocare antiquum priuilegium, sicut D. Urbanus clarè fecit in ista Bulla, & fecerat antea Clemens VIII. Imò dedit Ramonius in suis consiliis consilio 45. num. 13. & 14. citans Craueram, Socium, Menochium, Ruinum, quo ad hoc vt Princeps censeatur reuocare aliquod priuilegium, seu constitutionem, non indiget clausula derogatoria, sed sufficit quod sciat de opposito priuilegio, vel constitutione,

tionem, & nihilominus contra illam aliquid decernat: per hoc enim contrarium decretum clarè significat se illud prius derogare: videantur ad hoc quæ ego dixi in meo libro responsionum, siue consiliorum *casu* 32. n. 4. fol. 248. col. 2. ubi alios cito. Denique addo cum Bonacina *tom. 1. disp. 2. de excommunicatione in genere, q. 2. puncto 2. num. 8.* dicente quod ad hoc ut reuocetur decretum aliquod Concilij Tridentini, non est necessarium quod Papa reuocans faciat expressam mentionem talis decreti, dicendo: Non obstante Concilio Tridentino; sed sufficere quod Papa aliquid decernat contrarium tali decreto, ad hoc ut illud decretum censeatur manere derogatum; quod ibi probat ex quadam declaratione Pij V. & ex alia declaratione Cardinalium. Maius autem multo est decretum contentum in Concilio Tridentino, quod est ius commune, & Concilium generale Ecclesiæ præ omnibus Conciliis celeberrimum, quam sit priuilegium illud Regi Catholico onerosum, si extaret. Et proinde si decretum Concilij Tridentini potest reuocari decreto contrario sine expressa reuocatione Tridentini: multo melius posset reuocari priuilegium Regis, de quo quærimus, sine expressa mentione illius.

7 Quod verò attinet ad illa verba posita supra in hoc casu ante numerum, quæ Author tractatus oppositi dixit respondisse D. Urbanum VIII. se non reuocasse indulta, & concessionem sanctæ Cruciatæ. Dico primò Papam ibi interrogatum fuisse in genere, an per Iubilæum reuocauerit concessionem, & indulgentias Cruciatæ, quoad fideles Catholicos. Ad quod Papa respondit negatiuè, ut enim infra dicemus, per Iubilæum generale non suspenduntur indulgentiæ Cruciatæ: non verò fuit Papa interrogatus de illis Bul-

lis, in quibus Papa clarè, & expresse solis Religiosis prohibuit vsum Cruciatæ, vt fecit clarè Clemens VIII. & idem Vrbanus VIII. Secundò dico, quod Papa dicens se non reuocasse indulta, & concessiones Cruciatæ, non per hoc dixit, quod Religiosi possent illâ vti quoad illa duo quos sciebat prohibitos esse ab illius vfu per Clementem VIII. cuius Bullam hic Papa dicit semper robur, & firmitatem habuisse. Itaque D. Vrbanus VIII. dicendo se nunquam indulta Cruciatæ reuocasse quoad clericos & sæculares: & in substantia voluit dicere, quod Cruciatam possent accipere sicut antea, personæ habiles, non prohibitæ prohibitione speciali Papali, cuiusmodi non erant tunc, neque sunt hodie personæ Religiosæ. Neque debet hæc solutio displicere Authori tractatus oppositi. Nam ille simili solutione soluit argumentum quod sibi vidit posse offerri, quo probatur Religiosos non posse vti Cruciatâ quoad illa duo. Argumentum verò tale est. Pius IV. in sua Bulla Cruciatæ concessit Religiosis omnibus vt possent vti Cruciatâ quo ad illa duo. At cæteri omnes subsequentes Pontifices in suis Bullis Cruciatæ prædictam clausulam, & licentiam abstulerunt, quod signum est clarissimum nolle Summos Pontifices, vt Religiosi Cruciatam quo ad illa duo recipiant. Ad hoc argumentum respondet Author citato tractatu num. 15. quod sequentes Pontifices auferendo illam clausulam, & licentiam Pij IV. non per hoc voluerunt abrogare prædictam licentiam Pij IV. quo ad Religiosos, sed reliquerunt causam intra terminos iuris; ostendentes non esse necessariam clausulam derogatoriam. Idem ego dico in nostro casu. Nam licet D. Papa Vrbanus dixerit suprâ citata verba; & licet diceret quod omnes Cruciatam reciperent (quod

(quod non dixit,) non idcirco concessit licentiam Religiosis vt Bullam Cruciatæ reciperent quo ad illa duo: sed remisit se Papa ad terminos iuris Pontificij, Bullæ scilicet Clementis VIII. & aliorum idem prohibentium, Leonis scilicet X. de quo in præcedentibus diximus.

8 Sed quia, vt diximus, argumentum præcipuum partis oppositæ, est quod inter Papam, & Regem datur contractus onerosus, quem Papa neque intendit, neque potest dissoluere, quamuis ad hoc argumentum iam abundè responderimus in præcedentibus: quia tamen Sanchez Author grauissimus innuit, vel clarè docet in concessione Cruciatæ interuenire contractum: vt ipse Doctor melius intelligatur, & exinde magis confutetur contractus onerosus assertus à parte contraria, dico sequentia. Igitur Sanchez *lib.8. de Matrimon. disp. 33. num. 10.* ait per Iubilæum magnum non suspendi priuilegia Cruciatæ: quia (inquit) priuilegia Cruciatæ conceduntur per modum contractus. Vbi videtur clarè innuere quod in concessione Cruciatæ interuenit contractus. Respondeo primò, prædictum Authorem non dicere absolute ibi interuenire contractum, sed modum contractus, seu similitudinem contractus: quæ similitudo non est contractus. Dico secundò, prædictum Doctorem non asserere prædictum quasi contractum interuenire inter Papam, & Regem, sed inter Papam, & recipientem Bullam: quatenus Commissarius Cruciatæ nomine Papæ dicit illam accipienti: *Et quoniam tu Fullane dedisti taxatam elemosynam, consequeris indulgentias Cruciatæ.* Tertiò dico, prædicta verba Bullæ non continere contractum. Probo clarè ex definitione contractus: nam contractus definitur esse obligatio vltro citroque obligans,

ut habetur in lege *Labeo 2. ff. de verb. signif.* At recipiens Bullam dicitur in Bulla, quod dat eleemosynam: ergo non dat ex obligatione contractus, cum eleemosyna liberaliter detur, & non ex obligatione, neque ex contractu. Secundò, quia Papa petens illam eleemosynam à recipiente Bullam non petit illam tanquam ob pactum, vel tanquam ob causam principalem dandi indulgentias, sed tanquam ob conditionem, sine qua non. Eo nempe modo, quo Sacerdos promittens Missam se dicturum pro dante stipem, siue eleemosynam, non facit contractum cum petente Missam, neque illam potest dicere ob prædictam stipem tanquam ob causam principalem, aliàs foret simoniacus: sed dicit Missam ob stipem tanquam ob conditionem sine qua non. At conditio sine qua non, non facit pactum, neque contractum: neque dat formam actui. Potest hoc adhuc confirmari ex D. Chrysostomo, qui ad illa verba *Isai. 1. Venite, & arguite me*, sic ait sanctus Doctor in persona Dei. *Quiddam ipsi facite, & quod reliquum fuerit, ipse addam. Exiguum aliquid mihi date, & solidum rei totius summam vobis impertiar gratuito.* Quæ verba directè fauent ad nostrum intentum.

C A S V S. V.

Soluntur aliæ obiectiones minores contra citatam Bullam.

DEstructo argumento principali citati contractus oppositi, visum fuit etiam soluere in summa alia minora argumenta ferè futilia, quæ Author adducit ad suum intentum probandum.

1 Igitur

1 Igitur *fol. 2. num. 3.* ait ex Henriquez, quod aliquando Religiones permiserunt Religiosis accipere Cruciatam quoad illa duo. Respondeo: esto. quid facit illa permissio ad intentum, quando postea Papa id expressè prohibet, & Religiones ipsæ coram Papa reclamationum? Imò ferè omnes Religiones per propria statuta id prohibuerunt, maximè Religio Minorum, quæ peculiari statuto decernit ut carceri mancipetur Religiosus, qui dixerit posse aliquem Religiosum Ordinis per Cruciatam eligere confessorem, & absolui à casibus reservatis.

2 *Folio 3. pag. 1. & 2.* dicit quod Bulla plumbea Cruciatæ reuocat priuilegia Medicantium cum clausula, *Quorum tenores pro expressis habemus in presentibus.* quam clausulam non habet Bulla Clementis VIII. Respondetur, eandem clausulam, *Quorum tenores*, contineri in ista Bulla Urbani VIII. ut vidimus in textu illius: & ista Bulla Urbani VIII. est posterior illa plumbea, illique contraria, & proinde plumbeam reuocat, si fortè in plumbea aliquid continetur quod contrarietur isti Bullæ Urbani VIII. ut colligitur ex Nauar. *lib. 5. consiliorum tit. de pœnis, consilio 1.* & habetur in *cap. 1. de constit.* ubi glossa verbo, *Renocare*, & verbo, *Noscatur*, multa citat ad hoc intentum.

3 Eodem loco *num. 6.* ait Papam posse reuocare priuilegia Mendicantium. Dico id verissimum esse. Sed retorquetur hoc dictum contra Authorem, & dico quod etiam Papa potest reuocare priuilegia gratuita Regum, & sæcularium, & quod priuilegium Mendicantium quod non recipiant Cruciatam quoad illa duo, est confirmatum per Clementem VIII. & alios Pontifices. Imò addo quod priuilegium Mendicantium ad non recipiendam Cruciatam quo ad illa duo,
non

non est verè , & propriè priuilegium , sed puta prohibitio.

4 *Num.* 7. ait, quod licet Papa Gregor. XIII. prohibuerit Patribus Societatis Iesu, ne reciperent Cruciatam quoad illa duo , illi eligunt confessorum tempore Iubilæi publici, & idem faciunt alij Religiosi tempore Iubilæi ; & ex consequenti id poterunt facere virtute Cruciatæ , cuius priuilegiis per Iubilæum non derogatur. Ad hoc argumentum respondet Suarez *tom.* 4. *de Relig. lib.* 2. *cap.* 16. *fol.* 133. vbi primò dicit, quod in aliquibus Iubilæis in quibus Summi Pontifices volunt hanc gratiam facere Religiosis, specificat Papa quod poterunt eligere confessorum. In quo clarè innuit Suarez , quod si Papa id non exprefferit in Iubilæo, non poterunt Religiosi illum eligere. Secundò ait Suarez , quod licet Summi Pontifices id concedant Religiosis in Iubilæis, ista concessio est per modicum tempus, & vna tantum vice , & proinde facit modicum præiudicium Religionibus , idque concedit ob bonum commune totius Ecclesiæ , pro quo bono concedit Iubilæum. Quod non eueniret, si per Bullam Cruciatæ eligerent confessorum, tunc enim per totum annum, imò per totam vitam id possent facere cum magno, & continuo præiudicio Religionis.

5 *Numero* 8. ait quod Sorbus Capuccinus *in compendio* tenet , quod Religiosi cum licentia prælatorum possunt vti Cruciatâ quoad illa duo. Respondeo, quod citatus Sorbus ad compendium verbo, *Cruciatâ*, §. *Vnde concludendo*, resolutè tenet non posse , & dato quod id assereret, alij plures, & grauiores Doctores affirmant non posse, quos videbimus infra.

6 *Numero* 9. ait, quod ex eo quod Religiosi vtantur Cruciatâ quoad illa duo , non inde relaxatur Religio,
imò

imò succurritur aliquibus animis, vel animabus afflictis, & in graui necessitate constitutis. Respondeo, quod ab opposito per talem vsum Cruciatæ Religionum decus, & regularis disciplina relaxatur, vt suprà ostendimus ex DD. Clemente VIII. & Urbano VIII. dicentibus id cedere in magnum Religionum præiudicium: & pro hoc sufficit videre vnum Cordubam in Nationibus ad compendium verbo *Cruciata*, §. *Et hoc est fundamentum*, vbi multa doctè, & efficaciter congerit ad probandum per visum Cruciatæ quo ad illa duo periclitari decus, & bonum Religionum occasionaliter; ad quod citat Leonem X. & Sixtum IV. & addit Corduba non esse credendum tot prælatos Religiosorum relationem falsam prædictis Pontificibus fecisse de dissolutione Religionis per tales Bullas, mentitosque fuisse dicentes se id per experientiam comperisse. Quod verò dicitur in argumento, per talem vsum Cruciatæ quo ad illa duo, succurri aliquibus animabus miseris, & afflictis. Respondeo huic necessitati satis succurri per decretum Clemētis VIII. in decreto de casibus referuatis, vbi mandat quod in quouis conuentu Religiosorum, vltra prælatum ordinarium assignentur duo Religiosi per Prouincialem, qui habeant authoritatem absoluēdi à referuatis, sicut seruatur in nostra Religione Minorum: & sic debet fieri in aliis religionibus: per quod satis abundè succurritur prædictæ necessitati.

7 *Numero 10.* ait, quod Bulla Clementis VIII. expirauit cum illo, & quod ille non ligauit manus successorum Pontificum. Omissis aliis responsionibus, dico falsum esse quod Bulla Clementis VIII. cum illo expirauerit. Eius enim Bulla non fuit lata pro tempore limitato, sed absolutè, & ad perpetuam rei memoriam,

moriā, vt patet ex initio Bullæ. Et præterea lex de sua natura est perpetua, nisi reuocetur à potente reuocare: & prædicta Bulla Clementis VIII. nunquam fuit reuocata per aliquem successorem Pontificem: imo Urbanus VIII. in ista Bulla clarè innuit prædictam Bullam Clementis, semper in suo robore mansisse. Et dato, & non concesso quod prædicta Bulla Clementis cum illo expirauerit, satis innouata, & confirmata est per hanc Bullam Urbani VIII.

8 Numero 11. & 12. ait, quod clausula Bullæ Cruciatæ dicens: *Præter facultates concessas Religiosis*, &c. non debet referri nisi solū ad indulgentias, non verò ad priuilegia Religiosorum: ita quod sensus sit, Papam, vel Commissarium Cruciatæ, non reuocare indulgentias Religiosorum, quoad ipsos Religiosos: reuocare tamen priuilegia Religiosorum de non recipienda Cruciatæ quo ad illa duo. Huius rei causam assignat cum multis Iuristis, quia, inquit, clausula posita in fine dispositionis non semper refertur ad omnia suprà contenta: & cum in Bulla in præcedentibus fiat mentio indulgentiarum, facultatum, & priuilegiorum, ait quod clausula exceptiua in fine Bullæ, non refertur ad ambo, id est, priuilegia, & indulgentias: sed ad solas indulgentias, vt sit sensus: non reuocamus indulgentias, quas habent Religiones erga suos subditos: sed derogamus priuilegiis, quæ habent Religiones quoad suos subditos: quorum priuilegium vnum est ne recipiant Cruciatam quoad illa duo; cui priuilegio dicunt hîc derogari per Cruciatam. Ad hoc argumentum respondet Rodriguez *tomo 1. qq. 9. 21. art. 10.* dicens, quod illa clausula exceptiua; (*Exceptis*, &c.) debet referri & ad indulgentias & ad priuilegia, vt sit sensus: Non suspendimus indulgentias, neque priuilegia,

legia, quæ habent superiores regulares quoad suos subditos. Assignat causam, quia clausula posita in fine dispositionis refertur ad omnia præcedentia: pro quo citat textus Bartolum, Abbatem, Mendozium. Eodem modo explicat Suarez *tomo 4. de Relig. lib. 2. cap. 16. num. 4.* Et Sanchez *lib. 6. de Matrim. disp. 22. n. 19.* dicens cum multis ibi citatis, maximè cum Nauarro *consil. 34. de Simonia*, qui dicunt quod clausula posita in fine dispositionis, refertur ad omnia præcedentia, quando omnium præcedentium est eadem ratio. Et in nostro casu est eadem ratio, imò maior ratio ut non suspendantur priuilegia Religiosorum quoad usum Cruciatæ, quàm quod suspendantur indulgentiæ illorum. Ratio est clarissima. Nam ex suspensione indulgentiarum quoad Religiosos non resultat relaxatio disciplinæ regularis, & præiudicium Religionis, sicut resultaret ex eo quod priuilegia Religiosorum quoad usum Cruciatæ suspenderentur quoad illa duo, ut ex dictis, est notorium. Minus enim nocet Religioni carere indulgentiis, sine quibus potest homo saluari, licet minus commodè, quàm per facilitatem veniæ à reseruatis sumere occasionem, & incentiuum peccandi iuxta dicta in præcedentibus. Hoc ipsum ego deduco ex textu ipsius Bullæ Cruciatæ. In qua postquam Commissarius Bullæ dicit quod suspendit, &c. (exceptis facultatibus, &c.) istas facultates, quæ sunt priuilegia, dicit se non suspendere. Non dicit, se non suspendere indulgentias: sed addit, facultates, quæ scilicet sunt priuilegia: facultates verò non sunt indulgentiæ, sed licentiæ, & priuilegia: verba autem non sunt confundenda, sed accipienda in significatione propria, & vsitata. Et quod Prælati possit subdito limitare confessorem, & illi casus reseruare, non est indulgen

indulgentia, vt patet, sed est priuilegium : Bulla verò dicit quod non suspendit priuilegia, seu facultates, quas habent Prælati circa suos subditos. Hoc ipsum tenet Henric. lib. 7. de Indulg. cap. 22. §. 3. in gloss. littera G. vbi dicens primò quod Papa Gregor. XIII. & alij, declararunt non fuisse suæ intentionis quod Patres Societatis Iesu vterentur Cruciatâ quoad illa duo : ait Henriquez quod derogatio Commissarij Cruciatæ, non excedit commissionem, & intentionem Papæ, & est strictè interpretanda ne noceat bono communi Religionis. Sic ille. Quo nihil clarius dici potuit. Et idem ait ibidem littera H. in glossa citans alios.

9 Numero 13. ait, quod non est præsumenda inconstantia in Papa, qui cùm proximè antea concesserit Cruciatam in fauorem fidelium, & locorum Africae, statim post id reuocet per priuilegia Religiosorum. Respondeo in hoc Papam non fuisse inconstantem, neque mutasse consilium: nam à Leone X. id fuit prohibitum Religiosis, vt suprâ vidimus. Et ex Bulla Clementis VIII. clarè colligitur id nunquam licuisse Religiosis. Et præterea non est inconstantia in principe mutare legem pro circumstantia temporum, & causarum recurrentium, vt praxis quotidiana obseruat.

10 Numero 14. & 15. ait Pium IV. concessisse Religiosis, vt possent vti Cruciatâ quoad illa duo. Respondeo, quidquid sit de illa concessione Pij IV. quam citat, eundem Pium IV. quasi pœnitentem facti postea particulari Bulla prohibuisse sub pœna inobedientiæ, & aliis pœnis, ne fratres Minores, & Moniales sanctæ Claræ vterentur Cruciatâ, nisi cum licentia petita, & obtenta suorum Prælatorum. Tenorem istius Bullæ ad longum ponit Rodriguez in Bullario fol. 856. Et præterea post Pium IV. Clemens VIII. id expressè, & abso

& absolute prohibuit omnibus Religiosis, cum clausula derogatoria constitutionum Apostolicarum, per quam derogationem satis derogata manebat illa prima concessio Pij IV. quam pro se adducit Author tractatus.

11 A numero 16. incipit Author agere de privilegio Regis, quem vocat contractum onerosum, qui proinde nequeat renocari. Contra quod satis iam dixi in præcedentibus non dari talem contractum onerosum inter Papam, & Regem. Et in particulari *num. 18.* facit Author hanc interrogationem. Vbi est causa iusta, ob quam possit Papa abrogare hoc privilegium, & contractum onerosum? Respondeo primò, fundamentum nostræ opinionis esse quatuor, vel quinque Bullæ Summ. Pontificum suprâ citatas, qui vsum Cruciatæ quoad illa duo Religiosis interdixerunt, de quibus Pontificibus piis, doctis, & sanctis, non est præsumendum quod errauerint, vel egerint inconsideratè in materia graui, sed quod ad id faciendum iustam causam habuerint. Respondeo secundò causam iustam, & sufficientissimam ad id fuisse obuiare præiudicio magno resultanti Religionibus ex vso Cruciatæ quoad illa duo, vt patet ex supradictis. Et quod ista sola causa sit sufficiens ad abrogandum privilegium, tenet expressè Syluester verbo *privilegium, q. 10. versic. 7.* vbi ait quod causa reuocandi privilegium, est, si aliis sit læsio enormis. At si Religiosi vtantur Cruciatâ quoad illa duo sit læsio enormis Religionibus, vt patet ex dictis Clementis VIII. & Urbani VIII.

12 Numero 22. & 23. contendit quod ad reuocandum prædictum privilegium Regium est necessaria expressa, & specialis reuocatio. Ad hoc iam suprâ clare ostendimus non esse necessariam specialem, & expressam

pressam reuocationem, sed sufficere clausulam generalem reuocatoriam.

13 *Numero 24.* dicit quod declaratio Cardinalium missa ad Archiepiscopum Valentiae, in qua praedicti Domini dicebant Moniales non posse confiteri alteri Sacerdoti nisi assignato per suum Praelatum virtute cuiusvis indulti, ait Author, hanc declarationem non habere locum in hoc casu, ad quod citat pro se Suar. & explicat citatus Author, quod illa declaratio Cardinalium prohibens ne Moniales virtute Cruciatæ confiteantur confessario nisi approbato per ordinarium, & Praelatum suum, solum prohibet quod virtute Cruciatæ non confiteantur simplici Sacerdoti, qui non sit approbatus ab Ordinario: secus si sit approbatus ab Ordinario, tunc enim (ait ille) poterunt illi confiteri virtute Cruciatæ etiam si non habeant licentiam sui Praelati regularis. Sic ille exponit praedictam declarationem DD. Cardinalium. Ad hoc ego respondeo, quod melius se debet explicare Suarez, quem Author citat, quam ipse Author illum explicat. At Suarez *tom. 4. de Relig. lib. 2. cap. 16. num. 5.* citat eandem declarationem, & absolute dicit non posse Moniales eligere confessorem praeter approbatos à suo Ordinario ad audiendas confessiones. Eodem modo citat, & explicat hanc declarationem Cardinalium Capuccinus in suis notationibus ad compendium, verbo *Cruciata*, §. *Et ultra hoc*, ubi ait absolute quod per dictam declarationem, non possunt Moniales eligere confessorem praeter assignatum à superiore monasterij ipsarum Monialium. Iam verò declarationes Cardinalium, qui suas declarationes communicant cum Summo Pontifice, habent maiorem vim quam declaratio Commissarii generalis sanctæ Cruciatæ.

14 *Numero 33.* dicit quod Commissarius generalis Cruciatæ anno præterito 1630. mense Decembri reuocauit cum sua reuocatione generali Bullam per quam D. Urbanns VIII. prohibuit Patribus Societatis Iesu ne vterentur Cruciatâ quoad illa duo, & omnia alia quæ poterant adduci in contrarium. Respondeo primò me id non credere, cùm inferior non possit reuocare legem superioris. Respondeo secundò, quod si id fecit, nulliter fecit, ob eandem proximam causam. Ad quod videatur quod dixi paulò suprà *num. 8.* in fine, ex Henriquez dicente non posse Commissarium Cruciatæ explicare Bullam Papæ ultra, vel præter intentionem Papæ. Iam verò post Bullam ultimam D. Urbani VIII. suprà transcriptam, non potest Commissarius Cruciatæ illud sic declarare, quia in illa talis illi adimitur potestas declarandi. Neque item prædictus Commissarius Cruciatæ declarauit, nec reuocare potuit Bullam Clementis VIII. latam pro omnibus Religiosis. Neque est necessarium quod dicit prædictus Author, videlicet quod Religiosi Portugalliæ impetrent Bullam à Sum. Pontifice, per quam specialiter derogetur priuilegio regali per contractum onerosum: hoc enim iam abundè impugnatum est suprà, cùm probauimus non dari talem contractum onerosum inter Papam, & Regem in materia Cruciatæ.

15 *A numero 35. & seqq.* nritur ostendere quantam potestatem habeat Commissarius Cruciatæ ad impedienda, & reuocanda illa quæ impediunt priuilegia Cruciatæ. At iam respondi numero proximè præcedenti non posse Commissarium Cruciatæ aliquid declarare ultra vel extra intentionem, & clara verba Sum. Pontificum expressè prohibentium ne Religiosi

vtantur Cruciata quoad illa duo : nisi aliàs prædictus Author velit Commissario Cruciatae concedere maiorem potestatem , quàm Summo Pontifici : quod de illo non credo.

16 Numero 38. ait Papam posse concedere Commissario Cruciatae facultatem ad omnia reuocanda , quæ impediunt priuilegia Cruciatae. Respondeo posse id Papam , sed non constare quod Papa hoc illi concesserit : imò constare oppositum , maximè ex ista Bulla vltima D. Urbani VIII. in qua Papa dicto Commissario adimit potestatem declarandæ.

17 Fol. 24. dicit quod ex *Madrid* allatum est quoddam testimonium, seu consilium scriptum, in quo dicebatur posse Religiosos Societatis Iesu vti Cruciata quoad illa duo. Non dubito aliquem tale testimonium , vel consilium dedisse. Sed oportet videre quis ille fuerit , & quomodo intentum probaret , & ad tot Bullas , & suprâ obiecta respondeat. Facile enim est dicere, sed aliquando difficile probare. Addit tandem in fine tractatus , quod quatuor Doctores Conimbricenses prædictam opinionem approbarunt illi subscribendo. Respondeo imprimis prædictos Doctores non vidisse vltimam Bullam D. Urbani VIII. quæ tam clara est, vt contra illam scribere, vel subscribere hodie temerarium sit. Secundò respondeo prædictos quatuor Doctores Conimbricenses modò viuentes non esse maiores , & fortè neque æquales quàm sint Doctores qui istam doctrinam tradiderunt, non posse scilicet Religiosos vti Cruciata quoad illa duo : & hoc docuerunt ante vltimam Bullam D. Urbani VIII. supra transcriptam. Hoc docuerunt ante illam Bullam Suarez *tom. 4. de Relig. lib. 2. cap. 16. num. 3. fol. 132.* & hic sufficiebat cum fuerit talis Theologus, & Religiosus: materiam

materiam enim absolutionum, & reservationum casuum melius tractant Religiosi, quàm Canonistæ, & Legistæ. Citat Suarez pro hac sententia Garciam de *beneficijs*. Cordubam, Parasselum, Costam, & addit Suarez *num.* 9. quod neque cum licentia sui Prælati potest Religiosus vti Cruciatâ quoad illa duo. Idem tenet Collector priuilegiorum Mendicantium, vir doctissimus in materia priuilegiorum ad dictum compendium verbo *Cruciatâ ad* §. 5. Idem tenent ibidem eod. verbo *Cruciatâ* Córduba, & Capucinus. Idem tenet Rodrig. *tom.* 1. *qq.* 21. *art.* 10. Idem tenet Henriquez *tom.* 1. *lib.* 7. *cap.* 22. §. 2. & 3. vbi licet dicat quod aliquæ Religiones contrarium acceperunt, id non constat, neque hodie potest sustineri, quando omnes ferè Religiones reclamarunt coram Sum. Pontifice, ob quod motus D. Vrbanus VIII. promulgauit citatam Bullam sic claram, & sic rigorosam, citant hi Doctores, maximè Suárez, & Rodriguez, & Capucinus in §. *Dicitur, & duobus seqq.* 6. & 7. Bullas aliorum Pontificum, qui diuersis Religionibus interdixerunt vsum Cruciatæ quoad illa duo. Idem tenet Candelabrum aureum in verbo *absolutio* concl. 2. vbi dicit quod Doctores Salmanticenses de hoc consulti, dixerunt non posse Religiosos virtute Cruciatæ eligere confessorem, neque absolui à reservationis. Denique idem tenet Ludouicus de Beia in *suis responsionib. moral.* 3. p. *casu* 16. vbi etiam id probat validis fundamentis, & adducit alias multas Bullas diuersorum Pontificum. Adducit idem Pater Beia aliam declarationem Cardinalium missam ad Episcopum Caieta, in qua Cardinales idem declararunt, quam etiam citat Capucinus ad compendium verbo *casus reservati*, folio 150. Tandem addit ibidem Beia, quod ius antiquum

nunquam concessit Religiosis ea quæ sunt contra regularem obseruantiam, qualis est libertas confitendi extra ordinem, & absolui à reseruatis quoties libeat. Facit vltimò pro omnibus Religionibus vt nò possint vti Cruciata quoad illa duo, nam Ioannes XXII. in Extrauaganti *Inter cunctas*, de priuilegiis, prohibet ne Religiosi, qui per priuilegium vel statuta Ordinis tenentur confiteri cum Confessoribus Ordinis, possint eligere alium Confessorem. At illa Extrauagans est ius commune, vt patet, & Bulla Cruciata non derogat iuri communi nisi illud exprimat, quod non exprimit.

C A S V S VI.

*An publicato Iubilæo generali, possit illum
lucrari qui non habet Bullam
Cruciata.*

NOmne Iubilæi intelligo vel illum qui publicatur anno vigesimoquinto transacto, qui dici solet Iubilæus magnus; vel etiam illum, qui publicatur à Summo Pontifice initio suæ creationis, vel instante aliqua graui necessitate communi totius Ecclesiæ, qualem publicauit D. Papa Vrbanus VIII. anno 1630. mense Iunio pro graui necessitate tunc urgente. Quo Iubilæo tunc publicato, Commissarius Cruciata promulgauit edictum per quod declarauit prædictum Iubilæum non posse lucrari illum, qui careret Bullâ Cruciata: de quo satis tunc controuersum fuit. Et quod dicta declaratio Commissarij, vera, & valida fuerit,

& quod Iubilæus non acquiratur ab illo qui caret Cruciatâ. Probatur primò, quia prædictus Commissarius ex concessione Bullæ Cruciatæ habet auctoritatem suspendendi omnes alias indulgentias extra Cruciatam concessas: habet item auctoritatem à Papa declarandi omnes difficultates circa Cruciatam emergentes. At dictus Commissarius singulis annis in publicatione Cruciatæ auctoritate Apostolica suspendit omnes alias indulgentias extra Bullam Cruciatæ concessas: ergo indulgentiæ cuiuscumque Iubilæi manent suspensæ pro illo anno ita ut non possit illas consequi carens Bullâ Cruciatæ. Secundò, quia priuilegia Cruciatæ conceduntur per modum contractus, ut probat Sanchez *lib. 8. de Matrim. dispur. 32. num. 9.* cum aliis ibi citatis. At Papa in Bulla Cruciatæ concedit Commissario priuilegium suspendendi indulgentias absolutè: ergo iste quasi contractus Cruciatæ non potest dissolui à Papa per concessionem alterius indulgentiæ extra Cruciatam: tunc enim fraudarentur redditus Cruciatæ, cum læsione Regis Hispaniæ, qui ex redditibus Cruciatæ soluit magnam pensionem singulis annis Summo Pontifici.

1 Hoc non obstante, dico, quod tempore cuiuscumque Iubilæi generalis publicati, poterit illius indulgentias, & gratias lucrari etiam ille, qui non habuerit Bullam Cruciatæ. Probo primò, ex duabus clausulis positis in dicto Iubilæo. Prima est, quando in fine Bullæ incipit ponere, non obstantias, sic habet: *Non obstantibus constitutionibus, & ordinationibus Apostolicis, per quas facultas absoluendi in certis casibus in illis expressis, tali modo reservatur Pontifici Romano, quod nec similes, vel dissimiles concessionibus Iubilæi, indulgentiæ, facultates, nequeant alicui proficere, nisi facta expressa illarum derogatio*

derogatione. In quibus verbis Papa clarè, & expressè concedit, quod possit lucrari istum Iubilæum, non obstante quavis derogatione Apostolica, quamvis in illa dicatur, quòd non valeant gratiæ, & facultates alicuius Iubilæi: quod non dicitur in Bulla Cruciatæ, cum suspendit indulgentias alias. Imò licet Commissarius Cruciatæ in sua suspensione diceret, se suspendere omnes facultates, & indulgentias etiam Iubilæi futuri; hoc non obstante possunt illum lucrari etiam carentes Cruciatâ ob clausulam supradictam, dicentem, quod possint illum lucrari, non obstante quacunque reuocatoria cuiusvis Iubilæi. Secunda^{clausula} istius Iubilæi, per quam id ipsum probatur, ponitur in verbis proximè sequentibus post suprà citata verba eiusdem Bullæ, siue Iubilæi, dum sic dicitur: *Que omnia, & singula illorum, & quavis alia contraria, hac vice nominatim, & expressè ad effectum presentium litterarum derogamus, &c.* Quo nihil clariùs dici potuit ad intentum. In his enim verbis ait Papa, quod ad lucrandum istud Iubilæum derogat omne illud quod poterat illius lucrationem impedire. Dato igitur quod suspensio gratiarum, indulgentiarum, & facultatum facta per Commissarium Cruciatæ esset contraria isti Iubilæo, abrogata & suspensa maneret per clausulam secundam proximè dictam. Secundò probatur, ex *reg. 61. de Regul. iuris in 6.* quæ dicit: *In concessione generali non veniunt ea, quæ quis non esset verisimiliter in specie concessurus.* Vbi glossa verbo, *Generali*, multa dicit ad intentum: maxime quod in generalibus, & in dubiis inspicimus illud quod est verisimile, de quo ponit exempla. Quamvis ergo Papa in Bulla Cruciatæ concedat Commissariò Cruciatæ generalem licentiam suspendendi indulgentias, facultates, & gratias

extra

extra Cruciatam concessas fidelibus; in hac concessione generali non est credendum quod illi Papa concedat ut possit suspendere gratias, & indulgentias futuri Iubilæi quem Papa postea pro grauissima Ecclesiæ necessitate concedere voluerit, hoc enim esset Papam sibi manus arctare; & præterea inde sequerentur inconuenientia mox dicenda.

2 Consonat prædictæ regulæ generali, id quod tradit Nauar. *lib. 3. consil. tit. de Relig. domibus consil. 6. n. 3.* ubi citans quamdam glossam, quam dicit singularem, & communiter receptam, inquit, quod *illud pro lege habendum est, quod legislator statuisset, si cum legem faceret id illi propositum fuisset.* At constat, quod si Papa, quando concessit Commissario Cruciatæ licentiam suspendendi indulgentias extra Cruciatam, interrogaretur, an etiam id illi concederet pro tempore Iubilæi futuri ab ipso Papa postea concedendi, utique diceret Papa, non esse mentem suam tale concedere, cum suæ libertatis coarctatione: ergo id Papa non concedit in concessione facta Commissario. Nunc addo rationes, & claras coniecturas, ob quas credendum non est Papam concedere Commissario Cruciatæ, ut tempore Iubilæi futuri possit suspendere gratias Iubilæi quoad illos qui non habent Bullam Cruciatæ. Prima est, quia Papa hoc Iubilæo, ait, cupere se, ut omnes fideles Christiani participant hunc pretiosissimum thesaurum, ideoque illis concedere tale, & tale: & exprimit statim omnes, & singulos status fidelium; homines scilicet, mulieres, ecclesiasticos & sæculares, & regulares. Si ergo Papa cupit quod omnes, & singuli cuiuscunque status Iubilæum lucrentur, non est credendum quod eiusdem Iubilæi assencionem arctet, ad solos habentes Bullam Cruciatæ, cum sciat non om-

nes illam posse recipere, cum multi sint in Ecclesia pauperes, multique Religiosi, qui propter inopiam, & propter sua statuta non possunt dictam Cruciatam accipere; & sic deessent illi necessitati Ecclesiæ pro qua Iubilæus conceditur, orationes, & suffragia tot pauperum, & Religiosorum: quod est contrā, vel præter intentionem Summi Pontificis. Secunda coniectura est, quia Papa in hoc & aliis Iubilæis dispensat ut possint illud lucrari illi, qui aliàs sunt impediti ad facienda illa, quæ in eo iniunguntur, quale est ieiunare, dare eleemosynam, &c. dummodo illa per Confessorem commutentur in alia opera pia. Ergo clarè Papa innuit quod sua sit intentio, quod pauperes qui non habent pecuniam pro danda eleemosyna ad Cruciatam comparandam possint nihilominus lucrari prædictum Iubilæum non obstante impedimento paupertatis. Tertia coniectura est: nam si Papa in Bulla Cruciatæ concedit quod possit illam obtinens lucrari indulgentias stationum Romæ, illas non exprimendo: quomodo credendum est nolle Papam ut indulgentiam plenariam Iubilæi magni concessi pro bono communi toto Ecclesiæ, assequatur is qui caruerit Bulla Cruciatæ.

3 Quod verò hæ coniecturæ faciant probationem sufficientem in re morali, probatur ex eo quod argumentum à coniecturis habet vim ad probandum in re morali, ut patet etiam ex sacra Scriptura. Nam Act. 2. in die sanctissima Pentecostes, cum Apostoli pleni Spiritu sancto loquerentur mirabilia, ob quæ Iudæi arbitrati sunt, illos ebrios esse: D. Petrus probavit coram Iudæis Apostolos non esse ebrios, quia in illa hora, quæ erat hora tertia diei, non solebant Iudæi manducare, neque bibere: & ideo Apostoli in illa hora

hora tertia, non debuerant iam manducasse, & bibisse: quod argumentum, ut patet, fundatum fuit in coniectura. Sufficiens ergo tres coniecturæ superius adductæ ad probandum non esse mentem Papæ quod Commissarius Cruciatæ in suspensione generali suspendat etiam indulgentias, & gratias Iubilæi magni in posterum à Papa concedendi, & quod illud lucrari nequeat carens Bulla Cruciatæ. Ultimò pro maiori adhuc probatione facit, quod cum idem D. Papa Urbanus VIII. post illius Iubilæum primum anno 1630. publicaret alium Iubilæum generalem anno 1632. pro alia necessitate Ecclesiæ, & Commissarius Cruciatæ etiam tunc per edictum publicum declarauerit ad illud assequendum necessarium esse quod quicumque haberet Bullam Cruciatæ, capitulum Cathedralis Ecclesiæ tunc sedē vacante per edictum publicum affixum ad valuas Ecclesiæ Cathedralis, declarauit oppositum, dicens, posse prædictum Iubilæum assequi etiam illos qui non haberent Bullam Cruciatæ. Et addit capitulum in suo edicto circa hoc extare declarationem eiusdem D. Urbani VIII. idem sic declarantis.

4 Ad primum argumentum in oppositum dico, quod Commissarius Cruciatæ habet auctoritatem suspendendi indulgentias præteritas iam concessas à Summis Pontificibus, non verò ad suspendendas, vel impediendas indulgentias vel facultates futuras, quas Papa in posterum voluerit concedere extra Cruciatam, quia hoc esset ligare manus Pontificis. Et eodem modo intelligendum est habere Commissarium auctoritatem declarandi dubia Cruciatæ, videlicet circa indulgentias præteritas, non futuras. Itaque illa concessio Papæ facta Commissario sic est interpretanda:

tanda : Concedo tibi vt possis suspendere omnes indulgentias præteritas, exceptis illis, quas ego in posterum voluero concedere pro aliqua necessitate. Quod verò ista exceptio debeat intelligi in illa concessione generali Papæ, constat ex duabus regulis suprà positis, quæ dicunt, in concessione generali non condi illa, quæ concedens non concederet si de illis specialiter fuisset interrogatus : & ex alia regula dicente, illud habendum esse pro lege, quod legislator responderet, si illi propositum fuisset cum legem condidit.

§ Ad secundum argumentum dico, inter Papam & Regem non intercedere contractum onerosum, quando Papa illi concedit redditus Cruciatæ, vt satis clarè, & efficaciter suprà manet probatum *casu 4. a num. 1. usque ad num. 5.* in quo numero 5. in speciali probauit, quod licet inter Papam & Regem daretur talis contractus, posset nihilominus Papa prohibere, ne Religiosi Bullam Cruciatæ reciperent, licet in hoc aliquantulum redditus Cruciatæ minuerentur erga Regem, cum illa diminutio cedat in bonum commune Religionum. Quod maiori de causa locum habet in nostro casu, nam ob bonum commune totius Ecclesiæ, potest Papa concedere Iubilæum, quem lucrari possint etiam illi, qui non habent Bullam Cruciatæ, quamuis in hoc redditus Cruciatæ aliquantulum minuerentur : maximè cum ista læsio sit valde modica, utpote concessa pro vno tantum die. Confirmatur ex his quæ tradit Suarez *tom. de legibus lib. 8. cap. 37. num. 5.* vbi ait quod in casu raro poterit princeps (potens aliàs disponere de rebus subditi) reuocare priuilegium datum subdito per modum contractus. Imò addit ibidem Suarez, quod quando princeps
pro

pro casu raro, & valde necessario reuocat priuilegium datum subdito per modum contractus, illud in rigore non est derogatio, sed declaratio, qua princeps declarat non fuisse mentem suam extendere suum priuilegium præteritum ad casum præsentem rarum, & necessarium, quia à principio intelligitur illa conditio in priuilegio inclusa. Sic Suarez, quo nihil clarius ad intentum dici potuit.

6 Posito quod tempore Iubilæi possint illius indulgentias lucrari non habentes Bullam Cruciatæ. Quæris, an è contra publicato Iubilæo quandiu ille durat suspendantur indulgentiæ, & priuilegia Cruciatæ, ita vt Bullam habentes non gaudeant illius priuilegiis pro tempore Iubilæi? Respondet Sanchez *lib. 8. de Matrim. disput. 33. num. 10. & seqq.* per Iubilæum non suspendi indulgentias Cruciatæ, pro quo citat Henriquez, & Rodriguez, & addit quod sic fuit postea declaratum à D. Clemente VIII. dicente per suum Iubilæum non intendisse suspendere indulgentias, & facultates Cruciatæ.

C A S V S V I I .

*De secunda indulgentia contenta in Bulla
Cruciatæ post medium annum à
sumptione illius.*

COncedit Papa in Bulla Cruciatæ, quod dans elemosynam ordinariam pro sustentatione locorum Africæ lucretur vnâ indulgentiam plenariam in principio anni; deinde si post sex menses à Bullæ sumptione

ptione det dimidium consuetæ eleemosynæ, lucretur aliam indulgentiam plenariam. Ultra has duas indulgentias concedit Papa statim post, quædam indulta quæ non sunt indulgentiæ, sed quasi priuilegia, verbi gratia, primò, vt tempore interdicti possint Missam audire. Secundò, vt possint absolui à censuris, & casibus reseruatis. Tertiò, vt possint illis certa vota commutari. Quartò, vt de debitis incertis possint facere compositionem. Vltimò, vt possint liberè comedere oua, & lacticia in diebus aliis vetitis.

Hoc posito exortum est dubium, an is qui in principio anni dedit consuetam eleemosynam, lucratusque fuit primam indulgentiam plenariam, sed post sex menses non dedit illam dimidiam eleemosynam, nec proinde lucratus est secundam indulgentiam recipiens Bulletum paruum: an iste talis post illos sex menses à prima Bullæ sumptione possit vti illis quinque priuilegiis vsque ad finem anni, videlicet absolui à censuris reseruatis, &c. An verò ista priuilegia perdiderit in medio anni, cum primùm noluit accipere Bulletum paruum dando dimidiam eleemosynam?

I Audiui aliquos sensisse, quod iste talis, qui in dimidio anni non dat dimidium eleemosynæ, nec recipit Bulletum paruum, statim exinde amittit illa quinque priuilegia, ita vt non possit post mediam partem anni absolui à reseruatis, comedere oua, &c. Horum rationes non vidi. Fortasse id sibi persuadent, quia Commissarius Cruciatæ singulis annis in dimidio anni per edictum publicum monet fideles transactum esse dimidium anni, & esse tempus sumendi secundum Bulletum pro secunda indulgentia. Quæ Commissarij admonitio videtur innuere, quod illa quinque priuilegia Cruciatæ iam cessarint habenti Bullam

Bullam magnam, nisi accipiat Bulletum paruum.

2 Hoc non obstante, credo quod qui in principio anni suscepit Bullam dans consuetam eleemosynam, & tamen post sex menses non dedit dimidiam eleemosynam, nec sumpsit Bulletum paruum, iste talis non est quidem affectus secundam indulgentiam: sed tamen non amisit illa quinque priuilegia pro secundis sex mensibus, sed poterit vsque ad finem anni illis gaudere, quoad absolutionem à censuris, vötorum commutationem, & similia. Probo hoc, quia Bulla in primo, & secundo §§. id non declarat, neque innuit, quod ad assequenda illa quinque priuilegia, siue facultates, necessarium sit dare post sex menses dimidiam illam eleemosynam sumendo Bulletum paruum: quando verò lex non distinguit, neque nos debemus distinguere, vt dicitur in lege, *neque nos distinguemus ff. de recept. qui arb.* & in materia tam graui debebat Papa admonere fideles, dicendo quod ad assequenda illa quinque priuilegia Bullæ tenebantur omnes sumere Bulletum, dando dimidiam eleemosynam in medio anni. Primò hoc colligitur ex verbis ipsius Bullæ, in qua postquam Papa ait se concedere illas duas indulgentias, incipiens concedere alia quinque priuilegia Bullæ, quæ non sunt indulgentiæ, ter, vel quater ait, quod illis priuilegiis gaudebunt, *Durante eodem anno.* Concedit ergo Papa quod dicta quinque priuilegia durent toto anno illi qui accepit Cruciatam, & dedit consuetam eleemosynam pro prima indulgentia. Si verò quis dicat. clausulam positam in fine Bullæ Papalis referendam esse ad omnia antecedentia: & sic illa verba, *Durante anno*, debere referri, & intelligi, dummodo recipiat vtramque indulgentiam. Respondeo prædicta verba, *Durante anno*, non poni

poni in fine Bullæ, sed in medio. Item prædicta verba non sunt clausula Bullæ, sed solum declaratio, & noua concessio. Dico secundò non semper clausulam positam in fine referri ad omnia antecedentia, vt ait Nauar. in commentario de spolijs clericorum §. 10. num. 3. Item prædicta verba, *Durante anno*, non ponuntur vt conditio, si nempe recipiant ambas indulgentias: sed ponuntur absolute tanquam noua concessio. Secundò hoc ipsum colligo ex alijs verbis eiusdem Bullæ in fine, vbi loquens cum dante eleemosynam primam, & ordinariam, dicit: *Et si quidem tu Fullane dedisti eleemosynam duorum, vel vnus denarij, poteris gaudere prædictis indulgentijs in forma prædicta.* Vbi per verbum *indulgentiæ* necessariò debent intelligi cætera priuilegia Bullæ. Et statim addit hæc verba: *Quod si voluerit etiam lucrari Iubilæum sex mensium, dabis eleemosynam vnus, vel dimidiij denarij.* In quo notentur duo verba. Primum est, *Quod si volueris etiam.* verbum enim, *Etiam*, id est vltra primam indulgentiam cum suis priuilegijs supra positis, dabis, &c. In quo clarè supponit quod dando primam eleemosynam lucratur primam indulgentiam cum suis priuilegijs durante toto anno, licet non lucretur secundam indulgentiam sex mensium, nisi dederit dimidium denarij. Secundò pondero illud verbum: *Quod si volueris lucrari Iubilæum*, id est secundum. Considero inquam verbum illud *Iubilæum*. Nam verbum Iubilæum, non significat priuilegia sed solam indulgentiam, quæ nimis differt à priuilegio, vt constat. Cum ergo Bulla solum dicat, quod pro assequendo secundo Iubilæo dabitur dimidium denarij, non loquitur pro assequendis alijs priuilegijs Cruciatæ, supponit enim Bulla hæc non fuisse amissa ab habente Bullam qui soluit primam, & consue

& consuetam eleemosynam. Vltimò id probò exemplo : nam si aliquis testator alicui personæ relinquat duo legata fauorabilia cum certis obligationibus, vel conditionibus, si talis persona renuntiat alteri ex illis legatis, non ideo censetur renunciare alteri legato, vel illud amittere : quod potest ad casum præsentem applicari. Nam concedit Papa in Bulla duas indulgentias distinctas, vnã in principio anni, alteram post sex menses. Si ergo quis renuntiet secundæ indulgentiæ, videtur quod non ideo amittet priorem indulgentiam cum suis annexis priuilegiis, maximè cum vna indulgentia sit independens ab alia, neque Papa ad secundam obliget.

CASVS VIII.

De venditione cuiusdam agri cum circumstantia vsuræ.

Petrus vendidit Ioanni quemdam cāpum valde fructiferum : pretium inter ambos conuentum fuit, nouem millia ducatorum *de iuro* (vt vocant,) cum declaratione & pacto, quod ipse Petrus dominus retineret apud se campum, & fructus illius, quoad vsque Ioannes in integrum sibi solueret prædicta nouem millia ducatorum *de iuro*. Ioannes soluit Petro statim in principio venditionis quatuor millia ducatorum *de iuro* cum suis redditibus annuis, sub titulo emptionis : & quod residuum, solueret proximè post cum posset. Retinuit Petrus prædictum campum cum suis fructibus, & dicta quatuor millia ducatorum *de iuro*, cum suis redditibus per spatium septemdecim annorum,

eo quod Ioannes nondum soluerat quinque millia ducatorum *de iuro*, quæ promiserat. Quæ quinque millia Petro non sunt soluta à Ioanne, quia Ioannes incidit casu in magnam paupertatem: & sibi sunt confiscata bona sua à Rege propter delictum sibi impositum, & ideo non potuit soluere Petro illa quinque millia, quæ restabant: neque spes est ut tam citò possit illa soluere.

1 Quæritur primò, an Petrus potuit in conscientia per annos septemdecim retinere, ac possidere prædictum campum cum fructibus suis, & simul retinere quatuor millia ducatorum, quæ vocantur *de iuro*, cum redditibus suis. Redditus verò quatuor mille ducatorum *de iuro*, singulis annis accedunt ferè ad centum quinquaginta ducatos auri.

2 Secundò quæritur, an, si hodie Ioannes, eo quod ob inopiam non potest soluere quinque millia ducatorum restantia, voluerit rescindere contractum venditionis, sit audiendus: an verò debeat amittere quatuor millia ducatorum *de iuro*, quæ iam dedit, & hoc etiam in foro interno & externo?

3 Tertiò quæritur, an dato quod in foro externo dubium sit an possit prædicta venditio rescindi, & recuperare quatuor millia, quæ iam dedit; saltem in foro conscientiae teneatur Petrus dominus agri reddere Ioanni quatuor millia ducatorum *de iuro*, quæ iam recepit cum redditibus suis?

Responsio ad primum quæsitum.

4 **A**D primum quæsitum dico, quod Petrus securâ conscientiam potuit à principio retinere campum cum fructibus suis, & simul retinere quatuor millia

millia ducatorum cum redditibus suis vsque dum Ioannes integrum pretium haueret. Ista conclusio est Nauarri *in consilio* §. *de usuris* num. 5. cum aliis quos ibi citat. Eandem tenet Valerius Cartuxanus in lib. *de differentijs utriusque fori*, verbo *usura*, differ. 12. §. *Sed salua pace*. Probatur hoc per duas leges, quarum alteram citat Nauar. citato loco, quæ est lex vltima *titulo de fund. dot.* §. *fin.* Altera lex citatur à Cartuxano citato loco, quæ est lex *sistulas*, §. *qui fundum*, ff. *de contrah. emptione*. Et facit pro eodem intento cap. *Salubriter*, de usuris, in quo decernitur, quod quando Socer promisit genero certam dotem pecuniariâ; & quia in præsententi non habet socer pecunias, assignat genero campum tanquam pignus dotis pecuniariæ: potest talis gener retinere prædictum campum cum fructibus suis quoad vsque non soluat pecuniam sibi promissam. Idem euenit in casu præsententi, in quo Ioannes promisit nouem millia ducatorum pro pretio istius campi cum pacto quod Petrus retineret campum cum fructibus suis quoad vsque solueretur integrum pretium: & proinde poterit retinere dictum campum, & fructus illius quoadvsque sibi soluatur integrum pretium. Nam quamdiu campum non tradidit Ioanni, dominium campi manet apud Petrum. Res autem vbicunque est, fructificat domino suo, vel perit domino, vt communis opinio Theologorum, & Iuristarum tenet. Et ad maiorem claritatem casus, noto cum Nauarro citato loco, quod iste Petrus non retinuit istum campum cum fructibus ratione lucri cessantis, aut damni emergentis: quia illi non cessauit aliquod lucrum, neque obuinit aliquod damnum, vt pater: imò accreuit lucrum, cum fructus campi retineat, & simul possideat redditus quatuor millium ducatorum

de iuro. Neque item Petrus retinet campum cum fructibus ratione dilatae solutionis praecisae, id enim esset usura: sed retinet nos fructus & partem pecuniae iam solutae quasi ignus pecuniae adhuc sibi non solutae, ad quem finem citat Nauarrus Bartolum, & Baldum, & quandam legem iuris ciuilibis, quae apud illum videri potest Idem tenet Azor *tom. 3. lib. 8. cap. 16. q. 2.* in verbis vltimis citatae quaestionis.

5 Et quamuis Comitulus *lib. 3. Respons. Moral. q. 18.* & frater Ludouicus de Beia *in fine secundae partis dubitatione 2.* cum aliis ibi citatis, dicant, non posse venditorem percipere aliquod pretium, nec imponere emptori pensionem, quam soluat, donec soluat totum pretium rei venditae: hi tamen Doctores loquuntur in casu dissimili, videlicet quando venditor constituto pretio venditionis, rem venditam statim tradidit emptori, expectans integram solutionem. In hoc enim casu non potest illi imponere pensionem ob dilatam solutionem, iam enim id esset usura. Et praeterea, cum iam rem venditam tradiderit emptori, iam fructus rei venditae sunt emptoris: quia, sicut supra diximus, res ubicunque est, fructificat domino suo. Et in nostro casu, Petrus nondum tradidit campum Ioanni, sed retinet dominium illius: & ideo fructus sunt Petri, non verò Ioannis, quia nondum habet dominium, & possessionem campi.

Responsio ad secundum quaesitum.

6 **A**D secundum quaesitum, videtur dicendum, quod si Petrus hodie voluerit rescindere venditionem eo quod non possit soluere quinque millia ducatorum, quae desunt ad integram solutionem pretij,

tij, debet amittere quatuor millia ducatorum quæ iam soluerat pro principio solutionis, seu tanquam arrham solutionis. Sic enim videtur decernere lex istius regni *lib. 4. Ordinat. tit. 2. §. 3.* vbi decernitur quod postquam venditio facta est ex consensu amborum partium, non poterit postea alter illorum pœnitere vel retrocedere. Si verò aliquis pœniteat, & iam partem pretij soluerat, amitteret id quod antea iam dederat in pœnam suæ inconstantiae. Et hoc magis locum habebit in isto nostro casu, si in isto contractu venditionis agri, fuit apposita clausula, quod non soluente Ioanne dicta quinque millia ducatorum restantia in termino ibi præfixo, amitteret Ioannes quatuor millia ducatorum *de iuro*, iam tradita pro initio traditionis: tunc enim esset pœna conuentionalis, quæ potest apponi contractibus, sicut Doctores communiter, & praxis obseruant. Et quamuis in hoc contractu non esset apposita prædicta pœna conuentionalis, videtur quod debuit amittere quatuor millia ducatorum iam tradita per aliam legem Portugalliae *eodem lib. 4. Ord. tit. 8. §. 2.* vbi dicitur, quod si propter culpam venditionis, qui non tradidit rem venditam, damnum aliquod res vendita pateretur, manebit venditor obligatus pro damno secuto emptori ob culpam suæ moræ in re vendita tradenda. Ergo à simili, si per culpam emptoris in non tradendo pretio constituto aliquod damnum emptor passus fuerit, sibi debet imputari ob moram solutionis integri pretij, in quo damnum aliquod venditori Petro dedit. Nam si Petrus haberet integrum pretium venditionis, & iam tradidisset agrum venditum, non maneret obnoxius sterilitatibus temporis, & quietius viueret ob recuperationem reddituum agri, in qua debebat expen-

fas facere, quas non faceret in recuperatione reddituum nouem millium ducatorum *de iuro*, si illa quietè possideret.

7 Quo non obstante, Dico quod Ioannes hodie licet velit rescindere venditionem, eo quod soluere non potuerit residuum pretij, non debet amittere quatuor millia ducatorum, quæ iam soluit, sed potest illa petere in iudicio. Hæc conclusio non potest melius probari, quàm respondendo ad obiectiones proximè positas. Ad primum igitur dico, quod lex Portugalliæ *lib. 4. tit. 2.* non est contra nos. Nam ibi clarè loquitur lex de illo qui pœnituit post venditionem, vel emptionem finitam, & perfectam: at in isto casu, venditio non est perfecta, neque finita, sed est suspensa quoadvsque Ioannes soluat integrum pretium nouem millium ducatorum, tunc enim concluditur venditio. Sic tenet Cartux. *cit. §. Sed salua pace*; & citat ad hoc legem *quod si neque 14. ff. de peric. & comodo rei vendita*, cum glossa ibidem. Et hoc præcipuè locum habet in isto casu, quia in hac venditione vsque hodie non est facta scriptura publica venditionis, etiam ex consensu Petri, & Ioannis: quod est clarum signum eos noluisse venditionem perficere vsque dum pretium totum solueretur. Lex verò illa Portugalliæ dicit quod non potuerunt pœnitere post venditionem perfectam. Hoc expressè tenet Rabello *lib. 9. de contract. quest. 1. sect. 2. num. 9.* vbi ait quod si contrahentes intendunt perficere contractum per scripturam, contractus censebitur perfectus, donec fiat scriptura, licet in pretio conueniant ante scripturam: & citat vnâ legem iuris ciuilis, aliam Portugalliæ, aliam Regni Castellæ. Ad secundum argumentum, siue exemplum pœnæ conuentionalis,

nalis, dico quod licet in hoc contractu fuisset appo-
 sita pœna conuentionalis (de quo mihi non constat)
 vt Ioannès non soluens termino statuto, amitteret
 quatuor millia ducatorum iam soluta; hodie Ioan-
 nes illa non amittet, siquidem ob paupertatem inopi-
 natam quam incurrit, soluere non potuit: & sic non
 potens soluere, & carens culpa, non incurrit pœ-
 nam, quia vbi non est culpa, non exigitur pœna. Sic
 tenet expressè Rebello *lib. 8. de contract. q. 9. §. Addidi.*
 & Nauar. *in sum. cap. 17. num. 215.* in alia simili ma-
 teria, videlicet in mutuo, dicens quod si mutuans
 fecit pactum cum mutuuario, vt si mutuarius non
 solueret mutuum in termino assignato, teneatur solue-
 re certam pœnam conuentionalem. Ait Nauarrus,
 quod si mutuarius non soluit in termino præfixo
 propter inopiam, in quam incidit, non tenetur ad
 illam pœnam soluendam. Idem tenet Reginaldus
tom. 2. lib. 25. num. 230. Quod probatur clarè ex cap.
significante, de pignoribus, & melius ex cap. 2. *de con-*
stit. vbi Papa citat in textu regulam illam iuris, quæ
 dicit: *Rem quæ culpa caret, in damnum vocari non con-*
uenit. Pro quo ibi glossa multa congerit in verbo,
Culpa caret. At in nostro casu Ioannes non soluens
 restantia quinque millia ducatorum, propter inopiam
 quam incurrit, caret culpa: ergo non debet illam
 pœnam amittendi quatuor millia ducatorum iam
 tradita. Ad tertium exemplum de secunda lege istius
 Regni citata, quæ dicit venditorem teneri ad re-
 sarcendum damnum resultans ex mora quam ha-
 buit in tradenda re vendita. Respondeo primò sicut
 respondi proximè ad exemplum pœnæ conuentiono-
 nalis, quæ non debetur, quando ob impotentiam
 inopiæ solutio fieri non potuit à debitore; est enim

eadem ratio in non soluenda illa pœna conuentionali propter inopiam, atque in isto casu non soluendi damnum resultans ex mora non tradendi rem venditam, vel ex non soluendo statim totali pretio propter inopiam superuenientem. Et debet intelligi lex illa, quando mora tradendi rem fuit culpabilis, secus si non fuit culpabilis.

Dico secundo ad idem argumentum, quod illa damna, quæ ibi dicitur Petrus incurrisse ob dilatam solutionem quinque millium ducatorum, non fuerunt damna in rigore, imò Petrus lucrum magnum inde reportauit. Nam per annos decem, & septem possedit redditus quatuor millium ducatorum, quæ iam recepit, qui redditus per illud tempus plus valent, quàm duo millia ducatorum auri, & simul possedit redditus, seu fructus sui agri, & sic non damnum, sed potius lucrum, & commodum magnum sensit. Et hæc responsio, & probatio magis confirmata manebit ex proximè dicendis in solutione, vel responsione ad 3. quæsitum.

Responsio ad 3.

8 **A**D tertium quæsitum dico, quod siue venditio rescindatur in foro externo, siue non, Petrus in foro conscientie tenetur restituere Ioanni quatuor millia ducatorum quæ iam recepit, & simul tenetur restituere redditus illorum quos recepit singulis annis ex illis quatuor mille ducatis. Sic expresse tenet Nauarrus *citato consilio 5. de usuris, num. 5.* ubi ponit hæc verba: *Quando venditor rei, accepta parte pretij retinet illam cum suis fructibus, donec totum pretium solvatur, iuxta legem Iuliam, emptor debet*

debet habere partem fructuum pro rata partis pretij soluti iuxta legem memorabilem, &c. Et paulò pòst subiungit sic : *Venditor qui iam accepit partem pretij, & retinet fructus rei vendita, quasi pignus, fructus quos recipit quoad illam partem pretij iam soluti, debet restituere* : quo nihil clarius dici potuit. Et citat Nauarrus Baldum, & Salicetum. Idem docet Reginaldus citato lib. 25. num. 230. §. *Aduertendum est secundò* : ubi citans, & sequens Nauarrum in alio loco Sum. Latinæ, ait, quod si inter mutuantem, & mutuatarium pactum fuit, quod non soluente mutuuario in termino præfixo teneretur ad soluendam certam pœnam conuentionalem : si tamen mutuarius ante terminum præfixum soluit partem pretij, & in termino assignato non soluit pretium restans : in tali casu mutuarius transacto termino non debet soluere totam pœnam impositam : sed de illa pœna detrahenda est pars illa quæ respondet parti pretij iam soluti. Eodem modo, quamuis in nostro casu appositæ fuerit pœna conuentionalis Ioanni non soluenti in termino assignato : cum tamen iam Ioannes in principio soluerit ferè dimidium pretij taxati, non debet amittere illud dimidium pretij, neque partem fructuum illi pretio soluto respondentem. Probat hoc Nauarrus citato consilio 5. quia nemo debet cum aliena iactura locupletari, iuxta legem iure naturæ, ff. de Regul. iuris, & cap. Locupletari, de Reg. iuris in 6. At si rescissâ istâ venditione de qua agimus, Petrus non teneretur restituere quatuor millia ducatorum iam recepta, & redditus illius, Petrus valde locupletaretur cum magna iactura Ioannis ; ergo Petrus tenetur ad illa prædicta restituenda : cum enim nihil perdiderit de fructibus sui campi, acqui-

fuit quatuor millia ducatorum *de iuro* cum redditibus suis per annos septemdecim. Hoc fundatur in illa doctrina communi Theologorum, & Iuristarum dicentium: Quod si ego recepi aliquam rem bona fide, quæ tamen erat aliena; postquam cognoui illam esse alienam, teneor restituere rem, & fructus extantes propter quos factus sum ditior. Sic docet D. Thom. 2. 2. *quest. 62. art. 6.* Cajetanus, Sorus, Ca-uar. & Nauar. quos citat & sequitur Rabello *lib. 2. de restit. quest. 3. num. 1. & sequentibus*, pro quo adducit exempla. At Petrus factus est ditior cum quatuor mille ducatis iam receptis, & hi extant, cum sint *de iuro*: ergo illos debet restituere si venditio rescindatur, vel si Petrus reliqua soluere non potuerit.

9 Quod verò hæc quatuor millia ducatorum iam soluta, sint hodie Ioannis, illorúmque dominium non amiserit, probatur, quia Ioannes hæc non dedit Petro gratis, vt patet, neque absolutè, sed sub conditione, si venditio perficeretur, quæ tamen venditio non habuit effectum: donatio verò conditionalis, seu contractus conditionalis non obligat conditione non secutâ, vt communis Doctorum tenet opinio.

10 Probo insuper id ipsum, quia, vt suprâ dixi *in hoc casu 8. num. 4.* ex Nauarro, Petrus qui recepit illa quatuor millia ducatorum in partem pretij illa retinuit non ratione lucri cessantis, vel damni emergentis; sed illa recepit, & retinuit tanquam pignus reliqui pretij nondum soluti, vt ait Baldus, & Bartolus, & lex ibi citata à Nauarro, & Azor quem ibi citauimus. At ista quatuor millia ducatorum *de iuro* recepta in pignus, sunt fructifera, vt patet, cum
singulis

singulis annis mille ducatos *de iuro* valeant ad minus quadraginta ducatus reddituum. At constat ex Doctoribus quod creditor non potest retinere fructus pignoris fructiferi, nisi fortè ratione expensarum quas fecit in conseruando pignore: vt probat Rabello *lib.8. de vsuris 2. p. quest. 21. num. 2.* nisi fortè illos fructus recipiat ratione lucri cessantis, vel damni emergentis: quæ duo Petro venditori non acciderunt, cùm neque illi cessauerit lucrum, neque aliquod damnum acciderit, vt suprà vidimus: ergo prædicta quatuor millia ducatorum recepta in pignus tenetur restituere cum redditibus illorum venditione non sortitâ effectum. Confirmatur id ipsum, quia Ioannes soluens illa quatuor millia ducatorum, pro initio solutionis acquisiuit ius ad illam partem campi respondentem partiali pretio à se soluto: ergo si venditio rescindatur, tenebitur Petrus saltem restituere Ioanni, vel quatuor millia ducatorum iam recepta, vel partem campi respondentem illi pretio iam soluto: aliàs committeretur clara iniustitia.

11 Hanc sententiam defendit Farinacius *tom. 1. decision. Rota Romana, decision. 50. num. 9.* dicens, & probans ex lege *Curabit Cod. de act. empti*, dicens quod impossibile est quod quis simul cum re habeat pretium rei: in hoc verò casu Petrus habet rem,

idest, campum, & simul habet dimidium

pretij. Idem tenet Reginaldus

citato lib. 25. num. 198.

§. *Nota 2.*

CASVS

CASVS IX.

*De locatione reddituum cuiusdam
Commendæ.*

Quidam Commendatarius locauit fructus suæ commendæ quibusdam conductoribus per annos nouem sub certo pretio. Post contractum celebratum, coloni terrarum commendæ nouas terras antea incultas arauerunt, & excoluerunt, vnde resultauit vt fructus commendæ crescerent in tantum, quod conductores lucrarentur ex locatione vltra dimidium illius pretij quod commenda locari consueuerat. Commendatarius quarto anno post locationem incidens in magnam inopiam, & videns incrementum notabile fructuum commendæ voluit rescindere contractum locationis, illumque augere ad iustum pretium pro ratione fructuum nouorum tunc extantium.

Quæritur primò, an prædictus Commendatarius potuerit suam commendam locare vsque ad annos nouem?

Quæritur secundò, an, dato quod potuerit ita locare, possit post contractum locationis celebratum rescindere locationem, & obligare conductores ad sibi soluendum pretium pro ratione fructuum tunc extantium in redditibus præsentibus commendæ.

Responsio ad primum quæsitum.

Quod attinet ad primum quæsitum, videtur, quod Commendatarius non potuit locare commendam

dam usque ad annos nouem : nam commenda, & fructus illius sunt bona Ecclesiæ, cum sint decimæ; decimæ verò sunt bona Ecclesiæ, ut patet. At bona Ecclesiæ non possunt alienari, neque locari ultra triennium, ut expressè definit Paulus secundus in Extrauaganti, *Ambitiosa*, de rebus Ecclesiæ non alienandis : ergo prædictus commendatarius non potuit fructus suæ commendæ locare usque ad annos nouem.

1 Hoc non obstante, Dico potuisse commendatarium locare fructus suæ commendæ usque ad annos nouem. Tenet hoc expressè Vasquez *tom. de opusc. tract. de reddit. Eccles. cap. 2. dubio 6. num. 31.* citans Couarruiam. Idem tenet Azor *tom. 2. lib. 7. cap. 10. q. 3. in fine*, citans Abbatem Fredericum, Hostiensem, Redoanum. Idem tenet Reginaldus *tom. 2. lib. 25. num. 538.* & Bonacina *tom. 3. disput. 2. q. 4. puncto 11. num. 8.* Et Camillus Borellus *tom. 1. decisionum tract. 16. num. 18.* qui sunt grauissimi, & recentiores Doctores, & sufficientissimi ad acquiescendum huic opinioni : imò dicunt aliqui ex his Doctoribus, maximè Reginaldus, quod possunt isti fructus locari per totam vitam. Licet verò hi Doctores loquantur in terminis solum de beneficiario, quod possit locare fructus sui beneficii modo prædicto, & non loquantur de fructibus commendæ : eadem tamen ratio currit in fructibus commendæ, ut possint locari per totam vitam, cum commenda non sit beneficium Ecclesiasticum, sed sit quid minus beneficio Ecclesiastico. Nam beneficiarius Ecclesiasticus recipit bona Ecclesiastica ratione officij spiritualis, & debet esse clericus, saltem primæ tonsuræ, ut colligitur ex definitione beneficii tradita à Reginaldo *tomo 2. lib. 19. num. 78.*

num. 78. Bona verò commendæ militaris, neque dantur clerico, neque propter officium spirituale, ac proinde ex hoc capite, siue ex parte subiecti bona commendæ sunt bona Ecclesiæ minùs quàm sint bona beneficij Ecclesiastici. Cùm ergo iuxta præcitatos Doctores, beneficiarius possit fructus sui beneficij locare per totam vitam, à fortiori id poterit facere commendatarius de bonis suæ commendæ. Nunc restat adducere rationes, ob quas beneficiarius potest locare fructus sui beneficij vltra triennium, imò per totam vitam, non obstante citatâ Extrauagante *Ambitiosa*, prohibente alienationem rerum Ecclesiasticarum vltra triennium. Ratio verò est, quam tradit Vasquez *cit. num.* 31. ex Couarruua, quia dicta Extrauagans solùm intelligitur de rebus Ecclesiæ, quæ sunt immobiles, vel sunt res pretiosæ, quæ seruando seruari possunt, vt calix pretiosus, & similia. At fructus annui beneficij, vel commendæ nec sunt res immobiles, neque pretiosæ, quæ seruando seruari possint, vt clarè constat. Secundò, quia causa ob quam beneficiarius, vel Prælatus non potest alienare bona immobilia Ecclesiæ, est, quia non habet dominium illorum bonorum, sed solam habet administrationem, manente dominio penès Ecclesiam, vel Summum Pontificem: nemo verò potest alienare id cuius non est dominus. At beneficiarius habet verum dominium fructuum sui beneficij: ergo potest alienare prædictos fructus, & per locationem quoad totam vitam. Probat minor, quod scilicet beneficiarius, & similiter commendatarius sit dominus fructuum sui beneficij: primò, quia sic expressè docent Couar. Sarmient. Syluest. Adrian. Cordub. apud Vasquez *cit. opusc. de reddit. Eccles. cap.* 1. §. 2.

num. 7. qui sunt grauissimi Doctores, & recentiores. Id ipsum probatur expressè *ex cap. 1. de clericis non residentibus*, vbi Papa dicit quod clericus vel canonicus, qui non residet, non fit dominus distributionum: ex quibus verbis Doctores argumentantur à contrariò sensu; videlicet: ergo si canonicus residet, fit verè dominus fructuum sui beneficij. Denique id ipsum probant citati Doctores ex praxi communi, saltem totius Hispaniæ, in qua beneficiarij de redditibus suorum beneficiorum dant dotes in vita nepotibus ex fratre, vel sorore: itémque de eisdem fructibus beneficij relinquunt legata perpetua in testamento, neque de hoc eos aliquis condemnat: quod signum est illos verè esse dominos prædictorum fructuum; ac proinde, sicut in morte de illis possunt disponere in perpetuum: ita de iisdem poterunt per locationem disponere per nouem annos, vel pro tota vita. Et ex dictis in hoc numero patet responsio ad Extrauagantem *Ambitiosæ* in principio huius numeri positam pro parte opposita.

Responsio ad secundum quæsitum.

2 **M**Aior dubitatio est in secundo quæsito, an videlicet ob incrementum fructuum commendæ possit commendatarius augere pensionem, vel pretium locationis iam factæ, & acceptatæ. In qua materia Rodriguez *in summa verbo Alquileres cap. 21. conclus. 2.* tenet quod crescentibus fructibus rei locatæ propter fertilitatem, pensio locationis debet augeri. Dat rationem: nam si ob nimiam sterilitatem pensio minuitur conductori, cur non augebitur

bitur ob nimiam fertilitatem. Citat ad hoc Syluestrum verbo *locatio* quæst. 14. Excipit Rodriguez casum, quando fertilitas illa accreuit ex industria conductoris plus solito laborantis; tunc enim ait conductorem non teneri augere pensionem, quia illud incrementum fructuum est fructus suæ industriæ. Idem tenet Vega Minimus 1. *part. sum.* verbo, *arrendamentos*, *casu* 1. assignans ferè eandem rationem cum Rodriguez, & ponit hoc exemplum. Si quis haberet molendinum in fluuio, & fluuius præter modum, & consuetudinem ita inundaret, vt cætera omnia molendina destrueret, excepto illo molendino, ex quo conductor illius molendini excessuum, & insolitum commodum reportauit, teneretur vtique conductor talis molendini augere pensionem, seu pretium statutum locationis.

3 Hoc non obstante dico imprimis prædictum commendatarium non posse rescindere contractum locationis iam factum. Primò id probo ratione communi, & ex definitione contractus, qui dicitur obligatio vtrò, citròque obligans. Et cum per contractum vtraque pars contrahens obligetur, non poterit ista obligatio tolli, nisi per consensum vtriusque partis, iuxta illam regulam iuris, quæ dicit: *res per quasunque causas nascitur, per easdem dissoluitur.* At contractus nascitur per consensum vtriusque contrahentis: ergo non potest dissolui nisi de consensu vtriusque, & proinde alter tantum dissentiens non poterit contractum dissoluere. Hoc intelligo, dummodo contractus factus fuerit sine fraude, & dolo, & dummodo in illo non fuerit appositæ aliqua conditio, quæ postea non est sortita effectum: tunc enim poterit contrahens resilire. Quorum neutrum constat

constat in hoc contractu interuenisse. Tenet hanc conclusionem Bonacina *tom. 2. disput. 3. de contract. q. 7. num. 8. & seqq.* dicens quod locator non potest rem locatam repetere nondum finito locationis tempore: quia non potest resilire à contractu inuito conductore, qui per contractum locationis acquisiuit ius vsque ad certum tempus. Excipit ibi Bonacina aliquos casus quorum nullus hîc interuenit. Idem tenet Lessius *lib. 2. de locatione cap. 24. dub. 7. à num. 32.* & idem Lessius *eodem lib. cap. 17. dub. 4.* vbi citat Gomez, & Couar. & dicit esse communem, & Camillus Borellus *tom. 1. decis. tit. 16. num. 21.* & probât Lessius, quia ex iure naturali tenetur vnusquisque seruare quod promisit. At iste Commendatarius promisit conducto-ribus fructus commendæ per nouem annos, ergo tenetur promisso stare.

4 Excipiunt prædicti Doctores quatuor casus, in quibus locator potest ante tempus præfixum expellere conductorem. Primus est, si pensionem non soluit annis duobus. Secundus quando conductor malè vtitur re locatâ. Tertius si domum locauit, & domus ruinam minatur: tunc enim poterit conductorem expellere ad domum reparandam. Quartus casus est, si postquam locator domum locauit, eidem superuenit grauissima necessitas, ita vt non habeat aliam domum, in qua habitet, tunc enim poterit conductorem à domo locata expellere, vt ipse locator habitet in illa. Verùm aduertit Bonacina *citato num. 12.* hoc solum intelligi de necessitate domus ad habitandum, non verò de aliis necessitatibus locatoris, quia leges solum loquuntur de necessitate domus, non verò de aliis necessitatibus. Et hinc patet responsio ad id quod in informatione suprà dicebatur,

tur, an scilicet hic Commendatarius potuerit locationem rescindere eo quod in grauem inopiam incidere. Respondetur enim prædictam necessitatem non esse causam sufficientem ad locationem rescindendam, ob aduertentiam proximè positam à Bonacina, quia scilicet iura de sola necessitate domus loquuntur, non de aliis necessitatibus. Et præterea, quia nemo potest suam necessitatem subleuare auferendo ius alterius, nisi fuerit extrema necessitas, qualem suppono Commendatarium non incurrisse.

§ Restat probandum non potuisse Commendatarium locationem rescindere propter incrementum fructuum, siue propter fertilitatem superuenientem. Et quidem si prædicta fertilitas euenit ex eo quod agricolæ aliquas terras antea incultas denuo arauerunt, & ad hoc conductores commendæ agricolas induxerunt, & mouerunt; constat in tali casu non posse conductoribus auferri locatam commendam, quia illa fertilitas non fuit fertilitas terræ, sed industria agrorum, vel conductorum, ob quam industriam non potest conductori augeri pensio, ut dicunt suprà citati Doctores, maximè Rabello loco mox citando. Et in communi siue absolute, quod propter vbertatem superuenientem non possit locator augere pensionem conductori, tenet Rabello *lib. 14. de contractibus quest. 9. num. 1. & sequentibus*, dicens hanc esse communem consuetudinem. Et pro illa ibidem citat Emanuelem, Soarez, Pincianum, Valascum, Salicetum, illamque defendi affirmat ab aliis antiquis Doctoribus. Causam huius dicti assignat Rabello, quia contrahentes hodie, huiusmodi consensum tacitum habere censentur, cum iuxta receptam consuetu

consuetudinem contrahere saltem tacite intendant. Et pro hoc adducit legem *si merces*, §. *Vis maior ff. locati*. Potest hoc probari exemplo. Fecit aliquis pactum cum piscatore iacente rete in mare dans illi vnum ducatum pro omnibus piscibus quos rete primo iactu comprehenderet. Rete traxit multitudinem piscium, quorum pretium æstimabatur decem ducatis. Nunquid locator iactus tenebitur augere piscatori pretium ob multitudinem piscium? Non profectò; quia sicut contigit illa piscium abundantia, potuit contingere, ut rete nihil traheret. Idem evenit in nostro casu: pacti sunt conductores cum Commendatario in pretio ordinario plus minusve. Contigit ut fructus commendæ plus solito crescerent: non videtur quod possint obligari conductores ad plus soluendum ob fertilitatem, quia potuit ab opposito contingere, quod fructus commendæ plus solito minuerentur.

6 Pro maiori adhuc claritate, & probatione, adduco doctrinam Sylvestri, & Molinæ adductam à Reginaldo *lib. 25. cap. 41. num. 524. tom. 2.* ubi cum citatis duobus Doctoribus ponit tria puncta sequentia. Primum est, non esse augendam pensionem conductori si vbertas in eo sit, quod fructus hoc anno plus valeant solito, quia non est minuenda ex eo quod fructus vno anno minus valeant solito. Secundum punctum est: non esse augendam pensionem si vbertas contingat ex industria conductoris, quia nulli sua industria debet esse damnosa, sed proficua: quod etiam dicendum est si vbertas contingat ex bonitate agri, quia dominus illum quâ potuit sufficiente mercede locavit. Tertium punctum est, augendam esse pensionem quando vbertas contingit ex casu

fortuito, qui prævideri non potuit, ex lege *Sed addes, §. Si mulierem ff. locati*; sicut est minuenda pensio propter sterilitatem in simili casu contingentem. Dant prædicti Doctores exemplum molendini supra positum. Nam si ex molendino locato solebas percipere tantum quinquaginta singulis annis; sed aliis molendinis hoc anno destructis propter inundationem fluij percepisti centum, æquum est vt pensio pro rata augeatur; sicut fieret remissio pro rata si casu fortuito, qui prævideri non potuit, recepisset tantum viginti. At in isto casu non contigit casus fortuitus circa fructuum incrementum, qui casus prævideri non posset. Si enim contigit ex noua cultura agrorum antea incultorum, vt dicitur, talis casus non fuit fortuitus, sed optimè prævideri potuit tum à Commendatario, tum à conductore. Et per hoc patet responsio ad exemplum molendini supra adductum *num. 2. à Vega* pro parte opposita.

7 Ad argumentum adductum à Rodriguez eodem numero secundo, cum dicit, quod si ob sterilitatem minuitur pensio conductori, cur non augebitur pensio propter vbertatem, cum contrariorum eadem sit disciplina, vel vtroque sit par ratio. Ad hoc argumentum respondet Rabello *citata quest. 9. in fine numeri primi*, negando consequentiam, ac dicendo, non esse eandem contrariorum disciplinam quando ex tacito pacto, aliãve de causa, quæ in vno tantum contrariorum subsit, diuersa ratio colligitur. Diximus autem supra quod ex consuetudine Regni, pensio minuitur ob magnam sterilitatem. Non est verò consuetudo quod pensio augeatur propter vbertatem. Addi potest hæc ratio. Nam ad minuendam pensionem propter sterilitatem, dantur leges, maximè Lusitana

fitana *lib.4. Ordin. tit. 27.* & datur ratio ad id, quia conductori resultaret notabile scandalum, si teneretur soluere pensionem nullis perceptis fructibus. At non datur lex, quæ obliget conductorem augere pensionem propter vbertatem, nisi fortè in casu fortuito molendini, de quo suprà. Et præterea, quia ex nimia vbertate obueniente conductori, nullum damnum resultat locatori, vt patet.

Vltimò aduerto, quod si conductores commendæ liberè velint desistere à contractu, id poterunt licitè facere, cùm possint cedere iuri suo, & manebit tunc locator liber, poterit etiam locator locationem rescindere, si constiterit quod commendam locauit pretio quod erat infra dimidium iusti pretij pro tempore quo facta est locatio, vt Doctores tradunt in materia emptionis, & venditionis: de quo non tracto, cùm in hoc casu id non quærat.

CASVS X.

De quodam voto facto per iracundiam.

Petrus cùm esset perturbatus animo, cum iracundia fecit certum votum de re aliàs licita, & honesta: post factum votum, & sedata iracundia, pœnituit illum de voto. Quæritur an validum fuerit tale votum? Et pro parte negatiua, quod scilicet non fuerit validum; arguitur primò, quia facta per iracundiam sunt inualida in iure, sicut probat Mascardus *tomo primo, de probation. conclusionne 346. num. 20.* citans multos Doctores, & ait quod confessio rei

H 3

facta

facta per iracundiam, illi non nocet, nisi detur perseverantia post sedatam iracundiam. Secundò, quia Petrum statim pœnituisse facto voto, & sedatâ iracundiâ, est signum quod quando votum fecit, non habebat perfectam deliberationem, & consensum. Et ex hoc signo probat Sanchez *tomo primo Decalogi lib. 2. cap. 3. num. 13.* cum Torres ibi citato, non esse hæreticum illum, neque blasphemum, qui inter magnas tentationes hæresis, & blasphemix positus, & putans, vel timens, quod consenserit, statim pœnitetur; illa enim pœnitentia signum est quod non consenserit; cum ergo Petrus præ iracundia vouens statim pœnituerit, signum est quod in voto non consensit perfectè, ac de libertate, ac proinde votum non fuit validum. Tertiò probatur ex eo quod tradunt Angelus *verb. votum 1. q. 6.* & Tabiena *verb. votum 1. q. 1.* & supplementum Gabrielis 4. *dist. 38. quest. 1. artic. 1.* qui dicunt, quod si transacta periculi angustia, eum qui vouet, vel contrahit, pœniteat, signum esse defuisse plenam deliberationem, & proinde non obligare. Imò & Panormit. ad cap. *Si verò, de iureiur. num. 3.* & Anton. *cap. Sicut ex litteris, eod. tit.* dicunt, quod, si cessante calore iracundiæ minimè votum, aut iuramentum fuisset emissum non obligare.

1 Pro solutione notandum est primò, cum Petro Soto *de instit. Sacerdotum, tractat. de discrimine peccatorum lect. 8.* in voluntate nostra triplicem reperiiri motum. Quidam dicitur motus primò primus, qui ita est celer, & repentinus, vt nullo modo sit in hominis potestate illum cohibere: & hic actus non est liber, neque in hoc aliqua culpa potest reperiiri. Secundus motus dicitur secundò primus, qui impediri, & cohiberi potuit, sed sub tenui liber-

tate:

tate : & in hoc motu culpa mortalis inueniri non potest , quia imperfectè liber est ; bene tamen in eo dari potest culpa venialis cum gaudeat aliquali libertate. Tertius motus est perfectus , & deliberatus , plenèque liber , qui ex ratione dirigente , & voluntate libera procedit. Et in hoc inuenitur plena ratio culpæ , vel virtutis. Et hinc sequitur duobus modis dici actum deliberatum ; primò vt distinguitur contra actum primò primum , & secundò primum , in quibus vel nulla est , vel tenuis deliberatio , & insufficiens ad culpam mortalem. Secundo modo quando adest perfectum , & maturum consilium , præuiàque deliberatio omnium circumstantiarum , quæ in ea re possunt occurrere.

2 Notandum est secundò , iram in aliquo ita posse esse celerem , repentinam , & vehementem , vt auferat ab homine omnem prorsus deliberationem , ita vt nullo modo de circumstantiis actus delibetauerit. Secundò potest esse ira lenior & tardior , ita vt sinat intellectum semiplenè deliberare. Tertio ita poterit ira turbare intellectum , vt tamen sinat ipsum perfectè , & plenè deliberare : & nihilominus intellectus non obstante dictamine rectæ rationis sequitur passionem iræ.

3 Hoc posito , Dico primò : Si votum per iracundiam fiat primo modo , ita vt auferat deliberationem vt iudicatam primò primam , tale votum non est obligatorium. Constat ex dictis proximè *in numero 1.* vbi diximus actum primò primum carere omni libertate. Vbi autem nulla est libertas , nullum est meritum , vel demeritum , neque proinde vlla obligatio potest inde resultare : & in hoc sensu intelligendi sunt Doctores , præcipuè allegati à Mascardo

do suprà citato loco, cùm dicunt facta calore iracundiæ esse nulla : intelliguntur enim de iracundia tol-
lente omnem deliberationem, etiam primò primam.
Colligitur hoc præcipuè à Mascardo suprà citato lo-
co, dum dicit cum Baldo, hominem magno calore
iracundiæ promotum non esse omnino suæ men-
tis compotem : & iratum à furioso non distare, nisi
tempore : quatenus scilicet furiosus semper est amens;
iratus verò est amens ad tempus, videlicet quandiu
durat ira.

4 Dico secundò, ab opposito; quando ira non im-
pedit plenam, & perfectam deliberationem sufficien-
tem ad peccandum mortaliter, talique irâ durante fit
votum, tale votum obligat ad mortale. De hac nul-
la potest esse dubitatio. Et probatur primò ex cap.
Dudum, de conuersione coniugatorum, vbi dicitur votum
factum cum iracundia, esse obligatorium. Et hanc
opinionem esse communem tenet Nauarrus *commen-*
tario super cap. diuortium, de pœnit. dist. prima in fine,
num. 17. contra Romanum, & quamdam glossam op-
positum dicentes. Et probat ibi Nauarrus, ex praxi
Romanæ Ecclesiæ; nam vt ait, testis oculatus; sa-
cra Pœnitentiaria Romæ, omnia vota per iracun-
diam, vel aliam turbationem, vel passionem facta
iudicat esse valida, nisi tanta fuerit iracundia, tan-
tâque passio, & turbatio, quæ vouentem extra men-
tem ad insaniam trahat. Sic ibi Nauarrus. Idem te-
net Sanchez *lib. 1. de Matrim. disput. 8. num. 5.* cum
multis Doctoribus, quos ibi citat, quamuis ibi dis-
serat de promissione sponsalium facta per iram : ibi
tamen dicta possunt optimè ad hoc intentum appli-
cari. Et probatur ratione, quia si stante illâ perfecta
deliberatione per iram, fiat aliquod peccatum mor-
tale,

rale, propter quod obligamur diabolo: pari modo, si stante plenâ deliberatione per iram faciamus votum Deo, utique obligabimur Deo, sicut Sanchez citato num. 5. dicit, pro quo citat cap. *Sunt qui opes* 17. *quæst.* 14. & c. *Veniens, de voto.* Et hoc probat Nauarrus *consilio* 7. *de voto*, ex quadam glossa in cap. *Mulier* 32. *quæst.* 2. dicente quod iudicium sufficiens ad obligandum aliquem diabolo, sufficit etiam ad obligandum eundem Deo.

5 Sed quid, si votum ex iracundia factum, fuit factum cum semiplena deliberatione tantum, seu cum deliberatione secundò prima: an tunc votum obliget sub mortali? Hoc dubium apud nullum Doctorem reperi discussum in particulari, ex dictis tamen à Sanchez *lib.* 1. *de Matrim. disput.* 8. num. 5. potest colligi quod tunc votum obliget ad mortale. Nam ibi Sanchez ait, quod si quis promittat fœminæ sponsalia, vel matrimonium ex iracundia, ita ut tanta sit passio quæ rationis usum obtenebret, & deliberationem ad peccatum mortale requisitam impedierit, tunc sponsalia non obligant, neque erunt valida defectu deliberationis: ubi clarè innuit quod si promissio non tollat semiplenam deliberationem, promissio, & votum valebit. Quia tamen difficillimum est hos actus internos internoscere, & an facti fuerint ex motu primò primo, vel secundò primo, ait idem Sanchez *cit. disput.* num. 10. cum Alexand. de Neuo, Panorm. & Felino, quod stante dubio, an iracundia priuarit vouentem deliberatione requisitâ, iudicandum esse pro validitate voti, quia semper præsumitur deliberatio sufficiens: sicut rarissimè, occidens hominem per iracundiam excusatur à mortali. Nam qualitas, quæ naturaliter homini inest (qualis est de-

liberatio) semper adesse præsumitur, ut probat Menochius *lib. 1. de præsumpt. quest. 14. num. 3.* & præterea, quia verba exterius prolata sunt naturaliter signa intentionis internæ; & nemo præsumitur dicere, quod in corde non habet. Quod adeò verum est, ut etiam iuramentum metu extortum obliget in conscientia, licet in illo vehemens sit coniectura, quod defuerit animus se obligandi: sicut tenet communis opinio Doctorum. Eandem doctrinam tradit Nauarrus *consilio 4. de voto, num. 2.* ubi de quodam qui vouerat castitatem, sed dubitabat qualem intentionem habuerit, sic ait: *Si nescit qualem intentionem habuit, vel non credit probabiliter qualem habuit, sed dubitat; tenetur eligere tutiorem partem, & consequenter reputare se obligatum: quamuis ob talem dubitationem facilius cum illo Papa poterit dispensare.* Sic Nauar. citato loco.

6 Ad primum argumentum in contrarium respondet Nauar. super citatum cap. *diuortium, num. 12.* quod facta per iracundiam non sunt inualida in iure, nisi quando constaret iracundiam abstulisse omne iudicium rationis, ut patet in furioso, & amente, sicut dixit Baldus citatus à Mascardo citato loco. Videmus enim quotidie homines rixantes, & cum ira vulnerantes, passim puniri. Ad secundum dicendum Petrum post votum pœnituisse, non esse signum sufficiens, quod antea in vouendo non consenserit. Ut enim bene docet Sanchez *cit. disput. 8. num. 8.* Sæpe eorum quæ ex magna deliberatione gesta sunt, facientem pœnitet, ut experientia docet. Exemplum verò adductum de homine tentato de hæresi, non cogit, quia illud non ponitur pro claro signo quod consensus non intercesserit in illo qui post tentationem pœnituit, sed ponitur tanquam iudicium pium.

Et

Et præterea constat quod ille sic tentatus semper resistit, & non constat quod consenserit. At in isto casu constat clarè quod vouit: & proinde præsumitur habuisse in animo id quod ore protulit, vt diximus amplius paulò *suprà num. 5.* Ad tertium inanet responsum ex solutione secundi proximi argumenti: non enim est signum infallibile quod consensus antea defuerit si post factum quis pœniteat, cum, sicut ait Sanchez, sæpius post rectè facta nos facti pœniteat.

7 Quæri posset hoc loco, an iste Petrus peccauerit eo quod illum pœnituerit de voto facto? Ad hoc iam respondi in meo primo tom. *Dubiorum Regular.* verbo *votum*, num. 67. cum Azorio ibi citato, quod si quis pœniteat de voto, id est, de actu quo primùm vouit, peccat mortaliter, quia licitum non est dolere de actu qui est opus virtutis, & honestatis. Si verò pœniteat ob molestiam, & pœnam quam subiturus est in voti impletione, tunc non peccat, quia hoc non est pœnitere de voto, sed de molestia impletionis voti. Debet tamen habere semper propositum seruandi votum.

CASVS XI.

De quibusdam Missis relictis quibusdam Clericis soluendis in campo fructuoso plantatis.

Petrus reliquit testamento quod Clerici certæ Ecclesiæ Collegiæ pro se dicerent singulis annis certum numerum Missarum: pro labore, & stipendio

dio Clericis soluendo, consignauit in quodam agro certas mensuras tritici annuas per modum emphiteusis, quod in Portugallia dicitur, *renda de foro*. Clerici prædictas Missas dixerunt per aliquos annos quamdiu illi soluta est pitancia, seu stipendium Missarum. Et declaratur quod illi redditus tritici sunt relictæ directè ipsis Clericis, non verò alicui sæculari, qui Clericis solueret. Lapsu temporis prædicti redditus tritici extincti, & amissi sunt, vel ob lites obortas contra dictos redditus alteri adiudicatos, vel ob terram redditam omnino infœcundam, & proinde Clericis nullum stipendium Missarum solui potest.

Quæritur, an prædicti Clerici teneantur dicere prædictas Missas, supposito quod illis stipendium relictum non soluitur. Et pro parte affirmatiua, quod teneantur, videtur facere hoc exemplum. Dederunt mihi decem ducatos pro certis Missis dicendis, & postquam illos acceptaui, & recepi, quidam latro eos mihi surripuit, vel illos casu amisi. Clarum est quod hoc non obstante teneor ad illas Missas dicendas, cum iam pecuniam apud me receperim, eiusque dominium acquisiuerim, licet illa casu perierit: res enim vbicunque est perit domino suo, iuxta commune dictum Doctorum. Eodem modo videtur dicendum in isto casu. Hi enim redditus tritici relictæ sunt illis clericis, & illi acceptarunt, & suo modo receperunt dominium, & proinde si redditus tritici perierunt, & exinde illi ad dictas Missas obligantur, ad quas antea se obligauerunt.

1. Saluo tamen meliori iudicio, credo prædictos Clericos ad dictas Missas dicendas non obligari, eo quod illis assignatum stipendium non soluitur. Probo hoc

hoc imprimis ex illa regula iuris in *sexto*, quæ dicit : *Qui sentit commodum, sentire debet & onus : & è contrà, qui sentit onus, sentire debet & commodum.* Vel è contrà, qui non sentit commodum, non debet onus sentire. At hi Clerici non sentiunt commodum, id est solutionem stipendij, ex quo alantur : ergo non debent sentire onus Missarum dicendarum. Secundò potest ad hoc applicari illud D. Pauli. 1. ad Corinth. 9. *Qui altari deserviunt, cum altari participant.* Et, *dignus est operarius mercede sua.* Tertiò, illud probo exemplo claro in materia census. Vendidit Petrus Francisco ducentos ducatos census assignatos in re fructifera ipsius Petri, quæ erat res immobilis, & fructifera, de qua Petrus tenebatur singulis annis dare Francisco ducentos ducatos. Si casu perierit vel extincta fuerit res immobilis in qua plantatus est census, deobligatur Petrus à soluendo tali censu, etiamsi iam per aliquot annos Francisco censum soluerit. Sic decretum fuit à Pio V. in sua Bulla de censibus : & tenet communis Doctorum opinio cum Azorio *tom. 3. lib. 10. cap. 5. de censu, §. communis est opinio.* Quod exemplum est omnino adæquatum ad casum præsentem. Vnde licet Clerici acquisiuerint possessionem, vel dominium prædictorum reddituum tritici, pereunte re in qua illis plantata fuit obligatio solutionis, videtur extinguì in illis obligatio Missarum.

2. Quartò probatur etiam claro exemplo emphyteusis. Habet Petrus domum vel oliuetum sub contractu emphyteusis, de qua domo soluit singulis annis viginti ducatos : si non soluerit pensionem tempore assignato, amittit dominium utile quod habebat in tali domo. Si verò res illa emphyteutica perierit.

ierit, vel extincta fuerit, non obligatur Petrus soluere pensionem, ut tenet communis opinio cum Azorio *tom. 3. lib. 10. citato cap. 6. de emphyteusi*; quod est omnino simile presenti casui, in quo illi redditus tritici dicuntur fuisse plantati sub emphyteusi in agro illo.

3 Probatur exemplo beneficiarij, qui habet beneficium simplex, sed non habet Ordines sacros. Est res certissima ex motu proprio Pij V. quod iste talis tenetur ad recitandas horas canonicas, etiam si careat sacris Ordinibus: quas si omiserit, tenetur restituere fructus beneficij pro rata. Et tamen si iste talis beneficiarius ob aliquam causam sine culpa, redditus beneficij non receperit, non tenetur pro tunc horas canonicas recitare, sicut dicunt grauissimi Doctores, maxime Caietanus, Paludanus, Sotus, Nauarrus, Corduba, & alij, quos citat, & sequitur Vasquez *tom. opusc. tract. de benef. cap. 4. §. 1. dub. 6. num. 31*. Sextò probatur exemplo locationis. Conduxit quidam agrum fructiferum cum certa pensione soluenda locatori singulis annis. Contigit in quodam anno quod obuenerit nimia sterilitas, ita ut conductor nullum fructum ex agro receperit, talis conductor non tenetur tali anno aliquid soluere locatori, non obstante contractu præcedente, sicut decernitur in legibus iuris ciuilibus, maxime in nostra Portugallia *lib. 4. Ord. tit. 27. §. 1. in principio*. Ergo à simili, licet hîc clerici sub contractu se obligaauerint ad Missas illas dicendas, si tamen res, in qua assignatum est stipendium Missarum, fuit extincta, vel ita sterilis reddita, ut clerici nullum fructum recipiant, non sunt obligati ad prædictas Missas dicendas.

4 Ultimò probatur. Quia hæc obligatio, qua se clerici obligarunt ad dicendas has Missas, non est maior obligatio, quam sit obligatio voti, vel iuramenti, vt patet; votum enim & iuramentum obligant de iure diuino, contractus verò humanus obligat de iure humano positiuo. At constat ex Doctoribus in materia de voto, & iuramento, quod si ego aliquid voui in certa materia, vel iuraui circa aliquam materiam, si post votum vel iuramentum materia illa valde notabiliter immutata est, tale votum, vel iuramentum non obligat ob notabilem mutationem materiæ, quam si à principio vouens præuideret, non vouerat. Eodem modo licet hi clerici se obligauerint ad Missas illas dicendas quia tamen postea materia contractus valde immutata est, ita vt terra, in qua fundatum est Missarum stipendium, extincta sit, vel clericis adempta, & hoc si clerici præuiderent, nullo modo se obligarent, sequitur quod hodie mutatâ sic materiâ non tenentur ad prædictam obligationem Missarum.

5 Ad argumentum, seu exemplum in oppositum adductum in principio de Petro, qui recepit decem ducatos pro Missis dicendis quos ille postea casu amisit, vel latro clam furatus est, dico esse casum valde dissimilem, & in eo cerni diuersam rationem. Nam illo casu Petrus recepit statim totam solutionem, seu stipendium futurum, absque spe alterius stipendij futuri, & sine aliquo alio contractu virtuali de futuro. At verò clerici in nostro casu licet in principio receperint stipendium duorum, vel trium annorum; tamen quarto anno, verbi gratia, nullum stipendium, vel solutionem receperunt: contractus verò clericorum factus in principio, virtualiter

ter fuit contractus multiplex, id est pro omnibus annis futuris sub intellecta conditione in contractu imbibita, videlicet: Dicemus Missas si nobis pactum stipendium solutum fuerit singulis annis. Illi verò Petro qui recepit decem ducatos, iam solutum est totum stipendium, in quo conuenerunt: his verò clericis non soluitur stipendium annuatim sicut pactum fuit cum illis à testatore. Secundò datur diuersa ratio, quia in illo casu Petrus recipiens decem ducatos pro dicendis Missis, obligauit se ad illas absolute, & proinde etiamsi pecunia recepta casu perierit, durat obligatio. At clerici de quibus loquimur, non se obligarunt absolute ad illas Missas dicendas, sed sub conditione, si videlicet illis singulis annis stipendium assignatum solueretur, quæ conditio virtualiter & clarè inclusa fuit in illo contractu, & sic deficiente conditione, cessat obligatio.

C A S V S X I I .

*An possint Religiosi ministrare Eucharistiam
in priuatis Oratorijs.*

QUædam fœmina nobilis habebat licentiam Ordinarij, vel Nuntij Apostolici vt sibi diceretur Missa domi in Oratorio particulari. Aliàs idem Ordinarius mandato particulari præcepit, vt nemini liceret in particulari Oratorio sacram Eucharistiam recipere: si verò illam vellet recipere, à proprio Parocho, & non ab alio reciperet, etiam si esset Religiosus, qui virtute talis licentiæ, vel ali-

cuius

cuius sui priuilegij in eodem Oratorio Missam celebraret.

Quæritur, an prædictâ prohibitionem non obstante possit aliquis Religiosus prædictæ scæminæ in illo Oratorio Eucharistiam ministrare, virtute alicuius priuilegij sui Ordinis, dum celebrat in prædicto Oratorio?

1 Et videtur quod non possit. Nam Episcopus habet auctoritatem prohibendi, ne Religiosi ministrent sacram Eucharistiam in particularibus Oratoriis. Probatur ex Concilio Trident. *sess. 22. in decreto de obseruandis in celebrat. Missarum*, ubi dat licentiam Episcopis ut possint prohibere ne Religiosi possint Missas dicere in Oratoriis priuatis sæcularium, quouis priuilegio non obstante. Ergo si Episcopus potest prohibere Religiosis ne dicant Missas in Oratoriis, possunt etiam eisdem prohibere ne dent Eucharistiam in eisdem Oratoriis. Valet consequentia; quia qui potest destruere principale, potest etiam destruere illi annexum, & accessorium, iuxta *legem 1. & 2. ff. de pec. legat.* ubi dicitur quod perempto principali, perimitur accessorium. At constat quod ministrare Eucharistiam est annexum, & accessorium Missæ, & Missa est quid principale: ergo si Episcopus potest Religiosis prohibere ne dicant Missas in Oratoriis, quod est principale; poterit eisdem interdicare ne ministrent Eucharistiam in eisdem Oratoriis, cum ministratio Eucharistiæ sit accessorium Missæ: & confirmatur ex maxima Iuristarum collecta ex cap. *per venerabilem, qui filij sint legitimi*, ubi dicitur: *Qui potest quod est plus, potest utique quod est minus.* Videtur autem quid maius posse prohibere Missam, quam posse prohibere ministrationem

Eucharistiæ. Secundò probatur quòd possint Episcopi prohibere ministrationem Eucharistiæ in Oratoriis etiam Religiosis habentibus priuilegium, nam vnum ex priuilegiis, quæ ad hoc pro se Religiosi citant, est Pauli III. quod incipit; *Cum inter cunctas*, concessum patribus Societatis Iesu, in quo illis concedit, vt possint ministrare sacram Eucharistiam etiam sæcularibus, addens hæc verba, *Sine alicuius præiudicio*. Est autem præiudicium parochi, & Episcopi, vt illis inuitis ministraretur Eucharistia suo parochiano in Oratorio priuato; id enim resultat, vel fit cum aliquali irreuerentia Episcopi prohibentis. Addo quod dictum priuilegium concessum fuit prædictis patribus ante confirmationem Concilij Trident. per Pium IV. vt patet ex datis Bullarum; Concilium verò Tridentinum postea celebratum *citata sess. 22.* concedit Episcopo facultatem reuocandi omnia priuilegia antecedentia. Tertiò probatur ex Clementina *Religiosi, de priuileg.* vbi Papa expressè prohibet ne aliquis Religiosus ministret Eucharistiam alicui sæculari sine speciali licentia sui parochi, & addit Papa hæc verba: *Nullus Religiosis eisdem super hoc exemptionis, vel alio priuilegio suffragante*. Quo nihil clarius dici potuisse videtur. Et declaratur hoc exemplo: Si aliquis Religiosus existat in aliqua Ecclesia parochiali, non potest ibi ministrare Eucharistiam per annum alicui parochiano petenti sine licentia expressa parochi eiusdem Ecclesiæ, alias parochi fieret iniuria. Et hoc etiam dicendum videtur de Religioso dicente Missam in Oratorio existente intra parochialem Ecclesiam, & ibi ministrante Eucharistiam parochiano. Quartò, si Religiosi per aliquod priuilegium possent sæcularibus

ribus Eucharistiam ministrare in Oratorio particulari, parochio irrequisito, sequeretur quod posset etiam Religiosus extra suum conuentum per plateas publicas ducere sacram Eucharistiam ad domum sæcularis ægroti, eamque illi ministrare extra mortis articulum, cum scilicet sæcularis senio, vel alio impedimento non potest commodè ad Ecclesiam accedere, quod tamen foret magnum scandalum.

2 His non obstantibus, credo quod Religiosus dicens Missam in Oratorio priuato sæcularis, approbato ab eodem Episcopo, vel Nuncio pro Missa ibidem dicenda, poterit eidem sæculari ibidem Eucharistiam ministrare, non obstante quod Episcopus expressè prohibuerit ne ibi Eucharistiam ministret nisi solus parochus: idque dummodo non sit in Paschate, neque in articulo mortis. Et quod Religiosus hoc faciens per annum, neque peccet, neque aliquam pœnam incurrat. Hæc conclusio est Suarez, Rodriguez, Villalobos, & aliorum, quos antequam citem,

3 Suppono, & præmitto, Religiosos Mendicantes, & qui cum illis communicant in priuilegiis, habere priuilegium ministrandi sacram Eucharistiam sæcularibus extra suos conuentus, excepto die Paschatis, & articulo mortis. Præcipuum ad hoc priuilegium est quod concessit Paulus IV. anno 1557. Fratri Angelo de Auerfa Vicario generali Ordinis Minorum; quod priuilegium transcribitur à Rodriguez in suo Bullario fol. 851. In cuius priuilegij præmio narratur quod prædictus Vicarius generalis conquestus est apud Sum. Pontificem, quod aliqui Parochi Ecclesiarum in Italia molestabant fratres Minores

circa Sacramentorum ministrationem erga sæculares. Dicebant enim parochi prædictos fratres non posse ministrare Sacramentum pœnitentiæ, & Eucharistiæ sæcularibus nisi intra suos conuentus, non verò extra suos conuentus: quo præmissò, & narrato, Papa sic ibi concedit eisdem fratribus Minoribus: *Quod de cætero per totum orbem omnium utriusque sexus fidelium pro tempore, dicti Ordinis fratres à suis superioribus deputati confessores, confessiones, etiam infirmorum ubilibet, etiam extra domos, & habitacula eorundem fratrum audire, eosque posse absoluerè: ac omni tempore præterquam in die Resurrectionis Dominica, Sacramentum Eucharistiæ, tam illis, quàm quibusvis personis ministrare possint, Apostolica auctoritate indulgemus.* Sic ibi. Hoc priuilegium tam clarum nondum viderat Rodriguez in 1. tom. qq. q. 56. art. 3. vbi tractat an possint Religiosi ministrare Eucharistiam sæcularibus; & postea dictum priuilegium transcripsit citato loco Bullarij: neque ipsum viderat Villalobos mox citandus. Alia priuilegia, licet non tam clara, sunt Nicolai V. Sixti IV. & Leonis X. quæ citat Rodriguez citata questione 56. art. 3. Quæ eadem priuilegia citat Suarez tom. 4. de Relig. lib. 9. cap. 3. §. Circa alteram, in fine, dicens quod illi tres Pontifices concesserunt Religiosis facultatem ministrandi Eucharistiam sæcularibus, *Sine limitatione ad proprias Ecclesias, vel ad aliquod templum.* Aliam concessionem circa eandem materiam refert Villalobos tom. 1. tract. 9. difficultate 54. §. ultimo, dicens Pium V. concessisse, quod Religiosi possent audire confessiones, & ministrare Eucharistiam etiam extra suos conuentus. Sed non citat librum vbi sit talis concessio, vel, an sit concessa per Bullam, an per viuæ vocis oraculum.

3 Secundò præmitto Religiosos posse dicere Missam extra conuentus, & in Oratoriis sæcularium, & posse dare sacram Eucharistiam sæcularibus, esse duos actus distinctos, ac differentes, quorum alter non dependet ab altero, cum possit bene vnus existere sine alio. Potest enim dari Missa sine ministracione Eucharistiæ: & è contrà potest ministrari Eucharistia sine celebratione Missæ, vt patet experientiâ, & praxi, quando ex particulis consecratis in sacrario seruatis ministratur Eucharistia fidelibus in Quadragesima sine Missa, vel defertur ad infirmos extra Ecclesiam. Et cum sint hi duo actus distincti, & diuersi celebrare Missam, & ministrare Eucharistiam extra conuentus, concesserunt Summi Pontifices distincta priuilegia Religiosis, vt possint celebrare Missam extra conuentus in quouis loco, eo modo quo ego dixi in primo tomo dubiorum Regularium verbo, *Altare*, & verbo *Missa*. Et præterea iidem Pontifices concesserunt eisdem Religiosis alia priuilegia distincta ad sacram Eucharistiam ministrandam sæcularibus extra suos conuentus, vt paulò suprâ citauimus, in quibus secundis priuilegiis de Eucharistia ministranda, non fit mentio Missæ, vel quod fiat cum Missa. Et sic cum sint distincta priuilegia dicendi Missam, & ministrandi Eucharistiam, vnum non dependet ab alio, & reuocato vno, non censetur reuocatum aliud, nisi id clavis, & expresse verbis exprimatur.

4 Hoc posito, probatur conclusio suprâ posita primò ab authoritate: nam illam tenet Suarez *cit. tom. 4. de Relig. lib. 9. cap. 3. §. Dices: ergo licebit.* vbi in fine dicit, quod Religioso qui habuerit licentiam Ordinarij ad dicendam Missam in aliquo Oratorio par-

riculari, obtentâ facultate ad faciendum sacrum in loco accommodato, *non erit necessaria specialis licentia ad dandam Eucharistiam, sed ex vi priuilegij licebit.* Sic ille. At Religiosus in nostro casu habet licentiam Nuncij, vel Episcopi ad celebrandum in illo Oratorio, vt supponimus: ergo ex vi sui priuilegij poterit ibidem Eucharistiam ministrare absque alia licentia speciali. Verum quidem est, quod Suarez citato capite post initium, §. *Tertio circa*, dicit, quod poterit Episcopus, vel parochus prohibere suo parochiano cum iusta causa, ne sumat Eucharistiam in pœnam alicuius delicti, vel ob aliam causam iustam, & in tali casu non poterit illi licitè ministrari Eucharistia. Sed hoc non obstat: nos enim loquimur in casu ordinario, quando non adest delictum propter quod Episcopus, vel parochus communionem parochiano interdixerit, qui casus rarissimus est, & propterea de illo non est sermo. Imò ibidem Suarez addit hæc verba: *Si Episcopus prohibeat subdito non quidem communionem simpliciter, sed ne illam à nostris sacerdotibus (Societatis IESV) recipiat, talem prohibitionem nihil obstat huic facultati, quia illa supposita præceptum est iniustum, & directè pugnans cum priuilegio Pontificis.* in quibus verbis satis clarè defendit hanc opinionem. Eandem tenet Rodriguez citato art. 3. §. *Circa quas, in fine*, vbi postquam citat tria prædicta priuilegia Nicolai V. &c. ponit hæc verba. Per facultatem tamen Leonis X. extra communionem Paschalem, id illis conceditur per viam communicationis, in omnibus communionibus voluntariis, vt scilicet in quacumque Ecclesia possint fideles communicare (id est dare illis Eucharistiam.) Idem tenet Villalobos loco suprâ citato, dicens, quod
per

per priuilegium possunt Religiosi audire confessiones, & ministrare Eucharistiam sæcularibus extra suos conuentus. Idem tenet frater Ioannes de Cruce in sua *Epit. de statu Religionis lib. 2. cap. 5. §. Tertia conclusio.*

5 Rationibus etiam probatur eadem conclusio. Primò: nam Religiosi habent priuilegium dandi Eucharistiam sæcularibus extra suos conuentus, excepto die Paschatis, vt patet ex supradictis, saltem per priuilegium Pauli IV. ergo id poterunt hodie licite facere. Valet consequentia, quia tale priuilegium non est abrogatum per aliquem Papam successorem, quod sciam; sin minus ostendatur: & sic supponit Suarez non esse abrogatum, sed posse praticari; siquidem motus solum ex priuilegio Leonis X. quod fuit antiquius, ait posse id fieri. Secundò probatur, nam Episcopus non potest abrogare hoc priuilegium Religiosorum dandi communionem extra suos conuentus: cum enim priuilegium sit lex priuata, inferior Episcopus non potest tollere, vel abrogare legem Papæ superioris. Et licet Tridentinum *sess. 22. citata*, facultatem dederit Episcopis, vt possent prohibere Religiosis ne Missas celebrent in Oratoriis particularibus virtute alicuius priuilegij; non ideo ex hoc illis licentiam dedit vt possint prohibere eisdem Religiosis ministrare Eucharistiam extra suos conuentus virtute priuilegiorum quibus ad id muniuntur; cum vnum priuilegium sit distinctum ab alio, & vnum ab altero non dependeat, vt dixi *supra num. 3.* & proinde reuocato vno, non censeatur reuocari alterum. Reuocatio enim priuilegij est res odiosa, & quasi pœna, & ideo strictè est interpretanda, iuxta regulam *odia restringi, fauores con-*

uenit ampliari, de regulis iuris in 6. & proinde commissio facta alicui ad abrogandum priuilegium, strictè debet interpretari, vt solum extendatur ad illud priuilegium abrogandum, quod in commissione exprimitur. In citata verò commissione Tridentini facta Episcopo, vt Missas in Oratoriis prohibeat Religiosis, non exprimitur quod illis prohibeat dare communionem sæcularibus extra suos conuentus. Secundò principaliter probò, quia hoc priuilegium Pauli IV. non est amissum per non usum. Nam vt amittatur priuilegium alicuius Religionis, necessarium est primò spacium centum annorum, vt possit in illis dari præscriptio. Et secundò necessarium est vt detur scientia talis priuilegij: & tertio requiritur quod Religio habeat voluntatem non vtendi tali priuilegio Pauli IV. ab anno 1557. nondum transacti sunt anni centum, vsque ad hunc 1633. Facit etiam ad hoc exemplum istud: Aliqui Religiosi aliquando celebrant Missam extra suos conuentus in Ecclesiis, quæ nec sunt parochiales, neque monasteria, & ibi aliquando Catholici petunt ab illis sacram communionem in Missa, eamque illis ministrant; & de hoc nullus conqueritur: ergo aliquo modo in praxi positum est vt Religiosi sæcularibus Eucharistiam ministrent extra suos conuentus, idque sine licentia parochi; cum hæ sint communionες voluntariæ, ex quibus parochi non fit præiudiciū. Et quamuis in hoc fieret aliquod modicum præiudiciū parochi, Papa id videns, & sciens potest tale priuilegium concedere cum aliquo præiudicio tertij ob causam aliquam iustam, vt patet clarè in multis priuilegiis, quæ aliqui Summi Pontifices concesserunt aliquibus monasteriis ne soluerent

soluerent decimas : in quo tamen aliquod præiudicium fit Episcopo, & beneficiariis quibus illæ decimæ debentur. Ergo à simili poterit Papa concedere hoc priuilegium Religiosis, sicut concessit, etiam si aliquod præiudicium parochis adueniret: quanto magi cum inde illis nullum præiudicium resultet, vt diximus, cum hæ sint communionες voluntariæ per annum; & solam communionem paschatis, & in articulo mortis teneatur parochianus recipere de manu proprij parochi.

6 Ad primum argumentum pro parte contraria patet solutio ex iis quæ diximus in primo argumento adducto pro ista conclusione: vbi ostendimus Concilium Trident. non dedisse Episcopis facultatem abrogandi priuilegia, quæ habent Religiosi ad ministrandam Eucharistiam sæcularibus extra suos conuentus, licet illis concesserit, quod possint prohibere eisdem Religiosis ne celebrent in Oratoriis: & hoc ex eo quod sint duo priuilegia distincta, & independentia adinuicem, & proinde reuocato vno non censeretur reuocari alterum. Et ibi etiam ostendimus non posse Episcopum sine licentia Papæ abrogare alia priuilegia Religiosorum, quale est priuilegium dandi communionem sæcularibus extra conuentus. Ad illud quod additur in confirmationem cum ait: Qui potest in maius, potest in minus: si id intelligat absolutè, est falsum: nam sacerdos absoluens pœnitentem sacramentaliter, dat illi remissionem peccatorum, quod est maius, & tamen ex se non potest illi dare vnum diem indulgentiæ propriè sumptæ, per modum indulgentiæ, quod est minus. Intelligitur ergo illud dictum, *qui potest in maius, potest in minus*, ist est, quando illud minus est

contentum sub maiori, illique subordinatum, & dependens à maiori. At dare Eucharistiam sæcularibus extra conuentus, quod est minus, non subordinatur celebrationi Missæ, neque ab illa dependet, vt suprâ vidimus, sed potest dari sine Missa. Addo quod aliquando ius concedit alicui quod est maius, & negat illi quod est minus. Nam in *cap. 1. de Torneamentis*, illi qui moritur in torneamentis, conceditur absolutio ab excommunicatione, quod est maius, & tamen illi negatur sepultura Ecclesiastica, quod est minus, vt notat glossa *ad cap. citatum*.

7 Ad aliud exemplum eiusdem primi argumenti, ex regula iuris dicente, quod *accessorium sequitur naturam principalis*, & quod *destruëto principali destruitur accessorium*; primò potest negari quod dare communionem sit accessorium Missæ. Nam licet Eucharistia quoad fieri pendeat à Missa, cùm solum intra Missam possit consecrari, ministratio tamen Eucharistiæ non pendet à Missa, vt suprâ vidimus. Nec valet exemplum, si dicas; Homo producit alium hominem, & homo productus pendet in fieri à producente: ergo homo productus est accessorium hominis producentis. Eodem modo non valet: Missa producit Eucharistiam (id est fit in Missa;) ergo Eucharistia est accessorium Missæ. Secundò responderetur ad eandem regulam, quod dato quod ministratio Eucharistiæ esset accessorium Missæ, non sequitur quod peremptâ Missâ, quod est principale, pereat Eucharistia (id est illius ministratio) & quod dispositum in Missa censeatur dispositum etiam in ministracione Eucharistiæ: nam illa regula, *destruëto principali, perit accessorium*, intelligitur

reliquitur quando accessorium non potest consistere, seu conseruari sine suo principali, à quo pender in conseruari. Vt perempto homine, qui est principale, pereunt illius albedo, & cætera accidentia, quæ erant illi accessoria, & pendebant ab homine in conseruari. At Eucharistia, vel ministratio illius non pendent ab illa Missa in conseruari, cum Eucharistia possit conseruari sine Missa, & Eucharistiæ ministratio detur quotidie sine Missa. Sic explicatur illa regula de destructo principali, & accessorio, à Nauarro *consilio* 35. *de voto, & voti redempt.* ubi ait, quod illa regula, dispositum in principali censi dispositum in accessorio, debet intelligi quando accessorium non potest consistere sine principali.

8. Ad secundum argumentum dico primò, quod præter citatum priuilegium Pauli III. dantur alia quæ vidimus suprà, maximè Pauli IV. in quo conceditur Religiosis absolutè ministratio Eucharistiæ extra conuentum, absque illa clausula: *Sine alicuius præiudicio.* Secundò responderetur, quod licet in hoc fieret aliquod præiudicium parochis (quod suprà fieri negauimus) adhuc posset Papa id priuilegium concedere Religiosis, vt suprà ostendi *num. 5. propè finem.*

9. Ad tertium argumentum respondet Suarez citato *cap. 3. §. Obijci verò*, dicens quod Papa Clemens V. in Clementina citata non poterat reuocare priuilegia, quæ postea Pontifices successores concesserunt Religiosis, nam Papa antecessor non potest ligare manus sui successoris: & constat quod alij Pontifices successores Clementis V. id expressè concesserunt Religiosis.

10 Ad quartum argumentum respondet Suarez *cit. cap. 3. §. Dices ergo*, negando sequelam, nam licet Papa nobis concedat posse ministrare Eucharistiam sæcularibus extra conuentum, non ideo censetur concedere, vt illam deferamus cum pompa per plateas ad infirmos, quia hoc esset contra communem consuetudinem, quæ satis declarat illum modum administrationis pertinere ad parochum: ideóque ministerium propriè comprehendere sub illa exceptione Pontificum: *Sine alicuius præiudicio*. Et ratio est, quia ille modus deferendi Eucharistiam per Religiosos ad infirmos per plateas non est in vsu. Leges autem, & iura attendunt id quod regulariter, & frequenter accidit. Et sic poterat Papa concedere Religiosis ministrare Eucharistiam sæcularibus extra suos conuentus, sed non illam deferendi per plateas publicas cum pompa ad infirmos: quia hoc non est in vsu.

11 Adhuc aduerto in illo priuilegio Pauli IV. contineri concessionem magnæ ponderationis. Ex illo namque non obscure colligitur posse Religiosos dare Eucharistiam sæcularibus etiam infirmis extra suos conuentus, dummodo non deferant per plateas cum pompa, sed sacratissimam Eucharistiam conficiant in Oratorio particulari, & illam ministrent infirmo intra domum Oratorij. Nam dictum priuilegium Pauli IV. cum expressè præmiserit posse Religiosos extra suos conuentus audire confessiones sæcularium, etiam infirmorum, statim subdit: *Ac omni tempore, præterquam in die Resurrectionis Dominice sacramentum Eucharistie illis ministrare*. Vbi clarè dicit posse etiam infirmis sacram Eucharistiam ministrare. Dices: ergo etiam extra suos conuentus, poterunt Religiosi

ligiosi Eucharistiam ministrare infirmo sæculari existenti in articulo mortis, celebrando in Oratorio sæcularis, & dando Eucharistiam existenti in articulo mortis? Respondeo Papam in prædicto priuilegio solam communionem in die paschatis excipere, & cum hanc solam excipiat, videtur etiam permittere quod possint dare communionem in articulo mortis non deferendo per plateas. Potest hoc probari ex illo communi Iuristarum dicto, quod *exceptio firmat regulam contra alios casus non exceptos*; at ibi Papa solum excipit communionem in die Paschatis: ergo communio in quocumque alio die firmatur, & permittitur. Et præterea facere potest aliud dictum Iuristarum, dicens, quod *expressum in lege facit cessare præsumptum*, ut dicitur in l. *Si ita scriptum*, de liber. & posth. At priuilegium citatum solum exprimit, & excipit quod in die paschatis non ministrent Eucharistiam: ergo præsumptum de ministratione illius in articulo mortis cessabit, & locum non habebit. Hoc tamen non obstante, ego non consulo ut virtute prædicti priuilegij Religiosus ministret Eucharistiam sæculari existenti in articulo mortis extra suum

conuentum propter praxim communem

extantem in contrarium: & propter

Clementinam *Dudum*, de

sepulturis.

CASVS

CASVS XIII.

*De reuocatione priuilegiorum concessorum per
vina vocis oraculum.*

Dominus Papa Urbanus VIII. motus grauibus ex causis, vt ipse innuit in Bulla, anno 1631. in forma Breuis reuocauit omnia priuilegia concessa à quibuscumque Sum. Pontificibus, quæ concessa fuerunt solo vina vocis oraculo, cuicumque Religioni Mendicanti, vel non Mendicanti, Collegio, Societati, &c. prout statim videbimus. Et quoniam prædicta Bulla nimis tangit Religiosos, & ex illa graua & quotidiana dubia sunt exorta, libuit hîc primò prædictam Bullam transcribere, & postea aliqua dubia circa illam explicare. Igitur tenor Bullæ talis est.

S. D. N. Urbani diuina prouidentia
Papæ VIII.

*Extensio constitutionis rec. mem. Gregorij Pa-
pæ XV. reuocatoria concessionum vina
vocis oraculo factarum.*

VRBANVS VIII.

Ad perpetuam rei memoriam. Aliàs felic. re-
cord. Gregorius Papa XV. prædecessor noster,
vt subnascentibus iugiter varijs difficultatibus, &
abusibus

abusibus ex privilegijs à sede Apostolica viua vocis oraculo saepenumero concessis obuiam iret, constitutionem edidit tenoris subsequētis, videlicet: Gregorius Papa XV. ad rei memoriam Romanus Pontifex in specula militantis Ecclesiæ constitutus diuina prouidentia, gratias, & indulta à se, & à predecessoribus suis concessa, iustis interdum suadentibus causis, iuxta creditum sibi pastoralis officij debitum moderatur aut reuocat, prout rerum, & temporum qualitatibus debite conspiciit salubriter in Domino expedire. Itaque motu proprio, & ex certa scientia, ac maturâ deliberatione nostris, deque Apostolica potestatis plenitudine, omnia, & singula indulta, facultates, priuilegia, gratias, & concessiones quascumque spirituales, & Ecclesiasticas tam ad forum interius, quàm ad exterius spectantes, ac tam ad supplicationem partium, quàm motu scientiâ & potestatis plenitudine similibus, à sede Apostolica, quæ tamen viua vocis oraculo hætenus quandocumque, & qualitercumque, ex quauis etiam necessitate de exprimenda causa, quibusuis Collegijs, Capitulis, Ordinibus tam Mendicantium, quàm non Mendicantium, Societatibus, etiam Societatis Iesu, ac Congregationibus quibuscumque, siue eorum & earum respectiue Præpositis, Decanis, Magistris, Ministris, Prælatis, Prioribus, Rectoribus, Generalibus, vel Prouincialibus, quocumque nomine nuncupatis superioribus, etiam
quomo

quomodolibet exemptis, ac sedi prædicta immediate subiectis, cuiuscumque dignitatis, præeminentia, aut quouis priuilegio munitis, non tamen ad supplicationem Regum concessa, in ijs videlicet quæ non sunt sortita effectum, tenore præsentium reuocamus, cassamus, tollimus, abrogamus, & annullamus, ac reuocata, cassa, sublata, abrogata, & annullata, viribûsque, & effectu vacua perpetuò fore, & esse: neque in posterum cuiquam suffragari posse, vel debere: neque aliquem illis de cætero vti villo modo posse, etiamsi expressa, & specifica mentio etiam de verbo ad verbum de ijs facienda esset, decernimus, & declaramus. Firmis tamen, & in suo robore permanentibus omnibus indultis, & alijs concessionibus prædictis viuæ vocis oraculo S. R. Ecclesiæ Cardinalibus ad ipsorum, vel aliorum quorumcumque fauorem propria S. R. Ecclesiæ Cardinalium manu firmatis pro ipsis, vel alijs factis, & de quibus ydem S. R. Ecclesiæ Cardinales testimonium in scriptis præbuerunt. Decernentes præsentis litteras, & in eis contenta quacumque, etiam ex eo quod quicumque in præmissis interesse habentes, seu habere prætendentes, ad hoc vocati, & auditi non fuerint, de subreptionis, vel obreptionis vitio, aut intentionis nostræ, seu alio quocumque defectu notari, impugnari, redargui, in ius vel in controuersiam reuocari, ad terminos iuris reduci, aut aduersus illas quodcumque iuris, gratia,
vel

vel facti remedium impetrari nullatenus posse: sed illas semper validas, & efficaces existere, & fore, suosque plenarios, & integros effectus sortiri, & obtinere. Sicque per quoscumque iudices ordinarios, & delegatos, etiam causarum Palatij Apostolici Auditores, ac S. R. Ecclesie Cardinales, etiam de latere Legatos, & Nuncios, sublatâ eis, & eorum cuilibet, quavis aliter iudicandi, & interpretandi facultate, & authoritate iudicari debere, ac definiri; ac irritum, & inane si secus super his à quocumque quavis authoritate scienter, vel ignoranter contigerit attentari. Non obstantibus præmissis, ac quibusvis constitutionibus, & ordinationibus Apostolicis, privilegijs quoque, indultis & litteris Apostolicis Ordinibus, Societatibus, & Congregationibus prædictis, eorumque Prepositis, Decanis, Magistris, Ministris, Prælatiis, Prioribus, Rectoribus, & alijs superioribus prædictis sub quibuscumque tenoribus, & formis, ac cum quibusvis etiam derogatoriis derogatorijs, alijsque efficacioribus, & insolitis clausulis, ac irritan. & alijs decretis in genere, vel in specie, ac aliàs in contrarium præmissorum quomodolibet concessis, confirmatis, & innovatis. Quibus omnibus & singulis, etiam si pro illorum sufficienti derogatione de illis, eorumque totis tenoribus specialis, specifica, expressa, & individua, ac de verbo ad verbum, non tamen per clausulas generales idem importantes, mentio, seu

quavis alia expressio habenda, aut aliqua alia exquisita forma ad hoc seruanda foret, tenore huiusmodi presentibus pro plenè, & sufficienter expressis, & ad verbum insertis habentes, illis aliàs in suo robore permansuris hac vice dumtaxat specialiter, ac expresse derogamus, caterisque contrarijs quibuscumque. Volumus autem ut presentium transsumptis etiam impressis manu alicuius Notarij publici subscriptis, & sigillo personæ in dignitate Ecclesiastica constitutæ munitis, eadem prorsus fides adhibeatur in iudicio, & extra illud, quæ presentibus adhiberetur, si forent exhibitæ, vel ostensæ. Quodque eadem presentes litteræ, seu illarum exempla ad valuas Basilicarum sancti Ioannis Lateranen. ac principis Apostolorum de Vrbe, & in Acie campi floræ affixæ, omnes ita arctent, & afficiant, ac si unicuique personaliter intimatæ fuissent. Dat. Romæ apud sanctam Mariam Maiorem sub annulo piscatoris die 11. Iulij 1632. Pontificatus nostri anno 11. Cum autem experientia rerum magistra compertum sit, concessiones, & gratias viuæ vocis oraculo etiam à S. R. Ecclesiæ Cardinalibus obtentas, & ipsorum manu firmitas, sæpè ab his in quorum fauorem emanarunt, minus canonicâ interpretatione extendi, & perperam in disciplina Ecclesiastica detrimentum executioni demandari. Idcirco quantum cum Domino possumus, his, & alijs malis occurrere volentes motu proprio,

proprio, & ex certa scientia, ac matura deliberatione nostris, deque Apostolica potestatis plenitudine, & de consilio nonnullorum venerabilium fratrum nostrorum S. R. Ecclesie Cardinalium, quibus negotium huiusmodi mature discutiendum commisimus, omnia, & singula priuilegia, facultates, licentias, & gratias quascumque per Summos Pontifices predecessores nostros, ac per nos, viua vocis oraculo, & S. R. predictae Cardinalium quorumcumque manu firmata, quibuscumque Generalibus, Prouincialibus, ceterisque superioribus, & personis, cuiusvis Ordinis, Congregationis, instituti, & societatis, siue secularibus, siue regularibus, vel etiam ipsis Ordinibus, Congregationibus, institutis, & societatibus, etiam Societati IESV, aut Clericis, seu Presbyteris aliisque personis predictis quacumque de causa, etiam de necessitate exprimenda, occasione, pretextu, vel colore, etiam intuitu, contemplatione, seu ad instantiam Imperatoris, Regum, & Principum quorumcumque aut alias quomodolibet concessa, illorum tenores praesentibus pro expressis habentes, tenore praesentium reuocamus, cassamus, tollimus, abrogamus, & annullamus, ac de cetero reuocata, cassa, sublata abrogata, & annullata, viribusque & effectu vacua esse, & fore, nullique prorsus deinceps suffragari posse nec debere declaramus. Praeterea ut praesentes litterae omnibus, & singulis ad quos spectat,

& pro tempore spectabit, quantocyùs innotescant,
 omnibus & singulis Generalibus, & alijs quocum-
 que nomine nuncupatis superioribus quorumcum-
 que Ordinum, Congregationum, Societatum, etiam
 Societatis IESV, & institutorum, sub excommu-
 nicationis, ac priuationis officiorum & dignita-
 tum, necnon vocis actiue, & passiue pœnis ipso
 facto incurrendis, precipimus, & mandamus, vt
 infra tres menses proximos à die presentium com-
 putandos, omnes, & singulos Prouinciales eorum-
 dem suorum Ordinum, Congregationum, Societa-
 tum, etiam Societatis IESV, & institutorum, de
 eisdem presentibus litteris certiores faciant, ea-
 rumdémque presentium exemplaria illis transmit-
 tant. Qui quidem Prouinciales sub eisdem pœ-
 nis teneantur singulis superioribus monasteriorum,
 conuentuum, collegiorum, domorum, & locorum
 regularium præcipere, & easdem presentes subdi-
 tis suis, vt moris est, publicent. Decernentes præ-
 sentes litteras etiam ex eo quod quicumque in præ-
 missis interesse habentes, vel habere prætendentes
 aduocati, & auditi non fuerint, de subreptionis,
 vel obreptionis vitio, aut intentionis nostra, seu
 alio quopiam defectu notari, impugnari, inuali-
 dari, redargui, in ius, vel controuersiam vocari,
 aut ad viam, & terminos iuris reduci, sine ad-
 uersus illas quodcumque iuris, gratiæ, vel facti
 remedium impetrari nullatenus posse, sed illas sem-
 per

per validas, firmas, & efficaces existere, & fore, suosque plenarios & integros effectus sortiri, & obtinere. Sicque per quoscumque iudices ordinarios, & delegatos, etiam causarum Palatii Apostolici Auditores sublatâ eis, & eorum cuilibet quavis aliter iudicandi, & interpretandi facultate, & authoritate, iudicari, & definiri debere: ac irritum, & inane si quid secus super his à quoquam quavis authoritate scienter, vel ignoranter contigerit attentari. Non obstantibus præinsertis litteris huiusmodi, ac constitutionibus & ordinationibus Apostolicis, & quatenus opus sit, etiam regulâ nostrâ de non tollendo iure quæsito: privilegijs quoque indultis, & litteris Apostolicis eisdem Cardinalibus, ac Ordinibus, Congregationibus, institutis, & societatibus, eorûmque superioribus quocumque nomine nuncupatis, sub quibuscumque verborum formis, & ten. ac cum quibusvis etiam derogatoriis derogatorijs, alijsque efficacioribus, & insolitis clausulis, ac irritantibus, & alijs decretis in genere, vel in specie, ac aliàs in contrarium præmissorum quomodolibet concessis, confirmatis, & innouatis. Quibus & singulis, etiamsi pro illorum sufficienti derogatione, eorûmque totis tenoribus specialis, specifica, & expressa ac de verbo ad verbum, non autem per clausulas generales idem importantes, mentio, seu quavis alia expressio habenda aut aliqua alia exquisita forma ad hoc servanda foret,

K 3 illorum

illorum omnium tenores presentibus pro plenè, & sufficienter expressis habentes, specialiter & expresse derogamus, ceterisque contrariis quibuscumque. Volumus autem quod presentium transsumptis, etiam impressis manu alicuius Notarij publici subscriptis, & sigillo personæ in dignitate Ecclesiastica constitutæ munitis, eadem prorsus ubique fides adhibeatur, quæ presentibus ipsis adhiberetur si forent exhibitæ, & ostensæ: quòdque eadem presentes litteræ, siue illarum exempla ad valuas Basilicarum predictarum, & in acie Campi Floræ huiusmodi similiter affixa, omnes quos concernunt perinde arctent, & afficiant, ac si unicuique personaliter intimata fuissent. Dat. Romæ apud S. Petrum sub annulo Piscatoris die 20. Decembris 1631. Pontificatus nostri anno nono.

M. A. MARALDVS.

1 Hæc est Bulla priuilegiorum viuæ vocis oraculo reuocatoria: imò hîc sunt duæ Bullæ, prima Papæ Gregorij XV. secunda Urbani VIII. & hæc secunda est rigorosior quàm prima Gregorij. Nam Gregorius non reuocat viuæ vocis oracula impetrata ad instantiam Regum, vel Cardinalium, dummodo sint firmata manu Cardinalium. At Urbanus VIII. etiam hæc duo reuocat, vt patet ex textu. Incipit vero Bulla Urbani ab illo versiculo, *Cum autem experientia.*

2 Differt autem priuilegium concessum viuæ vocis oraculo à priuilegio concessò per Bullam, quia illud non

Casus decimustertius.

non conceditur à Papa per scriptum, in quo Papa ponit suum nomen in principio Bullæ, & proponit narrationem, & causam concessionis. Et in fine adiicit, clausulas, non obstant. & cæt. At in concessione viuæ vocis oraculo, Papa nihil horum facit, neque per suum scriptum aliquid dicit, sed ad petitionem alicuius Cardinalis, Episcopi, vel Prælati alicuius Religionis aliquid petentis solo ore, dicit, *Fiat*. Et de hoc prædictus impetrans testimonium scripto prodit, vt videre est apud Rodriguez in Bullario locis mox citandis.

3 Cùm autem ex reuocatione huiusmodi priuilegiorum viuæ vocis oraculo, magna sit orta confusio inter Religiosos, eo quod vtplurimum ignorent quæ & qualia sint illa viuæ vocis oracula tot Pontificum, quibus antea pacificè fruebantur, ego sæpius de hoc rogatus, respondi, neminem in hoc posse resolutionem summariam tradere, nisi conficiendo integrum librum de hac materia, ob multitudinem viuæ vocis oraculorum diuersis Religionibus à variis Sum. Pontificibus concessorum. Nam imprimis solus Leo Decimus apud Rodriguez in *Bullario à fol. 718. & sequentibus*, concessit septuaginta sex viuæ vocis oracula diuersis Religionibus. Et Pius V. apud eundem Rodriguez citato *Bullario à fol. 977.* concessit triginta tria: vltra alia viuæ vocis oracula, quæ in eodem Bullario citat Rodriguez in fine concessionum aliquorum Sum. Pontificum, quæ longum, & molestum esset recensere. Præterea in compendio Mendicantium passim referuntur multæ concessionem Pontificum factæ solo viuæ vocis oraculo diuersis Religionibus, & hæc viuæ vocis oracula designat prædictus Author compendij, apponens singulis

lis litteram O magnum, & litteram o paruum. Quæ viux vocis oracula cùm tot sint numero, non possunt à me commodè recenseri absque nimio labore. Maximè cum possit contingere, quod aliqua viux vocis oracula, quæ citatis locis contenta sunt, potuerint postea ab aliquibus Sum. Pontificibus per Bullam concedi aliquibus Religionibus, quibus hodie possunt frui, cùm iam sint concessa per Bullam, quæ ego non possum scire. Et ideo mihi sufficit ostendere libros, in quibus viux vocis oracula continentur. Ne tamen rem adeò necessariam intactam relinquam, contentus ero hîc ponere illa viux vocis oracula prædictis libris contenta, quæ erant frequentiora apud Religiosos, & magis necessaria, vt sciant hodie à quibus debeant abstinere: cætera non sic scitu digna omittam.

4 Primum ergo viux vocis oraculum positum inter viux vocis oracula Leonis X. *num. 5. citato Bullario* est, quod possint prælati nostri Ordinis in suis Ecclesiis, vel capellis exhumare corpora defunctorum, & ad alias sepulturas in suis Ecclesiis transferre de consensu illorum quorum interest, quod aliàs facere non possent; de quo Rodrig. *tom. 3. qq. 9. 62. art. 1.*

5 Secundum est, quod ponitur *ibidem num. 8.* quod scilicet in tempore quo Ecclesia ponit cessationem à diuinis, eadem possint tunc facere Religiosi, quæ possunt facere tempore interdicti, & quod in forma obseruationis nulla sit differentia inter cessationem à diuinis, & interdictum quodcunque. Quæ profectò erat magna concessio, cùm cessatio à diuinis sit rigorosior interdicto.

6 Tertium ponitur *num. 38. eiusdem Leonis*, quod
fratres

fratres Minores vocati, aut inuitati à prælatis Ecclesiarum, id est Episcopis, aut à prælatis Religiosis, vel Visitatoribus habentibus curam aliquorum monasteriorum Monialium, ad hoc quod visitent prædicta monasteria, vel exerceant omnia alia, quæ in monasteriis sibi subditis exercent, aut ad hoc quod intrent cum ipsis prælatis, siue Visitatoribus ad videndum officinas, & totum monasterium interius, possint cum ipsis prælatis, non obstante prohibitione, seu regulâ, vel declarationibus eiusdem regulæ, &c. quæ etiam erat magna concessio, sed hodie renocata.

7 Quartum ponitur *ibidem num. 39.* quod tempore interdicti ordinaria auctoritate apposti possint prædicti fratres dare publicè professionem fratribus suis, & in illa cantare, *Veni Creator Spiritus*, & alias ceremonias consuetas facere. Et quod tempore huiusmodi interdicti possint facere processiones per claustra dicendo litanias, & hymnos, &c.

8 Quintum ponitur *ibidem num. 49.* quod fratres laici socij Vicariorum generalium, dum illis in Missa inseruiunt, possint propriis manibus tangere calices, & corporalia plicando, & explicando, sicut Clericus in sacris constitutus facere consuevit.

9 Sextum habetur *ibidem num. 54.* quod possent fratres Minores celebrare Missam illico post matutinum, & post meridiem, præsertim diebus quando datur præceptum de Missa audienda: quando fratres sunt iter aggressuri, vel veniant de via, vt non possint ante meridiem celebrare, &c. ibi. Sed quoad hanc materiam quæ sæpe Religiosis occurrit, noto quod Patres Augustinienses habent priuilegium non viuæ vocis oraculo, sed per Bullam concessam ab

Innocentio VIII. in compendio Mendicantium, verbo *Missæ* 2. §. 5. per quod illis conceditur, quod expleto matutinali officio etiam ante lucis auroram possint Missas celebrare: nihil tamen ibi concedit de Missa post meridiem. Et proinde hoc priuilegium prædictorum Patrum non est hodie reuocatum, cum sit illis datum per Bullam, & in illo poterunt communicare cæteri Religiosi participantes priuilegia prædictorum Patrum.

10 Septimum viuæ vocis oraculum est *ibidem* n. 66. per quod concedit Papa Leo X. prælatis Minorum, vt cum aliquem fratrem in capitulo excommunicant, vel in communitate, non teneantur sententiam fere in scriptis, prout in iure sub pœna excommunicationis præcipitur, proferentibus. Pro quo sciendum est quod in cap. *Cum medicinalis*, de sentent. excom. in 6. excommunicantur illi qui proferunt excommunicationem contra aliquem ore tenus sine scripto. Vnde iam non habet locum quod cum Rodriguez dixi meo primo tomo dubiorum Regularium verbo *Excomm.* n. 2. videlicet prælatos nostræ Religionis cum ponunt excommunicationem ab homine præcipientes subdito præsentī ne aliquid faciat, vel vt aliquid faciat sub excommunicatione, idque sine scriptis, non incurrere hanc excommunicationem. Cessat, inquam, illa doctrina, quia erat fundata in hoc viuæ vocis oraculo iam reuocato per hanc Bullam: & aliàs lata excommunicatio erit nulla, vtpote lata à non potente sic excommunicare. Aduertit tamen Bonacina tom. 3. *disp.* 3. q. 5. *punct.* 1. §. 2. *num.* 4. quod poterit talis prælatus excusari ob ignorantiam, vel propter bonam fidem, pro quo citat Sñarez, & alios. Ait præterea posse excusari si periculum sit in mora, neque aliud

aliud ferat necessitas, utpote si nequeat fieri scriptura. Tertiò addit non esse necessarium quod scriptura sit publica, sed sufficiet quod sit priuata: debet tamen scriptura continere causam ob quam fertur excommunicatio, sicut exprimitur in dicto cap. *Cum medicinalis*.

11 Octauum viuæ vocis oraculum inter eadem oracula Leonis *num. 76.* erat quod fratres nostri Ordinis quando sunt extra conuentum, & non possunt habere sacerdotem eiusdem Ordinis, quia non habent socium confessorem, possint confiteri peccata sua alteri Religioso alterius Ordinis, vel etiam Presbytero sæculari, & hoc sine fraude, dummodo dicant prælato suo. Hoc tamen viuæ vocis oraculo frui possunt hodie Religiosi communicantes cum Patribus Dominicanis in priuilegiis quibus per Bullam concessum est à Sixto IV. in compendio Mendicantium verbo *Absolutio ordinaria quoad fratres*, §. 35. quod de licentia suorum prælatorum dum itinerauerint, vel fuerint extra conuentus suos dumtaxat, valeant confiteri quibuscunque sacerdotibus regularibus, vel sæcularibus. An verò iste confessor alterius Ordinis debeat esse confessor sæcularium, an sufficiat quod sit tantum confessor fratrum sui Ordinis, dixi in 1. tom. *dubiorum Regul. verbo, Confessor erga regulares*, n. 14. cum Nauarro, & Rodriguez, sufficere, quod sit confessor tantum fratrum in suo Ordine.

Cætera viuæ vocis oracula Leonis X. apud Bullarium Rodriguez citato loco, vel pertinent ad indulgentias, quæ propriè non sunt priuilegia, ut infra dicemus: vel non sunt adedò necessaria, & ad vsum frequentia. Venio ad viuæ vocis oracula Pij V. in eodem Bullario à fol. 977. circa quæ idem seruabo, quod

quod feci in oraculis Leonis X. solum citando illa, quæ frequentiora erant, & grauiora, à quibus oporteat abstinere.

12 Primum igitur viux vocis oraculum Pij V. positum in principio, & impetratum à Cardinali Alexandrino, quod Moniales sanctæ Claræ singulis feriis quintis possint recitare officium sanctissimæ Eucharistiæ non impeditâ illâ quintâ feriâ aliquo alio festo prout ibi explicatur.

13 Secundum ibidem ponitur impetratum ab eodem Cardinali Alexandrino §. *Nos Alexander.* in quo sequentia concedebantur circa ingressum feminarum in monasteria Monachorum. Primò, vt feminæ possent intrare claustra, & clausuram Monachorum, quando in eis Missa, & alia diuina officia celebrarentur; & quando processiones fiunt, vel defunctorum cadauera sepeliuntur, vel etiam pro illis suffragia fiunt. Secundò, vt quando in Ecclesia Regularium habetur concio ad populum, vel ob aliam causam, est tantus populi concursus, vt feminæ commodè exire non possint per portam Ecclesiæ, vel intrare per illam, possint ingredi, & egredi per portam claustri Monasteriorum, dummodo recto tramite accedant ad portam, qua exitur à Monasterio: hæc ibi continentur. Et scio hoc esse viux vocis oraculum à quodam Cardinali Alexandrino. Nec mihi constat quod ab alio Summo Pontifice per Bullam concessum sit. Quo non obstante, ego video hodie post prædictam Bullam fieri oppositum, & sine scrupulo: de quo nihil audeo dicere; sed solum hanc quæstionem proponere, pro dicta praxi in contrarium excusanda, vel potius accusanda.

Dubium tale est. An ista Bulla Domini Vrbanus VIII.

ni VIII. reuocatoria priuilegiorum concessorum vi-
uæ vocis oraculo, reuocet etiam declarationes ali-
quorum Summorum Pontificum, quas ipsi videntes
fecerunt ore tenus circa aliquam Bullam à se antea
publicatam? Et mihi videtur quod ista Bulla non re-
uocat declarationem alicuius Papæ ore tenus factam
circa aliquam Bullam prius à se editam. Probat,ur,
quia declaratio alicuius Papæ circa aliquam suam
legem præteritam, neque est priuilegium, neque est
noua lex, vt patet, sed explicatio contentorum in
Bulla præterita. Cum ergo reuocatio sit quid odio-
sum, imò aliquando pœnale, non debet lex ista re-
uocans priuilegia viuæ vocis oraculo concessa exten-
di ad reuocandas declarationes alicuius Papæ, imò
neque ad reuocandas declarationes Cardinalium: iux-
ta regulam, de Regulis iuris in 6. *Odia restringi, fauores
conuenit ampliari.* Si autem hoc verum est, vt credo, po-
test responderi ad præcedens dubium de ingressu mu-
lierum in claustra Religiosorum in prædictis occasio-
nibus, quod non fuit nouam concessionem facere, sed
declarare mentem suam, & proinde fuit declaratio Pa-
pæ, non verò fuisse nouam concessionem. Probo hoc
ex verbis ibi Cardinalis Alexandrini: referens enim
quod Papa Pius V. per rigorosam suam Bullam præ-
cedentem rigorosè prohibuerat ingressum feminarum
in monasteria virorum; ait prædictus Cardinalis, præ-
dictum dominum Pium respondisse sic: *Quod per di-
ctas suas litteras non intellexit, neque intelligit, quod mu-
lieribus præcludatur aditus accedendi ad monasteria, & loca
regularia, quando in eis, &c.* Quæ verba, *Non intellexit,
neque intelligit*, videntur esse declaratiua tantum, &
non denuò concessiua: sed potius supponentia quod
ibi contenta iam fiebant ex consuetudine, saltem de
ingressu

ingressu feminarum in claustra quando fit processio. Et ideo si prædicta interpretatio Cardinalis Alexandrini circa prædicta, non fuit noua concessio viuæ vocis oraculo, sed Papæ declaratio, non est reuocata per istam Bullam D. Urbani. Hoc est quod mihi occurrit dicendum in hoc dubio grauissimo. Videant illi ad quos pertinet, quid sibi faciendum sit.

14 In eodem Bullario inter oracula Pij V. *num. 9.* conceditur quod prouinciales possint aliquibus Religiosis confessoribus doctis, concedere authoritatem vt possint dispensare cum viris, & mulieribus incestuosis, qui carnaliter peccauerunt cum consanguineis alterius coniugis intra quartum gradum ad hoc vt possint petere debitum, & hoc in foro cōscientiæ tantum.

15 Ibidem *num. 12.* concessit prouincialibus, vt possint committere confessoribus approbatis iuxta Concilium Tridentinum, authoritatem dispensandi cum his, qui ante matrimonium vouerunt castitatem vt licite possint petere debitum, & hoc in foro conscientiæ tantum. Quæ duæ concessiones erant magni momenti, & sæpius in praxi occurrentes. Hodie tamen sunt omnino sublatae.

16 Ibidem *num. 15.* concessit quod fratres Minores possint vti omnibus suis priuilegiis concessis per antecessores Pontifices etiam si aliqua ex illis priuilegiis essent restricta, & derogata per Concilium Tridentinum. Quæ quidem erat magna concessio, & valde utilis ad tollendos sæpè scrupulos in aliquibus materiis difficilibus. Hodie tamen prædicta concessio sublata est per præsentem reuocatoriam. Cætera viuæ vocis oracula Pij V. vel sunt minoris momenti, vel ad indulgentias spectantia.

17 Adhuc refero aliud viuæ vocis oraculum Leonis X.

nis X. citato loco Bullarij *num.* 57. quo concessit Minoritis vt in die ieiunij possint comedere vnâ horâ ante horam consuetam prandij, quod video praticari apud eosdem Religiosos extra communitatem, neque ego inuenio prædictum priuilegium ab alio Pontifice per Bullam scriptam fuisse concessum. Quod tamen viuæ vocis oraculum per præsentem Bullam D. Urbani VIII. clarè reuocatur. Et antequam circa illud aliud aduertam, noto quod absque vlllo priuilegio prandere in die ieiunij vnâ horâ ante horam consuetam quidquid sit de peccato veniali, saltem non est peccatum mortale. Ita tenet Bonacina *tom.* 2. *disp.* vlt. *q.* 1. *punct.* 4. *n.* 3. cum Toletio, Filliucio, & Lessio ibi citatis; & addit, quod si detur iusta causa, neque erit peccatum veniale talis anticipatio per horam: & citat alios quatuor Doctores graues vltra prædictos. Et si fiat sine causa, erit veniale.

18 Occasione prædicti viuæ vocis oraculi Leonis hactenus praticati pono sequens dubium ortum post præsentem Bullam D. Urbani VIII. quod tale est. Occasione alicuius viuæ vocis oraculi antea concessi, aliqua Religio habet consuetudinem ferè immemorabilem faciendi illud quod concedebat tale viuæ vocis oraculum, vt prandere vna hora ante horam consuetam in die ieiunij: quæritur an ista Bulla reuocet prædictam consuetudinem ortam ex tali viuæ vocis oraculo? Audiui ego quemdam virum doctum, & Religiosum respondisse talem consuetudinem immemorabilem non reuocari per hanc Bullam. Potuit fortè moueri ad id asserendum, ex eo quod in ista Bulla licet multa reuocet, non tamen reuocat consuetudines, vt patet ex Bulla. At constat quod lex non abroget consuetudinem rationabilem nisi expressè caueatur in le-

ge ipsa, vt colligitur *ex cap. 1. de constit. in 6.* Ego tamen omnino censeo oppositum, & dico qualemunque consuetudinem fundatam in aliquo viuæ vocis oraculo, licet sit immemorabilis, reuocari per hanc Bullam. Probo, quia in ista Bulla D. Urbani VIII. postquam Papa exprimit aliqua quæ reuocat, addit: *Et cæteris contrarijs quibuscunque*, id est non obstantibus quibuscunque contrariis. At talis consuetudo est contraria isti Bullæ sicut est viuæ vocis oraculum, in quo fundatur: ergo per Bullam reuocatur. Secundò hîc optimè inseruit illa regula iuris, quod *destructo principali, destruitur accessorium*, in ipso fundatum, & ab ipso principali dependens: sed talis consuetudo fundatur in illo viuæ vocis oraculo tanquam in principali, & ab ipso viuæ vocis oraculo dependet: ergo destructo viuæ vocis oraculo, & reuocato per hanc Bullam, destruitur etiam, & reuocatur talis consuetudo. Tertiò, quia consuetudo vniuersalis abrogatur per legem vniuersalem, etiam si lex non habeat clausulam derogatoriam, vt probat Suarez *tom. de legibus, lib. 7. cap. 20. n. 7.* citans Baldum, Felinum, & Rotam. Cum ergo hæc Bulla reuocatoria, sit generalis, reuocabit quamcunque consuetudinem contrariam. Quartò probatur, quia aliàs Bulla hæc foret ferè frustratoria: bene enim sciebat Papa quod in aliquibus Religionibus erant consuetudines ortæ, & fundatæ in viuæ vocis oraculis, quæ reuocare intendit: ergo si tales consuetudines in ista Bulla non reuocaret, parum, vel nihil Papa efficeret, essetque lex saltem ex magna parte frustratoria, quod non est dicendum. Vltimò probatur, quia Papa in hac Bulla interdicat omnino vsum cuiuscunque viuæ vocis oraculi: at illa consuetudo orta ex viuæ vocis oraculo, nihil aliud est quàm vsum

viuæ

viuæ vocis oraculi, vt patet; ergo illam consuetudinem interdicir.

19 Maius dubium est, an per istam Bullam Papa reuocet viuæ vocis oracula per quæ aliqui Sum. Pontifices concesserunt aliquibus Religionibus aliquas indulgentias, quales concesserunt Leo X. & Pius V. *tit. loco Bullarij* viuæ vocis oraculo, vt ibi videre licet. Et videtur quod etiam illa reuocet: nam tales indulgentiæ concessæ sunt viuæ vocis oraculo; hic autem Papa reuocat omnia viuæ vocis oracula sine distinctione: quando verò *lex non distinguit, neque nos debemus distinguere*, vt dicitur in iure. Secundò, quia hic Papa expressè dicit se reuocare quascunque gratias, & indulta: at indulgentia in significatione propria est gratia, & indultum: ergo etiam reuocat indulgentias concessas per viuæ vocis oraculum, quæ sunt multa. Et hæc opinio est securior, & consulenda in praxi. Disputandi tamen gratiâ, videtur posse dici, quod Papa hîc non reuocet indulgentias viuæ vocis oraculo concessas. Potest hoc vtcunque probari ex glossa in *cap. de praben. & dignit. in 6. verbo Dignitatum*, vbi explicans textum Papæ dicentis quod ad Papam pertinet dispositio Ecclesiarum, personarum, dignitatum, aliorumque beneficiorum Ecclesiasticorum, &c. quærit glossa, an Episcopatus comprehendantur in ista constitutione? & respondens quod non, ponit ista verba: *Quia ea qua speciali notâ sunt digna, nisi specialiter notentur, neglecta intelliguntur.* Et citat ad hoc legem quandam iuris civilis, & duo capita iuris Canonici. At indulgentia est res valde notabilis, & digna speciali notâ, vt patet, & non notatur specialiter in ista reuocatoria Bulla: ergo videtur quod non reuocantur in illa viuæ vocis oracula indulgentiarum. Ad quod facit, quod sub com-

münibus nominibus non comprehenditur indulgentia, vt probat Suar. tom. de legib. lib. 8. cap. 9. ad finem, & innuit Nauarrus lib. 5. consiliorum tit. de pœnitent. & remiss. consilio 2. num. 3. Nihilominus certius est oppositum, vt dixi, per illam rationem quam dixi, videlicet quia Bulla reuocat omnia viuæ vocis oracula, & non distinguit, quidquid contineat tale viuæ vocis oraculum: ergo etiam reuocat viuæ vocis oracula, per quæ conceduntur indulgentiæ. Sed de hoc videat qui voluerit id quod dixi in primo meo tomo dubiorum Regularium verbo, *Indulgentia*, à num. 1. vsque ad 14. de reuocatione indulgentiarum facta à Domino Paulo V. circa indulgentias regularium.

Non adduxi hoc loco viuæ vocis oracula posita in compendio, tum quia multa sunt, tum quia non sunt frequentia in praxi: tum quia Rodriguez in suo Bullario citato illa maiori ex parte transcripsit. Videat qui voluerit in eodem Bullario in fine concessionum cuiusque Pontificis: & in compendio Mendicantium in fine cuiusvis concessionis habentis litteram O paruum, siue O magnum.

CASVS XIV.

*Dubia circa reclamationem cuiusdam
professi.*

Quidam Religiosus in Ordine non Mendicante transiuit ad alium Ordinem Mendicantem strictiorem, in quo habitum suscepit, & professionem emisit in eodem secundo Ordine; & in eodem secundo Ordine vixit per annos sexdecim, reputatus pro vero Religioso

Religioso secundi Ordinis. In eodem secundo Ordine commisit grauius delicta, ob quæ prælatus secundi Ordinis illum primò carceri mancipauit, & postea per sententiam illum condemnauit ad maius tempus carceris, & alias pœnas minores. Ille lectâ sibi sententiâ, per modum appellationis recurrit ad Vicarium generalem Ordinarij, allegans se non esse professum secundæ Religionis, eo quod quando ad illam venit, non petiit, neque obtinuit licentiam à suo prælato primæ Religionis. Quo audito Vicarius generalis decreto particulari mandauit prælato locali conuentus, in quo carceratus existeret, vt prædictum carceratum solueret è carcere, eundemque reponeret in certo quodam loco Religioso extra prædictam secundam Religionem. Prælatus localis prædicti carcerati, respondit se non teneri obedire præcepto prædicti Vicarij generalis, ob rationes, quas mox prætendebat allegare sicut de facto allegauit. Et profectò hic casus, & nouus, & difficilis, & inuoluens multas quæstiones.

Prima est, an prædictus Religiosus post annos sexdecim professus in secunda Religione potuerit reclamare, & audiri sine rescripto Papæ?

Secunda est, an prædictus Vicarius generalis illud potuerit præcipere prælato locali carcerati, & facere per se solum processum circa nullitatem professionis?

Tertia, an prædictus Vicarius generalis possit liberare à carcere prædictum Religiosum?

Quarta, an professio emissâ à prædicto Religioso in secundo Ordine fuerit valida, licet constet, quod non petierit, neque obtinuerit licentiam à suo prælato primæ Religionis?

Quinta, an dato quod secunda professio fuerit

nulla, possit prælatus secundæ Religionis hodie prædictum Religiosum punire propter culpas ab eo commissas tempore quo gestavit habitum secundæ Religionis, & reputatus est verus Religiosus illius. His omnibus quæstionibus singillatim respondebimus.

Respondetur primæ quæstioni.

QUod attinet ad primam quæstionem, præmitto Concilium Tridentinum *sess. 25. cap. 10. de Regularibus*, decernere absolutè, vt si aliquis Religiosus post annos quinque à die suæ professionis prætenderit probare suam professionem fuisse nullam, non audiat. Quo non obstante, Suarez *tom. 3. de Religione, cap. 4. à num. 6. & seqq.* sentit in tribus casibus posse audiri reclamantem contra suam professionem. Primus est, quando aliquis toto tempore quinquennij non potuit reclamare, & ius suum coram Ordinario postulare, & fuit impeditus. Secundus casus est, si ignorantia inuincibilis de ipsius professionis nullitate aliquo tempore intercessit: nam licet hæc non præsumatur, nisi probetur, vbi tamen probari potest, excusabit, quia causat moralem impotentiam. Tertius casus est quando defectus professionis talis est, vt sit euidens non potuisse toto illo quinquennio auferri, & consequenter nec ratificari professionem: ponit ibi exemplum de quodam viro coniugato, qui prius dimisit vxorem suam ob publicum adulterium ab illa commissum: & ingressus Religionem, in illa professus est, & in illa mansit ultra quinquennium: sed postea probatum est, quod ille ante ingressum Religionis pariter adulterium commisit, & sic non poterat facere diuortium, nec proinde professionem emittere: &

ex consequenti non potuit in quinquennio professionem ratificare absque consensu vxoris suæ adhuc uiuentis. Et ait Suarez iudicatum fuisse, talem professionem dissoluendam fuisse, non obstante quinquennio transacto. Fundamentum præcipuum Suarez est, quia lex illa Tridentini est fundata in præsumptione: præsumit enim Concilium, quod talis professus intra annos quinque debuit ratificare suam professionem præteritam; ergo quotiescunque talis præsumptio euidenter seu cum sufficienti probatione in externo foro cessauerit, non obstante hac lege audiendus erit talis Religiosus. Et est quidem hæc opinio satis probabilis, cum di&is modificationibus, neque puto vllum ex illis tribus casibus in hoc nostro casu concurrisse.

2 Quo non obstante Bonacina Doctor grauissimus post ipsum Suareze *in suo primo tom. q. 2. de clausura, puncto 10. difficultate 4. num. 4.* absolute dicit nullum remedium competere Religioso reclamanti post quinquennium, nisi rescriptum Papæ. Rationes istius Doctoris sunt plures, & efficaciores. Prima, quia Concilium Tridentinum absolute dicit, quod Religiosus reclamans non audiatur nisi intra quinquennium: ergo non præmittit ipsum vti alio remedio, cum eo vti non possit nisi audiatur. Secunda, quia in pari causa restitutionis in integrum inter duos Minores, melior est conditio possidentis *l. Si minor 35. ff. de minoribus.* Sed Religio gaudet priuilegio Minoris, *cap. 1. de in integrum restitut.* ergo Religiosus vti non potest contra Religionem priuilegio restitutionis in integrum. Tertiò, quia Concilium Tridentinum citato loco denegat Religiosum audiri post quinquennium propter pacem, & tranquillitatem Religionis: Religio autem hac tranquillitate, & pace priuari pos-

set, si Religiosus transacto quinquennio vti posset remedio extraordinario restitutionis in integrum, multi enim hoc subsidium implorarent. Quartò, quia licet admittamus Tridentinum citato loco niti præsumptione rationis professionis intra tantum tempus, nihilominus huiusmodi præsumptio est iuris & de iure, contra quam non datur probatio, perinde enim se habet huiusmodi præsumptio, ac si esset firmum ius, & ea posita certum quid statuitur, etiam si in lege non exprimatur probationem contrariam non esse admittendam, vt probat Menoch. *de præsumpt. lib. 1. q. 3. num. 16. & seqq.* Quintò, quia Gregor. XIII. ex sententia sacre Congregationis Cardinalium, declarauit Religiosum audiendum non esse vltra quinquennium, etiam si allegaret vim, & metum semper durasse: ergo idem dicendum est de ignorantia, vel alio impedimento, cum eadem in omnibus ratio militet: & alleganti in hoc casu ignorantiam, vel aliud impedimentum aduersetur præsumptio iuris, & de iure. Ita Parisius *de resignat. beneficiorum, lib. 13. quest. 5. num. 46.* vbi testatur ita declaratum fuisse à sacra Congregatione Cardinalium. Idem tenet Ceuallus *quest. pract. q. 500. in fine*, & alij.

3 Et sanè hæc videtur opinio potioribus fundamentis probata, maximè propter declarationem DD. Cardinalium pro illa citatam. Concedit tamen Bonacina *citato loco num. 7.* quod si Religiosus professus habebat impedimentum perpetuum irritans professionem, tunc elapso quinquennio poterit audiri, vt cernitur in exemplo adducto ex Suarez *num. 1. de viro adulterante, &c.* Secus ait Bonacina dicendum si impedimentum fuit temporale. Ad fundamentum verò Suarez dicentis, legem Concilij fundari in præsumptio

sumptione, dicendum est hanc præsumptionem non esse qualemcumque, sed præsumptionem iuris, & de iure, quæ non admittit probationem, ut numero præcedenti diximus cum Bonacina. Tres verò casus citati supra à Suarez, in quibus ait admitti posse reclamationem, non potuerunt contingere in isto casu, cum iste Religiosus non laboraret ignorantia, & benè sciret se non posse profiteri in alia Religione absque licentia sui Prælati prioris Religionis. Et præterea habuerit sexdecim annos, in quibus abundè potuit reclamare, neque illi vnquam vis aliqua facta fuerit: neque per annos sexdecim requisitus fuerit à Prælati suæ prioris Religionis, scientibus de illius professione facta in secunda Religione.

4 Ad maiorem dictorum probationem, & claritatem aduerto hîc cum prædicto Bonacina citatâ *questione 2. puncto 10. §. 5. num. 2.* cum Rodriguez, & Angles ibi citatis teneri Religiosum inualide professum, & obligari ad ratificandam professionem nullam, post quinquennium, saltem quando professio irrita fuit ob ipsius culpam, præter alias rationes affert istam; quia licet Religio sit graue iugum, nihilominus est etiam valde vtile ipsimet professo onus illud suscipienti, & onus vtilitate, & incommodum fructu compensatur: & ex consequente ægrè ferre non debet in eas se coniectum esse angustias, ut ad illud subeundum obligetur, maximè cum culpa sua ad id occasionem dederit. Quod si dicas in hoc religioso per illos sexdecim annos datum fuisse perpetuum impedimentum ratificandi professionem cum non haberet licentiam Prælati primæ Religionis ad profitendum in secunda Religione: & sicut sine illa non poterat profiteri in secunda, ita non poterat dictam

professionem ratificare ob impedimentum durans. Ad hoc dubium patebit responsio ex dicendis in responsione ad quartam quæstionem, ubi probabo professionem istius Religiosi factam in secunda Religione fuisse validam, etiam si non petierit, neque obtinuerit licentiam à suo Prælato primæ Religionis.

5 Ultimo aduerto hodie in hoc regno in praxi positum esse, ut nullus Ordinarius audiat aliquem reclamantem post quinquennium, nisi prius obtento rescripto Papæ, per quod restituatur ad quinquennium, sicut ego vidi circa duas Moniales istius regni, quæ post quinquennium de nullitate professionis reclamaverunt, & non fuerunt auditæ ab Ordinariis, nisi prius obtento rescripto Papæ. Et ratio clara id suadet: nam in dubio parendum est legi, neque in dubio licitum est operari contra legem, aliàs subiiceret se quis claro periculo peccandi contra legem: ergo stante dubio de validitate professionis, de qua reclamatur ultra quinquennium, non est licitum operari contra legem Concilij clarè decernentis ut non audiat: intellige sine rescripto Papæ dispensantis in lege prædicti Concilij.

Responsio ad secundum quæsitum.

1 Quid attinet ad secundum quæsitum, an scilicet Vicarius generalis Ordinarij possit solus absque Prælato regulari facere processum, vel processum incipere sine dicto Prælato regulari? Respondeo non posse. Pro quo suppono prius, quod Concilium Tridentinum *cit. cap. 19. de regularibus*, circa nullitatem professionis iudicandam, constituit iudices duos, videlicet Prælatum regularem ipsius reclamantis, & Ordinarium. Circa quos

Noro

Noto imprimis, quod illi duo non constituuntur iudices in solidum, ita scilicet, vt vnus possit procedere sine alio, & quilibet habeat integram facultatem iudicandi per se, sine alio. Constat hoc ex verbis Concilij: cum enim Concilium concedit vt reclamans possit allegare causas nullitatis, ait, quod eas proponat, *Coram Superiore, & Ordinario*: non dicit coram Superiore, vel Ordinario, sed per particulam, &, copulatiuam, clarè significat ambos simul debere procedere. Quod idem probatur, quia ibidem Concilium non ponit clausulam aliquando solitam apponi in iure, videlicet quando causa committitur duobus, cum ista clausula: *Vt si ambo interesse nequiverint, alter nihilominus exequatur*. Vt exprimitur in cap. *Prudentiam, de off. & potest. iud. deleg.* Tridentinum hanc clausulam ibi non apponit circa hos duos iudices, sed copulatiuè vnum cum alio iudices facit.

Secundò noto, quod dictus prælatus regularis, & Vicarius generalis in hac causa non sunt iudices delegati, sed Ordinarij, sunt enim iudices constituti à iure communi, videlicet Concilio generali, & proinde non sunt delegati, sed verè iudices Ordinarij.

2 Hoc posito resolutè dico, Vicarium generalem Ordinarij nullum actum iurisdictionis posse exercere in causa nullitatis istius professionis sine consensu, & assistentia prælati regularis, qui est coniudex cum illo, ita vt nec citare aliquem possit. Hoc probatur primò ex citato cap. *Prudentiam, de off. & pot. iudicis deleg.* vbi Papa dicit quod si causa committitur pluribus, cum clausula, *Quod si non omnes, duo saltem illam exequantur*, posse tunc illos duos causam iudicare, si aliquis se excusauerit, & interesse nequiverit. Vbi apertè ait, quod si causa pluribus committatur sine

illa clausula, *quod si non omnes*, non poterit vnus sine alio in causa procedere. At Concilium Tridentinum citato c. 19. constituens iudices professionis prælatum regularem, & Vicarium generalem, non ponit clausulam, *quod si non omnes*, vel *quod si non ambo*: ergo vnus sine alio non potest procedere. Et facit adhuc quod addit Papa citato cap. *Prudentiam*, in textu, dicens; consuetudinem fuisse Sedis Apostolicæ libentius committere causam duobus quàm vni. Nam, vt ibidem ait glossa in verbo, *Plurimorum*, id quod à pluribus quæritur, sapientius, & facilius inuenitur: iuxta cap. *De quibus*, 20. distinct. Causa autem non debuit vni tantum, Ordinario scilicet, committi, sed duobus simul, vt sapientius, & facilius rem cogitarent. Facit glossa in citato cap. *Prudentiam*, in verbo, *teneatur*, vbi ait, quod si tres iudices dati sunt in aliqua causa, & duo tantum citant reum, non tenetur reus respondere. Imò addit glossa ibidem, quod si tres iudices dati sunt in causa aliqua, & duo tantum protulerunt sententiam, tertio absente; non potest ille tertius absens postea adueniens ratificare sententiam, cum ab initio nulla fuerit: ad quod adducit regulam iuris ciuilibis *ff. de regul. iuris*, *quod ab initio, in fine*. Idem colligitur ex glossa in cap. *Coram dilecto filio*, eodem titulo, verbo, *Quod non intelligitur*, in fine. Denique vt omnis dubitatio tollatur, extat circa hoc declaratio DD. Cardinalium adducta à Marzilla in suo tomo de decretis Tridentini, & declarationibus Cardinalium lib. 1. de statu regularium, tit. 12. super cap. 23. §. *Coram superiore suo, & ordinario*, quæ sic habet: *Congregatio Concilij censuit, Regularem deducentem intra quinquennium nullitatem professionis, teneri eam probare coniunctim coram proprio superiore Regulari*

gulari illius monasterij in quo professionem emisit, & coram Ordinario illius loci, ubi extitit monasterium, &c. Quo nihil clarius dici potuit: cum dicat reclamantem debere suam causam probare coniunctim coram suo superiore, & Ordinario.

3 Ex his clarè colligitur non potuisse Vicarium generalem Ordinarij in hoc casu procedere in re aliqua, citando scilicet, mandando, vel aliquid ordinando in re aliqua spectante ad iudicandam nullitatem huius professionis, absque consensu, & assistentia prælati regularis. Cum enim Vicarius generalis, tale mandatum, vel citationem faciat ut iudex, non valet tale mandatum, vel citatio facta absque prælato regulari, qui est coniudex cum illo: & facta sine iurisdictione sint nulla, ut patet ex citatis text. & gloss. in numero præcedenti. Et in particulari, cum educere de carcere istum reclamantem, & deponere illum in loco tuto extra secundam religionem, sit annuere petitioni reclamantis, in re graui, & proinde sit actus iurisdictionis ordinatus ad iudicandam nullitatem professionis, ut patet; non potuit tale præceptum de educendo reclamante à carcere imponi prælato locali ipsius carcerati absque consensu, & assistentia prælati regularis ipsius carcerati, qui est coniudex causæ cum Vicario generali: quiniimo est prius nominatus iudex à Tridentino, quàm ipse Ordinarius.

Responsio ad tertium.

1 **Q**uod attinet ad tertium quæsitum, an Vicarius generalis possit præcipere, ut dictus reclamans educatur de carcere, iam patet solutio ex dictis in proxima responsione ad secundum, maxime in num. 3.

num. 3. vbi diximus id non potuisse mandare absque assensu, & assistentia praelati regularis. Nunc autem id probo clarius, & efficacius. Aut Vicarius generalis præcepit hanc educationem à carcere tanquam iudex appellationis per quam carceratus appellauit ad dictum Vicarium à sententia sibi data ob culpas commissas in secunda Religione: aut præcipit talem educationem à carcere tanquam iudex appellationis factæ à carcerato ad ipsum ob nullitatem professionis. Si dicas primum; Vicarius generalis nullo modo potest se intromittere in causa criminali Religiosorum, neque iudicare culpas commissas à Religioso, dum gestat habitum Religionis, vt amplius dicemus in responsione ad quintam. Sunt enim Religiosi personæ exemptæ à iurisdictione Episcopi, vt patet ex multis priuilegiis apud compendium verbo, *Exemptio*; quorum aliqua ibi excommunicant praelatos Ecclesiasticos, qui Religiosos exemptos per aliquam sententiam latam molestauerint. Ergo Vicarius generalis non potest præcipere educationem à carcere istius carcerati tanquam appellantis ad illum à sententia carceris sibi data ob culpas à praelato Ordinis, iam enim hoc esset intromittere se in causis regularium exemptorum. Addo quod à praelato regulari non potest appellari ad Episcopum, vt putet, sed Generalem Ordinis, & à Generali ad Papam, vt patet ex multis priuilegiis regularium. Si dicas secundum, videlicet Vicarium generalem imperasse hanc educationem à carcere, quia ipse reclamans recurrit ad illum tanquam ad iudicem nullitatis professionis; tunc dico iterum, neque vt sic potuisse illum à carcere educere sine consensu, & assistentia praelati regularis, qui est coniudex eiusdem causæ, siue appellationis, vt clarè, & abundè

abundè manet dictum, & probatum in responsione ad secundam quæstionem.

2 Idem probo nunc ex quadam declaratione Cardinalium adducta à Marzilla *citato tomo lib. 4. de appellat. tit. 10. super caput primum, §. Per diffinitivam.* vbi postquam DD. Cardinales dicunt iniuste carceratum posse appellare ab indebita carceratione, & teneri ordinarium tali appellationi, & processum transmittere ad iudicem appellationis, subdunt DD. Cardinales hæc verba : *Interim tamen reo manente in carceribus donec index appellationis causa cognita, aliud iusserit.* Vbi vides duo ibi requiri vt reus è carcere appellans ab illo educatur. Primum quod processus mittatur ad iudicem appellationis. Secundò quod non educat illum de carcere nisi causa cognita. At in nostro casu ad Vicarium generalem non est transmissus processus culparum, quas commiserat carceratus, vt constat, neque item fuit ad illum transmissus processus de nullitate professionis, quia talis processus nondum factus fuerat cum assistentia prælati regularis, qui debebat tali processui interesse, iuxta Tridentinum *citato cap. 19.* & proinde Vicarius generalis non potuit perfectè habere cognitionem causæ absque illis processibus, & ex consequente non potuit præcipere prædictam liberationem à carcere. Vltimò probo, quia prædicta declaratio Cardinalium loquitur solum, quando appellans fuit incarceratus iniuste. At in nostro casu Religio secunda iuste carceri mancipavit hunc, qui post carcerem reclamavit, ob graves culpas commissas, prout constabit ex processu. Et Vicarius generalis non potuit iudicare, an ista carceratio fuerit iusta, vel iniusta, cum non viderit processum culparum : ac proinde illius mandatum fuit nullum,

nullum, utpote factum expresse contra dictam declarationem Cardinalium, & contra alia in præcedentibus allegata.

Responsio ad quartam questionem.

QUod attinet ad quartam questionem, an professio istius reclamantis in secunda Religione fuerit valida, etiam si constet illum non petiisse, neque obtinuisse licentiam à suo prælato primæ Religionis? Quæ questio difficillima est, tum propter multa quæ Doctores dicunt circa illam, & propter aliqua priuilegia concessa à Sede Apostolica aliquibus Religionibus, ne sui Religiosi transeant ad alias Religiones nisi petita, & obtenta licentiâ.

1 Et quidem in hoc casu, primò noto adeundum esse prælatum primæ Religionis, vel successores illius, & ab illis inquirendum, an prædicto reclamanti licentiam dederint transeundi ad secundam hanc Religionem, vel ipse illam petierit, cum credibile non sit quod prælatus secundæ Religionis illum admitteret non prius constituto, quod prælatus primæ Religionis licentiam dederit. Tenetur enim prælatus secundæ Religionis sub mortali non admittere professum alterius Religionis ad suam, nisi cum litteris commendatitiis prælati primæ Religionis, ut expresse habetur in cap. *Statuimus*, 19. q. 3. ubi sic dicitur. *Discedentem vero nullus Abbatum, nullus Episcoporum, nullus Monachorum sine communi litterarum cautione suscipiat.*

2 Hoc posito, Bonacina tom. 1. tit. de clausura q. 2. puncto 9. §. 3. num. 7. absolutè dicit, quod si aliquis Religiosus professus in vna Religione sine licentia sui primi

primi Prælati, nec petitâ, nec obtentâ transeat ad aliam Religionem strictiorem, & in illa professionem emittat, professio erit valida, itavt prædictus Religiosus non possit repeti, seu revocari à Prælato primæ Religionis, neque ad illam propria sponte redire. Probat hoc citatus Author, quia quamvis in cap. *Licet*, de regularibus, præscribatur, vt prius licentia petatur; nihilominus ibidem præcipitur, vt non molestetur qui bona fide transiit, neque irritatur professio aliter facta: constat verò quod multa fieri prohibentur, quæ tamen facta valent. At iste reclamans, de quo agitur, clarè transiit ad secundam Religionem strictiorem quàm erat sua prima. Secundò probat Bonacina, quia cuilibet Religioso iure naturali competit ius aduolandi ad arctiorem Religionem, etiamsi fortè delinquat in modo non petendo licentiam à Prælato, vel eam per dolum extorquendo; citat pro se sanctum Antoninum, & Sanctarellum, quem dicit citare alios Doctores. Addit tamen Bonacina citato num. 7. quod si prima Religio habet priuilegium, ne sui Religiosi transeant ad aliam Religionem nisi petitâ, & obtentâ licentiâ, & quod professio aliter facta in secunda Religione sit irrita, & nulla, tunc, si Religiosus transeat ad aliam Religionem non petitâ, & obtentâ licentiâ, professio in secunda Religione erit nulla, ob dictum priuilegium irritans.

5 At Sanchez *lib. 6. Decalogi cap. 7. num. 89.* tenet oppositum, videlicet, quod secluso etiam priuilegio si aliquis Religiosus transeat à prima Religione ad secundam etiam arctiorem non petitâ, & simul obtentâ licentiâ, professio illius in secunda Religione strictiori erit nulla. Probat auctoritate Abbatis & Rossellæ. Addit hanc solam rationem: quia licet Doctores

res diuersimodè sentiant an bono zelo transiens non petitâ licentiâ reuocandus sit : concordant tamen vniuersi illum reuocandum quando bonus defuit animus. Idem tenet idem Sanchez *n.90. & sequenti, & n.96.* vbi tamen fatetur contrariam opinionem esse probabilem, & iuxta illam fore validam professionem illius, qui in arctiore Religione professus est non petitâ, & obtentâ prius licentiâ primi Prælati. Et quidem mihi magis placet opinio Bonacinae dicentis suprà professionem prædictam fore validam in Religione arctiori, etiam non petitâ, & obtentâ licentiâ. Nititur enim Bonacina meliori ac solidiori fundamēto, vt vidimus.

4. Quia tamen suprà dixi ex Bonacina non fore validam professionem, de qua agimus, si prima Religio habet priuilegium irritans professionem sui Religiosi profirentis in alia Religione, non petitâ, & obtentâ licentiâ primæ Religionis : iuuabit scire, quod Religio sancti Benedicti in Hispania habet priuilegium concessum ab Eugenio IV. quod sui Religiosi non possint transire ad alium Ordinem nisi petitâ, & obtentâ licentiâ sui Prælati. Idem priuilegium habet Ordo D. Hieronymi in Hispania, vt testatur illius compendium verbo, *Transitus ad alium Ordinem.* Sed tamen ibi non lego quod irritetur professio aliter facta. Item Religio Societatis IESV, & Religio Carmelitarum Discalceatorum, teste Sanchez *citato lib.6. Decalogi cap.7. num.31.* habent priuilegium ne sui Religiosi possint transire ad aliam Religionem, etiam Carthusiæ, nisi prius petitâ, & obtentâ licentiâ, idque præcipitur sub pœna excommunicationis. Non tamen ibi dicitur, quod Papa annullet professionem aliter emissam. Rodriguez tamen *tomo 3. questionum Regul. 9.52.art.20.* propè finem, citat vnâ declarationem

nem Cardinalium, sic dicentem : *Illustrissimi Cardinales definierunt quod transiūs ad parem, vel strictiorem Religionem, non fiat nisi causa cognita transeuntis, & vitæ, ac morum ratione, idque ex approbatione Capituli generalis.* Sed neque hæc declaratio est in usu, cum quotidie transferantur Religiosi sine licentia Capituli generalis, cum sola licentia sui prælati Ordinarij, vel prælati Prouincialis. Neque item in illa declaratione irritatur professio facta sine prædicta licentia.

5 Hoc solum restat aduertere, & inquirere : an opinio Bonacinæ tenentis professionem factam in secunda Religione arctiore sine licentia petita, & obtenta, defendi possit, quando prima Religio habet priuilegium ne sui Religiosi transeant ad aliam Religionem, nisi petita & obtenta licentiâ, non tamen ponit clausulam irritantem professionem secus factam ? Azor *tom. 1. lib. 12. cap. 14. q. 4.* absolutè dicit, quod non obstantibus Bullis particularibus Religionum prohibentibus transitum sine licentia, non tamen irritantibus secus factum, professio facta in Religione secunda erit valida. Idem tenet Nauarrus in *tomo consiliorum tit. de regular. consilio 59. & Sà in Aphorif. verbo Religio, num. 37.* qui omnes Doctores tenent quod illæ prohibitiones particularium Pontificum solum prætendunt, nè transitus fiat temerè, leuiter, vel cum damno Ordinis omissi. Si enim constet nihil horum interuenisse, dictæ Bullæ non impediunt. Hinc videas opinionem, quod professio facta in secunda Religione arctiori, non petita, & obtenta licentiâ, est valida, esse opinionem D. Antonini, Sanctarelli, Bonacinæ, Azoris, Nauarri, & Sà, qui sunt sex Doctores satis graues, & ex illis quatuor sunt recentiores, ob quos securè possit in praxi practicari.

6 Et postea adhuc hæc opinio Bonacinae probari exemplo professionis factæ à seruo, quæ cum sit valde prohibita, imò nulla, secundum iura, per allegata à Suarez *tom. 3. de Relig. lib. 6. cap. 6. num. 1.* Nihilominus ibidem *num. 2.* tenet cum Archidiacono, Turrecremata, Angelo, Syluestro, Gregor. Lopez, & Lessio, professionem serui factam, etiam incio, & inuito domino esse validam. Inter alias probationes, quas adducit, præcipua est, quia nullum ius canonicum inuenitur quod annullet professionem factam à seruo. Quod idem videtur locum habere in professione Religiosi facta in alia Religione sine licentia prælati primæ Religionis: quamuis enim iste talis prohibeatur per suos priores prælatos, imò per Bullas particulares, ne profiteatur in alia Religione absque licentia sui prælati, si tamen non detur aliquod ius, vel Bulla irritans factum, professio erit valida. Quamuis autem ibidem Suarez fateatur posse dominum serui illum repetere vt sibi seruiat in vita, non obstante validâ professione: hinc non infertur à simili posse prælatum primæ Religionis repetere subditum, qui incio, vel inuito prælato professionem validam emisit in secunda Religione. Vt enim bene notat Bonacina *citato puncto 9. num. 8.* sibi imputet prælatus primæ Religionis, qui non curauit sibi restitui subditum ante professionem, nec præsumitur transitum ignorasse. Maximè cum superiores Religionum teneantur singulis annis fugitiuos reuocare. Quod in particulari contigit in isto casu, in quo prælatus primæ Religionis per annos sexdecim non requisituit istum subditum, maximè cum pluribus annis habitauerit in quodam conuentu secundæ Religionis posito in quadam vrbe, vbi etiam pri-
ma

ma eius Religio habet quemdam conuentum : quod signum clarum est, primam Religionem eius transiitum non ignorasse, imò neque impediuisse.

Responsio ad quintam questionem.

1 **Q**uinta quæstio petit : an dato quod prædictus reclamans iudicetur pro non professio in secunda Religione , possit nihilominus prælatus secundæ Religionis illum punire pro culpis commissis in secunda Religione dum reputabatur verus professus in illa ? Et videtur quod non possit , nam declarato quod non fuit verus professus in secunda Religione , constat quod non est verè prælatus illius : at prælatus vnius prouinciæ , non potest punire subditum alterius Prouinciæ. Sicut Episcopus vnius diœcesis non potest punire subditum alterius diœcesis, vt praxis, & iura docent.

2 Nihilominus sentio prælatum secundæ Religionis posse punire dictum professum , etiam post declarationem , quod non fuerit verè professus in secunda Religione , & hoc multo magis habebit locum in isto de quo agimus, qui iam incipiebat puniri in carcere per sententiam latam à prælato secundæ Religionis antequam illius secunda professio nulla declararetur. Probo hoc imprimis ex praxi ; nam vt Iuristæ dicunt , vnusquisque sortitur forum ratione delicti. Exempli gratia : Clericus subditus Episcopi Conimbricensis , si existens Olyssipone delictum graue commisit , poterit , ac debet puniri ab Archiepiscopo Olyssipponensi , quia ratione delicti commissi Olyssipone sortitus est forum prædicti Archiepiscopi : quod iura sic decernunt, quia aliàs multa

M 2 crimina

crimina manerent impunita, & sequerentur multa scandala, & inconuenientia. Quod optimè applicatur ad nostrum casum. Nam licèt iste nulliter professus in secunda Religione in substantia fuerit subditus prælati primæ Religionis, quia tamen deliquit grauiter in secunda Religione dum reputabatur verus Religiosus illius, ratione delicti sortitus est forum, & tribunal prælati secundæ Religionis, & proinde ab illo poterit puniri. Ita expressè definitur in *cap. ult. de foro compet.* vbi dicitur quod ratione delicti sortitur quis forum; id est efficitur subditus illi prælato, in cuius ditone illud commisit, ita vt possit coram illo ritè conueniri. Idem probat glossa 2. in *cap. A nobis, 1. de sent. excom.* docens, quod si Episcopus vnus diocesis fulminet excommunicationem contra patrones certum delictum, talem excommunicationem incurrere subditum alterius Episcopi existentem in diocesi excommunicantis. Idem tenet Azor *tom. 1. lib. 12. cap. 2. q. 11.* & clarius idem tenet Bonac. *tom. 3. disput. 1. quest. 16. punct. 3. num. 14.* vbi tenet quod Nouitius exiens à Religione, in qua grauia delicta commisit, non potest puniri à potestate laica, sed ab Ecclesiastica; probat hoc, quia ad cognoscendum cui foro quis subiiciatur, inspiciendum est tempus delicti, & status in quo tempore delicti reperiatur delinquens, ex Baldo in *l. Affinitaris, Cod. comm. de succ.* Sed hic tempore delicti erat nouitius, & consequenter immunis à laica potestate: ergo remanet immunis à laica potestate ob delictum in nouitiatu commissum. Secundò probat, quia qui relicto clericatu sistitur coram iudice laico ob delicta quæ commisit tempore clericatus, non potest puniri à iudice laico ob talia delicta: pro quo citat Abbatem,

rem, Iulium Clarum, Sayrum, Farinacium, Cenedum, & alios. Quæ omnia magis quadrant ad nostrum intentum: si enim Nouitius potest puniri à prælato regulari, qui directè non habet iurisdictionem supra Nouitium, multò magis poterat prælatus istius reclamantis illum punire ob delicta commissa tempore, quo supra illum habebat plenam iurisdictionem ob professionem factam in sua Religione nondum declaratam ut nullam. Vltimò, ne aliqua dubitatio maneat, valde probatur hoc ex eo quod tradit Nauarrus *consilio* 59. *de Regular.* dicens, posse prælatum procedere contra Nouitium, de quo est magna præsumptio, quod Religiosum occiderit, & formare processum contra illum. Si verò hoc potest prælatus facere contra Nouitium, etiam poterit punire. Et quod possit prælatus talem Nouitium punire, tenet expressè Rodriguez *tom. 2. qq. q. 2. art. 10.* ubi multa addit ad hoc intentum. Videatur etiam ad hoc Suar. *tom. de leg. lib. 3. cap. 33.* & Sayro *lib. 1. de censur. cap. 7. num. 9.* qui dicunt, extraneos in alieno territorio teneri ad pœnam territorij ratione delicti.

CASVS XV.

De institutione cuiusdam Maioratus.

ANtonia per scripturam publicam instituit maioratum, & capellam de omnibus suis bonis: & per hanc scripturam publicam nominavit, & instituit Bartholomæum consanguineum suum, clericum Diaconum tanquam primum successorem, & administratorem huius maioratus. Et declaravit in scriptura,

quod prædictus primus nominatus Bartholomæus per mortem suam nominaret successorem in dicto maioratu alium consanguineum proximiorẽ eiusdem Antoniæ, qui esset masculus, si talis daretur. Mortuâ Antoniâ, & possidente Bartholomæo maioratum, dictus Bartholomæus nominavit Mariam successorem eiusdem maioratus neptem suam ex fratre, cùm declaratione, & onere, quod illa nuberet cuidam filio Emanuelis: quem filium Emanuelis declaravit successorem dicti maioratus, applicans illi & filiis masculis succedentibus bona sua vinculata eidem maioratui Antoniæ.

Facta hac institutione, & nominatione per Bartholomæum clericum, ipsemet postea fecit aliam nominationem, & institutionem, & nominavit successorem dicti maioratus quendam alium Ludouicum consanguineum, & reuocavit institutionem, & nominationem priorem factam Mariæ. Mortuo verò Bartholomæo clerico, apprehendit possessionem maioratus cum suis bonis dicta Maria, quæ hodie prædicta bona possidet. Et declaratur quod iste Ludouicus secundò nominatus à Bartholomæo est masculus, & proximior consanguineus Antoniæ primæ instituētis maioratus.

Quæritur, an prædictus maioratus cum bonis suis pertineat ad Mariam primò nominatam à Bartholomæo, an verò ad Ludouicum secundò nominatum masculum, & proximiorẽ consanguineum, cum reuocatione prioris nominationis factæ in Maria?

Et quod maioratus pertineat ad Mariam primò nominatam, non verò ad Ludouicum secundò nominatum, videtur probari ex regula illa iuris in 6. quæ dicit: *Quod semel placuit, amplius displicere non potest.* Sed Bartholomæo clerico primò nominanti semel & prius

prius placuit nominare Mariam in maioratus ergo non potuit amplius pœnitere reuocando prædictam nominationem Mariæ, & nominando denuo Ludouicum. Et confirmatur, quia Maria per priorem nominationem factam à clerico circa illam, acquisiuit ius ad rem; sicut ille qui eligitur ad aliquod beneficium, acquirit ius ad illud per solam electionem ante confirmationem, vt omnes fatentur. At nemo potest spoliari iure sibi quæsito sine causa, & contra iudicis, quæ hîc non videntur interuenisse: posset Maria spoliari iure sibi acquisito.

Responsio.

HOc non obstante dico prædictum maioratum cum bonis suis non pertinere ad Mariam primò nominatam, sed ad Ludouicum secundò nominatum cum reuocatione prioris nominationis. Fundamentum principale istius conclusionis est, quia prima nominatio Mariæ facta à Clerico, fuit nulla. Probo primò, quia iste Clericus primò nominans Mariam successorem maioratus non seruauit formam, & mandatum Antoniæ primæ instituentis, & fundatrici maioratus, vt patet. Nam Antonia mandauit Clerico per scripturam, quod ipse post se nominaret in successorem maioratus consanguineum masculum proximiorum ipsi Antoniæ, si extaret; & extabat prædictus Ludouicus, qui erat masculus, & proximior consanguineus, Maria verò erat femina: & proinde non seruauit formam mandati. Constat autem quod dispositio Antoniæ primæ instituentis maioratus fuit sicut testamentum. Voluntas autem testatoris habenda est pro lege, vt dicitur in Authent. de nuptiis, vbi

dicitur: *Disponat testator, & erit lex.* Et idem colligitur ex cap. *Cum esset, de testam.* Consuetudo verò, seu conditio quod in successione maioratum primò nominentur masculi, est consuetudo ferè omnium gentium, & regnorum. Nunc probo amplius ab auctoritate quod non seruata formà mandati, siue alicuius dispositionis, sit irritum, quod sit contra prædictam formam.

2. Imprimò habetur clarè in cap. *Cum dilecta, de rescript.* vbi contra quosdam, qui in iudicando non seruauerunt formam mandati ipsius Papæ, sic ait: *Propter quod processum ipsorum contra nostri formam rescripti, ac iuris ordinem attentatum, irritum decernimus, & inane.* Idem habetur in cap. *Venerabili, de officio legati,* vbi habentur hæc verba: *Quorum processus cassauimus, quia contra mandati nostri tenorem, &c.* Et idem habetur in cap. *ultimo, de restitut. spoliatorum.* At Clericus nominando primò Mariam feminam, non seruauit formam mandati primæ instituentis Antonie, mandantis nominari masculum; ergo fecit actum irritum, & nullum. Qui voluerit videre textus, & glossas iuris ciuilibis, & Iuristas idem docentes, videat Suárez tom. de legib. lib. 5. cap. 31. num. 1. & seqq. vbi ait esse commune prouerbiū Iuristarum, quod ex forma non seruata resultat nullitas actus. Ad quod ibidem Suárez adducit hanc rationem: nam sicut in naturalibus, defectus formæ destruit rem: deficiente enim animā in hoc leone, deficit leo: ita etiam in moralibus (quale est mandatum, seu testamentum) deficiente formā mandati corrumpitur factum in contrarium. Quod etiam deducitur ex lege Iulia. §. *Siquis, ff. ad exhibendum,* vbi ponuntur hæc verba: *Defectus forma propriè substantiam rei destruit.*

3 Secundò principaliter idem probo, quia prima nominatio Mariæ facta à Clerico fuit conditionalis, si videlicet Maria nuberet filio Emmanuelis; idem enim important hæc verba : *Cum declaratione, & onere, ut nubat filio Emmanuelis* ; ac dicere : *Cum conditione quod nubat filio Emmanuelis*, ut patet ex communi modo loquendi. At Maria noluit illi filio Emmanuelis nubere, ut colligitur ex informatione, & mihi constitit extra supra positam informationem. At donatio, siue legatum, siue contractus conditionalis sub conditione licita, & iusta factus conditionis, & conditio non ponatur in actu, aut caret robore, & firmitate, quando conditio non est turpis, neque impossibilis, qualis non fuit ista : ergo illa prima nominatio Mariæ sub conditione quod tali nuberet, non secutâ conditione appositâ nubendi, fuit nominatio nulla. Minor argumenti, quod scilicet donatio facta sub conditione, vel contractus conditionalis, non secutâ conditione, sit inualidus, est communissima Doctorum, ut probatione non indigeat. Nam contrahentes sub conditione, non consentiunt in tali contractu nisi secutâ tali conditione : at contractus, deficiente consensu est inualidus, ut patet. Probo nunc maiorem, quod scilicet ista nominatio Mariæ cum onere, & declaratione ut nubat filio Emmanuelis, fuerit conditionalis. Nam natura conditionis appositæ in contractu, est ut obliget contrahentes ; at Clericus obligavit Mariam ad nubendum filio Emmanuelis, siquidem dixit in nominatione Mariæ, *Cum onere ut nubat filio Emmanuelis*. Et talis conditio non fuit impleta. Pro maiori confirmatione illius dicti, quod conditione non secutâ corruat donatio, vel contractus conditionalis, videatur

Syluester verbo *Conditio*, quest. 1. Kabelleo tom. de obligat. iustitiæ, lib. 18. q. 14. num. 1. Sanchez lib. 7. Decalogi, cap. 5. num. 59. Nauar. Miscellanea 58. de oratione post medium: vbi post legem quamdam ad hoc citatam, ait: *Quod conditio efficit, vt possum sub ea censeatur esse de forma substantiali actus*, iuxta Baldum, & Felinum, quos ibi citat, & sequitur.

4 Quod autem Clericus primò nominans Mariam, potuerit ei valdè imponere conditionem quod nuberet Emmanuelis, & proinde talis conditio fuerit inhonesta, & proinde obligans, probatur primo ex praxi; quotidie enim relinquuntur legata, sub conditione, dummodo nubat Fullano. Et ultra praxim, ita in terminis tenet Sanchez lib. 1. de Matrim. disput. 13. num. 7. Ad quod citat l. cum ita legatum sit, vers. Si Titio nupserit. ff. de condit. & demonstrat. Et citat aliam legem Castellæ, & Couar. Tello, Manticam, Ioan. Lupum, Molinam tom. 1. de iust. tractat. 2. disput. 201. & alios, qui omnes dicunt posse testatorem relinquere alicui feminæ legatum cum conditione quod nubat Petro designato, sub pœna amissionis legati, si illi non nubat. Item tenet Iulius Clarus lib. 3. sententiarum, verbo, Testamentum, q. 96. num. 1. dicens posse testatorem priuare hæreditate voluntaria, hæredem cui iniunxit in testamento, vt nubat cum consilio Fullani: & ait esse hanc opinionem communem. Rationem huius dicti assignat: nam testatori licitum est rei suæ adiacere quamcunque conditionem voluerit, dummodo non sit conditio turpis, vel improba: ita vt illâ non impletâ priuetur hæreditate. Et statim post num. 3. addit idem Clarus quod non impletâ conditione retribit hæreditas ad alios cohæredes, vel alios substitutos,

tutos, pro quo citat Bartolum. Hinc manet clarius, fuisse nullam nominationem Mariæ factam à Clerico primo loco: nam illam nominavit sub conditione quod nuberet Fullano: quam conditionem ille non implevit. Et præter hoc nominata est femina contra mandatum primæ instituentis Antoniaæ iubentis nominare masculum.

5 Et quamvis prima instituens Antonia, non concesserit Clerico licentiam ut in sua prima nominatione posset arctare nominatum, ut nuberet tali, vel tali. Respondeo, quod licet hoc non concesserit in indiuiduo, concessit tamen in genere. Nam constat ex testimoniis extra informationem suprapositam, prædictam Antoniam in prima institutione huius maioratus dicere, quod si prædictus Clericus secundus nominator vellet huic maioratui bona sua iungere, & vinculare, posset tunc prædictus Clericus in sua nominatione, facere novam institutionem, vel clausulam pro futuris successoribus maioratus pro suo arbitrio. Et constat ex informatione, quod prædictus Clericus bona sua vinculavit prædicto maioratui, & ideo bene potuit addere prædictam clausulam Mariæ, ut nuberet Fullano, iuxta Iulium Clarum dicentem citato loco, posse testatorem adiacere rei suæ quamcunque licitam conditionem voluerit. Et hic Clericus vinculans bona sua maioratui, adiecit bonis suis conditionem licitam, ut Maria nuberet Fullano. Pro quo videatur Molina *tract. de Maioratus disput. 622. num. 8.* cum ibi citatis.

6 Probatur insuper prædictum maioratum non pertinere ad Mariam primò nominatam à Clerico, nam prædictus Clericus reuocavit hanc primam nominationem

nationem Mariæ, vt patet : idque antequam Maria possessionem illius acquireret, & talem reuocationem poterat iuste facere, imò & debebat facere : ergo Maria non habet ius ad maius. Valet hæc consequentia : nam dispositio, vel actus reuocatus est nullus, vt patet in testamento reuocato, tunc enim manet nullum. Prima pars antecedentis, quod Clericus reuocauit nominationem factam de Maria, patet ex informatione suprâ posita. Secunda pars antecedentis, quod scilicet prædictus Clericus potuerit reuocare priorem nominationem Mariæ, antequam illa possessionem acquireret maius, probatur argumento à simili : quod argumentum antequam adducam, noto, quod argumentum à simili est efficax, & in iure vlitatum, vt habetur in *cap. Corporalia, de transl. Episcop.* vbi Papa argumentatur à simili, dicens. *Propter expressam tamen similitudinem, nemini poterat videri dubium, &c.* vbi glossa verbo, *Similitudinem*, citat alios textus. Quo posito, probatur à simili quod Clericus potuerit reuocare nominationem Mariæ. Nam patronus habens ius præsentandi, postquam præsentauit vnum, potest postea præsentare alterum antequam primus præsentatus confirmetur ab Episcopo : quod Iuristæ vocant, *Variare*, vel *mutare præsentationem*. Ita habetur in *cap. Quod autem, de iure patron.* & *cap. Pastoralis*, eodem titulo : & tenet Syluester verbo *ius patronatus*, quæstione 8. Azor *tomo 2. lib. 6. cap. 21. q. 13.* & quamuis ibi Syluester, & Azor dicant posse patronum *variare*, id est, nominare secundum post primum, sed non recedendo à primo ; hoc intelligetur, quando primò nominatus est idoneus. Nam si primus nominatus est indignus, ipse tenetur recedere à primo, nunquam enim

enim licet præsentare, vel nominare, vel eligere indignum. Et idem colligitur ex Nauarro *consil.* 5. *de iure patronatus*, ubi dicit quod patronus tenetur præsentare digniorem. At in nostro casu Clericus primò nominans Mariam in successione maioratus, nominauit, seu præsentauit personam indignam, seu inhabilem, præsentauit enim feminam contra mandatum primi instituentis, mandantis nominari masculum, qui extabat. Et idem Clericus potuit recedere à prima persona præsentata tanquam ab indigna, seu inhabili. Et hic habet locum dictum commune Iuristarum, quod pactum contra leges, & bonos mores non obligat, & habetur in l. *Pacta quæ*, Cod. *de pactis*: & prædicta nominatio Mariæ fuit contra legem, & voluntatem primæ instituentis, ac proinde potuit, imò debuit corrigi à Clerico per reuocationem primæ nominationis.

7 At argumentum positum in principio pro parte opposita, sumptum ex regula iuris, *Quod semel placuit, amplius displicere non potest*. Respondeo primò in genere, videlicet, non posse aliquem mutare quod semel placuit, quando id quod primò placuit fuit licitum, & non prohibitum. Nam si id quod primò placuit fuit illicitum, & prohibitum, non solum potest quis illud retractare, sed potius tenetur in conscientia ad retractandum, & reuocandum: vt patet etiam in teste, qui per inaduertentiam deposuit falsum in iudicio cum præiudicio tertij: talis enim tenetur errorem suum retractare coram iudice, vt Theologi docent. At in nostro casu Clericus primò nominans Mariam errauit contra mandatum primæ instituentis iubentis nominari masculum: & errauit cum præiudicio Ludouici masculi, cui competebat prima nominatio:

minatio : ergo non ſolum potuit , imò etiam debuit ſibi diſplicere , & retractare errorem , quem fecerat nominando Mariam , quam non poterat nominare. Secundò reſpondetur ad citatam regulam iuris , iuxta gloſſam ad citatam regulam iuris in 6. ubi gloſſa adducit multa exempla , ex quibus conſtat poſſe alicui diſplicere id quod antea ſibi placuerat : quæ exempla videri poſſunt in gloſſa citata , & hîc applicari.

8 Ad confirmationem prædicti argumenti reſpondetur prædictam Mariam non acquiſiuiſſe ius ad maioratum per illam nominationem nullam , ſiquidem facta eſt contra ius , & contra voluntatem primæ inſtituentis , vt manet probatum in præcedentibus. Pro quo videatur Ordinatio iſtius regni *lib. 4. tit. 37. principio* , & §. 1. & 2. ubi agitur quomodo poſſit reuocari prima nominatio , quod inferuit ad hunc caſum : ſed debet prius attendi forma ſcripturæ primæ inſtituentis maioratum : & facit adhuc lex iſtius regni *lib. 4. tit. 100. §. 1.* ubi iubetur quod in ſucceſſione maioratus filius maſculus ſuccedet prius , & præferri debet ſorori ſeniori. Vnde videbis quantum ſe conformauerit cum lege regni Antonia prima inſtituens , mandando vt in maioratu prius nominaretur maſculus , & non femina. Et probo adhuc quod dicta Maria non acquiſiuerit ius ad rem per illam nominationem nullam , exemplo electionis adducto in argumento. Nam ſi quis eligatur in Prælatum per electionem , & conſtiterit quod electio fuit nulla , non acquirit electus ius aliquod ad talem prælaturam , vt conſtat. Quia ſicut *ex nihilo nihil fit* , vt omnes dicunt : ita *ex nullo nullum fit*. Eodem modo ex nominatione Mariæ , quæ fuit nulla , nihil

nihil fit, nec proinde ius aliquod ad rem fuit acquisitum. Vide adhuc, si placet, Sanchez *lib. 3. de Matrimon. disput. 2. num. 5.*

CASVS XVI.

*De quodam Religioso culpato in quadam
visitatione.*

Quidam Prælati regularis in visitatione cuiusdam conuentus inuenit quemdam Religiosum valdè diffamatum, & denunciatum, de quodam crimine graui, quod crimen naturâ suâ est difficilis probationis. Vocauit Prælati Religiosum, & exhibitis illi articulis culparum: ille primò dicit decem Religiosos ex iis qui testes fuerunt in visitatione esse suos inimicos capitales, & proinde illorum testimonium in sua causa non valere, & proinde se illis ponere exceptionem. Secundò dixit ante prædictam visitationem processisse contra se conspirationem, quia illi prædicti decem cum aliis dixissent, se tempore visitationis denunciaturos esse Prælato de culpis illius. In processu iuridico aliqui testes non recusati à reo ferè dixerunt id quod sufficiebat ad illum condemnandum in parte, sed non pœna totali. Si autem valerent dicta testium recusatorum, iuncta cum aliis, superabundabat probatio ad totalem pœnam inferendam, & alia paruioris momenti, quæ ex processu considerabuntur.

Quæritur primò, quid dicendum sit circa allegatam causam inimicitiae capitalis inter Religiosos allegatæ?

Secundò,

Secundò, utrùm in hoc casu interuenerit coniuratio, & conspiratio, quæ allegatur à reo?

Tertiò. An dictum testium recusatorum, & suspectorum iungi possit cum testimoniis testium non suspectorum ad probationem coadiuuandam, & complendam?

Responsio ad primum.

I Quid attinet ad primum de inimicitia capitali allegata à reo, antequam referam friuolas causas à reo pro illa allegatas, duo præmitto. Primum est, quàm detestanda sit hæc locutio, seu allegatio inimicitiae capitalis inter Religiosos, qui aliquando prætextu illius sæpius se defendunt. Notat hoc Rodriguez dicens, & bene, *tom. 2. qq. 9. 15. art. 3.* quod inter Religiosos non sit admittenda hæc locutio, vel exceptio inimicitiae capitalis in testimoniis ferendis. Nam Religiosi quotidie sacramenta recipiunt, celebrando Missam, & sacramentum confessionis passim recipiunt, & cætera sancta exercitia faciunt, cum quibus stare non potest, ut plurimum, odium capitale: sicut potest facilius in personis sæcularibus reperiri ob defectum frequentiae prædictorum sanctorum exercitiorum. Et proinde Prælati regulares debent esse cauti in recipienda exceptione inimicitiae capitalis inter Religiosos.

2 Secundò præmitto causas, & signa, quod inter aliquos sit inimicitia capitalis, assignari à Rodriguez citato loco, & à Mascardo *tom. 2. de probat. conclus. 878.* quæ præcipuè sunt istæ. Primò, si præcesserunt minæ de occidendo. Secundò, si accusauit aliquem de crimine graui. Et nota, quod dicunt, *si accusauit.*

Nam

Nam si solum denunciauit coram Prælato in Inquisitione, vel visitatione generali, vel particulari, non erit inimicitia capitalis, quia denunciatio non est accusatio. Tertiò, si occidit, vel percussit grauius personam coniunctam ipsi recusanti. Quartò, si ego illum detinui in carcere cum essem Prælatus. Quod explicat Mascardus *cit. conclusione num. 22.* intelligendum esse quando Prælatus iniuste in carcere detinuit. Nam si iuste detinuit, non fecit illi iniuriam, nec proinde dicendus est inimicus. Quintò, si dixit contra me verba iniuriosa. Sextò, si illum accusauit quod esset Iudæus. Septimò, si conuersatur cum inimicis meis capitalibus. Hæc sunt præcipua signa inimicitiae capitalis; ultra quæ dari poterunt aliquando alia iuxta circumstantias temporum, & personarum. Inimicitiae non capitalis signa dantur alia quæ recenset Mascardus *cit. conclusione à num. 26.* qualia sunt; si mecum antea loquebatur, & modò non alloquitur. Si illum expuli à domo: si de me seminat malam famam: si illum publicè reprehendi, & similia.

3 Tertiò noto ex Mascardo, & Rodriguez, quod est differentia inter inimicum capitalem, & non capitalem. Nam inimicus capitalis omnino repellitur à testimonio ferendo, eiusque dictum nullius est valoris. Inimicus verò non capitalis non repellitur omnino, sed recipi potest in testem tanquam testis diminutus. Sic tenet Mascard. *tom. 2. de probat. concl. 1049. num. 3.* & commentator Iulij Clari in sua praxi *q. 24. num. 32. & 33.* qui citant alios.

4 Inter causas ergo inimicitiae capitalis assignatas ab isto reo, vna fuit, quod cum ille esset Prælatus aliquos illorum testium in communitate reprehendit

ex officio : & vnum ex illis detinuit in custodia per aliquos dies. Sed imprimis hæ non sunt causæ inimicitiae capitalis , vt patet ex signis suprà allatis. Imò in Prælato , qui ex officio tenetur reprehendere , & carcerare , nedum sunt signa inimicitiae leuis. Nemo enim iustè queri potest de Prælato exercente iustè actiones sui officij : & constitit quod illum subditum quem detinuit in custodia , iustè detinuit. Ad hoc autem vt ex detentione in custodia resularet inimicitia capitalis , iuxta Mascardum suprà citatum , necessarium erat , vt iniustè detineret. Idem dic si subditum puniuit iustè ob culpas ; tunc enim nec datur causa leuis inimicitiae ob causam proximè dictam. Aliam causam assignauit , dicens quod illi decem non conuersabantur cum ipso. De hac causa iam suprà dixi non esse signum inimicitiae capitalis ; imò aliquando neque erit signum inimicitiae leuis : nisi quando (sicut ait Mascardus) antea intimè , & frequenter conuersabantur , & modo non se alloquuntur. Denique alij testes oblatis ad probandam inimicitiam dixerunt sibi videri quod essent inimici adinuicem ; sed nullam causam inimicitiae assignarunt : & proinde tales testes nihil probant , vt enim optimè docet Mascardus *tom. 2. de probat. conclus. 900. num. 10.* quando aliquis testis dicit in iudicio Petrum esse inimicum Francisci , & non assignat causam inimicitiae , iste talis dicitur deponere vt pecus , non vt homo , maximè in criminalibus , & citat ad hoc quatuor Doctores.

5 Quod attinet ad secundum de coniuratione , seu conspiratione præcedente , dico quod licet aliqui Religiosi ante visitationem dixerint adinuicem : Denunciemus hoc delictum Prælato tempore visitationis : talis

ralis cohortatio, seu exhortatio non est conspiratio, neque coniuratio. Probatur hoc primò ex quodam statuto generali istius Religionis, quod in materia visitationis, sic disponit: *Declaramus quod non est coniuratio, quando subditi se conuocant, & inter se conueniunt ut dicant Prelato aliquam culpam.* Quod statutum, siue declaratio est conformis definitioni, qua definitur coniuratio: definitur enim conspiratio à Mandozio in *commento Repertoriij Inquisitorum*, verbo *Conspiratores*, in hunc modum: Conspiratio est, quando vnus, vel plures improbè coeunt in alienam litem, vel perniciem. Notandum est illud verbum, *improbè*, quod significat debere illam adunationem, & cohortationem esse iniustam & peccaminosam ad hoc, ut dicatur conspiratio. Nam si id fiat ex zelo virtutis, & tollendorum abusuus causâ, maximè quando peccata sunt publica, id non dicetur conspiratio, sed virtus zeli. Quæ definitio conspiracyonis traditur, vel colligitur ex duabus legibus iuris ciuilibi citatis à Petro Vendrameno. At illi decem Religiosi quos ut suspectos recusauit, non denunciarunt illud delictum improbè: non enim dixerunt falsum testimonium, cum reuera prædictus Religiosus tale delictum commiserit, ac de illo esset valdè diffamatus: ac proinde credendum est illos non improbè, sed iustè tale crimen ad Prælatum detulisse, & proinde ibi non interuenit coniuratio, seu conspiratio. Et præterea testes oblatis à reo ad probandam conspiracyonem nihil validè dixerunt ex quo prædicta conspiratio posset sufficienter probari.

6^o Quod attinet ad tertium, dico, quod cum illi decem testes recusati, non fuerint habiti pro inimicis capitalibus, sed ad summum possent esse inimici

leues, vt suppono probatum ex præcedentibus, dicta testium recusatorum iungenda sunt cum dictis testium non recusatorum, & illa adiuuabunt ad faciendam plenam probationem, maximè in hoc delicto, quod erat difficilis probationis, & solitum fieri in occulto. Ita expressè tenet Humbertus in *practica Inquisitorum*, verbo *Suspicio*. §. *Suspicionum*. Et Mascardus *tom. 3. de probat. conclus. 1360. num. 1. & conclus. 1387. num. 4. & 6.* cum multis citatis ab utroque, & addunt quod pluralitas suspicionum sufficit in illis, quæ naturâ suâ non recipiunt perfectam probationem: & quod probationes aliàs imperfectæ iunguntur ad faciendam plenam probationem. Et vt iudices alios in hac materia iuuem, circa crimina difficilis probationis, & quæ fiunt in occulto: Noto primò, quod Ordinationes Portugalliæ *lib. 5. tit. 13.* dicunt quod delictum mollitiei, id est tactuum impudicorum inter masculos, probatur per testes singulares, & Mascardus *tom. 3. de probat. conclus. 1314. num. 2.* dicit crimen sodomix eo quod sit contra Rempublicam, & sit occultum, & atrocissimum, probari sufficienter per testes inhabiles, & per præsumptiones vehementes: & citat ad hoc sex graues Doctores Iuristas.

CASVS XVII.

*De quadam donatione facta intuitu
matrimonij.*

Quidam vir frequenter ingrediebatur domum cuiusdam feminæ non nuptæ suæ consanguineæ,
tum

tum respectu consanguinitatis, tum quia intendebat cum illa contrahere matrimonium: eidemque promisit se impetraturum dispensationem ad dictum matrimonium. Hac de causa frequentabat domum feminae ibi manducans, & bibens, & dormiens. Eidemque feminae donauit aliqua dona: & alia ibidem deposuit, quae inseruitura erant pro tempore matrimonij: & hoc fuit omnibus notorium. Post hæc omnia prædictus vir transmigravit in alium locum remotum, ibique cum altera femina matrimonium contraxit in facie Ecclesiae. Quo matrimonio contracto petiit à prima femina sua consanguinea res illas, quas illi donauerat.

Quæritur, an prædicta mulier teneatur huic viro res illas restituere, quas sibi donauerat intuitu matrimonij, postquam iam diffamata esset cum eo, & hodie manet ferè cum aliqua infamia, eo quod illi non nubat?

Responsum.

1 **D**ico primò. Quod si, quando hic vir dona hæc donauit mulieri, eidem dixit se illa eidem donare sub conditione, si postea matrimonium contraheretur: tunc illa tenetur res prædictas illi restituere; fuit enim talis donatio conditionalis. Donatio verò seu contractus conditionalis valet, si conditio non ponatur in actu. Est communis opinio Doctorum, Syluest. verbo *Conditio*, q. 1. Rabello tom. de oblig. institut. lib. 18. q. 14. num. 1. Sanch. lib. 7. de Matrim. cap. 5. num. 59. Nauar. *Miscellanea* 58. de orat. post medium, & alij ab his citati: & idem dico de illis quæ donauit, dicens: *hæc inseruiunt pro tempore quo*

vixerimus in matrimonio. Talia enim clarè videntur donata sub conditione matrimonij futuri.

2 *Secundò dico* : Si quando vir iste res has donauit mulieri , nullam imposuit , vel expressit conditionem , neque dixit : Serua hæc pro tempore matrimonij , sed illas donauit absolutè , easque illa retinuit per spatium longi temporis : in tali casu credo hanc mulierem non teneri res sic donatas restituere tali viro sic donanti. Probo , quia ista donatio fuit absoluta , non conditionalis ; fuit liberalis , & cum traditione rei. At donatio facta cum his omnibus circumstantiis statim sortitur effectum , ita vt non possit amplius reuocari. Sic decernit lex Portugalliæ *lib. 4. Ordin. tit. 63. in principio* , dicens , quod donationes absolutæ , simplices , & sine conditione factæ , statim sunt firmæ , & fixæ , ita vt non possint amplius reuocari à donatore. Excepto si donatarius fuerit ingratus donanti , in quatuor causis ibi numeratis ; vel si donatarius aliquid promisit donanti , quod postea non impleuit : & suppono nullum ex prædictis in hoc casu interuenisse ex parte donatariæ. Secundò probo , quia res donata vbi primum donatur absque conditione , & acceptatur , statim transit in dominium recipientis , vt latè probat Rabel. cum aliis quos citat *tom. 1. de obligat. iust. maximè lib. 18. q. 11. num. 4.* Ergo vir iste non potest reuocare res has donatas , quæ transierunt in dominium feminæ , quia illarum dominium iam transiuit in donatariam acceptantem , & possidentem. Tertiò facit optimè quod tradit Sanch. *lib. 6. de matrim. disput. 18. conclus. 3.* & Rabel. *2. p. lib. 6. q. 5. num. 3.* cum aliis , quos citant , qui dicunt , quod si sponsus ante matrimonium , misit aliqua donaria sponsæ intuitu matrimonij futuri , sponsa

sponsa statim acquirit dominium rerum illarum donatarum. Si verò matrimonium non sequatur culpa sponsi, ipse illa donata amittit, & fiunt sponsæ. At in hoc casu matrimonium non est secutum culpa istius viri, qui contra promissionem isti mulieri factam, alteri nupsit. Probatur quartò, quia donatio liberalis, & absoluta ex tribus circumstantiis præcipuè agnoscitur, iuxta Mascardum *tom. 1. de probat. conclus. 554. num. 38. 40. & 54.* Primò ob consanguinitatem. Secundò propter amicitiam. Tertiò ob longum tempus quo res donata possessa fuit. Hæ verò omnes tres circumstantiæ in hoc casu concurrunt. Erat enim hæc mulier consanguinea, amica: & per longum tempus has res donatas possedit, ut colligitur ex informatione posita in principio.

3 Dices: vir iste res has donavit intuitu matrimonij futuri, ut constat; aliàs non esset daturus: ergo dedit hæc dona sub conditione, si matrimonium sequeretur; & proinde illo non secuto potest res donatas reuocare. Respondeo, non valere hanc consequentiam: Donavit intuitu matrimonij: ergo donavit sub conditione matrimonij. Nam conditio in contractu habet propria verba, per quæ apponitur, qualia sunt: *Dummodo faciat: Si faciat: Sub conditione,* & similia. Intuitus autem nihil est horum. Imò etiam si talis intuitus esset verbo significatus, ut si diceret. Hæc tibi do, quia debeo nubere tibi: etiam tunc non esset conditio apposita: sed ut plurimum esset modus, vel causa impulsiva tantum, quæ duo non faciunt donationem, vel contractum conditionalem, ut Doctores latè disserunt in materia *de condition. appositis.* Et quamvis ille intuitus matrimonij quo motus est iste ad donandum, fuerit conditio ap-

posita (quod non admitto) adhuc res donatas non posset reuocare, quia talis conditio non est sortita effectum culpā ipsius viri alteri nubentis, & promissum non implentis : & tunc recurrit doctrina Sanchez, & Rabelli *num. precedenti*, dicentium, quod si culpā viri matrimonium non sequatur, vir amittit illa, quæ antea donauit.

4 *Tertiò dico*, quod si inter hunc virum, & mulierem interuenerit copula carnalis, sub spe, vel promissione matrimonij, in tali casu poterit mulier securā conscientiam retinere res illas donatas. Probatum hoc ex illis quæ tradit Rabellus *cit. tom. 8. cit. q. 5. num. 3.* & Sanchez *cit. disput. 18. num. 3.* qui ambo dicunt quod si sponsus post sponsalia contracta mittat ad sponsam rem aliquam pretiosam, quæ vocatur sponsalitia largitas, & post dicta sponsalia, & donationem, sponsus dedit osculum sponsæ : & tandem post hæc omnia matrimonium non est secutum casu aliquo absque culpa vtriusque ; in tali casu sponsa illa lucratur dimidium illius sponsalitiae largitatis donatæ, propter detrimentum pœnæ pudoris, quo afficitur ex osculo, & quia fortè inde maiori dote indiget si alteri velit nubere. Quod si hi Doctores hoc dicunt de femina tantum passā osculum intuitu matrimonij : quid dicerent de hac femina passā deflorationem intuitu matrimonij ? & maximè quando matrimonium non est secutum culpā ipsius deflorantis ? Potest hoc adhuc confirmari exemplo omnino simili, quod tale est : Ordinationes huius Regni *lib. 4. tit. 2. §. 3.* decernunt, quod post venditionem factam, & completam de consensu vtriusque partis, neutra pars poterit resilire à contractu : si verò aliquis eorum voluerit resilire, & iam aliquid donauerat

rat in partem pretij soluendi, amittat id quod donauerat, in pœnam suæ inconstantia. Quod optimè fauet casui præsentì, ad probandum quod iste vir amitteret quod donauit feminae sub quasi contractu matrimonij, in pœnam suæ inconstantia, maximè si inde mulier aliquod detrimentum in sua fama passa est, iuxta proximè dicta ex Sanch. & Rab.

5 Circa promissionem verò quam fecisse dicitur huic mulieri, quod scilicet ipse esset impetraturus dispensationem Papæ circa impedimentum consanguinitatis, possunt oriri aliqua dubia necessariò hanc materiam concernentia: quæ breuiter resoluam, Primum est: an si vir iste tali mulieri consanguineæ promiserit matrimonium absolute, dicens: Ducam te in vxorem: non adiiciens, si Papa dispensauerit, talis promissio fuerit sufficiens ad sponsalia contrahenda? Et videtur quod non fuerit sufficiens: nam fuit promissio de re illicita, cum non posset contrahere consanguinea sine dispensatione Papæ, & proinde promissio fuit facta contra legem Ecclesiæ. Sanchez *lib. 5. de matrim. disput... quest. 3. num. 26.* dicit talem promissionem non obligare, eo quod sit promissio de re illicita. Adducit multa ad istius conclusionis probationem, videlicet ex iure ciuili, & Doctoribus, & rationibus, quæ ibi possunt videri. Et certè est opinio securior, & habet pro se plures Doctores, quàm opposita. Nihilominus ipse Sanchez *ibidem num. 25.* refert oppositam opinionem dicentem talem promissionem obligare, & sufficere ad sponsalia, si femina pariter repromittat: & ait Sanchez esse opinionem satis probabilem. Et citat pro illa Molinam *de primog.* Gutier. & Sotum. Fundamentum huius opinionis apud me est validum. Videli-

cer, quia quando testator in maioratu, vel legato apponit conditionem, ut successor ducat consanguineam, omnes dicunt valere talem conditionem, licet testator non dicat, quod ducat consanguineam cum dispensatione Papæ. Adde quod promittens matrimonium consanguineæ necessariò supponit præmittendam esse dispensationem Papæ. Tertiò, quia verba quantumcunque generalia, restringenda sunt ut intelligantur de extremis habilibus, ut dicitur in l. *ut gradatim*, §. 1. ff. de muner. & honor. Omnes tamen fatentur, quod si consanguineus dicat feminæ consanguineæ: Ducam te in uxorem si Papa dispensauerit, tenet promissio, & facit sponsalia, de quo Sanchez citata disput. à num. 12. & seqq.

6 Secundum dubium est, an si vir promisit feminæ matrimonium, & illa non repromisit, sed tacuit; non dissensit, sed per aliqua signa ostendit se acceptare, sufficiat hoc ad sponsalia contrahenda? Sanchez lib. 1. de matrim. disput. 5. num. 5. ait non sufficere illam acceptationem feminæ si non repromiserit viro. Probat, quia in dubio obligatio non est inducenda, sed acceptans illam promissionem potest acceptare in quantum est in sui fauorem, nempe ut solum promittens ipsi obligetur. Ergo si aliud obligationis mutuae signum non intersit, minimè dicendum est ex illa acceptatione repromittere, & obligari. Citat pro hac sententia Sotum, Lopez, & Petr. Ledesm. Oppositam sententiam tenent alij ibi citati à Sanchez num. 4. quam Sanchez ait esse probabilem, quam tenent Paludanus, Veracruz, Henriq. & fauent alij ibi citati à Sanchez: & probatur, quia acceptans, virtualiter videtur repromittere; censetur enim velle utrinque parem obligationem contrahere prout in
matrimo

matrimonio contingit. Aliam probationem ad hoc ibi afferunt Doctores huius sententiæ. Sed securior est prima opinio dicens necessarium esse ad sponsalia, ut non solum femina acceptet, sed etiam ut re-promittat.

7 Tertium dubium esse potest: An si iste vir de quo agitur, non dixit huic feminae, promitto quod te ducam in uxorem, quæ sunt propria verba sponsaliorum: sed solum dixit; promitto quod impetrabo dispensationem Papæ ad contrahendum tecum matrimonium, an, inquam, hæc sola promissio fuerit promissio matrimonij, & sufficiens ad sponsalia ex parte ipsius viri. Probo, quia verba debent intelligi secundum subiectam materiam, & naturam contractus, ut dicitur in l. *damni infecti*, ff. de *damno infecto*. At iuxta materiam, & contractum matrimonij, qui vult impetrare dispensationem ad contrahendum cum consanguinea, clarissimè intendit, & promittit contrahere cum illa. Secundò, quia verba accipienda sunt secundum communem usum loquendi, communis præferendus est proprietati verborum, ut probat glossa in cap. *Nonnulli*, verbo *ultra*, de *Rescript.* & est communis Doctorum. At communis usus loquendi est, quod cum quis promittit se impetraturum dispensationem pro contrahendo matrimonio, intendat verè prædictum matrimonium contrahere, & ad illud se obligare; & quod non est factururus expensas frustra in impetranda dicta dispensatione.

CASVS XVIII.

De quodam legato relicto in testamento nullo.

Quidam vir coniugatus carens filiis, domi habebat neptem filiam ex fratre, & pauperem, quæ illi seruiërat per annos septem. Huic dixerat sæpe in vita quod illi debebat relinquere per mortem omnia bona sua propter obsequia sibi præstita, & ad dotem pro illa maritanda. Incidit hic in morbum, & vicinus morti, condidit testamentum, in quo post aliqua legata imperata, dixit quod cætera omnia bona sua legabat prædictæ nepti. Et vocato suo testamentario, dixit illi coram testibus illa quæ testamentum continebat: & antequam veniret Notarius ad approbandum testamentum, mortuus est testamento non approbatò.

Quæritur primò, an testamentarius possit soluere illa legata quæ iussit, maximè pro expensis funeris?

Secundò, an possit donare aliquid prædictæ nepti, cum sibi constet de clara voluntate testatoris fuisse, ut nepti traderentur?

Responsio ad primum.

AD primum quæsitum dicendum est primò, quod legata relicta ad pompam funeralem defuncti sunt adimplenda, si non erant nimia, & insolita. Nam de iure gentium est, quod unusquisque sepeliatur

peliatum cum pompa decente ad suum statum, & idem dicendum est de Missis imperatis, & de cæteris quæ fuerint legata pia, iuxta mox dicenda. Quod de pompa funerali adeò verum est, vt Doctores communiter dicant, quod si defunctus moriens reliquit multa debita, nec reliquit bona, ex quibus solueretur creditoribus, non possunt creditores impedire pompam funeris ordinariam, vt sibi debita soluantur. Quoad Missas, relictas eleemosynas, & similia pia opera statim dico præsuppositâ primò hac distinctione. Ita Zerola in 1. parte sua praxis Episcopalis, verbo *Funus corporis defuncti*, §. 2. an *expensæ*.

2 Legata relictæ in aliquo testamento alia sunt pia, alia non pia. Illa dicuntur pia quæ relinquuntur pro aliqua causa pia, seu opere pio. Et quoniam hæc definitio non clarè explicat omnia quæ dici possunt legata pia, Doctores in hoc explicando vtuntur potius exemplis in indiuiduo. Vnde communiter dicunt legata pia esse, verbi gratia, quod relinquitur in honorem Dei, vel Sanctorum. Secundò, quod relinquitur pro animæ salute: vt quod relinquitur pro personis miseris, viduis, pupillis, peregrinis, hospitalibus, & similibus. Et in hoc numero possunt primò etiam intelligi Missæ, & officia defunctorum, quæ defunctus mandauit pro se dici, hæc enim clarè relictæ sunt pro anima. Est etiam pium legatum id quod relinquitur pro maritandis puellis, vel pro eisdem Religionem ingredi volentibus. Tertiò, est etiam legatum pium quod relinquitur pro malè ablatiis, & pro captiuis redimendis, vel mortuis sepeliendis. Quartò, id quod relinquitur alicui Religioni, vel confraternitati erectæ auctoritate Episcopi. Imò addit Mascardus tom. 3. probat.

probat. conclusione 1172. num. 3. quod legatum relictum vni tantum Religioso, censetur legatum pium, pro quo citat Baldum. Quintò, id quod relinquitur consanguineo pauperi, dummodo ibi principalius moueat amor Dei quàm affectio consanguinitatis. Hæc omnia citant Doctores communiter, maximè Bonacina *tom. 2. disput. 3. de contractibus q. 17. §. 2. à num. 1. & seqq.* Hinc iam licebit colligere, quæ sint legata non pia, seu prophana; sunt enim illa quæ relinquuntur ad causas non pias, sed prophanas, seu causas sæculares, quæ faciliè dignoscentur ex opposito causarum piarum, quæ suprà sunt recensitæ.

3 Hoc posito, communis est Doctorum sententia quod legata pia relictæ in testamento nullo, debentur in foro conscientiæ legatariis. Ita Bonacina *tom. 2. disput. 3. de contract. q. 1. punct. 3. à num. 14.* & maximè *ibidem num. 17.* ait teneri hæredem in iis, quæ pertinent ad pias causas, implere voluntatem testatoris quam ipse testator expressit in schedula scripta, modò constet talem fuisse voluntatem deliberatam testatoris. In illis enim quæ pertinent ad pias causas, non est necessaria solemnitas iuris, sed in foro conscientiæ sufficit nosse voluntatem testatoris, vt multis probat Menochius *lib. 3. consil. 224.* & Couar. *in cap. Cum esses, de testament. num. 12. & cap. Relatum num. 1.* Sâ *in Aphor. verbo Testamentum num. 4. & verbo Legatum num. 51.* & Zerola *2. p. praxis verbo, Legatum, §. 3.* dicens quod legata pia debentur non obstante aliqua caducitate, vel defectu. Pro quo citat Capellam Tolosanam, & Couar. Idem tenet Sylu. *verbo Legatum 4. q. 10. post medium*, vbi citat Bartolum. Idem tenet Panorm. *in cap. quia plerique, de immunit. Eccles.* & tenent communiter plerique alij, maximè

ximè Comitulus in suis *Respons. moralibus lib. 7. q. 6.* ubi refert casum sibi propositum, qui talis fuit. Quidam vir nobilis, habebat ancillam: hic moriens sine testamento dixit in hora mortis habens plenum, & integrum iudicium, & coram testibus quod relinquebat prædictæ ancillæ ducentos ducatos: & ait Comitulus se ad prædictum casum respondisse, quod hæredes defuncti tenebantur in conscientia soluere dictæ ancillæ prædictam pecuniam.

4 Colligitur iam hinc responsio ad primum quæsitum, an scilicet testamentarius iste possit, ac debeat implere illa legata quæ testator reliquit scripta in illo testamento nullo. Et dicendum quod legata pia implere tenetur, iuxta dicta in præcedentibus, qualia sunt Missæ, & officia, sunt enim res relictæ pro anima. Item eleemosynæ præceptæ debent impleri, & cætera quæ fuerint opera pia, iuxta regulam supra assignatam. Cætera verò legata, quæ non fuerint pia, non tenetur, nec potest implere, quia citati Doctores solum loquuntur de legato pio, non verò de prophano.

5 Colligitur secundò responsio ad secundum principale quæsitum, an scilicet testamentarius possit dictæ nepti testatoris tradere id quod illi à testatore in illo testamento relictum fuit? & responderetur absque dubio posse, imò & debere id facere. Probatur clarè ex supradictis, nam hoc legatum fuit pium, vt constat: tum quia relictum est feminæ pauperi; tum quia relictum est pro illa maritanda. Tum quia si Comitulus supracitatus *num. 3.* respondit debere ancillæ ducentos ducatos legatos ab Hero, videlicet propter obsequia; multò magis legatum factum huic nepti testatoris illi debebitur, cum sit pauper,

per, consanguinea, & seruierit sicut ancilla: & hoc abundè probatum manet ex illis quæ dixi suprà *num. 3.* cum Doctoribus dicentibus legata pia relictà in testamento nullo, deberi legatario. Et hoc in particulari docet Bonacina citatus suprà *num. 3.* in principio: loquens enim ibidem *num. 21.* de nostro casu in terminis, videlicet quid faciendum sit quando testator incepit condere testamentum, in quo instituebat hæredem causam piam, vel aliquid relinquebat ad causam piam, sed antequam perficeretur testamentum mortuus est (qui est casus noster in terminis) responderet, in foro conscientiæ tradendum esse legatum causæ piæ: nam voluntas perfecta defuncti seruanda est, præsertim in illis quæ pertinent ad pias causas, vt ait Bartolus *in l. in testamentis, ff. de fideicommissis*: & citat ibi Bonacina, Molinam, Couar. Vasquez, Iulium Clarum, Decium, & alios.

6 Semper hætenus locutus sum de legatis piis, dicens, quod hæc relictà in testamento nullo debentur in conscientia. Quæris an idem dicendum sit de legato non pio, sed prophano, an hoc relictum in testamento nullo, debeatur etiam in conscientia? Bonacina proximè citato loco respondet negatiuè. Assignat hanc præcipuè rationem: quia hæc legata prophana subsunt dispositioni iuris ciuilis, cum pertineant ad causas prophanas; ius autem ciuile irritat contractus celebratos absque solemnitate. Quæ quidem ratio, & opinio probabilis est, & securior. At Couarr. ibi citatus à Bonacina, & Lessius *lib. 2. cap. 19. dubio 2. num. 9.* & Sâ *in Aphorism. verbo Legatum num. 4.* & alij tres Doctores ibi citati, dicunt etiam legatum prophanum relictum in testamento nullo deberi in conscientia. Potest hoc aliquo modo probari

probari ex eo quod dixit Bart. cit. in *num. 5.* præcedenti, videlicet, quod voluntas testatoris perfectè seruanda est. At licet testamentum fuerit nullum, constat quod voluntas perfectæ testatoris fuit relinquere hoc legatum prophanum legatario. Ego censeo securius esse tenere cum Bonacina, ac dicere, legata prohana in testamento nullo, non deberi in conscientia. Si verò quæras causam cur legata pia debeantur, non verò legata prophana? Causa assignatur à Bonacina citato loco *n. 19.* Nam legata pia nullo iure irritantur: non enim irritantur iure canonico, cum non possit assignari ubi irritentur. Neque irritantur iure ciuili, cum ius ciuile non habeat potestatem circa causas pias. Tum quia *cap. relatum, de testam.* dicitur, relictæ ad pias causas valida esse quamuis non seruetur ius ciuile. At ius ciuile annullat testamentum nullum, & proinde prophana in eo contenta. Et potest ius ciuile pro bono communi annullare donationes aliquas prophanas factas à secularibus, sicut annullat donationem factam inter coniuges, & donationem factam omnium bonorum, & donationem rei notabilis factam sine insinuatione, & sic de cæteris.

7 Ad maiorem claritatem istius materiæ propono hanc quæstionem. An Petrus cui relictum est legatum in testamento nullo, & tale legatum sibi non traditur, vel denegatur, possit illud clam apprehendere tuta conscientia: vel si illud iam habebat, possit in conscientia retinere, etiamsi feratur excommunicatio contra retinentes? Ad hoc, saluo meliori iudicio, cum distinctione dico. Quod si legatum fuit pium, bene potest legatarius illud quantum sine scandalo possit in occulto apprehendere, vel retinere si iam habet, etiam si feratur excommunicatio. Ratio est, quia tale legatum sibi

debetur ex iure canonico per capitulum relatum primum *de testam.* ubi dicitur quod relicta ad causas pias valida sint non obstante iure civili, dummodo adsint duo vel tres testes. Imò Iulius Clarus *lib. 3. sententiarum §. Testamentum quæst. 90. num. 2. & 3.* dicit quod relicta in testamento nullo debentur naturaliter, quod ex testamento minus solemniter oritur naturalis obligatio. Pro quo citat Corne. Albertum, Socinum, Alciatum, & vnam glossam iuris civilis, & alios. Si ergo illud legatum debetur Petro naturaliter, imò & debetur illi in foro conscientiae, iuxta Doctores citatos *suprà num. 3.* Clarum est quod poterit tale legatum clam capere, vel retinere, dummodo non adsit scandalum. Quando verò Bonacina *disput. 3. de contract. quæst. 17. punct. 8. §. 4. num. 19. & eadem quæst. 17. punct. 4. num. 15.* dicit non posse legatarium propria auctoritate capere legatum sibi relictum, videtur loqui si id faciat in publico, & scandalo. Nihil enim cum scandalo facere licet: secus si id faciat in occulto, & sine scandalo, cum capiat quod sibi debetur in foro conscientiae, iuxta prædicta.

8 Secundò respondeo ad prædictam proximam quæstionem, quod si hoc legatum relictum Petro sit legatum prophanum, de quo variant Doctores, an debeatur in conscientia, iuxta prædicta *num. 6.* Tunc, qui secutus fuerit opinionem Lessij, & aliorum dicentium talia legata prophana etiam esse valida, & deberi in conscientia, dicet pariter posse Petrum clam, & sine scandalo prædictum legatum capere, & retinere, iuxta rationem paulò *suprà* assignatam. At iuxta Bonacinam citatum *eodem num. 6.* dicentem legatum prophanum relictum in testamento nullo, non deberi in conscientia, non poterit Petrus tale legatum

legatum etiam apprehendere, vel retinere, etiam vitato scandalo.

CASVS XIX.

De emptione cuiusdam officij secularis, qui dicitur Notarius publicus.

Quidam dominus sæcularis habens in sua iurisdictione villas, oppida, & castella, dedit licentiam Petro Notario publico, ut posset vendere Ioanni suum officium Notarij. Ioannes emit prædictum officium pretio mille ducatorum: & de licentia scriptæ prædicti domini sæcularis, nominavit Catharinam suam filiam, & hæredem ut post mortem ipsius Ioannis esset proprietaria, & domina prædicti officij. Mortuo patre Catharinæ, possedit illa officium per aliquod tempus, inseruiente interim in eodem officio quodam famulo, seu vasallo prædicti domini. Filius successor prædicti domini præcepit ut ille famulus seruiens in officio solueret Catharinæ singulis annis certam pecuniam assignatam. Elapso deinde aliquo tempore filius successor eiusdem domini præcepto in scriptis mandavit ut eadem Catharina nuberet prædicto famulo domini seruienti in officio, sub declaratione, quod si illi non nuberet, amitteret illa dominium, & proprietatem officij. Et declaratur, quod prædictus famulus seruiens officio est pauper.

Quæritur an possit prædictus dominus filius prioris domini imponere Catharinæ hanc nouam obligationem nubendi tali viro, sub pœna amissionis officij, si non nubat?

1 Respondeo, non posse prædictum dominum filium prioris domini obligare Catharinam ad nubendum tali viro, neque illi auferre possessionem officij si non nupserit.

Ante probationem huius conclusionis, Præmitto primò, quod officia publica sæcularia possunt vendi, maximè illa quæ nõ habent annexam iurisdictionem, quale est hoc officium Notarij, de quo agitur. Sic tenet communis opinio Theologorum, teste Azorio *tom. 3. lib. 8. cap. 7.* vbi citat multos. Et tenet Bonacina *tomo 2. disput. 3. de contractibus disputat. 2. punct. 2. num. 10.* & hoc patet ex praxi istius Regni, in quo passim similia officia venduntur. Neque obstat lex istius Regni *lib. 2. Ordin. tit. 46.* prohibens huiusmodi officia vendi. Nam prædicta lex intelligitur de officiis pertinentibus ad bona publica Regis: & præterea loquitur prædicta lex de personis, quæ vendunt prædicta officia autoritate propria, sine licentia superioris, Regis scilicet, vel domini superioris respectiuè, vt colligitur ex dicta Ordinatione. Quod non cernitur in hoc officio cum non pertineat ad bona regalia, & possit donari à domino, illius oppidi in quo viuit Catharina: in quo oppido prædictus dominus habet plenam potestatem donandi similia sæcularia.

2 Secundò præmitto quod post venditionem soluto pretio, & traditâ re venditâ emptor statim acquirit rei dominium, vt tradit etiam communis opinio Theologorum, vt videre est apud Azorium *tom. 3. lib. 1. c. 14. §. Acquiritur*, vbi citat legem *Instit. de rerum diuisione §. Vendita.* Et nullus Doctorum hac de re dubitat.

3 Hoc posito, probo conclusionem. Nam hæc fœmina possidet hoc officium per emptionem, qua pater suus illud emit, & proinde illius officij habet dominium tanquam

tanquam hæres nominata à patre suo : ergo cum illius officij plenum , & qui etiam dominium habeat , non potest illi imponi onus nubendi certo viro sub pœna amissionis officij. Antecedens patet apud citatos Doctores per Azorium. Probatur consequentia hoc exemplo claro. Vendidit Antonius Francisco domum , & soluto pretio tradita est domus Francisco : nunquid postea poterit Petrus prædictam domum auferre Francisco , vel circa illam aliquid innouare ? Non profectò , quia si id posset , orirentur quotidie inconuenientia magna , lites , & scandala. Secundò id probò exemplo accommodatissimo ad casum præsentem. Habeo agrum sub emphyteusi (vulgo *de foro*) cuius agri habeo dominium utile , dominus emphyteusis habet dominium directum. Vendidi hunc agrum cum licentia domini directi , sine qua vendi non poterat. Constat quod post factam venditionem dominij directi non potest dominus directus aliquid innouare in illa emphyteutica vendita Petro , neque illam illi auferre , vt praxis communissima testatur. Idem prorsus cernitur suo modo in nostro casu. Iste dominus sæcularis , de quo agitur , habet , vt sic dicam , dominium directum in officiis sæcularibus suæ iurisdictionis : ille verò qui vt proprietarius possidet officium habet dominium utile prædicti officij. Si ergo iste qui habet dominium utile officij , vendidit illud cum licentia domini sæcularis , qui habet dominium directum ; non poterit ille dominus post venditionem factam de sua licetia innouare aliquid circa tale officium venditum , neque illud auferre Mariæ hæredi dicti Ioannis , qui illud emit cum licentia eiusdem domini , & erat Ioannes dominus directus illius. Eo nempe modo quo dominus directus rei emphyteuticæ non potest alterare ,

vel auferre rem emphyteuticam ab hæredibus domini utilis eiusdem rei, nisi forte ob culpas aliquas commissas. Quod suppono in Catharina non euenisse, cum non dicatur illam, vel patrem suum culpam aliquam commisisse. At constat quod obligare illam ut nubat tali viro pauperi, est illi imponere onus molestum, & pensionem grauem, & proinde est alterare rem venditam. Secundò probò principaliter: nam licentia quam dedit prior dominus ut venderetur hoc officium, fuit in substantia quædam donatio liberalis, per quam Ioanni ementi dedit hoc officium. At donatio liberalis absoluta, & acceptata non potest reuocari, ut est communis Doctorum opinio, & decernitur in lege istius Regni *lib. 4. Ord. tit. 63*. Ergo donatio istius officij non potest hodie reuocari à filio prioris domini, maximè cum ille confirmauerit donationem, seu licentiam datam à patre: cum ipse filius iusserit Catharinæ solui singulis annis assignatam pecuniam de fructibus officij tanquam veræ dominæ proprietariæ dicti officij. Si verò dicas quod licentia data à priori domino, ut officium venderetur, non fuit vera donatio, sed simplex licentia, quæ potest reuocari: dico quod neque tunc filius prædicti domini poterit talem licentiam reuocare eo quod iam illam confirmauit modo proximè dicto, idque iuxta regulam 21. *de reg. iuris in 6*. dicentem: *Quod semel placuit, amplius displicere non potest*. Maximè quando iam non est res integra: sed est licentia posita in actu, & emptio officij absolutè facta sine vlla conditione.

4 Probatur adhuc conclusio, nam Princeps, etiam supremus (qualis non est dominus, de quo agitur) non potest auferre subdito ius quod habet acquisitum in re, inuito tali subdito, ut dicitur in *l. penult. & finali, de nata*

natal. restit. cum aliis textibus citatis à Sarmiento 4. p. de reddit. Eccles. cap. 3. paulò post initium. Imò nec Papa intendit tollere alicui ius suum quod habet acquisitum in re aliqua, vt habetur in cap. *Super eo vero, de off. & potest. iudicis delegati*, cum aliis ibi citatis à glossa, verbo *Intentionis*. At ista mulier habet iam ius in re acquisitum in hoc officio, tanquam in re empta pecuniâ patris sui, & prædicti officij habet iam dominium utile, vt constat ex præcedentibus: ergo iste dominus non potest ab illa auferre ius quod habet quæsitum in hoc officio Notarij. Vltimò probatur: quia post venditionem factam non potest rei venditæ apponi aliqua conditio, nisi talis conditio ab utroque contrahente acceptetur, vt colligitur ex l. *perfecta Cod. de donat. sub modo, ibi: Perfecta donatio conditiones postea non capit.* de quo Sanchez lib. 5. de matrim. disput. 6. num. 3. & 4. vbi dicit non sufficere vt post contractum celebratum vnus tantum contrahens apponat conditionem, at in hoc casu, in principio quando à priori domino data est licentia vendendi liberè officium, & in venditione ipsius officij, non apposita cōditio vt Catharina certo viro nuberet: ergo talis conditio non hodie illi apponi post venditionem officij, & pacificam possessionem illius, non consentiente Catharina.

5 Obiicies: Hodie praxis Regni obseruat, quod quando Rex alicui viro nobili donat commendam, eidem imponit conditionem vt nubat certæ feminæ nobili, & pauperi, aliàs non daturus commendam, & prædicta conditio nubendi tali feminæ, est licita, & in praxi. Ergo similiter iste filius prioris domini potuit Catharinæ in donatione, seu confirmatione prædicti officij imponere conditionem quod nubat tali viro,

aliàs non daturus tale officium. Respondeo dissimilem valde esse rationem in utroque casu. Nam quando Rex imponit illam conditionem nubendi, imponit illam in principio antequam commendatarius accipiet, & præterea commendatarius non habet ius quæsitum in re, circa illam commendam, & propterea Rex potest apponere quamlibet conditionem in re, quam donat liberaliter antequam res donata acceptetur; & possideatur. At in nostro casu, iste filius prioris domini, non imponit Catharinæ hanc conditionem nubendi in principio donationis officij, sed postquam illa habet possessionem officij. Secundò, quia Catharina, id est pater suus, emit hoc officium propriâ pecuniâ. At Commendatarius non emit commendam, sed liberaliter illam accipit, & proinde potuit illi in principio apponi talis conditio nubendi; & retorquetur idem exemplum: nam postquam Commendatarius habet possessionem commendæ per aliquos annos, non solet Rex de nouo aliquam conditionem apponere. Si verò mihi dicatur, quod aliquando Rex aufert officia iam possessa ab aliquibus. Respondeo id non facere Reges nisi quando præcedunt culpæ. In Catharina verò non præcesserunt culpæ, ut suppono. Nam nolle nubere viro designato ab isto domino, non est culpa, cum matrimonium debeat esse liberum. Imò maior culpa poterit esse domino isto obligante Catharinam ut nubat illi viro, ut statim ostendo.

6 Vltimò aduerto, posse merito dominum istum timere quod peccatum committat obligando Catharinam ut nubat tali viro contra suam voluntatem. Probatur ex Concilio Trid. *sess. 24. cap. 9. de matrim.* ubi excommunicat omnes principes compellentes aliquem

aliquem ad matrimonium contrahendum , de quo etiam Sanchez *lib.2. de matrim. disp.27.* citans multos Doctores. Hic autem dominus obligatus Catharinam ad nubendum tali viro sub pœna amissionis officij , empti à patre , & in quo consistit suum remedium , est quasi compulsio , & coactio ad nubendum , & videtur illi incuti metus cadens in virum constantem , qui etiam iuxta Doctores incutitur in viro robusto quando adest periculum amittendi omnia bona. Si vero mihi dicatur Reges hodie dare commendas sub illa conditione nubendi tali , nec proinde aliquem dicere eos compellere ad nubendum , vel esse excommunicatos. Respondetur ex supradictis *num.5.* casum esse dissimilem. Nam Reges id faciunt in principio antequam dent commendam , & commendatarius nondum possidet illam commendam , neque illam emit suâ pecuniâ : & ideo Rex apponens illam conditionem liberam nubendi , non compellit sub protestatione quod auferet commendam possessam , sed quod non dabit illam denuo. At in nostro casu iste dominus temporalis apponens conditionem Catharinæ , vt nubat , minatur quod aliâs priuabit illam officio iam possessio , & empto pecuniâ patris sui. Secundò respondeo dictum decretum Tridentini de non compellendo ad matrimonium , non comprehendere Regem , neque Imperatorem : vt testatur Hentiquez *tom.2. lib.11. cap.6. §.6 littera G.* At iste dominus de quo loquitur , neque est Rex , neque Imperator.

CASVS XX.

De quadam emptione rei emphyteuticæ sub obligatione nominandi, vulgò, prazo.

QUædam mulier tutrix filiarum suarum, vidua cum esset, emit quandam proprietatem, (vt campum) quæ erat sub emphyteusi obligata cuidam confraternitati Misericordiæ in Portugallia, quod vulgo dicitur, *prazo*, cum obligatione nominandi successores in illo. Confraternitas Misericordiæ, quæ erat directra domina, confirmavit venditionem, & hanc viduam ementem constituit, & nominavit in prima vita, cum potestate vt possit nominare secundam personam, seu secundam vitam. Et secunda persona succedens posset nominare tertiam, cum declaratione quod tales nominationes, vel venditiones essent confirmandæ per confraternitatem Misericordiæ prædictæ. Hæc vidua matrimonio locavit primam filiam seniore, eamque domi retinuit cum genero & aliis filiabus. Huic filiæ seniori tradidit rem illam emphyteuticam, vt fructus eius comederet, dum manebat in domo ipsius matris. Mansit illa cum marito in domo matris per annos viginti. Quibus finitis, propter aliquas discordias & molestias exortas, gener cum sua vxore filia seniore viduæ, exiit à domo viduæ, & viuens separatim prætendit rem illam emphyteuticam pertinere ad se ratione vxoris suæ, quæ erat filia senior, & quam iam socrus eius nominasse videbatur in emphyteusi, seu *prazo*. Et declaratur quod prædicta vidua dedit illi filiæ seniori dotem competentem in aliis rebus

rebus mobilibus, & immobilibus: de prædicta verò re emphyteutica solum illi dedit vsum, vel vsum fructum: neque talem vsum dedit coram testibus, neque per scripturam. Imò cum filia, & gener ab illa peterent vt scripto illis absolutè traderet rem illam emphyteuticam, vidua id facere recusauit.

Mortua est hæc filia senior Olyssippone; quâ defunctâ, quædam alia mulier præsentauit quandam scripturam, per quam defuncta hanc secundam mulierem nominabat in illa re emphyteutica, eidemque faciebat donationem illius. Quæ secunda mulier, statim per procuratorem apprehendit possessionem dictæ rei emphyteuticæ, idque sine autoritate iudicis. Vidua hoc sciens per exceptionem opposuit se apprehensioni dictæ possessionis. Idem fecit confraternitas Misericordiæ directâ domina istius rei emphyteuticæ. Et declaratur quod prædictus gener viduæ per illos viginti annos, in quibus comedit fructus huius rei emphyteuticæ, ipse nomine suo soluebat pensionem emphyteusis dictæ confraternitati, non autem soluebat ipsa vidua.

Hoc posito, quæritur an ista secunda mulier nominata à filia seniore habeat ius ad dictam rem emphyteuticam: an verò ius maneat apud viduam, quæ primò fuit nominata à confraternitate Misericordiæ, neque illa aliquem nominauerit pro secunda vita, neque de hoc possit per aliquam scripturam constare. Et declaratur quod ratio quam assignauit filia defuncta ad nominandam hanc secundam mulierem in re emphyteutica, fuit eo quod ab illa receperat aliqua bona, & obsequia: cum prædicta secunda mulier esset pauperima, neque haberet vnde aleretur.

Secundò quæritur, vtrum per mortem istius viduæ,
hæc

hæc res emphyteutica, seu *prazo* adducenda sit ad collationem inter generum, & alios filios viduæ, vel nepotes?

Responsio.

I Quamvis materia hæc directè pertineat ad Doctores iuris ciuilibus, quia tamen Theologi ratione conscientia, & peccati aliquas materias Iuristarum attingunt, qualis est emphyteusis, maioratus, testamentum, & similes, dicam breuiter, quid circa hunc casum Theologi possunt attingere.

Dico ergo absolutè, & certissimè, prædictam filiam, quæ nominauit tertiam mulierem tanquam tertiam personam: seu tertiam vitam, id nullo modo potuisse facere, & proinde inualidè, & nulliter nominasse: neque proinde dicta mulier potuit acquirere dictam rem emphyteuticam, neque quo ad dominium, neque quo ad vsumfructum. Ante probationem præmitto, quod dicitur in principio informationis, videlicet quando confraternitas Misericordiæ confirmauit primò hanc viduam, illique concessit vt postea nominaret, addidit conditionem, quod futuræ nominationes confirmandæ essent per ipsam confraternitatem Misericordiæ. In quo factus est contractus conditionalis sub conditione licita, vt patet. Constat verò quod contractus conditionalis violatur si non seruetur conditio appositâ, vt testatur communis Doctorum sententia in materia de contractibus, maximè videntus est Azor *tom. 3. lib. 4. c. p. 24. §. 1.* cum textibus ibi citatis, & Lessius *lib. 2. de instit. cap. 18. dub. 15. num. 119. & 120.* Ratio est, quia donans, seu contrahens aliter non consentit nisi interueniente illâ conditione appositâ,

appositâ, & impletâ, & contractus sine consensu contrahentium, est nullus, vt patet ex iure, & praxi. Hoc posito, sic fit argumentum. Hæc mater, quæ primò fuit nominata, non poterat secundò nominare absque licentia, & confirmatione confraternitatis Misericordiae quæ erat directâ domina emphyteusis. At constat, quod ista nominatio prætensa, quæ allegatur facta per filiam defunctam, non est confirmata, nec approbata per confraternitatem prædictam: ergo talis nominatio secunda de tertia muliere nulla est, & inualida. Et eadem ratio à priori militat in nominatione matris circa filiam seniore, si daretur; quia non fuit facta cum approbatione, & confirmatione prædictæ confraternitatis & proinde non est seruata forma, & conditio contractus, maximè cum hodie dicat prædicta confraternitas Misericordiae, quod non consentit in tali nominatione matris: imo neque consentit in nominatione secunda, quam fecit filia circa tertiam mulierem. Hæc consequentia præcipuè probatur ex textibus citatis à glossâ in regula iuris in 6. quæ dicit, *Nemo potest plus iuris conferre in alium, quam sibi competere dignoscitur*. Vbi glossa citat alium textum, siue dictum commune Iuristarum dicentium: *Nemo dat quod non habet*; & lumen naturale idem dicat. Hæc filia nunquam habuit dominium istius rei emphyteuticæ, sed solum vsumfructum, cum non extet illa de re scriptura, nec approbatio confraternitatis Misericordiae: ergo cum non habuerit illius rei dominium vtile, non poruit illud transferre per nominationem in tertiam mulierem, cum nemo det quod non habet, maximè cum mater dicat quod non fecit nominationem in filia: imò rogata vt id faceret per scripturam, recusauit.

2 Cùm constet per testes, quod quando in principio hæc mater dedit filiæ fructus huius rei emphyteuticæ, declarauit se illi dare solum vsumfructum illius, cessat omne dubium, nec potest alicui in mentem venire quòd per hoc illi mater donauerit dominium vtile rei emphyteuticæ, vel quod filiam nominaret in secundam personam, quamuis filia per viginti annos comederet fructus illius. Hoc constat ex communi Doctorum opinione, & praxi dicentium, quod in rebus immobilibus, sicut campo, domo, & similibus, diuersa valde sunt dominium illius, & vsusfructus illius: quod potest donari vsusfructus illius sine eo quod detur dominium illius. Hoc constat clarissimè in illis, qui locant aliis vineas, oliueta, domos, & similia immobilia. Hi enim conductoribus non dant dominium talium rerum immobilium locatorum, vt patet, sed solum vsumfructum; dominium verò manet apud locatorem. Idem ferè aliquo modo cernitur in re emphyteutica, in qua possidens illam non habet absolutum dominium illius, sed solum dominium vtile & vsumfructum, & ideo non potest illam vendere absque licentia domini directi. de quo videri potest Reginaldus *tom. 2. lib. 25. n. 26.* Cùm ergo constet quod hæc mater in principio non dederit filiæ istius rei emphyteuticæ dominium, nisi solum vsumfructum, sequitur quod dicta filia nunquam habuit dominium vtile prædictæ rei emphyteuticæ, & proinde tale dominium non potuit dare tali tertiæ mulieri per nominationem, quia iuxta proximè dicta, *nemo dat quod non habet.* Neque ad probandum hoc dominium vtile in filia, vel ad probandam nominationem matris circa illam, sufficit quod per viginti annos comederet fructus prædictæ rei emphyteuticæ, vt hoc temporis spatium

spatium posset illi dare titulum dominij ob præscriptionem. Nam dato, & non concesso, quod illa posset præscribere, quoad vsum fructum, nunquam potuit præscribere quoad dominium utile, quod nunquam habuit: iuxta illud Iuristarum, quod *a separatio non fit illario*. Constat ex claro exemplo. Nam possidens rem emphyteuticam, comedit fructus illius per quinquaginta, & amplius annos, idemque faciunt successores illius: & tamen per hanc possessionem fructuum, siue per hunc vsumfructum nunquam præscribunt contra dominum directum. Idem à simili potest dici de ista filia, quod licet per viginti annos de licentia matris possederit vsumfructum istius rei, nunquam potuit præscribere contra dominium utile quod mater habebat in eadem re. Si verò quæras, quomodo probabit hæc mater quod filia non dederit dominium utile istius rei, sed solum vsumfructum? Dico quod lex istius Regni *lib. 3. ordinat. tit. 59. § 11.* dicit, quod ad probandas donationes, & contractus, & pacta inter patrem, & filium, vel matrem, & filium, non est necessaria scriptura, sed sufficiet probare per testes: & proinde debet ista filia saltem per testes probare quod mater illam nominauerit, vel quod illi dederit non solum vsumfructum illius rei, sed etiam dominium utile.

3 Tertiò dico principaliter, quod si confraternitas Misericordiæ quando primò nominavit hanc viduam, dedit illi licentiam nominandi vnâ personam ante mortem suam, vel tempore mortis; talis mater post primam nominationem poterat illam nominare, & post hanc aliam: & per vltimam nominationem reuocarentur omnes nominationes præcedentes: quod probatur, quia per præcedentes nominationes nondum est

est translatum dominium talis rei in personas nominatas : nisi fortè tale dominium datum esset filiae in dotem matrimonij , per scripturam specificantem, quod praedicta res emphyteutica dabatur filiae pro dote. Sic disponit lex istius Regni *lib. 4. Ordin. tit. 37. in principio, & in §. 1.* At hæc mater neque dedit rem istam emphyteuticam filiae in dotem , neque in filiam transtulit dominium quod in tali habebat. Imò dicitur in informatione posita in principio , quod mater expressit se solum vsumfructum filiae concedere. Ex quo constat quod licet mater in principio hanc filiam nominaret absolute , nihilominus potuit praedictam nominationem factam reuocare per praedictam Regni Ordinationem. Facit etiam quod pro hoc addit praedicta Ordinatio. *eodem tit. §. 5.* videlicet, quod si primus nominans simpliciter nominauerit in *prazo* aliquam personam non transferendo statim in illam ius, & dominium talis rei , & persona nominata mortua fuerit ante personam nominantem, in tali casu persona nominans poterit nominare aliam , quam voluerit, quoniam nominatio personae nominatae non fuit sortita effectum. Et in nostro casu neque mater nominauit hanc filiam, & dato quod illam nominauerit , filia mortua est ante matrem nominantem : & mater nominans nunquam transtulit in filiam dominium vtile quod habebat, viso quod filiam nunquam nominauit.

4 Quartò principaliter probatur ex eo quod tradit Rabello *tom. de oblig. iust. 2. p. lib. 13. de emphyteusi §. 17. num. 6.* ubi imprimis ait quod supra diximus, posse patrem in vita nominare filium in emphyteusi , sed quod viuente patre filius non habebit ius in illa quantum ad dominium , sed solum vsumfructum ex donatione patris. Deinde addit Rabello propriè ad nostrum

nostrum intentum, quod quando aliqua persona recipit rem emphyteuticam pro tribus vitis ad certas personas nominandas, ponit citatus Author hæc verba: *Non finitur precedens nominatio per nominationem sequentis persona quādiu precedens vita perdurat, quantumvis emphyteusis in alium, vel alios alienetur.* Sic ille: quo nihil clarius dici potuit. Et assignans prædictus Doctor huius rei causam, & citans legem istius Regni, ait, quod quando datur licentia nominandi ad tres vitas, intelligitur vt tres personæ ordine successiuo per tres ipsarum vitas omnino completas rem possideant. Et citat Rabello, Gamam *decis. 235. & 236. num. 3.* Quî Gama refert sic iudicatum fuisse in Senatu Regio Olyssipponensi, cum aliis ibi dictis à Rabello. At in nostro casu, vltra quàm quod mater non nominauit filiam absolute, transferendo in illam dominium vtile; matris vita nondum finita est, neque completa, cùm adhuc viuat, & filia prius mortua sit quàm mater, nec proinde duæ vitæ sint completæ. Et sic stante hodie emphyteusi in matre viuente, non potest simul stare in tertia muliere indebitè nominata.

5 Neque obstat quod gener istius viduæ per illos annos, in quibus comedit fructus huius emphyteusis soluit confraternitati Misericordiæ pensionem illius: nam talis solutio pensionis non dedit illi ius circa dominium emphyteusis: nam talem solutionem fecit tanquam procurator viduæ, vt patet. Procurator verò licet tempore longo procuratoris officium administret, non acquirit dominium illarum rerum, quarum est procurator, vt praxis obseruat.

6 Adhuc ex alio capite ostendo nominationem factam à filia in tertia muliere fuisse nullam, eo quod dicatur illam nominasse propter bona opera ab ipsa

accepta, cum aliàs constet prædictam tertiam mulierem esse nimis pauperem, quæ tali filix obsequia, & dona dare non poterat. Circa quod nimis inferuit quod tradit Mascardus *rom. 1. de probat. conclus. 184. num. 5. & seqq.* vbi cum aliquibus Doctoribus, dicit, quod si alicui fiat donatio in aliquo legato, dicendo in scriptura quod illi hoc donat propter merita, vel benemerita, intelligendum hoc esse, si merita, & benemerita probari possint. Et ait non sufficere verba narratiua instrumenti donationis, in quo donator dicat, se donasse pro seruitiis, meritis, & obsequiis; quia illa verba non sufficerent ad prædicta probanda, quando donatio fit inter personas prohibitas; sed censentur illa verba adiecta in fraudem legum. Hæc autem filia viduæ nominans tertiam mulierem fecit illi donationem prohibitam per leges supracitatas: neque probari possunt merita, vel obsequia, vel bona opera, quæ ipsa præstiterit filix viduæ, cum talis mulier esset pauper: ergo non sufficiet quod prædicta filia viduæ dicat in sua nominatione, quod illam nominet propter bona opera ab ipsa recepta: & proinde illius nominatio etiam ex hoc capite est suspecta.

7 Quantum ad secundum quæsitum, an scilicet hæc res emphyteutica post mortem viduæ adducenda sit ad collationem, vt illa, vel valor illius diuidatur inter hæredes respectiue? Dico decissionem huius casus positam esse in lege istius Regni *lib. 4. Ordinatio. tit. 27. §. 22.* vbi tria decernuntur. Primum est, quod si pater, aut mater in vita sua dederit filio aliquam rem emphyteuticam pro dote matrimonij, vel alio titulo, vt talem rem statim possideat in vita ipsius donantis: in tali casu talis filius ipsius donantis, obligabitur

obligabitur post mortem donantis adducere ad collationem prædictam rem emphyteuticam, si voluerit esse hæres æqualiter cum aliis fructibus in bonis paternis, vel maternis. Secundò dicit, quod si pater, vel mater rem emphyteuticam dedit filio, non ut possideat in vita ipsius donantis, sed post mortem ipsius donantis, nominando illum post mortem ipsius donantis, in tali casu non tenebitur filius post mortem patris rem prædictam adducere ad collationem, nec valorem illius. Tertiò dicit, quod si pater, vel mater talis filij tanquam prima vita, seu prima persona, emit rem illam emphyteuticam suâ propriâ pecuniâ, vel circa rem illam fecit multas expensas, seu melioramenta, prædictus filius adducet ad collationem rem prædictam, vel valorem ipsius, quamvis in illa fuisset nominatus post mortem nominantis; vel dicta res emphyteutica illi computabitur pro sorte, vel portione hæreditatis sibi debita. Hinc patet responsio ad secundum dictum dubium: constat enim quod hæc vidua emit suâ propriâ pecuniâ rem istam emphyteuticam, & proinde cùm illam inuita non donauerit quoad dominium, quamvis in vita aliquem nominauerit, vel per mortem, talis filius, vel hæres nominatus tenebitur post mortem matris adducere ad collationem prædictam rem emphyteuticam: vel saltem talis res illi comparabitur pro sorte, & portione suæ hæreditatis.

CASVS XXI.

De reelectione cuiusdam Guardiani in quodam Conuentu ultra tres annos.

Constat ex quadam Bulla Pauli I V. infra citanda, & ex quodam statuto generali Ordinis P. N. Francisci fundato in prædicta Bulla, quod nullus Religiosus prædicti Ordinis potest esse Guardianus in eodem Conuentu ultra tres annos. Contigit vt per mortem cuiusdam Guardiani, quidam Religiosus fuerit constitutus præses illius Conuentus; quem præsidem sic creatum, statuta generalia dicunt habere totam iurisdictionem, quam habet Guardianus, & quasi Guardianum reputandum esse. Prædictus Religiosus fuit præses in dicto Conuentu per decem menses: postea celebrato capitulo, vel congregatione capitulari fuit electus Guardianus eiusdem Conuentus, & in illo fuit Guardianus duobus annis, & duobus mensibus; quod tempus iunctum cum decem mensibus, quibus fuit præses in eodem Conuentu, complet tres annos prælaturæ in eodem Conuentu. Post hos tres annos sic transactos, celebratum fuit capitulum, vel congregatio capitularis, in qua solent aliqui guardiani de nouo eligi. Dubitatum fuit; an prædictus Religiosus de quo agitur, potuerit reeliggi in guardianum, vt continuaret guardianatum per alium annum cum dimidio eo quod in tali Conuentu non fuerit guardianus per tres annos integros, sed solum per duos annos, & duos menses, non obstante quod fuerit præses in eodẽ Conuentu per alios decem menses,

mensēs, qui complent prælaturam trium annorum in eodem Conuentu.

Ante responsionē præmitto Papam Paulum I V. propriâ Bullâ apud Bullarium Rodrig. fol. 853. decreuisse sub pœna excommunicationis, & aliis pœnis, ne in Ordine Minorum aliquis Religiosus posset esse guardianus in eodem Conuentu vltra tres annos: & quod aliter factum foret nullû, adeò vt Religiosi illius Conuentus sub pœna excômmunicationis illi non obedirent.

Quo non obstante, videtur quod Religiosus, de quo quæritur, potuerit reeligî in guardianum prædicti Conuentus, in quo solum fuit guardianus per duos annos, & duos mensēs. Nam licet in eodem Conuentu fuerit præses cum tota iurisdictione guardiani illud officium præsidis in substantia, & in communi vsu loquendi, non dicitur guardianatus, vt patet. Verba autem legis sunt accipienda secundum communē vsum loquendi, vt communis docet opinio. Secundò, quia citata Bulla Pauli I V. est pœnalis, & odiosa, cùm ponat pœnam excommunicationis. Lex autem pœnalis strictè est interpretanda, vt minus lædat quantum fieri possit: cùm ergo illa solum loquatur de guardianatu, non videtur extendenda ad officium præsidis iunctum cum guardianatu, cum præses non sit guardianus.

I Quo non obstante dixi, & dico, talem Religiosum post dictos tres annos non potuisse reeligî in guardianum in proximo capitulo, vel congregatione sequenti, vt maneret guardianus in eodem Conuentu. Fundamentum est, quia talis Religiosus iuxta mentem citatæ Bullæ iam fuit guardianus dicti Conuentus per tres annos, & proinde in eodem non potest continuari iuxta citatam Bullam. Ante probationem reuoco in memoriam supradictum, quod in ordine Minorum

statutum generale decernit, quod præses Conuentus, de quo agimus, factus ob mortem guardiani, habeat omnem iurisdictionem in omnibus, sicut habebat guardianus.

Hoc posito, probatur conclusio proximè posita, primò, quia *de æquipollentibus idem est iudicium*, vt habetur in *l. fin. ff. mandat. & cap. Inter cetera, de rescript.* At esse guardianum, & esse talem præsidem in eodem Conuentu, æquipollent cùm solo nomine differant, & quæstio de nomine non sit curanda: ergo cùm iste in substantia fuit guardianus, seu prælatus in illo Conuentu, non poterit continuari in illo officio guardiani vltra dictum triennium, per citatam Bullam Pauli I V. Et quod officium guardiani, & talis præsidis sint duæ res æquipollentes, probo ex Calepino, qui in verbo *Æquipollens*, ait, quod æquipollere, est parem potestatem habere. Diximus vero quod præses, de quo loquimur, habet parem potestatem in vtroque foro sicut guardianus. Secundò probatur ex illa regula Iuristarum dicentium, quod, *vbi est eadem omnino ratio, est etiam eadem iuris dispositio*: ita vt pœna imposita vni delicto in vna lege possit & debeat extendi ad aliud delictum, in quo militat eadem omnino ratio assignata in priori lege. Hæc est communis Iuristarum, pro qua sufficiat videre Sanch. *lib. 3. de matr. disp. 42. n. 4.* vbi citat textus, & Doctores vsque ad nauseam. Sed in guardiano, & in præside eiusdem Conuentus est eadem omnino ratio, vt suprà diximus: ergo in vtroque erit eadem dispositio, & dispositum in vno, erit dispositum in alio quoad durationem officij, & vt officium vnius computetur cum officio alterius. Quod verò eadem sit ratio in præside, & guardiano quoad durationem officij, probo, quia
ratio,

ratio, quæ mouit Pontificem in illa Bulla ad prohibendam continuationem guardianatus ultra triennium, fuit obuiari ambitioni procurandi, & continuandi officia in religione, vt Papa exprimit in præmio Bullæ, sic dicens : *Viam ambitiosa cupiditatis, quæ ex continuatione officiorum, quandam superioritatem, & iurisdictionem in Religionum Ordinibus, &c.* Intentio Papæ ibi exprimitur, videlicet quod tollatur ambitio circa continuationem officiorum habentium superioritatem & iurisdictionem in religionibus : at talis ambitio æquè interuenit in guardianatus officio, atque in officio talis præsidis, cum vtrumque habeat æqualem superioritatem, & iurisdictionem : ergo in vtroque est eadē ratio. Tertiò principaliter probatur conclusio, quia ex præmio legis colligitur mens, & finis legislatoris, vt est communis opinio, de quo fusè Sanch. more suo lib. 2. de matr. disp. 37. n. 3. citans multa : sed Papa in præmio cit. Bullæ dicit se intendere obuiare ambitioni continuandi officia, & hæc ambitio æquè cernitur in continuando officio guardiani, ac præidentis qui est omnino sicut guardianus : ergo mens, & intentio Papæ fuit ne aliquis in eodem Conuentu foret prælatus ultra triennium, siue cum titulo guardiani, siue cum titulo præidentis. Quartò, hinc elicitur aliud argumentum, nam finis legis, seu legislatoris potius seruandus est quàm verba legis, iuxta regulam 88. de reg. iur. in 6. sic dicentem : *Is committit in legem, qui verba legis amplectens contra legis nititur voluntatem.* Sed clara voluntas Bullæ istius est ne officia continuentur in eodem Conuentu ultra triennium : ergo hæc voluntas seruanda est, licet verba Bullæ non clarè loquantur de officio præidentis. Fauet quod dicit Bonac. tom. 2. tr. de legib. disp. 1. q. 1. punct. 8. n. 17. Quod scilicet mens legislatoris,

& intentio intrinseca seruanda est, non verò extrinseca: & declarat, quod mens intrinseca legislatoris seruatur, quoties adimpleretur id quod legislator intendit.

2 Hoc ipsum potest confirmari omnino à simili ex cap. *Dudum*, il 2. de elect. vbi agitur de electione: in quo capitulo, quidam clericus qui erat Archidiaconus, & simul habebat aliam Ecclesiam cum cura animarum, & fuit accusatus de hoc ob pluralitatem beneficiorum incompatibilium. Clericus excusabat se, quod officium Archidiaconi cum esset solum personatus, non verò dignitas, nec prælatura, non se incurrisse in pœnas habentium pluralitatem officiorum, vel beneficiorum cum cura animarum. Ad quod respondit Papa, quod cùm Archidiaconus illius Episcopatus quamuis esset solum personatus, nihilominus excommunicabatur, interdicebatur, suspendebatur ab officio, absoluebatur à pœna, qui sunt actus habentis curam animarum; idem dicendum esse de tali officio Archidiaconi, ac de habente curam animarum. Verba Papæ sunt: *Cum idem de personalibus, quod & de curam animarum habentibus iudicium sit habendum.* Hoc multo magis videtur de officio præsidis, de quo agimus, & guardiani in eodem Conuentu: quod scilicet idem iudicium sit de utroque, cum uterque habeat eandem parem curam animarum, & in solo nomine differant. Videatur glossa citati cap. *Dudum*, in verbo *De personalibus*, vbi multa adducit ad probandum, quod de similibus idem est iudicium.

3 Neque obstat, quod iste guardianus finito triennio in capitulo sequenti renunciavit officio guardiani, ut propter hanc renuntiationem videatur posse reeligi in guardianum prædicti Conuentus post dictum triennium

nium, eo quod per talem renunciationem vacauerit officium guardiani. Non obstat primò, quia illa vacatio per tempus breuissimum facta fuit. Mora autem brevis, seu interruptio brevis non computantur, nec reputantur in iure, sicut patet ex allegatis à glossa in *cap. ultimo, de verborum signif. in 6.* in verbo *Continuè*, & in verbo, *Pro tuis*. Vbi aliquibus, & clavis exemplis probat non desinere esse continuum id quod parua aliqua interruptione interruptitur. Facit ad idem quod tradit Mascardus *tom. 2. de probat. conclus. 1070. num. 24.* citans vnā glossā, & Doctores, dicentes, quod veniens intra tempus modicum, censetur venire, ac si veniret statuta die. Secundò, quod hæc renunciatio (vt ita dicam, momentanea, seu vacatio momentanea) non obstat, probo, quia aliàs aperiretur via fraudibus. Nam possent aliàs aliqui guardiani vno mense proximè ante capitulum renunciare officio guardiani, quod habuerunt per tres annos dempto vno mense; & proximè pòst possent eligi guardiani eiusdem conuentus ad alios tres annos, quod esset clarè in fraudem prædictæ Bullæ Pauli IV. *Fraudibus* autem *obuium est*, vt passim iura proclamant.

4. Ad duo argumenta in oppositum adducta in principio, dicendum est, ad Primum quod verba legis intelligenda sunt iuxta communem modum loquendi, nisi ex ipsa lege colligatur clarè mens, & intentio legislatoris. Iam verò suprà diximus, ex ipsa Bulla clarè colligi mentem Papæ esse tollere ambitionem continuandi quæcunque officia prælaturæ in eodem conuentu; ac proinde parum interesse, si ad hoc vtatur nomine guardiani, vel præsentis qui habet eandem omnino iurisdictionem. Ad Secundum dicendum est primò legem pœnalem, purè pœnalem

P s esse

esse restringendam nisi aliud constet ex mente legislatoris oppositum volentis : hic autem constat clarè dō mente legislatoris , vt proximè dixi in solutione præcedentis argumenti. Secundò responderetur , prædictam Bullam Pauli I V. non esse purè pœnalem , sed magis esse fauorabilem , quam pœnalem. Nam licet imponat pœnam oppositum facientibus , fauet tamen multum statui Religionis , ne ambitiosi continuent prælaturas , cum scandalo aliorum , qui exinde à prælaturis excluduntur , cum aliis inconuenientibus concernentibus. Quando verò lex est plus fauorabilis , quam sit pœnalis , potest extendi , maximè ad casus similes : & hæc lex valde fauorabilis statui Religionis , vt diximus , extenditur ad casum omnino similem , idest de guardiano ad præsidem similem sibi in iurisdictione vtriusque fori.

CASVS XXII.

De quibusdam Missis dictis à quodam Religioso prohibito.

IN quadam prouincia certæ Religionis datur statutum prohibens nec in communi , neque in particulari aliquem Religiosum posse dicere Missam pro stippe , vel eleemosyna pecuniaria , sed omnes Missæ dicantur pro tota Ecclesia in communi , seu pro intentione quam Christus D. habuit in Cruce. Quo non obstante , quidam Religiosus illius prouinciæ acceptauit ab amico centum Missas , quas dixit pro illius intentione absque licentia prælati id expressè prohibentis fieri sine licentia.

Quæritur

Quæritur primò an prædictus Religiosus peccauerit violando prædictum statutum? Secundò, an peccauerit mortaliter, vel venialiter? Tertiò, an (quid sit de peccato) prædictæ Missæ valide fuerint dictæ pro intentione illius amici iuxta intentionem Religiosi pro illo applicatam?

Responsio.

Ante responsionem primi, & secundi dubij præmitto, ex duobus capitibus posse quæri, an iste Religiosus peccauerit: primò ratione obedientiæ generalis, quam violauit contrariando statuto provinciae. Secundò, an peccauerit ratione voti paupertatis appropriando sibi eleemosynam tot Missarum, quæ vt minimum debuit accedere ad decem ducatos: & tantam pecuniam accèptare, & expendere absque licentia prælati, est contra votum paupertatis & actus proprietarij maxime in Ordine Minorum. Secundò noto considerandam esse formam dicti statuti, an contineat præceptum obligans sub mortali, vt si præcipiat per obedientiam, vel sub censura, vel per aliqua verba æquiualentia, ex quibus colligitur statutum continere vim præcepti obligantis ad mortale, poterit enim dare aliquod statutum in aliqua Religione, quod neque obliget ad peccatum veniale, sicut de facto datur regula alicuius Religionis, quæ neque suos Religiosos obligat ad veniale. Quæ talis regula dicitur habere solam vim directiuam, non verò coactiuam sub peccato: idest seruit vt dirigat Religiosos in illa sua vita regulari, sed non cogit sub peccato.

1 Hinc patet responsio ad primum, & dico. Quod, si prædictum statutum continet obedientiam, vel censuram,

suram, vel verba æquiualentia, ex quibus colligitur intentionem legislatoris fuisse obligare ad mortale; talis Religiosus peccauit mortaliter, & in hoc nulla est dubitatio, neque indiget aliqua probatione. Si verò statutum nulla talia verba contineat, sed ex praxi prouinciæ intelligatur quod prædictum statutum non obligat sub peccato, sed solum habeat vim directiuam, tunc neque peccauit mortaliter talis Religiosus, iuxta proximè dicta; quod intelligo non peccasse ratione formæ ipsius statuti. Nam aliàs merito credendum est peccatum sibi interuenisse mortale ratione grauitatis materiæ præceptæ, vt enim Theologi docent, ex grauitate materiæ præceptæ colligitur obligatio mortalis peccati; & materia huius statuti est grauissima. Et hinc patet responsio ad secundum.

2. Secundò dico, quod prædictus Religiosus, saltem peccauit mortaliter ratione voti paupertatis, si absque licentia prælati totam illam pirantiam tot Missarum accepit, & expendit: cum enim, vt iam dixi, deberet accedere ad summam decem ducatorum, non videtur permitti in aliqua Religione vt tanta pecunia recipiatur, & expendatur à subdito infcio prælato, maxime si fuit in Ordine Minorum. Sed quid? si prædictus Religiosus nullam pecuniam recepit pro illis Missis dicendis, sed solum voluit satisfacere obligationi, quam habebat amicus de illis dicendis, nihil interim recipiens ab amico? Respondeo, mihi valde probabile esse, quod etiam tunc peccauit mortaliter contra paupertatem. Probo, quia sic dicens centum Missas pro amico vt illum liberaret ab onere dicendarum Missarum, tali amico vel donauit, vel remisit decem ducatos, vt patet. At Religiosus non potest tantā summam pecuniæ donare sæculari absq; licentia prælati.

prælati. Quod magis declaratur, & probatur: nam remittere alicui aliquod debitum, reputatur pro quadam donatione, vt docet Nauar. in *commentario de spoliis clericis*. §. 15. num. 4. pro quo citat capitulum *veniens*, de testibus, & legem si *mulier*, de condict. caus. dat. in quibus dicitur, quod remittere est donare. At iste Religiosus remisit amico decem ducatos, qui aliàs sibi debebantur pro eleemosyna prædictarum Missarum: ergo illi donauit decem ducatos, quos non poterat donare sine licentia prælati: imò in Religione Minorum nec prælatus localis potest talem licentiam concedere.

3 Dico tertio, quod non obstante tali statuto de non dicendis Missis pro pstantia pecuniaria, tales Missæ validè dictæ fuerunt pro intentione mandantis illas celebrari, si pro illo Religiosus intentionem applicauit. Et proinde talis amicus illas Missas commendans non tenetur procurare, vt aliæ Missæ dicantur. Hæc conclusio, seu doctrina asseritur à Sanchez *lib. 5. Decalogi cap. 1. num. 6.* & Suarez in *tomo de Eucharistia disp. 79. sect. 9. §. alij nihilominus*, cum aliis Doctorebus ab his duobus citatis: qui dicunt, quod licet prælatus præcipiat subdito vt celebret Missam pro intentione certæ personæ, si subditus celebrauerit pro alia persona, quidquid sit de peccato subditi, Missa manebit dicta pro illa persona, quam subditus intendit, non verò pro illa quam prælatus præcepit. Et in hoc casu tenetur subditus procurare vt Missa intenta & præcepta à prælato, quam subditus omisit, iterum dicatur, si prælatus habebat obligationem, vt talis Missa celebraretur, quia per culpam subditi tali obligationi nondum est satisfactum. Fundamentum Suarez est, quia intentio consecrandi, & offerendi sacrificium,

&c

& intentio illud offerendi pro hoc, vel illo, est propria & personalis ipsius sacerdotis acceptata à Christo D. in sua ordinatione, & proinde talis intentio applicandi sacrificium non dependet à prælato. Vnde si prælatus diceret subdito: Missam quam hodie dixeris, ego applico pro tali defuncto; prælatus nihil faceret, quia prælatus non est dominus illius intentionis, seu applicationis, sed solus sacrificans, & proinde non obstante tali applicatione prælati, Missa maneret dicta pro illo, pro quo subditus celebrans applicauit. Et probat Suares claro exemplo in materia aliorum sacramentorum. Nam si prælatus præcipiat subdito, vt baptizet hunc, non illum: vel vt absoluat hunc, & non illum, & subditus nihilominus oppositum faciat, valebit factum subditi, non mandatum prælati, quia prælatus non est dominus intentionis subditi in illa materia. Eodem modo dicendum est in ista applicatione Missæ, cum sit in vtroquo eadem omnino ratio.

CASVS XXIII.

*Quid significet in symbolo Apostolorum
ille articulus: Sanctorum
communione.*

Apostolus Petrus in sua prima Epistola cap. 3. dicit quod simus *parati semper ad satisfactionem omni poscenti vos rationem reddere de ea quæ in vobis est spe.* In quo innuit congruum esse, vt quilibet Christianus possit reddere rationem de illis quæ sperat, & credit: & quæuis non teneatur vnusquisque Christianus reddere rationem

rationem de omnibus quæ credit, & sperat, saltem congruum est vt de præcipuis articulis fidei aliquam rationem reddat, vel saltem ad consolationem, & vtilitatem suam valde proficit, vt sciat rationem reddere præcipuorum articulorum fidei quos fere quotidie ore confitetur. Igitur in symbolo Apostolorum continente duodecim præcipuos articulos nostræ fidei, Simon Apostolus in conuentu Apostolorum, teste D. August. *serm. 2. Dominica in ramis palmarum*, protulit decimum articulum nostræ fidei in eodem symbolo, qui dicit: *Sanctorum communionem*. Et quia aliquæ vtilitates, & consolationes accrescere possunt fidelibus ex notitia, & explicatione prædicti articuli, illum hîc breuiter explicabo, declarando quid sit *Sanctorum communio*, & quid suffragium Ecclesiæ, in quo prædicta communio ferè fundatur.

1 Primò ergo præmitto in quouis opere bono facto in gratia à quouis fidei dari duplicem portionem illi actui respondentem ex parte Dei, maximè si sit actus virtuosus difficilis. Prima portio est certus gradus gratiæ respondens illi actui in ratione meriti: qui gradus gratiæ datur, quasi ex debito iustitiæ, supposita diuina misericordia dante gratis primam gratiam: iuxta id quod ait Paulus 2. *ad Timoth. 4.* loquens de modo quo meremur gloriam: *Reposita est mihi corona iustitiæ, &c.* Et istum gradum gratiæ respondentem actui meritorio non potest illum actum operans donare alicui: quia nemo potest mereri gratiam alteri de iustitia. Solus enim Christus Dominus, qui habuit gratiam capitalem, verus Deus & homo, potuit aliis gratiam, & gloriam mereri, vt Doctores dicunt in materia Incarnationis tractantes de merito Christi D. Secunda portio respondens actui meritorio difficili,

est

est quædam portio satisfactionis pro parte pœnæ debitæ pro peccato soluendæ in purgatorio, si qua debatur purganda. Et hanc portionem satisfactionis potest quis applicare alteri, si ille sit in gratia cui applicatur. Eo modo quo quis de sua pecunia potest alteri donare, quod sibi placuerit, si donatarius sit capax recipiendi. Tertiò in eodem actu meritorio cuiusque reperitur quædam congruitas ob quam Deus respiciens ad virum sanctum, ex quadam congruitate propter illum aliqua concedit illis, qui cum illo viuunt, tanquam socij, & amici, sicut olim in testamento veteri aliqui homines positi in necessitate petebant à Deo auxilium propter Abraham, Iacob, Isaac, &c. Congruum enim, & vñitatum est vt propter vnum virum bonum, & insignem beneficia conferantur aliis cum illo conuiuentibus in eadem Societate.

2 Quo posito, Dico cum Henriquez *tom.2. lib.13. de excom. cap.4. §.1.* & cum multis, quos citat, triplicem esse communicationem Sanctorum seu fidelium Catholicorum existentium in gratia. Prima est interna: secunda externa politica, qualis est etiã apud Gentiles in conuersando ciuilitè, quæ solet explicari per allocutionem, salutationem, conuersationem, contractus, & simul manducationem, & cætera temporalia, seu sæcularia. De qua secunda communione, seu communicatione parum hoc loco curabimus. Tertia communio Catholicorum est etiã externa, sed Ecclesiastica, & qua si spiritualis, quæ consistit in sacramentis, suffragiis, & beneficiis. Et de primâ interna specialiter loquitur articulus citatus symboli Apostolorum, de qua principaliter hoc loco sequentia dico ex Henriquez citato loco.

3 Prima communio Sanctorum, seu Catholicorum
consistit

consistit, & fouetur, internis charitatis, & virtutum officiis: vt dñ vnus fidelis iustus pro alio iusto libere, & special intentione applicat sua opera: quæ applicatio etiam reperiri potest inter catechumenos, qui sunt in gratia, quia viua Christi membra sibi mutuo communicant officia, eo modo quo membra eiusdem corporis humani quamdiu sunt viua, naturaliter participant fructum ex cibo in eundem communem stomachum iniecto. Et hæc est prima, & principalis communio Sanctorum interna, quoad iustos scilicet adinuicem, si sunt in gratia. Si verò fideles sunt in peccato mortali, habent imperfectum quendam, & vitalem fidei, & sp̃ei motum, non à vita gratiæ, sed à vita Christi, cui per fidem sunt aliquo modo coniuncti, cuius membrum est, non vt participet satisfactionem fructuum sicut iusti, sed ex aliorum impetratione, & merito congrui iuuantur ad conuersionem pœnitentiæ, & defenduntur ab incurisibus demonum, & à malis temporalibus. Itaque inter iustos Catholicos datur illa prima communio, vel communicatio, vt inter se possint sua opera satisfactoria infallibiliter communicare. Inter peccatorem verò, & iustum non reperitur ista infallibilis communicatio: sed, vt ita dicam, communicatio quædam de congruo: quia iustus non potest in iusto suam satisfactionem applicare, cum non sit membrum viuum Christi: de congruo tamen potest illi impetrare contritionem, & conuersionem, & cætera bona temporalia. Et his auxiliis priuatur excommunicatus, quia per sententiam Ecclesiæ positus est extra communionem Sanctorum: id enim significat excommunicatus, id est extra communionem Sanctorum positus. Quod autem quilibet iustus possit communicare infallibiliter

Q

alteri

alteri iusto viuenti, seu mortuo portionem illam satisfactionis sibi debitam ex actu meritorio, constat clarè ex indulgentiis quas aliquando Summ. Pontifices concedunt viuis, vt possint eas applicare defunctis per modum suffragij. Nam iuxta omnes Theologos, cum Papa non habeat directè iurisdictionem in animas purgatorij per modum iurisdictionis, concedit tunc fidelibus iustis vt illam satisfactionem pœnarum per indulgentiam concessam, possint illi applicare animabus purgatorij, quæ sunt in gratia per modum charitatis.

4 De secunda & tertia communione Sanctorum nihil hoc loco dicere intendo, tum quia claræ sunt, & paucae circa illas incidunt difficultates: tum quia in materia excommunicationis explicantur à Doctoribus singillatim dum tractant de effectu excommunicationis, siue de bonis externis quibus illa priuat.

5 Et quia prima interna communio, de qua diximus, est difficilior, vt illa magis innotescat, dico imprimis cum communi Doctorum, quod de illa locutus est Dauid *Psal. 118.* illis verbis dicens: *Particeps ego sum omnium timentium te, & custodientium mandata tua:* ubi non possum non afferre commentarium, quem piè, ac doctè ad huius dubij claritatem, & nostram consolationem ponit Lorinus ad citata verba prædicti Psalmi. Primò igitur ait Lorinus in prædictis verbis Psalmi contineri articulum fidei, de quo agimus: *Sanctorum communionem.* Deinde extendit declarationem illius, vltra quam alij Doctores explicant. Et ait illam extendi vt hæc communio spiritalis, & interna sit etiam inter nos, & animas gloriosas, quæ sunt in cælo, quam vocat Ecclesiam triumphantem: & inter animas purgatorij, quam vocat

cat Ecclesiam patientem. Et inter nos qui sumus in Ecclesia militante. Addit ibidem Lorinus quod etiam inter peccatores, & iustos huius sæculi darur hæc communio Sanctorum, quatenus precibus communibus Ecclesiæ, participant, sed etiam de precibus suis ab aliquibus singularibus verum esse, multæ historiæ testantur; in quibus constat Deum aliquando conuertisse peccatores ob preces alicuius magni iusti orantis pro peccatore. Noto verò in particulari circa hanc doctrinam Lorini dicentis inter Ecclesiam militantem, & Ecclesiam purgatorij, quam vocat patientem, dari hanc communionem Sanctorum, quatenus illæ pro nobis possunt orare, dictum Authorem sentire, quod nos possimus orationem fundere ad animas purgatorij vt ipsæ intercedant pro nobis, quod aliqui Doctores negarunt. Contra quos facit hoc dictum Lorini: nam si animæ purgatorij possunt orare pro nobis intercedendo, non erit illicitum ab illis petere, id quod illæ possunt, & solent facere. Sic sentit Henriq. *tom. 1. lib. 7. de indulgentiis cap. 8. num. 4.* vbi id probat primò, quia ante Christi aduentum fideles legis veteris fundebant orationes ad animas Patrum in limbo existentium. Et præterea probat exemplo, nam teste Beato Gregorio *lib. 4. Dialogorum cap. 40.* Beatus Paschasius, dum existeret in purgatorio, exaudiuit preces ad se suas, & fecit miraculum. Et citat ibi Henriquez *in glossa littera X*, alios Doctores, & aliud miraculum. Et ibidem *in glossa littera A, ad finem capituli citati*, dicit, piè esse interpretandos Doctores dicentes animas purgatorij non esse orandas.

6 Quia verò suprà diximus, hanc communionem Sanctorum magna ex parte niti, & fundari in suffragiis, quibus fiscales se inuicem iuuant, vt ille fuerit in

summa tantum dicere illa , quæ ad suffragiorum notitiam spectare possunt. Fusè enim de illis agere esset infinitum , & pertinet ad alium locum. Dicitur ergo suffragium à suffragando , seu iuuando , quatenus per aliquod opus fideles se adinuicem iuant, vel sibi adinuicem succurrunt. Summaria verò corollaria èlicita ex multis , quæ de suffragiis tractant Doctores, sunt sequentia apud Bonacinam *disp. 6. de indulgentiis q. 2. puncto. 1. 2. & 3.*

7 Primum est. Si quis opus suum satisfactorium applicet alteri viuenti, vel defuncto , non prodest facienti quoad satisfactionem : nam opus bonum non habet satisfactionem infinitam, sed limitatam ; ac proinde si illam portionem satisfactionis alteri applicet , illi proderit cui applicans , non verò ipsi applicanti. Iste verò sic applicans alteri satisfactionem suam , lucratur illum gradum gratiæ respondentem illi actui meritorio de condigno , quia talis actus est actus charitatis , & proinde meritorius. Et gradum gratiæ sibi respondentem ex merito , nemo potest alteri communicare , vt suprà dixi. An verò ista oblatio , seu applicatio satisfactionis habeat effectum infallibilem si vterque sit in gratia ? Bonacina *cit. loco punct. 1. num. 3.* negat : quia , inquit , non satis nobis constat Deum infallibiliter acceptare satisfactiones pro aliis. Sed mihi probabilius videtur dictum Suarez *tom. de Pœnit. disp. 48. sect. 5. num. 7.* dicentis : Infallibiliter , & de iustitia prodesse satisfactionem vnus iusti applicatam alteri iusto viuo , vel mortuo. Vide ibi probationes : & adde quod aliàs liceret nobis dubitare de vsu , & praxi Ecclesiæ magna securitate credentis has applicationes satisfactionum inter iustos esse proficuas , & vtilis.

8 Ut ista satisfactio oblata pro alio profit, requiritur primò vt offerens habeat intentionem offerendi pro eo, cui applicat: si enim non dirigat intentionem illam, retinet sibi suffragium, cum sit opus illius. Secundò requiritur vt opus fiat ab homine viatore, in hac vita existente. Nam in alia vita sicut non possumus mereri, ita nec possumus satisfacere. Tertiò requiritur vt persona applicans sit in gratia, si illum actum facit vel applicat in propria persona. Nam si sit in peccato mortali, nihil potest alteri applicare, cum sit inimicus Dei, & Deus peccatores non exaudiat. Dixi, *si applicet, & operetur in propria persona*: nam si operetur, & applicet in nomine personæ alienæ, v. g. in nomine Ecclesiæ, valebit applicatio etiamsi applicans sit in peccato mortali. Ratio est, quia malitia ministri non nocet operi boni actoris. Hinc fit vt Missa applicata à sacerdote existente in peccato m. profit defuncto purgatorij, cui applicatur. Tunc autem aliquis censetur orare nomine Ecclesiæ, quando preces, & orationes ab Ecclesia institutas recitat vt minister deputatus ad hoc ex præcepto, vel ex ordinatione. Si verò eas recitat non vt minister ab Ecclesia deputatus, non dicitur orare nomine Ecclesiæ Et ad exemplum de Missæ valore applicato animæ purgatorij per sacerdotem malum, addi potest exemplum Domini, qui est in gratia, & iubet eleemosynam dari pauperi per seruum existentem in peccato mortali; tunc enim fructu eleemosynæ, seu suffragij non fraudatur.

9 Ex parte verò ipsius, cui suffragium applicatur, aliqua etiam requiruntur. Primum est, vt ipse suffragio indigeat. Si enim non indigeat, vt anima iam beata, non illi prodest. Secundò requiritur vt ille cui applicatur suffragium, sit in gratia, nam si sit in mortali

Q ;

peccato

peccato, non illi prodest cum non sit membrum viuum Christi; sola autem membra viuia se adinuicem communicant. Aduertit tamen Bonacina *cit. loco puncto. 3. num. 6.* cum Suarez, Medina, & aliis, quod quando quis applicat suffragium alicui non indigenti, vel incapaci illius eo quod sit in peccato mortali, tunc talem satisfactionem redire ad vtilitatem ipsius applicantis iuxta Psalmum 34. *Oratio mea in sinum meum conuerteretur.* Ex dictis etiam constat suffragia non prodesse Beatis, quoad satisfactionem: posse tamen illis prodesse quoad gaudium accidentale, vt tenet Bonac. *cit. punct. 3. num. 8.* damnatis verò, & infantibus in limbo nullo modo prodesse possunt.

10 Adhuc in gratiam Religiosorum, dicam vnum verbum circa quandam communionem, vel communicationem bonorum sui Ordinis quas ipsi concedunt deuotis, & benefactoribus sui Ordinis. His enim dant patentes litteras sigillo munitas (vulgo *cartas de irmandade*) in quibus prælati dicunt se tales benefactores admittere ad communionem, & participationem omnium bonorum operum, quæ fiunt in sua prouincia, vel religione. Dubium enim est an tales prælati per illa verba applicent dictis benefactoribus satisfactiones suorum subditorum: an verò illis aliquid certum, & vtile applicent? Hoc dubium præ omnibus exactius tractat Suarez *tom. de pœnit. disp. 55. sect. 5. à num. 10.* ex iis autem quæ ibi fusiùs dicit, sequentia accipe. Primum est: non rectè, neque validè facere prælatos Religiosorum si insciis subditis eorum opera aliis applicant quoad satisfactiones: quia moraliter loquendo subditi, qui ignorant prælati intentionem, aliam diuersam habebunt, & illa erit quoad factum efficax: nam prælatus non habet potestatem directam in

in talem satisfactionem subditi, vt possit illam applicare infcio, & inuito subdito. Quamuis enim possit prælatus præcipere subdito vt faciat certum opus satisfactorium pro certa persona; si subditus non vult pro illo satisfacere, quamuis malè faciat, tamen reuera pro illo non satisfacit, quia valor moralis ad satisfaciendum pro aliquo pendet intrinsecè ex intentione ipsius operantis, eo nempe modo, quo in casu præcedente diximus applicationem intentionis Missæ non pendere ab applicatione prælati, sed ab intentione & applicatione ipsius operantis, seu sacerdotis celebrantis. Secundum quod dicit Suarez est, illam admissionem benefactorum ad participationem bonorum operum Ordinis, illis prodesse per modum cuiusdam meriti de congruo; quia hoc ipso quod aliquis est peculiari modo membrum, & socius huius Religionis, merita eiusdem Religionis valent apud Deum vt ratione illorum peculiari auxilio aliqua bona conferat personis illi coniunctis, etiam si ad hunc finem talia merita non referantur. Et præsertim habebunt hanc efficaciam si talis persona aliquid à Deo petat propter merita talis Religionis. Et eadem sect. §. num. 6. addit Suarez, non satis esse quod prælatus vnus conuentus sua intentione, & voluntate applicet pro benefactoribus, vel pro certo benefactore tantam satisfactionem, vel tale opus satisfactorium, quod ab aliquo subdito efficitur: sed necesse esse vt etiam subditus suâ voluntate illud offerat. Potest tamen prælatus licitè tale opus subdito præcipere, cum sit opus bonû, & illud possit subditus sine graui nocumento efficere. Quamuis si subditus opus non applicet pro intentione, non manebit applicatum ob supra dicta, quidquid sit de peccato inobedientiæ ipsius subditi.

CASVS XXIV.

*De quadam restitutione rei inuentæ
in manu latronis.*

Quidam latro fugiens ministros iustitiæ, confugit ad quandam Ecclesiam, quam fuit ingressus: quando ad illam fugiebat per viam, insequabantur aliqui homines clamantes illum esse latronem, & quod è certa domo furatus esset sacculum cum pecunia, & res alias, quarum aliquæ ceciderunt in platea per quam fugiebat. Ingressus Ecclesiam, secreto dedit sacculum pecuniæ cuidam clerico, vt illum secretè seruaret. Er statim iudex sæcularis superueniens facta cum Vicario Episcopi inquisitione de casu, illum ab Ecclesia eduxerunt, quia constitit illum non gaudere immunitate Ecclesiæ, & proinde deductus est ad publicum carcerem sæcularem: & iudex sæcularis cepit facere inquisitionem particularem de furto. Vir ille, à quo latro furatus est sacculum pecuniæ, licet noluerit illum accusare, & res aliquas ablatas recuperauerit, tamen de sacculo pecuniæ conqueritur, & nescit in cuius manu sit: latro detentus adhuc in carcere, & iam veniâ donatus à domino proximè dicto modo, id est, quia noluit accusare, petit inquam latro à clerico sacculum pecuniæ, quem sibi secretò tradidit, dicens sacculum esse suum. Pars autem opposita clamat sacculum sibi furto ablatum esse, sed non habet testes, nec probationes.

Quæsiuit clericus, cui tradere deberet prædictum sacculum pecuniæ, latronine, an prædicto viro de sacculo

sacculo sibi sublato conquerenti? Et quod restitui debeat ipsi latroni, videtur posse probari ex cap. *In literis tuis*, de restitutione spoliatorum, in fine, vbi Papa ponit hæc verba: *Quia præsumptum est secundum rigorem iuris restituendus.* Quæ verba nimis fauere videntur ad probandum quod prædictus sacculus restituendus sit latroni. Secundò, quia si clericus sacculum restituat domino conquerenti de furto, poterit se obiiicere periculo irregularitatis, videlicet, si pecunia multa sit, & sufficiens ad mortem, vel mutilationem membri inferendam latroni, accusante postea domino seculari. Tertiò facit pro hac parte id quod tradit Azor tom. 1. lib. 8. cap. 13. q. 2. & Valerus Cartuxanus lib. de differentiis vtriusque fori, vbi dicunt, quod si reus deposuit apud aliquem rem aliquam, timens ne sibi ob delictum bona confiscentur, quod delictum iam patrauit, & tamen postea idem reus, vel illius consanguineus, ante latam sententiam, existente adhuc reo in carcere petat rem ab illo depositario, tenetur depositarius non tradere, quamuis probabiliter timeat bona omnia prædicti rei fore proximè post per sententiam confiscanda. quod ibi probant argumento sufficienti. Qui casus est similis isti: nam ille latro tradidit pecuniam isti clerico tanquam depositario, & in secreto, neque adhuc lata est sententia iudicis super hac pecunia, neque clerico de certo constat illam esse illius de furto conquerentis: ergo videtur quod prædicto latroni sit sacculus dandus. Et declaro, quod duo illi autores, qui dicunt posse depositarium reddere reo cuius bona suspecta sunt de confiscatione, id intelligunt licere in foro conscientie, nam in foro externo dicunt posse postea fiscum à depositario exigere valorem rei quam tradidit reo de confiscatione suspecto.

Q 5

i Hoc

1 Hoc non obstante respondi prædictum clericum non debuisse, imò nec potuisse prædictum sacculum pecuniæ restituere latroni, adhuc in carcere detento. Probo, quia tres præsumptiones vehementes insurgunt contra istum latronem ad probandum, quod sacculus pecuniæ non sit suus. Prima est, quod dum fugiebat per plateas, cadebant ab illo res aliquæ, quas constituit esse furtivas. At delinquens in vno, præsumitur deliquisse in alio simili delicto annexo illi priori delicto. Et ista præsumptio magis confirmatur ex eo quod dominus sacculi insequabatur latronem fugientem clamans quod suum sacculum sibi rapuerit. Facit ad hoc quod tradit Mascard. *tom. 2. de probat. concl. 830. n. 13.* cum multis ibi citatis, qui dicunt esse magnam coniecturam ad probandum furtum, quando dominus rei subtractæ videns rem suam abesse statim conqueritur cum sociis, & ponit ibi Mascardus exemplum ad hoc satis accommodatum. Secunda coniectura siue præsumptio est quod latro intrans Ecclesiam dederit secreto sacculum pecuniæ ad custodiendum clerico. In hoc enim clarè ostendit suam non esse, & timuisse ne cum furto deprehenderetur. Tertia præsumptio est, quia latro, qui de ordinario est pauper, & ideo furatur ut necessitati suæ succurrat, non portat sacculum pecuniæ propriæ. Adhuc esse potest quarta coniectura contra latronem, fuga ipsius per plateas ad Ecclesiam: nam fuga; ut plurimum, est indicium patrati criminis contra fugientem, ut docet Mascardus *tom. 2. de probat. concl. 818. num. 1.* citans textus, & Doctores usque ad fastidium.

2 Ideo respondi prædictum clericum retinentem sacculum depositum, posse vocare ad se virum illum, qui de sacculo sublato conquestus est; & ab illo priùs interrogare

interrogare, quanta fuerit pecunia in sacculo contenta, cuius monetae, qualis pannus sacculi, & sic de cæteris circumstantiis: & constituto quod responsum viri conquesti consonat rei veritati, poterit illi sacculum tradere, cum protestatione tamen, imò & cum cautione data, quod si aliquando oppositum constiterit, reddet sacculum pecuniæ vero domino illius.

3 Ad primum argumentum oppositum, dicendum est, quod in capitulo citato cum Papa dicit latronem restituendum esse, loqui de iure civili, & in foro externo, quando latro vult probare in iudicio rem esse suam. Nos verò hîc loquimur de foro conscientiae, & de latrone, de quo sunt quatuor vehementes presumptiones quod sacculus iste non sit suus. Res autem non est restituenda illi, de quo dubitatur an sit dominus verus illius. Ad secundum dicendum, non dari periculum irregularitatis in clerico, si sacculum restituat domino conquerenti de furto cum illa cautela, & moderamine assignatis *num. 2.* quamvis enim inde sequeretur accusatio, mors, vel mutilatio latronis, clericus restituens rem domino suo, nullo modo ad illa duo concurrat.

Ad tertium dico, dico exemplum adductum à citatis ibi Doctoribus, diuersum nimis esse ab isto nostro casu. Nam ille homo, qui delatus est de crimine, ob quod timetur quod bona illius sunt confiscanda, habet verum dominium suarum rerum ante latam sententiam condemnatoriam criminis, vt citati Doctores dicunt, & alij Doctores affirmant. Et ideo licitum est illi reo in foro conscientiae suum pignus reddere, cum adhuc ante sententiam dominium illius retineat. At in nostro casu latro, de quo agimus, non constat quod habeat dominium istius sacculi, imò sunt quatuor vehementes

vehementes præsumptiones quod sacculus non sit suus; & proinde illi non est restituendus cum tali dubio: quia ultra scrupulum conscientiæ, obiiceret se clericus periculo restituendi valorem sacculi vero domino comparenti.

CASVS XXV.

*An Minorita possit facere eleemosynam
absque licentia expressa prælati.*

Quidam Religiosus Ordinis Minorum ieiunat bis vel ter in hebdomada in pane, & aqua. Quæsiuit an suam pitantiam carnis, vel piscis, quæ sibi apponitur, possit dare cuidam pauperi in eleemosynam singulis diebus propter Deum, præsumens quod prælatus id sibi non impediet: & an possit hoc facere quoad usque sibi non constiterit de expressa prohibitione prælati?

Secundò, an licitè prælatus possit illam charitatem & eleemosynam impedire, eo quod velit, ut illa pitantia carnis & piscis detur potius familiaribus, & seruatoribus Conuentus?

Tertiò an peccabit Religiosus, qui de hoc prælatum certiores fecerit, incitans illum ad prædictam eleemosynam impediendam?

Responsio.

1 Ad primum dico multos, & graues Doctores asserere, posse Religiosum subditum dare eleemosynam cum sola licentia tacita sui prælati. Hos Doctores citat

citatur Sanchez lib. 7. Decalogi cap. 19. n. 3. Sed ut prædicta licentia tacita sufficiat, requirunt prædicti Doctores sequentes conditiones. Prima, quod iste donans eleemosynam, (idem dic de Religioso donante aliquid non intuitu eleemosynæ) habeat certitudinem moralem, quod si prælatus id sciret, illi daret licentiam liberè, & voluntariè. Dixi, *Voluntariè*, quia si scit, prælatum quidem daturum licentiam, sed non voluntariè, sed intuitum illam daturum, & cum tædio; tunc talis licentia præsumptæ in rigore non est licentia, sed est consensus intuitus, qui in rigore non est licentia voluntaria. Secunda conditio, siue limitatio ponitur à Sanchez citato loco, citans, & sequens Rodriguez tom. 2. sum. c. 3. num. 7. & Ludouicum Lopez, dicentes hoc non intelligi in Religionibus strictioribus, in quibus datur præceptum obedientiæ, ne aliquis subditus aliquid recipiat, vel donet sine expressa licentia prælati. Nam in talibus Religionibus non poterit subditus aliquid donare sine expressa licentia prælati. Addit Sanchez cit. loco num. 7. citans, & sequens Lessium, quod ista licentia sufficiet quando prælatus absens non potest adiri. Si enim facile sit adire prælatum, non sufficiet ista licentia tacita. In quo citati Doctores innuunt, quod saltem in materia notabili, & quæ durare debet per multum tempus, & prælato existente præsentem, sicut contingit in hoc casu, est necessaria expressa licentia prælati. Et præter hoc solum ratione prudentiæ humanæ debuit hic Religiosus petere expressam licentiam à prælato: nam cum ista eleemosyna danda sit ter in hebdomada, impossibile est, moraliter loquendo, quin prælatus id sciat, & fortè alij Religiosi scandalizentur, ob factum notabile sine licentia prælati. Denique huic Religioso, qui vult sic rigorosè

rigorosè ieiunare, sed dare superflua suæ pœnitentiæ pauperibus, adducendum est in memoriam illud Isai, cap. 58. *Ieiunauimus, & non aspexisti: ecce in die ieiunij vestri inuenitur voluntas vestra.* Sic iste, de quo loquimur, in die ieiunij sui facit voluntatem suam, dans eleemosynam sine licentia prælati, propter quæ, cum materia sit grauis, & durans per longum tempus, consulo vt petat à prælato licentiam, siquidem ille præsens est.

2 Ad secundum quæsitum dico, quod prælatus sciens de tali eleemosyna, & illam impediens, nec peccabit venialiter: vtitur enim iure suo, & est dominus voluntatis subditi in actibus externis ratione voti obedientiæ. Nemo autem vtens iure suo peccat. Si verò aliquis dicat, quod illa pitantia carnis, & piscis quam dat pauperibus, non est furto ablata, cum ipse posset illam comedere, sed ab illa abstinet. Respondeo, quod saltem post prohibitionem prælati, talis eleemosyna sic donata est res furto ablata. Nam subditus maximè Franciscanus, non habet dominium in illis, quæ sibi supersunt ex cibo, & vestitu. In his enim non habet dominium, sed solum nudum vsum, vt docet Lessius *lib. 2. cap. 4. n. 38 §. Quinò non potest*, citans ad hoc Nicolaum in expositione regulæ nostræ. Idem tenet Ludouicus de Beia in *suis respons. moralibus 4. p. casu 16. §. Respondemus falsum esse.* Et præter rationes ab his Doctoribus adductas probatur id ex praxi omnium ferè Religionum, maximè Franciscanæ: nam in illis postquam Religiosi refectionem sumunt in refectorio, officialis Conuentus, vel seruitores colligunt illa fragmenta totius cibi, quæ superauerunt, & reponuntur in communitatem; quod clarum signum est quod Religiosi non habent dominium illorum residuorum.

fiduorum. Idem seruatur in vestibus Religiosorum, quas officialis Conuentus petit, & colligit à Religioso (maximè in nostro Ordine) quando Conuentus dat Religioso vestes nouas: quod clarum indicium est, in his residuis non habere Religiosum dominium, & proinde illa non posse donare absque licentia expressa prælari, vel absque licentia tacita illius, cum conditionibus suprâ explicatis.

3 Ad tertium dico, nullum peccatû commissurû subditum, qui prælaturum admonuerit de tali eleemosyna, vel illi suaserit vt illam impediat. Nam ipsi Religioso non facit iniuriam, cùm res sit publica, vt suppono, & sit actus contra votum paupertatis, vt constat. Neque item facit iniuriam pauperibus, quia illi nullum ius habent, vt de talibus superfluis Religiosus sibi faciat eleemosynam.

4 Occasione prædictorum volui hîc apponere casum consolatorium ferè pendentem à præcedente, qui est talis. Furatus est Religiosus à communitate, verbi gratia, decem ducatos. Quæritur an hos possit restituere eidem communitati non sumendo cibos, qui sibi apponuntur ex consuetudinè: non acceptando habitum, vel tunicam datam à Conuentu, & sic de aliis donec per res illas repudiatas satisfaciât id quod abstulit à communitate? Et videtur omnino quod non possit sic restituere. Nam ego non possum restituere dando quod non est meum, vt patet, sed illa residua quæ Religiosus renunciat, vt vestes, cibos, &c. non sunt Religiosi, neque in illis habet dominium, vt proximè diximus; ergo non potest Religiosus satisfacere, seu restituere Religioni dando Religioni, id quod est Religionis. Et apud me hoc argumentum videtur insolubile. Nihilominus Nauarrus *consil. 75. de regular.*

regular. & conf. 3. de stat. Monachorum, & Rodriguez addit. ad sum. tom. 2. cap. 118. concl. 30. & Sanchez lib. 3. Decalogi cap. 19. num. 112. cum aliis ibi citatis, dicunt prædictum Religiosum sic posse restituere Religioni quod ab illa furatus est, non accipiendo vestes suo tempore datas à communitate, vel cibos. Ratio horum Doctorum est, quia licet Religiosus teneatur reddere comunitati omnia, quæ ex vestibus, cibis, & aliis ei datis superfuerint; id intelligi debet quoad effectum non distribuendi ea in alios vsus, vel non dandi aliis: non tamen quoad effectum vt ea detrahere sibi nequeat in vtilitatem monasterij, pro suæ conscientiae exoneratione. Sic Sanchez citato num. 112. imo ibi addit ex Molina tom. 1. de iust. disp. 140. col. 11. vers. potius distinguerem, vbi Molina dicit Monachum furantem ab extraneo teneri restituere ex eo quod habet ex licentia prælati suæ liberę dispositioni relictum, sunt autem prædicti Doctores grauissimi, & valde pij, vt secure illorum dictis quis stare possit.

CASVS¹¹⁰¹¹ XXVI.

De subrogatione cuiusdam officij.

DOminus Papa Gregorius XV. pro ordine Minorum particulari Bullâ decreuit circa illius Regimen in officiis, & electionibus, in hunc modum: *Insuper fratres, qui officio ministri Prouincialis, Custodis, ac etiam Diffinitoris functi sunt, nullo modo possint reeligigi nisi sexennio transacto. Ab opposito in eodem Ordine extat statutum generale decernens: Quod si vacauerit aliquis diffinitor per mortem, vel alia quauis alia de causa,*

causa, eius loco subrogetur, & pro subrogato habeatur ipso facto, qui olim fuit diffinitor antiquior. Hocposito, in eodem Ordine vacauit officium cuiusdam Diffinitoris per renunciationem, & Diffinitor antiquior qui illi per statutum subrogandus erat, non desierat esse Diffinitor per sex annos, sed per solos tres vel quatuor annos.

Quæritur an talis Diffinitor antiquus subrogari possit in illum locum Diffinitoris. An vero ab hac subrogatione excludendus sit eo quod ipse in officio Diffinitoris antiqui non vacauit per sex annos, sed per tres vel quatuor tantum. Decretum verò illud Pontificium iubet ut eligendus in Diffinitorem vacet prius per sex annos.

Et pro parte negatiua, quod talis non possit subrogari ante sexennium vacationis, potest afferri capitulum *Ecclesia, ut lite pendente*, vbi dicitur quod subrogatus sapit naturam sui principalis cui subrogatur. Idem dicitur in l. *Si donata* §. 1. ff. de donat. inter vir. & vxor. & Abbas, & alij tradunt ad citat. cap. *Ecclesia*. Sed Diffinitor iuxta decretum Papæ non potest reeligi nisi post sexennium vacationis: ergo Diffinitor illi subrogandus debet pari modo vacare per sexennium in suo antiquo officio Diffinitoris, quia subrogatus sapit naturam sui principalis, cui subrogatur. Secundò, quia *de equipollentibus idem est iudicium*. l. fin. ff. *Mandar.* & vbi est eadem ratio, est etiam eadem iuris dispositio, cap. *Dudum* O 2. de elect. At esse subrogatum Diffinitori, & esse Diffinitorem, sunt idem omnino: ergo erit idem de utroque iudicium, ut scilicet quemadmodum Diffinitor non potest reeligi nisi post sexennium, ita Diffinitor non possit subrogari nisi post sexennium transactum, in sua vacatione.

I Hoc non obstante , cenſeo prædictum patrem, de quo agitur, poſſe ſubrogari in Diffinitorem , etiamſi non tranſierint ſex anni, ex quo deſit eſſe Diffinitor. Ante probationem præmitto, & ſuppono quod decretum illud D. Papæ Gregorij X V. eſt lex pœnalis , & odioſa. Ponitur enim ibi pœna excommunicationis prælatis oppoſitum permittentibus ; & irritantur actus facti in oppoſitum, & apponitur pœna priuationis officiorum. Quo poſito probo conſuſionem poſitam primò , quia verba legis ſunt accipienda ſignificatione propria , & uſitata , per multos textus vtriuſque iuris , quos ad hoc citat gloſſa in cap. *ex litteris*, de ſponſal. in verbo *Propoſuit*. Et ratio idem dicat : nam ſi velimus legem interpretari extra id quod verba ſignificant in ſignificatione propria , & communi , aſſignabimus legi multos ſenſus alienos à mente ipſius, quod eſt abſurdum. At hoc decretum Papæ clarè loquitur de electionibus ; & verbis claris , ait *non poſſe reeligi* ; & electio ſolum fit ſuffragia dando in capitulo : ergo iſta prohibitio de diffinitore non reeligendo niſi tranſacto ſexennio , ſolum eſt intelligenda quando Diffinitor eligitur in capitulo per ſuffragia : & non debet intelligi de ſubrogatione Diffinitoris, quæ fit extra capitulum abſque electione , & abſque ſuffragiis : quæ ſubrogatio neque eſt electio , vt clarius patebit ex ſolutione ſecundi argumenti adducti pro parte negatiua. Secundò probatur , quia hoc decretum Papæ eſt lex pœnalis , vt vidimus. At lex pœnalis debet reſtringi , non verò extendi , iuxta regulam in 6. *odia reſtringi* , &c. & iuxta cap. *pœna*, cùm ibi concordatis, de *pœnitentia*, diſt. 1. ergo prædictum decretum odioſum , & pœnale eſt reſtringendum vt ſolùm intelligatur in materia , de qua loquitur , quando

Diffinitor

Diffinitor eligitur in capitulo per suffragia, & per veram electionem: non verò ut loquatur de subrogatione, quæ neque est electio, neque reelectio. Et quamvis aliqui Doctores dicant legem pœnalem posse extendi de vno casu ad alium, in quo datur eadem omnino ratio, ut cum aliis citatis tenet Sanchez *lib. 3. de matrim. disp. 42. num. 4.* Hoc tamen intelligitur primò iuxta Sanchez ibidem, quando in secundo casu inuenitur eadem ratio expressa in lege prioris casus: & Papa in hoc decreto nullam exprimit causam in particulari suæ prohibitionis: sed solùm in communi dicit se id prohibere propter multa inconuenientia. Quæ tamen inconuenientia non inueniri in subrogatione Diffinitoris, probabimus in solutione argumenti secundi.

2. Tertiò principaliter probatur conclusio, quia lex non datur de rarò contingentibus, sed de illis quæ communiter accidunt; sic tenet Sanchez *lib. 6. Decalogi cap. 8. num. 51.* citans legem, *nam ad ea, ff. de legib.* verba Sanchez sunt hæc: *Ad ea quæ rara sunt, leges adaptari non solent.* At subrogari aliquem in diffinitorem rarò, & rarissimè contingit: videlicet per solam mortem, vel renunciationem: ergo hoc decretum Papæ loquens de electione non debet adaptari ad subrogationem. Quartò probatur, quia per subrogationem istam non impeditur finis intentus à Papæ in illo decreto. Ibi enim clarus finis Papæ, est, ne Religiosi perpetuentur in officiis, & non detur occasio subornandi, & ambiendi honores. At quando quis subrogatur in diffinitorem, non datur occasio perpetuitatis in officio, quia aliquando subrogatur pro sex mensibus ante capitulum, aliquando pro vno tantùm anno. Si verò idem diffinitor subrogatus, subrogetur pro duobus

annis, dictum statutum generale decernit ne possit reeligí in diffinitorem in capitulo sequenti, & sic obuiatur perpetuitati officiorum. Præterea in ista subrogatione non datur occasio subornationis, neque ambitionis. Cum enim non fiat electio libera, sed assumatur designatè is qui fuit antiquior in officio diffinitoris, cessat omnis occasio ambitionis, & subornationis. Et denique pro maiori confirmatione prædictorum videatur Suarez *tom. de legibus lib. 6. cap. 2. maxime num. 6. & 7. & cap. 3. num. 16. ubi probat quod lex pœnalis non sit extendenda ultra proprietatem verborum ipsius legis.*

3 Ad primum argumentum in oppositum adductum, concedo quod subrogatum sapit naturam sui principalis, cui subrogatur, in hoc sensu, quod scilicet postquam est subrogatum, habet qualitates, præeminentias, & iura sui principalis: sic explicat glossa in cap. *Ecclesia S. Maria, ut lite pendente*, verbo *successerunt*, in quo capitulo sermo est de subrogatione. Non verò requiritur quod res subrogata eodem modo creetur, & promoueatur, quo fuit creata, seu promota res, vel persona, cui subrogatur. Potest poni exemplum. Quando moritur Episcopus, loco illius in regimine subrogatur capitulum sede vacante, quod habet ferè totam iurisdictionem, quam habebat Episcopus. Non tamen requiritur, quod sicut Episcopus fuit creatus per præsentationem Regis, vel per electionem Canonorum; ita Capitulum subrogatum, debeat subrogari per aliam electionem, vel præsentationem Regis: & alia exempla poterunt applicari.

4 Ad secundum argumentum, dico quod reeligere in diffinitorem, de quo loquitur Papa in hoc decreto subrogare, de quo loquitur statutum, neque sunt

sunt æquipollentia, neque in illis est eadem ratio: valde enim differt electio, & subrogatio, & diuersa valde est in utroque ratio. Primò, quia electio fit per suffragia libera multorum in capitulo: subrogatio verò fit absque suffragiis. neque fit liberè, sed per designationem statuti, cogit enim statutum assumere illum, qui est antiquior in officio Diffinitoris. Secundò, in re-electione datur occasio subornationis, quæ non datur in subrogatione. Tertiò, quia in electione libera datur occasio vt perpetuentur officia per sollicitationem factam à prætensoribus. In subrogatione verò non datur talis occasio perpetuandi se in officiis, sicut dixi in quarto argumento. Intelligo verò quod in electionibus dentur illæ occasiones indirectè, & vt ita dicam obiectiue, quia aliqui exinde occasionem illam sumant, non quod electio ex se mala sit, vel illas occasiones ex se præbeat.

CASVS XXVII.

*De quadam professione Religiosi dubia,
vel nulla.*

IN quodam conuentu Patrum Carthusianorum recepit habitum Nouitij quidam adolescens viginti trium annorum: ante cuius ingressum non sunt factæ informationes præceptæ à Sixto V. in forma ab illo præscripta: quamnis interrogati fuerint de moribus, & vita illius, Religiosi duarum Religionum, in quibus antea commoratus fuerat, & quidam Medicus, qui illum de quodam morbo curauerat; quæ tamen omnia inquisita fuerunt absque forma iuridica, verbo

renus, sine scriptura. Et dicunt Religiosi istius Ordinis quod fecerunt dictam informationem iuxta Bullam Gregorij XIV. postea ante professionem procurator Conuentus de mandato prælati fecit informationem in quadam vrbe iuxta Conuentum Carthusiæ, ex qua vrbe Nouitius non erat oriundus. Pro informatione recepit tres testes, quorum primus obrulit se ad testificandum, & dixit se non cognoscere Nouitium antequam habitum susciperet, neque patrem Nouitij, neque eius proauos. Afferuit tamen se nescire quod dictus Nouitius haberet aliquod impedimentum ad profitendum in Ordine. Recepti sunt alij duo testes, quorum vnus dixit se agnoscere parentes Nouitij, Nouitium tamen non cognouisse nisi per quatuor menses antequam intraret Carthusiam. Tertius testis idem dixit, se cum Nouitio nunquam communicasse. Erat iste Nouitius natus, & nutritus in quodam oppido notabili inde distante per quindecim leucas, in quo non fuit facta vlla informatio. In hoc oppido Nouitius quatuor menses ante ingressum Carthusiæ delictum graue cōmiserat, propter quod iudex sæcularis pronuntiauit sententiam vt vbicumque inueniretur, caperetur, & carceri manciparetur: duo enim graua delicta commiserat, vt constitit ex processu iudicis sæcularis. Et nulla alia informatio de dicto Nouitio recepta est: & hanc approbauerunt Religiosi dicti Conuentus.

Solet in hac Religione Nouitius ante professionem interrogari à prælato, an alicui debeat pecunias, vel aliquid temporale: vel alicui restitutioni sit obnoxius. Interrogat item prælatus iuxta aliud illius Religionis statutum, an Nouitius habeat aliquod impedimentum corporale, vel spirituale perpetuum, propter quod

quod incapax sit ad sacros Ordines recipiendos, vel in eisdem ministrare prohibeatur : aliàs nullatenus ad habitum , vel professionem admittatur. Et est praxis Religionis , quod aliàs professus contra verba istius statuti facit professionem inualidam , & nullam.

Quæritur primò , an prædicta informatio facta à Religiosis ante receptionem habitus in forma assignata , & suprà relata , fuerit bona , & valida : supposito quod testes informationis nihil dixerunt sub iuramento , asserentes se scire quod Nouitius careret impedimento : sed solum iurarunt se nescire an aliquod haberet impedimentum , maximè cum nunquam fuerint conuersati cum Nouitio , neque essent eiusdem patriæ. Et supposito quod dicta informatio fuerit nulla , an prædicti Religiosi incurrerint pœnas impositas à Sixto V. contra Religiosos accipientes ad professionem non seruata forma suæ constitutionis ?

2. Quæritur , an , supposito quod prædictas pœnas non incurrerint , dicta professio fuerit nulla ob causas sequentes. Prima, quia admissa fuerit professio à prælato excommunicato ob non seruatam formam constitutionis Sixti V. Secunda , eo quod Nouitius negauerit se aliquid alicui debere , vel habere aliquod impedimentum , maximè cum illi facta fuerit protestatio , quod si aliquo tempore de opposito constaret , ab ordine foret expellendus. Tertia , propter crimen ante professionem , vel receptionē ad habitum commissum , quod fuit hominem quendam gladio percutere , & in alterum archebussium explodere , licet non percuteretur. Quarta est ratio infamiæ , quâ publicè diffamatus erat ob delicta , cum infamis arceatur ab Ordinibus

commune non annullet professionem hanc ob defectum informationum, sequitur quod ex hoc capite professio hæc non erit inualida.

3. Secundò in particulari, ad id quod tangitur in primo quæsito, an scilicet professio nulla fuerit ex eo quod admissa fuerit à prælato excommunicatio ob non seruatum formam præscriptam à Sixto V. Dico primò professionem ex hoc capite non fuisse nullam, licet prælatus illam admittens esset excommunicatus. Nam professio facta à proficiente excommunicato, & admissa à prælato excommunicato valida est. Probat hoc fusè, ac doctè Sanchez *lib. 5. Decalogi cap. 4. num. 36.* vbi multa ad hoc adducit, maxime, quia professio est quidam contractus inter proficentem, & Religionem: at contractus factus ab excommunicato validus est. Secundò, quia dato, quod prælatus esset excommunicatus (de quo statim) non tamen erat declaratus, sed toleratus. At nos possumus communicare etiam in diuinis cum excommunicato non declarato nominatim, vt tenet communis opinio ex declaratione Martini V. Addo similiter quod licet dictus prælatus esset inhabilis ad officia, per dictam Bullam Sixti V. adhuc ex hac parte professio non esset inualida, quia inhabilitas posita in aliqua Bulla non sortitur effectum in foro externo, nisi post sententiam iudicis declaratoriam, vt ego censui in 2. *tomo dubiorum Regularium, verbo inhabilitas, à num. 3.* cum Sanchez, Nauarro, Soto, Ledesma citatis ibi locis. Iste verò prælatus non erat declaratus inhabilis per sententiam iudicis.

4. Tota dubitatio est, an iste prælatus incurreret excommunicationem ob diminutam illam, & im-

R 5 perfectam

perfectam informationem, quam fecit? Et videtur id valde probari: nam Sixtus V. in sua prima Bulla §. *Ceterum quoniam*, mandabat ut prælatus ad professionem nullum admitteret, nisi prius factâ diligenti, & accuratâ inquisitione de moribus, & vita Nouitij, de parentibus ipsius, de patria: & quod exploratum sit eum non habere aliquod ex impedimentis ibi dictis. In informatione verò supradicta pro hoc Nouitio hoc magna ex parte defuit, cum testes, illius parentes, & anteaactam vitam ignorarent. At proinde non seruata forma Bullæ videtur incurrisse pœnas illius, quæ hodie non sunt sublata per Greg. X I V. quoad prælatos non seruantes formam prædictæ constitutionis, ut suprà vidimus.

§ Hoc tamen non obstante, inclinans in partem mitiorem cenfeo dictum prælatum non incurrisse excommunicationem. Moueor, quia Rodriguez *tom. 3. qq. 9. § 4. art. 4.* tenet, quod prælatus qui non seruât formâ Sixti V. recepit aliquem Nouitium, qui à parte rei non erat criminosus, ex illis numeratis à Sixto V. quales sunt homicidæ, fures, & similes, non incurrit excommunicationem. Nouitius verò iste non fuit de criminosis Sixti V. Nam licet antea fuerit percussor, & gladio vulnerans, & archebustum in alium exploderet, etiam ad illum deprædandum (ut dictum fuit ab aliquibus.) Hæc delicta non sunt homicidia, neque furta, maximè cum archebustum non habuerit effectum, neque furtum inde intentatum; ac proinde cum non fuerit ex criminosis Sixti V. non videtur incurrisse excommunicationem prælatus illum admittens ad professionem. Addo, quod Sixtus V. ibi non communicat nisi prælatos admittentes ad professionem illegitimos, & incestuosos: illos verò prælatos, qui

qui receperint alios criminosos, non excommunicat, sed priuat officiis habitis, & inhabilitat ad officia futura. Hic verò Nouitius neque erat illegitimus, neque incestuosus. Quod verò attinet ad priuationem officij, nondum erat priuatus per sententiam, & proinde quoad hoc seruandum est idem omnino, quod suprà num. 3. diximus de incurſu, & declaratione pœnæ inhabilitatis.

6 Quod attinet ad debita Nouitij, dico quod licet ius commune prohibeat ne fiat Monachus ille, qui est obnoxius debitis, nihilominus si secus fiat, non annullat professionem factam; de quo sufficiat videre Sanchez lib. 4. *Decalogi*, cap. 19. n. 2. id fusiùs disputantem. Multa enim fieri prohibentur, quæ tamen facta valent, vt tenet commune dictum Iuristarum. Quid si iste Nouitius, de quo agitur, ob sua delicta suprà relata ante ingressum religionis confugeret ad Ecclesiam ob pronunciatam iudicis sæcularis sententiam carcerationis ipsius; possetne iudex sæcularis illum ab Ecclesia extrahere virtute Bullæ Sixti V. id in tali casu concedentis tali iudici? Respondeo non posse, si aliàs talis delinquens gaudebat immunitate Ecclesiæ. Nam ius commune ad quod redacta est Bulla Sixti, non permittit extrahi talem ab Ecclesia si aliàs gaudet immunitate illius.

7 Quod attinet ad ad aliam causam nullitatis citatam, quia scilicet negauit coram prælato delicta, & debita, & impedimenta, cum protestatione sibi facta. Respondeo posse hodie Religionem, si voluerit, illum ea de causa expellere ab Ordine. Nam virtualiter defuit consensus ex parte Ordinis recipientis, qui noluit talem recipere nisi sub illa conditione, si caret tali, ac tali defectu. Probatur clarè, quia professio

est

est quidam contractus, vt suprà diximus. Contractus verò factus sub conditione, si conditio non seruetur, corrui omnino, vt tenet communis opinio, pro quo videatur Nauarro *consilio 5. de Regularibus num. 11.* & Rodriguez *tom. 3. qq. 9. 17. art. 9.* & licet Nauarr. citato loco dicat, non posse aliquam Religionem facere statutum per quod annulletur professio, si talis professio à iure communi non annullatur. Melius tamen Suarez *tomo 4. de Relig. lib. 2. cap. 2. num. 2.* tenet, quod potest id facere Religio annullando professionem per statutum, quando ius commune oppositum posituè, & expressè non prohibet. Potest ergo Religio expellere hunc professum eo quod negauerit contentum in suo statuto, si tale statutum non sit contrarium posituè iuri communi, & dictum statutum annullat professionem. Et licet statutum professionem non annullat, poterunt adhuc expellere ob defectum consensus ex parte Religionis, quæ non consensit in professione illius, nisi sub illa conditione sibi antea proposita, & declarata. De quo sufficiat videre Rodriguez *tom. 3. qq. 9. 11. art. 2. paulo post initium*, vers. *verum tamen est.* Hoc idem respondendum est, ad aliud statutum illius Religionis, decernens ne recipiatur ad Religionem habens aliquod impedimentum perpetuum, propter quod non possit sacris Ordinibus initiari, sed tamen circa hoc impedimentum sacrorum Ordinum recipiendorum, noto quod ille irregularitatem non incurrit. Nam per vulnera alicui inflicta, vt de illo dicitur, non incurrit irregularitatem, cum per id non fuerit homicida, nec membrum absciderit, nec per explosionem archebasij, effectu non securo.

8 Et ex hoc satis respondetur ad id quod quæritur de Ordine sacro Subdiaconatus post professionem: dicendum est enim quod characterem Ordinis recepit infallibiliter, ut paulo post clarius constabit: imò & dicendum, quod recepit etiam executionem prædicti Ordinis sacri, cum illum non receperit existens in irregularitate, tum ob proximè dicta, tum ob id quod proximè dico in responsione sequenti.

9 Ad id quod dicitur illum recepisse Ordinem sacrum dum existeret in infamia diffamatus apud sæculares ob delicta apud illos commissa, & quod infamatus arceatur ab Ordinibus sacris. Respondetur infamiam facti, qualis fuit ista, (non iuris) arcere sic infamem à sacris Ordinibus, quamdiu non emendatur; si verò emendetur, cessat talis infamia sine alia habilitatione. Ita docet Bonacina *rom. 1. disp. 7. de irregularitate q. 3. punct. 2. num. 5. & seqq.* pro quo citat cap. *Infames* 6. q. 1. pro quo citat Suarez, Azor. & Nauar. At iste Nouitius, licet ante nouitiatum ob citata delicta fuerit infamis apud sæculares, tamen post susceptionem habitus regularis emendauit vitam, ut pater; ergo cessauit illius infamia, per quam ab ordine sacro arcebatur. Secundò dico, quod prædicta infamia præcedens professionem, ablata fuit, & purgata per professionem. Ita Sanchez *lib. 5. Decalogi cap. 5. num. 22. & 28.* In quo capite recenset priuilegia professionis Religiosæ, maxime n. 27. ubi dicit vnum priuilegium ipsius esse, ut maculam quoad actus temporales expiet. Vnde ait, quod qui ante professionem in sæculo fuerat damnatus per iurij, vel furti, per professionem redditur aptus ad testimonium ferendum. Pro quo citat vnam glossam, & tres Doctores

Doctores Iuristas. Magis verò infamat furtum, & per-
iurium, quàm delicta de isto Nouitio narrata ante
habitus susceptionem.

10 Ad vltimum de Episcopo protestante in collatio-
ne Ordinum, dico, quod licet Episcopus in collatio-
ne Ordinum antea protestetur se non intendere ordi-
nare aliquem ligatum aliquo impedimento ex illis
quæ ibi ille recenser, eo non obstante validi sunt Or-
dines, quos ibi vnicuique confert. Sic ille in Ordi-
natione istius particularis non facit illam protestatio-
nem particularem, dicens apud se quod huic, si impe-
ditus est, non vult Ordines conferre: quod si apud
se hoc non dicat in ordinatione istius particularis, ma-
net verè ordinatus etiam si habeat impedimentum se-
cretum, non obstante illa generali protestatione. Sic
in terminis tenet Henriquez *tom. 2. lib. 14. de irregulari-
tate cap. 6. num. 5.* & citat in glossa littera T, multos Do-
ctores, & in textu assignat rationem, & tradit vnum
exemplum facti, quæ ibi videri poterunt. Addo quod
iste Religiosus sic ordinatus non habebat impedimen-
tum canonicum quo impediretur ab Ordine sacro re-
cipiendo ob delicta suprà numerata ante professionem
commissa, neque ob infamiam propter illa contra-
ctam, vt in præcedentibus satis diximus.

11 Adhuc pro maiori explicatione dico præsentem
Nouitium per illa vulnera, quæ intulit in rixa alteri
homini, non mansisse inhabilem ad professionem.
Probo, quia professio homicidæ hodie valida est:
quamuis enim ex vi Bullæ Sixti V. esset irrita, cum ta-
men illa Bulla redacta sit ad terminos iuris communis,
vt vidimus, ius commune non annullat professionem
factam ab homicida, imò in cap. *Admonere*, Papa
Stephanus consulit cuidam homicidæ vt fiat Mona-
chus

chus pro salute animæ suæ, & non fuit illud dispensatio, sed admonitio. Et de aliis viris sanctis narrant historiæ quod post homicidia intrarunt Religionem. Si verò homicida non prohibetur esse Religiosus, minus prohibeatur iste, de quo loquimur, ob sola vulnera alteri in rixa inflicta.

CASVS XXVIII.

*De quodam Religioso tentante propinare
venenum suo Prælato, & de Aduocato
seculari illum excusante.*

CAsum istum qui verè contigit, volui hîc apponere, præcipuè vt notum sit omnibus quàm parum sciant Aduocati sæculares in causis Religiosorum, quorum priuilegia, & statuta ignorant, & volunt eas metiri per apices iuris ciuilis.

Casus talis fuit. In quodam conuentu quidam Religiosus inensus suo prælato locali, intentauit illi propinare venenum. Tria contra illum indicia probata sunt. Primum, quia vna die obtulit officiali coquinæ certos pulueres papyro obuolutos, petens vt illos iniiceret in scutella iuris, quam missurus erat dicto prælato: quod dictus officialis facere recusauit, sed tamen sub iuramento firmavit. Secundum indicium fuit, quod alterâ die ingressus refectorium extra communis accessit ad locum vbi prælatus localis sedere solebat ad manducandum, & ibi visus est stans iuxta poculum in quo iam iniectum erat vinum bibendum à prælato locali. Paulò post officialis refectorij accessit

fit ad poculum vidit vinum valdè turbidum. Erat tunc in conuentu medicus conuentus, fuit illi ostensum poculum quasi iam continens massam liquidam. Affirmavit medicus illud fuisse venenum: & hoc iudicium medici fuit tertium iudicium approbandum hoc delictum. Præter hæc probata sunt alia indicia, quæ licet essent minora, iuncta tamen illis tribus valde iuuabant ad faciendam probationem violentam, contra dictum Religiosum. Et quod attinet in particulari de illo iudicio, quod viderint illum extra communitatem stantem solum circa poculum prælati, & paulò post inuenti sint illi pulueres in poculo, iuuat nimis ad probationem talis iudicij, id quod decernit lex istius Regni *lib. 5. Ord. tit. 135.* vbi dicitur quod si quis de nocte clamet in platea, dicens, Fullanus me percutit, vel occidit; & aliquis ex ianua desuper aspiciens videat ibi stantem illum Fullanum, de quo percussus conqueritur, licet illum non videat percutientem, decernit lex quod delictum censeatur plenè probatum contra talem stantem. Hic autem Religiosus visus est stans circa poculum, paulò antequam inuenti essent pulueres in poculo, quos pulueres ille antè obrulerat officiali coquinæ, vt iniiceret in scutellam iuris sumendam à prælato.

1 Admonuit prælatus localis Prouincialem, qui accedens ad conuentum in forma visitationis, seu inquisitionis, auditis omnibus Religiosis facto processu iuridico, inuenit probari illa supradicta indicia cum aliis iudiciis coadiuantibus per quæ resultauit contra reum satis violenta probatio. Viso processu in diffinitorio, & audito reo, attento etiam quod esset crimen difficilis probationis requirens minorem probationem, condemnatus est reus ad vnum annum carceris

cum

cum aliquibus minoribus pœnitentiis. Appellauit reus ad D. Collectorem. Exhibitus processus factus à Prouinciali, & tradito processu cuidam Aduocato sæculari, qui pro reo aduocabat. Dictus Aduocatus (Deus bone!) multa impertinentia, indecentia, imò & falsa scripsit ad impugnandum dictum processum factum à Prouinciali. Ponam hîc præcipuas illius impugnationes illius, quibus impugnauit processum, dicens in illo contineri nullitates, & iniustitias. Et quoniam præcipua illius intentio est ostendere in dicto processu non fuisse seruatos apices iuris, pono hîc prius concessionem Bonifacij VIII. per quam fratribus Minoribus concessit, vt in suis iudiciis & processibus non teneantur seruare apices iuris. Habetur Bulla in lib. Monumenta Ordinum fol. 125. & post medium Bullæ, sic Papa concedit.

*Nos piis vestris supplicationibus inclinati, vobis
authoritate Apostolica indulgemus, vt ad corre-
ctiones, & punitiones fratrum eiusdem Ordinis de-
linquentium infligendas prelati Ordinis supradic-
ti (ad quos eadem spectare noscuntur) in iure,
& apicibus eius postpositis liberè procedere valeant
secundum consuetudines approbatas, & generalia
facta, vel facienda ipsius Ordinis instituta. Neque
volumus eisdem licere fratribus ab eisdem corre-
ctionibus, & punitionibus aliquatenus appellare,
prauis debite obseruatis. Hactenus Bonif. Papa.*

2 Hoc posito: prima nullitas notata ab Aduocato
Baccalaureo circa processum factum à prouinciali,

S

fuit

fuit, quod non citauit reum ad videndum iurare testes quando deponebant. Hoc quis non videat carere fundamento? Nam citatio rei ad videndos iurare testes est purus apex iuris; probatur clarè exemplo tribunalis rectissimi sancti Officij, in quo seruatur omnino substantia iuris, & tamen nullo modo citatur reus hæreticus ad videndos iurare testes, imò illi occultantur nomina testium; ac proinde videre iurare testes non est de substantia iuris. Et sic declarat statutum generale istius Religionis *cap.6. §.1.* vbi explicans qui sint apices iuris, ait, apices esse citationes, dilationes, interlocutorias, &c. vbi verbum, *Citationes*, non intelligitur citatio rei ad respondendum obiectis, hæc enim est de substantia iuris, vt patet: sed intelligitur citatio rei ad videndos iurare testes; hæc enim non est de substantia iuris: neque per omissionem huius citationis fit læsio reo, cum illi relinquatur locus ad opponendam recusationem, & exceptionem testibus, vt fit in Religione, & admititur postea reus Religiosus ad opponendas tales recusationes testium.

3 Secunda nullitas taxata fuit, quod quando prælatus localis conquestus est apud Prouincialem, non recepit iuramentum, quod fuit in substantia dicere, quod non recepit iuramentum calumniæ, quod secundum canones iubetur præstari à litigantibus in principio litis. Hoc tamen non spectat ad substantiam iuris, sed ad apices illius; & licet lex Portugalliæ citata ab Aduocato præcipiat præstari tale iuramentum calumniæ litigantibus, Religiosi exempti non obligantur in hoc ad seruandum legem principis sæcularis, vt optimè, & fusè probat Azor *tom.2. lib.10. cap.7. q.9.* vbi probat quod lex ciuilis non obligat clericos,

clericos, nisi talis lex sit approbata per Ecclesiam; vel nisi ratione legis diuinæ, vel naturalis ad id clerici teneantur. Ad quod Bonifacius VIII. in concessione supra citata iubet vt Religiosi possint iudicare secundum suas consuetudines approbatas. At in ista Religione nunquam omnino fuit consuetudo vt tale iuramentum calumniæ deretur litiganti Religioso.

4 Tertia nullitas obseruata à Baccalaureo in processu fuit, quod in inquisitione facta per Prouincialem fuit vocatus prælatus localis ad testificandum, cum esset pars læsa, & conquesta. Responderetur, quod talis prælatus non fuit vocatus vt testis, neque dictum illius receptum est vt dictum testis ad sententiam, sed solum fuit rogatus an aliquid haberet quod amplius apponeret: vel an vellet accusare in forma accusatoris. Nam illius dictum non fuit computatum inter testes processus. Et dato, & non concesso, quod illius dictum foret receptum vt dictum testis: si aliàs crimen esset integrè probatum per alios testes, sicut de facto fuit probatum, tunc testimonium prælati localis licet esset nullum, non annullaret processum aliàs habentem sufficientem numerum testium probantium, iuxta regulam iuris 37. diceurem: *Vtile non debet per inutile vitiari*. Et proinde illud testimonium inutile prælati localis non potuit vitare processum quo ab alios testes vtilis.

5 Allegauit quartò, quod reo non fuerint admissi articuli suæ defensionis, quod est falsum; oppositum enim constat, quia fuit auditus. Si autem hoc dicit, quia illi non sunt data nomina testium, sicut ipse petit, infra dicemus non fuisse obligatum prælatum dare nomina testium in hoc casu. Si verò hoc dicit eo quod dixit in suis responsionibus prælatum localem, &

& aliquos eius socios esse sibi inimicos, & propterea non audiendos, hoc non sufficit, vt dicatur non fuisse auditum. Nam non sufficit dicere: Fullanus est meus inimicus, vt statim dictus Fullanus pro inimico reputetur, nisi allegentur, & probentur causæ inimicitiae; ille autem causas inimicitiae nec proposuit, nec probauit. Ita tenet Mascardus *tom. 2. de probat. conclus. 898.* dicens, quod inimicitia non præsumitur, sed probanda est, pro quo citat multa *num. 1.* Quod verò ait non habuisse Religionem potestatem procedendi in hoc casu summarie, & de plano sine apicibus iuris, iam suprà ostendimus hoc esse falsum; potest enim Religio sic procedere in omnibus suis causis, vt patet ex supracitata concessione Bonifacii VIII.

6 Quinta nullitas allegata, est quia processus, seu inquisitio facta fuit ad instantiam prælati localis sui inimici. Quis hoc non videat? Dato enim quod prælatus localis fuerit suus inimicus (quod non probauit) res est notoria, quod inimicus potest accusare, & obligare iudicem, vt inquirat de offensa sibi facta, vt praxis, & iura obseruant. Et quamuis reus pro causa inimicitiae alleget quod inter ipsum, & prælatum localem interuenerunt verba graua, & rixosa, tale non constat ex processu toto. Et est res nimis practicata, quod si prælatus subditum iuste etiam reprehendit, subditus vt plurimum ipsum reputet pro inimico. Veritas enim odium parit. Et prælati sunt sicut album ad sagittam.

7. Sexta nullitas taxata fuit, quod petente reo sibi dari nomina testium, non sunt illi data, pro quo citat statutum Ordinis sui. Ad quod responderetur primò, tale statutum Ordinis id non concedere absolute, imò

imò potiùs magis negare, quàm concedere: ait enim quod ad euitanda odia, & inimicitias inter Religiosos, nomina testium non publicentur: nisi fortè in crimine aliquo graui, & periclitetur iustitia rei, nisi tali nomina dentur. At prælati iudicarunt quod in hoc casu non periclitabatur iustitia rei ob publicitatem delicti, & probationis abundantiam. Quando verò lex aliquid relinquit arbitrio iudicis, non errat iudex vtens suo arbitrio. Fauet capitulum *qualiter, & quando, primo, de accusat.* vbi postquam Papa dicit, quod reo dentur nomina testium, &c. in fine capitis ponit hæc verba: *Hunc tamen ordinem circa regulares personas non credimus vsq; quaque seruandum.* Ecce quo modo Papa non obligat vt inter Religiosos dentur semper nomina testium. Addo quod dare reo nomina testium non est de substantia iuris, sed de apicibus. Probo ex eo quod suprà diximus. nam tribunal S. Officij seruat substantiã iuris, vt patet, & tamen nunquam dat nomina testium, sed potius abscondit, in fauorem talis tribunalis: quod clarè probat, quod dare nomina testium spectat ad apices, non ad substantiam iuris. Quod verò addit præcessisse coniurationem contra reum, facile est dicere, sed difficile probatur, maximè inter Religiosos, neque tale quid constat ex processu, & proinde eadem facilitate quã dicitur, eadem negatur. Coniuratio enim non præsumitur, sed debet probari, vt tradit Mascardus *cit. concl. 898. n. 1.*

8 Septima nullitas, vel iniustitia notata à Baccalaureo fuit, quod probationes maximè in criminalibus, debeant esse clariores luce meridiana: in hoc verò casu nullus fuit testis oculatus, qui videret reum iniicientem pulueres in poculum prælati localis: ergo non fuit vlla probatio sufficiens ad talem pœnam.

Respondetur, illud dictum Iuristarum, quod in criminalibus probatio debet esse clara vt lux meridiana, intelligitur in criminibus, quæ sunt faciles, & ordinariæ probationis, & solent fieri in publico. Secus de criminibus, quæ sunt difficilis probationis, & quæ de ordinario fiunt in occulto, vt sodomia, adulterium, veneni propinatio, & similia. Ad hæc enim probanda non requiritur tam clara probatio per testes oculatos: aliàs nunquam probarentur, cum tales delinquentes soleant effugere oculos aliorum: & proinde crimina atrocissima manerent impunita. Sufficit ergo ad probanda talia crimina difficilis probationis violenta præsumptio. Hæc est communis opinio Doctorum, & habetur in multis textibus citatis à Nauarro cap. si quis 0, 1. de pœnit. distinct. 7. n. 11. Sanchez lib. 10. de matrim. disp. 12. n. 4. Rodrig. tom. 2. q. 12. art. 2. Farinac. tomo de inquisitione, & delictis q. 2. num. 12. vbi ait quod in delictis occultis sufficit coniecturalis probatio: & ad hoc citat multa, & in cap. *Afferre gladium*, de præsumptionibus, ait rubrica illius capituli: *Quod ex præsumptione violenta fertur diffinitiva*. Iam verò rubrica quæ continet integram sententiam (sic ut ista continet) valet pro lege, vt omnes fateantur. Videatur etiam ad hoc Vmbertus in *practica inquisitionum*, in verbo *Probatio*, §. *Probatio per præsumptiones*, & *segg.* vbi citat Bartolum, Iasonem, & Bossum. Videatur etiam Mascard. tom. 3. de probat. concl. 1224. n. 13. vbi probat quod ad probandum delictum fieri solitum clam, & in occulto (quale fuit istud) sufficiunt coniecturæ, & præsumptiones. Denique id affirmant sexcenti alij Doctores. In hoc verò delicto concurrerunt non vna, sed plures coniecturæ sufficientes ad probationem illius, vt constitit ex processu.

Constat

Constat enim quod petiit ab officiali coquina vt pulueres iniiceret in scutellam prælati : & alius vidit papyrum puluerum in manu rei : alij viderunt illum stantem iuxta poculum prælati , alij viderunt pulueres in poculo. Medicus dixit esse venenum vltra alia indicia remotiora contenta in processu , quæ tamen iuncta præcedentibus faciunt violentam probationem.

9 Allegauit etiam , quod propinatio puluerum non fuit cum effectu , & proinde non merebatur tantam pœnam. Ad hoc respondeo distinguendo. Nam propinatio puluerum non est quidem sortita effectum mortis , vt fatemur : sed fuit completum delictum propinandi venenum , siquidem peruenit ad actum proximum , & per ipsum delinquentem non sterit , & per accidens fuit quod mors sit secuta. Quæ mors si sequeretur , imponenda illi erat ad minus pœna perpetua tritemium , & quia mors non fuit secuta , imposita est illi tam leuis pœna carceris vnus anni , & fuit hæc pœna conformis statuto generalis istius Ordinis , quo decernitur vt qui machinatus fuerit propinare venenum alicui , carceri mancipetur. Ista verò veneni intentio fuit grauior , vt pote contra prælatum ; & in cap. *Si quis Sacerdotum* 11. q. 1. & cap. *Si clerici, aut Monachi* , eadem causa , & q. Dicitur , quod Clericus , vel Monachus , qui conspirauerit , machinatus fuerit , vel parauerit insidias prælato , proprium gradum amittat , & curiæ tradatur , videatur etiam Iulius Clarus in sua praxi q. 92. in medio , vbi citat multos , & graues Doctores dicentes , esse opinionem communem quod in criminibus atrocibus , quale est hoc , conatus ad crimen punitur pœnâ ordinariâ , si deuenit ad actum proximum , sicut iste deuenit , licet per accidens

effectus non sit securus. Et ponit exemplum in eo qui parauit venenum, & posuit in loco vbi posset sumi. Et licet ibi Iulius Clarus non approbet illam opinionem, quoad dandam pœnam ordinariam; etiam huic reo non est data pœna ordinaria. Et quamuis Aduocatus oppositus dixerit illa indicia veneni non fuisse probata sufficienter per duos testes adductos pro singulis iudiciis; vltra quod oppositum constitit ex processu, Respondetur quod quando iudicium est proximum ad actum, tale iudicium probatur per vnum tantum testem, sicut tradit Mascardus *tom. 3. de probat. conclus. 1224. num. 41. & 42.* & sequitur Baiardus super Iulium Clarum ad quæstionem 23. *num. 5. & 6.* qui ambo citant alios Doctores. Hæc verò indicia fuerunt proxima actui.

10 Ultimo loco, dixit Aduocatus, quod dictum medici asserentis illud fuisse venenum, fuit dictum singulare vnus: & præterea medicus non id asseruit resolutè, sed solùm dixit, sibi videri venenum. Tale verò dictum opinatiuum non probat in testibus. Respondetur, quod licet fuerit dictum singulare vnus tantum, tamen plene probat, quia fuit dictum periti in illa arte: perito verò in sua arte credendum est, etiam si testificetur de sua credulitate tantum, nec dicat se certò scire. Ita tenet Mascardus *tom. 3. de probat. conclus. 1168. num. 19.* citans Roman. Bartolum, Immol. Iasonem, Corneum, Ioan. Andr. & alios, & fauent multi textus ibidem citati. Et dato quod dictum medici non plenè probaret, iunctum tamen cum aliis testibus, & coniecturis hîc concurrentibus satis probaret, maximè in hoc crimine difficilis probationis, vt iam suprâ ostendimus. Nam præsumptiones plures iungi debent ad faciendam plenam probationem

probat ionem, sicut fusè, & efficaciter probat Mascardus tom. 3. de probat. 1124. num. 1. 8. 13. 14. & 22. vbi num. 22. ait, quod præsumptiones etiam iunguntur cum fama ad plenè probandum. Hic verò concurrat fama, indicia probata, & cætera quæ sufficiebant ad faciendam violentam probationem, seu præsumptionem ob quam solam datur sententia diffinitiva in crimine difficilis probationis, vt supra ostendimus num. 8. in responsione ad septimam.

CASVS XXIX.

*De alio processu factò per quendam
Prouincialem, & impugnato ab
alio Aduocato sæculari.*

VOlui hîc inserere præsentem casum similem omnino præcedenti, vt magis constet de temeritate, & ignorantia Aduocatorum sæcularium in materia processuum Religiosorum: in hoc casu enim peior fuit alius Baccalaureus, quàm in casu præcedente. Conducit verò ad honorem, & famam Religionum ostendere quod prælati non ferunt sententias iniustas; & quod prælati sciant respondere *dictis impertinentibus, & falsis aduocatorum sæcularium. Et ex dictis à nobis, in hoc casu non parum iuuabuntur prælati Religiosi ad suos processus iudiciarios dirigendos, & aduocatorum sæcularium errores retundendos.*

Ignitur, quidam prælatus regularis circa quendam suum subditum fecit quandam inquisitionem particularem de quodam adulterio, de quo erat publicè

S S infamatus

infamatus. Ex processu resultauit crimen probatum contra subditum, præter hoc crimen, ex aliis visitationibus constabat subditum in materia castitatis habere aliam similem culpam cum graui circumstantia apostasiæ; aliam compositionis libelli famosi: & alias culpas in materia castitatis, & aliis materiis non leuibus, de quibus per interualla fuit conuictus, & non emendatus. Prælatus cum Diffinitoribus illum condemnauit ad priuationem perpetuam habitus, & exilium ad partem vltamarinam Angollæ, visâ suâ incorrigibilitate: cum protestatione, quod si appellaret, aliis pœnis grauioribus foret plectendus. Appellauit Religiosus, & datus est, illi Aduocatus sæcularis prout petiit, qui, mirum est, quanta dixerit in responsionibus, & rationibus allatis pro sui clientis defensione, quas mihi pro Religionis, & Religiosi prælati honore tuendo commiserunt, & antequam descendam ad allegationes Aduocati sæcularis in particulari impugnandas, dixit scripto, quod prælatus regularis in suo processu fuerit crudelis, & quod vindictam sibi sumere intenderit, quod iniustis mediis vsus fuerit, & malos fines intenderit, & quod reus iniustos carceres sustinuerit: quod sanè particularem pœnam merebatur, eo quod Religiosum prælatum scripto publico sic infamauit, maximè cum bene præsumendum sit de prælatis, vt dicitur in cap. *Ab sit* 11. *quest.* 3. & cap. *Non nos, distinct.* 40. Neque licitum sit alicui se defendere infamando aliquem iniustè.

I Prima ergo reprehensio, seu animaduersio Aduocati circa processum Prouincialis fuit, quod ad inquisitionem præcipui delicti adulterij, processit non existente infamiâ rei. Fortasse hoc contigit, quia Prouincialis in principio processus non posuit sum-

mariam

mariam informationem factam in particulari de infamia delicti, sicut solet præmitti ab aliquibus iudicibus vigilantioribus ante inquisitionem delicti in particulari, sed Prouincialis in processu incepit statim inquirere de delicto, non specificando quod præcesserit infamia: & ideo Aduocatus dixit processum fuisse nullum, eo quod prælatus in particulari inquisierit de delicto subditi non præcedente infamia, quod est contra leges vtriusque iuris. Ad hoc respondetur, non esse necesse quod iudex inquirens de particulari delicto præmittat in principio processus probationem scriptam, quod præcesserit infamia, sed sufficere quod rumor delicti peruenit ad aures prælati, vt ipse incipiat quærere de delicto in particulari si fama ad illum peruenit non solum de delicto, sed etiam de delinquente. Pulchrè, & doctè hac de re tractat Suarez tom. 4. de Relig. lib. 10. de regimine Societatis cap. 12. num. 27. & 28. vbi primò dicit, quod interdum fama per se ipsam peruenit ad aures prælati, & clamat contra reum, & in hoc casu non oportet vt præcedat iudicialis probatio infamiae: & ad hoc citat Nauar. & Syluest. & dicit alios sic sentire. Et probat, quia alias nunquam liceret prælato ex officio incipere ab inquisitione particulari. Et addit rationem à priori esse, quia in publicis, & euidentibus non est necessaria specialis probatio: tunc tamen infamia est per se euidens, & publica: & infamia clamat, & accusat publicè, & ideo per se sufficit ad inchoandam particula rem inquisitionem. Secundò ait Suarez, vt prælatus ordinarius ex officio, procedat ad inquisitionem, satis esse quod sit certus de infamia, & tunc suâ assertionem illam probet, & confirmet. Quapropter si minus inquirendi deleget alteri affirmans sibi constare

Petrum

Petrum eſſe infamatum de tali delicto, id ſatis eſſe vt delegatus poſſit immediatè incipere inquirendo in particulari de delicto talis perſonæ, non inquirendo de infamia, neque probationem eius inueſtigando. Quo nihil clarius dici potuit ad noſtrum intentum. Delictum verò adulterij huius Religioſi fuit publicum etiam apud ſæculares, ſicut infrà videbimus. Fundatur hoc dictum Suarez, quod ſcilicet credendum ſit prælato dicenti ſibi conſtare de infamia delicti, eo quod ſemper præſumendum eſt bene de prælato, vt patet ex citato cap. *Absit* 11. q. 2. & cap. *Non nos* diſt. 40. Et dictus aduocatus non ſolum arguit proceſſum Prouincialis, quod factus fuerit non præcedente infamia de adulterio, ſed etiam idem obicit de aliis delictis rei in vita anteaſta, quod ſcilicet de illis fuerit inqueſitum non præcedente infamiâ; quod modo eſt diuinare, cùm præteriti proceſſus de culpis præteritis ſint iam combuſti ex particulari ſtatuto Religionis iſtius, prohibente ne prælati finito ſuo officio poſſint ſeruare proceſſus vltra ſex menſes. Et præterea de dictis prælatis bene præſumendum eſt iuxta proximè citata capita iuris canonici.

2 Addo, quod licet Prouincialis inqueſiſſet de delicto, de quo reus non erat infamatus, ſi tamen ex illa inqueſitione non licita, nihilominus crimen manſit plenè probatum contra reum, cùm iam poſt inqueſitionem illam publica facta ſint illa delicta, & probat ſufficienter per teſtes, & reus fuerit citatus, & auditus, poterit iudex regularis illum punire pro illis delictis indebitè reuelatis, ſed factis iam publicis. Sic tradit expreſſè Nauar. tom. 3. ſuorum operum commentario ad rubricam de iudiciis num. 87. §. *Non obſtat etiam*, vbi ait, quod ſi interrogante iudice in genere à teſte, teſtis reuelauerit

reuelauerit aliquod delictum secretum, quod non poterat reuelare, & in eo peccauit; nihilominus iudex potest punire illud delictum illicitè publicatum: & ponit Nauarrus hæc verba: *Ex quo bene, vel malè deducta sunt in publicam iudicis notitiam, ille tenetur ad castigandum ea per inquisitionem particularem.* Et ad hoc citat Sotum dicentem sufficere notitiam iudicalem habitam per confessionem malè torti, vt iudex alias inquirat, &c. Et alia ibidem adducit Nauarr. doctè ad hoc intentum. Idem probatur ex cap. *Ecce* 2. q. 3. & cap. *de accusar. & inquis.* in 6. cum glossa ibidem, verbo *Confessus*, vbi dicitur, *Quod crimina debent puniri undecunque claruerint.*

3 Secundo arguit aduocatus, quod Prouincialis reo exhibuerit iuramentum in principio litis, siue inquisitionis factæ de illo. Respondetur, reo posse exhiberi iuramentum in principio processus, quando non adsunt testes. Ita expressè tenet Rodriguz tom. 2. qq. 9. 18. art. 11. citans alios, & Miranda in Ordine iudiciali q. 11. art. 8. Quando verò Prouincialis hoc iuramentum reo exhibuit, fortè nondum habebat testes ad probandum, & potuit experiri, seu tentare an per rei confessionem posset excusare confessionem processus. Et dato quod Prouincialis illicitè exhiberet reo hoc iuramentum extra tempus, non proinde annullaretur processus, nec dabitur textus id affirmans. Solum tunc annullaret, quando reus ob tale iuramentum illicitè exhibitum confiteretur, & ob id foret condemnatus absque alia probatione. Sed in hoc casu post iuramentum factæ sunt aliæ multæ probationes, vt patet ex processu.

4 Tertiò arguit, quod reo non sunt publicata nomina testium. Ad hoc iam responsum est in casu 28. proxime

proximè precedente num. 7. vbi satis probauimus non esse de substantia iuris exhibere reo nomina testium, ad quod adduximus exemplum Tribunalis sancti officij. Addo nunc, quod Paulus Bertus Augustinen-
sis in sua praxi fol. 185. ait quod in Religionibus non publicantur reo nomina testium propter pacem Religiosorum. Videatur etiam Rodriguez *tom. 2. qq. quæst. 3. art. 1.* vbi ad hoc citat Hostiensem, & Mansum. Et præterea iste reus non petiit sibi dari nomina testium.

5 Quartò, arguit Aduocatus, quod in hoc processu recepti sunt multi testes sæculares: at testes sæculares non possunt esse testes contra Religiosum. Respondetur, sæculares posse esse testes integros contra Religiosum. Sic expressè tenet Rodriguez *tom. 2. qq. 9. 10. art. 5. & q. 28. art. 3. in fine*, vbi miratur ille, quoad aliqui prælati regulares nolint admittere testes sæculares contra Religiosos in probatione adulterij, qualis est noster casus: & ait Rodrig. id nullâ lege prohiberi Religiosis. Et probo ratione clara ibi tacta à Rodriguez, nam aliàs maneret crimen adulterij impunitum à Religioso factum extra conuentum, cum extra cõuentum dari non possint testes Religiosi, per quos illud possit probari. Idem de homicidio facto à Religioso, & de quocunque alio graui delicto commissio extra conuentum, & sic manerēt multa crimina grauia, & scandalosa impunita. Idem probatur ex communi praxi Religionum admittentium testes sæculares in processibus criminalibus Religiosorum. Et cùm nulla lex canonica id prohibeat, teste Rodriguez, & praxi extante, non est curandum de Doctoribus, quos citat Aduocatus, qui non citant legem, neque rationem vrgentem, neque sciunt de praxi Religionum suprà citatâ.

6 Quintò,

6 Quinto, arguit Aduocatus, quod requirente reo, vt sibi vnus, vel alter testis reciperetur, vel examinaretur, sibi fuit denegatum. Respondeo primò, quod etiam in foro sæculari assignatur tempus intra quod possunt recipi testes, eoque transacto denegatur receptio testium, quod in Portugallia vocatur, *Conclusio*. Sic ergo potuit fieri in hoc casu, in quo intellexerunt iudices Religiosi, datum fuisse reo tempus superabundans ad respondendum, & testes producendos, vltra quod non erat obligatio vltiores testes producere. Facit etiam quod delicta ipsius sic erant notoria, & probata, vt intelligeret iudex nullam probationem reo posse proficere. Facit ad hoc omnino quod tradit Nauarrus *lib. 5. consiliorum, consil. 26. de sentent. excommunicat. num. 6.* & Rodriguez *tom. 2. qq. quest. 18. art. 1.* cum textibus ibi citatis, qui ambo dicunt, quod quando crimen est ita notorium & probatum, vt licet citetur reus, nullam omnino habebit excusationem: in tali casu potest ferri sententia contra talem reum illo non citato; quod est multo maius. Si tales ergo duo Doctores dicunt cum textibus, quod in crimine notorio satis probato, non est obligatio citare reum; minor obligatio erit recipere vnum testem in suo notorio & clarè probato quando testis oblatus nihil proficeret reo, eo nempe modo quo iudex non tenetur acceptare exceptiones, & recusationes friuolas partis opponentis, vt dicitur in iure.

7 Sextò arguit Aduocatus, quod ad proferendâ sententiam circa sua delicta, non sunt vocati duo diffinitores, vel Patres deputati vt coniudices ad proferendas sententias in illa Religione, & proinde sententia videtur nulla, ob defectum iudicum, qui debebant interesse causæ. Respondetur primò illos duos, de quibus
allegat,

allegat, iuxta quandam Bullam Papæ eo tempore publicatam, iam non habuisse iurisdictionem iudicis. Secundò, quòd dato quod possent tunc esse iudices, ambo erant notoriè impediti, ne possent itinerare, & accedere ad conuentum, in quo ferenda esset sententia. Alter enim illorum prælongâ, & graui senectute iam non egrediebatur suum conuentum: alter impeditus erat graui, & actuali infirmitate periculosa, & proinde non poterant accedere: & proinde erat obligatio vocare notoriè impeditos. Et probatur, simulque declaratur exemplo. Nam cum obligatio sit vocare omnes electores ad electionem celebrandam, non tenetur præses capituli vocare, nisi eos qui commodè vocari possunt, vt constat ex cap. *Coram* 35. *distinct.* & ex glossa cap. *Cum omnes*, de constit. verbo, *Ipsorum*. Et est communis opinio, maximè Syluestri verbo *Electio* 1. num. 6. & aliorum dicentium superioris arbitrio remitti, an sit periculum in dilatione electionis, vt ideo omittatur vocatio aliorum. Quod applicari potest ad vocationem coniudicium pro sententia ferenda: & hoc maximè habet locum in hoc casu, quando illi duo sic impediti, & omissi non sunt conquesti, neque tentarunt sententiam ob sui omissionem annullare.

8 Arguit septimò Aduocatus, huiusmodi reum non fuisse incorrigibilem, vt posset expelli à Religione. Respondeo prædictum reum primo esse incorrigibilem de facto, propter illa quæ tradit Rodriguez *tom.* 1. *qq. Reg. quæst.* 30. *art.* 14. citans Syluest. & Abbatem, cum quibus ait, quod ille Religiosus est incorrigibilis de facto, qui commisit multa, & grauia delicta, cum graui scandalo, licet non fuerit ter conuictus, & punitus: maximè iuxta Syluestrū, si ista incorrigibilitas facti

facti præsumatur de facto propter conditiones viri. Hic autem reus commisit multa, & grauius delicta cum scandalo, vt patet ex processu, idque variis temporibus, maximè in materia contra castitatem: ex quibus omnibus colligitur satis deprauata, & incorrigibilis hominis natura. Legatur Rodriguez *citato art. vbi* non dicit, quod ad probandum incorrigibilitatem de facto, necessarium sit quod testes dicant reum esse incorrigibilem de facto, sicut Aduocatus dicit affirmari ab Aldrete: nam iudicare incorrigibilitatem non pertinet ad testes, sed ad iudicem, ad quem spectat ponderare merita causæ processus. Et potest iudex ex variis circumstantiis processus formare iudicium illius quod non exprimitur in processu, imò & inde formare sententiam, cum scilicet subint præsumptiones violentæ, etiam in actis non probatæ; vt latè, & doctè probat Vmbertus in *practica inquisit. verbo præsumptio, in princip. §. Violenta præsumptio*, pro quo citat capitulum S. Mariæ de constit. & Innocentium in cap. *Tua*, de cohabitatione cleric. & mulier. Addo, quod multi Religiosi in suis testimoniis, dicunt naturam istius rei esse peruersam, effrænatam, & ad malum procliuem. Quamuis verò statutum istius Religionis, loquens de expulsionem incorrigibilis ab ordine, loquatur solum de incorrigibili de iure, qui videlicet ter, vel quater fuit punitus, & resipuit; tale statutum non tollit, quin possit etiam expelli verus incorrigibilis de facto, quia scilicet licet non fuerit quater punitus, commisit tamen multa, & grauius delicta, & ex illius natura, & moribus non solum erat emendatio. Ita sentit, & probat Rodriguez *citato art. 14.*

9 Nunc probo Religiosum istum fuisse incorrigibilem etiam de iure, vt posset proinde expelli ab

T

Ordine

Ordine. Nam teste Syluest. citato à Rodriguez *dicto art. 14.* incorrigibilis de iure est ille, quem aliqua lex vel regula iudicat esse incorrigibilem, & sicut talem præcepit expelli à Religione. At Pius V. concessit per Bullam Patribus D. Hieronymi, quod possint expellere ab Ordine Religiosum qui commisit vnum tantum delictum, si ob tale delictum lex sæcularis imponat pœnam mortis: quod priuilegium transcribitur apud Rodriguez *cit. art. 14.* Et iste Religiosus commisit adulterium, vt paulò infra ostendemus: ergo est incorrigibilis de iure, idest, per ius, & legem Summi Pontificis citatam quæ iubet taliter delinquentem expelli à Religione. Et dato quod iudices, quando tulerunt sententiam expulsionis ab Ordine, solum crederent illum esse incorrigibilem de facto, & non de iure, nihilominus sententia valida est, & ille censendus est tanquam expulsus, vt incorrigibilis de iure. Probatur, nam actus semper præsumitur fieri eo modo, quo utilior est agenti, vt tradit Sanchez *lib. Decalogi cap. 18. num. 40.* citans Bartolum, Menochium, & alios. Et ad idem accedit illa Maxima Iuristarum, quæ dicit: *Si non valet hoc quod ago, prout ago, valeat vt valere potest.* De quo glossa capitis vnici *de despons. impuberum*, & Rodriguez *tom. 1. qq. q. 20. art. 25.* At iudices huius sententiæ habebant pro se illam legem Pij V. iudicantis hunc esse incorrigibilem de iure: ergo vt talem illum intenderunt expellere.

10 Nunc restat probandum quod hoc delictum adulterij ab isto reo commissum fuerit satis probatum. Ad quod præmitto, ex processu constitisse omnia sequentia. Primò famam clamorosam valde inter sæculares, & Religiosos. Secundò quod ingrediebatur domum cuiusdam feminae vxoratae reputatae pro inhonesta

honestâ, & ingrediebatur solus. Tertiò quod visa est prædicta mulier quadam die exire à domo, & intrare in quandam syluam domui suæ vicinam, & paulò post prædictus Religiosus intrauit eandem syluam. Et post aliquod tempus exierunt ambò à sylua vnus post alium. Quartò, quod eadem die manè visi sunt ambo colloquentes. Quintò, quod vna die præcedente scripserat ipse epistolam quandam ad maritum feminæ petens vt illam ad se mitteret, quia necesse habebat illam alloqui. Sextò quod ille huic mulieri munuscula multa mittebat. Septimò, quod ille coram aliquibus Religiosis iactauit se de aliquibus adulteriis in comuni. Vltimò quod vltra hunc casum erat diffamatus in aliis casibus contra castitatem. Semel verò malus nunquam præsumitur bonus in eodem genere mali, & cum omnibus iis coniecturis, noluit Aduocatus Baccalaureus vt crimen esset probatum. Si enim *in casu præcedente* 28. satis probatum est, quod violenta probatio sufficit ad ferendam sententiam diffinitiuam in criminibus difficilis probationis, quæ solent fieri in occulto: quis negabit in hoc casu, attentis tot, & tam claris circumstantiis, & coniecturis interuenisse violentam præsumptionem? Videantur dicta, & citata *in casu* 28. *proximè num.* 8. & vltra ibi dicta, & citata, adduco legem istius Regni *lib.* 5. *Ordinat. tit.* 28. §. 6. vbi declarans lex quo pacto censeatur probatum delictum concubinatus, sic dixit in substantia. *Sufficiet ad probandum concubinatum, quod existat de hoc publica vox, & fama: & quod sunt soliti, & visi quod vnus ingreditur domum alterius.* Nam talis fama iuncta cum eo quod probatur de ingressu vnus in domum alterius, reputamus sufficientem probationem ad condemnandum in isto casu. Sic ibi lex in substantia. Si ergo lex ad condemnandum in

ista materia solum requirit famam & ingressum in domum, in hoc nostro casu fuit fama clamorosa, ingressus amborum in eandem syluam, alloquitio præcedens, munuscula, & multa alia proximè citata. His omnibus præsuppositis, potuit iustè, & iustissimè prædictus reus expelli ab Ordine propter hoc solum crimen adulterij, iuxta Bullam Pij V. sup. cit. viso quod crimen adulterij per leges ciuiles punitur pœna capitis. Quantò magis quando cum hoc delicto iuncta & probata sunt alia delicta grauius eiusdem rei, etiam cum quadam apostasia, de quibus omnibus fuit in particulari auditus.

11 Octauò conqueritur Aduocatus sæcularis, quod iudices Ordinis declarauerint reum fuisse periurum, eo quod negauerit veritatem in iuramento sibi exhibito præter ordinem iuris, vt ipse arbitratur. Ad hoc responsum manet ex dictis n. 3. in hoc casu, vbi diximus quomodo potuerit huic reo exhiberi iuramentum in principio processus, & ex ibidem dictis poterit dari responsio ad hanc obiectionem. Dato enim quod tale iuramentum foret indebitè exhibitum, id non annullaret processum, eo quod reus non fuit damnatus ex responso dato in illo iuramento, sed ob multas claras probationes contra ipsum factas post illud iuramentum.

12 Nonò, obiicit Aduocatus, quod aliquæ culpæ præteritæ rei iam fuerant punitæ, & propterea non potuerunt nunc accumulari ad delictum adulterij, vt propter omnes simul posset ab Ordine expelli. Nam vt ait, ex Cæpolla, multæ præsumptiones de diuersis delictis non possunt coniungi ad faciendam probationem. Ad hoc respondetur, quod, imò allegat contra se, & contra reum: nam, reum iam fuisse punitum

punitum sæpius, & non emendatum, arguit incorrigibilitatem, & duritiam animi illius, ob quam incorrigibilitatem ius canonicum & statuta Religionum permittunt illum expelli ab Ordine ne ovis morbida inficiat totum pecus. Et sic toties iste reus punitus, & non emendatus, factus est clarè incorrigibilis de iure. Neque modò, quando Religio hunc expellit propter ultimum crimen grauius iunctum cum præteritis culpis ià punitis, dicitur directè punire culpas præteritas, iam punitas: sed solùm punit incorrigibilitatē animi, & hanc perfectè declaratam per ultimum delictum cum præcedentibus iam punitis. Quod verò Aduocatus citat ex Cæpolla, dicente, quod multæ probationes de diuersis delictis non possunt iungi ad faciendam probationem, nihil facit contra nos. Nos enim hîc iungendo culpas istius rei præteritas cum ultimo delicto, non iungimus præsumptiones de variis delictis ad faciendam probationem ultimi delicti; nam ultimum delictum adulterij suas habuit claras probationes; sed iungimus præterita delicta iam probata, & punita ad probandam modò incorrigibilitatem rei, ob quam iura decernunt illum expelli ab Ordine. Potest hoc explicari exemplo, & praxi tribunali sancti Officij. In quo hæreticus primâ vice punitur, qui si veniam petit, condonatur, ac dimittitur: si vero postea relabatur in hæresim: non illi condonatur, etiam si pœniteat, sed relaxatur brachio sæculari. In qua relaxatione non puniuntur Inquisitores directè primam hæresim iam punitam, & condonatam; sed iungunt illam cum secunda hæresi ad cognoscendam incorrigibilitatem, & duritiem hæretici relapsi, de quo moraliter non speratur emendatio, & propter talem duritiā, & incorrigibilitatem illum relaxant

brachio sæculari. Quod exemplum optimè facit ad nostrum intentum. Addo vltimò, quod in hoc casu ad expulsionem istius rei non fuerit necessarium in rigore iungere culpas præteritas cum vltimo casu adulterij: nam propter solum adulterium poterat expelli ab Ordine per Bullam Pij V. citatam, cum leges regni, & leges iuris ciuilis puniant adulterum pœna capitis. Vide in casu præcedente 28. num. 10. aliam solutionem.

13 Decimò obiicit Baccalaureus, quod in hoc processu non extitit vllus accusator, & proinde non potuit ferri talis, ac tam dura sententia sine accusatore. In hoc clarè ostendit Aduocatus quantum ignoret priuilegia, & consuetudines Religionum. Voluit enim introducere in religionem promotores iustitiæ, qui accusent nomine Religionis delicta Religiosorum, quod nunquam in aliqua Religione fuit auditum. Nonne prælati Religiosi ex officio tantum, possunt inquirere in generali, & in speciali præcedente infamiâ, & punire culpatores? Nonne dicunt Iuristæ quod fama supplet locum accusatoris: & in hoc delicto fuit fama plusquam clamorosa, & iuxta hunc solum modum expulsi sunt ab Ordine quotquot expulsi sunt à principio Ordinis sine accusatore cum sola inquisitione prælati facta ex officio præcedente infamiâ. Addo quod in hoc Regno Portugalliæ, sicut accepi à viro graui, & experto, non permittit Rex, quod in supremo suo tribunali sit promotor iustitiæ sæcularis ad accusandum pro republica in processibus carentibus accusatore, idque propter aliqua inconuenientia inde exorta. Si autem in republica sæculari iudicatur inconueniens dari talem promotorem, qui subeat vicem accusatoris: multò magis id expedire dicendum

dicendum est in religionibus propter pacem, & tranquillitatem illarum.

14 Undecimò, proteruè, & ferè blasphemè dixit Aduocatus hanc expulsionem fuisse pœnam exorbitantem, datam cum animo crudeli, & animo vindictæ; & comparat iudices cum Achab, & cum Iudæis: in quo satis ostendit suum liuorem dignum sanè magno supplicio, & punitione ob iniuriam factam contra Religiosos positos in dignitate Ecclesiastica. Ad illius tamen infamiam respondetur hanc pœnam expulsionis ab Ordine non fuisse pœnam exorbitantem taxatam à lege Pij V. concedentis quod ob solum adulterium cui lex ciuilis pœnam capitis imponit, possit expelli; fuit etiam pœna taxata in lege seu statuto Ordinis decernente, quod incorrigibilis ab Ordine expellatur: ex prædictis verò constat quod iste reus fuit incorrigibilis de facto, & de iure. Iam verò pœna inflicta iuxta decretum legis nullo modo potest vocari exorbitans à lege. Imò potest probari, quod ista expulsio, cū exilio ad Angollam fuit pœna mitior quàm illa, quam lex assignat. Nam Bulla citata Pij V. concedit quod possit Religio damnare ad triremes Religiosum committentem delictum, cui lex ciuilis pœnam capitis imponit. Mitior verò pœna satis superque est exilium ad Angollam, quàm damnatio ad triremes, vt patet.

15 Duodecimò taxat Aduocatus, quod iudices Ordinis in sententia dixerint quod si reus appellasset, illi imponerentur aliæ duræ pœnitentiæ. Ad hoc respondetur imprimis quod ista protestatio iudicum de plus torquendo reo appellante, non annullauit sententiam, vel processum: sed vt plurimum mererentur aliquam reprehensionem quando appellatio foret iusta, & à iudicibus repulsa. At in hoc casu cū

sententia fuerit iustissima, & proinde appellatio rei deberet esse iniusta, poterit reo protestatio comminatoria fieri de pœna augenda. Neque enim noua res est vt imponatur aliqua pœna iniuste appellanribus: habetur hoc expresse 2.q.6. cap. omnino, vbi sic dicitur: *Omnino puniendus est, vt quoties iniusta appellatio promuntiat, sumptus, quos dum sequeretur aduersarius impendit, reddere cogatur, non simplis, sed quadruplos.* Ecce iniuste appellans punitur in quadruplum expensarum. Cùm verò iste reus appellans iniuste non haberet pecuniam, vt solueret in quadruplum, non fuit contra ius, quod iudices comminatoriè dicerent subitutum illum alias pœnitentias ob iniustâ appellationem. Nam reus appellans iniuste, iniuriam facit iudici, suo modo, quatenus illum notat de ignorantia, vel malitia in iudicando, & proinde sic appellans iniuste, vt plurimum peccat mortaliter, & ex consequenti aliquâ pœnâ dignus est. Facit etiam ad hoc glossa in citato cap. *Omnino*, quæ citat ad hoc capitulum *reprehensibilis*, de appellat. & citat vnâ legem ex Codice per quam imponitur pœna quinquaginta librarum argenti appellanti iniuste. Si ergo lex ciuilis sic punit iniuste appellantem, quid mirum si id faciat prælatus Religionis ob pacem communem Religionis?

16 Decimotertiò, conquestus est Aduocatus, eo quod non illi reo commutatum fuerit exilium Angollæ ad exilium ad insulam Melitæ, vel Gnetam. Ridicula ferè conquestio ista est. Numquam Religionis tale exilium expulsi imposuerunt. Addo quod iudex non tenetur reo imponere pœnam quam reus petierit, sed illam quam lex assignat, vel quam iudex arbitratur esse conformem legi, vel delicto. Culpæ verò istius rei maiorem pœnam merentur

bantur per Bullam Pij V. & per statutum generale Religionis.

17 Decimoquartò, arguit Aduocatus, quod Prouincialis reum in carcerem misit, cùm veniret ex Roma portans rescriptum Papæ pro sua causâ liquidanda: in hac querela, & in aliis, dicit Baccalaureus, quod reus passus fuerit carceres iniustos, sæuitias, & quod in processu interuenerint media iniusta, & crudeles fines. Vtitur sanè suo sic irreuerenti modo loquendi, seu potius conuitiandi. Respondeo ergo Prouincialem illum carceri mancipasse Roma redeuntem, quia non venit ad Prouincialem viâ rectâ, sicut imponere solet Papa Religioso apostatæ Romam adeunti, cui post absolutionem, vel recursum daturt imponitur vt viâ rectâ redeat ad suum prælatum. Ille verò reus post discessum à Roma, intrans Portugaliam iuit Olyssipponem, & in eo commoratus est per aliquos dies moram faciens in domibus sæcularium, neque accedens ad conuentum suæ prouinciæ, donec à quodam Religioso sui Ordinis captus est, & tanquam apostata traditus conuentui suæ prouinciæ. Addo quod cùm ille Romam adierit apostata, & de hoc constaret publicè, & propter dictam Apostasiam pœna carceris illi esset imposta per approbata Ordinis statuta, nihil nouum fecit prælatus illum sic venientem carcerare propter præteritam publicam apostasiam, maximè cum nondum legerit rescriptum Papæ, nec sciret quid in illo contineretur.

18 Vltimò petit Aduocatus nomine rei, vt sibi Religio det pecunias, quas insumpserit in processu suæ defensionis, pro quo possit allegare capitulum *ex parte, de accusat.* vbi decernitur, quod Religioso litiganti contra prælatum dentur expensæ ad litem de bonis

conuentus. Ad hoc iam ego respondi in alio simili casu cuiusdam Religiosi, qui appellauit ad Tribunal Nunciij Apostolici, & petiit expensas à conuentu Minorum, cuius ille erat professus, & tamen expensæ non sunt illi datæ à conuentu. Dico ergo ad textum citati capitis cum Abbate super idem caput, dicente, quod dictum capitulum solum intelligitur, quando Religiosus mouet litem prælato pro bono communi ipsius conuentus, quia scilicet Abbas dilapidator est, vel quid simile: non verò si subditus in suo litigio procuret suum tantum bonum, & interesse particulare; tunc enim non tenetur conuentus dare expensas litiganti. Sic expressè tenet Riccius *tom. 1. Decisionum collectanea* 850. vbi ait, quod si subditus accuset Abbatem ex causa propria, non debentur illi alimenta, id est, expensæ, & citat vnā decisionem Rotæ, quæ est in ordine 799. Hic autem reus non mouet litem prælato ob causam pertinentem ad bonum commune, sed ad suum particulare: ac proinde non tenetur conuentus dare expensas. Idem tenet Panorm. *ad citatum cap. Ex parte* num. 13. Secundò respondetur, quod citatum cap. *Ex parte*, intelligitur de conuentu, qui habet redditus annuales in communi. Conuentus autem istius Religiosi non habebat redditus in communi. Sic tenet Henricus super citatum caput, dicens conuentum habentem redditus annuales teneri dare expensas subdito ad lites: secus de conuentu carente redditibus. Et confirmatur exemplo omnino simili. Nam quando pater est omnino pauper, non tenetur dare alimenta filio: neque maritus pauper tenetur alimentare vxorem, vt tradit Sanchez *lib. 9. de matrim. disp. 4. q. 2. à num. 20.* citans multos Doctores, & tenet Riccius *cit. tom. collectanea* 97. At maior obligatio

obligatio est patris alendi filium, cum sit obligatio naturalis, & maior obligatio est mariti alendi uxorem, quam sit Religionis pauperis dandi subdito expensas ad lites, quæ non sunt alimenta. Ultimò respondetur, quod pater non tenetur dare alimenta filio, qui sibi fuit ingratus, vel ipsum patrem grauius infamauit, vt tenet Riccius *eodem tomo 1. collectanea* 962. citans, & sequens Baldum *decisione* 29. At iste reus fuit ingratus matri suæ Religioni, & illam toties infamauit dando scandala grauissima, prout continetur in processu: ergo non tenetur expensas ad lites motas contra Religionem.

CASVS XXX.

De ingressu in clausuram Monialium.

Quædam Abbatisa admisit intra clausuram per spatium notabile duas mulieres suas consanguineas. Reprehensa de hoc per Prouincialem, confessæ est, sed dixit id læpius factum fuisse in illo conuentu, neque se putasse in eo peccare, quia nunquam vidit illum casum in illo conuentu punitum. Et hoc contigit anno 1633.

Quæsitum est primò, an Abbatisa incurreret excommunicationem, & priuationem officij, & inhabilitatis ad futura?

Secundò an prædicta Abbatisa potuerit excusari ab incurssione prædictarum pœnarum propter bonam fidem, & ignorantiam?

Responsum

Quæstio hæc valde controuersa est inter Doctores graues, & recentiores, propter Bullam D. Papæ Gregor. XIII. quæ incipit: *Vbi gratia*, quæ præcipuè transcribitur à Rodriguez in fine expositionis Cruciatæ. In qua Papa reuocat omnes licentias suas, & antecessorum suorum, concessas viris, ac mulieribus ingrediendi monasteria monialium, vel virorum. Prælati verò tam masculis, quàm fœminis, qui aliquem admiserint intra suam clausuram virtute prædictarum licentiarum Papalium annullatarum, imponit Papa pœnam excommunicationis ipso facto, & priuationis officiorum quorumlibet: & inhabilitatis ad quæcumque officia in posterum obtinenda.

1 Circa cuius Bullæ expositionem graues Doctores recentiores dixerunt, & scripserunt, quod Abbatissa, quæ personas sæculares masculos, vel fœminas intra clausuram admiserit non virtute alicuius licentiæ papalis annullatæ in prædicta Bulla Gregor. XIII. sed ad libitum suum, admittendo sæcularem, qui nunquam talem licentiam habuit, etiamsi admittat sine necessitate, dicunt hanc Abbatissam non incurrere excommunicationem, nec priuationem officij, neque inhabilitatem ad futura officia. Hi Doctores sunt Suarez *de censuris disput. 2. 2. sect. 6. num. 11. & seqq.* Sayrus *de censuris lib. 3. cap. 31. num. 10.* Rodrig. *tom. 1. qq. 9. 47. art. 1. & 9. 48. art. 2. per totum.* Miranda *tract. de Monialibus q. 2. art. 10. concl. 1.* Zerola *in praxi Episcopali 1. p. verbo, Moniales q. 8.* Sanchez *lib. 6. Decalogi cap. 16. num. 79.* Sà *in Aphoris. verbo de excommunicationibus Papa reseruatis num. 15.* Principale fundamentum istius opinionis est: quia Bulla Gregor.

gor. XIII. est valde pœnalis, & odiosa, vt pote continens excommunicationem, priuationem, & inhabilitatem officiorum: at lex pœnalis est restringenda, & non extendenda de vno casu ad alium similem, per *regulam iuris* in 6. *odia restringi*, &c. ergo Bulla Gregor. XIII. puniens Abbatissam admittentem sæculares intra clauisuram virtute licentiarum Papalium reuocatarum, non comprehendit Abbatissam illos admittentem, qui carent licentiis annullatis; sed eos admittit intuitu consanguinitatis, vel alterius temporalis respectus gratiæ. Et Rodriguez *citato art. 1. q. 47. citat* Caietanum & Castro pro sua opinione, dicentes legem pœnalem nunquam posse extendi vltra illum casum, de quo loquitur. Adducitibi Rodriguez aliqua exempla, quæ non cogunt, & faciliè soluentur ex illis, quæ adducemus pro sequenti opinione.

2 Quo non obstante, ego verius puto oppositum, talem scilicet Abbatissam incurrisse excommunicationem, & priuationem officij. Hanc opinionem tenet Nauar. in *Manuali cap. 17. num. 105. excommunicatione* 61. Coriolanum de *casibus reservatis* 2. p. cap. 3. num. 40. Beia in *Respons. moral. 1. p. casu* 30. Quaranta verbo *Monialium monasteria, vers. Amplia prædictam constitutionem*. Azor 1. p. lib. 13. cap. 8. q. vltima. Filliutius citatus à Bonacina tom. 1. q. 4. *clausura puncto* 5. num. 4. qui Filliutius ait hanc sententiam esse comprobata stylo, & praxi pœnitentiariæ. Tenet eandem Rodriguez in expositione Bullæ Cruciatæ, quando explicat motum proprium Pij V. & Gregorij XIII. circa clausuram virorum, & Monialium toto num. 7. & denique Bonacina citato proximè loco dicit tutius esse hanc opinionem in praxi sequi. Et quamuis Rodriguez postea citato art. 1. videatur sibi contrarius

ob dicta in expositione Cruciatæ; eius tamen nepos ex fratre Hieronymus Rodriguez in suis resolutionibus *resolut. 26. num. 19.* nititur illum explicare, vt non se retractet à dictis in Cruciatæ. Fundamentum præcipuum istius opinionis ponitur à Rodriguez citato loco Cruciatæ: videlicet, quod finis legis, & mens legis sunt attendenda, & seruanda potius quàm verba legis, vt habetur expressè in Regula vltima de regulis iuris in 6. sic dicente: *Certum est quod is committit in legem qui verba legis completens, contra legis nititur voluntatem.* At finis, & intentio, Greg. XII. in sua Bulla, est occurrere quieti Monialium & tollere impedimenta, pericula, & scandala orta ex ingressu sæcularium: sic enim habetur in Bulla: *Sanctimonialium quieti, & tranquillitati consulere, atque omnia quæ illas à spiritualium rerum cogitatione, & exercitio auocant, impedimenta tollere, periculæque, & scandala ab eis remouere cupientes, &c.* Ecce finis, & mens Pontificis in illa Bulla. At omnia illa quæ Papa ibi prætendit amouere, contingunt, seu contingere possunt in ingressu sæcularium in clausuram Monialium, non virtute licentiarum annullatarum: ergo Abbatissa illos admittens non virtute licentiarum annullatarum prædictas pœnas incurrit. Imò addo, quod maiora pericula, scandala, & inquietudo possunt sequi ex ingressu sæcularium non habentium licentias Papales, quàm ex ingressu illas habentium. Nam Papa non solet concedere licentias ad clausuram Monialium nisi personis probatæ vitæ, & honestis, & nobilibus, de quibus vt plurimum non præsumitur periculum: Abbatissa verò de non habentibus licentias Papales, poterit admittere personas non spectatæ vitæ non nobiles, & de quibus poterit timeri periculum, & scandalum. Secundò, principaliter probatur, quia
lex

lex pœnalis potest , ac debet extendi ad casum similem, in quo reperitur eadem omnino ratio assignata in priori lege. Ita tenet Sanchez *lib. 3. de matrim. disp. 42. num. 4.* pro quo citat ibi tredecim Doctores vtriusque iuris, graues, & maiori ex parte recentiores : & ponit exemplum. In cap. fin. §. *Si quis verò*, de clandestin. desponsat. ponitur pœna contrahentibus matrimonium clandestinum in gradu prohibito, quod filij inde nati euadant illegitimi, quando parentes sunt consanguinei. Quo posito quærit Sanchez an eadem pœna illegitimitatis filiorum iudicanda sit in matrimonio alio quocunque nullo ob quodcunque impedimentum irritans, etiamsi non sit impedimentum consanguinitatis, & affinitatis. Et respondet Sanch. quod sic, & quod prædicta pœna extenditur ad aliud quocunque matrimonium irritum, ob quoduis aliud impedimentum irritans, ad quod citat illos 13. Doctores. At ratio & finis Bullæ pœnalis Greg. XII I. videlicet inquietudo monialium, pericula, & scandala, militant eodem modo, imò & potiori modo in ingressu ad clausuram quando sæculares intrant sine licentiis annularis : ergo etiam ad hunc ingressum extendi debent pœnæ positæ in Bulla Gregor. XIII.

3 Tertiò probatur eadem conclusio. Nam lex pœnalis, quæ aliàs datur pro salute animarum, est fauorabilis, & proinde extendi debet ad casus similes : ita docet Sanchez *lib. 1. de matrim. disp. 39. num. 5.* citans multos, & graues Doctores, & textus. At ista Bulla Gregorij licet in parte sit pœnalis, est tamen lata in fauorem animarum, vt viterur peccatum, vt patet; ergo debet extendi ad similes casus. Et ponit ibi Sanchez exemplum satis accommodatum ad casum præsentem. Aliud exemplum ponit Nauarrus *in expositione*

positione Extrauagantis de datis, & promissis pro impetratione alicuius gratia Papalis, notat. 9. num. 10. dicens, quod licet in illa Extrauaganti solum exprimat-ur excommunicatio contra dantem, & promittentem aliquid pro impetratione alicuius gratiæ fiendæ alicui: eadem tamen excommunicatio incurritur ab illo, qui dat aliquid ne aliqua gratia Papalis alicui concedatur, cum tamen hoc secundum non exprimat-ur in Bulla, eo quod utrobique militet eadem omnino ratio. Quod optimè potest applicari ad istum casum. Quartò probatur argumento tacto à Rodrig. cit. loco *Cruciata*. Nam, si per istam Bullam Gregorij non punirentur ingredienti-tes Monialium clausuram ad libitum & sine licentiis annullatis, Bulla prædicta Gregorij esset penè frustratoria. Nam personæ habentes aliquam facultatem Papalem ingrediendi, illam comburerent, illique renuntiarent, dicentes se velle intrare absque talibus licentiis, sicut intrant illi, qui tales licentias nunquam habuerunt: & sic Abbatissæ quoscunque indebitè admittentes nunquam punirentur, & manerent crimina impunita, & lex Papæ esset frustratoria, quæ duo in iure sunt omnino reprobata. Denique ut cesset omnis dubitatio, refert Rodriguez citato loco *Cruciata* ex Nauarro, Pium V. hac de re consultum respondisse suam Bullam circa clausuram locum habere non solum in intransibilibus mulieribus, quæ aliàs habuerunt licentiam intrandi, sed etiam in aliis quæ talem licentiam non habebant. Et ait ita obseruari à Pœnitentiariis Romæ ex responsione Gregorij. *III*. Quas duas declarationes pontificias non cessasse, probat ibi efficaciter Rodriguez cit. n. 7. ob quas rationes tam claras, & euidentés, etiamsi contraria opinio haberet plures Doctores, imò etiâsi foret opinio communis

communis (qualis non est) ab illa esset recedendum, maxime in materia peccati. Nam, ut ait Nauarrus in *Manuali cap. 7. num. 4.* ab opinione communi recedendum est, quando pro parte contraria datur textus, vel ratio cui bene non potest responderi.

4 Ad argumentum suprapositum pro parte opposita, dicens, quod ista lex est pœnalis, & proinde restringenda, satis manet responsum ex dictis *proximè num. 2. & 3.* ubi diximus, & probauimus, quod lex pœnalis potest extendi ad casum similem, in quo militat eadem omnino ratio: vel etiam quando lex pœnalis est lata in salutem animarum, quæ duo diximus habere locum in ista Bulla, & casu de quo loquimur: pro quo etiam satis efficacia exempla adduximus.

Responsio ad secundum quæsitum.

5 Non modicam continet difficultatem responsum Abbatissæ dicentis se habere, vel habuisse ignorantiam talis excommunicationis: videtur enim hoc valde facere ad suam excusationem. Pro quo valde facit quod tradit Suarez *tom. de censuris disp. 4. sect. 8. num. 19.* ubi ait ignorantiam inuincibilem præcepti Ecclesiastici ita excusare à censura, ut quamuis actus sit contra ius diuinum, & naturale, & homo contra illud peccet, nihilominus censuram non incurrat. Et declarat exemplo, dicens. Si quis ignoret inuincibiliter prohibitum esse ab Ecclesia sub excommunicatione ne quis clericum percutiat, non incurreret excommunicationem, etiamsi contra ius naturale, & diuinum peccet iniuriam faciendo clerico, qui consonat, quod tradit Reginaldus *tomo 2. lib. 31. num. 298.* ubi ponit exemplum, illius qui scienter baptizat filium

coniugis suæ extra necessitatem extremam : ob quod punitur pœna ut nos possit ab illa petere debitum : si tamen taliter baptizans ignoret talem pœnam ab Ecclesia imponi taliter baptizanti, euadet talem pœnam. At in Abbatisa fœmina facile est dari ignorantiam Bullarum Papalium, cum mulieres, ut plurimum talium Bullarum ignorantiam habeant.

6 Dico primò, hanc Abbatisam posse in foro interno conscientia excusari à peccato, & à pœna per ignorantiam inuincibilem. Est communis Doctorum in materia de ignorantia ; & probatur breuiter, quia ignorantia causat inuoluntarium, ut patet ; peccatum verò de sua essentia est voluntarium, ac proinde si non est voluntarium, non est peccatum : si autem non datur peccatum, non datur pœna excommunicationis in foro interno. Excommunicatio enim non imponitur nisi ob peccatum mortale. Secundò probatur, seu declaratur, nam ignorans non consentit ; patet ex *glossa in Clementina prima, de procuratoribus, in verbo Scienter*, ubi citat tres textus iuris Canonici id affirmantes. At si ista Abbatisa ignorauit, utique non consensit : absque consensu verò non datur peccatum, nec proinde pœna.

7 Dico secundò : hæc Abbatisa in foro externo potest puniri tanquam excommunicata ; & proinde iustè priuari officio. Probatur primò, & clarè ex regula 13. iuris *de regulis iuris in 6.* ubi sic dicitur : *Ignorantia facti, non iuris excusat* : ubi clarè vides, quod ignorantia iuris neminem excusat : quod Doctores intelligunt de foro externo. Et ratio id probat, quia nemo præsumitur ignorare id quod Respublica præcipit ; & præterea quia si ignorantia iuris communis in foro externo posset allegari ad euadendam pœnam legis,

legis, omnes illam allegarent, & sic manerent ferè omnia crimina impunita. Secundò probatur, quia nemo potest allegare ignorantiam in illis, quæ spectant ad suum officium, cum vnusquisque teneatur sub mortali scire illa quæ pertinent ad suum officium, vt tenet inter alios Suarez *tom. de censuris disputat. 4. sect. 8. num. 14.* Ad pertinet ad officium Abbatissæ non admittere sæculares ad clausuram, cùm id prohibeat ius publicum Concilij Tridentini, & duæ Bullæ Pij V. & Gregorij XIII. in praxi quotidiana ab omnibus Abbatissis seruatur: ergo circa hoc non potuit Abbatissa allegare ignorantiam. Tertiò, quia ignorantia istius Abbatissæ fuit crassa. Dicitur verò à Doctoribus ignorantia crassa illa, quâ ignoratur illud quod est clarissimum, & quod scitur ab omnibus: at sæcularibus interdici ingressum ad clausuram Monialium est res clarissima, & scitur ab omnibus Abbatissis: ergo istius ignorantia fuit crassa. Constat verò ex communi Doctorum, quod ignorantia crassa neque excusat à culpa, neque à pœna. Quartò probatur, quia ista ignorantia non fuit conuincibilis, sed vincibilis: potuit enim vinci facile consulendo, & interrogando suum confessorum Religiosum, qui semper assistit prope conuentum Monialium, quod illa non fecit. At constat quod ignorantia vincibilis neminem excusat.

8 Quod verò dicitur respondisse Abbatissam, se id vidisse fieri sæpius in illo conuentu, id non illam excusat: nam error aliorum non potest prodesse alicui: neque errores aliarum potuerunt abrogare Tridentinum, & duas Bullas Pontificias, maximè in tam breui tempore.

9 Ad argumentum verò positum *sup. n. 5.* dicendum est

est Suarez loqui de foro interno, in quo nos etiam *sup. num. 6.* diximus ignorantiam inuincibilem pœnæ excusare à pœna: secus dicendum credimus de foro externo, siue contentioso, iuxta dicta *num. 7.* Imò & ipse Suarez *citata sect. 8. num. 18.* expressè ait, quod in foro externo sapius præsumetur ignorantia culpabilis, quem ibi videre poteris. Et adhuc pro maiori probatione aduerto cum Mascardo *tom. 2. de probat. concl. 879. num. 22.* vbi dicit quod ignorantia nulli patrocinator in factis publicis, id est, in decretis publicatis. Pro quo citat cap. *Qui & humanis. 12. q. 2.* vbi Papa sic dicit: *Cum non potuerit ignorare sententiam proprii sacerdotis.* Pro quo citat ibi tres glossas vtriusque iuris, & sex Doctores grauissimos. In hoc verò casu dantur duo decreta pontificia publicata præter Concilium Tridentinum. Secundò idem Mascard. *cit. concl.* ait, quod cum aliquis tenetur ex officio aliquid agere, tenetur indagare id de quo dubitat, quia tenetur habere curam ouium suarum, pro quo citat multos, & graues Doctores vtriusque iuris, quæ coadiuuant illa quæ nos proximè diximus *num. 7.*

10. Quæris, in capitulo *pastoralis*, de except. & in cap. *Si verò, 20.* de sententia excom. conceditur quod ignorantia probari possit per iuramentum dicentis se ignorasse: nam iuxta Nauarr. *tom. consil. consilio 1. de constit. num. 7.* ea quæ latent in mente, qualis est ignorantia, non possunt aliter probari, quàm per iuramentum. Quæris, inquam, vtrum huic Abbatissæ possit exhiberi iuramentum de sua ignorantia, illâque iurante quod ignorauerit, eidem credendum sit, & proinde libera euadat? Respondeo, meo iudicio, illi non esse exhibendum tale iuramentum: nam casus positi in illis duobus capitibus citatis sunt

nimi

nimis diuersi à casu , de quo quærimus. Ibi enim in utroque casu agitur de probando ignorantia facti, quæ excusat. At nos quærimus in hoc casu de probanda ignorantia iuris, quæ non excusat. Hoc constat, quia in primo citato capite *pastoralis*, concedit Papa, quod dicente aliquo ad suam notitiam non peruenisse notificationem iudicis, nisi post terminum transactum, possit id probare iuramentu : quæ non erat ignorantia iuris communis, sed ignorantia facti, vel mandati particularis. Item in capite *Si verò*, concedit Papa, quod si aliquis percussor clerici nutrientis commam allegauerit se ignorasse quod erat clericus, admittatur ad id probandum cum iuramento quæ ignorantia clarè erat ignorantia facti, quæ probata excusat. At in nostro casu agitur de probanda ignorantia iuris communis, duarum scilicet Bullarum Papalium, quæ ignorantia etiam si probetur non excusat, per regulam 13. iuris citatam *num.7.* quæ dicit ignorantiam iuris non excusare. Facit denique quod tradit Mascardus *citato tomo 2. conclus. 881. num. 18.* dicens non posse probari ignorantiam per iuramentum, quando ignorantia non est verisimilis, & pro hac opinione citat Alexandrum, Albanum, & Felinum. At ignorantia istius Abbatissæ non est verisimilis; quia verisimile non est ignorari id quod scit, & practicat tota Ecclesia, videlicet arceri sæculares ab ingressu clausuræ Monialum.

CASVS XXXI.

Utrum Prouincialis possit transferre Monialem de vno conuentu, vt sit Abbatissa in alio conuentu.

NON rarò contigit vt sit necessarium transferri vnā Monialem in aliū conuentum, qui vel de nouo fundatur, vel iam fundatum indiget reformatione nouæ Abbatissæ. Et proinde quæritur, an Prouincialis regularis, vel Episcopus in Monasteriis sibi subditis possit Monialem sibi subditam sine licentia Papæ transferre in aliū conuentum nouum, vel antiquum, vt sit ibi Abbatissa prima fundatrix, vel reformatrix? Et quod ista de causa non possit Monialis ad aliū conuentum transferri sine expressa licentia Papæ, videtur probari primò, quia Pius V. in Bulla, quæ incipit, *Decoris, & honestati*, declarans casus, ob quos licitum est Monialibus egredi à clausura absque licentia Papæ, tres tantum exprimit. Primus est, si in Monasterio excitetur magnum incendium. Secundus est si aliqua Monialis sit leprâ infecta. Tertius est si adsit morbus Epidemiæ: quorum morborum explicationem non est nostrum hîc asferre. Cùm ergo Papa hos solos tres casus exprimat, in quibus Moniales possunt exire, & materia sit valde odiosa, & prohibita, sequitur quod omnes alij casus, vel causæ exeundi ibi non expressæ sunt exclusæ, & proinde non sit licitum exire ad fundandum, vel reformandum aliū conuentum absque speciali licentia Papæ.

Probatur

Probatur ex illa maxima Iuristarum, quæ dicit: *Expressum in lege facit cessare presumptum*. Et illa alia dicente, quod inclusio vnius est exclusio alterius. De quo Brunor. *in suis locis communibus*, verbo Lex, numer. 18. sed illa Bulla Pij V. exprimit solas illas tres causas exeundi: ergo excludit omnes alias. Et proinde excludit etiam causam exeundi ad reformandum conuentum non contentum in Bulla citata Pij V. & in terminis id expressè tenet Rodriguez *in addit. ad summam tom. 3. cap. 3. conclus. 2.* & Zerola *in praxi 2. parte*, verbo Moniales §. 8. qui dicunt non posse Prouincialem transferre Monialem ad fundandum, vel reformandum alium conuentum absque expressa licentia Papæ, quia sic dicunt declarasse sacram Congregationem Cardinalium.

1 In hac re primò dicam, quid Doctores sentiant, semotis priuilegiis. Igitur Bonacina *tom. 1. quæst. 1. de clausura*, punct. 9. num. 10. citat Rodriguez, Sorbum, Capuccinum, Miranda, Sanchez, Nauarr. & alios dicentes absolute contra Zerolam, posse Prouincialem transferre Monialem in alium conuentum, vt sit in illo Abbatissâ, vel Magistra Nouitiarum: qui Doctores à Bonacina citati non requirunt consensum expressum Papæ pro tali translatione. Et hos Doctores ibi Bonacina non reprobatur, quamuis dicat tutius esse Sedem Apostolicam consulere, propter dictam declarationem Cardinalium. Et quidem Sorbus vir doctissimus, & Italus *in suis addit. ad compendium*, verbo Moniales, §. ult. dicens cum Nauarr. posse generalem eadem causa transferre Monialem, non requirit specialem licentiam Papæ. Eodémque modo Sanchez vir doctissimus *lib. 6. Decalogi cap. 13. num. 45.* dicens cum multis

posse Monialem à prælato transferri ad alium conuen-
 tum vt sit Abbatisa, nec requirit specialem licen-
 tiam Papæ, neque facit mentionem declarationis ali-
 cuius Cardinalium circa hanc materiam factæ, imò
 ibi impugnat Zerolam, quem diximus dixisse talem
 declarationem extare. Et sanè mirum esset, quod si
 talis declaratio Cardinalium extaret, illam ignora-
 rent tales, ac tanti viri, neque illius meminissent
 illi, & alij Doctores in materia tam graui & quoti-
 diana. Secundò probatur argumento efficaci, nam
 in regula secunda Monialium sanctæ Claræ, rubrica
 secunda, postquam dixit Urbanus I V. quod Monia-
 les illius debeant seruire perpetuam clausuram, exci-
 pit statim dicens, quod nihilominus poterunt inde
 exire si Cardinalis, qui fuerit illarum gubernator, man-
 dauerit aliquas illarum ad plantandam aliam Religio-
 nem, vel ad reformandum aliquod monasterium, vel
 causâ regiminis, vel correctionis, &c. Erant enim
 tunc prædictæ Moniales subiectæ illi Cardinali à Pa-
 pa designato, non verò prælatis Franciscanis. Postea
 prædictæ Moniales fuerunt per sedem Apostolicam
 subiectæ prælatis Minorum; & sicut habetur in com-
 pendio Mendicantium *verbo Ministri* §. 8. Iulius se-
 cundus concessit vt Prouinciales Minorum habeant
 eandem potestatem circa Moniales sanctæ Claræ eo-
 rum curæ cõmissas, quam Urbanus I V. in regula præ-
 dictarum Monialium commisit Cardinali protectori
 dicti Ordinis. Quo posito, sic deduco: Cardinalis
 tunc gubernator dictarum Monialium poterat trans-
 ferre aliquas Moniales, & licentiare ad egrediendum
 concurrente aliqua ex causis proximè dictis: ergo idem
 hodie possunt facere Prouinciales Minorum habentes
 circa easdem Moniales omnem iurisdictionem, quam
 habebat

habebat Cardinalis olim illarum gubernator, per citatam concessionem Iulij secundi. Idem affirmat Collector priuilegiorum in *compendio Medicamentum, verbo Clausura super §. 5.* ubi inter alias notationes, & casus ob quos Monialis sanctæ Claræ potest exire à clausura, dicit esse, quod poterit exire de licentia prælati, vt sit Abbatisa in alio monasterio, vel vt sit Magistra Nouitiarum, vel vt ponatur in aliquo officio, in quò multum consistit honestas Religionis, quale est habere custodiam portæ. Et addit ibi, quod si Monialis sic translata finito officio vult regredi ad suum priorem conuentum, poterit reuerti sola, si illius socia nolit cum illa redire.

2 Vltimò probatur eadem conclusio, ex eo quod tradunt communiter omnes graues Doctores recentiores post cit. Bullam Pij V. nam licet Bulla citata ob solas illas tres causas iam dictas, concedat Monialibus egressum à clausura, nihilominus non prohibet quin possint egredi si vltra illos tres casus contingant alij casus similes, vrgentes, & necessarij ob bonum commune Monialium, quale indicatur exitus vt sit Abbatisa, & similes. Sic tenet imprimis Sanchez *lib. 6. Decalogi cap. 15. num. 37.* Rationem assignat, quia dictio taxatiua (qualis est *duntaxat, nisi, solum*, & similes) non excludit casus similes, & in quibus eadem ratio vel vrgenitor militat; pro quo citat Doctores, & textus vsque ad fastidium: quamuis ergo Pius V. in illa Bulla solum exprimat illos tres casus, propter quos licitum sit egredi à clausura, non excludit tamen alios casus similes in quibus militet magna ratio necessitatis. Hoc ipsum tenet Bonacina *tom. 1. q. 1. de clausura, puncto 9. num. 6.* ob rationem proximè citatam ex Sanchez: & addit hanc aliam, quia

ſcilicet in omnibus diſpoſitionibus eſt locus Epiicheiæ præſertim in re, quæ ad commune bonum dirigitur. Et addit quòd in tali egreſſu, de quo loquitur, non violatur regularis obſervantia Monialium: quin potius illi prouidetur. Et vt omittam multos alios Doctores recentiores id affirmâtes, adduco ſolum gloſſam ſuper capitulum *periculoſo*, de ſtatu regular. in 6. quod capitulum eſt Bonifacij VIII. qui primus clauſuram indicit Monialibus illas ibi rigoroſè obligans ad clauſuram. Quo non obſtante, gloſſa ibi in verbo *perpetua*, ponit hæc verba ex Archidiacono: *Non credo quod decretalis iſta tollat, quin poſſent, ſi vellent, ad ſtriſtiorem Religionem tranſire. Item quin vna Monialis ad regimen alterius Monafterij poſſit aſſumi, &c.*

3 Reſtat reſpondere ad declarationem Cardinalium, quam Zerola citat, quæ ait neceſſariam eſſe licentiam Papæ ſpecialem, vt Monialis poſſit ire ad gubernandum aliud monaſterium. Ad quam dico primò talem declarationem non oſtendi authenticam. Secundò dico cum ferè communi recentiorum opinione, Cardinalium declarationes non obligare nos ad illas ſequendas. Probat, quia non ſunt lex. Nam de ratione, & eſſentia legis eſt vt promulgetur, & publicetur populo; tales verò declarationes non promulgantur in Eccleſia, & proinde non obligant ad ſui obſervantiam: & idem dicendum eſt de deciſionibus Rotæ Romanæ. Sic tenet Nauarrus *lib. 5. conſiliorum conſil. 15. de ſentent. excommunic.* Sanchez *lib. 8. de matrim. diſputat. 2. num. 10.* Martinus Delrio *lib. 8. Magic. cap. 1. ſect. 3. prope finem.* Valero Cartuxano *lib. de diſſer. vtriuſque fori, fol. 222.* Vega Minimus *verbo, Deſcommunication caſu 226. col. 967.* & nouiſſimè Bonacina, cum ſit Italus, *tom. 2. diſp. 1. de legibus, queſt. 1. punct. 8. num. 4.*

& citat Suarez, Salas, & alios: & asserit aliquos recentiores Doctores adhæsisse aliquibus opinionibus contra declarationes Cardinalium: per quæ tollitur omnis scrupulus ortus ex citata declaratione Cardinalium. Secundò responderi potest ad dictam declarationem, id quod respondet Azor ferè in simili materia, & Sà in *Aphor. verb. Religio n. 37.* qui dicunt quod si aliqua Religio habet priuilegium Papæ prohibens ne sui Religiosi transeant ad aliam Religionem nisi petita, & obtenta licentiâ: & nihilominus aliquis Religiosus transeat licentiâ non obtenta, transitus est validus, si aliàs transit ad Religionem strictiorem, & non ex leuitate animi, sed cum conditionibus positus in *c. licet*, de regular. quia inquit Azor, illa prohibitio transitus solum fit ne subditus transeat ex leuitate ad Religionem non strictiorem; quare si de opposito constet, validus erit transitus. Eodem modo dicendum, fortasse prædictam declarationem Cardinalium petentem licentiam specialem Papæ ad translationem Monialis, de qua quærimus, solum inferuire ne transitus fiat indebitè, de Moniali indigna non habente annos 40. &c. Si verò constet de opposito, & quod nihil indebitè fit, egressus erit validus, & non accusandus.

4 Ad argumentum possum in principio pro parte opposita, responsum manet ex dictis *num. 2.* vbi diximus cum Sanchez, & Bonacina, quod particula taxatiua extenditur ad similes casus. Et proinde licet citata Bulla Pij V. ponat tres illos tantum casus cum particula taxatiua, vt non possint egredi nisi in illis tribus, responderetur, quod dictio illa taxatiua, *nisi*, extenditur etiam ad alios casus similes, vt diximus citato *num. 2.*

5 Vltimò quæris, an ista monialis sic transmissa ad alium conuentum pro Abbatisa debeat eligi in Abbatissam per suffragia conuentus, à quo egreditur, vel per suffragia conuentus ad quem mittitur? Videtur enim quod non possit aliqua esse Abbatisa nisi per electionem Monialium, vt patet ex cap. *Indemnitatibus*, de elect. in 6. & ex Concilio Tridentino sess. 25. cap. 7. de regular. vbi datur forma eligendi Abbatisam. Respondetur in hoc casu talem Monialem missam pro Abbatisa, nec debere eligi per suffragia conuentus à quo exit, nec per suffragia conuentus ad quem mittitur, sic enim praxis obseruat. citata verò capita loquuntur de Abbatisa, quæ sit via ordinaria, & debet fieri per electionem conuentus, & est Abbatisa quasi ordinaria. Hæc verò de qua loquimur est Abbatisa quasi extraordinaria, in qua non habent locum citata iura loquentia de Abbatisa ordinaria.

CASVS XXXII.

*De quodam Religioso indebitè promotò
ad Ordines sacros.*

Quidam prælatus regularis concessit licentiam subdito, vt posset recipere Ordinem Diaconatus, & in litteris patentibus sigillo magno munitis specificauit, quod dictum Ordinem sacrum reciperet Eboræ, verbi gratiâ. Subditus fecit alias litteras patentes in persona Prouincialis, in quibus illi concedebat vt prædictum Ordinem Diaconatus posset recipere Olyssipone: & his litteris à se confectis apposuit

posuit verum sigillum magnum Prouincialis positum in litteris prioribus.

Quæsitum fuit primò , utrùm hic Religiosus fuerit falsarius quauis apponeret verum sigillum Prouincialis ?

Secundò , an fuerit apostatata, idest, fugitiuus eundo Olyssipponem ad suscipiendos Ordines, cum Prouincialis illi non dederit licentiam eundi Olyssipponem, sed eundi Eboram ?

Tertiò , an sic suscipiens Ordinem sacrum Olyssipponem, suscepit illum existens in excommunicatione, & proinde aliquas pœnas incurrerit ?

Responsio.

1 Ad primum respondeo prædictum Religiosum absque dubio fuisse falsarium: probatur clarè, quia vt aliquis dicatur falsarius sufficit quod in scriptura mutet, vel deleat, vel apponat aliquod verbum, quod faciat diuersum sensum, vt tradit communis opinio, maximè Suarez *tom. de censuris disp. 21. sect. 2.* At iste non solum mutauit vnum verbum, sed multa verba facientia sensum diuersum; pro verbis enim dicentibus, vt iret Eboram, apposuit vt iret Olyssipponem, quod est valde diuersum. Præterea fecit subscriptionem Prouincialis in secundis litteris, quam Prouincialis non apposuit, & hoc est principale delictum ad constituendum aliquem falsarium. Neque obstat quod litteris à se factis apposuit verum sigillum Prouincialis: id enim illum non excusat à culpa, & pœna falsarij, quia tale sigillum apposuit inuito Prouinciali. Sic in terminis docet Bonacina *tomo 3. disp. 1. de censuris Bullæ Cœne 9. 7. punct. 1. num. 3.* vbi recensens illa quæ

quæ faciunt aliquem falsarium, ait per hæc sequentia fieri falsarium. Primò, aliquid addendo, vel subtrahendo, idque siue scribat, siue subscribat. Secundò, radendo, secando, vel lauando. Tetiò, sigillum verum falsis litteris apponendo: quod fecit hic de quo loquimur. Quartò fabricando falsas litteras, aut signando falso sigillo, vel etiam vero, sed sine consensu illius ad quem spectat. Sic Bonacina, & citat Vgolinum, Alterium, Duardum, Sayrum, & alios. Et per hæc satis respondetur primo quæsito.

2 Ad secundum quæsitum dico hunc Religiosum fuisse apostatam, id est fugitiuum, pro quo præmitto prius, in Religione istius Religiosi dari statutum generale circa apostatas, in quo sic dicitur. Intelligimus autem apostatam omnem fratrem, qui sine licentia, vel contra obedientiam suorum prælatorum per terras, loca, cum habitu, vel sine habitu, cum socio, vel sine socio iuerit: & generaliter absque Ordinis licentia quomodolibet discedentem, &c. Hic autem Religiosus absque licentia Prouincialis iuit Olyssipponem distantem per ferè viginti leucas à ciuitate, quam illi assignauit. Iam verò in eodem statuto Ordinis huiusmodi apostata, seu fugitiui sunt excommunicati ipso facto.

3 Ad tertium quæsitum dico, constare ex proximè dictis, prædictum Religiosum suscepisse Ordinem sacrum dum existeret excommunicatus excommunicatione maiori. Ad quæsitum verò hinc resultans, quam scilicet pœnam incurrerit suscipiendo Ordines existens excommunicatus, dico cum communi opinione illum incurrisse censuram suspensionis: de quo latè Suarez *tomò de censuris disput. 31. sect. 1.* dicens sic decerni in cap. *cum illorum*, de sententia excommunicat.

municat. Imò ex alio etiam capite dici potest, quod iste Religiosus incurrerit suspensionem, videlicet, quia recepit ordinem sacrum sine dimissoriis, iuxta Sà in *Aphor. verbo* Suspendi ipso iure, *num. 2.* nam Prouinciatis non dedit illi dimissoriam vt ordinaretur Olisippne, sed Eboræ. Dico præterea quod si Religiosus iste ministravit in Ordine Diaconatus, vel Subdiaconatus sic existens suspensus, incurrit irregularitatem, teste Nauarro in *manuali cap. 27. num. 163.* vbi sic dicit de taliter suspensio violante suspensionem: Peccat mortaliter, & incurrit irregularitatem, si violat eam exercendo aliquem actum peculiarem alicuius Ordinis siue maioris, siue minoris. Hanc verò irregularitatem non incurreret si officio Diaconi functus est in Missa Episcopi, in qua fuit ordinatus: sic tenet Sà citato proxime *num. 2.* & alij communiter. Ab ista verò suspensione, vel irregularitate poterit Religiosus absolui, & dispensari à suo prælato, etiam locali, per multa quæ dixi in meo primo tomo Dubiorum Regular. verbo, *Abbas num. 6.* & verbo Prælati ad absoluendum, & prælati potestas ad dispensandum.

4 Pro quiete tamen, & consolatione istius vel similis Religiosi, quæro sic. An iste Religiosus existens excommunicatus ante susceptionem Ordinis, incurrat illam suspensionem, si prius manè, vel noctè præcedente confessus est sacramentaliter, & absolutus est ab illa excommunicatione apostasiæ per potentem absoluere; & postmodum accedat ad suscipiendum Ordinem sacrum ob vitandam infamiam, quæ sibi euenerit ex eo quod iam scriptus sit in albo ordinandorum, & Religiosi illius conuentus vbi hospitatur, valde notabunt, quod Ordines non suscepit iam scriptus in albo,

albo, &c. Et videtur quod non excusetur ab incurſu ſuſpenſionis etiam ſic abſolutus : nam licet ſit abſolutus, adhuc tamen durat materia apoſtaſiæ, & excommunicationis, cùm adhuc ſit extra conuentum vnde exiuit apoſtata, & proinde adhuc videtur dici excommunicatus, ſaltem in foro externo, & proinde videtur obligatus ad abſtinendum à receptione Ordinum, quos ibi adhuc ſumit ſine licentia Prouincialis. Difficultas profeſſo non careret difficultate magna, in praxi in qua tutius eſſet abſtinere à receptione talis Ordinis.

§ Quia tamen magnum ius habet quis vitandi propriam infamiam, dum commodè poteſt, ego in tali caſu excuſarem illum ab incurſu ſuſpenſionis, ſi iam ſic abſolutus, & in albo ordinandorum aſcriptus Ordinem ſacrum reciperet ob vitandam grauem infamiam inter Religioſos. Probo exemplo omnino ſimili, quod tale eſt : Quidam clericus exiſtens irregularis, ab illa non abſolutus, vel exiſtens excommunicatus ex communicatione, à qua non eſt confeſſor præſens, qui poſſit abſoluere, ſi timeat notabilem infamiam ex eo quod non celebret : poteſt præmiſſâ confeſſione peccatorum, & contritione celebrare abſque eo quod nouam aliquam cenſuram incurrat, dummodo poſtea quantocyus procuret abſolutionis remedium. Idque ob ius naturale vitandi infamiam, & quia nemo tenetur prodere peccatum ſuum occultum. Sic tenent communiter Doctores, maxime Caſtro, Nauar. Gutierrez citati à Rodriguez 1. part. *Summ. cap. 166. concl. 1.* quod idem in terminis cernitur in hoc caſu, in quo talis Religioſus timet magnam infamiam, vt ſuppono, & iam præmiſit confeſſionem ſacramentalem, & valide fuit abſolutus ab excommunicatione incurſa propter

propter apostasiam. Neque obstat quod adhuc est extra conuentum, vnde exiuit apostata, & non sit absolutus adhuc pro foro externo; hoc enim per accidens est, cum in substantia iam sit absolutus ab excommunicatione, & habeat propositum statim reuertendi ad suum conuentum.

CASVS XXXIII.

De venditione cuiusdam rei habentis onera imposita.

Quidam homo testamento reliquit vnico filio, quem habebat, certam terram, quam sumpsit in sua terra, ei que imposuit certa legata perpetua. Filius mortuo patre, terram illam vendidit, non declarans emptori obligationem legatorum terræ appositam à patre: & declaratur quod dictus pater de dicta terra fecit mentionem, quod deueniret ad suos descendentes. Iste filius vendidit terram infra dimidium iusti pretij, vt constitit per experientiam. Primus emptor terræ illam diuisit in partes, ita vt hodie sit penès diuersos dominos, & pari modo prædictus emptor imposuit prædictæ terræ alias obligationes capellæ, quæ hodie soluuntur à possessoribus. Vxor primi venditoris subscripsit cartæ venditionis ob metum cadentem in virum constantem, ad hoc enim maritus venditor, illam percussit quasi alapis, & in xtem minatus est, nolebat enim illa vt terra venderetur. Et cum propter hunc metum venditioni subscriberet, statim post adiit iudicem, & reclamauit contra venditionem, dicens se illi inuitam subscripsisse.

1 Quæritur primò, utrùm prædicta terra vendi potuerit cum esset relicta à primo instituyente pro suis legitimis descendentes: & vxor illius subscripserit venditioni ob grauem illum metum incussum.

2 An venditio pariter nulla fuerit ex eo quod vendita fuerit infra dimidum iusti pretij. Dicitur enim quod tempore venditionis æstimabatur pretio duorum millium & quingentorum ducatorum: & vendita fuit pretio non accedente ad mille ducatos.

3 Quæritur an ob has causas nepos illius primi instituentis possit prædictam terram vindicare, & venditionem rescindere, maxime cùm sit pauper, & habeat filios alendos?

1 Respondeo, hanc venditionem fuisse nullam multis ex capitibus. Primò, quia venditor vendidit rem in qua plantatus fuerat maioratus, & posita clausula quod pertineret ad legitimos descendentes. His enim concurrentibus terra illa non erat venditoris, quoad dominium directum, sed tantum quoad dominium vtile, & proinde non poterat alienare per venditionem: cum enim hæc terra ex institutione primi instituentis pertineret ad omnes, & solos legitimè descendentes, si venditor illam venderet extraneis, iam vendidit rem alienam, id est, ad descendentes pertinentem. Venditio verò rei alienæ est nulla, imò pœnà puniuntur venditor, & empror rei alienæ per legem istius regni *lib. 4. Ordin. tit. 35. & 37.* cui accedit, quod ista terra relicta fuit titulo maioratus cum illis obligationibus. Res autem certissima est quod maioratus vendi non potest à possidente maioratum. Nam possidens maioratum non habet dominium directum, & absolutum illius, sed solum dominium vtile, & proinde non potest maioratum vendere. Eo modo

modo, quo possidens rem emphyteuticam non potest illam vendere, cum non habeat dominium directum illius, sed solum vile.

2. Secundò fuit hæc venditio nulla ex eo quod vxor venditoris consensit in venditione, coacta metu cadente in virum constantem: ante cuius probationem suppono vt rem certissimam, quod facta per metum grauem, sunt nulla, vt patet ex toto titulo *de iis, quæ vi metusve causa fiunt*, in decretalibus, maximè *cap. 1.* quod idem decernunt leges ciuiles. Secundò suppono, quod per legem huius Regni *lib. 4. Ordinac. 48. §. 2.* maritus non potest vendere rem aliquam immobilem absque consensu, & subscriptione vxoris sub pœna quod venditio aliter facta erit nulla: & ex dictis ibidem in principio legis clarè colligitur, quod talis consensus vxoris debet esse liber, & non coactus, & quamuis id lex non exprimeret citato loco, res est manifesta, quod quando ius requirit consensum alicuius personæ, talis consensus debet esse liber, & non coactus. Quo posito constat ex informatione, quod consensus istius vxoris in venditione fuit extortus per metum cadentem in virum constantem. Nam percussio grauis & metus mortis cum minis sufficiunt ad cauendum metum cadentem in virum constantem etiam respectu viri robusti, iuxta copiosè tradita à Sanchez *lib. 4. de matrim. tota disput. 5. & 6.* & multo magis prædicta sufficiebant ad cauendum metum viri constantis respectu feminæ, quæ est fragilior, ac timidior, iuxta *cap. Cum locum*, de spons.

3. Tertiò, prædicta venditio terræ fuit nulla, & potest rescindi ex eo quod res vendita fuerit infra dimidium iusti pretij. Hoc etiam constat ex communidicto Doctorum, & decernitur expressè in lege

istius Regni *lib. 4. Ordin. tit. 13. in principio, & §. 5.* ubi lex ponit exempla tum ex parte venditoris, tum ex parte emptoris. Limitat tamen ibi lex, quod talis venditio nulla ob fraudem infra dimidium iusti pretij, non poterit rescindi vltra annos quindecim à die factæ venditionis; quod videtur fuisse sancitum ad obuian- dum litibus, ne scilicet lites mouerentur in perpetuum: eo pacto quo res præscripta non potest repeti à domino suo post certos annos, idque ob vitandas lites.

4 Neque obstat ad rescindendam hanc venditionem ob iniustum pretium infra dimidium iusti pretij dicere quod venditor id fecit sciens, & prudens, & proinde si res vendita plus valebat, præsumitur quod id liberaliter donauit. Non obstat, quia iuxta commune dictum Iuristarum, nemo præsumitur iactare res suas, de quo multa tradit Mascardus *tom. 2. de probat. conclus. 872. num. 1. & seqq.* citans multos, & dicens, quod vnusquisque præsumitur avarus rei suæ, & proinde donatio non præsumitur. Et in hoc casu satis præsumitur, quod venditor noluerit donare emptori mille ducatos, qui defuerunt ad pretium iustum. Sed quod vel fuit fraus emptoris, vel simplicitas, & ignorantia venditoris, vel magna eiusdem necessitas.

5 Hinc iam patet ob illos tres titulos posse nepotem primi instituentis hodie repetere rem sibi debitam, & sic malè venditam. Excipio, quod si iam sunt transacti anni quindecim, non poterit illam repetere ob venditionem infra dimidium iusti pretij, iuxta dicta proximè *num. 3.*

6 Dato verò quod nepos dictam terram recuperet auctoritate iudicis, non tenebitur ad onera, quæ illi

illi imposuerunt secundi emptores, seu filij primi emptoris, quia nemo potest imponere onus in re aliena, & hæc terra nunquam fuit sua. Neque obstat, quod res transit cum onere suo, vt dicitur cap. *Ex litteris*, de pignoribus, & cap. *Pastoralis*, de decimis. Nam id intelligitur rem transire cum onere suo, quando tale onus impositum est illi rei à potente illud imponere, vt modò diximus: secus si non poterat tale onus imponere.

7 Quæris: An si iste nepos autoritate iudicis prædictam terram vindicauerit, obligandus sit restituere hodie possessoribus terræ pretium illud, quod pater illorum primus emptor dedit primo venditori? Respondeo ad id non teneri. Probatur exemplo clarissimo. Emit Petrus à latrone bonâ fide rem, quæ erât mea: ego probaui coram iudice rem esse meam, & ideo iudex mandauit, vt mihi res mea traderetur. Ego non teneor reddere Petro pretium, quod ille dedit latroni: sed ipse sibi imputet, quia emit rem alienam, vel pretium traditum recuperet à latrone: quod idem in hoc casu omnino locum habet.

CASVS XXXIV.

*Appendix ad casum XIII. suprà de viua
vociis oraculis.*

Suprà casu 13. n. 14. & 15. dixi reuocata esse per D. Papâ Urb. VIII. illa duo viua vociis oracula Pij V. in quibus concedebat nostris Prouincialibus vt possint
X 3 committere

committere confessoribus, quod possent dispensare ad petendum debitum cum incestuosis, & cum illis, qui ante matrimonium vouerunt castitatem voto simplici. Postea quidam Religiosus ea de re scripto me consuluit, citans Mirandam *tomo 1. q. 47. art. 3. fol. 420.* ubi dicit, quod non obstante illa teuocatione D. Urbani VIII. idem poterant hodie nostri confessores per alias concessiones, videlicet per concessionem Eugenij IV. *in compendio Mendicantium, verbo Dispensatio §. 29.* ubi prædictus Eugenius sic concedit Benedictinis: Quod deputati ad confessiones audiendas per suos prælatos, possint omnia vota permutare, atque in omnibus, & singulis casibus, etiam ordinariis, aut per synodales, vel Prouinciales constitutiones reseruatis cum sibi confessis dispensare: præter eas censuras, &c. circa quam concessionem Rodriguez *tomo 1. qq. q. 63. art. 3.* ait quod in illa non conceditur dispensatio in his duobus casibus. Hæc sunt verba Rodriguez ibidem: *Non dat facultatem ad dispensandum, sed ad commutandum vota.* Et re vera verbum Papæ quoad vota, solum exprimit, vota permutare. Quæ cum sint verba clara & in materia odiosa, debent restringi ad solam permutationem, non verò dispensationem. Communis enim Theologorum opinio docet, quod quando Papa concedit alicui vt vota commutet, non illi concedit vt vota dispense: plus enim est votum dispensare, quam votum commutare; ac proinde credo, quod per istam concessionem non possunt confessores regulares dispensare cum coniugato, qui ante matrimonium habebat votum simplex castitatis, vt petat debitum; esset enim hoc quasi dispensare in voto simplici castitatis. Bene tamen credo, quod per prædictam concessionem

cessionem poterunt prædicti confessores regulares dispensare cum incestuosis ad petendum debitum, tales enim incestuosi non habent votum castitatis, vt suppono: sed habent illud impedimentum petendi debitum, quod non est impedimentum dirimens matrimonium, sed casus, in quo Episcopus potest dispensare, vt infra dicemus: & Papa Eugenius ibi concedit vt possint dicti confessores dispensare in casibus Episcopo reservatis.

2 Aliam concessionem citabat ille Religiosus, quæ est Iulij Secundi, per quam concedit Patribus Benedictinis Vallisoleti, vt de licentia sui superioris ad id deputati, possint dispensare cum incestuosis ad petendum debitum. Sed hæc concessio hodie non habet locum, fuit enim concessa viux vocis oraculo ad instantiam cuiusdam Cardinalis Ludouici, vt patet ex Bullario Rodriguez *Bulla 22. inter Bullas Iulij secundi fol. 599.* Aliam concessionem citauit dictus Religiosus ex compendio Mendicantium, quam ego non potui in meo libro reperire. Itaque per concessionem ab illo citatas ego non conuincor vt discedam ab eo quod suprà dixi *casu 13.* illa scilicet duæ viux vocis oracula Pij V. esse reuocata per D. Urbanū VIII. Quia tamen illi duo casus frequentes sunt, & passim obuij cōfessoribus Religiosis, laboraui quantum potui, inuenire aliquam concessionem Papalem, quæ non sit viux vocis oraculum, per quam dicti confessores possint in prædictis duobus dispensare.

3 Et quidem quod attinet ad dispensationem super voto castitatis ante matrimonium emissio, si hoc Episcopi possunt dispensare ad petendum debitum, etiam poterunt confessores Religiosi ad id deputati per Provincialgm. Nam prædicti confessores possunt

dispensare in omnibus votis, in quibus possunt Episcopi, & hoc in foro conscientiae tantum. Sic concessit Innocentius VIII. in *compendio Mendicantium*, verbo *Dispensatio* §. 16. & verbo *Absolutio* quoad saeculares 2. §. 12. & quod magis ad hoc facit est concessio Iulij II. citata à Capucino in suis notationibus ad compendium verbo *dispensatio*, titulo *Ex privilegiis Congregat. sancti Bernardi* in §. *Iulius Secundus*. Vbi refert praedictum Iulium concessisse monasterio B. Mariae de Monferrato, ut Confessores illius possent dispensare cum saecularibus in casibus, & votis Episcopis reservatis: & possent dispensare inter coniugatos, quorum alter cum alterius consanguinea adulterium commisit. Quae concessio diuersa est ab illa alia eiusdem Iulij II. supra citata: quia illa fuit facta Monasterio Vallisolerano, ista vero facta est Monasterio Monferrati. Non tamen declarat ibi Capucinus an praedicta concessio facta per Bullam, an solo viuae vocis oraculo: sed solum citat illorum Patrum compendium fol. 46. Neque ego possum illud diuinare. Simile est illud quod Collector priuilegiorum Mendicantium in verbo *Dispensatio* ad §. 17. videlicet, quod concessit Innocentius VIII. Confessoribus Minorum, ut possint dispensare in affinitatibus contractis post matrimonium consummatum, ratione coitus viri cum consanguinea vxoris, aut è contrà: & hoc quando sunt iuuenes dumtaxat. Sed hanc concessionem dicit ibi Collector non extare impressam in libris Ordinis, sed illam vidisse in libro cuiusdam curiosi Patris confessoris.

Alias concessionem refert Rodriguez citata *quest. 63. artic. 3.* diuersorum Pontificum, quae possent ad hoc intentum inservire: sed ferè in omnibus illis ipse dubitat,

dubitat, quod possint ad hoc clarè inferuire.

Et proinde fateor me nihil in hac materia inuenire potuisse, per quod possit ostendi clarè posse Religiosos confessores hodie vti illis duobus priuilegiis à Pio V. viux vocis oraculo concessis positiscitatio casu 13. & ex consequenti, vt plurimum poterunt dispensare cum illis solum qui ante matrimonium habebant votum castitatis, si id possunt facere Episcopi, iuxta proximè dicta in principio numeri tertij. Sed neque consulo vt hoc fiat propter adeo rigorosam reuocationem viux vocis oraculorum factam à D. Urbano VIII.

CASVS XXXV.

An Religiosus nimis ebriosus, & in hoc scandalosus, possit expelli à Religione?

QVæsitum à me fuit, an Religiosus nimis ebriosus, qui, sæpius cum magno scandalo sæcularium inebriatur, & sæpius admonitus non respuit, nec de illo speratur emendatio, possit ob hoc solum priuari habitu, & expelli à Religione? Hunc casum apud nullum inueni tractatum: neque audiui aliquem Religiosum propter hanc solam culpam fuisse eiectum ab Ordine. Respondi tamen tales potuisse in aliquo ebrioso concurrere circumstantias, magni scilicet scandali inter sæculares cum notabili infamia Religionis, & absque spe emendæ, vt propter hanc solam culpam possit eiici à Religione tanquam incorrigibilis. Pro quo suppono Bullas pontificias concedentes prælatis regularibus vt possint

ab Ordine expellere incorrigibiles, non specificare quales in specie debeant esse hæ culpæ; sed solum requirunt quod sint culpæ graues, de quibus non speratur emendatio.

1 Quod igitur Religiosus ebriosus cum illis particularibus grauib. circumstantiis, & sæpius admonitus non resipiscens, possit expelli ab Ordine ob hanc solam culpam, probo prius in communi: nam hæc culpa mortalis est, & nimis infamatiua Religionis. Iuuant multum ad hoc intentum illa quæ tradit Salsedo in sua praxi criminali *cap. 77.* vbi duo ostendit, primum est, grauitas huius culpæ: secundum est pœna, quâ in iure canonico punitur Clericus ebriosus. Et quod attinet ad primum, de grauitate istius culpæ, bene aduertit Salsedo, D. Paulum 1. *ad Corinth. 6.* æquiparare ebriosum cum fornicariis, idololatriis, Sodomitis, &c. Ait enim Paulus citato loco: *Neque fornicarij, neque idolis seruientes, neque molles, neque masculorum concubitores, neque auari, neque adulteri, neque ebriosi, regnum Dei possidebunt.* Non potest amplius exaggerari istius culpæ grauitas. Et ad idem intentum citat Salsedo quendam sermonem D. Augustini, & D. Isidorum, & D. Basilium multa de hoc dicentes. Iam verò infamia inducta per hoc vitium tanta est, vt ausim dicere plus infamare hoc vitium, quàm infamet luxuria. Nam ad vitium luxuriæ natura prior est, & non priuat vsu rationis. Ebrietatem verò ipsa natura auersatur, maximè cum priuet vsu rationis, quod est intolerabile malum.

2 Hac de causa Ecclesia Clerico ebrioso graues pœnas imponit, quas refert Salsedo *cit. loco.* Prima ex Concilio Agathensi, quia Clericus semel ebrius iubetur aut submoueri à communione per 30. dies, aut corporali

corporali supplicio affici. Secunda pœna est, vt si ebrietatem continuet, & non resipiscat, deponatur. Quod idem est ac priuari Ordinum sacrorum exercitio. Tertia est, quod Clericus ebriosus & admonitus non resipiscens, suspendatur ab officio & beneficio, iuxta decretum Concilij generalis Lateranensis ibi citati. Quod adeò verum est, vt etiam Clericis ea de causa interdicatur sub certis pœnis ingressus in tabernas, prout ibi citat Salsedo.

Si ergo culpa ebrietatis tam grauis est, & tam seuerè ab Ecclesia puniatur in Clerico: quid mirum si à Religione possit puniri pœna expulsionis ab Ordine, concurrentibus illis circumstantiis, quas suprà diximus?

CASVS XXXVI.

De quodam Religioso reclamante intra quinquennium contra suam professionem.

Quidam Religiosus ingressus certā Religionem, in illa professus est ob metum grauem sibi à patre incussum, vt ipse asseruit post professionem: intra quinquennium reclamauit coram Vicario generali Ordinarij, qui petitionem reclamantis accepit, & cœpit de causa cognoscere. Ob hanc causam cæteri Religiosi illius conuentus illi magnas molestias, & vexationes intulerunt, non patientes illum vt libertate, quæ aliis Religiosis concessa erat. Et idem coram prælato conuentus, quidam Religiosus notabilem

notabilem fecit iniuriar , ob quam iniurians non fuit reprehensus à prælato , sed potius ipse prælatus ipsum iniuriatum per aliquos dies in cubiculo velut in carcere inclusit : postea illi præcepit per obedientiam ne loqueretur cum aliquo sæculari , neque vllas litteras extra conuentum mitteret. Quod ille videns , ademptam scilicet sibi libertatem ad prosequendam causam , & sciens suos consanguineos impedire suæ causæ prosecutionem , & timens alia mala sibi impendentia , idque ob iustas causas , quas habebat timendi , fugit à conuentu cum habitu Religionis : sed non exiuit extra septa monasterij , quia captus est à fratribus intra limites , in quibus Religiosi solent certis diebus deambulare. Inde reductus ad monasterium carceri mancipatus est in pane , & aqua. Quod ille videns fregit vincula carceris , & fugit à conuentu extra septa monasterij , & non audens comparere ne iterum capiatur à Religiosis , vult causam suæ professionis prosequi per procuratorem.

Quæritur primò , an dictus Religiosus pœnam apostaliæ incurrerit sic fugiens à conuentu ?

Secundò , an sic fugiens amiserit ius prosequendæ suæ causæ in materia nullitatis suæ professionis ?

Tertiò , an possit eandem causam prosequi per procuratorem non comparendo in propria persona ob metum ne capiatur , & molesteretur à Religiosis prioris conuentus.

Quartò , an prædicti Religiosi potuerint illi licitè prædictas molestias inferre impediendo illi libertatem ad suam causam prosequendam.

Responsio.

Responsio.

1 Ad primum dico, hunc Religiosum non incurrisse pœnam apostatæ, ob prædictam fugam. Probo, quia subditus fugiens ob grauem vexationem quam merito timet sibi inferendam ab inferiori prælato, & recurrens ad superiorem prælatum, non est apostata, vt multis probat Rodrig^{us} tom. 1. 99. q. 30. art. 3. quia talis aditio ad superiorem in substantia est appellatio, quæ iure naturali conceditur, vt ibi probat Rodriguez cum quadam glossa: addens hanc talem fugam ad superiorem ob dictum grauamen non prohiberi à Concilio Tridentino. Sed hic Religiosus iam expertus fuerat graues molestias iniustas à prælato inferiori aliasque in futuro merito formidabat, maxime cum sibi adimeret libertatem prosequendæ suæ causæ: ergo licitè adire poterat, vel suum superiorem si ad manum haberet: vel Vicarium Episcopi coram quo iam sua causa professionis cœpta erat, ratione cuius iam dictus Vicarius generalis dici poterat prælatus istius Religiosi, non absolutè, sed ratione causæ cœptæ. Confirmatur: quia si verè professus potest fugere à prælato inferiori propter pendens grauamen, multo magis id posset facere iste, de quo agimus, de quo non constat an sit verè professus. Nam qui non est verè professus, si fugit à conuentu, non est apostata, vt probat Suarez tomo 3 de Religione lib. 3. cap. 2. num. 5. Confirmatur amplius ex eo quod tradit Mascardus tom. 2. de probat. concl. 820. cap. 16. vbi cum Couar. Boccio, Grammat. & Neriis. dicit, quod carceratus iniustè, potest fugere de carcere sine peccato, etiamsi inde custodi aliquod detrimētum contingat, quin etiam si mortem aliter vitare nequiret, posset

posset impunè custodes occidere. At constat, quod iste Religiosus iniuste carceratus est ob primam fugam, cum per illam non exierit septa monasterij, & proinde non fuerit verus apostata: ergo potuit licite fugere à carcere, maximè concurrentibus aliis vexationibus supra dictis. Facit quod tradit Sanchez *lib. 4. de matrim. disp. 5. n. 9.* vbi probat quod solus metus carceris causat metum cadentem in virum constantem. Iam verò talis metus excusat sic metuentem à multis, vt dicunt Doctores. Vltimò probatur ex eo quod tradit Ludou. Lopez *1. p. instruct. c. 56. §. in pralati, cum seqq.* vbi citant Sotum, Cord. Medinam, & alios, ait subditum non teneri obedire prælato in rebus valde difficilibus, & cum periculo vitæ, & honoris: pro quo etiam facit dictum à Sà *in Aphor. verbo obedientia num. 2.* Nam cum subditus promittit obedientiam, non intendit obligare se ad illam cum tanto suo damno. Ergo cum iste Religiosus passus fuerit tam graues molestias, vt superior narratio continet, & alias timeret, non videtur obligandus ad perseverandum in tali conuentu cum tam difficilibus difficultatibus.

2 Ad secundum dico hunc Religiosum per talem fugam non amisisse ius prosequendi causam suæ professionis, neque violasse decretum hac de re factum à Tridentino *sess. 25. cop. 19. de regular.* Nam ibi Concilium duo statuit. Primum, vt reclamatio fiat intra quinquennium: constat verò quod iste reclamauit intra quinquennium, & iam proposuerat causas nullitatis suæ professionis, coram superiore, & Ordinario. Secundò statuit ibidem Concilium, quod si habitum antea sponte dimiserit amplius non audiat. Hic verò habitum non dimisit, sed cum habitu fugit ad superiorem suæ causæ, videlicet ad Ordinarium:

rium : ergo non violauit prædictum decretum Tridentini. Imò dico, quod si in secunda fuga à conuentu habitum dimisit, timens ne cum habitus cognitus caperetur, & reduceretur ad pristinas vexationes, tunc talis dimissio habitus non illi noceret ad incurrendam prædictam pœnam Tridentini. Nam Tridentinum expresse dicit, quod si habitum sponte dimiserit. Hic autem sic dimittens habitum ob metum redeundi ad pristinas vexationes iniustas, non dimisit habitum sponte, sed inuitus ob prædictum metum; quod autem sit per metum, non sit sponte, sed inuoluntariè, cum metus causet inuoluntarium, vt docent Doctores. Probatur clarissimo, & efficaci exemplo. Nam in cap. 2. *Ne clerici, vel Monachi*, ponitur excommunicatio contra Religiosum dimittentem habitum suæ religionis. Quo non obstante dicunt Doctores, maximè Sanchez *lib. 6. de matrim. cap. 8. n. 3*, 8. quod si Religiosus transiens per terras Turcarum, vel hæreticorum timeat, quod cognitus pro monacho occidatur, potest sine peccato & sine incurfu censuræ habitum Religionis dimittere. Quod directè facit ad nostrum intentum. Addo, quod licet talis metus non interueniret, & habitum pro breui tempore dimitteret, vt per vnum diem, & statim illum reassumeret, non diceretur simpliciter habitum dimisisse. Nam parua interruptio non facit discontinuationem, neque impedit continuitatem de quo multa dicit glossa *ad cap. final. de verbor. significat. in 6. verbo Continué.*

3 Ad tertium dico, quod iste Religiosus potest prosecui causam suæ professionis per procuratorem non compatendo in propria persona. Probo primò quia Concilium Tridentinum, quando *citato cap. 19.*

ait

ait quod reclamans proponat coram superiore & Ordinario causas nullitatis suæ professionis, non requirit quod id faciat per se, & in propria persona: *quando verò lex non distinguit, neque nos debemus distinguere*, vt habetur in lege *non distinguemus*, ff. de *recepti. qui arbit.* Probatur secundò, quia nouitius absens potest facere professionem per procuratorem, vt tenent communiter Doctores, maximè Sanchez *lib. 5. Decalogi cap. 3. num. 7.* citans textus, & Doctores: ergo nullitas professionis potest probari per procuratorem, cum eadem ratio videatur esse vtrouique. Imò plus est fieri professionem per procuratorem, quàm probare illius nullitatem per procuratorem, iuxta illud dictum commune, etiam philosophicum: Plura requiruntur ad productionem vnius rei, quàm ad destructionem illius, vt ipsa experientia testatur. Et potest probari *ex cap. 1. de regulis iuris, in decretalibus*, vbi dicitur, quod omnis res per easdem causas, per quas nascitur, per easdem dissoluitur. Sed professio nasci potest per procuratorem, vt diximus; ergo dissolui potest, & probari eius nullitas per procuratorem. Tertiò probatur ex eo quod tradit Sanchez *lib. 6. Decalogi cap. 12. num. 32.* vbi cum multis probat, quod quotiescunque Religiosus potest per se comparere in iudicio ius suum prosequens, potest ad idem intentum constituere procuratorem vt pro se respondeat in iudicio. Ad quod in particulari citat regulam *potest*, de regulis iuris in 6. Cum ergo iste Religiosus possit per se in iudicio procurare nullitatem suæ professionis, poterit ad hoc idem procurandum in iudicio constituere procuratorem. Quartò, hoc clarius constabit, si ex eo quod ipse appareat personaliter in iudicio, sibi timet, notabile damnum euenturum.

euenturum. Probatur hoc clarè ex eo quod reus citatus ad locum non tutum, non tenetur comparere. Habetur expresse in capite *ex parte*, de appellat. & in Clement. *Pastoralis*, de sententia, & re iudicata, maximè §. *Quod si punitio*, vbi dicitur quod reus citatus non tenetur comparere in loco non tuto. Et pro eodem intento moneo & aduerto teneri illustrissimum Nuncium, vel Ordinarium ponere, seu deponere istum Religiosum in loco, seu in aliquo conuentu tuto, & securo, vnde possit causam suam securus prosequi. Probo imprimis per capitulum *cum locum*, de sponfal. vbi Papa iubet, vt quædam fœmina deponatur in loco tuto, & securo, in quo possit securè, & liberè respondere ad quandam causam matrimonialem. Si verò hoc Papa iubet in causa matrimonij carnalis, à fortiori id debet fieri in causa matrimonij spiritualis, qualis est professio istius Religiosi, quæ requirit maiorem libertatem. Confirmatur hoc amplius per casum relatum à Nauarro *in tomo consiliorum tit. de confessis, consilio unico*, de quadam puella, quæ eduocationis tantum gratiâ ingressa monasterium Monialium, suasionibus, & precibus Monialium fecit professionem, sed inuita: pater illius hoc sciens, petiit ab Ordinario via iuridica, vt filiam à monasterio extraheret, & reponeret in loco tuto, & libero vbi interrogata posset respondere de voluntate cum qua professionem omiserat. Illa extracta à monasterio, & de veritate interrogata respondit, se nunquam habuisse animum profitendi, sed suasionibus ac precibus Monialium id fecisse: cum antea ad crates monasterij intra clausuram, interrogata à Vicario generali de eadem professione, responderit oppositum, videlicet se voluntariè fuisse professam.

Videatur tandem Marfylla in *lib. Decisionum ad sess. 25. Tridentini cap. 17. de Regular.* vbi ait sic declarasse congregationem Cardinalium : *Si Monialis, aut Novitia neget se esse professam, Ordinarius audire poterit illam extra monasterium.* Eandem declarationem citat Farinacius in *libro suarum Decisionum, & declarationum super Tridentinum ad sess. 25. cap. 17.* Si verò ista declaratio permittit, vel potius iubet ut Monialis dubiè professa extrahatur à clausura promissa per votum particulare, & reponatur in loco securo, & libero, à fortiori id poterit fieri, seu concedi Religioso reclamanti contra suam professionem, ut scilicet extrahatur à conuentu, cum non promiserit clausuram, & proinde debeat reponi in loco libero ut possit allegare causas nullitatis suæ professionis.

4 Ad 4. quæsitum dico, Prælatus, & Religiosos prædicti conuentus hunc Religiosum prædictis molestiis, & vexationibus molestantes, indebitè omnino egisse, & contra iustitiam; præcipuè quia illum impediabant à prosecutione causæ concessa à Concilio Tridentino *sess. 25. cap. 19. de regular.* vbi concedit quod possit Religiosus allegare causas nullitatis suæ professionis coram Superiore, & Ordinario. Impediens enim aliquem ab illo, quod sibi debetur de iustitia, peccat, ut patet. Sufficiat ad hoc videre Vmbertum in *sua practica Inquisitorum, verbo defensiones, prope finem, §. Nota etiam*, vbi ad hoc intentum citat quandam legem iuris civilis, & Clementinam *pastoralis*, de re iudicata, & Bartolum, & alios dicentes ad hoc multa. Et in particulari ibi dicit quod cum defensio naturalis sit de iure naturali, & positivo, non potest Princeps prohibere alicui defensionem naturalem etiam de potestate absoluta: hoc autem

autem noto specialiter in hoc casu, quod iste Prælat-
tus pro prima fuga, in qua iste Religiosus non exiuit
à septis monasterij, nec proinde fuit apostata, nec
fugitiuus, vt patet, eum multauit pœnâ carceris, &
compedum, quæ fuit pœna valde excessiua, & exor-
bitans, maximè cùm iam causam suæ professionis ad
Ordinarium detulisset.

CASVS XXXVII.

De factura, & utilitate testamenti.

QVoniam libertas faciendi testamentum multa
commoda continet, maximè pro salute animæ,
& res est quotidiana ferè omnes tangens, libuit hoc
loco casum istum apponere pro directione multo-
rum.

Quidam homo fecit testamentum existens in pec-
cato mortali, & testamentum statim confirmauit
solemnitate requisitâ. In testamento reliquit multa
legata pia pro salute animæ suæ, vt Missas, & eleemo-
synas. Post duos menses incidit in morbum, de quo
mortuus est. Confessus est sacramentaliter, & recepit
cætera sacramenta, per quæ supponitur obiisse in gra-
tia: sed de præterito testamento nihil cogitauit, neque
illud ratificauit.

Quæsitum fuit vtrùm illa pia legata statim impleta
post mortem illius, eidem profuerint in purgatorio?
& videtur quod sic. Nam de fide est animas in pur-
gatorio iuuari piis operibus pro illis oblatis, qualia præ-
cipuè sunt Missæ, & eleemosynæ, vt praxis Christiana

obseruat, & multæ historiæ piæ proclamant, quod ob Missas oblatas, & eleemosynas aliquæ animæ exierunt à Purgatorio.

I Hoc non obstante, dico talia legata impleta, non prodesse huic animæ existenti in Purgatorio, ex vi dispositionis istius testamenti. Ante probationem suppono cum Theologis in matetia de pœnitentia, opera nostra bona esse in triplici differentia; quædam sunt bona ex se, & facta in gratia, & hæc debent fructum per viam meriti, quâ operans meretur gratiam, & gloriam, & accipiet gloriam, si in gratia moriatur, & hæc opera dicuntur opera viua. Secundò, sunt opera, quæ dicuntur mortificata, & sunt illa opera, quæ fuerunt bona ex se, & facta in gratia, sed per peccatum mortale superueniens fuerunt mortificata, & suum valorem meritorium perdiderunt coram Deo. Tertiò sunt opera quæ dicuntur mortua, quæ videlicet ex se sunt bona, & de bono obiecto, sunt tamen facta in peccato mortali, & proinde dicuntur mortua, quia non proficiuntur à spiritu viuificante, qui est gratia habitualis. Quamuis sit opinio valde probabilis Theologorum in materia de pœnitentia, quod opera secundi generis, quæ dicuntur mortificata per superuenientem gratiam sacramentalem reuiuiscant, & sic semper peccator per pœnitentiam resurgat ad maiorem gratiam, quam habuerat ante peccatum; omnes tamen Theologi dicunt, quod opera bona mortua, id est, opera bona facta ab homine existente in peccato mortali, hæc talia opera non reuiuiscunt, nec propter illa peccator pœnitens recepit aliquem gradum gratiæ, vel satisfactionis, quia scilicet nunquam fuerunt opera viua,

2 Ex hoc facillè probata manet nostra conclusio. Nam licet legata ista pia relicta ab hoc testatore fuerint opera bona, & valde meritoria, si fierent in gratia; quia tamen facta fuerunt in peccato m. & proinde fuerunt opera mortua, licet testator postea per pœnitentiam recuperauerit gratiam, non recuperauit gratiam & satisfactionem, quæ possent illis legatis respondere, si aliàs fierent in gratia. Hæc conclusio in substantia asseritur ab Henriquez *tomo 1. lib. 1. de pœnit. cap. 16. num. 4.* pro quo in *glossa littera R.* citat Sylvestrum, Gabrielem, & Honcalam, & ideo ibi consulit, quod testator testamentum faciat quando credit se esse in gratia, si vult vt sibi legata imperata proficiant. Vel si dubitat an fuerit in gratia tempore quo fecit testamentum, ratificet postea illud tempore quo credit se esse in gratia.

3 Dixi in conclusione illi non prodesse legata illa ex vi dispositionis in tali testamento, id est non proderant illi ex eo quod ipse impetrauit illa fieri: quia impetrauit existens in peccato mortali, & sic nihil meruit. Poterunt nihilominus illi prodesse Missæ, & eleemosynæ, si ab alio viuentre pro illo liberè offeratur Missa, vel eleemosyna, sed Missa oblata liberè ab alio viuo pro illo non ita abundanter illi proderit, ac proderet si ab ipso mortuo viuentre peteretur, vel imperaretur existens in gratia. Tunc enim prodesset ex opere operantis, quando illud ordinauit, quia tunc meruit, & postea in Purgatorio cum Missa diceretur prodesset etiam illi ex opere operato. Quando verò Missa offertur pro existente in purgatorio, qui non petiit, proficit illi solum ex opere operato. Hinc aduertat cum Sylvestro verbo *suffragia* §. 1. differentiam inter illum, qui existens in gratia mandat pro se fieri

nus *tomus 1. Controuersiarum lib. 2. de Purgatorio cap. 16.*
§. *Vnum solum hic est dubium*, refert quandam reuelationem B. Brigidæ *lib. 6. suarum reuelationum cap. 66.* dicentem, animam tamdiu cruciari donec restituatur quod iniuste ablatum est.

§ Ipse nihilominus Bellarminus citato loco cum Soto respondet, non obesse illi animæ si non fiat illa restitutio, dummodo illa in vita peccati veniam obtinuerit pro re malè ablata. Ratio illius est, nam Deus non punit nisi pro culpa propria in hac vita contracta; vel ergo ille defunctus peccauit non restituendo, vel non peccauit. Si non peccauit, quia fortè non potuit restituere, aut bonâ fide possedit, non debet pro illo puniri in purgatorio, quia nemo punitur sine culpa. Si verò peccauit, punietur pro culpa negligentia illius in purgatorio; & postquam ibi pœnas debitas soluerit, saluabitur, siue res illa restituatur, siue non. Ille enim est factus impotens ad restituendum, neque debet pendere salus eius ab alterius voluntate: alioqui posset anima aliqua manere in purgatorio in æternum, si videlicet hæres nunquam restitueret. Quare si restitutio possit fieri, & non fiat negligentia hæredis, peccabit quidem hæres, sed id non nocebit animæ. Si verò fiat restitutio, nihil animæ illi proderit, quia restitutio non est satisfactio pro culpa; satisfactio enim est bonum opus pœnale: pœnale autem est dare suum, quod fit per eleemosynam; restituere verò alienum non est pœnale. Sic ibi optimè, & Theologicè Bellarminus.

6 Ad apparitionem verò illam citatam *num. 4.* & alias similes respondet Bellarminus citato loco, fortè animas illas non petere restitutionem, vt restitutionem, sed vt eleemosynam: licet enim non prosit animæ

animæ si restituat rem alienam is qui tenetur restituere, tamen bene proderit, si restituat alius, qui non tenetur. Illa enim eleemosyna quædam est, & proinde satisfactoria. Si verò hinc inferas: ergo, si iuxta Bellarminum, restitutio rei iussà in testamento non prodest animæ in purgatorio si fiat, neque illi nocet si non fiat; frustra, & sine necessitate iubent homines in testamento restitui debita quæ debent. Si, inquam, sic arguas, malè argues, nam restituere debitum alienum est obligatio iustitiæ, & obligat sub mortali in hac vita, & proinde testator si potest, tenetur mandare restituere, & per hoc mandatum exonerat conscientiam suam. Si autem hæres cùm possit non restituat, hæredi imputabitur peccatum; omissio verò restitutionis non nocebit animæ, quæ remissionem peccati in hac vita obtinuit, & restitutionem imperavit: per hoc enim iam fecit quod potuit. Potest secundò responderi ad illas apparitiones, quod fortè illæ animæ sic apparentes, & petentes à viventibus restitutionem pro se fieri, id petebant antequam satis paterentur pro pœnis debitis culpæ pro re malè ablata, vt citius liberarentur à pœnis purgatorij: quod non tollit illas fuisse liberandas ab eisdem pœnis statim ac satis paterentur pro eadem culpa.

7 Ad reuelationem B. Brigittæ, nihil responder Bellarminus, in qua dicit B. Brigitta animam in purgatorio tandiu cruciari, donec restituatur ablatum iniustè. Et fortè id omisit Bellarminus de industria, cùm difficile sit illi respondere, & aliàs illius reuelationes permissæ sint, & approbatæ ab Ecclesia: & ego cum tanto Doctore possem similiter pertransire. Ne tamen rem intactam relinquam: pro illa

illa reuelatione B. Brigittæ, dico cum Martino Delrio non inferiore Doctore, in lib. 4. *Magia cap. 1. quæst. 3. sect. 4.* imprimis reuelationes B. Brigittæ non esse approbatas ab Ecclesia tanquam de fide: sed nihilominus esse examinatas ab Ecclesia, & proinde permissas, vt sine scandalo, & errore possint legi. Secundò dicit Delrio *cir. loco in responsione.* Ad 4. argumentum illorum qui illas impugnant, ait citatus Doctor, quod si aliquid in prædictis reuelationibus reperiatur, quod repugnet communiori sententiæ Theologorum, non ideo confestim damnandum est vt erroneum, cum piè, & prudenter intellectum, suis quoque probatis Autoribus, & rationibus non absurdis stabiliatur. Sic ille. Neque amplius aliquid addo.

CASVS XXXVIII.

An Religiosus post professionem possit renouare, vel mutare testamentum quod ante illam fecit?

Semel ego hac de re fui interrogatus; & iterum à me quæsitum fuit, an Monialis, quæ prius fuerat vxorata, & ante professionem poterat nominare aliquam personam in successione cuiusdam rei emphyteuticæ, quam tamen non nominauit ante professionem, posset post professionem illam personam nominare in tali successione: nec defuerunt tunc Iuristæ iuris ciuilibus, qui dicerent licitè id potuisse facere. Quod igitur Religiosus

Y s post

post professionem possit reuocare testamentum ante illam factum, tenuit Barr. in *l. sed si mors*, num. 2. ff. de donat. & Megalus 1. 2. instructo. confess. lib. 2. cap. 14. & alij quos ipse citat. Qui dicunt posse Religiosum professum in Religione capaci bonorum, reuocare testamentum. Præcipuum argumentum est; quia Religiosus post professionem potest reuocare donationem causâ mortis antea factam, vel factam inter coniuges, quæ morte confirmari solet: ergo etiam poterit reuocare testamentum antea à se factum.

I Dicendum est tamen non posse nisi obtineat privilegium à Summo Pontifice. Ita Sentit Sanch. lib. 6. de matrim. disput. 17. num. 11. Rodrig. tom. 3. qq. 9. 69. art. 3. Tuschus, Glarus, Vasquez, Molina, & alij citati à Bonacina, quos ipse sequitur tom. 2. disputat. 3. q. 17. punct. 6. n. 7. Probatur primò, quia qui non potest facere testamentum, non potest illud reuocare, cum eadem facultas requiri videatur ad reuocandum testamentum, ac requiritur ad illud faciendum: Religiosus verò professus non potest facere testamentum, cum non habeat velle, aut nolle: ergo non potest reuocare testamentum. Secundò probatur, quia testamentum nō potest reuocari solâ contrariâ voluntate, aut expressâ reuocatione, sed alio testamento, ut dicitur in lege, *si iure*, ff. de legat. 2. sed Religiosus non potest concedere nouum testamentum: ergo non potest reuocare præteritum testamentum. Tertiò probari potest, quia si Religiosus fecit professionem in Religione bonorum incapaci, statim succedit hæres institutus, seu venientes ab intestato, & legata, ac fideicommissa statim soluenda sunt legatariis, & fideicommissariis. Si verò professionem fecit in Religione capaci bonorum

rum, loco Religiosi succedit monasterium quandiu Religiosus viuit, si ipse oppositum non disposuit in testamento relinquens alicui bona sua; tunc enim ille cui relinquit, statim acquirit possessionem. Dixi *nisi obtineat privilegium Papa*, quia Papa potest ex iusta causa dispensare cum Religioso in voto paupertatis, & proinde in testamento faciendo, & proinde poterit eidem concedere, vt possit reuocare testamentum. Quanquam id ferè nunquam Papa concedet, neque concessit, maximè quando bona relicta in testamento priori iam sunt possessa ab illo cui fuerant relicta.

2 Addit Bonacina citato loco quod si Religiosus, qui antea fecerat testamentum, transferatur ad statum, in quo habeat disponendi facultatem, vt si fiat Episcopus: vel obtineat pleno iure aliquod beneficium sæculare: vel transferatur ad statum clericalem, tunc poterit reuocare testamentum, & bona aliis vi testamenti relicta repetere. Sed ego vel non intelligo, vel non approbo, si ille id intelligat postquam iam possessionem acquisuerunt illi, quibus bona illa in testamento relicta sunt: tunc enim illa ab illis non poterit repetere, etiam si fiat Episcopus. Probo clarè, quia iuxta communem Doctorum opinionem, donatio liberalis acceptata à donatario valida est; nisi intercedat ingratitudo, iniuria facta donatori, &c. Ergo multo minus res alicui per testamentum iam donata poterit reuocari à testatore, postquam talis rei acquisiuit dominium. Secundò probatur ex eo quod suprà dixi cum Bonacina, videlicet quod si Religiosus facit professionem in Religione incapaci, statim bona transeunt ad hæredes, & legata statim debentur legatariis. Quod similiter dicendum videtur

derur de testamento facto à Religioso paulo post translato ad Episcopatum; iam enim bona quæ reliquit in testamento, acquisita sunt ab illis quibus illa reliquit, & proinde non poterit illa ab iis repetere.

3 Ad rationem positam in principio contra nostram conclusionem positam *num. 1.* respondet Sanchez *citato num. 11.* dicens quod licet professus possit reuocare donationem causâ mortis, vel inter coniuges, non tamen potest reuocare prius testamentum; datur enim dispar ratio: nam testamentum præteritum non potest reuocari, nisi per aliud nouum testamentum, quod nouum testamentum Religiosus non potest facere. At donatio causâ mortis, vel inter coniuges potest reuocari absque testamento, inò potest reuocari ex sola tacita voluntate, prout ipse Sanchez probat *disp. 15. eiusdem libri 6. & citat ad hoc in num. 11. citato Emmanuelem Suarez.*

4 Sed circa illud quod in principio dixi à me quæsitum fuisse, an Monialis olim coniugata, post professionem facere potuisset illam nominationem in re emphyteutica, quam tamen non fecit existens in sæculo, & ego respondi illam facere non potuisse: potest probari quod illam potuerit facere, saltem de licentia sui prælati: nam frater Minorita non potest esse executor testamenti, ex declaratione regulæ fratrum Minorum facta per Clementem V. in Clem. *Exini*, de verborum signif. & tamen Sanchez *lib. 6. Decalogi, cap. 11. num. 41.* tenet quod licet frater Minor non possit esse testamentarius, seu executor testamenti, potest tamen nominare testamentarium, si testamento illum non nominet, sed solum dicat in testamento: Erit executor mei testamenti, ille quem designauerit frater Fullanus frater Minorum. Et tunc ille
nominatus

nominatus à fratre Minore erit verus testamentarius. Atque ita potest aliquis ex commissione facere id quod ille non potest esse. Et proinde potuit illa Monialis, & potest hodie Religiosus post professionem nominare in successione alicuius emphyteusis, vel maioratus illum quem poterat antea nominare, & non nominauit. His non obstantibus, ego persisto in eo quod tunc dixi, & modò dico non posse Religiosum post professionem facere illam nominationem. Nam actus ille nominandi in successione emphyteusis, est quasi iurisdictio, & confert dominium vile nominato super re emphyteutica, vt patet: Religiosus verò nec de licentia Prælati potest dare dominium, vel iurisdictionem alicui. At quando Religiosus ex Ordine Minorum de commissione testatoris nominat testamentarium sui testamenti, non confert nominato vllam iurisdictionem, nec dominium, sed solam administrationem. Præterea nominare aliquem in successione rei emphyteuticæ est actio pure secularis, & transiens cum persona donec viuit. At non conueuit quod persona Religiosa exerceat illas actiones forenses: & præterea si illa facultas nominandi successorem in re emphyteutica transit cum persona, id est, durat solum illa viuentem, cum post mortem nequeat sic nominare: Religiosus moritur ciuilitè per professionem, ob quam solam mortem ciuilem reputatur mortuus etiam apud ius ciuile, ita vt non possit facere testamentum, nec proinde nominare aliquem in successione rei litigiosæ, seu emphyteuticæ.

§ Cum hoc dubio coniunctum est aliud an Religiosus post professionem possit declarare coram iudice dubia sui testamenti à se facti ante professionem?

Ad

Ad quod responderet affirmatiuè Rodriguez *tom. 3. 99. quæst. 69. art. 2.* & in hoc non est dubium, quia Religiosus sic declarans testamentum à se factum nihil donat, neque distribuit.

CASVS XXXIX.

De prælatura, vel officio in Religione acquisito simoniacè.

CONSTAT ex cap. *Matheus*, & ex cap. *Sicut tuis*, de simonia, & Extrauagante 2. de *Simonia*, quod obtinens beneficium Ecclesiasticum per simoniam, etiam si ipsa simonia sit occulta, talis collatio beneficij fuit nulla, & tenetur tale beneficium dimittere, & omnes fructus perceptos restituere. Quod adeò iura citata premunt, vt in dicto cap. *Sicut tuis*, præcipiatur, quod si is cui collatum est beneficium, post illius possessionem sciat illud beneficium sibi fuisse collatum, præuia simonia commissâ ab alio amico, cuius simoniæ ipse beneficium iam obtinens non fuit conscius: tenetur talis beneficiarius vbi primum conscius fuerit de tali simonia interueniente in collatione sui beneficij, tenetur, inquam, beneficium resignare cum fructibus vt explicat communis opinio Doctorum. Pro quo inter cæteros videatur Suarez *lib. 4. de Relig. tom. 1. cap...* Hoc posito, dubium est an hæc pœnæ locum etiam habeant in prælaturis Religionum, Prouincialis, Prioris, Rectoris, Guardiani, & similibus, & in aliis officiis Religionum vt Diffinitoris, & cæterorum, itavt horum obtentio per simoniam secretam

secretam, & ignotam, sit nulla, & tales praelaturas & officia obtinentes teneantur in conscientia illa dimittere? Partem affirmatiuam tenent Caietanus in *sum. verbo* Excommunicatio, *cap. 72.* Armilla *eodem verbo cap. 59.* Suarez *cit. tom. 1. de Relig. lib. 4. cap. 57. num. 47.* Reginald. *lib. 23. num. 181.* & alij. Probant, quia huiusmodi officia Religionum vocantur ab alijs quibus beneficia, & suo modo habent præbendam. Secundò, quia de his expresse loqui videtur Extrauagans 2. *de simonia* citata, in illis verbis ibi positis: *Electiones, postulationes, prouisiones, in Ecclesijs, & Monasterijs, &c.*

1 Contrariam sententiam, pro quiete Religionum tenent Nauarr. *cap. 23. num. 111. vers. 7.* Lessius *lib. 2. cap. 36. dub. 25. num. 137.* Azor 3. *part. lib. 12. de simonia cap. 21. quæst. 6. ad finem,* & Bonacina *tom. 1. disputat. 1. de simonia, quæst. 7. puncto 1. §. 2. num. 4.* ubi citat alios dicentes excommunicationem non incurri nisi ob simoniam in ordine, & beneficio: praelatura verò Religionis non est beneficium, ut mox videbimus. Idem tenet idem Bonacina *eadem q. 7. punct. 2. num. 24.* Ratio principalis istius opinionis est, quia citati textus solum loquuntur de beneficijs Ecclesiasticis, quod sic probo. Beneficium Ecclesiasticum sic definitur communiter, maximè à Reginaldo *lib. 19. num. 78.* hoc modo: Est ius percipiendi bona Ecclesiastica toto vitæ tempore constitutum ab Ecclesia ad sustentationem propriam clerici ratione officij spiritualis quod præstare tenetur. Quæ omnes ferè conditiones desunt in Prælato regulari, verbi gratiâ Rectore, vel Guardiano: hi enim non recipiunt bona Ecclesiastica sibi ad insumenda illa libere, sed tota in vtilitatem conuentus distribuunt, nec

nec recipiunt hæc bona toto tempore vitæ suæ, cùm de ordinario sint triennales. Neque bona illius conuentus sunt instituta ad sustentationem propriam talis Prælati, sed ad sustentationem totius conuentus : ergo prælatura Religionis, & officium Religionis non est beneficium Ecclesiasticum. Cùmque non sit beneficium Ecclesiasticum, & citata capitula iuris loquantur clarè de beneficio Ecclesiastico, sequitur, quod illorum pænæ rigorosæ, qualis est excommunicatio, nullitas obtentionis, & resignatio beneficij, non debent extendi ad prælaturas, & officia Religionis, quæ non sunt beneficia Ecclesiastica; cum lex pœnalis sit restringenda, & non extendenda de casu ad casum, vt tenet communis Doctorum sententia; & traditur *in regula iuris in 6. dicente: odia restringi, fauores conuenit ampliari*. Nec obstat quod dicunt Doctores oppositi, videlicet, quod licet prælatura Religionis non sit beneficium Ecclesiasticum propriè acceptum, est tamen officium Ecclesiasticum, quod beneficio comparatur: non obstat, inquam, quoniam, vt respondet Bonacina, *in priori loco supra citato*, in materia pœnali non valet argumentum à pari, vel à maiori ad maius: sed proprietati verborum standum est. Nam si in materia pœnali non esset standum proprietati verborum, sed licitum esset pœnam extendere ad casus non propriè significatos per verba legis contingerent quotidie multæ extorsiones, imò iniustitiæ, puniendo scilicet id quod lex nullo modo intendit. Probatur etiam à Bonacina *cit. num. 24.* quia licet in Extrauaganti citata dicat Papa se excommunicare obtinentes prouisiones, electiones, &c. in Ecclesiis, & monasteriis: illud verbum *Monasteriis*, positum est vt comprehenderet non

non prælaturam religiosam, & ordinariam : sed vt comprehenderet beneficium Ecclesiasticum regulare, quod est verè beneficium Ecclesiasticum, & potest obtineri ab aliquibus regularibus. Vnde Doctores communiter diuidunt beneficium Ecclesiasticum in sæculare, & regulare, de quo Doctores in materia de beneficiis. Et hinc patet solutio ad prædicta verba Extrauagantis posita in principio pro parte contraria.

2 Ex prædictis colligitur, quod Religiosus, qui prælaturam Ordinis, vel officium Diffinitoris, vel aliud simile, obtinuit dando pecuniam, vel donapretio æstimabilia, & pretiosa, commisit quidem simoniam mortalem: sed non incurrit excommunicationem, vel alias pœnas iuris, ex vi ipsius iuris communis. Nam simoniacus non incurrit excommunicationem, nisi fuerit simoniacus in Ordine, vel beneficio vero Ecclesiastico, quale non est prælatura regularis, vt vidimus supra num. 1. Sic tenet expressè Nauar. in sum. Latina cap. 23. num. 11. idem tenet Angelus verbo simoniacus num. 9. Rozella eodem verbo, num. 13. Syluest. eodem verbo q. 12. Azor tom. 3. lib. 12. cap. 21. q. 6. Sà in Aphorism. verbo Simonia num. 6. Dixi Religiosos hanc excommunicationem in suis electionibus simoniacis non incurrere ex vi iuris communis: quia ex alio capite illam poterunt incurrere, videlicet ob subornationem in illa interuenientem; quæ subornatio, quodammodo simonia iudicari potest cum sit munus à lingua, quod in iure prohibetur. Extant verò duæ Bullæ Pontificiæ excommunicantes Religiosos qui ante electiones subornant, quas refert Rodriguez tomo 2. qq. q. 56. & aliam Clementis VIII. contra Religiosos Ordinis Prædicato-

rum, & Minorum. Cæteri Religiosi viderint quid ad se spectet.

*Appendix ad casum præcedentem,
& Casus XL.*

Occasione casus proximè præcedentis pono hunc qui contigit in quadam Religione. Et est talis : Commisit quidam Religiosus culpam, circa quam sunt duæ opiniones Doctorum probabiles; quarum vna affirmat per illam culpam incurrisse excommunicationem, & priuationem iuxta quandam legem canonicam. Altera opinio tenet per illam culpam non incurri prædictas pœnas in lege contentas : qualis in terminis fuit casus præteritus ubi vidimus sex Doctores citatos *num. 2.* asserere Religiosum obtinentem prælaturam Ordinis simoniacè, non incurrire excommunicationem, & alias pœnas iuris. E contrà datur alia opinio Suarez *tomo 1. de Relig. lib. 4. cap. 57.* & aliorum citatorum in principio casus præcedentis; qui omnes affirmant prædictum Religiosum incurrisse excommunicationem & alias pœnas iuris.

Quæritur an stante hac varietate opinionum, quæ sunt ambæ probabiles, si illa culpa probeatur iuridicè coram iudice Ecclesiastico, possit iudex Ecclesiasticus sequendo partem affirmatiuam condemnare reum, & illum declarare excommunicatum, & priuatum, non obstante opinione probabili in oppositum? Et videtur id posse facere, quia iudex in iudicando potest sequi vnâ opinionem probabilem
relictâ a

reliatâ aliâ probabili, maximè si opinio quam sequitur sit probabilis ex parte iuris. Sic tenent communiter Doctores, maximè Sayro in *clavi Regia lib. 1. cap. 11. num. 4.* citans Sorum, Arragon. Salon. Valentiam, & Medinam. Additque Sayro in hoc casu, secluso scandalo, posse iudicem propter amicum modò secundum vnam, modò secundum aliam opinionem iudicare. Et probat, quia cum vtraque opinio sit æquè probabilis, iudicando nunc secundum vnam opinionem, nunc secundum aliam, facit semper quod est licitum, & licito nititur fundamento, & proinde non peccat.

I Quo non obstante, dico, in tali casu non posse iudicem Ecclesiasticum talem Religiosum declarare excommunicatum, neque priuatum, cum sit opinio grauium Doctorum illum prædictas pœnas non incurrisse. Huius opinionis est Sayro *citato libro cap. 13. num. 22.* & probat, quia incerta pro certis habenda non sunt. Et in hoc casu incertum est an hic reus incurrerit illas pœnas, cum multi, & graues Doctores probabili ducti fundamento dicant non incurrisse: ergo non est declarandus pro certo excommunicato ille, de quo incertum est an talis existat: pœna enim excommunicationis grauissima non debet imponi pro delicto dubio. Secundò probatur, quia vt reus condemnatur debet constare de delicto commissio, vt habetur cap. *& si Clerici*, de iudiciis, & cap. *Sciunt cuncti*, 2. q. vlt. At quando sunt diuersæ opiniones, non constat certò de delicto, cum alij dicant deliquisse, alij negent: ergo non potest declarari vt talis. Probatur minor, quia licet constet de casu commissio, & constet quod fuerit peccatum, non constat an talis casus fuerit peccatum, vel an tale peccatum

fuerit illud pro quo lex pœnam illam imponit : & proinde non clarè constar an prædicta lex fuerit violata.

2 Si verò sic arguas. Datis duabus opinionibus, probabilibus : non solum erit probabile non adfuisse hanc culpam , sed etiam erit probabile interuenisse talem culpam : ergo propter hanc secundam probabilitatem quod talis culpa interuenerit , poterit iudicari , & condemnari. Neganda est consequentia : nam licet probabilitas sit æqualis pro vtraque parte , tamen reus in hac materia possidet , & iuxta decreta in iure , *in pari causa , potior est conditio possidentis* , per regulam 65. *de regul. iuris in 6. & l. in pari causa ff. eodem tit.* vbi notat glossa id decretum fuisse in fauorem rei , qui in pari causa debet absolui , & non condemnari. Et ex consequenti , si reus pro se habet etiam suam probabilitatem , non debet condemnari , siquidem est in possessione : & probabilitas actoris , vel partis oppositæ non debet reum deicere à sua probabilitate. Facit quod dicitur cap. *ex litteris* , de probat. videlicet quod *promptiora sunt iura ad absoluendum , quàm ad condemnandum*. Et addit Panormitanus ad cap. *quanto* , de præsumpt. quod licet maior sit probatio pro actore , seu accusatore , quàm pro reo ; si tamen excessus sit exiguus , potius pro reo ; quàm pro actore est iudicandum. Facit etiam quod tradit glossa *in capite Clerici* 81. *distinct.* vbi dicit quod si duo Clerici affirmant Petrum tali die fuisse fornicatum , & alij duo laici dicant contrarium , præponendi sunt laici Clericis , licet sint laici inferiores Clericis , & assignat causam : quia duo testes laici , licet sint inferioris gradus , & reputationis quàm Clerici , testificantur pro reo , cui semper fauendum est. Vide

Rodrig.

Rodrig. tom. 2. qq. q. 39. art. 2. & Salon *secunda secunda* q. 63. art. 2. *controu. 2. conclusione 3.* vbi cum aliquibus citatis, dicit licitum esse iudici sequi partem probabilem in fauorem rei, relictâ parte probabiliori accusatoris, & hoc præcipuè in criminalibus. Quod probat primò, quia iuxta regulam iuris in 6. quando iura partium sunt obscura, licet declinare in fauorem rei: sed quando pars rei est probabilis, licet pars accusatoris sit probabilior, iura non sunt clara, sed adhuc obscura: ergo fauendum est reo.

3 Quia omnia iura clamant fauendum esse reo potius quàm actori, vt tradit glossa *super regulam undecimam iuris* in 6. vbi ponit tres causas istius regulæ. Prima est: quia actor imperit, reus verò defendit. Codic. *de dilat. l. si quando.* Secunda, quia nullus præsumitur obligatus, vel obnoxius, *In Authent. collat. 6. quibus modis natu. effi. sui §. Natura siquidem.* Tertia, quia reus in iudicio pugnat pro libertate: & sic videmus quod existente dubio an aliquis sit excommunicatus, siue dubium sit dubium facti, siue dubium iuris, non debet iudicari excommunicatus in foro externo, vt tenet Innoc. *super cap. Cum tu, fin. de testib. & attest.* & ibi Hostiens. *num. 1.* Ioan. Andr. Cardinal. Henricus, & alij. Imò in vtroque foro censendum est non esse excommunicatum, vt fusè tradit Sanchez *lib. 1. Decalogi cap. 10. num. 56.* & eodem modo, si dubitatur an aliquis sit irregularis, non debet vt talis iudicari in vtroque foro, vt latè probat Suarez *de censur. disp. 40. sect. 5. & 6.* Quod ergo idem faciendum sit, quando datur diuersitas opinionum, probatur, quia iam tunc non est certum, quod excommunicationem incurrerit, siquidem alij affirmant, alij negant. Et (vt benè dicit

Suarez loco proximè cit. *sect* 5. *num.* 6. loquens de irregularitate) quantumcunque probabilis sit opinio dicens in tali textu contineri irregularitatem : nihilo minus si id possit cum probabilitate negari , nunquam potest iure dici in tali textu contineri irregularitatem , nisi apud eos qui appellant evidens quidquid ipsi opinantur. Et sic tenet Suarez quod quodocunque est diuersitas opinionum, non debet quis reputari irregularis : & idem censet dicendum de incursu censuram.

4 Et non solùm in tali casu reus non est declarandus pro excommunicato, sed nec aliqua pœna puniri potest. Hæc colligitur ex præcedentibus : & probatur ex cap. *Cognoscentes*, de constit. vbi dicitur : Rem , quæ culpa caret, in damnum vocari non conuenit. Ergo si is qui sequitur vnâ opinionem probabilem, relicta probabiliori, non peccat, vt communis opinio docet, neque etiam ob id poterit puniri, & probatur ex Syluest. *verbo* pœna *num.* 1. Pœna est id quod pro culpa infertur, & punit, ac vindicat, quod quisque commisit : ergo vbi non est culpa, non potest pœna licitè infligi. Et per consequens, si sequens opinionem probabilem non peccat, non poterit exinde puniri.

5 Et redeundo ad casum positum in præcedenti casu 49. de procurante prælaturam Religionis per simoniam, non est mens mea hîc, quod non peccet nec mereatur pœnam : peccat enim, & meretur pœnam. Sed est mens nostra dicere quod non peccauit peccato illo quod puniunt textus ibi citati, nec meretur pœnam illorum, excommunicationis scilicet, & cæterarum ; idque ob varias opiniones Doctorum, vt vidimus : quorum aliqui dicunt illius peccatum non fuisse

fuisse peccatum in illis textibus punitum, cum non procurauerit simoniacè proprium, & verum beneficium Ecclesiasticum: poterit tamen puniri aliâ pœnâ condignâ, & respondente tali de delicto, si sit probatum in foro externo.

CASVS — XLI.

An Prælati regularis possit absolvere à simonia in ordine, & à casibus Bullæ Cœnæ?

PROPTER dicta in duobus casibus præcedentibus, volui hoc loco præsentare duos casus adiciere in gratiam Religiosorum. Primus est, An prælati regulares possint absolvere suos subditos à simonia commissâ in ordine, vel beneficio? Secundus, an possint illos absolvere à casibus contentis in Bulla Cœnæ Domini?

Et quod attinet ad primum: Suarez in *tomo 4. de Religione lib. 2. de Religiosis cap. 21. num. 9.* expresse tenet non posse prælatum regularem absolvere suum subditum à simonia contractâ in ordine sacro. Probat, quia Sixtus V. in motu proprio aduersus clericos malè promotos §. 8. pœnas excommunicationis, & alias positas in iure communi denudè renouat, & illarum absolutionem sibi reseruat, reuocans quæcunque priuilegia Religiosorum, etiam contenta in mari magno, vel quibuscunque Ordinibus, aut personis regularibus concessa. Et similiter derogat facultatem Concilij Trident. concessam Episcopis ad absoluendum à casibus occultis. Quam reuocationē dicit adhuc manere. Nam licet Clemens. VIII.

motu proprio anno 1595. constitutionem illam Sixti V. reduxit ad terminos iuris communis, & Concilij Tridentini addidit exceptionem : *Præterquam contra simoniacè ordinatos, & ordinantes inflictas.* Idem tenet Rodriguez tom. 1. qq. q. 20. art. 13. ad finem, ductus ex eodem motu proprio Sixti V.

1 Quonon obstante, credo posse hodie prælatum regularem absoluerè suum subditum à simonia commissâ in ordine, vel beneficio. Probo, quia licet Sixtus V. reuocauerit omnia priuilegia Religiosorum, per quæ id poterant absoluerè, tamen postea Clemens VIII. in Bullario Rodriguez fol. 1201. confirmauit priuilegia Minorum ex certa scientia, quod idem fecit postea Paulus V. & Clemens VIII. in prædicta Bulla confirmatoria, addidit hoc verbum, *Confirmamus & innouamus.* Est autem communis Doctorum opinio, quod quando Papa in confirmatione priuilegiorum ponit verbum *ex certa scientia*, & verbum *innouamus*, censetur confirmare etiam priuilegia talium Religiosorum, quæ antea per aliquem Summum Pontificem fuerant reuocata. Sic tradit glossa in *cap. quia diuersitatis*, & in *cap. 1. de transact.* Et confirmatur, quia talis confirmatio ex certa scientia habet vim confirmandi actum nullum reddendo illum de inualido validum, seu de priuilegio nullo facere validum. Sic Suarez *suæ lib. 8. de legibus, cap. 18. à n. 12.* idem tenet Collector priuilegiorum Mendicantium *verbo priuilegium ad §. 15.* dicens multos famosos Doctores vniuersitatis Salmantinæ declarasse, quod quodocunque aliqua priuilegia conceduntur de nouo ; cum hac clausula : *Non obstantibus reuocationibus Apostolicis.* Intelliguntur viuificata, & de nouo concessa etiam illa, quæ fuerant reuocata.

At

At Clemens VIII. in citata Bulla dicit *Innouamus*, & in proemio Bullæ dicit: *Et in præstium statum reponat.* & post medium Bullæ dans iudices conseruatores pro defensione dictorum priuilegiarum, præcipit illis vt procurent: *Omnia semper in præstium reponi.* Quæ omnia verba satis innuunt confirmare voluisse etiam priuilegia reuocata; maximè cum ibi Clemens VIII. non apposuerit clausulam, *Quatenus sunt in vsu.* At constat, quod ante illam reuocationem factam à Sixto, prælati regulares poterant absolvere subditos ab omni simili excommunicatione, maximè per concessionem Pij V. factam prælatis Patrum Dominicanorum, quibus concessit vt per se possent absolvere subditos ab omnibus casibus occultis, quæ possunt Episcopi absolvere: & huius meæ opinionis est etiam. nouiter Frater Hieronymus Rodriguez in *suis resolutionibus, resol. 3. num. 7.*

2 Dixi posse prælatum absolvere suum subditum simoniacum in Ordine: nam quæstio non modica esse potest, an confessores regulares possint hodie absolvere Clericum simoniacum in ordine, vel beneficio ad se venientem pro confessione sacramentali audienda? Hunc casum non inueni expressum ad vllum recentiorum. Sed tamen (sub correctione doctiorum) credo illos talem Clericum posse absolvere virtute suorum priuilegiarum. Probo, quia prædicti Religiosi id poterant facere ante illam reuocationem Sixti V. maximè per priuilegium Sixti IV. *apud compendium Mendicantium, verbo Absolutio quoad sæculares 2. §. 20. cum annotatione Cordub. ad dictum §. 20.* per quod concessit confessoribus Ordinis Minimorum, vt possint absolvere pœnitentes ab omnibus casibus excommunicationis, suspensionis, &c.

Episcopis à iure, vel ab homine reseruatis. Et simile priuilegium extat in eodem compendio, & in eodem verbo §. 19. concessum Benedictinis: & clariùs adhuc id poterunt confessores Societatis Iesu per priuilegium illis concessum à Paulo III. & transcriptum à Rodrig. in *Addit. ad §. 9. num. 120.* Per quod Papa concedit illis patribus (& proinde cum illis communicantibus) vt pœnitentes ad se venientes possint absolvere ab omnibus censuris, & pœnis Ecclesiasticis, exceptis contentis in Bulla Cœnæ. Quapropter licet illa priuilegia sint reuocata per Sixtum V. si tamen illi Religiosi quibus illa concessa fuerunt, habeant confirmata sua priuilegia ex certa scientia (vt suppono) poterunt eisdem vtì, ob rationes claras, quas adduxi in numero 1. proximè præcedenti.

3 Possset etiam hîc dubitari; an prædictus simoniacus in ordine, & beneficio possit absolui per Bullam Cruciatæ? Neque etiam hunc casum inueni apud vllum. Credo tamen similiter quod possit. Moueor quia Bulla Cruciatæ concedit, quod possit absolui illam habens ab omnibus censuris, etiam contentis in Bulla Cœnæ, præter aliquas ibi in Cruciatæ exceptas: & excommunicatio contra simoniacos in ordine, vel beneficio, neque est contenta in Bulla Cœnæ, neque est excepta in Bulla Cruciatæ. Addo quod priuilegia Cruciatæ singulis annis denuo conceduntur post illam reuocationem Sixti V. ergo licet Sixtus V. reuocasset priuilegia Cruciatæ, de quo non constat, cum priuilegia Cruciatæ nunquam reuocentur, nisi exprimatur, sequitur quod adhuc per Cruciatam possit absolui talis simoniacus, cum priuilegium Cruciatæ absoluedi à censuris singulis annis illi concedatur
post

post illam reuocationem Sixti V. & Papa antecessor non possit ligare manus Papæ successoris.

De secunda parte huius casus, videlicet an possint prælati regulares absoluere suos subditos à casibus Bullæ Cænæ, maior est dubitatio, tum ob multitudinem Doctorum varia dicentium in hac materia: tum præcipuè ob hæc duo fortia argumenta, primum est, quia in fine Bullæ Cænæ reuocantur omnia priuilegia quibuscunque in contrarium concessa: & hæc reuocatio legitur singulis annis in Ecclesia. Secundum est, quoniam sic Religiosi possent absoluere suos subditos ab hæresi occulta, qui est præcipuus casus contentus in Bulla Cænæ: quod tamen asserere, nimis dubium, & minus tutum est propter multa priuilegia in contrarium concessa tribunali sancti Officii, eidem soli tribunali referuantia hæresis absolutionem.

4 Quod ergo attinet ad primam partem istius secundi casus, de absolutione à casibus Bullæ Cænæ, Suarez *tom. 4. de Relig. lib. 2. cap. 21. num. 8. in fine*, ait probabile esse quod prælati regulares id possunt circa suos subditos: & suam Religionem obtinuisse à Gregor. XIII. declarationem, & renouationem suorum priuilegiorum circa hanc materiam. Idem tenet Rodriguez *in Addit. ad Cruciatam, Addit. ad §. 9. n. 64.*

§. *Testas posteras.* vbi in substantia docet, quod reuocationes priuilegiorum Mendicantium factæ in singulis annis per Bullam Cænæ Domini, non reuocant priuilegia Religiosorum, in quibus illis specialiter conceditur absolutio à talibus casibus Cænæ Domini; sed solum esse mentem Summorum. Pontificum reuocare licentias, & priuilegia, per quæ in generali id concederetur. Cui distinctioni etiam fauet

Suarez

Suarez *cit. cit. cap. 23. num. 7. in fin.* Idem tenet frater Hieronymus Rodriguez *citata resolutione 3. num. 3.* ubi absolute tenet posse regulares prelatos absol-
uere suos subditos à casibus Bullæ Cœnæ. Et citat ad hoc Mirandam *tom. 2. Manual. quest. 7. artic. 3.* Id
verò quod dicit Rodriguez citato loco, addit; vide-
licet, non reuocari per Bullam Cœnæ priuilegia par-
ticularia, per quæ illis conceditur in particulari absol-
ui posse à casibus Bullæ Cœnæ, sed solum priuilegia
in communi, per quæ videtur concedi talis abso-
lutio: probat inquam Rodriguez *citato loco §. De lo
dicho*, hoc claro, & bono exemplo: nam Bulla Cœ-
næ singulis annis publicata, non reuocat faculta-
tem Cruciatæ absoluendi à casibus Bullæ Cœnæ in
illa contentis, pro quibus absoluendis specialem ibi
concedit facultatem: ergo pari modo illa reuocatio
Bullæ Cœnæ non reuocabit priuilegia religiosorum
per quæ illis Sedes Apostolica concesserat posse ab-
solui in particulari ab omnibus, vel ab aliquibus ca-
sibus Bullæ Cœnæ. Quod verò Religiosi hæc priui-
legia absoluendi à casibus Bullæ Cœnæ olim habue-
runt, ultra multa priuilegia contenta in compendio
Mendicantium verbo *Absolutio quoad fratres*, suffi-
ciat videre Bullam Pij V. per quam concedit prela-
tis Ordinis Patris Dominici, vt possint per se absol-
uere suos subditos ab omnibus casibus, & censuris,
sicut possunt Episcopi absoluere suos subditos per
facultatem illis concessam à Concilio Tridentino in
foro conscientiæ. Iam verò Episcopi per dictam fa-
cultatem Tridentini *sess. 24. cap. 6.* possunt in foro con-
scientiæ absoluere suos subditos à casibus Bullæ Cœ-
næ in foro interno, etiam si sit hæresis occulta. Hoc
priuilegium Pij V. transcribit Rodrig. *tom. 1. qq. 9. 61.*

art. 9. ad finem; neque ego video prædictam Bullam Pij V. esse reuocatam. Et per hæc responsum manet ad primam partem ipsius secundi casus; dico enim posse Religiosos per suos prælatos absolui in foro conscientie à casibus Bullæ Cœnæ, exceptâ hæresi (de qua statim dicam) neque huic ob stare primum argumentum suprà de reuocatione facta in Bulla Cœnæ singulis annis: ad hoc enim iam respondi paulò suprà in hoc *num. 4.* cum Suar. & Rod.

5 Tota dubitatio est de eo quod infert secundum argumentum suprà positum, videlicet quod si prælati possunt absolvere suos subditos à casibus Bullæ Cœnæ, poterunt etiam eosdem absolvere ab hæresi occulta. Et quidem partem affirmatiuam, quod possint, tenet clarè Suarez *citato cap. 21. num. 9. post medium*, & *eodem cap. 21. num. 2.* dicens Alexandrum VI. id concessisse fratribus Minoribus, & addit suæ Religioni id concessisse Gregorium XIII. & scio aliquos Doctores hodie viuentes idem scripto suo dixisse. Et posset probari ex allata Bulla Pij V. qua concedit prælatis Dominicanis omnia quæ possunt Episcopi per Concilium Trident. Episcopi verò possunt absolvere ab hæresi occulta per dictum Concilium Tridentinum. Maior autem ratio videtur, vt hæc facultas absoluedi ab hæresi occulta concedatur prælatis regularibus erga suos subditos, quàm Episcopis erga suos. Nam subditi Religiosi, & Moniales recurrendo ad Tribunal S. Officij poterunt incurrere infamiam propriam, & totius Ordinis, quod non sic militat in subditis sæcularibus Episcopi.

6 Ego in re tam graui nihil de meo dico, neque consulo vt prælati regulares id faciant. Tum quia scimus Tribunal sanctæ Inquisitionis esse munitum pluribus

pluribus privilegiis ad se auocandi absolutionem hæresis, vt ipsi Inquisitores publicant. Tum quia scio, quod non obstante quod Concilium Tridentinum *citata sess. 24. cap. 6.* concedit Episcopis vt possint absolvere ab hæresi occulta, hodie multi & graues Doctores dicunt hanc facultatem illis esse ademptam per declarationem Gregorij XIII. & Clementis VIII. Hi Doctores sunt Maiolus, Toletus, Viualdus Hugolinus, Paromus, Molina, Garcia, Sayro, Riccius, qui citantur à Barbosa in suis remissionibus ad Tridentinum super citatum cap. 6. vbi etiam tradit sic practicari in supremo Tribunali sancti officij Romano, & sic declarasse Gregorium XIII. & Clementem VIII. & sic censuisse sacram Congregationem Cardinalium asserit Suarez *rom. 4. disp. 30. sect. 2. num. 11.* Si verò tot, ac tanti Doctores asserunt id prohibitum esse Episcopis, quibus id concesserat Tridentinum quod est ius commune: à fortiori id dicemus de prælatis regularibus, quibus ius commune id nunquam concessit, & adhuc pro opinione quod non possint Episcopi absolvere ab hæresi occulta per dictam facultatem Tridentini citat alios Doctores Sanchez *lib. 2. De calogi cap. 11. num. 26.* & *ibidem num. 27.* citat multos alios dicentes non esse reuocatam. Sed tandem in fine illius capitis resoluit priorem sententiam esse tenendam, videlicet Episcopos hodie id non posse, eo quod Tribunal sancti Officij oppositum declaret, & in re tam graui non sit tenenda opposita sententia valde dubia.

CASVS XLII.

*De superstitione particulari, & de
superstitione in communi.*

SVppono, quod superstitio vt plurimum est peccatum, & pro ratione circumstantiæ erit peccatum mortale. Superstitio verò quod spectat ad præsens institutum, definitur à Lessio *lib. 2. cap. 43. de superstitione num. 5.* tunc fit, quando præter Ecclesiæ morem ponitur Religio in quibusdam circumstantiis, vel rebus, in quibus non est ponenda, vt in numero, colore, & situ. Vt quod tot candelæ sint ponendæ, non plures: tot orationes sint dicendæ, non plures: vel vt cera sit alba, non flaua, & sic de similibus, prout amplius patebit ex dicendis. Et antequam descendam ad dandam rationem istius peccati, pono casum particularem superstitionis, qui talis est.

I Mihi constitit quod in duobus Monasteriis, quorum vnum erat virorum, alterum Monialium valde religiosum, quædam personæ sæculares miserunt qualdam hostias non consecratas cum certis literis manuscriptis in ipsa hostia, quæ literæ aliàs erant piæ, & sanctæ; & dicebant tales personæ sæculares tales hostias sic superscriptas, & manducatas valde proficere ad febres, & alios morbos pellendos. Ego respondi hoc esse superstitionem claram, prohibitam, & sapere maleficium. Casum ponit in terminis Martinus Delrio *lib. 3. Disquis. Magic. p. 2. q. 4. sect. 9.* vbi inter Magias, & superstitiones Eburonum ibi citatas, quæ

quæ sunt 18. ponit hanc, quæ ibi est decima. *Recipe tres panes Missales* (id est hostias) & *in uno scribe, qualis est pater, &c. In altero, &c. in tertio, &c. & da has hostias febricitanti, &c.* Et idem tradit Delrio eodem lib. 3. part. 1. *quæst. 3. fol. 158.* referri à Grilando, fieri videlicet aliquando sortilegia super hostiam non consecratam, sed circumscriptam notis, & litteris, quo nihil clarius dici potuit ad ostendendam superstitionem in hac cæremonia inclusam. Et citata *sect. 9. §. Decima octava*, poruit Delrius alias similes superstitiones pendentes similiter ex aliquibus litteris, aliàs piis, & sanctis, quæ ibi videri poterunt.

2 Modò restat reddere causam quare hæ, & similes cæremoniæ sunt prohibitæ, & verè superstitiosæ ac suspectæ. Ratio ergo communis Doctorum est; quia in tali casu illa verba scripta non habent ex se vim naturalem ad producendum illum effectum, morbi scilicet, vel alterius mali vitandi, ut patet. Item non habent illam ex sacra Scriptura, ut patet, quia in sacra Scriptura nihil tale reperitur de illis verbis. Item prædicta verba scripta non habent illam vim ex definitione Ecclesiæ, vel ex traditione, vel applicatione Ecclesiæ: ergo talis effectus morbi tollendi tribuendus est pacto cum dæmone inito, & proinde censenda est superstitio magica, vel saltem vanæ observantiæ. Ita Doctores communiter, maxime Delrio *lib. 3. quæst. 4. sect. 1.*

3 Et quoniam tales superstitiones non solum in sæcularibus, sed etiam in Religiosis ab aliis delusis solent reperiri, ponam hîc aliquas in summa ex multis, quæ referuntur à Delrio citato proximè loco per novem sectiones.

Prima sit: Per certa ieiunia, & orationes expectare consecutionem rei optatæ vel peccatorum remissiones: maximè, si præcribatur quod tales orationes sint fundendæ certis tantum diebus, vel certis horis: hoc enim, & vana superstitio est, & suspecta. Ad hoc pertinet id quod dicit Author libri, qui dicitur Summa de exemplis, & rerum similitudinibus lib. 5. cap. 94. ex Cass. videlicet tantam esse vim versiculi illius Psal. 115. *Dirupisti Domine vincula mea, tibi sacrificabo hostiam laudis*, ut si quis illum in morte ternâ confessione dixerit, omnia peccata sibi solvantur. Hoc inquam est falsum, & superstitio: promittit enim remissionem peccatorum ob illam rem, quæ nec est Sacramentum, nec à Deo vel Ecclesia instituta ad peccatorum remissionem consequendam.

Secunda superstitio ponitur à Deltio, gestare reliquias, vel Euangelium sancti Ioannis, vel aliquos versus Psalmorum non ex deuotione tantum, sed adiunctis vanis circumstantiis, ut sic vel sic sint scripta, vel ut reliquiæ portentur in tali vase, vel tali panno, & sic de cæteris. Si verò non adsint illæ vanæ circumstantiæ, pium, & salutare est reliquias, & Euangelium sancti Ioannis ex deuotione ad collum gestare, ut testatur experientia miraculorum propter illa duo factorum.

Tertia superstitio est obseruare certas festiuitates, ut Conuersionem B. Pauli, festum B. Vincentij, B. Urbani, vel aliorum Sanctorum, in quibus si pluat, vel cælum serenum sit, sibi spondent serenitatem, vel fertilitatem, vini copiam, vel inopiam, aut continuatam per tot dies pluuiam. Et ad hoc etiam dicit colligere herbas in die sancti Ioannis Baptistæ ad certos effectus esse superstitionem: eodem modo inserere ar-

bore in die Annunciationis B. Mariæ; vel in die sancti Stephani equorum sanguinem minuere: in quibus omnibus non datur causa naturalis talis effectus, neque ex institutione Ecclesiæ colligitur. Ad idem pertinet, si habeant pro infaustis aliquos dies ad iter agendum. Item seruare oua, quæ Gallina parit feria 6. in Parasceue, quæ dicunt valere ad extinguendum ignem si accendatur, in domibus, vel agris, & dicunt ignem extinguere per illa oua in ignem iniecta. Denique huc spectare potest quod ego vidi meis oculis in quodam adolescente valde nobili, cum quo eram in quadam Ecclesia: qui solitus erat quoties in Missa legebatur epistola ex D. Paulo, surgere & stare capite discooperto, & dicebat hoc proficere ad non cadendum ex equo, quando equitaret, vel curreret in equo: idque in honorem D. Pauli, qui cecidit ex equo in via dum iret in Damascum. Est enim hoc mera superstitio cum Ecclesia talem deuotionem nec instituerit, nec approbauerit.

Quarta ponitur à Delrio, quam dicit vſitatam maximè à militibus, qui grauiâ vulnera curant solo panno taliter, vel taliter applicato, & cum certis verbis piis, quorum formulam ibi ad longum transcribit. Qui modus curandi dicitur per Enfalmos: & fuit semper valde suspectus, cum tantus effectus curationis vulneris aliâs mortalis sperari non possit absque miraculo: cumque à Deo ibi non credatur fieri, suspicio magna est quod illa curatio proueniat ex pacto cum Diabolo, & proinde ibidem Delrio *ſcſt.* 7. §. *De hac formula*, refert quod Episcopus Iptensis cum multis consiliariis ad id adhibitis, iudicarunt illam formam curandi esse superstitiosam; & prohibuerunt ne quis illâ vteretur. Et tradit causam Delrio:

nam

nam talis effectus totus speratur à Deo per modum miraculi : sed miracula sic assidue, & quasi ex consuetudine sperare à Deo, est tentare Deum, quod nobis facere non licet. Vide fusè *Valle de Ensalmis sect. 1. cap. 6. num. 2.* ubi multos Doctores citat contra hos Ensalinos.

Occasione præcedentium casuum pono sequentem, qui à me aliquoties quæsitus est, & in praxi sæpius contingit.

CASVS XLIII.

*An malefica denunciande sint coram sancto
Officio, vel coram Ordinario?*

ANtequam ad hunc casum respondeam, præmitto, & transcribo hanc partem Bullæ, quam Gregorius XV. edidit contra maleficos anno 1623. die 20. Martij, quam refert Bonacina *tom. 1. disp. 4. puncto 2. num. 11.* quæ talis est.

Moti itaque proprio, & ex certa scientia, ac matura deliberatione nostris, deque Apostolica potestatis plenitudine, tenore præsentium decernimus, præcipimus, & mandamus, ut constito, quod aliquis pactum cum Diabolo fecerit, & à fide apostatando maleficijs, seu sortilegijs unam seu plures personas ita laeserit, ut ex maleficio, seu sortilegio mors secuta sit, etiam pro primo lapsu curia seculari tradatur debitis pœnis puniendus. Qui verò similiter apostatando pactum cum Diabolo, ut præfertur, fecerit, & maleficium, seu sortilegium commiserit, ex quo licet mors secuta non sit, infirmitas tamen, diuortia, impotentia generandi, sine animabus, frugibus, vel alijs fructibus dam-

num notabile prouenerit muro claudi, siue perpetuis carceribus in sancto Inquisitionis officio, ubi illud existit, fabricandis, mancipari debeat: qui verò similium delinquentium notitiam habuerint, eos Episcopo, seu Inquisitori denunciare debeant. Sic ibi.

1 In qua Bulla primum noto, per illam non iuberi denunciari Inquisitoribus vel Episcopo quoscunque maleficos, sed illos imprimis, qui à fide apostatarunt propter pactum factum cum Diabolo. Et præterea si aliquam personam per maleficium vel sortilegium occiderint: vel denique aliquam læsionem in animabus, corporibus, vel fructibus causauerint. Hi omnes deferendi sunt ad Inquisitores hodie, non ad Episcopum, quia sunt malefici hæreticales, & Episcopi non possunt cognoscere de hæresi in foro externo. Licet verò Papa in fine Bullæ dicat eos deferendos esse ad Episcopum, vel Inquisitores, intelligit deferendos esse ad Episcopum in vrbe in qua non est Inquisitor: si enim sit Inquisitor ad illam primò deferendus est talis maleficus cum sit Apostata à fide. Si verò non sit Inquisitor, nec possit adiri commodè, ad Episcopum deferri debet, vel ad suum Vicarium generalem in vrbe metropoli, vel ad Vicarium pedaneum cuiusque oppidi, hoc enim est propriè denunciare Episcopo. Et hanc denunciationem tenentur facere sub illis pœnis, & intra illum terminum, intra quem Inquisitores per sua edicta generalia iubent denunciari de hæreticis: hi enim malefici cum à fide apostatauerint, hæretici sunt.

2 Noto secundò, quod sicut sunt blasphemii alij hæreticales, alij non hæreticales, de quo Doctores in verbo *Blasphemia*, ita sunt aliqui malefici non hæreticales, qui scilicet cum suo maleficio non habent admixtam

admixtam hæresim, vel idololatriam, de quibus paulò pòst dicemus. Alij sunt malefici hæreticales, qui scilicet cum suo maleficio habent hæresim admixtam. Hanc autem admixtionem hæresis innuit Papa hoc loco non posse melius cognosci quàm per pactum factum à malefico cum Diabolo. Bis enim Papa ponit hoc verbum, *Pactum cum Diabolo*. Et proinde est omnino necessarium explicare, quomodo maleficus, vel malefica soleant facere hoc pactum cum Diabolo?

3 Rem breuiter expedio ex multis quæ tradit Delrio lib. 2. *disquisit. Magicarum*, q. 4. §. *Tertia conclusio*, ubi ait duplex pactum posse fieri à malefico cum Diabolo. Alterum expressum, aliud tacitum. Pactum expressum cum Diabolo fit, quando concurrunt aliqua ex sequentibus. Primò solet apparere Diabolus in figura corporea, & illi coram testibus promittitur homagium siue fidelitas. Secundò, si libellum supplicem Diabolo præsentant. Tertiò, licet hanc fidelitatem Diabolo non promittant in præsentia illius, est etiam pactum expressum, si illam promittant mediante mago, vel tertio aliquo, eo quod nouus promittens faciem Diaboli reformidet. Et cum his pactis de ordinario coniuncta sunt hæc: primò abnegare fidem, & Christianismum: Deo obedientiam subtrahere: Deiparæ Mariæ patrocinium repudiare, & illam conuitiis incessere. Quartò, illos Diabolus aliquando tingit suo baptismo. Quintò, dant Diabolo particulam aliquam sui vestimenti. Sextò, iusiurandum Diabolo præstant super circulo in terram sculpto. Septimò, singulis annis tenentur aliquid offerre Dæmoni suo magistello. Et denique promittunt se fore contumeliosos in B. Virginem, & in Sanctos, Crucem Christi, & nunquam facturos veram sacramentalem con-

fessionem. In quibus omnibus clarum est grauissima peccata committi, cum ibi intercedat idololatria, adorando creaturam. Si verò fidem ex animo abiiciant, sunt etiam apostatæ, & hæretici. Quod si illa omnia fictè faciant, nec apostatæ, neque hæretici sunt: peccant tamen grauissimè contra fidei confessionem.

3 Pactum tacitum cum Diabolo fit primò, quando quis sciens, ac volens utitur signis superstitiosis, quibus uti solent magi: quæ quidem ex libris, aut sermonibus illorum, vel aliorum acceperit. Hoc enim est etiam graue peccatum, cum non liceat cum Diabolo directè, neque indirectè communicare. Secundò, potest dari hoc pactum tacitum cum Diabolo, quando quis ignorans utitur signis magicis, quia nescit esse mala, & à Dæmone instituta: quod solet illis accidere qui legunt libros superstitiosos, putantes illos esse Authorum probatorum.

4 Viso ergo quid sit pactum expressum, & tacitum cum Diabolo, non est hoc loco quæstio de pacto tacito secundo modo, quando scilicet quis ignorans utitur signis magicis, paratus corrigi si sciat. Talis enim non peccat propter ignorantiam probabilior. Quæstio ergo hîc est, an iubente Papa in hac Bulla denunciari sancto Officio, vel Episcopo maleficum habentem pactum cum Diabolo, per tale pactum non solum intelligendum sit pactum expressum, prout explicatum est suprà num. 2. sed etiam pactum tacitum primo modo, quando scilicet quis sciens, & volens utitur signis, & mediis, quibus vtuntur magi habentes pactum expressum cum Diabolo? Potest utrumque sustineri hos non esse denunciandos apud Inquisitores: quia formaliter, & in rigore non videntur hæretici, cum fidem non abnegauerint cum aliis cæremoniis positis

positis *num. 2.* Inquisitores verò non possunt se intro-
mittere in sortilegiis, & diuinationibus, nisi sapiant
hæresim manifestè: vt expressè dicitur in c. *Accusatus*,
de hæreticis in 6. Secundò, quia verba vt plurimum sunt
accipienda in suo principali significato: & proinde
cum Bulla Gregorij citata dicat denunciandos esse
maleficos habentes pactum cum Diabolo, nomine
pacti intelligendum est pactum principale, quod est
pactum expressum, non verò tacitum, quod non est
propriè pactum. Facit etiam ad hoc quod tradit Au-
thor mallei maleficarum 3. *part. q. 1. §. Ex his specialiter:*
vbi dicit non fuisse hæreticum quemdam Presbyte-
rum, qui cum quodam diuinatore introiuit in locum
secreterum, non ea intentione vt Dæmonem inuocaret;
sed vt per inspectionem Astrolabij furtum quoddam
inueniret.

§ Nihilominus ego credo probabilius, & securius,
etiam denunciandos esse apud Inquisitores, vel Epi-
scopum hos maleficos habentes cum Diabolo solum
pactum tacitum primo modo tradito suprà *num. 3.* Pro-
bo clarè: primò, quia quando lex non distinguit, ne-
que nos debemus distinguere. l. *Non distinguemus* ff. de
recept. qui arb. Sed citata Bulla Gregorij XV. iubet
denunciari maleficos habentes pactum cum Diabolo,
& non distinguit de pacto expresso, vel tacito, &
aliàs pactum tacitum reputatur verum pactum à Do-
ctoribus: ergo mens Papæ est vt etiam denuntietur
apud Inquisitores maleficus habens solum pactum ta-
citum primo modo cum Diabolo. Secundò, quia ta-
citi, & expressi idem est iudicium, vt habetur in l. *De*
quibus, in fine, ff. de legibus: & in l. *Cum quid*, ff. si cer-
tum petat. De quo multa tradit Euerardus loco ab ex-
presso ad tacitum: ob quam causam facta per solam

licentiam tacitam Prælati valida aliquando valent, & non condemnantur. Ergo pactum tacitum cum Diabolo pro eodem reputantur, & proinde habens pactum tacitum cum illo denunciandus est sicut habens cum illo pactum expressum. Terriò, quia suspectus de hæresi deferendus est ad Inquisitores, vt clarè colligitur ex cap. *Accusatus*, de hæretic. in 6. & ex praxi S. Inquisitionis, in qua abiurant etiam de leui. At iste habens pactum tacitum cum Diabolo est suspectus de fide, saltem de leui: ergo est denunciandus Inquisitoribus. Probo minorem exemplo claro. Nam Paulus V. propriâ Bullâ iubet denunciari Inquisitoribus confessarium sollicitantem feminas intra sacramentalem confessionem; idque ob suspicionem hæresis. Hæc autem suspicio hæresis non est suspicio vehemens, sed leuis, vt probat P. F. Antonius de Sousa in *explicatione cit. Bullæ Pauli V. tract. 1. cap. 5. num. 6.* At quis negabit leuiter saltem in fide esse suspectos maleficos qui scientes & prudentes faciunt illa, quæ faciunt Magi pacti expressi, videlicet abnegando fidem, adorando Diabolum, iniuriando Sanctos, &c. Quod potest probari ex eo quod Christus D. *Ioan. 8.* dixit Pharisæis: *Vos facitis opera patris vestri.* Vbi eos filios Diaboli appellauit, quia faciebant opera patris sui Diaboli. Quod potest applicari ad intentum: nam is qui habet pactum tacitum cum Diabolo, & sciens & prudens facit id quod facit maleficus pacti expressi suspicionem, leuem saltem incurrit circa materiam fidei.

6 Hoc autem quod proximè dixi de denunciandis etiam maleficis pacti taciti, saltem locum habebit infallibiliter, quando maleficus pacti taciti in suo maleficio, abusus fuerit sacramentalibus Ecclesiæ, seu rebus

rebus quas Ecclesia benedicit pro usu sacramentorum, quales sunt, petra Aræ, seu altare portatile, candelæ benedictæ, corporalia, & similia; tunc enim clarum signum est quod maleficus contemnit Ecclesiam, & proinde est satis suspectus de fide: sic tenet Penha 2. part. directory Inquis. commento 67.

7 Tandem notandum est, quod in denunciandis maleficis seruandæ sunt regulæ traditæ à Doctoribus circa denunciationem Euangelicam, & correctionem fraternam, de quibus regulis modo non disputo. Semper autem præmittenda est correctio fraterna, si speratur fructus de correctione: si verò non speratur, omittenda est. Notat verò Delrio lib. 5. *Magic. sect. 4. §. Sextum*, aliqua circa hanc materiam denunciationis maleficarum. Primum est, quod si constat aliquos errare ex ignorantia, & moraliter speratur fructus ex admonitione, tunc præmittenda est correctio fraterna. Secus si constet eos peccare ex malitia, nec speratur fructus ex correctione fraterna. Secundum est, quod si res sit dubia, an peccent ex malitia, vel ignorantia. Item si sit dubium an emendabuntur ex correctione fraterna; tunc est securius, & vtilius Reipub. vt omisâ admonitione, statim denunciarentur: quia in re dubia non est Resp. Christiana in delictum adducenda, & bonum commune præponendum est bono particulari. Terriò dicit, quod lamia, & maleficæ de ordinario sunt valdè pertinaces, & vix fieri potest vt ex ignorantia peccent, & semper mora est periculosa aliis; & ideo semper sub mortali vnumquemque teneri confestim illas denunciare, etiamsi crimen illarum non sit coniunctum cum hæresi. Et ideo qui non reuelat hoc crimen cognitum extra sacramentalem confessionem, indicium contra

se præbere ut possit contra illum specialiter inquiri, tanquam de fautore maleficorum, & suspectorum de hæresi.

CASVS XLIV.

De indulgentijs confraternitatis Chordigerorum P. N. Francisci.

Papa Sixtus V. apud Bullarium Rodriguez fol. 1138. concessit ut in Monasteriis Ordinis P. N. Francisci erigeretur, & institueretur confraternitas Chordigerorum, id est, portantium, seu gestantium chordam P. N. Francisci, & confraternitas erecta est in multis conuentibus nostri Ordinis: sed in aliquibus illorum extincta est ob teporem fidelium, & in aliquibus illorum adhuc perdurat. Item Leo X. in compendio Mendicantium titulo, *Indulgentia quoad sæculares*, in titulo, *Ex privilegijs Fratrum Augustinenſium*, concessit aliquas indulgentias sæcularibus gestantibus chordam P. N. Francisci benedictam ab aliquo Prælato Ordinis; sicut idem Leo concesserat gestantibus corrigiam D. Augustini. Vltimò constat quod Paulus V. reuocauit omnes indulgentias Religioſorum, exceptis paucis, quas illis permisit. Hoc posito, quæritur primò: Vtrum indulgentiæ illæ in compendio pro gestantibus corrigiam, vel chordam P. N. Francisci, sint hodie validæ, an reuocatæ per Bullam D. Pauli V. & an ad eas lucrandas debeant ascribi in dicta confraternitate.

2 Quæritur, an illi conuentus, in quibus illa confraternitas extincta est, possint illam denuo erigere, & an

& an sic erecta, seu restituta debeat habere omnes indulgentias in Bulla concessas : & cuius autoritate possit iterum erigi.

3 Quæritur quæ , & quales sint hæ indulgentiæ ?

Responsio.

1 **A**Nte responsionem præmitto, quod Paulus V. particulari Bullâ reuocauit omnes indulgentias concessas cuicumque Religioni in communi, vel in particulari, exceptis tredecim quas in citata Bulla Paulus V. omnibus Religiosis reliquit. Et licet idem Paulus V. post hanc reuocationem confirmauerit priuilegia Ordinis Minorum ex certa scientia, ego clarè probaui in meo primo tomo *Dubiorum Regularium*, verbo Indulgentia, §. *Ego constanter*, ibi Paulum V. non reuolidasse, neque denuo confirmasse nostras antiquas indulgentias, quas ille reuocauerat : & idem hodie constanter teneo, quidquid meam opinionem impugnet Hieronymus Rodríguez tom. *Resolutionum*, resolut. 77. à num. 45. meis argumentis non adæquatè respondens. Ibidem etiam probaui Paulum V. solum reuocasse indulgentias primò & directè concessas ipsis Religiosis, non verò concessas sæcularibus intuitu Religiosorum, vt exemplis ibi ostendi. Quo posito, dico :

2 In citato loco compendij, Leo X. sic concessit: Quod viri, & feminae deferentes zonam Fratrum sancti Augustini datam ab aliquo Prælato eiusdem Ordinis ad hunc finem, lucrari possint indulgentias prædictis Fratribus concessas. Postea ibidem Collector priuilegiorum, asserit eandem concessionem extendisse Leonem X. ad illos qui gestarent chordam P. N. Francisci, datam similiter ab aliquo Prælato.

3 Cirea

3 Circa quàm conſeſſionem, noto, illam quoad ſæculares non eſſe hodie reuocatam à Paulo V. nam illa indulgentia non eſt conſeſſa Religioſis, vt patet, ſed eſt conſeſſa ſæcularibus intuitu Religioſorum: & proinde non eſt reuocata à Paulo V. ſicut non ſunt reuocatæ indulgentiæ aliæ conſeſſæ ſæcularibus intuitu Religioſorum, quales ſunt viſitare Eccleſias illorum. Audire concionatores illorum: oſculari habitum illorum, & ſimilia. Secundo, noto geſtatores prædictæ corrigiæ, vel chordæ non poſſe hodie lucrari omnes indulgentias prædictis Religioſis Auguſtinenſibus & Minoribus conſeſſas, ſed illas ſolum quæ ſunt illis conſeſſæ per Paulum V. in ſua Bulla reuocatoria, quas ego pono in citato meo tomo 1. Dubiorum Regular. Non verò poſſunt dicti ſæculares chordigeri lucrari illas indulgentias antiquas reuocatas à Paulo V. nam indulgentiæ reuocatæ nullæ ſunt, nec exiſtunt in rerum natura. Potelt hoc ipſum probari ex citata Bulla Sixti V. pro chordigeris P. N. Franciſci, de qua agimus, in qua bis Sixtus V. dicat ſe concedere dictis Chordigeris quod poſſint lucrari omnes indulgentias conſeſſas Minoritis, quoad eas dumtaxat quæ non ſunt reuocatæ, & vt ponam vnum, vel alterum exemplum, ex illis quæ dixi cit. meo primo tomo Dubior. Regularium, verbo *Indulgentia*, conſeſſit idem Paulus V. Minoritis indulgentiam plenariam dicentibus Coronam B. Virginis; conſeſſit item ibidem, quod Religioſus viſitans ſuam propriam Eccleſiam, & ibi orans conſeſſus, & ſacratiffima communionem reſectus orans pro concordia Principum Chriſtianorum, extirpatione hæreſum, exaltatione Eccleſiæ, & ſalute Sum. Pontificis, huic tali conſeſſit indulgentiam plenariam: ſæcularis portans corripiam,

giam, vel chordam, & dicens coronam B. Virginis, vel recitans modo proximè dicto in Ecclesia Augustini, vel Patris Francisci, respectiue, lucrabitur id, quod conceditur prædictis Religiosis respectiue. Tertio, noto circa eandem concessionem compendij, quod ut sæculares lucrentur prædictas indulgentias portando corrigiam vel chordam prædictas, non est necessarium quod ascribantur in confraternitate instituta à Sixto V. pro Chordigeris P. Francisci; sunt enim duæ valde diuersæ concessionem; quarum prior Leonis præcessit confraternitatem Sixti V. ferè per annos octoginta, & sic vna non dependet ab alia.

3 Ad secundum quæsitum dico, licet dicta confraternitas Chordigerorum sit extincta in alio monasterio Minorum, Prælatus tamen, maximè Prouincialis, poterit eandem erigere in eodem conuentu, & sic erecta, vel restituta habebit omnes indulgentias concessas chordigeris in confraternitate, & Bulla prædicta. Quod autem solus Prælatus Minorum prædictam confraternitatem in suo conuentu possit denuò erigere, vel extinctam restaurare, probatur clarè ex Bulla citata Sixti V. in qua pro talis confraternitatis erectione non requirit licentiam, vel consensum Episcopi. Sed ipse ex sua propria autoritate, & potestate dicit, quod tales confraternitates erectas, in monasteriis, ipse illas incorporat, & aggregat archiconfraternitati eiusdem chordæ primo institutæ in ciuitate Assisij, in qua est corpus P. N. Francisci. Quod autem confraternitas in vno monasterio extincta, non impediat quin alia in eodem monasterio restituta iuxta eandem Bullam, habeat omnes indulgentias concessas in eadem Bulla, sicut habuerat prior confraternitas extincta in eodem conuentu, probatur
claro

claro exemplo adducto ex iure per Suar. *tom. de censuris, disput. 38. sect. 1. num. 13.* vbi aliquibus citatis, dicit quod si destruaturs una Ecclesia, in qua antea erat concessum vnum priuilegium, & in eodem loco, seu pavimento reedificetur alia Ecclesia: talis Ecclesia denuò reedificata gaudebit priuilegio antiquo quod habebat Ecclesia destructa: pro quo citat Felinum, & Iasonem. Quod exemplum est adæquatum ad intentum.

4 Ad tertiam in quo quæritur, quæ, & quales sint indulgentiæ concessæ chordigeris P. N. Francisci in dicta Bulla Sixti V. satis respondet Rodriguez *tomo 1. qq. 9. § 8. art. 1.* vbi postquam transcribit prædictam Bullam Sixti V. ponit summarium, seu compendium indulgentiarum in illa contentarum. Vbi referuntur multæ, & magnæ, & faciles indulgentiæ concessæ confratribus eiusdem confraternitatis.

5 Eadem verò *quest. § 8. art. 2. tract.* Rodriguez de institutione confraternitatis corrigiatorum D. Augustini, & de priuilegiis eidem concessis maximè à Gregorio XIII. & Gregorio XIV. qui voluerit ibi videat.

CASVS XLV.

*An confessarius teneatur admonere pœnitentem inuincibiliter ignorantem
aliquid.*

CAsus iste sapius contingit, & est circa rem grauiissimam, & doctrina illius mihi iam bis fuit necessaria

necessaria, ut infra forsitan attingam. Casus igitur est: Cognovit aliquis Confessarius intra confessionem incidenter, pœnitentem coniugatum contraxisse matrimonium cum impedimento dirimente. Videt tamen quod pœnitens habet circa hoc ignorantiam inuincibilem: videt item separationem, & dispensationem fore difficillimam, & timetur, quod ex admonitione non sperabitur fructus, sed potius tunc pœnitens antea ignorans continuabit sciens, & peccans in illo statu. Hic idem casus potest contingere in materia restitutionis, ut cum confessarius incidenter cognovit in confessione, pœnitentem possidere rem alienam notabilem, ut primogenium, vel maius, videt tamen pœnitentem admonitum non esse restitutum; & postea manebit in mala fide, cum antea haberet bonam fidem. Quæritur, inquam, utrum in his duobus, & similibus casibus teneatur admonere pœnitentem: vel debeat illum relinquere in sua bona fide.

In qua quæstione grauissima, & quotidiana, Petrus Soto *lect. 10. de Confess. ad finem*, §. *Circa hæc*, ait quando ignorantia est iuris diuini, vel humani, tutius esse pœnitentem instrui. Idem docent alij, quando resultat damnum tertij, sicut resultat quando pœnitentes ex ignorantia etiam inuincibili retinent rem alienam, ut maius, vel quid simile; tunc enim dicunt pœnitentem monendum esse ut rem alienam restituat. Probatur hæc opinio, primò, quia illa ignorantia nunquam est inuincibilis, nisi deficiente aliquo qui instruat; cum ergo possit tunc confessarius instruere, tenetur instruere ne ignorantia illa culpabilis fiat. Secundò, quia pœnitens ad confessorem accedit tanquam ad Doctorem, & Vicarium Dei, ut

ab ipso instruat, quia vel est proprius pastor, vel gerit vicem proprii pastoris: ergo infideliter ager nisi instruat, & tacens absoluensque pœnitentem errantem, videtur suo facto pœnitentis errorem approbare, vel confirmare. Tertiò, quia vtilius nasci scandalum permittitur, quàm quod veritas relinquatur, cap. *Qui scandalizauerit*, de reg. iuris: ergo propter scandalum pœnitentis non acceptantis monitionem, non est desistendum à veritate manifestanda. Quartò, quia potens alium ab errore reuocare, & tacens, se ipsum errare demonstrat, vt habetur in cap. 2. de heret.

1 Opposita tamen sententià tenenda est in praxi, videlicet, quod quando pœnitens habet ignorantiam inuincibilem iuris, vel facti circa aliquod impedimentum matrimonij, vel circa retentionem rei alienæ ex qua resultat præiudicium tertij, non teneri confessarium illum admonere, si clarè videt ex sua monitione non futuram emendationem pœnitentis, sed potius illum mansurum in mala fide, cum antea esset in bona fide. Hanc opinionem latè tractat, ac defendit Sanchez lib. 2. de matrim. disput. 38. à num. 6. & seqq. in quo citat vndecim graues Doctores, præter alios quos citauerat num. 1. eiusdem disputationis, quos dicit eandem tenere sententiam. Aliqua verò notata à Sanchez circa hunc casum paulò pòst aduertam. Eandem sententiam sequitur Bonacina tomo 1. de impedimentis matrimonij, quest. 3. puncto ultimo, maxime num. 7. vbi alios citat, & numeris sequentibus. Ponit Sanchez citato num. exemplum, quando ex admonitione sequetur scandalum ex separatione: vel difficultas, quia verbi gratia, coniux volet recedere cum scandalo alterius ignorantis impedimentum: vel
volet

voler persistere in matrimonio obrenta dispensatione, & alter nollet denuo consentire, vel permanebunt ambo coniuges in perpetuo concubinato. Circa errorem verò facti, ponit Sanchez hoc exemplum, quod paucis abhinc diebus à me fuit quæsitum. Exemplum, v. g. Aliquis bona fide contraxit matrimonium, præmissa sufficienti indagine circa mortem prioris coniugis: scit confessarius, vel aliquis alius priorem coniugem vivere. In hoc casu seruiunt illa, quæ paulò suprà diximus. Circa errorem verò iuris sit exemplum. Habuit quis copulam ante matrimonium initum cum consanguinea vxoris intra secundum gradum, & inuincibiliter ignorans esse impedimentum dirimens, contraxit matrimonium: seruiunt illa quæ proximè diximus.

2 His positis probatur hæc sententia, quod scilicet cum talibus circumstantiis non debet, inò non potest confessarius pœnitentem admonere, sed relinquere illum in bona fide: probatur inquam primò ex Diuo Augustino, & habetur cap. *Si quis autem, de pœnit. dist. 7.* ibi: *Si scirem non tibi prodesse, non te admonerem, non te terrerem.* Ad quem locum Nauarrus in commentario citati capitis num. 73. in 1. tom. suorum operum ad finem, testatur se aliquando vidisse aliquas dispensationes in variis materiis, (quorum erant illæ) quas sine vllò scrupulo de peritorum consilio putabant esse legitimas, quæ tamen tales non erant: sed quia circa ius erant humanum, & nulli præiudicabant, ait Nauarrus timuisse se veritatem illis propalare, ne quos ipsorum iusta ignorantia excusabat, auctoritate suâ crederent eas non valere, & nihilominus eis vtentes, peccarent. Et in citato loco loquens Nauarrus de hoc casu nostro dicit, non solum posse, sed debere confes-

sarium tali pœnitenti, cui credit monitionem nocituram potius, quàm profuturam, dicere illum in bono statu viuere. Secundò probatur conclusio: quia nulla lex obligat ad actum frustraneum & otiosum: sed in hoc casu admonitio confessoris erit frustranea, vt supponimus; ergo ad illam faciendam confessarius non tenetur. Tertio probatur claro argumento, & exemplo. Nam correctio fraterna obligat de iure naturali, & dirigitur ad vtilitatem proximi correcti: & tamen si ego credo correctionem meam fraternam nihil profuturam, non teneor ad illam faciendam, vt Doctores communiter dicunt in materia correctionis fraternæ: ergo confessarius non tenetur in nostro casu admonere pœnitentem. Quarto probatur, quia nulli debemus laqueum iniicere, vt dicitur in cap. *de viduis* el. 2. 27. q. 1. sed admonere in hoc euentu nihil aliud esset quàm laqueum & offendiculum opponere: nam constituti in bono statu, & bona fide, per confessoris admonitionem poterunt manere in mala fide: quia deinceps, v.g. vxor impedimenti conscia tenetur potius mortem subire, quàm reddere debitum: & fortè vir non poterit deregere impedimentum ne famæ impedimentum patiatur, & inde rixæ, & scandala oriantur, & Ecclesia non probato impedimento compellet. Et propter id quod proximè dictum de periculo continuandi in mala fide, dico mihi bis quid simile contigisse cum duobus viris coniugatis, & ambobus habentibus impedimentum dirimens, & ambo sciebant suum impedimentum, vxores verò ignorabant: & hoc fuit extra confessionem per viam consilij, quibus cùm dixissem, vt prius irent, & certam diligentiam facerent, illaque factâ ad me redirent, nullus illorum amplius rediit.

3 Maius est quod addit Sanchez *citata dispnt.* 38.n.6. videlicet, non solum post matrimonium contractum posse, ac debere confessarium abstinere ab ista admonitione, sed etiam ante illud contractum. Si enim confessarius, vel quilibet alius videat pœnitentem ignorantia inuincibili impedimenti laborantem, & probabiliter credat fore ut monitus non acquiescat, nec fidem adhibeat, & læsâ conscientia matrimonium sit contracturus, & cum maximo scandalo, vel difficultate à matrimonio desistet: utpote quia iam fortè factæ sunt denunciationes per parochum in Ecclesia, vel quid simile, prudentissimè aget confessarius si taceat. Et hoc probatur eisdem rationibus quibus *num. 2. præcedente* probatum est id debere facere post contractum matrimonium, militant enim utrobique eadem rationes: & colligitur clarè ex eo quod citauimus in principio numeri secundi præcedentis, videlicet noluisse illum Nauarrum detegere errorem quarundam dispensationum, ne fortè sua monitione daret scandalum peccandi. Ibi enim clarè colligitur ex Nauarro id sibi contigisse ante matrimonium contractum. Et idem tenet Bonacina *citato loco num. 9.*

4 Dixi suprà *num. 1.* hoc debere facere confessorem in tacendo impedimento matrimonij concurrentibus illis circumstantiis: nunc addo posse, ac debere similiter tacere, quando videt pœnitentem ignorantem inuincibiliter retinere rem alienam, ut maioratum, si admonitus non acquiescet, nec restituet, sed manebit in mala fide. Sic Sanchez & Bonacina *cit. loco*, citans Henriquez, Gutierrez, Medinam. Et hæc probatur eisdem rationibus, quas suprà adduximus ad probandum in *num. 2.* non debere confessarium admonere pœnitentem de impedimento dirimente occulto,

concurrentibus circumstantiis ibi dictis, probant enim dictæ rationes in hoc casu restitutionis. Additque Sanchez *cit. disput.* 58. hætenus dicta de non admonendo pœnitente, locum etiam habere, quando credit confessarius fore, vt pœnitens libenter quidem admonitionem suscipiat, ac videt remedium esse difficillimum, vt si scandalum, vel notabilis infamia inde sequatur, currit enim eadem ratio.

5 Ponit tamen Sanch. aliquas aduertentias pro maiori declaratione præcedentis conclusionis, quas in summa sic repeto. Prima est, quod si ignorantia pœnitentis sit vincibilis, & culpabilis mortaliter, tenetur confessarius illum admonere, siue ignorantia sit iuris, siue facti, nec poterit tunc confessarius dissimulare, licet timeat quod pœnitens non emendabitur, & licet inde sequatur scandalum culpâ pœnitentis: & probatur, quia talis ignorantia vincibilis, & culpabilis non excusat, & proinde tenetur confessarius admonere. Secunda est, posse contingere vt aliquando pœnitens prius fuerit in mala fide, sed postea sit in bona fide, quia scilicet consuluit postea viros doctos, qui conscientiam sedarunt, & tunc reputandus est pœnitens tanquam ignorantia inuincibili laborans. Tertia est, posse contingere, vt pœnitens fateatur se deliquisse in modo contrahendi matrimonium, vt quia peccauerat cum consanguinea vxoris ante matrimonium, & tamen inuincibiliter ignoret præsentis matrimonij nullitatem, & tunc debet se confessarius cum illo tanquam cum laborante ignorantia inuincibili gerere. Quarta est, si pœnitens ex conscientia erronea credat aliquid esse peccatum mortale, tenetur confessarius admonere: & hoc saltem probat argumētum secundum suprà positum pro parte
contra

contraria : quia scilicet pœnitens accedit ad confessor-
rem tanquam ad Doctorem , & Vicarium Dei vt ab
ipso instruatut , &c. Quinta est , quod si ipse pœni-
tens dubitet , & interroget de impedimento , tunc te-
netur confessarius admonere, licet credat se nihil pro-
futurum. Nam pœnitens in eo casu iam non laborat
ignorantiâ inuincibili, sed potius vincibili, cum du-
bitet de impedimento: tum quia confessarius non ma-
nifestando veritatem, censetur approbare errorem pœ-
nitentis.

6 Quia verò in tota hac disputatione supponitur
impedimentum dirimens in confessione cognitum,
esse tollendum , & succurrendum pœnitenti obtem-
perante dispensatione. Non erit inutile scire , in casu , quo
teneatur confessarius pœnitentem monere, quis possit
dispensare, vt ablato illo impedimento, iterû coniuges
matrimonium in secreto cōtrahant; & quomodo vnus
coniux impedimenti iam conscius , admonere debeat
aliû coniugem ignarum illius, vt iterum contrahat.

7 Quoad primum dico , Episcopum posse dispen-
sare in impedimento dirimente matrimonium , con-
currentibus his circumstantiis : vt matrimonium sit
publicum , impedimentum verò occultum. Secundò,
quod sit scandalum in separatione. Tertiò , si non
possit adiri Papa , inopiâ , aut aliâ iustâ causâ impe-
diente. Hanc conclusionem latè probat Sanchez *lib. 8.*
de matrim. disput. 40. num. 3. & seqq. & praxis obseruat,
pro qua probanda multas ibi rationes assignat , &
multos citat. Notat verò *eadem disput. num. 8.* quod si
facile adiri possit Nuncius Apostolicus , qui habeat
facultatem dispensandi in illis , vel Commissarius
Cruciatae , qui habeat similem dispensandi faculta-
tem , tunc non poterit Episcopus dispensare. Nam

Episcopus solum potest dispensare in hoc casu ratione urgentis necessitatis : sed quando adest potens dispensare ad quem confugi potest, cessat necessitas: ergo non poterit Episcopus. Aliud ibi ponit argumentum quod vide. Aduertit etiam ibi, commissarium Cruciatæ non habere facultatem dispensandi, nisi detecta nullitate prioris matrimonij alteri coniungi : quare si eâ non detectâ expediret celebrari matrimonium urgente necessitate ; tunc cessante quoad hoc facultate Commissarij, posset recurri ad Episcopum ratione urgentis necessitatis.

8 Obtentâ verò dispensatione impedimenti occultri, & dirimentis, dubium est quomodo declarandum sit impedimentum coniugi ignoranti, vt denuo contrahat, & denuò consentiat. Vtrum scilicet illi sit declarandum in particulari, quod fuerit impedimentum præcedens : an verò sufficiat illi dicere in communi quod impedimentum dirimens præcesserit, & ideo denuo consentiat in matrimonio? Ad hoc respondet Bonacina *tomo 1. tit. de natura, & proprietatibus matrimonij, quæst. 2. puncto 9. num. 7. §. Sed mihi*, vbi relatis prius duabus opinionibus, vnâ dicente manifestandum esse impedimentum in particulari; alia affirmante sufficere quod manifestetur in genere. Respondet Bonacina, quod si tale impedimentum possit manifestari coniugi absque graui periculo, tunc debet illi manifestari, vt tollatur omne dubium nullitatis prioris matrimonij, & consensus dandus in secundo matrimonio sit liberior. Pro quo citat Sanchez, Filliucium, &c. Si verò non possit manifestari coniugi tale impedimentum nisi cum magno periculo, & scandalo, tunc non est manifestandum in particulari, sed sufficere si illi dicat : Consensus, quem

quem habui in contractu matrimonij, non fuit sufficiens ad valorem illius, nisi de nouo consentiamus, &c. tunc accedente vtriusque consensu matrimonium coalescit. Plura alia dubia mouent Sanchez, & Bonacina citatis locis ad hunc casum spectantia, quæ apud illos videri possunt. Mihi sufficit adducere posteriora, & frequentiora.

9 Ad argumenta posita in principio probantia teneri semper confessarium admonere pœnitentem. Respondetur sic. Ad primum dicendum est antecedens esse verum quando pœnitens dubitaret; teneretur enim data opportunitate consulere Doctores: quando autem nihil dubitat, nihil est quod ipsum urgeat ad intentum. Ad secundum respondetur teneri confessarium admonere, quando fructus de admonitione speratur, secus illo fructu cessante, quia monitio illa ad bonum ipsius ordinatur: eo ferè modo, quo suprà num. 2. diximus correctionem fraternam ordinatam ad bonum correcti cessare non sperato fructu correctionis. Ad tertium dicendum, illam regulam, *ut minus scandalum*, &c. intelligi sic: Quando aliquid sine peccato mortali fieri non potest, vel omitti, faciendum non est omitendum propter scandalum: secus quando fieri potest, vel omitti sine peccato: & eodem modo explicandum est aliud capitulum ibi citatum. At ista omissio admonendi potest fieri sine peccato confessarij, quin illâ ommissione non peccat. Ad quartum dic illum textum loqui de errore culpabili, secus de inuincibili.

CASVS XLVI.

De quadam promissione pro contrahendo matrimonio.

QUædam mulier dato scripto promisit cuidam viro suo consanguineo in tertio gradu, se cum illo matrimonium contracturam, si Papa dispensaret; pater puellæ contradicit matrimonio futuro: tum quia illa nondum habet duodecim annos completos; tum quia adolescens est nimis pauper, & ipsa diues.

1. Quæritur primo, an illa promissio, viso quod facta sit de nubendo in gradu prohibito, fuerit nulla, & ideo illa non manet obligata ad matrimonium illud, nec proinde teneatur ad procurandam dispensationem?

2. Quæritur, an pater possit impedire matrimonium illud eo quod ipsa non habeat annos 12. completos?

Respondetur ad primum.

1. **Q**Uod attinet ad primum dubium, sunt duæ opiniones relatæ à Sanchez lib. 5. de matrim. dispur. 5. Prima opinio tenet quod talis promissio fuit nulla, & proinde nullam inducat obligationem ad tale matrimonium. Fundamentum præcipuum istius opinionis, est, quod ista conditio; *si Papa dispensaueris, contraham tecum*; est conditio impossibilis: nam conditio dependens à voluntate Principis reputatur impossibilis, vt constat ex l. continuus 137. §. cum quis, ff. de

ff. de verb. oblig. At conditio impossibilis adiecta pro sponsalibus, est nulla: ergo talis promissio fuit nulla, utpote de re pedente à voluntate aliena, scilicet Papæ. Alias rationes pro eadem sententia adducit Sanch. *cit. disput. 5. num. 5.* & citat pro illa ultra viginti quinque Doctores graues, qui ibi possunt videri. Ego enim contentus sum respondere ad substantiam casus. Estque hæc prima opinio probabilis tum ob rationes, tum ob multitudinem Doctorum illam defendentium. Et proinde hæc mulier, si voluerit illam sequi non nubendo tali viro, securâ conscientiam id poterit facere. Quamuis enim ut statim dicam, opinio opposita, quod scilicet talis promissio obliget, sit opinio probabilior; potest quis sequi opinionem quæ est probabilis relictâ opinione probabiliori, ut tenet communis Doctorum opinio, maxime Azor. *tom. 1. lib. 2. cap. 16. q. 5. & seqq.* Neque iudex Ecclesiasticus poterit hanc mulierem obligare in foro externo ad contrahendum cum tali viro, cum opinio illi assistens habeat pro se ultra vigintiquinque graues Doctores.

2 Est nihilominus secunda opinio, dicens prædictam promissionem esse validam, & proinde teneri illam mulierem obtentâ dispensatione Papæ nubere illi adolescenti. Hanc opinionem sequitur Sanchez *citata disputatione 5. num. 12.* pro qua citat decem & nouem graues Doctores, dicens esse probabilior, quàm sit prior: licet enim hæc habeat pro se pauciores Doctores quàm prior opinio, habet tamen solidiora fundamenta. Maior autem probabilitas opinionis alicuius non consistit in eo quod plures Doctores illam sequantur; sed in eo quod pluribus, & melioribus rationibus fulciatur. Prima ergo, & prin-

cipalis ratio pro ista opinione est. Nam promissio de re licita, honesta, & factibili, obligat promittentem sub mortali, postquam acceptatur ab illo cui promittitur, ut tenet communis opinio Theologorum, & Canonistarum, nec talis promissio potest reuocari nisi concurrentibus certis circumstantiis, quæ in hoc casu non interuenerunt, qualis est ingratitudo, & similes aliæ. At promissio de contrahendo matrimonio cum consanguineo dispensante Papa est res licita, cum quotidie fiat dispensante Papa, & proinde est res honesta si fiat cum tali dispensatione; & est factibilis, cum quotidie fiat: ergo talis promissio fuit valida, & proinde obtentâ dispensatione obligabit sub mortali. Et ex hac ratione destruitur fundamentum oppositæ opinionis, quod est, hanc conditionem, si Papa dispensauerit, esse conditionem impossibilem, eo quod sit conditio pendens à voluntate Papæ. Quod constat esse falsum; talis enim conditio non est impossibilis, cum quotidie Papa dispense in tertio gradu, imò & in secundo: quod autem quotidie fit, non dicitur impossibile. Posset verò dici impossibilis talis conditio, si Papa dispensauerit, quando esset dispensatio in primo gradu, seu impedimento, in quo nunquam Papa dispensat: at quando agitur de dispensatione in tertio gradu, in quo quotidie Papa dispensat, nullo modo est conditio impossibilis, sed possibilis. Adducit ad hoc Sanchez citatâ disput. 5. legem apud Iulianum, §. Constat, ff. de legat. 1. ex qua colligitur, quod non reputatur impossibile id quod pendet à voluntate Principis, quando Princeps id solet concedere.

2 Affert pro eadem opinione Sanchez cit. num. 12. duo exempla clara, & efficacissima. Primum: nam institutio

institutio spurij in hæredem, sub conditione, si princeps illum legitimauerit, est valida, iuxta communem, & verissimam sententiam, pro quo citat Couar. Duennas, Molina de primogeniis, Matienzo, & alios. Secundum exemplum est: nam venditio rei feudalis, seu maioratus simpliciter facta, inualida est: valet tamen si fiat sub conditione, si dominus feudi, aut princeps voluerit. Pro quo citat eundem Molinam, & adhuc ponit tertium exemplum: nam votum quo Episcopus vouet intrare Religionem, si Papa voluerit est votum obligans, si Papa dispenseret, vt tenet communis opinio: & tamen in his tribus rebus pendet conditio à voluntate principis. Et proinde nullam vim habet fundamentum præcipuum opinionis contrariæ: & ex consequenti promissio, de qua agimus, si Papa dispensauerit, fuit valida, & est obligatoria.

3 Ad secundum dubium dico, non patrem, sed ius commune, prohibere, & annullare matrimonium si fiat à femina non habente annos 12. completos per multa capita iuris canonici citata à Sanchez lib. 7. de *matrim. disput. 104. n. 1. & 2. & seqq.* ac proinde quoad hoc non est necessaria prohibitio patris, cum ius commune illud prohibeat, sic rigorosè, vt si ad annum duodecimum in femina desint duo tantum dies, matrimonium futurum sit nullum, vt tradit Sanchez citata *disput. 104. d. 2.* Quod verò amplius quæritur in eodem secundo dubio, an possit pater impedire matrimonium eo quod adolescens sit pauper, & filia diues, nullum habet fundamentum dubitandi: nam illa disparitas in diuitiis, vel in sanguine, nihil facit ad rem, cum videamus in praxi positum valere matrimonium diuitis cum paupere, nobilis cum ignobili: est enim matrimonium liberum ita vt nec pater filium,

filium, nec Rex subditum possit cogere ad nubendum, vel ad non nubendum, vt constat ex Concilio Tridentino *sess. 24. cap. 1. & 9. de reform. matrimonij*. Id verd quod proximè diximus non posse feminam validum matrimonium contrahere ante annos 12. completos, non tollit quin ista femina, de qua agimus, teneatur ex vi suæ promissionis contrahere matrimonium cum isto viro completo anno duodecimo.

Non obstante quod ista secunda opinio sit probabilior, & proinde absolutè tenenda, & consulenda in praxi: ego in hoc nostro casu consulere, & ferè obligare hanc feminam ne nuberet tali viro, eo quod pater puellæ contradicit, & nimis molestè fert. Moueor, quia ex vi duarum opinionum relatarum, licet secunda, dicens eam obligari, sit probabilior, vt dixi, prior tamen opinio est etiam probabilis, & vt dixi *num. 1.* potest quis absque peccato sequi opinionem minus probabilem relictâ probabiliori. Secundò ad persuadendum moueor ex eo quod doctè, & fusè tradit Cordub. in *sum. casuum, quest. 171.* videlicet filium, & præcipuè filiam, de ordinario peccare mortaliter contrahendo matrimonium inuito patre, maxime si id filia facit ante annum 25. in qua ætate adhuc pater non est in culpa, neque in mora eo quod filiam matrimonio non locauit, vt cernitur in ista quæ non est annorum duodecim. Et probat Corduba, quia in re grauissima, quale est matrimonium, à quo aliquando pender honor parentelæ, & interessè parentum, congruum, imò & debitum est, vt filij, maxime filia, obediant patri circa matrimonij electionem, maxime quando pater non suadet filiæ matrimonium disconueniens filiæ. Quod verò de ordinario filia peccet mortaliter nubendo contra volun-

tatem

tatem patris, probat optimè Corduba ex cap. *Honoratur* 32. q. 2. quod est D. Ambrosij, vbi S. Doctor de filia à patre in matrimonio locanda sic ait: *Illā* (id est filia) *enim iudicium spectat parentum, non est enim virginis pudoris eligere maritum.* Quo nihil clarius ad intentum dici potuit. & cap. *Hoc sanctum*, eadem causa, & *questione*, idem ferè habetur his verbis loquendo de maritandis virginibus: *Nec extra voluntatem parentum, vel suam, cogantur maritos accipere.* Et idem habetur in cap. *Aliiter* 30. q. 5. vbi sic dicitur: *Aliiter legitimum non sit coniugium nisi ab his qui super ipsam feminam dominationem habere videntur, & à quibus custoditur, vxor petatur.* Quæ omnia verba satis indicant magnam obligationem habere filiam, vt in matrimonio eligendo obediat patri. Ex contrario enim facto nascuntur multæ discordiæ, & odia perpetua. Vnde Corduba *cir. quest.* 171. §. *T assi* quanto à *las hijas*, dicit dari leges ciuiles, quæ concedunt patri vt possit exhæredare filiam, quæ furtiue, & contra voluntatem patris contraxit matrimonium. Quæ leges ciuiles (ait Corduba) licet ab Ecclesia reiiciantur, vtpote quia impediunt libertatem matrimonij; signum tamen est quod prædictæ leges culpam inueniebant in filia nubente contra voluntatem patris, ob quam culpam lex sic filiam grauiter puniebat.

CASVS XLVII.

*De confessione, & communione indebitè
factis in Quadragesima, an satis-
faciant præcepto.*

HI duo casus sæpe solent accidere. Primus est, an qui in Quadragesima confessus est, sed confessionem nullam fecit, eo quod vel aliquod peccatum mortale tacuit, vel quia non habuit dolorem aliquem de peccatis, iste talis satisfecerit præcepto confessionis annuæ, & proinde euaserit excommunicationem impositam non confitentibus in Quadragesima? Secundus casus est, an qui communicauit quidem in Quadragesima, vel Paschate, sed tamen communicauit in peccato mortali, satisfecerit præcepto communionis annuæ, & proinde euaserit excommunicationem impositam non communicanti in Paschate?

I Quod attinet ad primum casum de confessione, videtur imprimis quod ille qui sic confessus est diminutè, & sine vllò dolore, licet peccauerit mortaliter, satisfecerit tamen præcepto confessionis annuæ; nam potest quis bene satisfacere præcepto aliqui, licet existat in peccato mortali. Probatur exemplo in præcepto audiendi Missam, vt docent praxis, & communiter Doctores. Item is qui tenetur dare eleemosynam extrèmè indigenti, si illam ei det existens in peccato mortali, satisfacit præcepto dandi eleemosynam, licet inde fructum non recipiat: ergo pari modo faciens confessionem inuvalidam in Quadragesima

drageſima, licet in eo peccet, & fructum inde non recipiat, videtur tamen quod ſatisfaciet præcepto confeſſionis, & proinde euadet excommunicationem. Secundò probatur, quia licet talis confeſſio fuerit nulla, leges non puniunt pœnâ actum qui fuit nullus: probatur *ex l. 1. in fine, Cod. de ſepulch. violat.* vbi habetur, quod Notarius qui fecit inſtrumentum falſum, ſed inualidum, debet puniri pœnâ ordinariâ falſarij. Et hanc legem citat Sanchez *lib. 3. de matrim. diſput. 2. num. 5.* ad probandum quod ibi defendit, videlicet, quod licet ius commune impoſuerit pœnam excommunicationis, & alias, illi qui contraxit matrimonium clandestinum: ait Sanch. quod ſi quis contraxit matrimonium clandestinum aliàs nullum, & inualidum, non incurrit illas pœnas. Ergo eodem modo qui fecit illam confeſſionem nullam, & inualidam, euadet pœnam excommunicationis. Ex alio verò capite, quod iſte talis licet præcepto confeſſionis non ſatisfecerit, nihilominus pœnam euadat excommunicationis, tenent Nauarrus *cap. 10. ſum. n. 4.* & Henriquez *lib. 4. cap. 5. & lib. 2. cap. 14. num. 8.* & alij, quos ibi citat Henriquez: & cauſam aſſignant, quia licet hic non impleat præceptum ob cuius violationem poſita eſt cenſura, tamen iſte defectus adeò eſt occultus ob ſigillum confeſſionis, vt non videatur poſſe cadere ſub pœnis Eccleſiæ.

2 Hoc non obſtante tenendum eſt hunc, de quo agimus, qui fecit confeſſionem inualidam ſcienter ob duos citatos defectus, non ſatisfeciſſe præcepto confeſſionis, & proinde incurriſſe pœnas impoſitas non conſitenti. Hanc concluſionem tenet præter alios Bonacina *tom. 1. diſput. 5. de ſacramento Pœnit. q. 5. ſect. 7. puncto 4. n. 23.* vbi pro eadem citat duodecim Doctores graues,

graves, & recentiores, qui ibi poterunt videri. Ratio principalis est, quia præceptum confessionis est præceptum diuinum, quod determinatum est ab Ecclesia ad tale tempus, vt patet ex Tridentino *sess. 14. cap. 5. & canone 18.* Qui autem facit confessionem imperfectam, & inualidam, non confitendo omnia peccata sua mortalia ex malitia, aut ex ignorantia crassa, aut sine debito dolore, non implet præceptum diuinum, cum pœnitens ex Christi Domini institutione teneatur omnia peccata mortalia cum dolore confiteri: ergo qui facit confessionem imperfectam ob illos duos defectus, cum non impleat præceptum Christi, non satisfacit præcepto Ecclesiæ. Quod optimè declarat Suarez *tom. de Pœnit. disp. 3. sect. 7. num. 3.* dicens, Ecclesiam non instituisse, nec præcepisse confessionem, sed determinasse tempus confessionis faciendæ, & præcepisse fieri confessionem institutam à Christo Domino. Confessio verò à Christo D. instituta est illa quæ est valida cum dolore, aperiens omnia peccata, & per hanc solam satisfacit præcepto Ecclesiæ de annua confessione. Secundò probatur, nam quando aliquis modus est intrinsecus, ac de substantia alicuius actus præcepti, si desit ille modus in illo actu, non satisficit tali præcepto; est exemplum in recitatione diuini officij: præcipit Ecclesia, vt Clericus recitet horas canonicas cum attentione: & attentio est modus intrinsecus, & de substantia recitationis; clarum est apud omnes, quod Clericus dicens horas canonicas sine vlla attentione, non satisfacit præcepto Ecclesiæ de recitandis horis canonicis. Eodem modo, præcipit Christus Dominus, vel Ecclesia cōfessionem sacramentalem fieri in Quadragesima: de ratione, & substantia intrinseca confessionis

sionis est, ut fiat de omnibus peccatis, & cum dolore: ergo qui non confitetur cum illo modo intrinseco confessioni, non satisfacit præcepto confessionis. Hanc rationem secundam ponit Suarez *tomo de censuris, disput. 4. sect. 4. num. 19.* ad probandum in terminis quod incurrat excommunicationem ille, qui in Quadragesima confitetur inualidè; quia dolor, & integritas confessionis, sunt de substantia confessionis: confessio enim sine dolore, non est confessio instituta à Christo Domino.

3 Quæris: Aliquis in Quadragesima confessus est omnia peccata, & cum contritione, sed non recepit absolutionem à confessario culpâ sui pœnitentis, ut quia est publicus vsurarius, vel meretrix publica, qui nolunt illum statum relinquere: an isti satisfecerint præcepto annuæ confessionis? Azor *1. p. lib. 7. cap. 40. q. 4.* dicit aliquos sentire quod hi tales satisfaciunt præcepto confessionis annuæ. Et potest probari, quia hi ex sua parte videntur fecisse quod potuerunt confitendo integrè, & cum dolore: faciens verò quod in se est, non peccat. Et confirmari potest, quia si pœnitens confiteatur integrè, & cum dolore suo parrocho, & parochus iniuste illi deneger absolutionem, nec pœnitens habeat alium confessorem, videtur omnino quod ille pœnitens satisfecit præcepto Ecclesiæ, neque incurrit excommunicationem, quia non potuit amplius aliquid facere; facienti verò quod in se est, culpo non imputatur. Id ipsum de meretrice proxime dictum, quæ scilicet confessâ est, sed non absoluta, quod, inquam, hæc satisfaciat præcepto confessionis, etiam si non absolvatur, videtur probari ex praxi, nam meretrix sic confessâ non declaratur à parrocho pro excommunicata ob confessionis

præceptum omisſum : quod arguit eam per talem confeſſionem ſatisfacere præcepto.

4 Hoc tamen non obſtante Bonac. *cit. loco, num. 24.* ſentit oppoſitum, videlicet taliter confeſſum, & ſuâ culpâ non recipientem abſolutionem, non ſatisfacere præcepto Eccleſiæ: cùm enim culpa ſua non recipiat abſolutionem, in ſubſtantia non recipit Sacramentum, nec proinde ſatisfacit præcepto Eccleſiæ, quæ præcipit recipi ſacramentum Pœnitentiæ. Ad primum verò argumentum in oppoſitum, factum *in num. 3.* dicendum eſt, hos ſuâ culpâ non abſolutos, non feciſſe totum quod in ſe eſt, poterant enim habere firmum propoſitum non peccandi, & relinquere malum ſtatum, quo facto abſoluerentur: & cùm hoc non fecerint, non fecerunt quod in ſe eſt. Ad ſecundum exemplum de parocho iniuſtè negante abſolutionem pœnitenſi non habenti alium confeſſorem, dico hunc talem ſatisfeciſſe præcepto Eccleſiæ. Verè enim fecit quantum potuit, & per ipſum non ſterit, cùmque careat aliquo alio confeſſore, impoſſibilitatur ad alium quærendum, ſicut is qui habitaret in ſylvis. Ad tertium exemplum de meretrice, dico primò, quod ſi illa abſolutè dicat quod non vult relinquere malam vitam, non ſatisfacit præcepto, & incurrit excommunicationem. Si verò illa proponat quod quantum in ſe eſt, non amplius peccabit, licet aliàs timeat quod peccabit, poterit abſolui, & ſatisfaciet præcepto: & quia fortè ſemper cum hoc firmo propoſito conſentitur, ideo non publicantur, vt excommunicatæ.

5 Ad primum argumentum poſitum ſuprà *num. 1.* pro parte oppoſita, quod attinet ad exemplum de audiente Miſſam in peccato mortali, & ſatisfaciente præcepto

præcepto Missæ, dico primò, quod si sic audiens Missam nullam habeat attentionem ad Missam, quæ attentio est modus intrinsecus actui audiendi Missam, sicut suprà diximus attentionem in recitando diuino officio esse modum intrinsecum, de substantia recitationis: tunc audiens Missam sine attentione ad Missam, non satisfacit præcepto Missæ, sicut omnes Doctores docent. Si verò audiat Missam cum attentione, licet sit in peccato mortali, satisfacit præcepto Missæ, quia implet substantiam operis præcepti; audit enim Missam, de cuius substantia non est, vt audiatur in gratia, sed vt audiatur attentè. At is qui in Quadragesima confitetur sine dolore, & non integrè, non implet substantiam operis, quia de substantia confessionis est vt fiat integrè, & cum dolore. Eodem modo responderetur ad exemplum de dante eleemosynam extremè indigenti, quando ipse dans eleemosynam existit in peccato mortali: talis enim satisfacit præcepto, cum re vera impleat substantiam operis iniuncti, quod est dare eleemosynam: at confitens in Quadragesima sine dolore, & sine integritate, non implet substantiam operis iniuncti, id est, non confitetur cum illis circumstantiis, quæ sunt de substantia confessionis, dolor scilicet, & integritas. Ad secundum argumentum dicendum est primò Ecclesiam hîc propriè non punire actum nullum confessionis inualidæ, sed punire omissionem veræ confessionis quadragesimalis, qui enim sine dolore, ac diminutè confessus est, verè omisit quadragesimalem confessionem. Potest verò Ecclesia punire omittentes facere quod illa præcepit. Respondeo secundò posse Ecclesiam punire actum nullum. Nam Ecclesia excommunicat rebaptizantem: & tamen re-

baptizans facit actum nullum in genere baptismi, nullum enim baptismum confert rebaptizans. Videatur Suarez *tom. de legibus, lib. 5. cap. 34. maxime num. 8.* in quo capite tractat quo pacto leges possint punire actus inualidos. Ad tertium argumentum dicens ex Nauarro, & aliis, quod non satisfaciens præcepto modo supradicto ex defectu doloris, & integritatis non incurrit pœnas impositas, eo quod delictum sit valdè occultum. Respondet Bonacina *citato puncto 4. num. 25.* cum Suarez, Ledesma, & aliis ibi citatis, quod licet tale delictum ibi sit occultum, potest Ecclesia illud punire, sicut punit excommunicatione hæresim occultam per accidens, quæ non est purè mentalis, vt omnes Doctores farentur. Ista verò confessio facta sine dolore, ac diminutè, licet sit occulta, non est tamen mentalis, sed vocalis, & proinde potest puniri ab Ecclesia per censuram positam contra omittentes veram confessionem in Quadragesima.

6 Quod attinet ad secundum quæsitum in principio, an scilicet communicans in Paschate cum peccato mortali satisfaciat præcepto communionis? Suarez *tom. de censuris, disput. 4. sect. 4. num. 19.* dicit illum qui in Paschate communicaret, non solum in peccato mortali, sed etiam sine vera fide, animo irridendi, vel occultandi errorem, talis non satisfaceret præcepto, quia talis animus est contra substantiam talis præcepti: sed nos non hîc quærimus de communicante non habente fidem, sed de non habente gratiam, & existente in peccato mortali. Dico igitur cum Bonacina *tom. 2. disput. 1. de legibus, q. 1. puncto 9. num. 2.* quod iste talis licet peccet grauissimè, tamen satisfacit præcepto communionis, nec proinde incurrit

incutrit excommunicationem positam contra non communicantes in Paschate : quia iste talis adimplet substantiam præcepti , verè enim recipit corpus Christi , licet indebitè. Licet enim non recipiat debitè , & deuotè , iste modus recipiendi non est de intrinseca substantia Sacramenti : sed de congruitate , ac de de-
cência illius. Et concludit ibi Bonacina , quod im-
plens præceptum per actum ex aliqua circumstantia
malum , satisfacit præcepto , etiamsi non impleat mo-
dum , aut finem à legislatore intentum : modò finis ,
aut modus non sint de intrinseca ratione operis præ-
cepti.

CASVS XLVIII.

*De obligatione Religiosi expulsi ab Ordine
circa obligationem officij diuini.*

REs est indubitata quod Religiosus expulsus ab Ordine propter culpas , si habet ordinem sa-
crum , etiam si sit subdiaconatus tantum , teneri ad
dicendas horas canonicas , propter talem Ordinem
sacrum. Sed dubitatio est , an si iste Religiosus sic
expulsus caret Ordine sacro , vel quia est conuersus ,
id est frater laicus , vel quia licet recipiatur ad cho-
rum , adhuc tamen nullum recepit Ordinem sacrum ,
qui in Ordine P. N. Francisci dicuntur *Choriste* : sed
tamen Regula illius Ordinis obligat sub mortali præ-
dictum Choristam ad dicendas horas canonicas in
nostro Ordine per Breuiarium , & obligat Religiosos
laicos sub mortali ad dicendum certum numerum

orationis Dominicæ pro Officio diuino: quæritur, inquam, an isti Religiosi carentes Ordine sacro sic expulsi teneantur extra Religionem dicere illud Officium diuinum, ad quod tenebantur sub mortali ex vi suæ Regulæ, vt obligat regula P. N. Francisci?

1 Et quod, si saltem in Ordine P. N. Francisci teneantur prædicti Religiosi expulsi ab Ordine, dicere diuinum Officium respectiuè, videtur probari, quia cum illud præceptum dicendi diuinum Officium sit præceptum in Regula, & in Ordine Minorum, obliget ad mortale, videtur hoc præceptum non cessasse per expulsionem ab Ordine, cum Religiosus promiserit seruare Regulam toto tempore vitæ suæ. Et confirmatur, quia iuxta commune dictum Iuristarum, nemo debet ex culpa sua commodum reportare, cum culpæ potius debeatur pœna, quàm commodum. Sed si iste Religiosus sic expulsus deobligaretur à labore recitandi diuinum Officium, iam commodum ex sua culpa reportaret: ergo non liberatur sic expulsus à dicendo officio diuino. Et ita sentit Nauarrus in *Enchiridion. de Officio diuino, cap. 7. num. 20.* & Rodriguez *tom. 1. qq. 9. 30. art. 19.* qui addit non esse hos exonerandos à diuino Officio, sed solum in illis, quæ non possunt commodè seruari in sæculo, cum suâ culpâ extra Religionem sint: & extra Ordinem possunt commodè dicere Officium diuinum. Et ego olim idem censui cum his duobus Doctoribus *tomo 2. Dubiorum Regularium, verbo Eicere ab Ordine num. 7. in fine*, sed nunc re melius consideratâ,

2 Respondeo tales sic eictos non teneri in sæculo ad dicendum diuinum Officium in Religione promissum. Sic tenet expressè Suarez *tomo 4. de Religione, lib. 3. cap. 6. num. 12.* vbi citat Sorum *lib. 7. de iust. q. 2.*

art. 1.

art. 1. Idem tenet Bonacina *tom. 1. tit. de ijs qua priuatum spectant ad recitationem diuini Officij, disput. 1. q. 2. puncto 2. num. 3.* & licet ibi dicat oppositum sensisse Suarez *tomo 2. de Religione*, non tamen ipsum vidit postea *tom. 4. de Relig.* loco proximè citato, vbi sentit cum eodem Bonacina. Idem clarè colligitur ex Sanch. *lib. 6. Decalogi, cap. 9. num. 52.* vbi cum Nauar. Arag. Philarch. Sayro, Sà, & Sorbo, probat expulsum ab Ordine in perpetuum non teneri obseruare regulares obseruantias positas in Regula vltra tria vota solemnia: & ponit exempla, dicens, sic expulsum non teneri ad ieiunia Regulæ; & si sit Minorita, posse portare camisiā, & contrectare pecunias, equitare, licet hæc illi fuerint sub mortali prohibita per Regulam Minorum. Rationem assignat Sanchez: quia professus primò, & immediatè solum. vouit tria vota essentialia, cætera verò contenta in regula vouit consecutiue, & mediatè, videlicet si in illa Religione maneret. Et in speciali dicit contra Rodriguez, quod Minorita sic expulsus non tenetur ad ieiunia suæ regulæ, licet in sua Religione obligent sub mortali. Et hanc eandem rationem traditam à Sanchez, quod sic expulsus non obligetur ad obseruantias regulæ vltra tria vota, tradit & probat Suarez *citato loco num. 11.* citans Nauarum, Sotum, Molinam, Fredericum de Senis, & ait esse communem: & probat Suarez *citato num. 12.* quod sic eiectus non teneatur ad diuinum Officium; nam, vel teneretur ex voto: & hoc non, quia illud non expressè vouit, sed sola tria vota essentialia: cætera verò consecutiue, si maneret in Religione. Vel teneretur ratione regulæ; & hoc non, quia non tenetur obseruantias regulæ seruare extra Ordinem, vt ieiunia,

nia, &c. sicut suprà dixit Sanchez. Vel teneretur ratione Ecclesiastici præcepti, quod obliget omnes in Religione professos. Et hoc non: quia nullum datur tale præceptum Ecclesiasticum obligans Religiosos carentes Ordine sacro ad dicendum officium diuinum, vt probauit ipse Suarez *lib. 4. de horis canonicis, cap. 10. num. 7.* vel teneretur ratione consuetudinis: & hoc non. Nam consuetudo quæ est intra Religionem, non potest obligare existentem extra Religionem: tum quia non est maior ratio de consuetudine, quàm de regula: at regula non obligat extra Ordinem: ergo neque consuetudo. Tum, quia extra Religionem deficit fundamentum illius consuetudinis, quod est obligatio ad chorum ex vi regulæ; & fortasse sustentationis ex eleemosynis, & ex bonis Ecclesiasticis, vt aliqui volunt. Vel denique (pergit Suarez) teneretur sic eiectus ad diuinum officium ratione professionis, & hoc non, quia professio per se non affert secum obligationem diuini officij, sed hæc obligatio in Religionibus orta est ex consuetudine, vt ipse Suarez ibi testatur alibi se probasse cum Caietano, Ioan. de Medina, & aliis.

3 Potest hoc insuper probari ex eo quod tradit Sanchez *lib. 6. Decalogi, cap. 7. num. 80.* (& consentit Suarez *cir. loco, num. 13.*) probat inquam Sanchez *citato num. 80.* cum Sorio, Aragon. Azor, & Petro Ledesma, pòsse Prælatum redigere ad statutum laicorum illum Religiosum, qui fuerat professus ad chorum, Ordinèsq. suscipiendos. Probat, quia hoc quod est, professum ad chorum teneri ad officium diuinum, non consurgit ex vi professionis, sed ex consuetudine, & voluntate profitentis, & consensu Prælati possunt dispensare existente causâ, qualis causa erit,

erit, si sic mutandus de tali statu commiserit culpās: vel si ipse subditus hoc petat ex zelo nimiae humilitatis. Aduertit tamen Sanchez primò, hoc non posse facere Prælatum localem, sed prouincialem. Aduertit secundò, & optimè, Prælatum in hoc eximere subditum directè ab obligatione dicendi horas canonicas, sed indirectè, remouendo illum ab illo statu deputatorum ad chorum. Et ego addo, vel declaro, quod si hæc mutatio fiat circa professum ad chorum habentem iam aliquem Ordinem sacrum, talis mutatus ad statum laici tenebitur dicere diuinum officium propter Ordinem sacrum, quantumcunque culpas graues commiserit. Nam, teste Bonacina *cit. num. 3.* Religiosus quocunque Ordine sacro insignitus, & ad triremes relegatus tenetur dicere officium diuinum. Rediens ergo ad intentum dico, quod si Religiosus carens Ordine sacro intra Religionem, licet fuerit professus, & deputatus ad chorum in quo statu dicebat horas canonicas, per translationem ad statum laicorum liberatur ab obligatione dicendi horas canonicas: melius liberabitur ab eadem obligatione idem Religiosus carens Ordine sacro expulsus, & existens extra Religionem cum magnis impedimentis ad recitandas horas canonicas. Quæ omnia militant etiam in Religioso laico expulso propter culpas, vt non teneatur extra Religionem recitare illud quod pro officio diuino in Religione dicere tenebatur.

4 Ad primum argumentum in contrarium positum *num. 1.* patet solutio ex dictis: nam licet illud præceptum dicendi horas canonicas intra Religionem obligauerit Minoritam sub mortali, illud iam non obligat extra Religionem; quia Minorita non vult

officium diuinum voto speciali, sed solum consecutiue, & quasi conditionaliter, si in Religione maneret. At positus extra Ordinem non tenetur seruare illa quæ sunt in Regula ultra tria vota essentialia, vt supra dictum est cum tot Doctoribus. Ad confirmationem eiusdem primi argumenti respondet Suar. *cit. num. 13.* hunc Religiosum sic eiectum, & liberum à recitatione diuini officij non reportare commodum ex sua culpa propriè, ac directè; sed reportare commodum directè ex mutatione sui status, ex cessatione obligationis fundatæ in vita monachali; culpa verò ob quam expulsus fuit, est causa remota huius commodi, ad cuius pœnam per accidens secutum est vt tolleretur fundamentum istius obligationis. Et hinc etiam soluitur id quod in *eodem num. 1.* addebat Rodriguez, dicens, hos sic eiectos non esse exonerandos ab officio diuino, quod commodè possunt dicere extra Religionem: respondetur enim quod imò non possunt illud commodè dicere extra Religionem, cum ibi distrahendi sint multis, & magnis occupationibus & curis secularibus: nec viuere debeant in statu propriè Ecclesiastico. Addo quod ultra hoc, isti tales sunt deobligati, ob causas supra adductas.

CASVS XLIX.

Notationes particulares circa dispensationes obtentas.

Quoniam materia dispensationum, quotidiana est, & valde necessaria, & multi circa illam quotidie oriuntur, & interrogantur scrupuli à viris doctis; non

non erit inutile hîc apponere selectiores responsiones, quas circa illas viri docti recentiores tradiderunt; idque summatim per modum resolutionum.

1 Sit igitur prima resolutio : quando in narrativa dispensationis aliquid tacetur , vel falsò narratur: quo cognito superior non dispensasset , inualida est dispensatio : nam tunc superior censetur nolle dispensare , nisi sub conditione , si res ita est. Secus dicendum est quando aliquid tacetur vel falsò narratur, quo cognito superior difficilîus tantùm dispensasset, sed tamen dispensaret. Hanc ponit Bonacina *tom. 2. tit. de legibus, disput. 1. q. 2. puncto 4. num. 3.* quam declarat hoc modo. Nam si veritas occultata , vel falsitas narrata habeat pendentem connexionem cum materia dispensationis, tunc facit dispensationem inualidam. Si verò hanc connexionem non habet cum materia dispensationis, sed potiùs est res , vel materia impertinens ad causam , dispensatio valida est, quia in his subsistit principalis finis dispensationis. Ad hoc secundum ponit hæc exempla. Si quis in dispensatione obtinenda se finxit esse virum doctum, vel studiosum, &c. valet dispensatio, quia talis fictio nihil facit ad causam dispensationis. Secundum exemplum. Valida est dispensatio obtenta tacito nomine personæ ne cognoscatur à dispensatore , qui si illam cognouisset , non dispensaret propter odium : non enim tacetur aliquid habens necessariam connexionem cum materia dispensationis , citat Suar. Sanchez, & Azor.

2 Valida est dispensatio quando erratur in nomine personæ, quia error in nomine personæ non mutat intentionem dispensantis. Bonacina *citato loco num. 6.* citans multos, ubi ponit hunc casum. Si petens dispensationem

sationem dicat esse se diœcesis Eborensis, cùm tamen sit diœcesis Olyssipponensis, & Papa remittat dispensationem faciendam ab Ordinario nominato in narratiua, cùm non sit verus Ordinarius impetrantis: poterit in tali casu dispensare cum illo suus Ordinarius Olyssipponensis. Nam Papa ibi intendit dare facultatem dispensandi Episcopo ipsius impetrantis. Ita ibi Bonac. cum Salas, contra Sanch. dicentem in tali casu neutrum Episcopum posse dispensare. Sic ego vidi in casu simili. Misit Petrus, verbi gratiâ, famulum, vel amicum qui sibi afferret quandam Bullam Cruciatæ, soluit officiali Cruciatæ eleemosynam consuetam; sed famulus, vel officialis Cruciatæ errauit in nomine, & loco Petri dixit Franciscum. Respondi Bullam valere Petro non obstante errore nominis: quia intentio Papæ, vel Commissarij Cruciatæ fuit dare Bullam illi, qui soluit eleemosynam. Aliud exemplum ponit Bonacina *eodem num. 6.* dicens, quod si scriptor Bullæ Romæ dixit Papam per illam dispensare in tertio gradu affinitatis, cùm impetrans petierit dispensationem pro tertio gradu consanguinitatis, ait Bonac. Commissarium cui committitur dispensatio posse dispensare à voluntate Principis mandantis: & in hoc casu constat de voluntate Papæ, quod velit dispensare cum isto in impedimento quod petiit.

3 Si impedimentum certum narratur pro dubio, dispensatio est inualida: vt si petatur dispensatio voti quod certum est fuisse emissum, sed dicatur esse dubium, an sit remissum. Nam tunc tacetur aliquid habens connexionem cum materia dispensationis, nec omnino exprimitur substantia voti, cùm votum dubium non sit verum votum. Bonac. *cit. loco num. 7. &*

eodem

eodem num. 7. addit cum Sanch. & Fillucio, validè dispensari illum qui loco voti exprimit iuramentum, vel è contra loco iuramenti exprimit votum. Quia tunc, inquit, non erratur circa aliquid substantiale: cùm votum æquiualeat iuramento. Et addit, quod si fecit iuramentum in confirmationem voti, & non expressit iuramentum, valet dispensatio, quia destructo principali corrui accessorium. Secus si separatim vouit, & separatim per se iurauit, tunc enim vtrūque exprimendum est.

4 Si petatur dispensatio ad contrahendum cum consanguinea, & allegetur pro causa quod copula præcessit, quæ tamen re vera non præcessit, dispensatio nulla est, quia narratur vna tantum causa, & illa est falsa. In omni dispensatione Papæ semper intelligitur hæc conditio, si preces veritate nitantur. Et in hoc casu narratâ vnâ tantum causâ, & illâ falsâ, preces non nituntur veritate. Bonacina *num. 8.* vbi addit quod si petatur dispensatio à Papa ad contrahendum cum consanguinea, allegatis multis causis copulatiuè, videlicet quia præcessit copula, & est periculum scandali, & infamiæ inde suborituræ, valet dispensatio, etiamsi copula non præcesserit: quia Papa solet illam dispensationem concedere ob solum periculum infamiæ, quod ibi verè intercessit, & proinde preces veritate nituntur, licet illud de copula falsum fuerit. Addit quod quando narrantur duæ causæ disiunctiuè, sufficit quod aliqua illarum sit vera vt valida sit dispensatio.

5 Si verum taceatur, vel falsum exprimatur in vna tantum parte rescripti, vitiatur, & irritum reddit rescriptum quoad eam partem, in qua est subreptio, non verò quoad reliquas partes rescripti. Quod vitiatur,

tiet, & irritet quoad illam partem, in qua est subreptio, ab omnibus conceditur, quia tunc quoad illam partem preces non nituntur veritate. Quod verò non reddat inualidum quoad alias partes, ratio est, tum quia utile non debet per inutile vitari, ut habet regula iuris in 6. Tum, quia rescriptum pendet à voluntate concedentis: sed concedens voluit concedere, & concessit rescriptum, neque indicavit nolle reliquas rescripti partes valere, quando subreptio non fuit causa finalis: ergo rescriptum validum est quoad illas partes, in quibus non contigit subreptio: & hoc in terminis decernitur in capitulo *Super litteris*, de rescriptis. Hoc tamen limitandam esse docet, dummodo partes in quibus non contigit subreptio, separabiles sint quoad valorem à parte in qua fuit subreptio. Nam si separabiles non sint, sed sint accessoriae, rescriptum corrui: nam accessorium corrui destructo principali. Hinc colligit Bonacina, quod si quis in vno rescripto obtinuit dispensationem in voto castitatis, & peregrinationis ad limina Apostolorum, narratâ falsâ causâ in vno voto, poterit uti dispensatione quoad aliud votum in quo non contingit subreptio, quia vnum votum istorum non est accessorium, & dependens ab alio.

6 Valde etiam consolatorium est quod tradit idem Author citato loco, videlicet validum esse rescriptum quoad illam partem, in qua non contingit subreptio, etiam si curialis, vel sollicitator scienter subreptionem in ea parte commiserint inscio illo in cuius fauorem rescriptum obtinetur, qui verum curiali proposuerat. Ratio est, quia subreptio contingit solum in vna rescripti parte separabili ab alia, ut supponitur, tum quia impetrans non dicitur obtinere rescriptum

ptum per dolum, vel malitiam. Tum quia cit. cap. *Super litteris*, decernitur, dum subreptio contingit, inualidum esse rescriptum in poenam peruersitatis ipsius impetrantis. Hic autem non adest culpa, seu peruersitas ipsius impetrantis, sed in sollicitatore. Sollicitator autem graues poenas incurrit, vel meretur subreptionem committendo. Videatur Henriquez *lib. 2. cap. 3. num. 7.* & Rodriguez *in sum. 1. p. cap. 238. num. 9.*

7 Dubium est, an si in narratiua detur vitium tacendo veritatem, vel exprimendo falsitatem, & nihilominus Papa in dispensatione dicat, se dispensare ex motu proprio: per talem clausulam *motu proprio* suppleatur vitium subreptionis, & inualiditatis possit in narratiua? Respondet Bonacina *num. 21.* cum Suarez ibi citato, distinguendo. Nam vel Papa concedit hanc dispensationem motu proprio, absque petitione, vel narratione petentis, sed ex mera liberalitate: vel illam concedit ex prauia petitione, & informatione petentis. Si concedit primo modo, dispensatio, seu priuilegium valent, etiam si à parte rei subsit impedimentum. Ratio est, quia cum princeps concedit ex mera liberalitate, non ex causa sibi falso narrata, vel veritate tacita, cum priuilegiarius non loquatur, nec aliquid operetur, nisi acceptando gratiam, censetur Princeps tollere liberaliter omne impedimentum obstans, per illam clausulam *motu proprio*. Et sic habetur in cap. *Si motu proprio*, de prae-bend. in 6. Si verò Papa concedat dispensationem cum clausula *ex motu proprio* praecedente petitione, vel informatione petentis, & in informatione taceatur veritas, vel narretur falsitas, tunc illa clausula *ex motu proprio* non supplet illum defectum, & proinde dispensa

dispensatio est nulla. Probatum principaliter, quia in *cap. 2. de rescriptis*, dicitur, quod in rescriptis semper intelligitur apposita clausula, si preces veritate nitantur. Hic autem preces non nituntur veritate. Tum, quia impetratio beneficij non explicatâ eius qualitate, non valet, etiam si fiat motu proprio, ut docet *Panorm. cap. ad aures, de rescriptis, num. 5. & alij.*

8 Inualida est dispensatio circa matrimonium obtentum, non expresso gradu affinitatis, vel consanguinitatis, vel publicæ honestatis. Nam ex stylo curiæ, difficilius, & cum maiori onere dispensantur hi gradus quo sunt proximiores. Est etiam dispensatio inualida si non fiat expressio diuersorum titulorum, ratione quorum duo sunt affines. Vnde si quis cognatus sit, vel affinis alteri duplici titulo, nempe quia illum suscepit in baptismo, & confirmatione: aut quia copulam habuit cum duobus consanguineis illius, cum quo vult matrimonium contrahere, exempli gratia, cum patre, & fratre sponsi; seu cum matre, & sorore sponsæ, tenetur vtrumque titulum exprimere, cum inde duplex affinitas contrahatur, Bonacina citato loco *punct. 5. num. 3.* cum Filliucio, Sanchez, Layman, contra Rodrig. ibi citatum. Non tamen necessarium est exprimere numerum actuum copulæ: sicut enim ex multiplici iteratione voti non multiplicatur votum. Ita ex multiplicatione copulæ cum affine non multiplicatur affinitas.

9 Sequitur casus positus à Bonacina *cir. puncto 5. num. 4.* de quo ipse ait sæpius fuisse consultum, qui talis est: Petiit Petrus dispensationem à Papa ad contrahendum matrimonium cum Antonia consanguinea, cum qua habuerat iam copulam. Papa per suas litteras commisit Episcopo, vel Confessario, ut in illo casu

casu cum illo dispensaret. Sed antequam dispensatio executioni mandaretur ab Episcopo, copulam carnalem habuit cum eadem Antonia consanguinea. An litteræ dispensationis illi suffragentur non solum pro copula habita ante petitionem dispensationis, verum etiam pro copula habita post petitionem antequam dispensatio executioni daretur ab Ordinario? Respondet Bonac. prædictas litteras suffragari, & Ordinarium virtute illius facultatis sibi committæ posse dispensare. Ratio est, quia non inducitur nouum impedimentum per superuenientem copulam, sed idem manet, cuius auferendi facultas datur Ordinario: nam ex actionibus pluribus eiusdem speciei in eodem subiecto fit vnum numero accidens. Secundo, quia irritus aliquo impedimento non teneretur exprimere numerum actuum, per quos impedimentum contraxit. v. g. Irregularis non tenetur exprimere numerum actuum per quos contraxit irregularitatem; vt quoties celebravit existens excommunicatus: & citat ad hoc multos, & graues Doctores. Excipit tamen ille quando aliquis fecit multa homicidia, per quæ incurritur irregularitas: nam tunc in petitione dispensationis explicanda sunt omnia homicidia, quia tot sunt irregularitates, quot sunt homicidia. Et præterea quia ex stylo curiæ sic exprimi solet. Tertio probat, quia qui petiit dispensationem voti à Papa, & Papa commisit Episcopo, vel confessorio vt dispensaret: sed is post commissionem Papæ, sed ante executionem Episcopi, vel confessoris votum iterauit, potest adhuc hic talis dispensari in voto prædictæ facultatis virtute: quod probat ex Suarez ibi citato, & Sanch. *lib. 4. Decalogi, cap. 47. num. 33.* Bene tamen ibi aduertit, quod si hic qui petiit dispensationem ad

contrahendum cum consanguinea, postquam Episcopus, vel confessor expediuit dispensationem, copulam iterum habuit cum consanguinea, nondum contracto matrimonio, non poterit iam Episcopus cum illo dispensare; quia iam functus est munere suo. Et præterea per iam factam dispensationem sublatum est impedimentum, quod antea extiterat, non verò id quod denuo ortum fuit: & propterea si iste talis sic matrimonium contrahat, erit matrimonium nullum, quia contrahit cum vero, & nouo impedimento.

10. Inualida est dispensatio obtenta pro contrahendo matrimonio cum affine, vel consanguineo tacitâ copulâ inter illos habitâ antequam litteræ Romanæ transmitterentur, vel antequam Ordinarius, cui data est facultas dispensandi, expediret dispensationem. Sic Bonacina *cit. puncto num. 9.* dicens sic declarasse DD. Cardinales, & practici ex stylo curiæ. Addit tamen oppositum posse sustineri si copula taceatur ob periculum infamiæ. Pro quo citat Sanch. Petr. Ledesm. Gutier. Fillincio, Nauar. Sâ. Addit tamen quod si copula fuit habitâ post expeditionem Ordinarij, tunc non impedit matrimonium subsequens: nam iam ista copula non est incestuosa, cum iam per dispensationem sublatum sit affinitatis, vel consanguinitatis impedimentum. Tum quia nullo iure, vel stylo curiæ constat faciendam esse huius copulæ mentionem, quando habitâ fuit post expeditam dispensationem ab Ordinario.

11. In obtinenda dispensatione exprimenda est necessariò copula incestuosa, si habitâ sit spe facilius impetrandi dispensationem, vel cum tractatu matrimonij, vel cum scientia, vel ignorantia impedimenti.

Non

Non enim sufficit exprimere copulam, sed etiam explicandus est animus (quamvis alter eorum tantum talem habuerit animum) vel tractatus, quem contrahentes habuerunt ante expeditam dispensationem: sic enim seruat stylus curiæ. Sic Bonacina *citato puncto 5. num. 10.* sed in hoc quod ille ait, exprimendam esse copulam habitam cum spe facilius obtinendæ dispensationis etiam si ab vno illorum tantum spes concipiatur, & aliàs fore dispensationem inualidam: in hoc ultimo illi non assentior, quin potius dico, quod si vnus coniugum in copula incestuosa concipiat illam spem facilius impetrandæ dispensationis, impetratio erit valida expressâ copulâ, licet non exprimat illa spes facilius impetrandi ab vno tantum concepta. Ita expressè tenet Sanch. *lib. 8. de matrim. disp. 25. num. 31.* licet Bonacina illum citer pro se *in num. 24. eiusdem disput. 25.* quod clarè, & efficaciter probat ex Concilij Tridentini verbis, vt ibi poteris videre. Ac proinde tenet quod si vnus tantum fornicantium incestuosè spem concipiat facilius impetrandæ dispensationis, idque alteri non reuelet: dispensatio erit valida etiam si in petitione non exprimat copulam fuisse habitam cum spe facilioris impetrationis.

12 Si Papa dispense cum duobus impeditis ad contrahendum sub hac forma: *Si copula non interceperit;* talisque dispensatio petatur pro foro externo; renentur contrahentes confiteri copulam coram Episcopo examinante, aliàs contractum matrimonium tacitâ copulâ erit nullum. Probatur hac clarâ, & efficaci ratione: nam illa dispensatio est conditionalis, si copula non præcessit: ergo deficiente conditione deficit dispensatio, & mens Papæ est non dispensare, si copula præcessit, *cit. punct. 5. num. 14.*

13 Si in impetranda dispensatione exprimatur quod est impedimentum in quarto gradu, cum tamen sit in tertio gradu, dispensatio nulla est: quia non exprimitur qualitas, quam stylus curiæ docet exprimendam. Si verò è contrà, in petitione dicatur quod est in tertio gradu, cum tamē sit solum in quarto gradu, dispensatio valida est. Sic Suarez *tom. 2. de Relig. lib. 6. c. ult. n. 8.* & alij communiter probant, qui sicut qui dispensat in toto, censetur etiam dispensare in inferiore, & parte in eo contenta: ita qui dispensat in tertio gradu consanguinitatis, censetur etiam dispensare in quarto, qui continetur in tertio, tanquam in maiori. Idque verum esse dicit Bonacina *num. 15.* etiam si dedita operâ tale mendacium committeretur: nam talis dolus non est contra substantiam, nec eo præmissio difficilior dispensatio concederetur.

14 *Num. 20.* dicit illum qui occidit Sacerdotem, & pro dispensatione irregularitatis obtinenda solum dicit se occidisse quemdam virum, non exprimendo quod erat Sacerdos, validam obtinuit dispensationem. Sic tenet Bonacina *cit. num. 20.* cum Sanch. Salas, Sanctarello, Molina, Layman: quidquid oppositum censuerint Nauarrus, Rodriguez, & Suarez ibi citati. Ratio est, quia nullo iure, stylo, vel consuetudine præcipitur, ut exprimatur talis circumstantia. Tum quia licet occisio Sacerdotis sit maius peccatum ratione sacrilegij, non facit tamen irregularitatem specie distinctam.

15 Si aliquis indigebat dispensatione in certo casu, & noluit casum manifestare superiori, timens, quod ipse superior non erat dispensaturus: & ideo obtinuit ab illo facultatem, ut alius secum dispensaret, non exprimendo superiori qui, casus esset; & superior commisit

commisit alteri ut cum illo dispensaret: quæritur an ista dispensatio fuerit valida? Respondeo, quod si iste superior habuit antea animum nunquam in tali casu dispensandi, quia fortè credebat se in tali casu non posse dispensare, aut quia nolebat dispensare, idque aliquando ore protulit, in tali casu dispensatio est inualida, quia non adest intentio concedendi: sicut enim in generali concessione non veniunt ea, quæ quis non esset verisimiliter in specie concessurus, si specialiter rogaretur, ut dicitur *de reg. iuris in 6.* Ita nec in illa indeterminata concessione venit casus, quem verisimiliter non esset concessurus, quique virtuali concedentis voluntati repugnat. At si superior nunquam habuit animum non dispensandi in tali casu, & aliàs poterat dispensare, valida est dispensatio, & dispensationis concessio. Ratio est, quia facta est ab eo, qui facultatem, & voluntatem dispensandi habebat. Sanchez *lib. 8. de matrim. disput. 21. num. 24.*

16 Valida est dispensatio quam quis obtinet, etiam si non exprimat se iam illam petiisse, sed non obtinuisse. Nullo enim iure, vel ratione probatur necessariò esse exprimendam talem circumstantiam. Tum, quia superior in tali casu potest, & vult dispensationem concedere. Suar. *lib. 6. de legibus cap. 22.* & alij contra Menochium. Addit Suar. *citato lib. 6. cap. n. 4.* quod si ego petij à superiore dispensationem, & ille negavit, possum postea adire Prælatum inferiorem potentem aliàs dispensare in eodem casu, qui inferior si dispenset, valida erit dispensatio, non obstante quod negata fuerit à superiore, etiam si talis superior sit Papa, & ego recurri ad Episcopum potentem etiam dispensare. Nam illa denegatio Papæ circa dispensationem non abstulit ab Episcopo facultatem dispensandi,

quam aliàs habebat ex officio, vel delegatione. Limitat tamen hoc Sanchez *lib. 8. disput. 14.* dicens, quod si Papa non dispensauit, eo quod iudicaret non adesse causam dispensandi, tunc Episcopus, vel inferior non poterit dispensare in illo casu denegato à Papa, quia tenetur se conformare cum maiori, & meliore iudicio Papæ.

17 Si quis obtinuit rescriptum Papæ ut posset à certo confessario Doctore dispensari: eo rescripto non obstante poterit recurrere ad Episcopum, vel alium superiorem aliàs dispensare. Rescriptum enim non priuat Episcopum facultate quam aliàs habet ad dispensandum in illo casu. Sanchez *lib. 8. de matrim. disput. 14. num. 3. & 4.*

18 Si quis sit irretitus duabus irregularitatibus, homicidij scilicet, & illegitimitatis, validè potest obtinere dispensationem vnius, non factà mentione alterius: nam vna irregularitatis ablatio non pendet ab alia; sed tamen iste talis non poterit promoueri ad Ordines donec auferatur per dispensationem alia irregularitas: adhuc enim est impeditus propter irregularitatem. Sit exemplum in vno qui est ligatus pluribus excommunicationibus, hic enim potest validè absolui ab vna tantum, manens iterum ligatus alteris. An verò hoc etiam locum habeat in impedimentis matrimonij, ut scilicet possit validè obtineri dispensatio in vno impedimento, non obtentà dispensatione in alio, quæstio est pro vtraque probabilis: de qua Bonac. *cir. disput. 1. punct. 9.* vbi citat pro vtraque parte æquales Doctores recentiores, licet ipse sequatur partem negatiuam. Declaro tamen, quod licet quis sequens partem affirmatiuam, obtineat dispensationem in vno impedimento matrimonij

non obtenta dispensatione in alio; iste talis nubere non poterit cum adhuc sit impeditus alio impedimento.

19 Si Papa concessit Episcopo facultatem ut dispenseret cum Petro irregulari ad Ordines sacros recipiendos, assignans pro causa paupertatem parentum: & antequam Episcopus dispense, cessauit causa dispensationis, ut quia parentes mortui sunt, vel facti sunt diuites præter spem, iam non potest Episcopus dispensare, cum cessauerit causa dispensationis. Facultas enim illa dispensandi concessa fuit Episcopo conditionaliter, si preces veritate nitantur; & in hoc casu iam non est verum, quod parentes Petri pauperes sint. Bonacina *punct. 10. num. 3.* ubi ait cum Sanchez ibi citato, hoc esse intelligendum, quando causa dispensationis cessauit in totum, vel omnino. Si enim solum cessauit ad tempus, & transacto paruo tempore reuixit causa dispensationis, poterit dispensare: quia in tali casu non fuit causa verè ablata, sed suspensa. Et hinc colligitur, quod causa ob quam Papa alicui concedit ut dispense, non solum debet existere quando Papa Romæ concedit illam facultatem, ut dispenseretur: sed debet etiam illa causa existere tempore, quo delegatus à Papa dispense. Bonac. *cit. punct. 10. num. 4. cum alijs ibid. citat.*

20 Licet aliqui Doctores graues citari à Bonacina *puncto 10. num. 9.* censeant, quod dispensatio iam obtenta ob causam tunc subsistentem, non cesset, etiam si postea cesset causa: verior tamen, & tutior sententia est, quod cessante causa ob quam dispensatum est, cessat etiam dispensatio. Hanc tenet Sanchez, Tiraquellus, & multi ab utroque citati, quos sequitur Bonacina *puncto 10. num. 5. & 9. §. Hac sententia.* Pro-

batür, quia dispensatio pendet à voluntate superioris: superior autem non censetur velle, vt locus dispensationi sit, si causa dispensationis cesset. Non enim præsumitur velle aliquem ab obligatione legis eximere, ei que concedere facultatem faciendi contra legem non subsistente iustâ causâ: alioqui talis concessio, seu dispensatio esset iniqua. Et ultra alia exempla adducta à Bonacina, facit exemplum in praxi: nam dispensatio vescendi carnibus in Quadragesima ob certam infirmitatem, cessat cessante illâ infirmitate, quæ fuit causa dispensationis, & hoc exemplum recipitur communiter in tota Ecclesia. Hinc sequitur primò dispensatum in ieiunio propter aliquam infirmitatem, teneri ad ieiunium cessante infirmitate. Sequitur secundò dispensatum in aliqua lege humana, vel diuina, vt in iuramentis, vel votis non videri immunem à peccato iuxta materiâ, & præcepti grauitatem, si tali dispensatione vtatur postquam omnino cessauit causa dispensationis. Limitat Bonacina hanc opinionem, nisi superior ob causam temporalem, quam sufficientem putat, ad dispensationem perpetuam concedendam, absolute dispenset: constat enim Sum. Pontificem non solum in aliquibus, quæ sunt de iure humano, sed etiam in illis, quæ sunt de iure diuino, vel naturali, absolute, & in perpetuum aliquando dispensare.

21. Si dubium sit, an causa dispensationis cessauerit: præsumendum est non cessasse, & proinde adhuc dispensationem valere. Probatür, quia in tali dubio possessio stat pro dispensatione, quam constat validdè concessam fuisse. Tum, quia in dubio valoris dispensationis præsumendum est pro valore dispensationis: & hoc multum prodest ad quietandos aliquorum

quorum scrupulos in materia ieiunij, vel dicendi horas canonicas, & sic de aliis.

22 Si quis post obtentam dispensationem in quacunque re, proposuit secum illâ non uti, aut illi renunciare; potest postea non obstante tali proposito, tali dispensatione uti, modò illam non renunciauerit coram superiore, & superior acceptauerit renunciationem. Ita Bonacina citato puncto 10. num. 5. citans Salas, Sanchez, & Suarez, imò addit Sanchez lib. 8. de matrim. diffut. 32. num. 5. & 6. quod licet iste, de quo loquimur, post obtentam Bullam dispensationis lacerauerit litteras dispensationis animo non utendi illis, adhuc potest postea eadem dispensatione uti, si voluerit: probatur, quia subditus per propositum non utendi dispensatione, aut per renunciationem nondum acceptatam à superiore, non abdicauit à se ius dispensationis, nec ob id dispensatio vires suas amisit; ergo qui dispensationem obtinuit, & proposuit non uti, potest retractatâ voluntate uti dispensatione. Præterea, per quascunque causas res nascitur, per easdem dissoluitur, cap. 1. de reg. iuris; sed ad concessionem dispensationis, & priuilegij requiritur voluntas concedentis, & dispensati: ergo ad eius dissolutionem requiritur voluntas utriusque: ac proinde qui proposuit non uti dispensatione, potest adhuc illâ uti, cum nondum adsit voluntas superioris dispensantis, acceptantis renunciationem, ut suppono.

23 Dicta in præcedenti numero locum habent in dispensatione legum humanarum, & externarum: non verò in dispensatione voti, & iuramenti. Ratio diuersitatis est: nam obligatio aliarum legum ab alio pender; obligatio verò voti, & iuramenti pender à voluntate propria cuiusque. Vnde dispensatio voti,

vel iuramenti semel perfectè concessa, amittit vim suam per internam renunciationem: nam interius renuncians dispensationi voti, vel iuramenti, præsumitur iterum velle sibi imponere obligationem voti, & iuramenti, quæ ab ipsius voluntate pendet, nisi aliud constet de mente ipsius: & proinde indiget noua dispensatione, factâ semel renunciatione internâ. Dispensatio verò aliarum legum non admittit vim suam donec renunciatio dispensationis fuerit acceptata à legitimo superiore: quia obligatio aliarum legum non pendet à voluntate renunciantis dispensationi. Ita Sanchez *lib. 8. de matrim. disput. 32. num. 3.* qui aduertit hoc locum habere quando dispensatio voti, vel iuramenti nondum sit perfectè concessa: vt si Episcopus, vel confessarius cui à Papa, vel à summo Pœnitentiario data est facultas dispensandi cum aliquo, nondum expediuit dispensationem, & is in cuius fauorem data est facultas dispensandi, renunciet dispensationi: potest adhuc mutatâ voluntate recipere dispensationem, & illâ vti. Ratio est, quia nondum exemptus erat ab obligatione, cum dispensatio nondum fuerit expedita: & licet votum sæpius repetatur ante dictam expeditionem, seu dispensationem, potest tamen eâdem dispensatione auferri.

Hæc sunt potiora documenta adducta à Doctoribus in materia dispensationum, ita vt per hæc possint resolui omnia ferè dubia quotidiana circa dispensationes oborta. Qui voluerit copiosiores hac de re tractatum, consulat Sanchez *cit. lib. 8. de matrim.* quem totum integrum consumit in disputationibus de dispensatione.

CASVS L.

Utrum Confessarius possit absolvere complicem sui peccati cum quo peccauit?

QUidam Confessarius habuit copulam carnalem cum quadam femina graui, & habita in uicinia in magna reputatione. Mulier valde timer peccatum suum alteri Sacerdoti confiteri ob periculum honoris: & fortè aliquando non habet commodè alium confessarium nisi complicem suum. Quæsitum est utrùm hæc mulier possit validè confiteri illi Sacerdoti, cum quo peccauit, & is possit validè illum absolvere? Idem casus poni potest in Confessario, qui habuit actum sodomiticum cum aliquo (quod omen Deus auertat) an possit hic Confessarius complicem validè absolvere in confessione sacramentali? Idem quæri potest de confessario, qui furtum commisit cum aliquo in secreto, an possit validè absolvere complicem suum in furto?

Igitur Bonacina tom. 1. tit. de sacramento Penitentiae, disput. 1. quest. 7. punct. 5. à num. 10. & sequentibus, tenet non posse confessarium habentem facultatem ad absolendum à reseruatis, absolvere complicem sui peccati, siue à peccatis, siue à censuris: & ita ait decretum fuisse in aliquibus Conciliis prouincialibus diocesis Mediolanensis: ubi non solum fit prohibitio ne confessarius audiat confessionem sui complicis, sed etiam illi adimitur iurisdictio ad talem absolutionem, declarando quod talis confessio erit;

erit nulla, & Confessarius oppositum faciens manebit excommunicatus. Affert ad hoc præcipuè hanc rationem: nam confessio sacramentalis debet fieri cum pudore, vt communis opinio docet, & cum animo præcauendi peccata in futurum: confessio autem facta Confessario complici non fit cum pudore, & verecundia: imò fortè ex ea accipi potest occasio liberiùs peccandi. *Secundò*, quia Sacerdos culpæ socius non censetur Confessor approbatus, sed potius reprobatus ad confessionem complicitis audiendam. *Tertiò*, quia aliàs sequeretur quod tempore Iubilæi posset Sacerdos excommunicatus, vel suspensus sacramentum Pœnitentiæ administrare, quod est falsum. Et videtur Bonacina hoc sentire non solum in diœcesi Mediolanensi, vbi id dicit specialiter prohiberi: sed etiam extra Mediolanum, absolute enim, & in generali loquitur: exprimens hoc verum esse non solum in peccatis carnis, sed etiam in aliis, vt in furto & cæteris: ita vt etiam in articulo mortis non possit Confessarius suum aliquem complicem absoluerè, si adsit alius Confessarius qui possit confessionem excipere.

1 Hæc opinio quod sciam, nunquam fuit recepta, imò nec audita extra Mediolanum, & quod notandum est, Bonacina nullum Doctorem pro se in hac materia citat. Et ideo cùm decreta Ecclesiæ Mediolanensis non habeant vim obligandi extra illam: primò consulendum est ne pœnitens confiteatur sacramentaliter cum Confessario complice sui peccati, propter periculum suprâ tactum à Bonacina: sed tamen dicendum est secundò, quod si pœnitens id faciat propter vrgentissimam necessitatem, vt quia fortè alium Confessorem non habet: vel si habet, periculi-

ratur

tatur honor, & fama pœnitentis si illi alteri confiteatur; in tali casu, & concurrentibus his circumstantiis, si pœnitens non timeat periculum relapsus, confessio facta Confessario complici valida erit. Probatur argumento claro, & efficaci. Nam Confessarius complex per illud peccatum quod commisit cum pœnitente complice non amisit iurisdictionem ad absoluendum. Suppono enim quod per illud peccatum Confessarius non incurrit excommunicationem, vel ullam suspicionem: quod si illas incurrit, poterit ab illis prius absolui, & postea sic absolutus poterit confessionem complicis validè audire. Suppono etiam quod in diœcesi istius Confessarij non datur tale decretum id prohibens sicut Bonacina dicit dari Mediolani: vnde ergo hic Confessarius amisit iurisdictionem ut non possit absolvere talem complicem, maxime cum de iure communi id non sit prohibitum? Difficilior casus est, quem ponit Ludouicus de Beia 4. *part. Respons. moralium, casu 6.* qui talis est. In quodam oppido erant duo tantum Confessores ap- probati; hi duo tempore Iubilæi irato animo se adinuicem percusserunt in præsentia multorum, & fuit casus publicus in toto oppido: die sequenti amicabiliter reconciliati sunt, & adinuicem unus alteri confessus est sacramentaliter, & virtute Iubilæi se adinuicem absoluerunt, & statim celebrarunt. Quæsitum est, an illi Clerici publicè excommunicati ob notoriam percussorem Clerici, se potuerint absolvere validè? Et respondet Beia potuisse, dato quod urgeat necessitas celebrandi, vel ministrandi aliud Sacramentum, quæ sine scandalo differri nequeant: Probat, quia necessitas non habet legem: & pia mater Ecclesia non intendit in tam vrgenti necessitate priuare

priuare filios remedio necessario. Præterea quia irregularis ad vitandum scandalum, & periculum famæ potest celebrare, vt tenet Nauarrus *in manuali*, cap. 27. num. 279. Si ergo hoc concedit Beia excommunicato notoriè percussore Clerici, cui excommunicato interdicta est omnino ministratio sacramentorum per legem Ecclesiæ: à fortiori id licebit Confessario complici ad absoluendum suum complicem, si interueniat talis necessitas, vt famæ periculum: maxime in casu in quo Confessarius complex non sit excommunicatus, neque irregularis. Et hoc magis locum habebit, si ponamus casum in parcho rurali, qui cognouit carnaliter suam parochianam, quæ non potest urbem, vel oppidum adire commodè pro quærendo alio Confessore. Similis est casus positus à Sorbo Capucino *annotat. ad compendium*, verbo *Absolutio ordinaria quoad fratres*, §. *Sed si succederet*, vbi probat, quod si duo Religiosi se adinuicem percutiant, & aliàs habeant facultatem absoluendi à tali censura, poterunt se adinuicem absolvere.

2 Neque obstat si dicas, per hoc dari occasionem vt quis faciliùs peccet, complex enim sciens, quod in suo complici Confessario facilius absolutionem inueniet, quàm in alio Confessario, facilius peccatum committeret. Peccans verò cum spe facilioris indulgentiæ non illam meretur. Ad hoc argumentum respondetur primò, nos hæcenus non fuisse locutos de complice peccante cum spe facilioris veniæ, sed de peccante ordinario ex fragilitate. Dico secundò, quod licet iste complex peccaret cum complice confessario sub spe faciliùs veniam impetrandi, adhuc ab eo licitè posset absolui; secus, si illi confiteretur cum proposito iterum peccandi cum illo: tunc enim

est

est incapax absolutionis. Nam ista prohibitio, quod non absoluator peccans ex confidentia, vel sub spe facilioris veniæ, non habet locum nisi in casu quo lex, vel Bulla id exprimit, vel prohibet in speciali. In hoc verò casu, vt iam diximus, non datur lex Ecclesiæ prohibens ne absoluator peccans sub spe facilioris absolutionis impetrandæ à Confessario complici. Confirmatur responsio ex eo quod tradit glossa communiter recepta in *cap. fin. de immunit. Ecclesiæ*, dicente, quod delinquens extra, vel prope Ecclesiam etiam spe gaudendi immunitate Ecclesiæ, gaudet illa. Vide Nauar. in *commentario de Iubileo, & Indulg. notatione 34. num. 6.* & eundem Nauar. in *manuali, cap. 23. num. 109.* vbi explicat Bullam Pij IV. & Pij V. de confidentia simoniaca in beneficiis.

3 Ad primam obiectionem ex Bonacina, dum dicit confessionem debere fieri cum pudore, & rubore, & complicem non posse confiteri complici cum rubore. Respondeo illam circumstantiam confessionis sacramentalis, quod sit verecunda, esse quidem ad maiorem decentiam, & bonitatem confessionis sacramentalis: non tamen esse de essentia confessionis, ita quod si confessio fiat sine verecundia, desinat esse confessio sacramentalis; rem sic declaro: Nauarrus (& alij) in *manuali, cap. 2. num. 5.* ponit quatuor versus, qui incipiunt: *Sit simplex, humilis confessio*, &c. In quibus quatuor versibus continentur sexdecim conditiones requisitæ ad confessionem sacramentalem. Ex illis refero has præcipuas, quod sit frequens, verecunda, lachrymabilis, fortis, &c. Quis ergo non videat non omnes conditiones ibi positas esse de essentia confessionis sacramentalis? Nam inter illas conditiones vna est quod sit lachrymabilis.

mabilis. At non est de essentia confessionis sacramentalis, ut fiat cum lachrymis: imò facta sine illis potest esse vera confessio. Item alia conditio confessionis ibi posita, est ut sit frequens. At confessio potest esse verissima, licet non sit frequens, sed semel tantum facta in anno. Sunt ergo illæ sexdecim conditiones confessionis sacramentalis, perfectiua, magna ex parte, non verò omnes essentielles, ita ut si aliqua desit, desinat esse vera confessio, Respondetur secundò pœnitentem confitentem sacramentaliter suo complici confessario, posse habere debitam, & veram verecundiam. Nam pœnitens non tenetur præcipuè erubescere confessorem, vel homines, sed verecundari coram Deo, & coram se. Potest hoc explicari exemplo gloriosæ pœnitentis Magdalenæ, de qua optimè considerat D. Gregor. *hom. 33. in Evangelio*, quod cum primò accurrit ad Christum Dominum in domo Pharisæi conuiuantis, non erubuit conuiuentes, qui illam agnoscebant; sed erubuit Christum Dominum, & ideo se posuit retrò post terga Christi, non coram facie illius: & præterea in hoc facto erubuit se ipsam. Verba Diui Gregorij sunt hæc: *Super conuiuentes ingressa est. Nam quia semetipsam grauiter erubescerat intus, nihil esse credidit quod verecundaretur foris.* Sic Diuus Gregorius. Quod potest ad intentum applicari, ac dici, quod pœnitens confitens suum peccatum confessario complici eiusdem peccati, licet non habeat verecundiam de confessario, quæ non est de essentia; habet tamen verecundiam coram Deo offenso, cui ferè potest dicere cum Dauide Psalm. 50. *Et malum coram te feci.* Et præterea potest idem pœnitens habere verecundiam de suis peccatis, quæ verecundia de peccatis est præcipua, quæ commenda-

tur in illis conditionibus requisitis ad confessionem.

4 Ad secundum dictum Bonacinæ, dico non sumi ex se occasionem peccandi facilius, ex eo quod complex confiteatur confessario complici: & licet pœnitens dum prius peccauit ex fragilitate sua talem spem fiducia conceperit, id non tollit quin possit postea verè pœnitens à confessario complice absolui, vt patet ex dictis *in num. 2.* Ad tertium dictum Bonacinæ, quod confessarius complex delicti censeatur reprobatus ad audiendam confessionem complicitis. Respondetur id falsum esse: neque id constare ex aliqua lege communi, vel particulari extra Mediolanum. Ad vltimum argumentum Bonacinæ concedimus quod infert tanquam absurdum: sed dicimus non esse absurdum, sed licitum, quod concurrente urgente necessitate, & periculo, non solum tempore iubilæi, sed extra illud possit Sacerdos confessarius complex delicti absolvere complicem delicti, si alias habet facultatem absoluedi à tali delicto, vt sufficienter manet probatum ex dictis.

CASVS LI.

De institutione cuiusdam Capellaniæ cum certo onere.

Petrus in suo testamento bona sua immobilia reliquit Francisco, in quibus bonis instituit capellaniam perpetuam, & consignauit Clerico Capellano futuro sexaginta quinque ducatos singulis annis reddendos. Franciscus, hæres quæsiuit Clericum pauperem,

E e rem,

rem, qui illam capellaniam vult dicere singulis annis stipendio, seu eleemosynâ quadraginta quinque ducatorum. Præterea Franciscus administrator capellæ emit calicem, & vestimenta ad celebrandas Missas dictæ capellæ.

Quæritur primò, vtrum Franciscus ex illis sexaginta quinque ducatis assignatis Capellano, à testatore, possit sibi retinere viginti ducatos, & dare Capellano pauperi quadraginta quinque, cum quibus ille contentus est seruire capellanix?

Quæritur secundò, an Petrus administrator capellanix possit sibi applicare de stipendio Capellani, pecuniam illam, quam insumpsit in emendo calice, & vestimento pro celebrandis Missis dictæ capellanix?

1. Et quod attinet ad primum dubium, videtur quod possit Petrus retinere sibi illos viginti ducatos ex sexaginta quinque iussis dari Capellano; & Capellano dare solum quadraginta quinque. Potest hoc probari exemplo communiter adducto à Doctoribus, in materia *de restit.* Dedit dominus proxeneta rem vendendam pretio assignato, vt decem: proxeneta suâ particulari diligentia, quam posuit, rem vendidit tredecim: dicunt Doctores communiter posse proxeneta illa tria sibi retinere, nec domino reddere, quia illa duo sunt fructus suæ diligentix, quam non tenebatur adhibere. Ita in hoc casu videtur, quod Franciscus, qui tenebatur soluere Capellano sexaginta quinque, si ob suam diligentiam, & preces obtinuit à Capellano, vt contentus esset cum quadraginta quinque, poterit sibi retinere illos viginti ducatos, qui videntur suæ diligentix deberi. Quoad secundum verò quaesitum, an possit Franciscus expensas factas in emptione calicis, & vestimenti emptorum, à stipendio

dio assignato Capellano per testatorem extrahere, & sibi retinere, videtur quod potuerit: nam illæ expensæ non videntur solum voluntariæ, sed fuerunt expensæ necessaria: etenim sine calice, & sine veste sacra non potest Missa celebrari. At expensæ necessaria tribuendæ sunt conductori, quas fecit in re conducta, vt Doctores communiter dicunt in materia de locato & conducto.

2 Ad primum quæsitum respondeo Franciscum non posse sibi retinere illos viginti ducatos, sed teneri dare Capellano omnes sexaginta quinque ducatos à testatore assignatos. Probatur primò, quia capellania comparatur beneficio simplici, teste Azorio *tomo 2. lib. 3. cap. 8. quæst. 4.* vbi dicit hanc esse communem opinionem. At beneficij collator non potest beneficium conferre cum diminutione, sed illud integrum debet conferre, vt expressè habetur in decretalibus, titulo *vt Ecclesiastica beneficia sine diminutione conferantur.* cap. fin. Secundò, quia hæres non potest autoritate propriâ mutare legata, siue donationes à testatore relictas: sed testator reliquit Capellano absolute illos sexaginta quinque ducatos pro suo labore celebrandi: ergo hæres Franciscus non potest illos minuere. Tertiò, potest hic casus probari per alium casum ferè similem positum à Bonacina *tomo 2. disput. 3. de contractibus, q. 17. puncto 8. §. 9. & §.* *Ex quo patet.* vbi dicit quod si testator reliquit certam pecuniam pro construendo oratorio, sed hæres in construendo oratorio non insumpsit totam pecuniam, non potest hæres illud residuum pecuniæ sibi retinere. Ratio est, quia hæres non censetur satisfacere intentioni testatoris, qui illam quantitatem pecuniæ assignauit pro illo opere. Quæ ratio directè inferuit ad casum nostrum.

maximè cū ista pecunia relicta sit à Petro pro congrua sustentatione Capellani laboraturi.

3 Neque obstat, si dicas, istum Capellanum sciuisse quanta pecunia relicta fuerit pro Capellano futuro à testatore, & eo non obstante ipsum liberè acceptasse capellaniam: cum quadraginta quinque ducatis tantum, ac proinde libenter illos viginti ducatos remisisset hæredi, eosque illi liberaliter donasse censendus est. Non obstat, quoniam, cum in informatione dicatur quod Clericus iste erat pauper, non est credendum Clericum pauperem liberè donasse Francisco viginti ducatos singulis annis, sed quod id fecit inuitus ad leuandam suam paupertatem. Probatur hoc, quia iuxta Mascardum *tom. 1. de probat. concl. 554.* donatio regulariter non præsumitur: & ponens signa quando donatio potest præsumi, dicit vnum signum esse, quando is qui donat est diues, & is qui accipit est paupertate oppressus. At in nostro casu à contrario se res habuit. Nam Clericus donans, seu remittens viginti ducatos, erat pauper, & Franciscus cui viginti ducatos remisit, erat diues: & ex consequenti non fuit remissio, seu donatio libera, & voluntaria. Constat verò quod donatio inuoluntaria non est donatio, neque res sic donata potest tutâ conscientia retineri.

4 Ad argumentum in contrarium positum *num. 1.* respondet Reginaldus *tom. 2. lib. 25. num. 316.* cum Sylvestro & Nauar. cum hac distinctione. Si fuit pactum tacitum, vel expressum inter dominum, & proxenetam, ut proxeneta domino rei solum decem redderet, sique aliquid in pretium ultra inueniret, sibi retineret; tunc certum est quod poterit illa tria retinere. Si verò tale pactum non interuenit, non poterit retinere. Quando enim

enim dominus rei vendendæ, taxauit vt venderetur decem, voluntas illius solum fuit ne venderetur infra decem, non autem ne supra decem, si occasio ita ferret. Et probat Reginaldus, quia sicut proxeneta, si rem non venderet, tenebatur illam integram reddere domino suo: ita postquam illam vendidit, tenetur domino reddere totum pretium pro illa receptum. Iam ergo exemplum non probat contra nos. Nam in nostro casu non interuenit pactum inter Petrum mortuum, & Franciscum hæredem, neque tacitum neque expressum, quo Petrus dixerit Francisco vt si capellanium inueniret inferuire volentem pro minore stipendio, quam taxabat in testamento, residuum sibi Franciscus retineret: sed absolutè Petrus dixit vt Capellano futuro darentur sexaginta quinque ducati: ergo hæres nihil potest illi detrahere. Confirmo hoc adhuc isto clarissimo exemplo. Iussit quis in testamento vt maritarentur tres puellæ virgines, & vnicuique pro dote darentur septuaginta ducati. Hæres diligentiam adhibuit, & obtinuit à puellis vt contentæ essent accipere singulæ sexaginta ducatos pro dote, idque illæ fecerunt ad leuandam suam paupertatem. Nunquid poterit hæres in hoc casu sibi retinere illos triginta ducatos detrahendo decem ab vnaquaque? Minimè profectò, quia hæres absolutè iussit vnicuique dari septuaginta. Quod optimè quadat cum nostro casu.

5 Quod attinet ad secundum quæsitum de expensis factis in emptione calicis, & vestis sacræ. Respondetur priuò, quod si testator in testamento ultra pecuniam dandam capellano, reliquit aliam pecuniam, seu redditus pro sumptibus capellanix, ex illis redditibus, vel pecunia erat emendus calix, vel vestis

sacra, vt patet, non ex stipendio assignato Capellano. Si verò talis pecunia separata non est relicta, & Capellanus habebat faciliè Ecclesiam, in qua inueniret calicem, & vestem sacram ad celebrandum, non potuit hæres emere calicem, & vestem ex pecunia assignata Capellano illo inuito; quia in hoc læsionem daret Capellano, minuendo stipendium illius, pro emptione rei, quæ non erat necessaria ad celebrationem Missarum. Si autem hæres non deficiente calice, vel veste sacra, voluit ad maiorem ornatum emere calicem, & vestem meliorem, credo quod suis sumptibus propriis id debet facere, & quod non sunt illi soluendæ tales expensæ ex stipendio capellani. Probatür clarè, quia tales tunc expensæ non fuerunt necessariae, vt suppono, quia aliàs non deerat calix, & vestis sacra. Imò nec fuerunt expensæ viles, sed voluntariæ ad ornatum. Constat verò apud Doctores communiter, quod dominus rei non tenetur ad soluendas expensas voluntarias, quas alius fecit in re sua, se infcio, & nihil mandante. De quo inter alios videatur Rabello *tom. de oblig. instit. 1. p. lib. 2. de rest. q. 8.* vbi explicat quæ sint expensæ necessariae, quæ viles, & quæ voluntariæ.

6 Si tandem neque testator reliquit redditus pro sumptibus capellaniæ, neque vestem sacram, neque calicem; neque Capellanus habet Ecclesiam paratam vbi hæc duo gratis inueniat, & eo non obstante accipiat capellaniam: in tali casu tenetur suis sumptibus emere calicem, & vestem sacram ex stipendio sibi relicto: declaratur exemplo à simili. Nam si ego conduxì fabrum lignarium pro certo stipendio, vt mihi domum construeret vltra stipendium pactum, non teneor ego dare fabro instrumenta, quibus ille
debet

debet laborare. Sic etiam dici debet de Capellano acceptante capellaniam sub tali eleemosyna sui laboris cui non tenetur dans capellaniam dare necessaria ad Missam celebrandam, ut quotidie sit in eo qui commendat, v. g. viginti Missas Sacerdoti, cui non dat calicem, vestem, &c.

7 Quæres, an Capellanus in hoc casu emens calicem, & vestem sacram, possit minuere numerum Missarum dicendarum pro rata illius pecuniæ, quam insumpsit in emptione calicis, & vestis? Respondeo non posse id facere, quia is sciens, & libens acceptavit capellaniam cum illo defectu calicis, & vestis, & proinde se obligavit ad omnes Missas illo defectu non obstante. Aduertit tamen Bonacina *tom. 2. disput. 3. de contract. quest. 17. puncto 9. §. 9. & §. Quinto sequitur*. Quod redditus deputati pro celebratione Missarum possunt ab Episcopo cum necessitas urget, conuertri in emptionem vestium sacrarum, quæ sunt necessariae ad Missæ celebrationem, & citat ad hoc Riccium: & proinde si hoc vix Episcopo conceditur per dispensationem, non poterit id efficere Sacerdos ordinarius. Et ex hoc patet solutio ad secundum argumentum positum in num. 1. pro secundo quæsito.

CASVS LII.

*De commutatione cuiusdam legati pii relictæ
in quodam testamento.*

Q Vidam vir valde diues Olyssipnone fecit testamentum, in quo primò instituit maiorum

pro successoribus : & ultra redditus maioratus reliquit tria millia , & quingenta ducatorum perpetuorum in redditibus annuis , de quibus instituit , vt fieret monasterium , in quo reciperentur quadraginta mulieres honestæ , sine dote , & ibi alerentur , & proficerentur : cum his declarationibus , & conditionibus. Prima , quod monasterium foret subiectum quoad regimen Prælato ordinario , non verò vlli Prælato regulari. Secunda , quod electio feminarum intrantium fieret per executores sui testamenti , quos destinavit ; & per mortem illorum fieret electio intrantium per successionem maioratus cum Archiepiscopo , vel cum capitulo sede vacante. Item instituit quod singulis annis maritarentur certæ virgines cum certa dote.

Post mortem illius Rex Catholicus considerans quod Olyssipone essent multa monasteria Monialium cum excessu , & pro alia parte considerans quod Hospitale publicum pro infirmis sæcularibus curandis habeat paucissimos redditus pro curandis tot infirmis tam populosæ vrbis ; & quod sit vnum tantum Hospitale in tam ampla vrbe , & situm , seu ædificatum est in loco angusto , & parum sano , iussit Rex impediri ædificationem dicti Monasterij relictæ à dicto testatore , & prætendit obtinere à Papa dispensationem & commutationem talis legati , vt de redditibus relictis pro fabrica , & sustentatione dicti Monasterij , transferatur Hospitale infirmorum sæcularium ad alium locum saniores , & habeant infirmi sufficientem victum , & remedium ad sui curationem.

Quæsitum fuit vtrum Papa possit in hoc dispensare , vt redditus relictæ pro dicto Monasterio ædificando,

cando, applicentur in perpetuum pro curatione infirmorum dicti Hospitalis publici: & proinde, an peccet Rex Catholicus petendo hanc dispensationem à Sum. Pontifice?

1 Et pro parte negativa, quod non possit Papa commutare hoc legatum, nec dispensare in illo testamento, videtur facere capitulum *ultima voluntas* 13. q. 2. vbi Papa Gregorius dicit, quod ultima defuncti voluntas modis omnibus conseruanda est. Facit etiam Authentic. *de nupt. §. disponat. col. 4.* vbi dicitur, quod ultima testatoris voluntas pro lege habenda est. Faciunt etiam aliqui textus iuris ciuilis, quos citat Sarmiento 4. p. *de reddit. Ecclesiast. cap. 3. num. 1.* in quibus dicitur, quod neque Princeps sæcularis potest mutare voluntates contrahentium: & quod Princeps facit iniuriam illi cui aufert ius, quod illi in aliqua re competit. Cum quo concordat dictum commune Iuristarum, ac Theologorum, quod scilicet Papa non censetur concedere aliquod priuilegium, vt dispensationem cum præiudicio tertij: at si Papa dispenseret in hoc testamento, resultabit præiudicium tertij, vel multorum. Fiet enim præiudicium executoribus huius testamenti, qui priuantur iure recipiendi ad Ordinem, illas feminas admittendas. Et eodem iure priuantur successores maioratus, quibus conceditur idem ius recipiendi illas post executores testamenti. Denique fit præiudicium tot feminis pauperibus, quæ recipi deberent in tali Monasterio; & proinde videtur quod cum tanto præiudicio tertij non possit Papa concedere talem dispensationem.

2 His non obstantibus dico primò D. Papam posse in hoc dispensare, vt redditus prædicti relictæ pro futuro Monasterio applicentur in perpetuum pro cu-

randis infirmis publici Hospitalis. Hæc conclusio est certissima in iure, & communis Doctorum. Habetur expressè in Clementina *quia contingit*, de Relig. domibus. vbi Papa, postquam dixit, quod res per fideles Catholicos destinatae ad certum usum, non possunt ad alium usum conuerti, subdit statim: *Saluâ Sedis Apostolicæ autoritate*. Quo nihil clarius dici potuit. Et cum hoc sit decretum expressum Papæ, nullus Catholicus Doctor poterit contrarium defendere. Videatur inter alios Nauar. lib. 3. consiliorum, tit. de voto consilio 31. num. 1. Rodriguez tom. 2. qq. quest. 125. art. 9. Zerola in praxi Episcop. 1. p. verbo, legatum, §. Ad secundum. Sarmiento citato cap. 3. num. 1. & 2. qui omnes sunt recentiores, & graues, & citant eandem Clementinam, *quia contingit*. Probatur hoc insuper rationibus. Prima sit. Nam Papa potest irritare, vel dispensare, vel commutare votum alicuius Catholici, cum votum obliget vouentum de iure naturali, ac diuino, quod votum ipse vouens non potest commutare, nec dispensare per se ipsum, quæ ambo sunt certissima in Theologia: ergo per argumentum à maiori ad minus, potest Papa dispensare, vel commutare voluntatem testatoris super aliquod legatum pium, cum voluntas testatoris non fuerit votum, sed ipse testator dum viueret, poterat illam mutare in aliam dispositionem. Facit ad hoc expressus textus in cap. *Per venerabilem, qui filij sint legitimi*, vbi Papa expressè dicit, quod qui potest quod est maius, potest etiam id quod est minus, vbi glossa verbo, *in minori*, citat alios textus pro eodem intento. Secundò probatur, nam res est valde congrua, & necessaria ad regimen boni communis, & consolationem Ecclesiæ, ut Papa supremus Ecclesiæ pastor, ac dispensator

Dei in operibus piis, habeat potestatem commutandi certa legata pia in alia legata magis pia, & magis necessaria ad bonum commune. Nam potest contingere quod aliquis testator sub colore causæ piæ relinquat legatum alicui Ecclesiæ, quod illi non est necessarium, vel est parum necessarium: quale esset si quis certæ Ecclesiæ relinqueret pecuniam, ex qua sex calices emerentur: & in illa Ecclesia existerent calices sufficienter, & deessent vestes sacræ ad Missarum celebrationem: quis negabit posse Papam in tali legato dispensare pro bono illius Ecclesiæ, præcipiendo, ut non calices, sed vestes sacræ emerentur? Ideo enim est pastor, & dispensator in Ecclesia Dei, ut Ecclesiæ necessitatibus provideat: maxime quando testator talis rei ignorantiam haberet tempore quo legatum instituit. Imò & in tali casu deficientibus vestibus, id posset Episcopus dispensare, ut diximus suprâ ex Bonacina in fine casus præcedentis. Semper autem credendum est voluntatem testatoris fuisse se conformare Papæ voluntati disponentis pro bono communi. Secundò probatur, nam Episcopus in sua diœcesi potest commutare legata pia in alia legata magis pia, ut probabo efficaciter in mox sequentibus: ergo Papa in tota Ecclesia id poterit facere, cum maiorem iurisdictionem habeat Papa in tota Ecclesia, quam habet Episcopus in propria diœcesi, ut omnes tenentur fateri.

3 Tertiò principaliter probatur eadem conclusio, posse scilicet Papam hoc legatum, & quodcunque aliud mutare in aliud magis pium, probatur inquam à iam facto ad possibile, id est, Papa iam sæpe fecit hanc commutationem legatorum; ergo potest eam facere, non enim credendum est quod Papa errauit

sic

sic faciundo. Hoc modo argumentandi vtuntur Nauar. & Sanchez ad probandum, quod possit Papa hodie dispensare in matrimonio rato non consummato. Arguunt enim sic : Iam aliqui Sum. Pontifices in hoc dispensarunt, vt narrant historiæ; ergo Papa id potest dispensare: nam aliàs cogemur dicere illos præteritos Sum. Pontifices errasse in re tam graui, & pertinente ad salutem animarum, quod esset temerarium dicere. Restat probandum antecedens quod scilicet iam in hoc Papa dispensauit, & in eadem omnino materia: sit exemplum primum, & clarum in eodem Hospitali regio istius Olyssipponis. Reges enim Portugalliæ obtinuerunt Bullam seruatam, & practicatam in eodem Hospitali Regio, per quam Papa concedit dicto Hospitali, quod Missæ relictæ à quibuscumque testatoribus, pro quibuscumque animabus, si intra certum tempus in Bulla præscriptum, dictæ non fuerint, officiales Hospitalis colligant, & recuperent eleemosynam pecuniariam relictam pro talibus Missis non dictis, & talem pecuniam insumant in curandis infirmis dicti Hospitalis, absque eo quod tales Missæ amplius dicantur. Non potest ad hoc clarius, & efficacius exemplum desiderari. In quo Papa legatum tam pium, quale est Missarum celebratio, commutat in aliud opus, quod reputat magis pium, vel saltem magis necessarium, qualis est tot infirmorum, & miserabilium curatio. Neque in hoc Papa defraudat animas, pro quibus imperatæ sunt illæ Missæ, aliquo suffragio spiritali necessario: primò, quia cum illæ Missæ sint institutæ à tempore satis antiquo, probabile est quod tales animæ iam illis Missis non indigent, eo quod iam sint in gloria, vel fortè in inferno. Secundò, quod dato quod illis

illis Missis indigerent, Papa illis applicat illam eleemosynam factam Hospitali ex illarum pecunia, quæ eleemosyna pro curandis infirmis est magnum suffragium pro animabus oblatum, de quo videatur Frater Ludouicus de Beia statim citandus in secunda conclusione. Secundum exemplum, quod aliqui Summi Pontifices iam in simili casu dispensarunt, est hoc: Sixtus I V. & alij Summi Pontifices concesserunt Ordini P. N. Francisci, teste Rodriguez *citato loco art. 9.* ut Prælati ipsius possent legata quæcumque pia sibi relicta à fidelibus ad certum usum, possent illa conuertere in alium pium usum, prout Prælatis videbitur. Et quamuis ibi Papa limiter, dicens, dummodo in hoc non detur scandalum hæredibus, vel testamentorum executoribus. Hæc limitatio per accidens est ad nostrum intentum, qui solum quærimus an Papa id possit facere, vel iam fecerit; & potuit Sixtus I V. illud concedere Minoritis absque illa limitatione, eo modo quo suprà diximus Papam in Bulla concessa prædicto Hospitali applicare illi Missas non dictas, absque illa limitatione, dummodo hæredes non scandalizentur. Maius enim scandalum possunt hæredes sumere in illo casu Missarum non dictarum, & non dicendarum, quàm ex ista concessione Sixti I V. Si verò obiicias, quod poterunt hæredes, & executores istius testatoris scandalizari ex mutatione istius legati. Respondeo de tali scandalo non esse curandum, quando per se ipsum concedit iudicans hoc esse vtilius, & congruentius, & fortè de hoc aliquid amplius infrà dicetur. Tertium exemplum sit. Constat in hoc Regno quod domina Maria filia Regis Portugalliæ Emmanuelis in suo testamento reliquit certa legata pia, ut collegia, & similia, declarando quod illa opera legata fierent,

fierent, & executioni traderentur, illo ordine prioritatis, quem assignauit in tali testamento. Quo non obstante per dispensationem Papæ, ille ordo non est seruatus: aliqua enim legata quæ prius fieri iussit nondum sunt facta: & alia sunt iam facta quæ posteriùs mandauerat. Quod si Papa mutauit testamentum filię Regis, multo magis poterit mutare testamentum, de quo agimus, quod non est factum à Rege, neque à persona insigni, & commutabitur in opus magis pium, & magis meritorium, quàm sit illud, quod ipse iubet fieri, vt ex dicendis patebit.

4 Dico secundò: non solum Papa, sed etiam Archiepiscopus Olyssipponensis poterit mutare hoc legatum pro curandis infirmis dicti hospitalis nimis indigentibus. Et idem poterit quilibet Episcopus in sua diœcesi, conuertendo legatum pium. Hæc conclusio est ferè communis recentiorum, & antiquorum. Illam tenent Sarmento, & Zerola suprà citati, cum aliis ab illis citatis. Eandem tenet Comitulus *lib. 7. Respons. moral. q. 9.* Riccius *tom. 3. decisionum 3. p. decis. 558. vers. secunda, & decis. 1270. limit. 5. & 6.* Ludoicus de Beia in suis *Resp. moral. 4. p. casu 22.* Barbosa in suis Remissionibus ad Tridentinum *ad sessionem 22. c. 6. de reform.* vbi citat Syluest. & Comitulus *citata quest. 9.* citat Butrium dicentem posse hoc facere Episcopum cum causa, etiamsi testator prohibuisset talem mutationem fieri: & Zerola citato loco dicit, posse fieri talem mutationem legati non petito consensu hæredis. Et hi Doctores suprà citati citant alios Doctores antiquos, quos apud illos videre poteris. Denique nouissimè idem sentit Bonacina *tom. 2. tit. de contractibus, disput. 3. q. 17. puncto 8. §. 9. num. 4. & seqq.* vbi ponit aliqua exempla vsu frequentia. Ad probandam hanc conclusionem

nem inferuiunt illæ tres rationes suprà adductæ, quibus probauimus posse id Papam dispensare in tota Ecclesia. Eadem enim etiam probant id posse facere Episcopum in sua diœcesi; vnâ, vel alteram rationem affero in particulari pro Episcopo quod id facere possit, quas adducit Beia loco citato, §. *Probatur hæc sententia*. Prima est, quia hæc commutatio est in materia fauorabili, vtpote quæ redundat in utilitatem animæ defuncti, & ideo potest in ea mens testatoris legantis latè interpretari, iuxta *cap. cum dilectus, de donat.* & proinde potest Episcopus satis præsumere, quod testator non contradixisset. Secunda, quia iuxta Tridentinum, Episcopi sunt executores piarum voluntatum quæ fiunt à defunctis, vt dicitur *sess. 22. cap. 6. & 8.* & ideo legatum defuncti poterit mutare in aliud æquale, vel in aliud melius pro anima defuncti. Nam qui melius facit, non aliud, sed idem facit, vt in *cap. Pervenit, il 2. de iur. iurando.* & *cap. Scriptura, de voto.* & per regulam iuris in 6. dicentem; *plus semper continet in se quod est minus.* Cum verò constet per tot Doctores, & rationes, quod Episcopus possit mutare hoc legatum, illud etiam commutare poterit capitulum sede vacante. Nam capitulum sede vacante succedit Episcopo defuncto, & potest omnia quæ poterat Episcopus per iurisdictionem ordinariam: vt tenet Sanchez citans multos Doctores *lib. 2. Decalogi, cap. 11. num. 4. & lib. 8. de matrim. disput. 2. num. 10. & seq.* Hæc verò potestas commutandi ista legata competit Episcopo via ordinaria, vt patet; non verò ex commissione speciali Papæ.

¶ Vnum tantum restat inquirere, & probare, an scilicet in hoc casu detur causa sufficiens ob quam Episcopus possit licitè, & validè dispensare? Cum enim

enim constet apud omnes Doctores, quod dispensatio nec licitè, nec validè possit fieri, nisi detur causa sufficiens ad dispensandum, videre restat, utrùm in hoc casu tam graui detur causa sufficiens vt omitatur constructio Monasterij feminarum pauperum, & quod non maritentur tot virgines pauperes sicut disponit testamentum? Vt enim Doctores aduertunt, ad hoc vt causa dicatur sufficiens ad dispensandum, debet esse illud opus in quod fit commutatio, vel æquale, vel melius, quàm sit illud quod commutatur.

6 Ad hoc respondeo dari in hoc casu causam iustissimam, imò & clarissimam, vt possit dispensari, quod redditus isti annuales relictæ pro monasterio ædificando, & maritandis puellis insumantur in curandis infirmis. Primò id probo, quia hospitale Olyssipponense pro infirmis curandis est vnum tantum in vrbis tam populosa: licet enim sint aliæ domunculae, in quibus curantur aliquot infirmi, hæ domunculae sunt duo tantum, & vix decem infirmi in singulis curantur. Hospitale verò Regium, de quo loquimur, vnum tantum est, & habet paucos redditus annuales. Hospitia pro infirmis sunt pauca, & angusta, ita vt ob paucitatem lectorum, & cubiculorum, non possint in hospitali recipi aliquot ægroti, qui miserè moriuntur extra illud. Addo quod hospitale constructum est in loco humili, humido, & non sano, neque habet vicinum spatium, ad quod possit extendi. Ad cuius rei confirmationem dico, quod Romæ sunt quinque hospitalia publica (ad minus) & perampla, quorum præcipuum est hospitale sancti Spiritus in Saxia, quod habet redditus annuales duplo maiores, quàm hospitale Regium Olyssipponense: cùm tamen populus Romanus quoad numerum vicinorum multò minor

nor sit quam populus Olyssipponensis. Secunda causa consideranda, ex parte ipsius Hospitalis in quod conuertendum est legatum, est curatio tot infirmorum miserabilium, quibus facienda est hæc eleemosyna corporalis, imò & spiritualis, qualis est administratio sacramentorum illis in illo exhibita. Quanti autem meriti sit hæc eleemosyna illis miserabilibus exhibita, & quod Deo hoc magis acceptum sit, quam ædificare Monasterium, vel maritare aliquas virgines, potest probari primò ex eo quod dixit Christus Dominus Matthæi c.9. *Misericordiam volo, non sacrificium.* Maior autem est misericordia curare infirmos pauperes morientes, quàm recipere mulieres ad Monasterium, vel ad matrimonium. In quo loco Matthæi clarè Christus D. innuit, quod aliquando iuxta necessitatem pauperum, plus sibi placita est eleemosyna, & curatio pauperum infirmorum, quam sit sacrificium Missæ. Secundò probatur ex eo quod multi Sancti fecerunt, vendentes calices, & vasa sacra Ecclesiæ, pro subleuandis pauperibus, & redimendis captiuis. Hoc imprimis docuit D. Gregorius Papa lib. 6. *epistolarum*, cap. 177. *epistola ad Fortunatum Episcopum*, in qua Papa illi concedit facultatem ad alienanda vasa sacra suæ Ecclesiæ pro redemptione captiuorum suæ Ecclesiæ, & verba Papæ sunt hæc: *Notrum consensum præbere curauimus, & in distrahendis vasis sacris, vobis licentiam indulgemus.* Et addit ibi sanctus Pontifex: *Quod in hac re, & legum, & canonum decreta consentiunt.* Idem fecit S. Rembertus Archiepiscopus Bremensis, de quo refert Surius 4. die Februarii, quod vendidit vasa sacra Ecclesiæ pro captiuis redimendis. Idem fecit sanctus Laurentius, qui thesauros Ecclesiæ dedit pauperibus non ægrotis, sed

sanis , qui per plateas ambulabant : & in nostro casu succurritur pauperibus ægrotis , qui aliquando in ægritudine patiuntur maiorem necessitatem , quàm captiui sani apud Turcas. Eleganter , ac piè satis hæc de re dixit Ambrosius lib. 2. officiorum , cap. 28. vbi sic ait : quid enim diceret ? *Timui ne Templo Dei ornatus deesset ? Responderet : Aurum sacramenta non quarunt , neque auro placent , quæ auro non emuntur. Ornatus Sacramentorum redemptio captiuorum est : & verè illa sunt vasa pretiosa , quæ redimunt animas à morte. Et paulò pòst addit sanctus Doctor hæc verba : Nemo enim potest dicere ; cur pauper viuít ? Nemo potest queri quod captiui redempti sunt ? &c. Nec minus eleganter Chrysostomus homilia 52. super Mattheum , loquens de modo quo debemus Deum venerari , sic dicit : Tu etiam ita eum honora , (id est Deum) ut ipse vult. Expone diuitias tuas pauperibus : non est opus vasis , sed animis aures : & ante omnia misericordia , & benignitati est incumbendum. Et paulò infrà sic ait : Nemo enim quia templa magnifica non condiderit vnuquam accusatus est. At verò gehenna , & supplicia Daemonum imminet , nisi quis diligenter illa peragere velit. Sic ibi. Ecce quam sit Deo accepta eleemosyna facta pauperibus , maximè ægrotis , ut iuxta verba Chrysostomi vltimò citata , sit hoc opus Deo magis acceptum quàm Templi magnifici ædificatio. Iam verò ædificatio noui Monasterij quòd prætenditur , non est opus adeò necessarium bono communi populi Olyssipponensis , in quo sunt multa monasteria Monialium , & virorum in tanta multitudine , ut ferè sæculares molestè ferant tot Monasteria priuilegiata. Et Summi Pontifices , maximè Clemens VIII. in quadam Bulla circa monasteriorum ædificationem , taxam , & modum assignauerit*

signauerit pro Monasteriorum multitudine vitanda.
7 Restat respondere argumentis in principio pro parte contraria adductis. Ad primum igitur fundatum ex capitulo *ultima voluntas*, & ad textum Authentic. ubi dicitur quod ultima voluntas seruanda est omnino, sicut lex; Respondetur, seruandam esse ultimam voluntatem quasi esset lex, hoc intelligitur seruandam esse à subditis ordinariis, qui non possunt dispensare in testamento, sed sunt meri executores: hi enim ad vnguem debent seruare verba testamenti. Secus verò dicendum de Sum. Pontifice, qui est supremus pastor & dispensator Ecclesiæ, qui est supra omnes leges humanas, & proinde potest dispensare in testamento pro bono communi, vel pro bono meliori, iuxta suprà dicta; & potestatem habet ex iusta causa commutare legatum pium in aliud magis pium. Et idem dicitur de Episcopo, qui iuxta Concil. Trid. suprà citatum, est executor piarum voluntatum: maxime quando ex ista commutatione legati non fit præiudicium defuncto, sed redundat potius in ipsius vtilitatem. Et hoc in rigore non est mutare voluntatem defuncti, sed est illam perficere, vt suprà diximus ex cap. *Peruenit*, & cap. *Scriptura*, de voto. Et ad id quod in particulari dicit lex Auth. quod scilicet voluntas testatoris, est lex. Respondeo adhuc cum Sà in *Aphorism.* verbo *Lex, num. 1.* quod quando lex facta est inutilis, ipsa per se abrogatur, vel debet abrogari, quia lex fertur in vtilitatem publicam. Lex verò istius legati de quo agimus, est minus utilis Reipublicæ, quàm sit curatio tot infirmorum miserabilium. Ad hos etiam textus respondet Ludouicus de Beia loco suprà citato, sic esse intelligendos, quod Papa, qui est supra omnia

iura in foro animæ, potest illa iura mutare pro bono animæ, etiam absque causa: & quod Episcopus ex epiikeia legis potest eadem iura mutare cum causa pro maiori bono animæ. Ad alios textus citatos à Sarmiento dicentes, quod Princeps non concedit priuilegium cum præiudicio tertij, nec aufert ius acquisitum alicui parti, responderetur, quod si Papa, vel Episcopus in hoc dispensauerint, nullam facient iniuriam hæredibus, vel feminis quæ possent postea ingredi tale Monasterium, quia nondum existunt in rerum natura, neque illis aufertur aliquid quod iam actu acquisierint. Illud verò dictum, quod Princeps non aufert alicui ius quæsitum, vel quod non concedit gratiam cum præiudicio tertij: intelligitur quod non aufert ab aliquo id quod iam in re acquisierat, nec facit præiudicium alicui in re iam acquisita. Sic explicat Suarez *tom. de legibus, lib. 8. cap. 27. num. 9.* innuens quod potest Princeps in sua concessione auferre alicui ius ad rem, seu ius quod habet ut illi in posterum aliquid acquiratur. Et exemplum clarum est in Prælato Ecclesiæ, qui non potest per se solum alienare bona Ecclesiæ, nisi cum debita solemnitate præscripta à iure. Si verò suæ Ecclesiæ relinquatur legatum magnum ad quod iam sua Ecclesia habet ius ad rem, potest Prælatus per se solum illud legatum repudiare, quia nondum in re acquisitum est suæ Ecclesiæ: & sic licet non possit nocere suæ Ecclesiæ in bonis iam in re acquisitis, potest illi nocere in rebus acquirendis, ad quæ habet ius ad rem. Sic tradit Sanchez *lib. 7. Decalogi, cap. 6. à num. 2. & seqq.* & in hoc nostro casu feminæ, quæ in posterum possent intrare tale Monasterium, & hæredes, & executores testamenti nondum habent ius quæsitum

quæsitum in re, imò ut plurimum nondum existunt in rerum natura, nec potiri sunt prædictis officiis. Et parum interest si illis fiat aliquod præiudicium in officio acquirendo, maximè cum hoc illis adimatur pro bono communi, & pro maiori utilitate illius defuncti. Addo quod hoc legatum non est relictum certis, ac determinatis personis, sed personis incertis, ut patet, & in genere. Legatum verò sic relictum incertis personis facilius commutatur ab Episcopo, teste Riccio 4. p. *Decisionum, decis.* 1270. *vers. limitatione* 4. ubi se ipsum citat in decisione 556.

Ex dictis satis responsum manet secundo dubio principali posito in principio, an scilicet Rex peccauerit impediendo executionem dicti testamenti, & petendo à Papa dispensationem legati? Respondetur enim, non solum non peccasse, imò plè, & prudenter egisse petendo à Papa, quod ipse potest facere, & quod vergit clarè in bonum commune Reipublicæ.

Appendix ad casum præcedentem de mutatione prædicti legati.

Postquam præcedentem responsionem ad casum præcedentem dedi, vidit illam quidam Religiosus grauis, & doctus, qui plus adhærens textibus civilibus, ac Iuristis, quàm Theologis, aut rationibus, impugnauit hanc meam responsionem sequentibus argumentis: quibus respondebo non gratiâ contentionis, vel defensionis mei honoris, sed ut magis confirmetur à me dictum pro casu præsentis in re tam graui, & bono communi necessaria; & pro aliis casibus similibus, qui quoridie possunt occurrere.

1. Igitur prædictus Doctor contra me arguit, non posse Papam in prædicto testamento dispensare: primo, quia Papa non potest obligare hæredem ut det Hospitali illud quod testator non debebat, nec iussit dare: pro quo citat l. in *Authent. de hæred. §. hinc nobis*. At obligare hæredem ad dandum id quod neque lex, neque testator obligat, est vim inferre, & nulla lex permittit quod alicui vis inferatur. Et confirmat hoc argumento, quia aliud est commutare vnum legatum in aliud opus pium: & aliud est obligare hæredem, ut soluat illud quod testator non iubet solvere: & ponit exemplum, dicens, quod si testator mandaret hæredi ut daret certæ Ecclesiæ vnum calicem iam factum, non poterit Prælati obligare hæredem ut det Ecclesiæ valorem illius calicis in pecunia, vel rem aliam calici æquivalentem.

2. Quia si dicatur posse hoc Papam facere de potentia absoluta, id non potest Papa facere: nam secundum aliquos Iuristas, quos citat, quod sit de potentia absoluta est tyrannis, pro quo citat leges, & textus. At de Papa non est credendum quod vim inferat, vel tyrannidem exerceat, dans de potentia absoluta Hospitali id quod testator dari non iussit.

3. Quia hæredes huius defuncti habent iam quæsitum ius in providendis locis futuri Monasterij admittendo feminas ad tales locos, ad quos possent recipere proprias filias, & sorores suas, & consanguineas, quod est magnum interesse. Et Princeps non potest præiudicare bono alicuius tertij, iuxta legem *Filius is. ff. de condit. & alios textus, & Doctores*.

4. Quia Papa non potest sine causa mutare piam voluntatem testatoris. Et in hoc casu dicit non dari causam sufficientem ad dispensandum in hoc testamento.

mento. Nam causa maior non debet considerari ex parte rei, in quam debet mutari legatum (quæ est curatio infirmorum) sed solum ex parte voluntatis testatoris, considerando scilicet id quod esset melius ipsi testatori, pro quo citat Bartolum, & alios.

5 Quia licet Papa possit mutare vnum legatum in aliud opus pium quando testator in tali legato habuit respectum solum ad salutem animæ propriæ, ibi sistendo: non tamen potest illud legatum mutare si testator habuit etiam respectum ad honorem, & famam sui proprii nominis, & descendendum: & ad hoc citat l. *legatum*, ff. de usu, & usufr. In hoc verò casu testator non respexit solum ad salutem animæ in ædificando Monasterio; sed respexit etiam ad proprium honorem, & suorum descendendum, cum ex eo ædificio, & ex iure patronatus super idem Monasterium sibi, & suis descendentibus accrescat fama, & gloria magna.

6 Quia ad hoc ut Papa possit mutare legatum in aliud opus magis pium, dicit dari tantum duas causas; prima, quod sit necessitas publica: secunda, quod legatum non possit executioni mandari. At in hoc casu, dicit necessitatem Hospitalis non esse necessitatem publicam Reipublicæ, vel sui status. Secundò, quia Monasterium potest commodè ædificari, neque ad hoc datur vllum impedimentum. Ad hoc etiam addit quod quando Doctores dicunt, quod Princeps potest sine causa mutare legata, loquuntur de potentia absoluta: Author verò iste iam suprà dixit, potestatem absolutam æquiparari tyrannidi.

7 Quia non potest Hospitale recipere redditus annuales, qui sunt applicati Monasterio futuro, sub prætextu legatorum, quæ executioni non sunt man-

data; ex vi Bullæ, quam supra diximus habere prædictum Hospitale: nam monasterium comparatur posthumo, & facit fructus suos, & sic semper illi reservantur fructus futuri.

Ultimò, quia si hoc legatum mutaretur, daretur occasio ut aliquæ personæ nollent relinquere legata pia in suis testamentis, timentes quod post suam mortem possint à Papa mutari, vel ab Episcopo in alia opera, quæ illi non intenderunt: quæ occasio vitanda est tanquam Ecclesiæ parum utilis.

Hæc sunt argumenta, quibus prædictus Author mean responsionem impugnauit, sequens potius ut dixi, textus ciuiles, & Iuristas, quàm ius canonicum, & Doctores Theologos, quos citavi suprâ in hoc casu *num. 2.* & quia hic Author in suis argumentis, maximè in primo, & ultimo innuit absolute non posse Papam dispensare in testamento, & in hoc legato; miror, & nescio quid debeat respondere ad Clementinam, quia contingit, de Religios. domibus, citatam in citato numero 1. ubi Papa expressè dicit, Sedem Apostolicam id posse facere: nisi fortè iste Author sequi potiùs velit leges ciuiles, quas fortè non intellexit, quàm sequi leges Pontificias, qualis est ista lex Clementinæ citatæ. Et quoniam in hoc casu iam suprâ attuli efficacia argumenta, & tot Doctores dicentes id posse facere Papam, non amplius hîc immorabor in adducendis argumentis ad probandum quod possit Papa id facere: solum respondebo ad furilia argumenta istius Authoris; nam ex iis quæ dixero in solutione illorum, magis confirmata manebit nostra sententia.

*Solutio argumentorum supra po-
sitorum.*

9 **A**D primum argumentum dico, quod si Papa hoc legatum per dispensationem commutauerit applicando redditus relictos vt insumantur in Hospitali pro infirmis curandis, obligat Papa, & obligare potest indirectè saltem hæredem, vt det Hospitali, id quod testator illi dari non iussit. Declaratur claro exemplo. Posuit Petrus in manu Ioannis rem quandam tanquam pignus depositum, dicens Ioanni, quod illi non daret nisi Francisco. Iudex ad instantiam cuiusdam probantis rem ad se pertinere, per sententiam mandauit Ioanni vt rem traderet Ferdinando. Clarum est quod res tradenda est Ferdinando, cui iudex reddi iubet, cui Petrus non mandauit reddi. Idem euenit in hoc casu: Iussit testator hos redditus reddi Monasterio futuro: Papa qui potest illos per dispensationem applicare pro Hospitali, mandat illos reddi Hospitali; clarum est quod tenetur hæres illos reddere Hospitali, & quod Papa hoc illi potest præcipere. Aliàs sequeretur, quod nunquam Papa posset facere commutationem alicuius legati, quod est clarè contra citatam Clementinam. Probatur sequela: nam quotiescunque Papa dispensat in aliquo legato relicto pro aliqua re certa, & applicat illud legatum, v.g. alicui Ecclesiæ, testator non declarauit, neque iussit, vt legatum daretur tali Ecclesiæ, sed illi operi quod declarauit: & tamen hæres tenens rem illam legatam tenetur tradere rem Ecclesiæ, cui mandat Papa, alias nunquam Papa posset in aliquo legato dispensare, quod est contra praxim Ecclesiæ,

& contra istum Authorem in suis argumentis qui admittit commutationem legatorum faciendam per Papam, sine ista obiectione posita in isto argumento. Et confirmatur, seu magis declaratur. Nam hæres non retinet hos redditus tanquam suos, vt patet, sed tanquam executor & depositarius. At iudex potest iubere executorem testamenti, vel depositarium vt tale quid faciat, vel non faciat. Et declaro adhuc exemplo claro quod Papa possit, vel Princeps obligare hæredem, vt det illud, quod testator non declarauit, neque mandauit. Nam si testator debebat Petro decem ducatos, quos Petrus oblitus non declarauit, nec mandauit solui in testamento, & Petrus post mortem testatoris probauit illos sibi deberi: clarum est quod tenetur hæres illos reddere Petro licet testator id non declarauerit, nec præceperit: ergo falsum est in genere, dicere quod hæres non tenetur soluere id quod testator nec declarauit, nec iussit. Tunc sic; Isti redditus post dispensationem, & applicationem Papæ potentis applicare, debentur Hospitali: ergo hæres tenetur illos reddere Hospitali, licet hæres id neque declarauerit, neque præceperit. Quod verò attinet ad legem quam citat in confirmationem, in qua dicitur quod nulli inferenda est vis seu violentia. Respondetur primò, quod Papa iubens per dispensationem vt hi redditus applicentur Hospitali, nullam vim, nec violentiam facit hæredi, cum tales redditus non sint ipsius hæredis, sed sint subiecti dispositioni Papæ dispensantis. Fieret quidem iniuria hæredi, si illi redditus essent sui, & eos illi auferret. Cum verò non sint sui, non facit Papa illi vim, neque iniuriam iubendo per dispensationem vt Hospitali tradantur. Respondeo secundò, quod
utens

vtens iure suo nulli facit iniuriam, teste Nauarro *ad cap. Cum contingat in 7. causa nullitatis, num. 8.* pro quo citat *cap. Cum Ecclesia, de electione, & legem Iniuriarum, §. 1. ff. de iniurijs.* At Papa vtens dispensatione, & applicans hos redditus Hospitali, vtitur iure suo, sicut potest; ergo nullam hæredi vim facit, neque iniuriam.

10 Ad confirmationem istius argumenti primi, quatenus dicit, aliud esse commutare legatum in opus aliud-pium, aliud verò obligare hæredem ad soluendum illud quod testator non præcepit; respondeo, quod licet hæc duo sint duæ res aliquo modo differentes, vna tamen, id est, obligare hæredem ad soluendum, est dependens ab alia, id est à dispensatione, illique subordinata. Nam dispensante Papa, sicut potest, vt redditus isti applicentur Hospitali, consecutiue potest obligare hæredem, qui est solum quasi depositarius, vt tales redditus reddat Hospitali. Aliàs sicut supra argumentabamur, frustra haberet Papa hanc potestatem dispensandi, si non haberet potestatem exequendæ suæ dispensationis per traditionem reddituum eidem Hospitali. Confirmatur amplius hæc responsio: nam qui potest præcipere antecedens, potest etiam præcipere consequens sine quo illud antecedens stare non potest. Sed Papa potest hoc antecedens, id est dispensare in hoc legato, vt probaui supra tot rationibus, & Doctoribus; ergo Papa potest consequens quod hinc sequitur, videlicet mandare hæredi vt tradat illos redditus Hospitali, sine qua traditione frustranea foret Papæ dispensatio. Ad exemplum verò quod affert de calice, quem testator præcepit dari Ecclesiæ cum declaratione ibi positâ; dico etiam posse Prælatum in tali casu obligare

gare hæredem, vt pro calice det Ecclesiæ pecuniam, quæ erat insumenda in emendo calice, si Ecclesia non indigebat calice, sed indigebat pecuniâ: concurrunt enim in hoc casu rationes sufficientes ad dispensandum, & proinde dispensante Prælato, potest, ac debet hæres stare dispositioni Prælati dispensantis, vt satis manet probatum in præcedentibus. Et obligando hæredem, vt det pecuniam, & non calicem, nullam illi vim facit, neque iniuriam: imò liberat illum à labore iubendi fieri calicem, quem calicem potest Prælatus commutare in aliud opus Ecclesiæ vtilius.

11 Ad secundum argumentum, in quo dicit, quod si Papa aliquid concederet de potentia absoluta, talis concessio esset tyrannis; dico primò hanc propositionem esse duram, & proinde dignam censurâ. Nam Summi Pontifices passim concedunt multa cum ista clausula, *motu proprio, & plenitudine potestatis*: quæ verba æquivalent potentiæ absolutæ: & tamen nemo illos arguit de tyrannide. Secundò, quia Papa est supra omne ius canonicum, & ciuile, quando est ius purè positium, & potest in vtroque dispensare pro bono animarum, & super tale ius nouas regulas inducere, vt tenet communis opinio teste Mascardo *tom. 3. concl. 1377. num. ultimo*, vbi citat multos Doctores in solutione tertij argumenti. Ergo si potest Papa supra ius commune aliquid addere, vel dispensare, tale suum factum non erit tyrannis, sed factum licitum, cum vtatur iure suo. Tertid, dicta propositio, quod factum de potentia absoluta sit tyrannis, haberet aliquam apparentiam, quando tale factum Principis contra, vel præter ius, esset factum, vel opus iniquum. Sed commutare legatum in opus magis

gis pium (quale est istud) non est opus malum, sed bonum, & pium: imò neque est contra ius commune, sed illi conforme, cum id clarè sit diffinitum in Clementina citata *cum contingat*, de Relig. domibus. Ergo Papa hoc concedendo, etiam de potestate absoluta, non exercet tyrannidem, sed potius actum bonum, & opus misericordiæ erga pauperes miserabiles curandos.

12 Ad tertium argumentum, quatenus dicit, hæredes, & executores istius testamenti habere iam ius acquisitum ad recipiendas in futuro Monasterio suas sorores, filias, & consanguineas; & quod Papa non potest auferre ius quæsitum tertio, iam ad hoc responsum est suprà *num. 7.* in responsione ad primum argumentum, post medium, vbi cum Sanchez *lib. 7. Decalogi, cap. 6. num. 2.* diximus quomodo Princeps possit auferre alicui ius suum, non quæsitum iam in re, sed ius ad rem. Hi verò hæredes, & executores nondum habent illud ius præsentandi acquisitum in re, sed ad rem futuram: nondum enim sunt in possessione patronatus, vt in simili probat Azor *tom. 3. lib. 1. cap. 12. quas. 8.* At Papa potest tollere ius ad rem & in re quod habent laici ad præsentationem beneficiorum, vt tenet communis opinio, teste Reginaldo *tom. 2. lib. 30. tract. 3. cap. 16. sect. 4. num. 226.* vbi citat Couar. & Lambertinum. Et causam assignat, quia ius patronatus est de iure canonico; Papa verò potest derogare toti iuri canonico: ergo Papa potest derogare isti iuri ad rem, quod habent isti patroni in præsentando: maximè cum ista illorum præsentatio feminarum pro ingressu futuri Monasterij, non sit præsentatio ad beneficium Ecclesiasticum. Secundò responderetur, quod Papa ex iusta causa potest alicui auferre

auferre ius suū, etiā acquisitū, & non præcedentibus culpis. Videatur glossa in *cap. per principalem* 9. q. 3. *vers. ad nos*, ubi citat quādam legem iuris ciuilis, & duo capita iuris canonici, in quibus dicitur, quod Papa potest auferre à Clerico beneficium iam acquisitū: & quod Imperator possit alicui domino auferre seruum suū ex iusta causa. Idem tenet Azor *tom. 2. lib. 4. cap. ultimo, §. vigesimumquartum*, citans alios textus, & hoc dicunt existente iusta causa. At in hoc interuenit tam iusta causa, qualis est curatio tot pauperum miserabilium & ægrotorum. Tertio probo exemplo clarissimo, quod possit Papa alicui auferre ius suū iam acquisitū in re. Constat quod decimæ de iure diuino, & naturali debentur Episcopis, & beneficiariis, ad propriam sustentationem, vt probat Azor *tom. 1. lib. 7. cap. 34. §. In ijs igitur*; & sic Episcopi habent ius in re vt sibi Catholici soluant decimas. Et hoc non obstante multi Pontifices concesserunt aliquibus Religiosis, vt de suis campis, & proprietatibus non soluerent decimas Episcopis, vt patet ex compendio Mendicantium verbo *Decima*. In quo Sum. Pontifices fecerunt præiudiciū tertio, id est Episcopis, auferendo ab illis ius quod iam habebant quæsitū in decimis. Ergo à fortiori, poterit Papa in hoc casu auferre hæredi, & executoribus testamenti auferre ius ad rem, quod habent pro futura præsentatione sceminarum, maximè interueniente causâ tam piâ hospitalis: maximè cū hoc ius illis non competat de iure naturali, nec diuino, sicut Episcopis competit ius ad decimas, & in decimis.

13 Quartum argumentum dicit in hoc casu non dari causam sufficientem, vt Papa dispenset: quia inquit,

quit, hîc non est attendenda causa ex parte maioris necessitatis ipsius hospitalis: sed ex parte maioris necessitatis ex parte testatoris. Respondeo, hoc gratis, & sine fundamento dici. Nam Doctores dicentes posse Papam commutare legata, non dicunt quod id fiat attentâ voluntate testatoris, sed quod sit opus melius. Et probatur, quia si attendenda esset solum voluntas testatoris, nunquam Papa posset commutare aliquod legatum; semper enim credendum est, quod testator voluerit ut suum legatum detur executioni sub forma à se præscripta in testamento. Secundò, quia voluntas defuncti præsumenda est quod sit ista, & fuerit ista, quod suum legatum conuertatur in melius pro bono animæ suæ, idque Papa voluerit applicare, qui est Dominus ultimarum voluntatum: sicut tenet Beia 4.p. Resp. Moral. casu 22. §. *Probat hęc sententia, & §. sequenti*, ubi citat vnam legem iuris ciuilis, & aliam iuris canonici, ex quibus colligitur posse Papam mutare legatum in aliud opus pium, etiamsi nulla detur causa iusta, dummodo commutet in rem meliorem: & quod sic commutans interpretatur voluntatem testatoris legantis. Et citat ad hoc Hugon. Angelum, Imolam Rog. qui præponderant Bartolo citato in oppositum, si Bartolus id dicit.

14 Ad quintum argumentum dico, quod licet testator in hoc legato non solum respexerit ad salutem animæ suæ, sed etiam ad propriam famam, & honorem suum, & suorum descendendum, hoc non obstante poterit Papa illud commutare. Probo, quia licet testator habuerit respectum ad has duas res, animam, & famam: præsumendum est, quod principale quod prætendit, fuit salus animæ: fama verò prætensa fuit accessorium, & secundarium: præsumi enim debet, quod homo

homo Catholicus moriens plus curat de anima, quàm de fama. Cùm igitur principale intentum fuerit salus animæ, & fama fuerit quid accessorium: dico, quod cùm Papa possit mutare legatum quoad intentum principale animæ, poterit etiam illud mutare quoad accessorium famæ. Probatur clarè per Regulam 42. *de Regul. iuris in 6.* vbi dicitur, quod destructo principali, destruitur accessorium. Et potens in maius, potest in minus. Addo quod in ista mutatione legati, & omissione ædificationis Monasterij, non perdit testator famam prætentam in ædificio Monasterij, nam eadem fama & honor illi accrescit ex reparatione hospitalis, & curatione perpetua tot infirmorum miserabilium.

15 Sextum argumentum contendit quod in mutatione legati duo debent attendi; primum necessitas publica: secundum impossibilitas exequendi legatum. Ad primum ergo quod dicit, in hoc casu non dari necessitatem publicam, pro qua mutetur legatum. Dico curationem infirmorum pauperum totius Olyssipponensis, imò & peregrinorum ad illam confluentium esse necessitatem plusquam publicam, & ferè extremam in hac materia. Quæro enim: Num magis indiget Olyssippo hoc nouo monasterio Monialium, in qua iam sunt tot illarum monasteria, quàm indigeat hospitali publico ad curandos tot pauperes miserabiles? Videantur ad hoc illa quæ dixi in hoc eodem casu ante hanc appendicem ex D. Ambrosio, Gregorio, & Chrysostomo, qui aded commendant curam pauperum, plusquam vasa sacra, &c. Quoad secundum quod dicit, non posse mutari legatum quando illud potest commodè dari executioni, hoc autem potest commodè impleri. Dico primò, nul-

lum Doctorem Theologum hanc causam, vel rationem assignare : & quod quoties Sum. Pontifices, vel Episcopi commutarunt legata, ferè semper illa legata, quæ mutarunt, potuerunt facillè executioni mandari, eoque non ostante dicta legata commutarunt. Imò, si hæc ratio aliquid valeret, ferè nunquam Papa, vel Episcopus possent vllum legatum commutare: omnia enim legata relicta à testatoribus possunt vltimum executioni commodè mandari, & nihilominus ea dicti Prælati commutant. Dico secundò, quod hoc Monasterium relictum in hoc legato non potest commodè, & facillè construi. Pro huius probatione, suppono ex Nauarro *commentario* 4. de *Regular.* num. 71. §. *Quarto quod*, vbi citans l. *Nepos Proculo*, ff. de verb. signif. & cap. *Faciat* 22. q. 2. ait, quod illud dicimur nos posse, quod commodè possumus: & ponit multa exempla. Quo supposito, dico hoc Monasterium fieri non posse, quia commodè fieri non potest. Assigno duas causas, prima est, quia præcipit vt executores sui testamenti, vel hæredes simul cum Episcopo eligant fœminas ingressuras in Monasterium, & prius ad hoc nominat executores, & hæredes, quàm Episcopum. Hoc autem est contra ordinem, & contra praxim Ecclesiæ: nam patroni officium solum est præsentare Prælato, & Prælatus potest repellere præsentatum à patrono, si non sit dignus: non potest verò patronus eligere, sed solum præsentare. At in hoc testamento datur patrono potestas non solum ad præsentandum, sed etiam ad eligendum. Imò ex hac dispositione testamenti colligitur, quod poterunt executores testamenti cogere Episcopum vt recipiat vnâ feminam inuito eodem Episcopo. Probat, quia cum talis femina sit reci-

pienda per suffragia executorum, & Episcopi: poterit contingere, quod si sint tres executores testamenti, & hi omnes dent suffragium pro certa femina, quam Episcopus non vult recipere ad nouitium, cogetur Episcopus inuitus illam recipere ad nouitium: quod est inauditum in Theologia, & sacris Canonibus, vt scilicet recipiatur Nouitius ad habitum contra voluntatem Prælati ordinarij, idque cum solis suffragiis sæcularium. Secunda causa, ob quam Monasterium commodè fieri non potest, est quia adimit Episcopo potestatem, & iurisdictionem recipiendi vnâ Monialem sine consensu patroni, vel patronorum, quod est onus graue, nunquam visum, neque positum in vsu. Scio quod aliqui domini temporales habent ius patronatus, vt possint præsentare in aliquo monasterio Monialium duas, vel tres recipiendas ad habitum: quas tamen, si non sint dignæ, potest Prouincialis repellere. Quod verò patronus omnes ingressuras præsentet, & eligat, res est inaudita. Addo quod in mea Prouincia Algarbiorum Rex Catholicus est patronus aliquorum grauium conuentuum Monialium à Regibus fundatorum, & tamen Rex patronus neque vnâ præsentat in aliquo illorum monasteriorum, sed totum negotium recipiendi Moniales liberè relinquit Prouincialibus. Idem fecit D. Maria Infans filia Regis Emmanuelis Portugalliæ, quæ à fundamentis Eboræ adificauit monasterium Monialium istius Prouinciæ, & reliquit executores sui testamenti, qui hodie durant: & tamen nullum locum sibi, vel executoribus reliquit, vt possent vnâ solam feminâ in illo monasterio præsentare, sed totum Prælati commisit. Credendum est enim quod maiorem zelum, & minus interesse habebunt Prælati Religiosi
in

in recipiendis nouitiis, quàm sint habituri sæculares, qui amicorum, & consanguineorum voluntati obsequi solent, & propriis obligationibus satisfacere consue-
scunt. Cùm ergo constet ex dictis, quod ex libertate præsentandi, & eligendi his patronis commissa possit accrescere grauamen, & damnum Ordinario in receptione Monialium, sequitur quod commodè tale monasterium fieri nequit, & quod talis libertas patronis non sit danda. Facit ad hoc quod tradit Reginald. *tom. 2. lib. 30. tract. 3. num. 232.* vbi cum Lambertino, & Syluest. dicit, quod si patronus imponat conditionem, quæ sit grauamen immoderatum, vel intolerabile, vel contra rectam rationem, non obligare talem conditionem. Illa verò forma recipiendi Nouitias assignata ab isto testatore, est intolerabilis, & contra rectam rationem, & contra omnem consuetudinem, vt probaui.

16 Ad septimum argumentum dico, quod redditus residui huius legati hodie extantes, si Papa dispensauerit, dari debent hospitali, quia per talem dispensationem debentur hospitali, vt patet ex suprà dictis. Ad exemplum quod ponit quòd monasterium comparatur posthumo, cui reseruantur redditus hæreditatis patris defuncti. Respondeo, quod comparatio nullo modo tenet. Probo; quia filio posthumo debentur redditus paterni de iure naturali, atque etiã diuino, cùm pater de iure naturali, ac diuino teneatur alimenta dare filio. At isti redditus testatoris non debentur isti monasterio de iure naturali, nec diuino, sed ex pura liberalitate testatoris, eos dantis illi monasterio: & sic est casus nimis diuersus. Secundò, quia hi redditus nondum sunt in possessione monasterij, sed sunt in manu hæredis, tanquam in manu depositarij, idque dependenter à voluntate Papæ potentis illos applicare

ad alium vsum magis pium. Et si Papa illos de facto applicauerit, talis applicatio erit sicut mandatum, quo Papa præcipit hæredi vt tales redditus tradat pro expensis hospitalis. Probatur hoc præsentis exemplo. Antequam prædictum hospitale haberet Bullam, quam habet, vt possit colligere pecunias assignatas pro elemosyna Missarum non dictarum in termino certo, sicut suprà diximus habere hospitale, vt illas insumat in curandis infirmis; ante, inquam, hanc Bullam multæ Ecclesiæ, & Monasteria habebant ius ad has pecunias colligendas, eo quod tales Missæ sibi essent relictæ, & ad illas habebant ius acquisitum. Hoc tamen non obstante, per eandem Bullam iubet Papa vt dictæ elemosynæ pecuniariæ talium Missarum tradantur ad expensas dicti hospitalis, & non tradantur Ecclesiis, & Monasteriis, quibus sunt relictæ ex mandato testatorum.

17 Ad vltimum argumentum dico, quod ex eo quod Papa hoc legatum mutet, in expensas hospitalis, non datur occasio fidelibus, vt nolint amplius relinquere legata pia in suis testamentis, timentes ne Papa postea illa commutet. Probatur per exemplum proximè adductum de Bulla concessa dicto hospitali, ad colligendas pecunias debitas pro Missis non dictis, sicut colligit hospitale: eâ enim Bullâ non obstante, quotidie fideles in suis testamentis iubent Missas perpetuas pro se dici. Probatur etiam alio exemplo iam suprà allato de privilegio Sixti I V. concessio Minoribus, (quo gaudent omnes Mendicantes) per quod dictus Papa illis concessit vt possint legata sibi relictæ ad vnum vsum, conuertere ad alium vsum, modo in præcedentibus explicato. Et tamen per hanc concessionem non aueruntur sæculares à relinquendis quotidie legatis piis dandis monasteriis Minorum, & aliorum Religiosorum.

Idque

Idque maximè cùm sciant quod per talem mutationem legatorum ipsi non defraudantur suffragiis in purgatorio, cùm Papa illis applicet illud opus pium, in quod legatum suum commutat, quod opus aliquando est melius, quàm fuerat legatum ab illis relictum.

CASVS LIII.

De quodam delicto facto intra Ecclesiam.

Quidam vir intra Ecclesiam existens feria quinta in Cœna Domini, dum Sacerdos actu ministraret fidelibus sanctissimam Eucharistiam, euaginavit gladium contra alium quendam, qui simul eduxit gladium de vagina, & factus est tumultus grandis in Ecclesia, cum alia circumstantia nimis aggravante. Non est tamen alicui inflictum vulnus, neque mors. Unus tamen ex illis, qui gladium eduxerunt de vagina, confugit ad Ecclesiam, seu monasterium. Quæsitum fuit primò quam pœnam incurreret per educationem gladij. Secundò, an ipse gauderet immunitate Ecclesiæ, ut ab ipsa non posset extrahi per ministros iustitiæ?

1 Quod attinet ad primum, non inveni legem Ecclesiasticam, quæ huic particulari delicto euaginandi gladium in Ecclesia non securâ morte, vel vulnere, particularem pœnam imponat. Lex tamen Portugalliæ lib. 5. Ordin. tit. 40. ob solam educationem gladij in Ecclesia, vel in processione, in qua defertur sacrosancta Eucharistia, ponit pœnam exilij ad Brasilos in perpetuum, etiamsi nec vulneret, neque occidat.

2 Quod attinet ad secundum, est communis sententia Doctorum, quod delinquens intra Ecclesiam non

gaudet immunitate Ecclesiæ. Habetur expressè in cap. ultimo, de immunitate Ecclesiæ. At si verba illius textus bene considerentur, ibi Papa solum priuat immunitate Ecclesiæ illos qui intra Ecclesiam mutilauerint, vel occiderint. Euaginare autem gladium solummodo, non est occidere vel mutilare: & ideo ex hoc capite non videtur iste euaginator priuandus immunitate Ecclesiæ.

3 Dubitat ergo Suarez *tomo 1. de Relig. lib. 3. de Reuerentia debita locis sacris, cap. 11. num. 6.* an delinquentes in Ecclesia, & non mutilantes neque occidentes gaudeant illius immunitate. Et videtur quod debeant gaudere. Nam cum lex illius capitis finalis sit pœnalis, & non exprimat, neque arceat ab immunitate Ecclesiæ nisi solos mutilantes, vel occidentes intra illam, videtur restringenda ad hos solos, non verò ad alios in Ecclesia delinquentes, qui non mutilant, neque occidunt. Sed tamen Suarez *citato num. 6.* cum Syluestro, Panormitano, & Nauarro, tenet eadem immunitate priuari omnes qui graua delicta commiserint intra Ecclesiam, etiam si non occidant, neque mutilent, quam dicit esse opinionem communem Nauarrus *in summa, cap. 25. num. 20.* Probat illam Suarez ex ipso textu citati capitis: nam in principio sic inquit: *Nonnulli impunitatem suorum excessuum per defensionem Ecclesia obtinere sperantes*, &c. Quibus verbis Papa in communi comprehendit omnes excessus factos in Ecclesia: homicidium verò, & mutilationem, dicit Suarez poni exempli gratiâ.

4 Hoc non obstante Bonacina *tomo. 2. disput. 3. circa primum Decalogi præceptum, quæst. 7. puncto 6. §. 2. num. 11.* cum Farinacio, & Peregrino, quos citat, defendit quod delinquens in Ecclesia si non occidat, vel mutilet, gaudet

gaudet immunitate illius. Probat præcipuè, quia in Bulla Gregorij XIV. edita in particulari circa immunitatem Ecclesiæ, solùm priuantur tali immunitate, occidentes aut mutilantes in illa: priuatio autem immunitatis non est extendenda ad casus non expressos in tali Bulla. Et ait Bonacina prædictam Bullam Gregorij XIV. circa immunitatem Ecclesiæ, fuisse editam conformiter ad citatum cap. vltimum, de immunitate Ecclesiæ, citato à Suarez. Ad fundamentum Suarez responderi potest, in citato capitulo non poni homicidium, & mutilationem solùm, vt exempla, sed vt totam materiam, de qua lex illa fertur, & ideo illa sola duo specificantur. Si enim ibi illa duo ponerentur solum vt exempla, adderet Papa post homicidium, & mutilationem, & *alia huiusmodi*. Quod tamen Papa non addidit, sed absolute illa duo tantum posuit. Et probari adhuc potest, quia si per illa, *suorum excessuum*, posita in illo capitulo, intelligerentur omnes alij excessus facti in Ecclesia, vt vult Pater Suarez, etiam fornicatio, vel furtum ordinarium paruum factum in Ecclesia priuaret immunitate, quod non videtur dicendum.

§ Ex sua illa opinione colligit Bonacina citato §. *aliquot corollaria*; primum est, quod percutiens gladio in Ecclesia, ita vt vulneret, & sanguis effluat, non priuatur immunitate Ecclesiæ, quia vulnerare solum, non est mutilare propriè, nec membrum aliquod abscindere. Colligit secundò, abscindentem digitum, etiam si sit pollex, vel index, vel abscindentem auriculam exteriorem, non dici mutilatorem: quia hæc non sunt membra. Colligit tertio, illum qui mutilauit in vna Ecclesia, & postea confugit ad aliam Ecclesiam, non esse tutum in secunda Ecclesia, sed ab illa

esse extrahendum, quia adhuc verum est hunc perpetrasse delictum in Ecclesia: pro quo citat septem Doctores. Colligit quartò, non priuari immunitate Ecclesie illum qui existens intra Ecclesiam hominem occidit existentem extra Ecclesiam, expulso videlicet archebusio. Nam hoc delictum in rigore non est factum in Ecclesia, sed extra Ecclesiam. Idem dicendum est de illo qui euaginavit gladium intra Ecclesiam, & exiens ab Ecclesia insecutus est aliquem, & illum occidit: talis enim non dicitur delictum fecisse in Ecclesia.

6 Adhuc potest circa hunc casum notari, quod si quis intra Ecclesiam mutilauerit, vel occiderit, sed id fecerit inuasus ab alio, qui volebat illum occidere, ipse ad sui defensionem naturalem mutilauit, vel occidit, seruato moderamine inculpatæ tutelæ, credo quod iste non priuabitur immunitate Ecclesie. Probo, quia priuatio immunitatis Ecclesie est pœna, imò pœna grauissima, vt patet: pœna autem non debetur vbi non est culpa, iuxta illam regulam iuris, dicentem: *Rem qua culpa caret, in damnum vocare non licet.* Et illam aliam, de reg. iuris in 6. *Sine culpa, nisi subsit causa, non est aliquis puniendus.* At iste sic mutilans in Ecclesia non peccauit, cum id fecerit inuasus, & aliter non posset suam vitam tueri: ergo non est puniendus pœnâ grauî immunitatis Ecclesie. Et applicando hæc ad primam partem istius casus suprâ positam de pœna positâ à lege istius Regni de exilio perpetuo; dico quod si iste qui sic euaginavit gladium in Ecclesia, id fecit inuasus iniuste, & necessitate coactus, euadet pœnam illam exilij, quia cum in eo non peccauerit, non potest puniri, iuxta duas regulas proximè traditas. Idem dico si gladium euaginauit ad defendendum innocentem intra Ecclesiam inuasum: & idem dico de euaginate gladium.

gladium solum vt separaret ab inuicem duos rixantes ne se percuterent vel occiderent, talis enim separatio res licita, & sancta est, & proinde cū in illa non sit peccatum, non est punienda pœna priuationis immunitatis Ecclesiæ, nec pœna legis Lusitanæ de perpetuo exilio ad Brasyllos.

CASVS LIV.

Quid debeat restituere homicida hæredibus defuncti?

CAsus iste quotidianus est, & non facilè resolutus in praxi, propter diuersas circumstantias concurrentes in homicidiis. Casus igitur sic figuratur. Petrus occidit, vel vulnerauit Franciscum iniuste; vnde contigit vt Franciscus, vel faceret expensas in curando vulnere, vel moreretur ex illo. Queritur quid teneatur Petrus restituere Francisco curato à vulnere, vel hæredibus illius si ex vulnere mortuus est? & notanter posui in titulo, de homicida, qui occidit iniuste: nam si occidit iuste inuasorem, seruato moderamine inculpatae tutelæ, nihil debet hæredibus defuncti, quia non fuit causa iniusta damni. Imò potius teste Molina *tom. 4. disp. 81.* & Petro Nauar. *lib. 2. cap. 3. n. 62.* & aliis. hæredes occisi inuasoris tenentur restituere inuaso occidente iuste, expensas, quas fecit in lite. Et ego meis oculis vidi Olysippone virum, qui occidit inuasorem suum, prius ab inuasore fugiendo, & illum obtestando sapius vt à se recederet, & cū amplius fugere nō posset, neque haberet quò fugeret, inuasorem occidit. Qui inuassus delatus ad iudicium seculare, habuit aliqua

suffragia iudicum pro se dicentium, quod hæredes defuncti soluerent expensas litis occisori. Omisso ergo illo qui occidit sic iustè cum tali moderamine : quia casus quotidianus est , & variæ circumstantiæ in homicidio iniusto quotidie concurrunt , vt possim satisfacere dubiis frequentioribus , ponam hîc per summam principales conclusiones, quas ex præcipuis Doctoribus potui colligere.

1 Prima ergo sit : Prouocantes se ad pugnam, vel ad duellum, ad nullam tenentur restitutionem si se occidant. Ratio est, quia sic se prouocantes, censentur cedere iuri suo. Hæc est communis Doctorum, Molinæ *tom. 4. de iustit. disput. 82.* Lessij *lib. 2. cap. 9. dub. 21.* Azor. *3. p. lib. 5. cap. 3. q. 7.* & aliorum.

2 Conclusio secunda. Homicida, qui se defendendo occidit inuasorem, excedendo moderamen inculpatæ tutelæ, tenetur ad aliquam restitutionem, sed non ad integram. Quod teneatur ad aliquam restitutionem patet, quia fuit causa iniusta damni, cum excesserit moderamen defensionis. Quod verò non teneatur ad integram restitutionem, probatur primò, quia, qui prior alium inuadit, videtur cedere iuri suo, & ex consequenti inuasus non tenetur ad restitutionem omnium damnorum. Secundò, quia difficillimum est, vt inuasus temperet dolorem, quin tantisper excedat moderamen : ergo æquitas videtur suadere vt non obligetur sic inuasus ad omnimodam restitutionem, sed standum tunc erit prudentis arbitrio, qui consideret qualitatem excessus in se defendendo. Videatur Azor *3. p. cit. cap. 3. q. 8.* Lessius *cit. loco dubio 2.* Syluest. *verbo, Restitutio 3. q. 2.* & alij.

3 Quæris : An inuasus qui occidit inuasorem cum moderamine inculpatæ tutelæ, si tamen ipse inuasus

prius

prius dedit causam inuasionis, v. g. quia prius contumeliam, vel conuitium dixit inuadenti; an in tali casu teneatur ad restitutionem? Respondetur, quod si seruauit moderamen inculpatæ tutelæ, non tenetur ad restitutionem. Ita sentit Petrus Nauar. *citato supra loco*, & Molina *citata disp.* 81. Rodrig. 1. p. *sum. cap.* 136. n. 2. quidquid in contrarium dicat Nauar. *in sum. c.* 15. n. 7. & Bonacina *tom.* 2. *disp.* 2. *de Restit. in particulari, q. ult. sect.* 2. *puncto* 1. n. 5. Idem sentit cum Petro de Nannarra non teneri scilicet ad restitutionem, quia qui afficit alium contumeliis, non amittit ius propriæ vitæ defendendæ: ergo iuste se potest defendere occidendo inuasorem cum moderamine, quem per contumelias prouocauit.

4 Tertia conclusio. Homicida qui propter suum delictum poenâ mortis punitus est, non deobligatur à restitutione damni dati per suum homicidium, iuxta mox explicanda. Hæc est ferè communis recentiorum, pro qua Bonacina *loco citato*, citat Petr. Nauar. Lessium, Azor, Vasquez, Rabello, Molinam, Arragonium, & alios. Ratio est, quia ex iustitia commutatiua restituendum est id quod fuit ablatum: sed homicida per mortem illatam à Rege non restituit ablatum occiso, & hæredibus: ergo tenetur ad restitutionem damni, quod intulit occiso, & hæredibus, pro cuius confirmatione, seu declaratione, benè aduertit Bonacina *cit.* n. 14. quod homicida tenetur ad duplicem restitutionem faciendam: altera est quæ fit Reipublicæ, quæ passa est iniuriam: altera quæ fit hæredibus occisi pro damno illato. Per poenam igitur mortis illatam à iustitia satisfat Reipublicæ, nõ verò hæredibus occisi. Hinc licet aduertere quantam obligationem habeant confessarij, qui hos homicidas comitantur ad patibulum, admonendi illos vt iubeant restituere damna per suos hæredes,

hæredes, si habent unde restituant; vel saltem ab hæredibus occisi impetrent remissionem debiti.

5 Circa hanc verò remissionem debiti, noto sequentia in summa. Primò quod si læsus, vel hæredes remittant omne debitum, liberatur homicida, percussorque vulnerans ab omni restitutione, & in hoc non est dubium, quando hæredes remittunt. Neque item est dubium quando ipse occisus ante suam mortem dixit se remittere occisori omne debitum. Nam tunc hæredes non possunt aliquid exigere ab homicida. Nam hæredes habebant ius exigendi per viam occisi in cuius bona succedunt. Si ergo occisus ante mortem remittat omne debitum, iam hæredes non habent ius ad illud exigendum. Dixi, si occisus remittat omne debitum, quia, si ante mortem dixit se remittere delictum, seu iniuriam, tunc non videtur remittere damna illata, ad quæ hæredes ius habent.

6 Occidens, seu vulnerans alium per homicidium casuale, non est propriè homicida, nec proinde tenetur ad restitutionem: sic Doctores citati communiter. Ratio est, quia ille propriè dicitur homicida, qui committit homicidium voluntarium: & ex cōsequenti non inducit obligationem restituendi, cum obligatio restituendi confurgat ex actione iniusta voluntaria. Ex hac conclusione colligit Bonacina citata q. ult. punct. 2. num. 4. & seqq. aliqua corollaria scitu digna ad praxim confessorum. Primum est, illum qui alicui inflixit vulnus leue, non lethale, ex quo vulneratus obiit ex sola sua negligentia, ob malum regimen in cibis, &c. iste talis non tenetur restituere damna secuta ex morte, sed ad solas expensas vulneris illati obligatur. Probat, quia tunc occisio respectu vulnerantis est casualis, nec reputatur voluntariè intentata. Præterea quia illa

illa vulneratio non fuit causa mortis, sed malum regimen occisi, vel omissio adhibendi medicinas, vt suppono. Colligit secundò, illum, qui dans operam rei licitæ, vel illicitæ, fecit debitam diligentiam ne inde sequeretur homicidium, non teneri ad restitutionem: secus si quis accessit ad domum fœminæ coniugatæ, cum qua commisit adulterium factâ priùs diligentia de absentia mariti, cum certitudine morali quod non erat venturus: & postea venit, & adulterum cum vxore inueniens voluit occidere; si ipse adulter pro vitæ defensione maritum occidat cum moderamine inculpatae tutelæ, non tenetur restituere, quia cum in illa occisione non peccauerit, ad restitutionem nõ tenetur. Ita communiter Doctores, & patet ex supradictis. Sic Bonacina *cit. loco n. 6.* addit cum Lessio hoc verum esse; etiam si antequam accederet ad adulteram, suspicatus sit hæc incòmoda euentura: quamuis enim peccauerit peccato adulterij, non tamen est reus homicidij, cum occiderit pro tuenda sua vita, quam aliter tueri non poterat. Qui casus in terminis mihi olim propositus est, in quodam viro satis nobili, qui accessit ad domum cuiusdam fœminæ non coniugatæ, cum qua habuit copulam carnalem, & statim intrauit domum quidam frater dictæ puellæ, qui euaginato gladio voluit virum nobilem occidere: qui ob vitæ defensionem occidit fratrem puellæ cum moderamine inculpatae tutelæ: & proinde mansit liber à restitutione ex parte homicidij.

7 Occidens alium pro suarum rerum temporalium defensione, quas non potest aliter defendere nisi occidendo illum, qui vult illas iniustè eripere, non tenetur ad restitutionem si seruauit moderamen inculpatae tutelæ. Ita Comitolus *lib. 4. Respons. moralium quest. 10. n. 17.* citans Antonin. Syluest. Caietan. Navar. & alios dicens

dicens esse opinionem communem. Probatur, quia tunc non committitur culpa. Nam bona ista temporalia sunt nobis necessaria ad vitam, imò, & ad virtutem, & proinde pro iusta illorum defensione possumus inualorem occidere. Imò addit Comitulus *citato loco* 7. 18. quod licetè potest quis occidere seruato modamine tutelæ illum qui iniuste inuadit suum amicum, consanguineum, vel affinem: & dicit esse opinionem communem: & proinde si talem licet impunè occidere, non dabitur obligatio restituendi, per supradicta.

8 Quid verò restituendum sit pro homicidio, res est difficilis in particulari. Dicam id in quo communiter Doctores consentiunt. Primò consentiunt maiori ex parte Doctores, pro vita ablata, vel cicatrice relicta ex vulnere, non deberi restitutionem: nam vita hominis non est pretio æstimabilis, vt constat *ex l. ult. ff. de ijs qui effuderunt*. Ex cicatrice verò relicta nullum, vel tantillum damnum resultat. Si verò abscissa sit manus, vel pes hominis viuientis ex labore suo, tenebitur vulnerans ad restitutionem lucri cessantis pro arbitrio boni viri. Aduertit Bonacina hoc lucrum cessans non esse restituendum rigorosè, attendendo ad totum illud quod occisus, aut vulneratus posset cōsequi in vita, sed quantum valebat spes lucri in homine occiso, vel mutilato, nam lucrum erat in spe, luctum verò in spe minus valet quàm lucrum in re. Sunt etiam detrahendæ expensæ, quas occisus fecisset in acquirendo lucro. Et quia hoc difficillimum est ad vnguem æstimare, cōsultat Molina *cir. lib. disp. 83.* vt compositio fiat inter hæreses occisi, & homicidam. Et quamuis in principio huius numeri dixerim pro vita hominis quatenus talis est, nihil esse restituendum, quia non est pretio æstimabilis, hoc non tollit quin debeat eidem occiso restituo

tutio lucri cessantis, propter lucrum quod lucraturus erat per operas suas, & actiones corporales modo proximè dicto ad arbitrium boni viri: circa hanc verò æstimationem lucri cessantis duo aduerto. Primò cum Bonacina *citato puncto* *l. n. 9.* hanc spem lucri non esse æstimandam ex ætate sexaginta annorum ad quam aliquis peruenire potest: sed iuxta viri prudentis arbitrium, consideratis omnibus circumstantiis præsentis ætatis, sanitatis, & virium quibus vltèrius putabatur vitam producturus. Vnde infert illum qui occidit sexagenarium, sed adhuc vigorosum, teneri ad restitutionem lucri cessantis pro arbitrio boni viri. Secundò aduerto Nauar. *in Sum. c. 15. n. 22.* asserere, quod pro lucro cessante hominis occisi in legibus civilibus taxantur quinquaginta aurei. Sed tamen, vt benè notat Rabello *1. p. lib. 3. q. 13.* in hoc non potest assignari certa taxa; quia variæ sunt operariorum differentiæ, quoad ætatem, vires, officia, industriam, &c. & proinde securius est semper facere compositionem inter partes. Adhuc noto quod licet occisus sit vir nobilis, qui non labore manibus suis, adhuc in hoc casu debetur restitutio lucri cessantis ratione officij, & industriæ quam habebat, ob quæ poterat in vita lucrari ad arbitrium boni viri.

9 Constat item apud omnes, quod occiso, vel vulnerato restituendæ sunt expensæ omnes quas fecerunt in curando morbo, seu vulnere, & de hoc nemo dubitat, quia tales expensæ sunt damnum emergens, vt patet; lædens verò aliquem tenetur ad restituendum non solum lucrum cessans, sed etiam damnum emergens, vt Doctores communiter dicunt. Si verò quæras, an homicida restituere debeat occiso expensas factas in funere, & exequiis? Respondet Nauar. *cit. n. 22.* & Bonacina

cina *citat. loco n. 11.* nihil teneri restituere propter expensas funeris. Nam si occisus obiisset morte naturali, easdem expensas facere debebant hæredes, & proinde ex hac parte nullum homicida damnum intulit. Excipit tamen ibi Bonacina cum Rodriguez & Filliucio, nisi occisio fieret extra patriam occisi, propter quod maiores expensas faceret, quàm si moreretur in patria: tunc enim restituendum est illud plus quod in patria non insumeret in funere.

10 Constat item apud omnes, quod si occisus alebat parentes, filios aut consanguineos, tenetur homicida ad arbitrium boni viri illis restituere damnum, quod illis intulit, verè enim, ac directè suo homicidio causa illis fuit talis damni. Ita Rabello *citat. loco quæst. 14. n. 10.* citans Scotum, Gabrielem, Nauarrum. Addit ibi Rabello, quod esto de facto, proximè dicti non alerentur, siue essent parentes, siue filij, siue vxor, si egeant, aut petant, homicida ad eorum sustentationem obligandus erit, eo quod ex suo homicidio secutum sit, vt non sit à quo alimenta percipiant, neque possint exigere. Idem tenet Reginaldus *tomo 1. lib. 10. c. 22. sect. 1. n. 314.* dicens hoc locum habere circa consanguineos, seu hæredes necessarios, quos occisus tenebatur alere, & non poterat per testamentum excludere ab hæreditate, quales sunt parentes, filij, & vxor quam alere debebat ratione dotis acceptæ, & consumptæ. Non verò de hæredibus non necessariis, quos poterat per testamentum ab hæreditate excludere. Hos enim non tenebatur alere: & proinde damnum his illatum per homicidium non est restituendum. Et ad hanc restitutionem faciendam talibus hæredibus necessariò alitis ab homicida, tenentur hæredes homicidæ, quando ipse nō sit viuus. Sicut enim hi hæredes succedunt in bona homicidæ;

ita

ita etiam succedunt in onera illius, iuxta illam Regulam iuris in sexto: *Qui sentit commodum, sentire debet & onus*, & è contra: quod clariùs probat Reginaldus *citato cap. sect. 2. num. 320.* dicens, hoc colligi ex *cap. final. de sepulchris*. Addit tamen *citat. n. 14.* Quod si illi hæredes necessarij defuncti habent unde sustententur, neque ab occiso sustentabantur, his non tenetur homicida restituere, qui illis damnum vllum non intulit.

11 Concludit Reginaldus *citato loco num. 315.* quod si occisus debeat aliqua debita alicui creditori, non tenetur homicida restituere illa debita creditori, pro quo citat Sorum, & Molinam; probat, quia creditor non habet ius in debitorem, nisi quantum extendunt se bona quæ actu habet, vel verosimiliter habiturus erat, quæ vtraque ad hæredes transeunt: illa quidem ratione hæreditatis aditæ; hæc verò restitutione per homicidam ei facta, illorum quæ occisus lucraturus erat probabiliter. Vnde solutio debitorum ipsius incumbit hæredibus, non verò homicidæ, nisi ea intentione occidisset, vt debiti restitutionem impediret: tunc enim tanquam peccans contra iustitiam damnum secutum teneretur restituere.

12 Adhuc aduerto quod si filiusfamilias aliquem hominem occiderit, non tenetur pater talis filij restituere aliquid pro tali homicido, si pater ad illud non concurrat iubendo, vel consulendo. Nam pater non tenetur refarcire damna illata à filio, ad quæ damna pater non fuit cooperatus, vt tenet Iulius Clarus in *praxi criminali, q. 86. n. 4.* & Lessius *lib. 2. de iust. cap. 9. dub. 17. n. 121.* & innuit Reginaldus *tomo 1. lib. 1. cap. 19. sect. 2. n. 252.* dum ait, filium percussorem Clerici non teneri adire Romam pro absolutione quærenda, si pa-

ter dissentiat. Si verò hic talis filius sub patria potestate existens habeat bona castrensia, vel quasi castrensia, tenebitur pater pro filio homicida restituere ex dictis bonis, si illorum usumfructum habet. Et hinc colligo quod si iste filius familias homicida exierit à patria potestate per matrimonium contractum, vel emancipationem, tenebitur ad faciendam restitutionem præteriti homicidij, si habuerit unde restituat: illa enim obligatio restituendi, est onus personale, quod transit cum persona, & adhuc talis obligatio non est extincta. Eo nempe modo, quo, si aliquis in graui paupertate existens furtum committat, & pro tunc non potest restituere, si tamen venerit ad pinguiorem fortunam, teneretur restituere, ut omnes fatentur.

CASVS LV.

De quodam patre cogente filiam ad ingressum Monasterij.

EXtat in Concilio Tridentino sess. 25. c. 18. de Regulis, decretum ne aliquis sub pœna excommunicationis cogat aliquam mulierem inuitam intrare Religionem. Verba quibus Concilium id prohibet sunt hæc: *Si quomodocunque coegerint ad ingrediendum Monasterium, vel ad suscipiendum habitum cuiuscunque Religionis, vel ad emittendam professionem, &c.*

1 Hoc posito, quidam pater habebat filiam iam nubilem sine matre, cui filia timebat periculum castitatis, vel matrimonium se incio contrahendum; coëgit illam per metum cadentem in virum constantem, ut monasterium Monialium ingrederetur, non ut fieret Nouitia,

Nonitia, vel Monialis, sed solum educationis gratiâ, quoadvsque congruè matrimonio locari posset.

Dubitatum fuit, an talis incurreret excommunicationem citatam à Concilio Tridentino? Et quidem quod incurreret, nimis suadent priora verba citata à Tridentino, ibi: *Ad ingrediendum monasterium.* Tria enim ibi prohibet Concilium. Primum est coactio ad ingrediendum monasterium. Secundum, coactio ad suscipiendum habitum Religionis. Tertium ad emit-tendam professionem: quæ omnia sunt distincta valde inter se, & proinde prohibitio videtur æqualiter at-tingere omnia illa tria. Et mihi quidem est opinio valde probabilis, quod incurreret, quam tenet Suarez *tomo de censuris, disp. 23. sect. 7. n. 9.* & Filliucius *tract. 14. cap. 6. quæstio 5. num. 89.* Probat Suarez eo argumento proximè tacto, quod Tridentinum illa tria distincta dinumeret: & præterea quia Tridentinum in illo pri-mo membro non dicit, ingredi Religionem, sed ingre-di monasterium, qui ingressus est valde diuersus ab ingressu Religionis. Secundò probat ex illis verbis ibi politis à Tridentino: *Nisi in casibus à iure permissis, vel expressis.* Nam ait Suarez iura aliquando cogunt, vel permittunt, quod in pœnam, vel cautionem femina cogatur intrare monasterium: nunquam verò, aut rarò illam cogunt ad suscipiendum habitum, vel ad professionem, propter quæ vt dixi est hæc opinio valde probabilis, & securior, quàm oppositæ, quæ talis est.

2 Oppositam sententiam, quod scilicet iste pater so-lum cogens filiam ad ingressum monasterij solius edu-cationis gratiâ, non incurrat pœnas Tridentini, tenet Rodriguez *tom. 2. summa, seu 2. p. cap. 8. num. 9.* & San-chez approbat *lib. 4. Decalogi, cap. 4. num. 12.* citans

Rodrig. loco prædicto. Sequitur etiam Bonacina *tom. 1. disp. 2. de excommunicatione, q. 6. puncto 2. num. 6.* & quidem nec Rodriguez nec Sanchez citatis locis aliquam rationem efficacem adducunt pro sua opinione, quæ sit fortior quàm illæ quas pro se affert Suarez citatus, ipse tamen Suarez postea *tom. 3. de Religione, lib. 5. de ingressu Religionis, cap. 2.* se declarans, vel retractans ponit hanc conclusionem. Pater potest cogere filium (idem dicit de filia) ante annos pubertatis vt ingrediatur monasterium, offerendo ibi illum in obsequium Dei: si verò filius iam sit extra pubertatem, id non potest facere pater. Hanc conclusionem probat ibi Suarez fusè, & clarè. Secunda pars conclusionis, quod scilicet non possit pater ad id cogere filium post annos pubertatis; probatur quia quoad hunc statum eligendum iam filius sui iuris effectus est in electione illorum, quæ spectant ad animam, & proinde ad hoc cogi non potest à patre: & in hoc sensu dicit loqui Tridentinum *citato cap. 18.* Secundam partem conclusionis probat, quod scilicet pater ad talem ingressum possit cogere filium ante pubertatis annum, quia talis ingressus non est de se malus, sed utilis animæ filij, & de quo possunt multa bona sperari. Et *citato libro, cap. 1. num. 12.* expressè dicit, & absolute, licitum esse parentibus offerre filios educandos Religioni, ita vt quantum in ipsis est, in ea perpetuò perseuerent, & ad hoc citat duo capita iuris canonici. Rationem assignat, quia pater habet ius ad dominium in filium suum: ergo potest de illo disponere in omnem usum, qui iniustitiam, vel turpitudinem non contineat: ergo multo magis in eum usum ad cultum Dei ordinatum. In utroque autem capite resoluit filium sic oblatum monasterio à patre, ante
puber

pubertatis annos non posse exire à monasterio : posse verò exire post annos pubertatis. Et hoc ipsum ego non viso Suarez tenui *tomo 2. dubiorum regularium, verbo, clausura Monialium, num. 8. & 9.* & cum Sanchez ibi citato.

3 Et ut dicam quod sentio, Suarez in 3. *tomo* non sibi contradicit circa illa quæ dixit in *tomo* de censuris loco citato: nam in 3. *tomo* quando dicit patrem posse cogere filium ad ingressum Religionis, vel monasterij, loquitur de filio ante annos pubertatis, etiam cum intentione ut faciat professionem, de quo casu hîc non quærimus. Et in *tomo* de censuris loquitur de puro ingressu monasterij, sine intentione ut fiat professus, idque de filio post annos pubertatis, & hoc dicit non licere: qui est casus, de quo agimus, in quo decidendo dico, quod opinio Suarez est securior, & consulenda in praxi, ob rationes, quas adducit. Et proinde iuxta illam, non posse patrem cogere filiam post annos duodecim ad ingressum monasterij etiam solius educationis gratiâ.

4 Quia tamen Rodriguez, Sanchez, & Bonacina sunt Doctores graues, imò & classici huius temporis, non condemnabo illum, qui illos secutus fuerit, & dixerit non incurrere censuram positam à Tridentino illum patrem, qui filiam duodecim annorum vsque ad vigesimum coëgerit ingredi monasteriũ solius educationis, vel securitatis gratiâ. Et licet Bonacina, & Rodriguez non adducant pro se rationes efficaces, vnã adduco quæ attingitur à Bonacina, quæ talis est: Finis legis attendendus est potiùs quàm verba legis, ut habetur expresse in regula vltima *de regul. iuris in 6.* At finis illius decreti Tridentini vetantis coactionem feminarũ ad ingressum monasterij, & habitus susceptio-

nem, est consulere libertati feminarum, illarúmque salutis spirituali, ne scilicet professæ coactæ totam vitam ducant tristes, & ferè cum occasione peccandi, & desperandi per impatientiam: ergo cum iste finis cesset in coactione filiar ingressæ monasterium solius educationis, & securitatis gratiâ, cum non cogatur ad habitum suscipiendum, neque ad professionem emittendam, sed possit exire quoties voluerit; cessabit proinde in hoc casu dispositio Tridentini, & censura ab eo posita cum cesset finis sui decreti.

§ Supponi adhuc in præcedentibus posse hodie feminam intrare monasterium solius educationis gratiâ, ut possit exire quando voluerit. Sed paucis abhinc annis, vel mensibus audiui, extare nouam prohibitionem Pontificiam, ne amplius femina recipiantur in Conuentibus Monialium solius educationis gratiâ. Si autem ista prohibitio facta est per Bullam Pontificiam, ego non vidi illam publicari in hoc regno. Si verò id prohibitum fuit per declarationem DD. Cardinalium, ego non illam vidi authenticam. Hoc vnum scio, quod Bonacina Doctor grauissimus, & Italus, qui suam summam prælo dedit anno 1632. qui debuit de hac re notitiam habere, in suo 1. tomo tit. de clausura, q. 4. puncto 4. n. 15. postquam dixit licitum esse puellarum ingressum in monasteria Monialium educationis gratiâ, & citat graues Doctores recentiores; transcribit ibi tenorem cuiusdam declarationis Cardinalium factam circa hanc materiam, quæ talis est: *Ex sacra congregatione Cardinalium Concilij Tridentini interpretum, amplitudinis tue nomine quaesitum est, an puella in monasterijs Monialium educationis gratiâ manere possint: ij vero sic censuerunt ad te scribendum. Iam dudum ab eadem congregatione statutum esse nullo Concilij decreto prohiberi quomi-*

nus puella in monasterijs Monialium educuntur, si tamen, &c. Et subdit statim dicta declaratio aliquas condiciones quæ ad hoc debent interuenire; quæ condiciones non militant contra hunc casum. Quamuis autem Rodriguez citato c. 8. summa concl. 9. citet vnâ Bullam Pij V. & alteram Sixti V. prohibentes ne in monasteriis Monialium sint aliquæ feminæ, nisi cum titulo Nouitiæ, & cum intentione profitendi, non citat vbi sint tales Bullæ, neque illas vidi, nec citantur à Bonacina. Et præterea ipse Rodriguez post summam scriptam in 1. tomo qq. q. 46. art. 10. citat vndecim vel potius septemdecim declarationes Cardinalium circa hanc educationem puellarum in monasteriis Monialium, & nulla ex illis nobis contradicit. Imò in declaratione 13. ibi posita sic habetur: *Mulier que venit in suspicionem adulterij apud maritum, & ob id timet ne ab eo sibi vis aliqua inferatur, permitti debet vt ingrediatur monasterium Monialium.* Qui casus maior est quàm noster: licet iste secundus casus, neque sit in vsu, neque consulendus.

6 Occasione verò præcipui casus hic tractati de patre cogente filiam ad ingressum monasteriorum causâ educationis, potest quæri quomodo & quando pater, aut quis alius incurrat excommunicationem à Tridentino positam propter coactionem factam feminis ad ingrediendum in monasterium Monialium; si cogant ad suscipiendum habitum, vel ad professionem emitendam; & quantus, & qualis metus ad hoc requiratur? Respondeo in summa ex Bonacina tom. 1. tit. de excommunicat. in communi, disput. 2. q. 6. puncto 2. num. 1. & seqq. metum leuem, & vim modicam excusare cogentem à censuris quando per talem metum leuem cogunt feminas ingredi monasteria ad susceptionem

habitus, vel professionem emittendam. Probatur, quia cum lex ista pœnalis sit, strictè intelligenda est tantum de illo metu, de quo ratio habetur in iure. In iure autem non habetur ratio metus levis *l. nec timorem, ff. de eo quod metus causa*. Tum quia pœna constituta contra eos qui metum inferunt incurritur solum ob illum metum, qui sufficit ad reuocanda illa, quæ per metum fiunt. De quo optimè Sanchez *lib. 4. Decalogi cap. 4. num. 4.* & Suarez *de censuris disput. 23. scil. 4. n. 11.* Metus verò qui sufficit ad reuocandum iam factum, non est metus levis, sed grauis. Quis autem sit metus grauis, seu cadens in virum constantem, disputat doctè more suo Sanchez *lib. 4. de matrimonio tota disput. 5.* Hinc colligit Bonacina citato proximè loco, *num. 4.* illum qui precibus, etiam importunis cogit, seu suadet feminæ, vt ingrediatur monasterium ad nouitiatum, vel ad professionem, non incurrere illam censuram: quia preces, etiam importunæ, non sunt metus, nisi fortè concurrant minæ. Colligit secundò ibidem *num. 5.* dictam censuram Tridentini non incurri ab eo, qui fœminam cogit habitum Religionis assumere incussò metu priuationis alicuius boni, ad quod femina aliàs non habet ius; tunc enim dicitur vis, aut metus inferri: sed negari id quod est in libera potestate donantis concedere, vel negare. Quale etiam erit si pater dicat filiæ, se aliàs illam non esse melioraturum in ea parte bonorum, quæ potest dare, vel auferre. Ad hoc etiam videri possunt illa quæ dixi *1. tomo dubiorum regularium, verbo Moniales, num. 8. & 9.*

CASVS LVI.

*De electione cuiusdam Abbatis dubiâ ex parte
eligentis Prælati.*

IN quadam Religione virorum habente curam Monialium, datur statutum, disponens quod quando visitator accesserit ad visitandum aliquam prouinciam, antequam incipiat visitare, moneat Prouincialē illius Prouinciæ, & Prouincialis prædictus visitandus tradat visitatori sigillum paruum sui officij. Estque consuetudo Religionis, vt Prouincialis cesserit à suo regimine per ingressum visitatoris in suam Prouinciam. Iste visitator ingressus Prouinciam statim monuit Prouincialem de suo aduentu, monēs quod sibi statim mitteret sigillum paruum officij ad incipiendā visitationem: Prouincialis distulit mittere sigillum, & non obstante monitione visitatoris, iuit ad Conuentum quemdam Monialium in quo vacauerat Abbatissa, & factâ electione, confirmauit quandā Abbatissam, quæ fuit electa Canonice.

Quæsitum fuit an prædicta electio fuerit valida: an verò nulla, ex defectu iurisdictionis iam cessantis in Prouinciali. Et quod fuerit valida, videtur probari ex ipso statuto Ordinis dicente, quod visitator non poterit exercere suum officium nisi prius habuerit sigillum paruum Prouinciæ: hoc autem sigillum Prouincialis illi nondum tradiderat; ideoque cum nondum posset visitator eligere illam Abbatissam, potuit eam eligere Prouincialis habens adhuc illud sigillum, maxime ne conuentus Monialium tanto tempore careret Abbatissa.

Responsio.

1 Quo non obstante, respondeo dictam electionem fuisse nullam, ex defectu iurisdictionis quæ iam cessauerat in prouinciali, secundum praxim prouinciæ: cum iam haberet mandatum visitatoris petentis sigillum paruum, & ex consequenti inhibentis prouincialem, ne ulterius in suo regimine externo procederet. Probo primò, nam iurisdicção siue ordinaria, siue delegata reuocatur, vel suspenditur per Epistolam, siue per Nuncium intimantem iudici ordinario, vel delegato talem reuocationem, vel suspensionem iurisdictionis, sic tenet, & probat Sanchez *lib. 3. de Matrim. disp. 30. n. 12. & 13.* pro quo citat Boërium, Rebuffum, Cucum; idem tenet Bonacina *tomo 2. disp. 1. quæst. 3. puncto 8. §. 3.* citans Azor, & alios. Et probant, quia iurisdicção inferioris pendet à superiore, & à lege reuocantibus. At in hoc casu visitator, qui per statutum est superior prouincialis, per litteras missas ad Prouincialem, & petitionem sigilli parui, virtualiter intimauit illi suspensionem iurisdictionis; ergo Prouincialis à tali iurisdictione suspensus non potuit ultra eligere, & confirmare illam Abbatissam: electio enim, & confirmatio Abbatissæ est actus iurisdictionis. Secundò non obstat, quod Prouincialis quando elegit Abbatissam habebat adhuc sigillum paruum, illudque nondum habebat visitator. Nam adhuc id sigillum in manu prouincialis illi non conferebat iurisdictionem ad electionem, iam enim illud retinebat cum culpa propria nolens illud mittere ad visitatorem, qui illud petebat iuxta statutum: nemo autem ex sua culpa debet commodum reportare, vt dicitur *in cap. Ad nostrum, de empta. & vendit. & cap. Tux, de cleric. non residentibus,*
&

& est communis Iuristarum, teste Sanchez *lib. 2. de Matrim. disput. 22. n. 6.* & proinde culpa, seu mora Prouincialis in non mittendo sigillo ad visitatorem, non potuit patrocinari Prouinciali, neque illi dare iurisdictionem ad celebrandam interim electionē Abbatissæ.

2 Tertiò, si Prouincialis potuisset retinere sigillum, illud non remittendo ad visitatorem petentem, & interim facere quod liberet: sequeretur potuisse, vel posse Prouincialem retinere dictum sigillum per vnū mensem non tradendo illud visitatori ingressō prouinciam, & exercere suum officium Prouincialis in præiudicium iurisdictionis visitatoris, & in retardationem visitationis, quæ omnia sunt absurda, & incōuenientia: absurdis autem obuiandum est, vt dicitur *cap. Cū inter priorem, de exception. & cap. Dudum, de prebend. in 6.*

Quartò idem probatur, quia quando alicui iudici delegato committitur iurisdictione ad aliquod negotium, talis iudex acquirit possessionē talis iurisdictionis vbi primum citationem partis fecit: sic decernit capitulum *Gratum, de offic. delegati, vbi agens de iurisdictione commissa alicui iudici delegato, qui partem iam citauerat, ponit hæc verba: Cū citatione factā negotium sit, quasi capium.* Circa quod multa dicit Sanchez *lib. 8. de Matrim. disp. 28. n. 10. vsque ad 13.* Sic etiam in hoc casu visitator est iudex delegatus, & in virtute suæ commissionis misit statim Epistolam ad Prouincialem monens illum de sua commissione ad visitandam prouinciam, quod in substantia fuit citare Prouincialem vt desisteret ab officio: per quam citationem visitator acquisiuit possessionem sui officij, & sic acquisitā possessione sui officij, non poterat Prouincialis exercere actum externum suæ iurisdictionis, qualis est electio, & confirmatio Abbatissæ. Confirmantur hæc ex eo quod tradit

tradit Bonacina *tomo 2. disp. 1. de legib. q. 3. puncto 8. §. 1. n. 22.* vbi ait, quod in negotiis in quibus non requiritur citatio contentiosa, res censetur non integra, sed iam cœpta, quando Commissarius iam incepit primum actum respondentem citationi. Et in hoc casu missio illa epistolæ ad Prouincialē fuit actus primus respondens citationi. Neque obstat, quod Prouincialis nondum miserat visitatori sigillum paruum: hoc enim non erat impedimentum, quia visitator posset post missam epistolam exercere suum officium: aliās si prouincialis sigillum non mitteret intra duos menses, non posset suum officium exercere. Vltimò probatur hoc ex praxi prouinciæ, & Ordinis istius, in quo vbi primum visitator accedit ad aliquā Prouinciā visitandā, Prouincialis dictæ Prouinciæ personaliter adit visitatorem, & cessat à suo officio, sciens quia ipso facto cessat sua iurisdictio quoad forū externum contentiosum.

3 Ad argumentum factum in principio? Respondetur nihil ob stare quod visitator nondum haberet sigillum paruum, quod illi dari iubet statutum generale: licet enim illud non haberet, non poterat Prouincialis suum officium exercere, cū iam per epistolam visitatoris acceptam sua iurisdictio esset suspensa, vt probatum est suprà, maximè argumento primo, & quarto? Respondetur secundò, quod non habere adhuc visitatorem dictum sigillum paruum, non fuit culpa visitatoris, sed ipsius Prouincialis nolentis mittere. Et ideo retinente Prouinciali dictum sigillum suā culpā, talis culpa non debet illi suffragari, vt dictum est in præcedentibus. Addo quod facta post iurisdictionem suspensam sunt nulla, vt inter alios probat Camillus Borrellus *tomo 1. suarum Decisionum, tit. 41. n. 286.* citans alios: iam verò ostēdimus iurisdictionem Prouincialis man-

siste

fisse suspensam. Quod verò attinet ad inconueniens tactum in primo argumento, quod scilicet esset damnum illius Conuentus Monialium si diutius cageret Abbatissâ? Respondetur primò, quod talis vacatura non prorogabat iurisdictionem Prouincialis iam suspensam? Respondetur secundò, quod visitator breui tempore posset illum defectum supplere, vel accedendo personaliter ad dictam electionem faciendam: vel committendo alicui Religioso graui vt eandem electionem celebraret.

C A S V S L V I I .

*De dispensatione in quodam statuto
Prouinciali.*

IN Prouincia cuiusdam Religionis exstabat quoddam statutū Prouinciale factum in capitulo per totam Prouinciam: quidam Prouincialis in certa occasione dispensauit in illo statuto, non habens specialem commissionem à capitulo prouinciali, vt posset in illo dispensare. Quæsitum est an prædicta dispensatio valida fuerit?

I Primò, respondeo non posse Prouincialem dispensare in statuto prouinciali suæ Prouinciæ. Probatio istius conclusionis habetur clarè ex simili exemplo, quod posui, & probaui in meo *tomo 1. Dubiorum regularium*, verbo *Generalis*, num. 4. vbi probaui cum Miranda, & Corduba, Generalem Ordinis Minorum non posse dispensare in statuto generali totius Ordinis, nisi seruata formâ assignatâ ab eodem statuto generali, & quod dispensatio facta tali formâ non seruata erit

erit nulla. Fundamentum meum ibi fuit, quia Generalis Ordinis est subditus, & inferior Capitulo generali: nam in c. 8. nostræ regulæ dicit Pater noster Franciscus, quod Capitulum generale possit priuare officio Generalem, si inueniatur quod non sit idoneus ad officium. Si ergo Generalis est subditus Capituli generalis, nec potest dispensare in vno statuto generali, nisi speciali commissione sibi factâ à capitulo generali, & seruâtâ formâ præscriptâ ab eodem Capitulo generali: eadem ratione, vel potius maiori, Prouincialis erit subditus Capituli prouincialis, nec poterit dispensare in aliquo statuto prouinciali suæ prouinciæ, nisi sibi sit ab eodem Capitulo prouinciali specialis facultas concessa ad dispensandum: est enim comunissimum dictum Iuristarû, quod *ubi est eadem ratio, est etiam eadem iuris dispositio*. Est autem eadem ratio Generalis ad Capitulum generale, & Prouincialis ad Capitulum prouinciale. Secundò probatur hoc ex eo quod citato loco attuli ex Suarez *tomo de legib. lib. 6. cap. 15. num. 7.* vbi probat quod Archiepiscopus ligatur legibus Concilij prouincialis, & proinde in illis non posse dispensare nisi à prædicto Concilio prouinciali sibi specialiter fuerit commissum, & proinde dictum Concilium prouinciale est supra Archiepiscopum. quod optimè probat Sanchez *lib. 8. de matrim. disp. 17. num. 36.* citans Nauarrum dicentem posse Archiepiscopum excommunicari à Synodo, vel Concilio prouinciali. Et confirmatur, quod sit minor facultas prouincialis, quàm Capituli prouincialis: nam Capitulum prouinciale potest facere statutum, seu legem, quæ duret in perpetuum: Prouincialis verò non potest condere statutum, sed solum mandatum, quod duret tantum suo triennio. Denique vt hoc semel, & clariùs innotescat in

re quotidiana, tum de Generalis, tum de Prouincialis potestate ad dispensandum in statuto generali, vel prouinciali, videatur frater Petrus Toscinianus *in sua historia Franciscana, lib. 2. folio 130. pag. 2.* vbi refert quamdam Bullam Gregorij XI. in qua Papa agens de iurisdictione Cardinalis protectoris supra Ordinem Minorum: cui Cardinali Pater noster Franciscus in regula dat tantam iurisdictionem, vt dicat, quod sit gubernator, corrector, & protector istius Religionis. Nihilominus Papa in illa Bulla ait, quod Cardinalis protector, *de cetero non presumat quacunque ordinata, statuta, siue disposita, ac ordinanda, & statuenda per generalia, & prouincialia, & custodialia capitula infringere, reprobare, corrigere, suspendere, aut dispensare super ipsa, &c.* Si igitur Papa decernit, quod nec Cardinalis protector Ordinis, cui regula dat tantam iurisdictionem supra ipsam Religionem, possit dispensare in vno statuto Capituli Custodialis: clarum est, quod non poterit Prouincialis dispensare in statuto prouinciali eiusdem prouinciæ. Solus ergo Papa est supra Concilium generale Ecclesiæ ob rationem, quam Doctores Theologi assignant, præcipuè in materia de fide: ceteri verò Prælati sunt infra Capitulum generale suæ Religionis: & Prouinciales infra capitulum prouinciale suæ prouinciæ.

CASVS LVIII.

*An possit Prælatus punire certum delictum
secretum subditi.*

Quidam Prælatus regularis, vel localis, vel prouincialis ex vi statuti illius Ordinis, associatus duobus

duobus Religiosis grauibz vsitans cubicula, seu cellas Religiosorum, in cella cuiusdam Religiosi inuenit litteras amoritias cuiusdam feminae ad illum, & alias illius ad feminam. Inuenit praeterea scelopum quemdam paruum, vulgo *pistolet*, quod genus armorum grauissimè punitur per leges istius Regni. Quaesitum fuit, an talis Prælatus potuerit illa delicta occulta in publico punire? Et videtur quod potuerit illa punire: nam in *cap. Ecce 24. q. 3.* dicitur, quod crimina vndecunque claruerint, puniendi sunt. Hæc autem delicta iam claruerunt coram Prælato, & duobus testibus grauibz associantibus Prælatum: ergo poterunt puniri. Secundo, quia Christus Dominus in Euangelio dixit, *In ore duorum vel trium stare omne verbum.* Hoc autem delictum iam stat in ore trium. Et denique, quia finis illius statuti præcipientis vt cellæ fratrum singulis annis visitentur à Prælato, videtur esse, vt Prælato sic visitantes cubicula possint emendare, & corrigere id quod viderint esse necessarium ad bonum commune, & ad bonum particulare cuiusque Religiosi. Et videtur omnino hoc probari ex *cap. 1. de accusat. inquisit. in 6.* vbi Papa dicit posse puniri illum qui coram iudice confessus est delictum, quamuis alleget quod de tali delicto non erat diffamatus, vel quod sibi non fuerunt exhibitæ capitula inquisitionis. Et ad hoc ibi glossa verbo, *Confessus*, citat capitulum *Ecce 24. q. 3.* & alios textus. In hoc autem casu, illa inuentio litterarum, & armorum prohibitorum est in substantia confessio facta coram iudice, cum reus illa negare non possit, neque tergiversari: ergo poterit puniri.

I Nihilominus tenendum est tanquam certissimum non potuisse, nec posse Prælatum hæc delicta sic occulta punire, saltem publicè. Probatur primò ex *cap.*

Qualiter,

Qualiter, & quando il 1. de accusat. in fine, vbi Papa dicit, quod pro reformāda Ecclesia exhibeatur iuramentum, & testes iurent quæ sciunt, vel credunt, & addit: *Exce-
ptis occultis criminibus*. At hæc delicta sunt occulta: ergo non potest Prælatus illa punire. Valet consequentia; quia si testis sub iuramento rogatus non potest reue-
lare iudici delictum occultum; nec iudex poterit puni-
re publicè delictum quod est occultum. Idem habetur
in cap. qualiter, & quando, eodem titulo de accusat. vbi Papa
assignans ordinē seruandum à Prælatis in inquisitione,
& punitione delictorum, ponit hæc verba: *Sed cum su-
per excessibus suis quisquam fuerit infamatus, ut iam clamor
ascendat, qui diutius sine scandalo dissimulari non possit, &c.*
Vide qualem infamiam, & clamorem requirat Papa ad
hoc vt Prælatus possit de aliquo crimine inquirere, &
punire. At iste Religiosus de quo agimus non est in-
famatus, vt suppono; ergo Prælatus non poterit illum
publicè punire. Idem habetur, & clariùs in cap. de accu-
sat. quod incipit, *Inquisitionis negotium* in §. vbi ponit
hæc verba: *Ad hæc respondemus, nullum esse pro crimine su-
per quo aliqua non laborat infamia, seu clamorosa insinuatio
non præcesserit propter huiusmodi puniendum: quinimo super
hoc depositiones contra ipsum recipi non debere.* Quo nihil
clarius dici potuit. Et ibi glossa littera B, C, D, citat
multos alios textus & proinde necesse non est aliquas
rationes afferre, vel Doctores citare. Solùm aduerto
prudenter nostram Religionem Minorum in statuto
generali c. 6. de correct. delinquentum, sic statuisse: Si quis
fuerit conuictus de aliquo crimine per duos vel tres,
vel quatuor testes; si tamen est omnino occultum inter
ceteros Religiosos, tunc non publicè puniendus est. Et
quamuis ibi statutum dicat quod talis reus secretò co-
ram testibus puniendus est: hoc ego intelligo esse acci-
piendum

piendum prudenter, & cum limitatione. Prima est, quod non debet puniri secretò corā illis testibus, qui in processu testes non fuerunt, neque de delicto aliquid sciunt: quia hoc iam esset reum infamare coram illis de delicto nihil scientibus, quod non videtur esse licitum. Secūdò dici potest quod illa punitio secreta debet fieri coram testibus, videlicet illis testibus, qui sciunt de delicto, & in processu testes fuerunt. Sed tamen etiam in hoc datur inconueniens: nam exinde poterit reus concipere odium perpetuum eo quod contra se fuerint testificati. Sed tamen dicendum est posse licitè hanc punitiōem fieri coram aliis testibus qui non tulerunt testimoniū in processu, neque de delicto sciebant. Nam Christus D. *Matth.* 18. agens de correctione fraterna, dixit, vt primo corripere delinquens secretò inter ipsum delinquentem, & ipsum corripientem. Si verò delinquens non acquiesceret, adhiberetur vnus, vel duo testes, vt in ore duorum, vel trium stet omne verbum. Et tamen illi duo testes denuò adhibendi, videtur quod deberent ignorare delictum. Neque in hoc læditur fama delinquentis iniuste, cum hoc ordinetur ad bonum spirituale ipsius. Imò etiam ordinatur ad bonum temporale ipsius, quia sic correctus, & emendatus, non perseuerabit in peccato, vt veniat ad talē statum vt possit puniri publicè cum iactura honoris. In hac tamen punitiōe secreta coram testibus curandum omnino, & cauendum est, vt punitio sit talis, & tali modo inflicta, vt non veniat in cognitionem aliorum; tunc enim publicaretur crimen secretum, quod est contra mentem textuum suprà citatorum.

2 Ab hac tamen regula non puniendi publicè delictum secretum, excipitur quando delictum est atrox, & contra communitatem, qualis est hæresis, & crimen nefandum;

fandum; tunc enim etiam non præcedente infamiâ, potest de illo inquiri, & poterit puniri publicè si probe-
tur. Ita Suarez *tom. 4. de Religione, lib. 10. cap. 12. n. 4. & 5.*
& constat ex praxi rectissimi Tribunalis sanctæ Inqui-
sitionis, in quo quotidie puniuntur delictum hæresis,
& sodomix in publico non præcedente infamiâ publi-
câ, eo quod sint clarè contra bonum commune Reipu-
blicæ, probat Suarez *n. 5. citato*. Nam in hoc casu non
interuenit solum punitio criminis occultri, sed etiam ac
præcipuè defensio boni communis, quod bonum com-
mune præponderat famæ delinquentis. Hanc eandem
regulam extendit ibi Suarez ad sacrilegium fornica-
tionis in persona Religiosa. Item extendit ad peccata
quæ vergunt in aliquod graue damnum alicuius inno-
centis, cui aliâ viâ subueniri non potest: tunc enim
etiam defensio innocentis præferenda est famæ homi-
nis iniqui. Et hoc maximè locum habebit quando fue-
rit facta machinatio contra Prælatum. Denique addit
Suarez idem dicendum esse quotiescunque sufficiens
ratio intercedit ad contemnendam famam proximi
propter aliud maius bonum, quod sæpe licere dicit
constare ex D. Thoma 2. 2. *quæst. 73. art. 2.* & ex com-
muni Doctorum sententiâ. Et ex consequenti, vt ibidem
ait Suarez *num. 4.* in huiusmodi dilectis vergentibus
contra bonum commune, si correctio fraterna non
creditur profutura, tenetur testis aperire personas par-
ticulares: quia eadem ratio quæ probat posse iudicem
in hoc casu inquirere, & punire, etiam non præceden-
te infamiâ, probat etiam in teste, quod interrogatus te-
neatur reuelare personam occultam si non sit spes
emendæ, & instet periculum Reipublicæ.

3 Ad argumenta posita in principio quatenus viden-
tur obstare doctrinæ traditæ, respondetur; primò qui-

dem, quoad caput *Ecce 24. q. 3.* dicens, *crimina undecunque claruerint, puniendi sunt*, esse regulandum, & explicandum per alios textus citatos *num. 1.* qui dicunt non esse inquirendum, neque puniendum crimen occultum: nam, ut aiunt Iuristæ, *iura iuribus debent concordare*. Si ergo crimina claruerunt, ita ut sint facta publica, ac de illis extet infamia, debent puniri. Si verò claruerint ex probatione secreta apud solum iudicem, & de crimine non sit infamia, non debent puniri publice iuxta tres textus citatos *num. 1.* nisi fortè sit crimen contra communitatem, ut dictum est *num. 2.* Delictum verò istius Religiosi, de quo agimus, non erat delictum contra communitatem. Ad secundum, dicendum, dictum illud Christi *D. in ore duorum, vel trium stare omne verbum*, verissimum esse, quod duo testes plenè probent quodcunque delictum: non tamen docuit ibi Christus *D.* quod quoties delictum probaretur duobus testibus, posset puniri in publico, si delictum esset occultum, & non diffamatum. Nam Ecclesia in illis textibus declarauit, quod licet delictum posset probari in secreto, non tamen possit inquire, nec puniri, si reus nō fuisset diffamatus, ut patet ex dictis *n. 2.* Ad tertium dico, finem illius statuti iubentis visitari cubicula Religiosorum esse ut superflua auferantur à Religiosis quoadvsum superfluum, imò etiam ut corrigantur; sed tamen ut corrigantur seruato ordine iuris, ne scilicet puniatur publicè delictum occultum, iuxta tot textus citatos *num. 2.*

4 Ad capitulum primum *de accusat. in 6.* Dico primò, Papam non ibi dicere posse inquire, vel puniri reum non diffamatum, sed solum retulisse Papam id quod reus allegabat, dicens, se non esse diffamatum: in quo dicto reus mentiebatur: nam oportuit ut esset diffamatus.

tus. Ibi enim dicitur quod iudex antea cœperat inquire in particulari de certis criminibus rei. At iudex non potuit nec debuit facere inquisitionem de certis criminibus, nisi talia crimina essent diffamata, iuxta textus *n. 2.* citatos: mentitus ergo videtur ibi reus, dicens, se non fuisse diffamatum. Respondetur secundo, confessionem illam rei corâ iudice in cap. citato fuisse sufficientem ad reum condemnandum: confessio enim facta iuridicè corâ iudice sufficit ad condemnationem, ut omnes fatentur. In hoc autem nostro casu per litteras amatorias, & sclopum repertum in cubiculo istius Religiosi, non dicitur confiteri Religiosus talia delicta: adhuc enim poterit se aliquo modo defendere, dicendo quod sclopus ille non erat suus, sed cuiusdam amici sæcularis, qui illum deposuerat apud Religiosum, ne sæcularis cum sclopo inueniretur à Ministro iustitiæ sæcularis. Quod verò attinet ad litteras amatorias, posset qualemcunque aliam excusationem dare, ut quod littera epistolarum non esset sua, sed quod tales epistolæ essent sibi falsò adscriptæ ab aliquo inimico, & sic de cæteris. Itaque reus iste per hæc prohibita in suo cubiculo reperta, non censetur facere confessionem sui delicti, quod tamen verè, & in substantia erat occultum, & ob culpam Prælati factum est publicum.

CASVS LIX.

De restitutione cuiusdam usuræ.

Quidam homo viuens ex mercatura, & habens pecuniam destinatam ad solam negotiationem, tem-

pore proximo ante messem, dedit agricolis pecunias sub titulo emptionis tritici futuri, sed tamen in tali emptione interuenit clara usura ob conditiones positas, quas omitto. Quæsiuit à me an teneretur restituere, & quid deberet restituere. Et punctū dubitationis fuit, vtrum hic homo ex restitutione facienda posset detrahere, & sibi retinere portionem illam lucri cessantis, quod lucrum sibi cessauit ex eo quod pecuniam suam dedit agricolis, & cum illa pecunia posset interim lucrari, in alio contractu licito. Et videtur quod posset sibi retinere partem dicti lucri cessantis, ex eo quod omnes Doctores fatentur, posse mercatorem quando mutuatur pecuniam, quam habebat destinata ad negotiationem deducere in pactum, quod ultra capitale soluendum sit sibi lucrum illud cessans ex mutuatione talis pecuniæ: eadem enim ratio videtur currere in hoc nostro casu.

1 Hunc casum in terminis apud aliquem Doctorem non inueni. Lessius tamen *lib. 2. de mutuo, c. 20. dub. 12.* ponit hunc casum ferè similem: quærit enim ibi, vtrum qui bona fide fecit contractum usurarium, vel aliàs iniquum, quem si talem sciuiisset, fecisset alium iustum, possit ratione lucri cessantis veritate compertâ tantum retinere, quantum contractu illo iusto lucraturus fuisset? Et quidem Lessius primò citat aliquos Doctores, quos non nominat, qui dicunt posse tunc hunc dantem pecunias retinere sibi illam partem pecuniæ respondentem lucro sibi cessanti ex tali donatione pecuniæ; & affert tres rationes, quas illi Doctores pro se afferunt, licet ille illis absolute non assentiat: quamuis in fine *num. 109.* idem Lessius resolvere videatur, quod iste taliter contrahens, implicite videtur intendere iustum titulum, qui cupit iusto modo lucrari, & non aliter.

ter. Et proinde videtur Lessius aliqua ex parte inclinare in sententiam illorum quos suppresso nomine citat: qui dicunt posse tunc retineri illud lucrum cessans.

2 At Bonacina *tomo 2. tit. de contractibus, disput. 3. q. 3. puncto 15. n. 9.* sequens Molinam ibi citatum, & Lessium loco proximè citato, asserit tale lucrum non posse retineri, nisi contrahentes expressissent velle se obligare omni meliori modo, quo possent. Rationem assignat Bonacina, quia acquisita contractu iniusto, & inualido, non possunt possideri ab aliquo: quæ autem accepta sunt in proposito casu, dicuntur acquisita contractu iniusto, & usurario, cum ille qui tradidit non liberè tradiderit, neque iusto titulo: ergo huiusmodi accepta non possunt retineri, nisi contrahentes expresserint velle se contrahere, vel obligare omni meliore modo quo possent.

3 Ex dictis ab his duobus tam grauibz Doctoribus huius temporis, ad casum propositum in principio, respondeo primò, quod si iste qui dedit pecuniam colonis ante messem habuit malā fidem, nullo modo potest sibi retinere illam partem lucri quod sibi cessauit. Probatur primò, quia Lessius, & Bonacina loquuntur expressè de illo, qui id fecit bonā fide, & adhuc de illo id negant, multo magis negaturi de illo, qui id fecit malā fide. Quod adhuc potest confirmari, quia fraus & dolus nemini debent patrocinari, nec debet aliquis ex peccato suo commodum reportare, cap. *Audiuimus*, de collusione detegenda: vbi glossa in ver. *spoliare*, citat alios textus, maxime *l. 1. ff. de dolo*, vbi dicitur quod malitia alicuius non debet illi esse lucrosa, & *l. 3. §. 2. ff. de don. inter virum, & uxorem*, vbi dicitur, quod ex eo quod quis deliquit, non debet esse melioris conditionis.

4 Etiam dico secundò, quod licet iste sic daps pecuniam

niam agricolis habuerit bonam fidem, cum tamen contractus à parte rei fuerit clarè vsurarius, vt supponitur, & dicitur in informatione, etiam si habuerit bonam fidem, postea compertà veritate non potest sibi retinere illam partem lucri cessantis. Hæc est opinio Lessij, & Bonacinæ citatis locis, ambo enim in hoc concordant. Lessius illà probat duobus exemplis. Primum est. Nam qui emit rem minus iusto, & cum bona fide, postea tamen intellectu veritate tenetur complere pretium, nec potest confugere ad alium contractum, quem cum alio iniuisset, & quo plus lucratus fuisset, quia venditor non consensit in illum alium titulum: non enim mens illius fuit rem suam vendere minoris iusto propter interesse emptoris. Secundum exemplum est: Siquis bona fide vendidit rem supra iustum, postea compertà veritate tenetur restituere excessum; nec potest confugere ad lucrū cessans. Quia emptor non consentit in illum titulum: non enim intendit compensare interesse venditoris, sed tantum emere rem illam iusto pretio. Eodem modo in nostro casu, agricolæ illi, quibus hic mercator dedit pecunias anticipatas, non intenderunt vendere triticum suum nisi iusto pretio, & non intenderunt compensare interesse mercatoris. Et è contrà iuxta primum exemplum Lessij, si iste mercator emit triticum ab agricolis minus iusto, postea compertà veritate tenetur id refarcire, neque potest confugere ad alium contractum quem cum alio posset facere: maxime cum non fecerit cum agricolis pactum de lucro cessante. Ratio autem Bonacinæ supra tacta, quod scilicet acquisita ex contractu vsurario, & iniusto, non possunt retinere, ampliatur ab eodem Bonacina eadem 9. 3. puncto 14. n. 1. vbi dicit cum multis citatis, quod vsurarius nunquam acquirit dominium eorum, quæ per vsuras

vsuras accepit. Vt ibi probat tum ex iure ciuili, tum quia is qui patitur vsuram, & soluit aliquid sub vsura, non intendit tradere aliquid vsurario vltra sortem capitalis, vel iusti pretij: & proinde vsurarius tenetur restituere id quod accepit vltra sortem, seu vltra iustum pretium.

5 Ad argumentum oppositū in principio, siue exemplum de mercatore mutuante pecuniam, quam habebat paratam ad negotiationem, dicendum est esse casum nimis diuersum ab isto nostro. Nam ibi mercator mutuans illam pecuniam, prius facit pactum cum mutuuario de sibi soluendo lucro cessante, in quo mutuarius consentit. Et in nostro casu iste dans pecunias illis agricolis, non fecit pactum de lucro cessante, sed absolutē fecit contractum vsurarium emens triticum ~~minoris~~ iusto ratione anticipatæ solutionis. Et retorquendo exemplum adductum de mercatore mutuante, dico, quod si ille mercator ex pecunia parata ad negotiationem mutuaret, non faciens pactum cum mutuuario de soluendo lucro cessante, sed nihil declarans, pecuniam dedit mutuo, non tenebitur mutuarius postea soluere mercatori lucrum quod illi cessauit: quia mutuarius non intendit se obligare ad illud lucrum cessans non declaratum à mercatore, sed credidit se gratis mutuo accipere. Eodem modo licet mercator in nostro casu emeret triticum ab agricolis de pecunia parata ad negotiationem, non ideo potest retinere lucrum cessans ex tali pecunia, quia de eo pactum non fecit cum illis: neque illi intenderunt se obligare ad soluendum tale lucrum cessans.

CASVS LX.

*De restitutione cuiusdam, qui iuravit falsum
in iudicio, & alios ad id induxit.*

Quidam homo querelam fecit coram iudice, & sub iuramento coram illo dixit quod Petrus furatus sibi fuerat quemdam equum: & hic idem induxit, seu suavit aliis duobus hominibus ut ferrent testimonium coram iudice, quod ille Petrus furatus fuerat rem aliam similem notabilem, propter quod Petrus carceri publico traditus est. Sed declaratur quod nullus ex his tribus sciebat certò quod Petrus talia furtiva commisisset, sed solum de illo habebat indicia aliqua. At omnes in suo testimonio affirmatiue dixerunt se scire quod Petrus tale furtum commiserit; & is qui induxit illos, dixit in iuramento se certò id scire.

Iste qui induxit duos ad iurandum falsò, positus in morbo periculoso quæsiuit quid sibi faciendum esset ad animæ salutem?

I Et quidem ante omnia dubitari potest, an hoc iuramentum fuerit iuramentum falsum: videtur enim quod non fuerit falsum, sequentibus exemplis. Primò, quia iudicans aliquod malum de proximo, si habet indicia ad sic iudicandum, non dicitur habere iudicium temerarium, ut omnes Doctores fatentur, quia habet fundamentum ad sic iudicandum: ergo cum isti habuerint indicia, quod Petrus tale furtum committeret, non sunt dicendi quod iurauerint temerariè, & falsò. Secundò, quando aliqua opinio habet pro se rationes probabiles, talis opinio non dicitur falsa absolute,

solutè, sed potest teneri, vt omnes Doctores concedunt: ergo à simili, cùm hi iurantes habuerint pro se indicia ad sic iurandum, non est dicendum quod falsò iurauerint, habuerunt enim pro se indicia, quæ indicia sunt sicut rationes probabiles ad firmandam, & sequendam suam opinionem.

2. Hoc non obstante dico prædictos iurantes iurasse falsò: cùm enim dixerint in iuramento se certò scire Petrum commisisse furtum, quod certò non sciebant, sed per indicia, mentiti sunt, dicentes esse certum quod non erat certum: nam cognitum per sola indicia non dicitur certum, sed probabile. Dicentes ergo esse certum, id quod erat incertum, iam dixerunt mendacium, & proinde iurarunt mendacium, & ex consequenti iurarunt falsum. Hæc doctrina, seu illatio traditur expressè à Sanchez lib. 3. *Decalogi*, cap. 4. n. 8. ubi agens de iuramento falso, ponit verba sequentia: *Idem dicendum est, si quis rem sibi dubiam, vt certam iuret, quod periculo periurij exponatur, imò re vera falsum iurat: quia mentitur, asserens tanquam rem certam, de qua est dubius. Secus si rem illam asserat tanquam dubiam, vt dicendo, Suspicor ita esse.* Sic optimè Sanchez citato loco ad nostrum intentum. Ad exempla de iudicio temerario, & de opinione probabili, dicendum est non esse similia, vel saltem non probare contra nos. Nam iudicans de proximo per indicia probabilia non dicit mendacium, neque affirmat certo rem aliquam dubiam, sed credit probabiliter rem sic se habere. Si enim ita certò crederet malum de proximo, vt affirmaret sub iuramento rem ita se habere, iam falsò iuraret, quia affirmaret rem esse certam, quæ est incerta. At in casu nostro iste iurans in iudicio propter indicia affirmavit vt rem certam, illam quæ à parte rei erat incerta.

incerta. Eodem modo responderetur ad exemplum de opinione probabili. Nam sequens opinionem probabilem non iurat, neque iurare potest opinionem, quam sequitur esse certam: eo enim ipso quod opinio est, iurari non potest quod sit certa. At homo de quo loquimur suam opinionem, seu potius credulitatem iuravit absolutè esse certam, & proinde iuravit mendacium.

3 Supposito ergo quod isti iurauerint falsò, & reus contra quem iurarunt est incarceratus cum periculo vitæ, & honoris: quæritur ad quid teneantur isti sic falsò iurantes, qui illum reum in tale periculum suo iuramento coniecerunt? Ad hoc respondeo per sequentes conclusiones collectas ex Sayro in *Clavi Regia lib. 12. cap. 19. num. 8.* & Reginaldo *tomo 2. lib. 24. num. 163;* & Bonacina *tomo 2. tit. de 8. Decalogi precepto, disput. 10. q. 3. puncto 3. num. 15.* qui sunt ex grauioribus Doctoribus huius temporis.

4 *Prima conclusio.* Si isti sic iurantes credunt ad arbitrium viri prudentis quod retractando suum testimonium coram iudice, nihil proficiet sua retractatio, quia iudex eo non obstante in causa procedet ob probationes iam receptas, in tali casu non tenentur coram iudice dictum retractare. Probant illi tres Doctores, quia nemo tenetur ad actum frustraneum, ut omnes Theologi, ac Iuristæ fatentur. Talis autem retractatio est futura frustranea, ut supponimus: ergo ad illam non obligantur. Ad hoc autem consulendi sunt Doctores iuris ciuilibis, & Aduocati periti, qui dicant, an retractatio testimonij sit profutura. Si enim dicant non profuturam, quiescere possunt iuxta hanc conclusionem. Si dicant profuturam, tenentur ad faciendum id quod mox dico in sequentibus.

5 *Secunda conclusio.* Si iste, qui sic iuravit falsò, & induxit ad iurandum falsum, credit suam retractationem apud iudicem profuturam, ne reus condemnetur, tenetur dictum suum retractare: semper enim sub peccato mortali tenetur periculo in quod reum sua culpa coniecit, obuiare. Sic tenent citati tres Doctores cum aliis quos illi citant. Sed aduertunt, quod ut iste sic obligatus possit vitare periculum mortis sibi inferendæ à iudice propter testimonium falsum, quod confitetur coram iudice, poterit iste talis ponere se in loco tuto, verbi gratia, in monasterio, vel extra Regnum: & inde in scriptis mittere iudici retractationem iuramenti falsi taliter quod fidem faciat in iudicio, & sic satisfaciet suæ obligationi. Et quod hoc facere teneatur, constat, quia semper tenetur facere restitutionem eo modo quo potest.

6 *Tertia conclusio.* Si iste qui sic falsò iuravit, & induxit ad iurandum, credit suam retractationem profuturam, & se non potest ponere in loco tuto, neque extra Regnum, tenetur se præsentare iudici & coram illo suum testimoniū retractare, etiamsi sciat se esse carcerandum cum periculo propriæ vitæ. Hæc asseritur à tribus citatis Doctoribus, & est communis aliorum, maximè Caietani, Soti, Nauarri, & Petri de Nauarra, Cordub. Aragon, Ludouici Lopez, Toledo, & Rodrig. qui citantur ab illis tribus Authoribus. Si verò aliquis contra hanc communem opinionem obiiciat, illud commune dictum Doctorum, videlicet quod ego magis teneor defendere vitam meam propriam, quam vitam alterius: & sic iste sciens se ob suam retractationem esse morte plectendū, poterit potius vitæ propriæ consulere omittendo retractationem, quam illam facere pro conseruanda vita Rei: si, inquam, sic obii-

cias.

cias. Respondet Reginaldus loco citato, & alij, dictum illud commune Doctorum intelligendum esse, cæteris paribus, & quando vterque est in gradu æquali innocentia, tunc enim plus debeo mihi, quàm alteri succurrere. At quando vnus est innocens, & alter nocens, succurrendum est prius vitæ innocentis, & omittenda est vita nocentis. In hoc verò nostro casu ille, qui iurauit falsò, est nocens, vt clarè patet; & carceratus, contra quem iurauit, est innocens, vt suppono; ac proinde succurrendum est potius vitæ carcerati innocentis, quàm vitæ falsò iurantis, & nocentis. Aliud exemplum ponit Reginaldus citato loco, in aggressore, qui inuadit innocentem, vt illum occidat: in quo casu qui iniuste inuaditur, potest occidere aggressorem; non verò è contra, sed tenetur desistere ab aggressionem. Et ego persistens in eodem exemplo aggressoris, addo quod si quis in tali rixa de foris accurrat ad separandos rixantes, & non possit illos separare, plus debet iuuare innocentem inuasum, quàm nocentem inuadentem: quod clarè, & efficaciter applicari potest ad casum præsentem.

7 Contra hanc tamen veram doctrinam poterit aliquis adducere hæc tria exempla ad illius impugnationem. Primum sit. Is, qui commisit crimen dignum morte, vt hæresis, sodomia, & similia, non tenetur se ipsum accusare, nec de se ipso denunciare coram iudice, vel Inquisitoribus cum periculo vitæ, vel famæ, vt omnes Doctores dicunt, quia nemo tenetur esse executor contra se ipsum. Secundum exemplum sit: Is qui commisit delictum graue propter quod bona illius per leges ciuiles, & canonicas sunt adiudicata fisco, nõ tenetur sua bona per se ipsum deferre fisco, antequam iudex per sententiam particularẽ talia bona auferat ab eo, vt communis tenet opinio, idque ob eandem causam pro-

xiij

ximè allatam. Tertium exemplum esse potest in materia denunciationis : Iubet iudex Ecclesiasticus pœnâ excommunicationis, quod sciens de tali crimine vadat denunciare intra certum terminum : si ego scio de tali crimine, & nihilominus timeo moraliter quod ex tali mea denunciatione incurram periculum vitæ, vel alterius similis, non teneor denunciare cum tanto periculo: quod videtur posse ad casum nostrum applicari, vt dicamus non teneri hunc se retractare cum tanto periculo. Addi potest & hoc exemplū quod videtur vrgere. Nam in materia de restitutione, dicunt communiter Doctores, quod nemo tenetur restituere alienum cum periculo vitæ, & honoris: at in hoc casu, si iste iurans falsò restituat per retractationem, incurrit clarum periculum vitæ & honoris: ergo non tenetur se retractare.

8 His non obstantibus, ad primum exemplum dico, esse casum dissimilem: non enim datur præceptum naturale, quod obliget me, vt me accusem, cum periculo vitæ meæ, & ideo non teneor me ipsum accusare, vel præsentare iudici sub peccato mortali. At in nostro casu datur præceptum naturale, & diuinum non lædendi proximū, & reddendum illum illæsum à malo pendentī, cuius ego causa fui. Et ideo in hoc teneor me præsentare, non verò in illo. Ad secundum exemplum dico, quod bona damnāda ad fiscum non debentur fisco nisi post sententiam declaratoriam criminis, & ideo ante sententiā non obligatur delinquens ea deferre fisco. At delinquēs, de quo agimus, ex præcepto naturali diuino tenetur statim restituere huic reo damnū iam illatum, & proximè inferendum. Quod verò non possit nisi cum tanto suo periculo id facere, sibi imputet, qui suā culpā reum in tantum periculum coniecit. Ad tertium exemplum dico, casum esse dissimilem: nam in denunciatione

ciatione facienda cum periculo vitæ, concurrunt duo præcepta, vnũ positium Ecclesiæ iubentis denunciare: aliud naturale de vita propria, seu honore tuendo: & tunc præualeat præceptum naturale de vita conseruanda, propter quod præceptum fortius, omittitur præceptum positium Ecclesiæ iubentis denunciare, quod est præceptum minus. In nostro verò casu non concurrat aliquod præceptum positium, sed præceptum naturale non lædendi, ac restituendi, & succurrendi innocenti: & hinc patet solutio ad quartum exemplum, dicens, non teneri aliquem restituere alienũ cum periculo vitæ propriæ. Respondetur enim primò id intelligi de re, quæ iam est ablata: sed de re auferenda in posterum, teneor potius subire mortem, & infamiam, quam rem suam à proximo auferre. At in hoc casu adhuc de futuro pendet vita, & fama proximi, quam auferã nisi faciam retractationem, & proinde teneor illam facere. Respondetur secundò ex supradictis, quod licet præceptum naturale conseruandæ vitæ videatur me excusare à restitutione quam facere non possum sine tali periculo: at in nostro casu concurrunt duo præcepta naturalia, vnum seruandæ vitæ istius rei, qui est innocens; aliud seruandæ vitæ iurantis falsò qui est nocens: & præceptum primum seruandi vitam innocentis, est fortius, & præualere debet huic præcepto secundo minori de tuenda vita nocentis.

9 *Quarta conclusio.* Iste sic iurans, & inducens alios ad iurandum falsò, tenetur sub peccato mortale admonere illos, quos induxit ad sic iurandum vt retractent suum testimonium coram iudice, seruatis regulis suprà positis. Hanc tenet expresse Sayro *citato loco n. 9.* & ratio est clara, nam cum iste sic inducens causa fuerit vt illi illud damnum reo inferrent, tenetur tale damnum impedire dum

dum potest : at potest sic monendo : ergo ad hoc tenetur. Et addit Sayro, quod si isti sic inducti ad iurandum noluerint se retractare, tenetur ille qui induxit illos manifestare iudici, etiam cum mortis periculo. Dato verò quod nullus retractet suum testimonium, & reus condemnatus sit, omnes restituere tenentur in solidum, iuxta communem Doctorum sententiam.

10 Quæres ultimò : quid si isti sic iurantes habuerunt indicia vehementia de tali furto, quæ indicia facerent violentam præsumptionem : & illi persuasi ex tali vehementi, & violenta præsumptione se certò scire Petrum commisisse furtum, & sic iurantes crederent se non iurare falsum? Respondeo tunc illos non teneri vel ad retractionem, vel ad restitutionem. Nam qui aliquid scit ex violenta præsumptione, poterit iurare se id certò scire. Probo hoc, quia etiam in criminalibus potest iudex ferre sententiam condemnatoriam, præcedente solâ violentâ præsumptione, ut Doctores, & praxis observat, & clarè colligitur ex cap. *Afferto gladium*, cum rubrica ibidem de præsumptione. At iudex non potest ferre sententiam, nisi super re certa; & hoc verius erit, si cum ista violenta præsumptione iuncta fuit bona fides ipsius iurantis. Et hoc colligitur ex Reginaldo citato loco *num. 169.* & Sayro *num. 11.*

Si verò indicia quæ isti habuerunt de furto fuerunt leuia, & ordinaria,
habent locum omnia à nobis supradicta.

* * *

CASVS LXI.

De acceptione duorum officiorum incompatibilium.

Quidam Religiosus grauis in quadam Prouincia in Portugallia existens Diffinitor Prouinciæ, electus est in Prælatum generalem illius Religionis existentis in India : ad quam Indiam erat nauigaturus in proximo mense Martio sequenti. Acceptauit officium Prælati in Indiam, & virtute illius acceptionis exercuit aliquos actus iurisdictionis pertinentes ad illud officium. Et quando acceptauit prælaturam Indiæ protestatus est, quod si naues Indiæ illo anno non irent, vel post egressum à portu redirent, ille suum officium Diffinitoris in Prouincia non renunciabat, neque illud debebat deponere. Casu contigit, quod naues in illo anno in Indiam non irent.

Quæsitum est, an iste Religiosus in Regno manens per annum sequentem fungi posset officio Diffinitoris in Prouincia, retetâ prælaturâ Indiæ. An verò officium Diffinitoris vacauerit ipso facto vbi primùm acceptauit prælaturam Indiæ, quæ videtur incompatibilis cum tali officio Diffinitoris? Et ante omnia suppono quod in ista Religione datur statutum generale decernens, quod nullus Religiosus possit esse simul Prælatus localis, vt Prior, vel Guardianus, & simul Diffinitor.

1 Quod ergo prædictus pater per acceptionem prælaturæ Indiæ, non amiserit officium Diffinitoris, sed quod potuerit dictum officium Diffinitoris exercere tempore toto quo mansit in Regno ante exitum nauium ad Indiâ: videtur probari primò: Quia ille quan-
do

do acceptauit prælaturam Indiæ, protestatus est se non depositurum officium Diffinitoris donec naues cum effectu nauigarent non reuersuræ. At protestatio conseruat ius protestantis, vt habetur *in l. si debitor, §. 1. ff. quibus modis pignus, vel hypotheca solu.* Secundò, quia si contractui apponitur conditio licita, & conditio non ponitur in acta, talis cōtractus non obligat, sed rescinditur, vt praxis obseruat, & tradunt communiter Theologi, & Iuristæ. At quando iste Religiosus acceptauit prælaturam Indiæ apposuit conditionem, si naues exirent: & hæc conditio non est sortita effectū, quia naues non exierunt: ergo non amisit officium Diffinitoris. Tertiò, quia licet per adeptionem secundi beneficij amittatur primum beneficium *cap. de multa, de prabend. & dignit.* hoc intelligitur quando de secundo beneficio habetur pacifica possessio, vt Doctores explicant ad citatum capitulū. Secundò intelligitur quando primum, & secundum habent annexam curam animarum, vt clarè dicitur *in cit. cap. de multa:* at iste Religiosus nondum habebat pacificam possessionem prælaturæ in India cum naues non exierint: & præterea officium Diffinitoris non habet curam animarum, vt patet, sed respondet beneficio simplici. At beneficiū primum, si est simplex, non amittitur per adeptionem secundi beneficij curati, vt tenet expressè Panormit. *in cit. cap. de multa:* ergo officium Diffinitoris respōdens beneficio simplici, non vacauit in hoc Religioso per adeptionem secundi officij curati in India.

2 Hoc non obstante, ego censeo oppositum, vacasse scilicet officium Diffinitoris in hoc Religioso vbi primum acceptauit prælaturā Indiæ, & exercuit aliquem actum iurisdictionis circa prælaturam Indiæ. Moueor præcipuè ex statuto generali citato istius Religionis,

quod circa Diffinitores sic decernit; quando aliquis existens Prælatus localis promouendus, & subrogandus est in locum alicuius Diffinitoris defuncti, dicens quod subrogetur in locum Diffinitoris defuncti Guardianus Conuētus principalioris Prouinciæ: & ponit statutum hæc verba: *Subrogetur, dummodo Guardianatu se abdicet.* Si ergo statutum non permittit vt aliquis sit Diffinitor simul, & Guardianus in eadem Prouincia, quomodo permittet vt sit Diffinitor in Portugallia, & Prælatus generalis in India? Et non video quomodo ad hoc argumentum possit responderi saltem in ista Religione, in qua datur tale statutum. Secundò hoc etiam potest probari ex Concil. Trident. sess. 7. c. 4. de reform. vbi ponuntur hæc verba: *Quicumque de cetero plura curata, aut alias incompatibilia beneficia Ecclesiastica recipere, ac simul retinere præsumserit, beneficijs ipsis ipso iure priuatus existat.* Vbi noto, non loqui Concilium tantum de beneficijs duobus curatis, sed etiam de non curatis, si aliàs sunt incompatibilia, vt patet clarè ex verbis Concilij, vbi post illa verba, *Plura beneficia curata*, addit: *Aut alias incompatibilia.* At hæc duo officia Diffinitoris in Portugallia, & Prælati generalis in India, sunt clarè incompatibilia, cum vnum requirat residentiam in Portugallia, aliud requirat residentiam in India, ergo sunt incompatibilia. Hoc modo explicat Azor tom. 2. lib. 6. c. 10. §. *Ea igitur*, quomodo intelligatur duo beneficia esse incompatibilia: & dicit esse illa, quæ requirunt vt beneficiati ratione sui oneris, & muneris in suis Ecclesijs resideant: pro quo citat textus, & ponit exempla. Idem probatur ex cap. Gratia, de Rescript. in 6. vbi loquens Papa de impetrante duo beneficia, sic ait: *Verumque tamen (si talia sunt beneficia, quæ de iure nequeunt teneri) habere non potes, sed eligas ex eis, quod malueris tenere.*

nerē. Si verò quæras, quando intelligendum sit vacare primum beneficium? Respondet Azor *citat. lib. 6. c. 13. §. Si quæras ex Concilio Trident. sess. 14. c. 17.* quod ubi primum impetratur secundum beneficium, amittitur primum. Tertiò probatur ex eo quod tradit Nauar. *conf. 34. de præbend. primæ impressionis*, ubi refert DD. Cardinales mensæ Concilij Tridentini, Romæ declarasse, quod beneficiū simplex vacat per adeptionem Ecclesiæ Parochialis, & possessionem illius pacificam. Quartò probatur ex inconuenienti quod sequeretur dato opposito: si enim dicas, quod hoc officium Diffinitoris non vacat nisi postquam hic Religiosus pacificè in India suum officium possideat, vel quoad vsque cõstet naues egressas à portu non posse retrogradi; cùm hoc non possit constare nisi tempore longissimo, vt patet; inde sequeretur quod toto hoc tempore Prouincia posset, ac deberet carere Diffinitore, cuius officium per te non vacat, neque potest aliquis illi Diffinitori subrogari, cum per te non vacet, nec sit ab officio amotus, quod tamen est magnum inconueniens.

3 Contra hanc tamen resolutionem obiicitur efficaciter, quod Concil. Trident. *citato loco sess. 7. c. 4.* expressè prohibet quod non habeantur, seu impetrentur duo beneficia Ecclesiastica simul: at officium Prælatis regularis ordinarij non est beneficiū Ecclesiasticum, vt suprà iam patuit in alio casu istius libri. Cùm de ratione beneficij Ecclesiastici sit, vt sit perpetuum; & quod recipiat certos fructus ad sui sustentationem propter suum officium: quæ duo non cõpetunt Prælato regulari, siue Prouinciali, siue locali: cum ergo prælatura regularis non sit beneficium Ecclesiasticum, & multo minus sit beneficium Ecclesiasticum officium Diffinitoris, sequitur quod Concilium Tridentinum de illis non loquitur,

tur, cum solum loquatur clarè de duobus beneficiis Ecclesiasticis, qualia non sunt praelatura regularis, & Diffinitor, vt diximus. Et eodem modo videntur alij textus suprà citati vetantes retineri duo beneficia Ecclesiastica, quod scilicet intelligèdi sunt solum de duobus beneficiis Ecclesiasticis, quæ sunt verè beneficia Ecclesiastica: non verò sit extendenda hæc prohibitio ad officia regularium quæ non sunt beneficia Ecclesiastica: iuxta *regulam iuris in 6.* dicentem quod odia, id est, pœnæ, sunt restringenda.

4 Ad istius obiectionis responsionem præmitto, rem esse certissimã in iure, quod *vbi est eadem ratio, est etiam eadem iuris dispositio*, & quod de similibus seu æquipollentibus idem est iudicium. Habetur expressè cap. *inter cetera, de rescript. in fine*, vbi Papa postquam respondit ad aliquas interrogationes in materia odiosa, & pœnali, ponit hæc verba: *Et idem in similibus obseruandum est.* Ad quæ verba glossa dicit: *Nota quod de similibus simile debet esse iudicium.* Idem habetur in cap. *Dudum, de elect. il 2. post medium cum gloss. ibidem, verbo, Idem de personatibus.* Et c. 2. *de translat. Episcop.* vbi glossa citat alium textum. At eadè est omnino ratio, vt non debeant retineri duo beneficia curata, atque vt non debeant retineri duo officia non curata sed incompatibilia: ergo neque hæc possunt licitè simul retineri. Probo minorem ex illis quæ doctè tradit Reginaldus *tom. 2. lib. 3. n. 276.* cū aliis, videlicet, quod ex pluralitate beneficiorum resultant hæc inconuenientia. Primò, quod alij benemeriti relinquuntur absque beneficio, & vnus habeat plura beneficia. Secundò resultat quod habenti plura beneficia datur occasio ambitionis, & auaritiæ. Tertiò datur occasio & scandali, & indignationis in aliis qui relinquuntur. Et hæ tres causæ etiam reperiuntur, & mouent

in beneficiis, & officiis non curatis, vt constat: ergo & de illis idem erit iudicium atque de curatis. Nam iuxta l. ult. Cod. ad legem Falcid. similis æquitatis ratio similia iura suadere videtur. Idem habetur eodem cap. *Dudum*, il 2. de electione, vbi Papa in textu, licet dicat quod officium personatus non est beneficium curatum: declarat tamen, quod illud quod ibi decernit de beneficiis curatis, etiam intelligitur in personatibus. Et hinc patet responsio ad obiectionem, ductam ex Tridentino: dicendum est enim quod licet Concilium loquatur solum de beneficiis Ecclesiasticis, illa tamen dispositio debet extendi etiam ad officia Ecclesiastica, in quibus reperitur eadem omnino ratio.

5 Neque item obstat, quod aliqui dixerunt, videlicet officium Diffinitoris in vna Prouincia nõ esse incompatibile, sed compatibile cum officio Prælati generalis Indiæ. Dant duo exempla. Primum: quia potest vnus Religiosus Diffinitor in vna Prouincia eligi Visitator, & Cõmissarius in alia Prouincia. Secundum, quia potest Diffinitor vnus Prouinciæ eligi in Cõmissarium pro capitulo generali, & ire Romam ad capitulum generale, & sic erit simul Diffinitor, & Cõmissarius. Non obstant exempla. Non primum, quia Diffinitor vnus Prouinciæ vadens visitare, parum temporis insumit, & finitâ visitatione statim redit ad Prouinciã: Prælati vero iste Indiæ nec per quinque annos redire poterit. Idem dici potest ad secundum exemplum de Diffinitore, qui vadit ad capitulum generale loco Prouincialis, iste enim redit statim, nec potest facere tantam absentiam, quantam facere debet Prælati Indiæ. Et hæc conclusio magis clara, & confirmata manebit ex solutione argumentorum, quæ adducta sunt in oppositum.

Solutio argumentorum.

6 Ad primum argumentum pro parte contraria adductum, respondeo, quod licet hic Religiosus quando acceptauit prælaturam Indiæ, fecerit illam protestationem dictam in argumento, talis protestatio illi non suffragatur ad hoc, vt non amiserit officium Diffinitoris: fuit enim protestatio contra legem canonicam disponentem quod impetrato secundo beneficio vacet primum; & quod duo officia incompatibilia simul, non retineantur, quas leges suprâ citauimus. At nemo potest protestari contra legem: sicut nemo potest appellare à lege, vt dicitur in cap. *Quia nos, de appellat.* Sic etiam protestari contra legem non licet: id enim esset impedire legem quin operetur suum effectum, quod inferior facere non potest. Et hoc adeò verum, quod neque potest quis protestari contra consecutiuum legis. Sit exemplum: Ordinatur quis ad Ordines sacros: iste per consequentiam legis manet obligatus ad seruandam continentiam, etiamsi in receptione Ordinum, non admonetur de continentia: si quis ergo Ordines sacros recipiens protestetur se nolle seruare continentiam, numquid talis protestatio liberabit illum à seruanda continentia? Minimè profectò, quia protestatus est contra legem Ecclesiæ, & voluit quod lex Ecclesiæ non operetur suum effectum. Hoc exemplum in simili materia ponit Mascardus tom. 3. de probat. concl. 1243. num. 7. & 8. citans alios Doctores. Respondeo secundò ad idem primum argumentum cum Mascardo citatâ concl. n. 4. vbi ait, quod protestatio nihil operatur, si ab illa receditur per actum contrarium, quia facta derogant verbis: pro quo citat plures textus, & Doctores. At iste Religiosus postquam fecit dictam protestationem, fecit actum contrarium, per

per quem recessit à dicta protestatione: actus verò contrarius fuit incipere exercere officium prælaturæ Indiæ per aliquos actus iurisdictionis, quod est officium contrarium, & incompatible cum officio Diffinitoris, ut suprà ostendimus: & proinde per talem exercitationem officij recessit à protestatione prius facta.

7 Ad secundum argumentum dico, non valere exemplum adductum de conditione appositâ in contractu: nam Prælatus generalis Ordinis, qui istū Patrem creavit Prælatum generalem Indiæ, nullum cum ipso fecit contractum, sed absolutè illum elegit in Prælatum Indiæ sine vlla conditione appositâ. Secundò respondetur, quod licet acceptans prælaturam Indiæ exprimeret illam conditionem, de qua loquimur: adhuc illi non suffragaretur, quia apposuit conditionem contra legem Ecclesiæ prohibentis retineri duo beneficia incompatible: sed conditio posita contra legem nihil valet, quia talem conditionem apponens in substantia vult ut lex suum effectum non operetur. Quod idem constat ex illis quæ Doctores tradunt in materia de matrim. dum agunt de conditionibus appositis contra substantiam & leges matrimonij.

8 Ad tertium argumentum quoad primam partem, dico hunc Religiosum iam acquisivisse possessionem pacificam suæ prælaturæ Indiæ; iam enim exercuerat in Portugallia actus pertinentes ad suam iurisdictionem, ut dare licentias in Ordine ad Indiæ navigationem, dare absolutiones, & similia. Possessio autem officij acquiritur per vnum tantum actum iurisdictionis factum ab illo, qui habet officium, ut probat Sanchez lib. 8. de Matrim. disp. 28. à n. 8. ubi probat cum multis, & gravibus Doctoribus, quod si Princeps, vel superior committit alicui aliquam iurisdictionem ad aliquod

negotium;is cui committitur iurisdictione, per solam citationem partis coram se, acquirit possessionem dicti officij: iam enim res non est integra, sed iurisdictione est perpetua. Imò addit Sanchez *n. 10.* quod ad hanc iurisdictionem pacificè acquirendam sufficiet quod iste delegatus mandatum dederit, quod aliquis citaretur coram se, etiam si citatio non fuisset intimata homini citato. Probatur hoc insuper ex eo quod tradit Mascardus *tom. 1. de probat. concl. 83. num. 35.* vbi ait, quod vacat primum beneficium ex eo, quod Papa Romæ pro collatione secundi beneficij, dixit, *Fiat*: idque antequam Bulla conficiatur pro secundo beneficio: pro quo citat duos textus iuris canonici, & quatuor Doctores graues. At iste Religiosus acceptauit litteras suæ cõmissionis, & virtute illarum exercuit actus iurisdictionis. Ad secundam partem dicti tertij argumenti, in qua dicitur non vacare primum beneficium per acceptationem secundi beneficij, quando primum est beneficium simplex, secundum verò est curatum & quod officium Diffinitoris est beneficium simplex, & ideo non vacauit. Dico primò quod officium Diffinitoris non est purè beneficium simplex. Nam beneficium simplex nullam habet annexam iurisdictionem, vt patet. At officium Diffinitoris habet annexam aliquam iurisdictionem: fert enim sententias in rebus grauibus, etiam criminalibus, & ciuilibus in diffinitorio, ad quod requiritur iurisdictione. Secundò dico, quod licet officium Diffinitoris neque esset quidem beneficium simplex, cum tamen requirat specialem residentiam in sua Prouincia, & incompatibilem cum residentia Indiæ, hoc sufficiebat ad vacaturam dicti officij Diffinitoris, iuxta supradicta de duobus officiis incompatibilibus. Tertio dico, quod licet officium Diffinitoris respondeat benefi-

cio simplici : iam suprà diximus cum Nauarro, ex declaratione Cardinalium, beneficium simplex vacare per adeptionem secundi beneficij curati. Declaratio verò Cardinalium præponderat Authoritati Panormitani in oppositum adducti in tertio argumento.

9 Neque obstat quod addit Mascardus *tom. 1. concl. 183. n. 2. & 3. & alijs sequentibus*, dari scilicet decisionem Rotæ Romanæ per quam deciditur, quod beneficium primum non vacat nisi post adeptionem secundi beneficij habitam pacificè per annum : pro quo citat Felinum, cum quo consentit Reginaldus *tom. 2. lib. 30. tract. 3. n. 310*. Non obstat, primò, quia Decisio Rotæ non facit legem, sicut tradit idem Mascardus *tom. 1. concl. 484. n. 1.* ubi inter alia, dicit; *Decisiones Rotæ, licet sint probabiles, non tamè possunt adduci ad Decisiones causarum*. Secundò dico, quod talis Decisio Rotæ non concordat cum Concilio Tridentino *cit. sess. 7.* dicēte, quod beneficia incompatibilia ipso iure amittantur; amissio autem beneficij ipso iure non debet expectare annum, ut vult citata Decisio Rotæ. Tertio dico, quod ex illa opinione, non amitti scilicet primum beneficium nisi post annum, sequeretur magna læsio primæ Ecclesiæ vel secundæ: quia cum non dimitteretur primū beneficium, non posset beneficiarius commodè seruire in duabus Ecclesiis, & ideo vna, vel ambæ dispendium paterentur per annum, quod est contra mentem Ecclesiæ. Quartò dico, quod ista opinio, posse scilicet clericū per vnum annum retinere duo beneficia, maximè si fuerint pingua, non consonat cum lege Ecclesiæ, quæ tanto rigore prohibet pluralitatem beneficiorum. Et ideo talis Decisio Rotæ nullo modo nos cogit ad illius sequelā.

10 Quæris: an si iste Diffinitor, qui hoc anno à portu Olyssipponensi nō exiuit, renunciauerit officio Prælati

lati generalis in India, possit redire ad officium Diffinitoris quod antea habebat in Prouincia, & hoc sine noua electione, vel collatione dicti officij Diffinitoris? Respondeo negatiuè. Nam si in illo vacauit officium Diffinitoris per acceptationem prælaturæ Indiæ, & talis officij exercitium, vt suprà vidimus ex Tridentino, & aliis textibus; non potest per se redire ad antiquum officium dimissum sine noua collatione potentis illud conferre. At probatur primò ex praxi Ecclesiæ, quia postquàm Petrus, v.g. resignauit beneficium in Ioannem, si Ioannes moriatur, non potest Petrus suâ propriâ authoritate regredi ad antiquum beneficium renunciatum nisi per specialem Bullam Papæ, quæ solet aliquibus concedi, quando renunciant beneficium alteri, concedit illis aliquando, quod mortuo illo in quem renunciauerunt, possit renunciens regredi ad prius beneficium, quod vocant Renunciare cum regressu. de quo Azor *lib. 7. cap. 21. q. 2.* ex quo clarè patet non posse quem redire propriâ authoritate ad beneficium primum amissum, vel dimissum. Idem probatur ex cap. *Cum nostris, de concess. prebend.* vbi refertur quod quidam Episcopus antequam esset Episcopus, habebat in quadam Ecclesia quoddam beneficium, quod dicitur præpositura: quæ cùm vacasset per consecrationem ipsius in Episcopum, eoque non obstante ille prætenderet illam possidere simul cum Episcopatu, canonici illam eidem iterum donarunt per nouam electionem. Casus delatus est ad Papam, qui decreuit, neque sic potuisse Episcopum redire ad dictam præposituram, quæ vacauerat absque licentia Sedis Apostolicæ. Idem tenet gloss. in cap. *Gratia, de rescr. in 6. in verbo, Eligas*, vbi ait quod qui impetrauit secundum beneficium, potest eligere vnum ex illis, quod maluerit, illudque retinere,

sicut

sicut Papa ibi concedit: sed hoc debet esse re integrâ: id est antequam possessionem acquirat, & exerceat secundum beneficium. Facit ad idem intentum quod tradit Nauar. *ad c. Si quando, de rescr.* in Actuario, quod fecit ad dictum cap. n. 28. vbi ait, quod ille qui renunciauit alicui beneficio, non potest redire ad illud sine noua collatione superioris. Et in hoc nostro casu iste pater, de quo agimus, saltem facto contrario renunciauit officio Diffinitoris per acceptionem prælaturæ incompatibilis. Et citat ibi Nauar. *c. quam periculosum* 7. q. 1. Denique iuuat ad hoc quod dicit Azor *citato lib. 6. c. 13. q. 7. tom. 2.* videlicet, quod ante Concilium Tridentinum per citatum cap. *Gratia*, de rescr. & alios textus, assequenti duo beneficia incompatibilia dabatur optio vt vnum eligeret, & alterum dimitteret. At post Tridentinum (ait Azor) primum vacat statim vt quis secundi possessionem fuerit assecutus. Et in facti contingencia vidi ego Olysippone quemdam Religiosum, qui erat Prior localis cuiusdam Conuentus certæ Religionis, & simul erat Prælatus cuiusdam monasterij Monialium distantis per duas leucas, quæ duo officia non videbantur incompatibilia; & tamen Prælatus illius Religionis coëgit illum renūciare alteri illorum.

C A S V S L X I I.

An sanctus Ioseph fuerit viduus ante desponsationem cum Deipara Matre?

Quidam concionator prædicaturus in die SS. Apostolorum Philippi, & Iacobi, quæsiuit à me an posset in sermone dicere, quod S. Ioseph sponsus Deiparæ,

paræ, fuerit pater Apostoli Iacobi Minoris, & proinde verè fuerit duabus vicibus matrimonio copulatus, semel ante matrimonium cum Deipara matre, de quo primo matrimonio habuerit filium Iacobum Minorem Apostolum. Et ostendit mihi Surium, qui 3. tom. *prima die Maij in vita istius Apostoli Iacobi*, expresse dicit sanctum Ioseph sponsum Deiparæ fuisse patrem Iacobi Apostoli. Quod posset aliquo modo probari ex eo quod D. Paulus *ad Galat. 1.* vocat Iacobum Apostolum Minorem, fratrem Domini: quod posset vtcumque ad hoc intentum explicari, quia scilicet Ioseph erat pater naturalis Iacobi, & pater putatiuus Christi D. coram populo; & proinde cum Ioseph esset pater amborum modo proximè dicto, vocabant illum fratrem Christi D. Hæc verò, & similes quæstiones dependentes à sacra Scriptura, non sunt minus vtilis, & necessaria quàm aliæ quæstiones pertinentes ad casus morales conscientia, & proinde volui hanc quæstionem hic inferere, maximè in laudem tanti Patriarchæ sponsi Deiparæ; cui non parum laudis accrescet si constiterit illum fuisse virginem, & cum Virgine virginum desponsatum.

r Quod igitur sanctus Ioseph ante matrimonium cum Deipara contractum, fuerit alio matrimonio copulatus, tenuit non solum Metaphrastes apud Surium citato loco, sed quod maius est, tenuit id ipsum D. Epiphanius *hæresi 78.* dicens quod S. Ioseph ex prima uxore ante Deiparam habuit sex filios, quatuor masculos, & duas femellas. Idem de sex filiis sancti Ioseph tenuit Hippolytus Portuensis apud Nicephorum *lib. 2. c. 3.* & quod aliam conjugem habuerit ante Deiparam dixerunt Origenes, Eusebius, Gregor. Nyssenus, Chrysostomus, Hilarius, & Ambr. qui omnes propriis locis citantur

citantur à Baron. in Apparatu ad suos Annales cap. 46.
 2 Sed tamen hodie communis Catholicorum sententia defendit Beatissimum Iosephum neque filios habuisse, neque alteri feminæ nupsisse quàm Deipara, imò virginitatem semper per votum coluisse. Sic imprimis docuit D. Hieronymus *contra Heluidium prope finem*, sic dicens contra illum hæreticum: *Tu dicis Mariam virginem non permansisse: ego mihi plus vendico, etiam ipsum Ioseph virginem fuisse per Mariam, ut ex virginali coniugio filius nasceretur.* Et paucis interiectis ait: *Relinquitur eum virginem mansisse cum Maria, qui pater Domini meruit appellari.* Sic ille. Idem docuit August. *serm. 14. de Nativit. Domini*, sic dicens, & alloquens sanctum Ioseph: *Sit Maria sponsa Christi in carne sua virginitate servata; sis autem & tu pater Christi cura castitatis, & honorificentia virginitatis, &c.* Et paulò post sic ait, *Gaude itaque Ioseph, nimiumque congaude virginitati Mariae, qui solus meruisti virginalem affectum possidere coniugij, quia per meritum virginitatis ita separatus es à coniugio uxoris, ut pater dicaris Salvatoris.* Idem tenuerunt post Augustinum, & Hieronymum omnes subsequentes Patres, & Doctores, quos fusè citat Baronius *in loco citato Apparatus cap. 47. ad marginem*, inter quos citat Petrum Damianum Doctorem gravissimum, qui *epist. 11. ad Nicolaum Papam, cap. 4.* ait: *Ecclesie fidem in eo esse, ut non modò Deipara, sed etiam putativus pater, atque nutritivus virgo habeatur.* Ad quem locum Baronius affert hanc coniecturam, siue rationem. Nam si Christus in cruce moriturus matrem suam homini virgini commendavit, videlicet Apostolo Ioanni, de quo canit Ecclesia in suo die, quod Christus D. Matrem virginem virgini commendavit, idque cum iam Deipara esset prouectioris ætatis, quomodo idem Christus D. non traderet

traderet in matrimonium Matrem virginem, de qua nasciturus erat, homini etiam virgini, Iosepho videlicet? Hanc rationem siue coniecturam ampliat Cardinalis Toletus *super cap. 1. Luca Annot. 55.* sic dicens: Virgo commendata est Ioanni propter eius virginitatem: profectò non minus decebat Virginem virgini tradi in matrimonium, imò magis congruum id videbatur. Nam Ioanni data est in Matrem, qui titulus aufert omnem inhonestatis suspensionem. At Iosepho data in sponsam, qui titulus copulæ coniecturam admittit: maximè cum matrimonij tempore, Beata virgo fuerit adolescens, non autem tempore passionis: vt igitur castitas omnino comprobaretur, Virgini virgo tradenda erat. Sic Toletus citato loco, & ibi citat alios Doctores. Denique non fuerit inutile ad hoc intentum referre breuiter historiam relata à quodam Authore, qui scripsit librum de natiuitate Virginis, quam refert Barradas *in primo tomo Concordia lib. 6. cap. 7. §. Opera etiam pretium.* quæ historia sic habet. Pontifex denunciabat publicè, vt Virgines, quæ in templo educabantur, & ætatis tempus impleissent, domum reuerterentur, & nuptiis operam darent. Cui mandato cum cæteræ paruissent, sola Virgo hoc se facere non posse respondit: dicens se quidem, & parentes suos Domini seruitio mancipasse, & insuper se ipsam Domino virginitatem vouisse. Tunc Pontifex præcepit vt ad festiuitatem, quæ imminabat, omnes ex Hierosolymis, & vicinis locis primores adessent, quorum consilio sciri posset, quid de tam dubia re faciendum esset. Omnibus in commune placuit Dominum consulendum esse, & cunctis quidem orationi incumbentibus, Pontifex ad consulendum Deum de more accessit. Nec mora, cunctis audientibus de oraculo, & propitiatorij loco, vox facta

facta est; secundum Isaiaë vaticinium requirendum esse, cui illa Virgo disponfari, & commendari deberet. Secundum ergo vaticinium, cap. 11. *Egrediatur virga de radice Iesse, & flos de radice eius ascendet*; cunctos de domo, & familia Dauid nuptui habiles non coniugatos, virgas suas allaturos ad altare prædixit, & cuiuscunque virgula florem germinasset, & in eius cacumine spiritus Domini in specie columbæ consedisset, ipsum esse cui illa Virgo desponsari deberet. Erat autem Ioseph de familia Dauid grandæuus: cunctis verò virgas suas iuxta ordinem deferentibus, ipse solus suam subtraxit, unde cum nihil diuinæ voci consonum apparuisset, Pontifex iteratò Deum consulendum putauit: qui respondit solum illum ex iis, qui designati erant, virgam suam non attulisse, qui Virginem desponsare deberet. Proditus est itaque Ioseph: cum enim virgam suam attulisset, & in cacumine eius columba de cælo veniens consedisset, liquidò omnibus patuit ei Virginem desponsandam fore. Hactenus historia.

2 Quæ historia licet à Barradas citato loco dicatur quod non sit magni ponderis, hodie tamen tota illa descripta est recenter à Magistro Iosepho de Valduezo in suo libro de sancto Ioseph, metro Hispanico conscripta, prius in Castella, & postea in hac Olyssipone impresso, & satis approbato: prosequitur dictus Author hanc historiam citato libro, toto cantu quarto. Nec videtur aliquid inconueniens contineri in illa historia, si enim Num. 17. per simile miraculum solius virgæ Aaronis florescentis inter duodecim virgas principum Israël, quæ non floruerunt, voluit Deus declarare sanctitatem, & innocentiam Aaronis contra murmur de illo excitatum in populo: quid mirum si simili miraculo voluerit ostendere sanctitatem, & castitatem

Beatissimi Iosephi, qui erat futurus sponsus Deiparæ matris suæ? Et per hæc quidem satis probatum manet intentum, videlicet istum nullum matrimonium contraxisse ante matrimonium contractum cum Deipara, neque filios ullos habuisse, sed potius Virginem semper fuisse. Cuius ego Sancti laudes non prædico, sed id relinquo prædicatoribus pro die illius. Hoc tantum dico, quod Suar. tom. de Incarnatione, disp. 8. sect. 2. dicit, non esse temerarium, neque improbabile, imò potius pium esse, & probabile asserere quod gloriosus S. Ioseph excedit omnes alios Sanctos in gratia, & beatitudine, etiam Apostolos. Quamvis enim, inquit, aliquæ locutiones generales Doctorum videantur præferre Apostolos cæteris omnibus Sanctis, possunt intelligi quod faciunt comparationem regulariter cum aliis Sanctis, & non excludere speciale aliquod privilegiū. Præterea loqui videntur illi Doctores de Sanctis, qui fuerunt posteriores Apostolis; Sanctus verò Ioseph Apostolos antecessit. Denique asserit Suarez ex definitione Ecclesiæ, vel ex cultu Ecclesiæ non posse aliquid efficax adduci contra hanc considerationem: quamvis ipse consulat parcè in hoc loquendum esse, & non nimium hoc esse exaggerandum tanquam certum. Quia ubi, deest scripturæ authoritas, aut Ecclesiæ traditio, nulla potest esse sufficiens certitudo, præsertim in re, quæ pender ex diuina electione, & prædestinatione: cuius consilia sunt inscrutabilia, & mysteria abditissima.

3 Quod verò obiiciebatur in principio, ex 1. cap. ad Galatas, Iacobum Minorem dictum fuisse fratrem Domini, respondet D. Hieronym. apud Baronium citato Apparatu cap. 46. in hæc verba: *Nos autem fratres Domini, non filios Ioseph, sed consobrinos Saluatoris, Maria liberos intelligimus, Matertera Domini (id est tia de N. Senhora)*

Senhora) qua esse dicitur mater Iacobi Minoris, & Ioseph, & Iudæ, quos in alio loco Euangelij fratres Domini legimus appellatos: fraures autem consobrinos omnis Scriptura demonstrat. Sic Hieronym. in cap. 12. in fine. Eo modo quo Abraham Genes. 20. dixit Saram vxorem suam, esse sororem suam: id est, consobrinam, filiam Aram, qui erat frater Thare patris Abraham, & sic consobri-
ni dicebantur fratres. Qui plura videre voluerit de virginitate sanctissimi Ioseph, & de laudibus illius, adeat Canisium tom. de B. Virgine lib. 2. cap. 13. §. Vbi quæstio, vsque ad finem, vbi plura congerit.

CASVS LXIII.

An Beata Anna mater Deiparæ tres maritos habuerit?

Siquidem in laudē Beatissimi Ioseph pro vnico matrimonio illius, & virginitate eius casum apposuimus præcedentem à nobis quæsitum, non inutile iudicauimus præsentem etiam inferere in laudem Beatissimæ Annæ matris Deiparæ, an scilicet habuerit tres maritos? non parum enim hoc ad illius laudem conducit. Igitur multi Doctores non contemnendi, & libri aliqui etiam recentiores id passim inculcant, quos non sine tædio audio legi, & citari, in quibus dicitur Beatissimam Annam tres maritos successiuè habuisse, & ex singulis singulas filias habuisse, quas omnes vocauit Marias. Doctores istius opinionis recenset Barradas tom. 1. Concord. lib. 6. cap. 15. §. vulgata opinio, qui præcipuè sunt D. Antonin. Magister histor. Petrus à Natalib. Ludolphus de vita Christi, Echius Gerson, Petrus Sutor.

& Baptista Mantuanus. Ibidem affert rationes pro illa sententia, quæ vtplurimum fundantur in eo, quod in Euangelio Christus Dominus dicitur habere fratres, & Deipara mater dicitur habere sororem. Cui principali obiectioni responsum manet in fine præcedētis capituli, id est præcedentis casus, vbi diximus morem esse sacræ Scripturæ, vt cōsanguinei fratres, & sorores appellētur.

1 Ex Doctoribus verò citatis Echius tenet hanc opinionem de tribus matrimoniis B. Annæ sic veram esse, vt opposita sit error, & repugnet sacræ Scripturæ, Ecclesiæ, & Patribus. Probat illam Echius ex D. Ignatio in Epistola 1. ad Ioannem, vbi clarè dicit Mariam Salome esse filiam B. Annæ. Rationem efficacem pro hac sententia nō inuenio: vnā tamen qualemcunque ponit Adricomius in lib. descriptionis Terra sanctæ, anno mūdi 3945. videlicet, quia Deuteronom. 25. præcipiebat lex vt si aliquis frater sine filiis moreretur, frater residuus acciperet in vxorem illam quæ fuerat vxor prioris fratris, vt suscitaret semen fratris sui, & primogenitum ex ea filium appellaret nomine fratris defuncti, cūque D. Anna neque ex primo, neque ex secundo marito filium masculum susciperet, nupsit tertio.

2 In hac quæstione primò dicendum est, opinionem dicentem B. Annam non habuisse tres maritos, nullo modo esse temerariam, vel vllum continere errorem, neque repugnare Ecclesiæ. Probatur, quia Ecclesiā, neque in lectionibus Diuæ Annæ, neque alio in loco facit mentionem de tribus viris illius, neque de tribus filiabus illius. Quod item non aduersetur Scripturæ, patet, quia quidquid Scriptura allērit de fratribus Domini, & sororibus Deiparæ, verum esse poterit absque eo quod tres maritos, & tres filias habuerit, vt iā patuit ex casu præcedente. Ex Patribus verò antiquis nullus meminit

meminit horum trium maritorum, & trium filiarum. Et quod non habuerit tres viros, neque tres filias, testatur Baronius in dicto Apparatu ad Annales, c. 50. in fine, esse sententiam veterum, & recentiorum Catholicorum. Coniecturæ pro hac opinione non desunt. Prima sit, quod non fuerit consuetudo apud Iudæos idem nomen imponi duobus fratribus, vel sororibus: & proinde minus debuit idem nomen Mariæ imponi tribus sororibus. Secundò, quia videtur inconueniens, & signum alicuius incontinentiæ, quod Anna per annos viginti sterilis, & post impetratam talem filiam Deiparam, & longæuæ ætatis, nuberet post mortem Ioachim secundâ, & tertiâ vice. Quod comprobari videtur ex eo quod dicit Cedrenus apud Canisium lib. 1. de Beata Virgine, cap. 12. §. sed & Gregorio, ubi ait quod D. Anna vixit annos vndeoctoginta, id est 79. & Ioachim vixit annos 80. quomodo ergo D. Anna potuit post mortem Ioachim duos habere maritos? Adde quod teste Benedicto Pereira tom. 1. disputationum super Ioannem, disput. 3. proæmij, §. At enim, Beata Anna peperit Deiparam, cum esset Anna sexaginta annorum, & ait hoc esse probatum in antiquis, & probatis historiis. Quomodo ergo potuit post 60. annos duo inire matrimonia? maxime cum ipsæ leges ciuiles mulieri secundò nubenti non nimis faueant, cum in aliquibus regnis mulier secundò nubens, si erat tutrix filiorum, per secundas nuptias priuaretur dicta tutela filiorum orphanorum: non quod sit peccatum secundò nubere, sed quod supponitur non sollicitè curaturam de filiis prioris matrimonij. Ego hanc coniecturam, seu considerationem afferro, quam apud nullum inueni, quæ talis est: In libro Iudith c. 5. refertur, quod cum Iudith reuersa esset ex cæde Holofernis, cuius caput absciderat, populus ad illam accurrens,

rens, acclamauit in hunc modum: *Tu gloria Hierusalem, &c. Eo quod castitatem amaueris, & post virum cumque alterum nescieris, ideo & manus Domini confortauit te, &c.* Laudauit illam populus eo quod post virum suum primum, nescierit virum secundum, & erat Iudith iuuenis, & formosa. Cur ergo laus ista desit B. Annæ, Matri Deiparæ, vt non possimus illi dicere, eo quod post virum tuum Ioachim alterum nesciueris, si per te post Ioachim cognouit duos? Nūquid nobilior est Iudith, quàm Anna in Ecclesia Dei? Nam si Iudith abscidit caput Holofernis, D. Anna peperit illam quæ contriuit caput Diaboli, iuxta illud *Genes. 3. Ipsa conteret caput tuum*, quod de Deipara cōmuniter explicāt Doctores. Adhuc pro cōplemento videatur Lorinus *tom. super actus Apostol. Ad cap. primum, versu 14. §. utraque vera*, vbi quod B. Anna fuerit vniuiua, id est semel tantum nupta, probat ex Epiphanio, Damasceno, Hieronymo, & Ambrosio, Euthymio, & Theophylacto: qui rationē assignant, nam decebat B. Annam tantā prole, id est Deiparā, miraculosē obrentā contentam esse, vt legitur de feminis, quibus partus est diuinitus annunciatus in Scriptura: quales fuerunt Rebecca *Genes. 25. Sara Genes. 18. mater Sansonis, Iudic. 13. Et Elizabeth, mater Baptistæ, quæ secundas nuptias non contraxerunt.* Addit Lorinus quod secundæ nuptiæ, neque apud Iudæos, neque apud Gentiles laudabiles fuerunt, vt ipse refert se exposuisse in Historia Samaritanæ, imò potius laudari Iudith, & Annam prophetissam *Luc. 2. eo quod secundas nuptias non cognouerint.*

3 Videatur etiam Canisius *lib. 1. de B. Virgine cap. 4. paulò ante finem, §. Est autem*, vbi in substantia dicit, hoc multiplex Annæ coniugium vulgi opinione magis, quàm veterum autoritate niti, & quod recentiores

tantum

tantum habet suffragatores, qui Deiparæ Matrem non satis prudenter, ac solidè, tam malè castam proponunt. Sic Canisius expressis verbis ad nostrum intentum. Quod idem ibidem probat ex coniectura iam à nobis supra allata, quod parentes Deiparæ essent iam grandævæ ætatis, & quod id ordinatum fuerit à Deo pro maiori miraculo: & quod, teste Epiphaniio, Ioachim post ortum Deiparæ vixit annis duodecim: ac proinde incredibile sit Annam ferè decrepitam secundas, imò & tertias nuptias iniisse. Videatur etiam Suarez tom. 2. de Incarnat. disp. 5. sect. ... §. *Sed hac sententia.* Cum igitur hæc opinio de vnico B. Annæ Matrimonio tot ac tam grauibus, & recentioribus Doctoribus commendetur, ac tam claris coniecturis in æquitate fundatis fulciatur, & maximè cedat in laudem B. Annæ ad illius honestatem commendandam cum Iudith, Anna prophetissa, &c. Matronis legis veteris supra recensitis indignū prorsus iudico, quod eius multiplex matrimonium populo in sermonibus prædicetur.

4 Hinc patet quàm cauendum sit à prædicanda illa reuelatione, quam Pratum Spirituale Hispanâ linguâ scriptum, 2. part. lib. 6. cap. 4. §. *En tanto*, refert factam fuisse sorori Collectæ notabili Moniali & reformatrici Monialiū Capucinarum sanctæ Claræ. Ibi enim refert, quod cū dicta Collecta increparet Matrem suam, eo quod secunda vice matrimonium contraheret, vel contraxisset. Item quod eadem Collecta, parum deuota, & parum affecta esset erga Diuam Annam, eo quod tertio nupta fuisset, refert Author Prati spiritualis, quod cū dicta mater Collecta quadam nocte oraret, apparuit ei sanctissima Anna cum magno splendore, & portans secum omnem progeniem filiarum, & nepotum à se descendentium, inter quos prima

erat à dextris Deipara mater cum filio Christo D. Alia erat Maria Iacobi, quæ secum ducebat quatuor filios, Iacobum, Simonem, Iudam, & Ioseph iustum. Tertia erat Maria Salome cum duobus filiis Apostolis Ioanne Euangelista, & Iacobo Maiore. Et post hæc B. Annam conuersam ad sororem Collectam, illi dixisse: Quamuis ego ter nuptias contraxerim, tamen Ecclesia triumphans, & militans, sic illustrata fuit meis filiis, & nepotibus sicut vides. Hanc inquam historiam, seu reuelationem, ego populo non prædicarem: tum quia illa in libris nostræ Religionis non contineatur, cum in Chronicis Ordinibus 3. p. eiusdem Collectæ vita exactissimè referatur. Tum quia si verum est, quod suprà diximus ex tot Doctoribus, & claris coniecturis, hæc historia de triplici matrimonio B. Annæ falsa est, ut vidimus. Si autem falsa est, seruit ad intentum, id quod Iob cap. 13. dixit amicis suis: *Nunquid Deus indiget vestro mendacio?* Sic Anna Beatissima ad sui laudem non indiget nostro mendacio: sufficit illi quod sit mater matris Filij Dei.

§ Ad obiectionem positam num. 1. de lege ex *Deuter. 25.* obligante ut frater residuus suscitarret semen fratris sui defuncti sine filiis. Respondeo primo in loco citato Deuter. non dici, quod id fiat, si frater defunctus moriatur sine filiis masculis: sed solum dicitur, si absque liberis mortuus fuerit. Ille autem frater, qui tunc moreretur relinquens vnā tantum filiam, nam diceretur mori sine filiis, iam enim habebat filiam hæredem, cui bona sua relinqueret, & per quam genealogiam suam propagaret, qui videtur esse finis prædictæ legis Deuteronomij. Cum ergo iam Beata Anna, & Ioachim haberent filiam Deiparam, non est dictus Ioachim mori sine liberis, cum filiam hæredem

heredem bonorum relinqueret. Hac de causa Canisius citato lib. 1. de Beata Virgine cap. 4. paulò ante finem, dicit Beatam Annam nullo præcepto legis post mortem Ioachim obligatam fuisse ad repetendas secundas nuptias. Secundò respondetur, quod si vera esset expositio illius legis in argumento citata, quod scilicet vidua relicta cum vna filia, tenebatur contrahere cum fratre sui mariti, donec ex eo haberet filium masculum, sequeretur teneri talem viduam expectare tertium, quartum, & quintum matrimonium cum fratribus viri sui prioris, si tot fratres extarent, & sic Beatam Annam potuisset expectare quatuor matrimonia, donec filium masculum haberet: quod videtur nimium, & indecorum. Tertiò respondetur ad dictam legem Deuteronomij, quod illi tres viri, quibus Beata Anna dicitur nupsisse, non erant omnes fratres germani inter se vt propter citatam legem Deuteronomij tenerentur duo illorum ad contrahendum matrimonium cum Beata Anna. Nam tres mariti assignati Beatae Annæ fuerunt Ioachim, Cleophas, & Salome. At Cleophas non potuit esse frater germanus Ioachimi. Nā Cleophas erat frater germanus sancti Ioseph sponsi Deiparæ, teste Hegesippo apud Baronium in Apparatu citato cap. 50. non ergo potuit Cleophas esse maritus B. Annæ post mortem Ioachim, aliàs duo fratres contraherent matrimonium cum matre, & filia: Ioseph scilicet cum Deipara filia B. Annæ, & Cleophas frater Ioseph, cum eadem matre Deiparæ, quod non inuenio ab aliquo Doctore scriptum fuisse, scilicet Ioachim fratrem germanum Cleophas: inde enim sequeretur, quod iuxta Hegesippum, Ioachim esset etiā germanus Iosephi generi sui, cum Ioseph fuerit frater germanus Cleophas, iuxta Baronium citato loco sequutum Hegesippum.

CASVS LXIV.

*De professione Nouitiæ facta absque prævio
examine Episcopi.*

Concilium Tridentinum *sess. 25. c. 17. de Regul.* præcipit vt nulla Abbatissa, seu præfecta Monialium admittat vllam Nouitiam ad professionem, nisi prius monito Episcopo, qui iubeat fieri examen de libertate Nouitiæ. Quod si Abbatissa Episcopo non monito Nouitiam ad professionem admiserit, possit per Episcopum suspendi ab officio. Quo posito, quædam Abbatissa admisit ad professionem quamdam Nouitiam irrequisito Episcopo, & absque prædicto examine. Quæritur an prædicta professio facta contra decretum Tridentini, valida fuerit? Et quod fuerit professio nulla, videtur probari ex illa Regula *de reg. iuris in 6. dicente: Quæ contra ius fiunt, debent pro infectis haberi: & ex l. non dubium, cap. de legibus.* Hæc autem professio facta est contra ius Concilij Tridentini.

Ad hunc casum respondet Sanchez *lib. 5. Decalogi* prædictam professionem fuisse validam, non obstante prædicto decreto Tridentini. Vbi hanc solam rationem principalem assignat: quia licet Tridentinum prohibeat professionem fieri irrequisito Episcopo, non tamen ibi irritat professionem aliter factam, quidquid sit de peccato Abbatissæ. Eodem modo idem Sanchez *lib. 3. de matrim. disp. 5.* respondet ad similem objectionem, videlicet: iubet Concilium Trident. *sess. 24. cap. 10. de matrim.* vt matrimonium non celebretur à Parocho, nisi præmissis tribus denunciationibus publicis in Ecclesia: quo non obstante, tener Sanchez

cit.

cit. disput. 5. n. 3. quod si Parochus aliquos matrimonio iungat non præmissis tribus denunciationibus, matrimonium tamen erit validum, non obstante prædicto decreto Tridentini: quia, ut ait *in solutione ad 4. eiusdem disputationis*, textus citati, dicentes factum contra legem esse inualidum, sunt intelligendi quando lex statuit formam substantialem actus: secus quando ex ea colligitur solum præscribi modum ut rectè fiat. Nullam aliam ibi rationem assignat; quæ ratio, & illius Doctoris verba ampliolem postulant declarationem, pro hoc dubio quotidie contingente, an scilicet factum contra legem prohibentem sit validum. Urget enim nimis regula illa generalis iuris *in 6.* dicens, quod factum contra ius debet pro infecto haberi.

1 Et quamuis ego teneam cum Sanchez *citato loco Decalogi*, hanc professionem, de qua quæritur, fuisse validam propter illa, quæ infra clariùs dicam; necessarium duxi hîc amplius explicare citatam regulam iuris *in 6.* dicentem, inualidum esse quidquid sit contra ius: & hanc regulam concordare cum alia regula Iuristarum dicente, quod multa fieri prohibentur, quæ tamen facta valent. Quæ secunda regula colligitur clarè ex *cap. Dilectus il 2. de præb. & dignit.* ubi dicitur, quod licet Papa mandauerit dari certam præbendam uni, & Capitulum talem præbendam dedit alteri, valida fuit collatio capituli contra mandatum Papæ. Igitur pro concordia duarum prædictarum regularum, & ut intelligatur quando factum contra Tridentinum, vel aliam legem Ecclesiæ sit validum, vel nullum, ponno sequentes aduertentias.

2 Prima sit: quando, ut aliquis actus fiat, requiritur iurisdictio in agente, si talis iurisdictio desit in agente, actus est nullus. Exemplum sit: Præcipit Ecclesia

clesia vt nullus Confessor audiat confessiones sæcularium, nisi sit approbatus ab Episcopo : is qui sine tali approbatione confessiones audierit, dabit absolutiorem nullam, quia caret iurisdictione ad absoluendum. Item præcipit Papa vt à casibus Bullæ Ccenæ nemo absoluat : ille qui absoluerit ab illis sine speciali privilegio, faciet actum nullum, quia caret iurisdictione ad absoluendum. Idem dic de dispensante in aliquo, in quo non potest dispensare : dispensatio erit nulla etiam si faciat bona fide, & per ignorantiam inuincibilem, quia caret iurisdictione.

3 Secunda sit: Quando lex prohibet aliquem actum, addendo, quod *secus factum sit irritum, nullum, nullius valoris*, & sic de similibus verbis annullantibus, actus factus in oppositum est nullus. Et de hac nemo dubitat, nec dubitare potest. Superior enim si sit supremus Princeps, sicut potest legem condere, ita etiam potest pro suæ legis obseruatione contraria quæque annullare, vt omnes concedunt. Dixi, si legislator sit supremus Princeps : quia si v.g. aliqua Religio faceret statutum quod professio taliter facta sit nulla : & hæc eadem professio taliter facta, per legem communem Ecclesiæ sit valida, non poterit Religio facere tale statutum contra legem communem Ecclesiæ, quia Religio est legislator inferior, & subdita Ecclesiæ.

4 Tota dubitatio est, si lex Ecclesiæ non annullat expressè factum in oppositum, sed ponat verba rigorosa indicantia annulationem, vt si dicat : *Nullatenus, nullo modo fiat* ; non possit fieri, & sic de similibus verbis. Quæris, inquam, an per hæc verba indicantia nullitatem, intelligatur quod factum contra legem sit nullum? & quod attinet ad verbum *nullatenus fiat*, Sanchez lib. 6. de Matrim. disput. 3. 2. n. 7. citat multos Doctores dicen-

res quod quando lex prohibet, dicens, *nullatenus fiat*, factum in oppositum dici nullum, & *eodem lib. disput. 38. num. 2.* dicit, quod quando lex prohibet sub his verbis, *Non possit*, vult inducere nullitatem actus. Sed melius meo iudicio Suarez *tom. de legib. lib. 5. cap. 31. a num. 13.* dicit per hoc verbum legis, *Non possit*, non induci nullitatem actus contrarij: sed solum indicari, quod oppositum non possit licite, & recte fieri.

5 Tertia aduertentia: Quando lex præscribit formam seruandã in actu faciendo, & simul dat denuò potestatem faciendi actum, quæ potestas antea non dabatur, talis forma est de substantia actus, & proinde eius formæ ommissio reddit actum nullum: quando verò supponebatur iam potestas ad faciendum actum, & sola additur noua solemnitas, tunc forma præscripta est accidentalitatis, & eius ommissio non annullat. Sic Suarez *citat. c. 31. de legib. num. 9.* ubi ponit exempla, quæ apud ipsum videri possunt.

6 Quarta aduertentia. Si lex prohibeat actum simpliciter, nullum verbum adhibens quod sonet annulationem actus, vel irritationem illius, talis actus est validus, quamuis sic agens contra legem, graue peccatum committat. Hæc est communis Theologorum, & Iuristarum sententia: & sumitur ex *glossa vltima, in c. de desponsat. impuberum*, & probatur ex praxi: quando enim Summi Pontifices, maximè in motibus propriis, volunt irritare actum prohibitum, statim id verbis irritantibus, & annullantibus declarant: vt in particulari fecit Sixtus V. in suis Bullis contra professionem criminoforum & illegitimorum: & alij Pontifices in alijs Bullis. Quando verò talia verba non adhibent, signum est quod nolint irritare. Esset enim valde onerosum semper annullare omnes actus factos contra legem; & da-

retur

retur occasio magnæ confusionis, & inquietudinis, si crederemus annullari quemcunque actum factum contra legem, quando in illa non continentur verba clarè annullatiua actus.

7 Hinc in forma, responderetur clarè ad dubium de professione facta positum in principio: dico enim cum Sanchez *citato loco Decalogi*, dictâ professionem fuisse validam, non obstante prohibitione Concilij Tridentini: quod sic deduco ex positis suprâ aduertentiis. Nam prius Abbatisse non defuit iurisdicctio ad professionem admittendam, habebat enim illam ex officio. Secundò, Tridentinum licet mandet ne professio fiat, factam tamen non irritat, quod necessariò esset adhibendum pro tollenda confusione: sicut Tridentinum fecit, quando *cap. 15. eiusdem sessionis, de Regular.* prohibuit ne professio Nouitij fieret ante annum decimum sextum completum, & annum integrum nouitatus; addidit enim ibi sic: *Professio autem antea facta, sit nulla, nullamque inducat obligationem alicuius regula, vel Religionis, vel Ordinis obseruationem, &c.* Quæ verba non adhibuit paulò pòst in *cap. 17.* loquens de prius monendo Episcopo, & prohibens fieri professionem eo non admonito: quod signum clarum est noluisse Concilium in hoc secundo casu professionem annullare, sicut fecerat suprâ *cap. 15.* in casu ætatis anni 16. &c. Tertiò ibi Tridentinum *cap. 17* per illam prohibitionem, non assignauit Abbatisse formam substantialem seruandâ in actu professionis: hæc enim forma, & solemnitas antiqua est, & contenta in praxi, & in libris Ordinum. Solùm ergo fecit simplicem prohibitionem, ne professio fieret inconsulto Episcopo, vt actus rectè, & debitè fieret, id est, ne professio fieret per aliquem metum, ex quo posset annullari.

8 Volui adhuc pro maiori explicatione casus positi, & pro quiete aliquorum ponere hoc loco responsionem datam à Sanchez in casu ferè simili. Tradit ille in *lib. 3. de Matrim. disput. 32. num. 2.* quod, si Episcopus interdicat Parocho ordinario, ne ipse assistat alicui matrimonio, neque det licentiam alteri Sacerdoti ut alicui matrimonio assistat nisi sit approbatus per Episcopum; & nihilominus vel per se aliquos matrimonio iungat, vel hanc licentiam alteri Sacerdoti extra mentem Episcopi concedat: tenet Sanchez prædictum matrimonium tali prohibitione non obstante fore validum, si Episcopus in sua prohibitione, vel statutum synodale non apponant verba annullantia, & irritantia actum in contrarium factum: idque probat Sanchez ibidem quinque argumentis clavis, & efficacibus: quorum unum est sumptum ex doctrina Adriani ibi citati, & dicentis prohibitionem superioris, ne Religiosus audiat confessiones, arguere Religiosum peccare audiendo, non tamen absolutionem esse irritam, si de Episcopi licentia confessiones excipiat. Et citat ibi Henriquez idem dicentem in *primo tomo, lib. 6. cap. 6. num. 6.* & dictus Henriquez citato loco in margine, seu glossa littera *R.* multos Doctores ad hoc probandum adducit. Addit tamen prædictum

Religiosum peccare graviter eo quod

non obediat Prælato in

✓ materia gravi.

* * *

CASVS

CASVS LXV.

De quadam emphyteusi.

QUADAM mulier vidua habebat emphyteusim cum potestate nominandi pro tribus viris, & illa erat prima vita. Hæc habebat neptem quandam ex sua filia legitima; & relicta ista nepte nominavit ad successionem dictæ emphyteusis post mortem, quemdam suum consanguineum in gradu valde remoto transfuersali. In scriptura publica, quâ ipsum nominavit successorem emphyteusis, apposuit sequentes clausulas. Prima, quod illa nominans statim transferebat in ipsum nominatum omne ius, ac dominium utile, & possessionem, quam habebat in ipsa emphyteusi, cum clausula constituti: & quod illa maneret solum ut colona, & inquilina, ita ut illa maneret solum cum usufructu reddituum emphyteuseos. Secunda clausula fuit, quod illa talem in ipso nominationem faciebat pro argumento dotis, erat enim ille iam coniugatus, ante sex, vel septem annos, & erat diues. Tertia clausula fuit, quod illum sic nominabat in emphyteusi propter bona opera, & obsequia, quæ ab illo acceperat, & volebat gratificare. Et sic adhibuit alias solitas clausulas.

E contra verò ipse nominatus fecit viduæ quandam scripturam, per quam se obligavit dare nepti eiusdem viduæ mille quingentos ducatos pro illa maritanda, vel ut monasterium intraret. Item se obligabat dare singulis annis quinquaginta ducatos cuidam filia eiusdem viduæ, iam moniali per modum pensionis. Item ultra se obligabat soluere debita pecuniaria contracta per

per ipsam nominantem, si quæ manerent post mortem ipsius. Et præterea se obligauit ad soluendos fructus, & expensas faciendas in pompa funerali post mortem nominantis. In fine tamen addidit se ad illa omnia obligare sub conditione, si ipse post mortem ipsius nominantis maneret possessor pacificus in prædicta emphyteusi.

Post hæc omnia, & prædictis non obstantibus, prædicta vidua fecit aliam nominationem, per quam nominauit in dicta emphyteusi prædictam suam neptem filiam filiae suæ, dicens in Scriptura, quod reuocabat priorem nominationem factam in priori consanguineo, & quod nominabat prædictam neptem cum omnibus clausulis solitis apponi.

Queritur,

An potuerit hæc vidua in conscientia reuocare priorem nominationem factam in consanguineo cum supra dictis clausulis, & secundo loco nominare neptem? Et an secunda nominatio neptis fuerit valida in foro externo?

Et pro parte negatiua, quod non potuerit priorem nominationem reuocare, & ex consequenti, quod nominatio neptis fuerit inualida, videtur probari clare per legem istius Regni *lib. 4. Ordinat. tit. 37. §. 2.* ubi expressè deciditur, quod si habens emphyteusim cum potestate nominandi, nominauerit aliam personam post se successuram, & statim in personam sic nominatam transtulerit omne ius, ac dominium quod habebat in tali emphyteusi, reservato sibi tantum usufructu dictæ emphyteusis, iam non poterit vltra nominare alteram personam. Hoc verò in terminis contigit in hoc casu: nam hæc vidua in priori nominatione, quam fecit in

consanguineo, dixit se ex nunc transferre in illum omne ius, ac dominium, quod habebat in tali emphyteusi, sibi reseruato solo usufructu, ac proinde iam non potuit secundo loco neptem nominare. Secundò, quia in hoc casu interuenit contractus, quia consanguineus nominatus promisit, & obligauit se ad præstandam prædictam pecuniam nepti, ac filiae moniali prædictæ viduæ, & ipsa vidua id liberè acceptauit: ergo fuit verus contractus: contractus autem obligat contrahentes in lumine naturali.

Responsio.

His non obstantibus censeo prædictam viduam potuisse in vtroque foro reuocare priorè nominationem factam in consanguineo, & validè, ac licitè nominare neptem successuram in dicta emphyteusi. Antequam adducā argumenta ad hoc probandum, suppono quod hæc vidua habebat licentiam nominandi in emphyteusi vsque ad suam mortem quem voluisset: & hanc licentiam illi concessit dominus directus emphyteusis, hospitale scilicet Olyssipponense, idque sub forma præscripta à lege istius Regni, *cit. lib. 8. tit. 37.* vbi dicitur, quod habens licentiā nominandi in emphyteusi vsque ad mortem, poterit vnam, vel alteram nominationem facere, & quot voluerit vsque ad mortem: & quod per vltimam nominationem censebuntur reuocatæ omnes præteritæ nominationes. Ita vt nullum habeant vigorem. Et hæc vidua vltimo loco nominauit neptem, ac proinde per hanc vltimam nominationem neptis, manebit reuocata prior nominatio facta in consanguineo.

Primum igitur argumentum pro supradicta nostra conclusione sit: Quia lex istius Regni *cit. lib. 4. tit. 38. §. 2.* decernit, quod si emphyteuta, seu habens emphyteusim,

teusim, vendiderit, vel alienauerit rem emphyteuticam absque expressa licentia domini directi, talis venditio, & alienatio sit omnino irrita. At constat, quod prima nominatio viduæ facta in priori consanguineo, nō fuit libera nominatio, sed fuit in rigore venditio emphyteusis: ergo talis nominatio fuit omnino irrita per citatam legem. Probatur minor, quod scilicet fuerit venditio: nam definitio venditionis & emptionis tradita à Scoto, & ab omnibus Theologis recepta, teste Comitolio in *Resp. moral. lib. 3. q. 18. n. 11.* est hæc: *Emptio & venditio est commutatio rei utilis factio pretio.* Et in hoc casu seu priore nominatione, vidua dedit rem utilem, id est, emphyteusim factio pretio cū scriptura, per quam nominatus consanguineus promisit se daturum filiæ, & nepti viduæ prædictas pecunias, & soluturum debita, & cætera iam dicta. Et hoc pretiū promisit pro nominatione de se facta à vidua, si nominatio sortiretur effectum pacificum, quod est clara emptio, & venditio. Neque obstat dicere, non fuisse venditionem, quia res vendita, id est emphyteusis, nondum est plenè tradita consanguineo nominato viuenti viduæ, neque consanguineus nominatus adhuc soluit pecunias promissis nepti, aut filiæ moniali. Non inquam obstat, quia emptio, & venditio solo consensu emptoris, & venditoris perficitur, vt probat Rabello 2. p. lib. 9. de contract. q. 1. sect. 1. n. 3. dicens esse opinionē communem. Et idem tenet Bonacina tom. 2. tit. de contract. disp. 3. q. 2. puncto 1. n. 4. & alij. Et præterea vidua iam dederat nominato ius, & dominium quod habebat in emphyteusi, cum possessione, quæ omnia iam transtulerat in ipsum: & præterea ipse nominatus iam soluerat pro vidua aliqua debita pecuniaria: ac proinde iam interuenerat aliqua traditio rei venditæ ex parte viduæ, & aliqua solutio pretij pecu-

niatij ex parte consanguinei nominati. Et constat ex praxi quod multa validè venduntur facto pretio credità pecunià nondum solutà, sed in posterum soluendà.

Secundum argumentum, seu confirmatio prioris argumenti, sit, quod prior nominatio consanguinei non fuit pura nominatio, seu liberalis donatio, sed fuit contractus venditionis palliatus. Probatur ex illis quæ tradit Mascard. *tom. 1. de probat. concl. 44. n. 9.* vbi dicit satis probari contractum esse simulatum per argumentum sumptum à non verosimili: quia quod non est verisimile, quædam falsitatis species est. Pro quo citat Crauettam, Castr. & Baldum, Anchar. & Decium. At non est verisimile quod consanguineus primò nominatus in sua scriptura faceret donationem liberam pro tanta pecunia soluenda nepti, ac filia, & pro solutione debitorum, præcipuè cum ille non esset dominus alicuius tituli, vel nimis diues, nec nimis liberalis. Cum ergo ex parte ipsius nō præsumatur quod sua promissio pecuniarum fuerit liberalis donatio, nec remuneratio purè gratuita, præsumitur clarè quod sua promissio fuit emptio, quā voluit emere emphyteusim, & proinde talis emptio, & venditio fuit irrita per citatam legem istius Regni: & proinde talis prior nominatio fuit venditio simulata. Hoc ipsum confirmatur ex eo quod tradit idē Mascard. *eodem tom. 1. concl. 154. n. 32.* vbi dicit, quod non præsumitur quis facere donationē immoderatam, & *n. 13.* ad idem intentum citat multos *in eadem concl. 154.* Donatio verò quam iste Prior nominatus fecit viduæ pro nepte, & filia, & debitis soluendis, fuit donatio immoderata, attentà qualitate personæ ipsius nominati: ac proinde non fuit donatio liberalis, sed emptio emphyteusis, & solutio pretij pro tali emptione.

Tertium argumentum hinc potest elici: cum enim constet

constet ex præcedentibus quod in hoc casu interuenit vera emptio, & venditio emphyteusis, idque incio domino directo, ex alio capite fuit ista prima nominatio, seu venditio nulla, quia scilicet cum fuerit venditio emphyteusis, non est solutū laudemium domino directo, quæ est certa pensio soluenda domino directo quoties venditur emphyteusis. Et ob hanc causam dicit Iulius Clarus *lib. 4. §. Emphyteusis, & §. Arbitror*, quod licet emphyteuta habeat potestatem nominandi absque expressa licentia domini directi, nihilominus in aliquibus casibus tenetur petere licentiam nominandi à domino directo. Inter quos casus istum annumerat; videlicet, quod nulla subsit fraus. Nam si emphyteuta effectualiter venderet in fraudem ipsius domini, talis emphyteuta esset priuandus emphyteusi. Idem tenet Bonacina *tomo 2. tit. de contract. disput. 8. q. 8. puncto 2. num. 24.* citans alios, ac dicens non posse emphyteutam rem emphyteuticam, vel eius melioramenta alteri per venditionem tradere secundum ius vtile, absque consensu domini directi. Et addit quod aliàs emphyteuta incidet in commissum, iuxta legem vltimam, *C. de iure emphyt. & iuxta capitulum, Placuit, de locato*, & citat Syluest. Filliucium, & Mantiam. Idem tenet Camillus Borellus *tomo 2. tit. 33. de emphyt. num. 64.* vbi postquam dixit, quod emphyteuta potest nominare sine licentia domini directi, ponit aliquas limitationes sui dicti; quarum vna est hæc, dummodo sub specie donationis non fiat venditio, ad excludendum fortè ius prælationis domini competentis. Et ad hoc citat Iulium Clarum. Et in hoc nostro casu in prima nominatione consanguinei interuenit clara venditio, vt manet probatum in præcedentibus. Neque obstat responsio, quam auditur dari à parte contraria, dicentem hinc non interuenisse

emptionem, quia promissio pecuniarum facta à nominato, non fuit pretium adæquatum, & iustum pro emphyteusi, si enim hæc venderetur publicè, multo plus valeret. Non, inquam, obstat, quia non desinit esse venditio vera eo quod pro re vendita detur pretium inadæquatum. Nam multi homines vendunt vili pretio, & tamen verè vendunt. Et quando in hac venditione, emphyteusis venderetur infra mediū iusti pretij, etiam tunc vidua nominans, & vendens posset reuocare venditionem propter læsionem enormem, & alterum nominare. Denique in hoc casu constitit ex scriptura publici Notarij, quod vt prædicta vidua faceret priorem nominationem consanguinei, non est impetrata licentia à domino directo, videlicet hospitali, contra id quod statuit lex istius regni suprà citata, & docent Doctores suprà adducti.

Quartum argumentum est. Quia prior nominatus consanguineus post sui nominationem non obtinuit à domino directo confirmationē suæ nominationis: quæ confirmatio est omnino necessaria, sicut docet Camillus Borellus in titulo citato, *emphyteusis*, n. 6. pro quo citat Alexandrum, Aretinum, Beroum, & alios, qui dicunt, quod non impetratā istā confirmatione emphyteuta cadit à suo iure. Quod dictum specialiter locum habebit, quādo emphyteuta in nominatione faceret venditionem, sicut probauimus in hoc casu contigisse: nam concurrente ibi venditione obligatus erat admonere dominum directum, vt recuperaret laudemium sibi debitum ex venditione emphyteusis.

Quintum argumentum. Fuit præterea ista prior nominatio consanguinei nulla, quia vidua in scriptura dixit se nominare illum consanguineum propter bona opera, & beneficia sibi ab eo collata: & tamen nullum bonum

bonum opus ab eo collatū in speciali declarat. Constat autem quod quando aliquid alicui in testamento relinquitur propter bona opera, & beneficia ab eo accepta, imprimis debeat probari illa bona opera, quod sint paria rei donatæ. Sic tenet Mascard. *tom. 1. de probat. concl.* 186. n. 1. pro quo citat multos, & graues Doctores Iuristas, & in particulari citat Alexandrum dicentem donationem factam propter benemerita, nō valere si non sit facta ad numerum, & æqualitatem benemeritorum. Et in hoc casu non constat de aliquo bono opere notabili facto à nominato consanguineo in obsequium viduæ nominantis. Et ideo illa clausula à vidua nominante posita, quod nominaret illū propter bona opera ab illo recepta, fuit clausula palliata, & simulata. Sicut etiam videtur fuisse clausula simulata dicere viduam in sua scriptura, quod dicto consanguineo donabat illam emphyteusim, pro augmento dotis. Dos enim non assignatur nisi ad matrimonium contrahendum; & iste consanguineus iam multò antè erat matrimonio copulatus. Præterea dos non assignatur propriè viro nubenti, sed mulieri. Et denique prædictus consanguineus non erat pauper, sed diues sufficienter.

Sextò datur adhuc alia ratio ad probandum quod quando ista nominatio consanguinei non foret irrita, saltem fuit illicita in foro conscientię. Nam cum hæc vidua haberet neptem ex filia sua, nepte omisā nominauit consanguineum in gradu tam remoto, & transuersali. Tenebatur enim nominare neptem à se descendentem, non verò remotum consanguineum transuersalem. Probatur hoc ex eo, quod dicunt Doctores in materia emphyteusis, videlicet quod si licentia nominandi finita est in tertia vitā, descendentes ab vltimo emphyteuta proximiores habent ius vt obligent domi-

num directum, vt se descendentes admittat ad emphyteusim, & illam ipsis innouet pro tribus vitis. Et quod nolente directo domino ipsos descendentes admittere ad emphyteusim illā ipsis innouando, poterunt ab illo appellare. Sic expresse tenet Camillus Borellus *citato titulo, emphyteusis, num. 265.* vbi ponit hæc verba: *Finita emphyteusi, potest alius de familia reuocationem emphyteusis petere in suam personam: & dominus tenetur eam concedere, aliàs fieret sibi iniuria, & posset ad superiorem appellare;* & citat ad hoc multos, & graues Doctores. Et idem Borellus *infra n. 291.* sic ait: *Emphyteusi reuersa ob finitam generationem, si alteri velit dominus concedere, agnati illius preferendi erunt, qui primò illam ab Ecclesia obtinuerunt.* Idem tenet Rabello *lib. de oblig. iust. lib. 10. de emphyteusi, quest. 18. n. 26.* vbi dicit, quod finita emphyteusi tenetur dominus directus illam concedere descendentes; & quod eo nolente possunt descendentes recurrere ad publicam potestatem. Idem asserit idem Rabello *citata quest. num. 4. & seqq.* vbi citat Caldas, Decium, Tiraquelum, Iulium Clarum, Valascum, & alios, vbi sic ait: *Dominus directus tenetur ad nominationem faciendam ultimi possessoris defuncti illius, siue descendentes, (subaudi, & loco illorum proximioribus agnatis) siue emphyteusis sit secularis, siue Ecclesiastica.* Sic ille, & ibi cit. Caldas, ait Rabel. quod sic iudicatum fuit in supremo Tribunali Regio Olyssipponensi. Cùm enim quædam Ducissa Bargantiæ Elizabeth esset directa domina cuiusdam emphyteusis, & mortuus esset tertius emphyteuta tertie vitæ, reuertente emphyteusi ad ipsam Ducissam, eaque nolente amplius emphyteusim innouare; sed illam reseruante pro suis necessitatibus, descendentes ultimi possessoris litem mouerunt contra illam, & in prædicto supremo Tribunali lata est sententia contra Ducissam

cissam obligans illam vt dictam emphyteusim descendibus prædictis innouaret. Iuuat ad hoc præcipuè quod tradit Thomas Sanchez *in suo libro consiliorum. sive opuscul. moral.* vbi dicit, *lib. 4. c. 1. dub. 34.* quod si emphyteuta habens licentiam nominandi, non nominauit in vita, & mortuus est non nominando, censetur nominare hæredem, qui illi succedet in secunda vitâ: illóque mortuo transit ius nominandi in eius hæredes. Et citat Alexandrum, Pinellum, Panormitanum, & alios. Hæc autem vidua in prima nominatione omisit neprem descendentem à se in secundo gradu, & ideo iuxta citatos Doctores, vel inualidè fecit, vel saltem illicitè, & nota in particulari, quod dixit Rabello secundo loco citato, videlicet quod emphyteusis primò innouanda est in descendentibus defuncti, & istis deficientibus innouandi sunt agnati, id est, transuersales. Ex quibus omnibus Doctoribus constat quod descendentes à possessore emphyteusis habent ius vt sibi potius concedatur emphyteusis, quàm extraneis, seu transuersalibus.

Sed contra secundam nominationem factam in nepre, quod non valuerit, insurgit validum argumentum. Nam si constat ex supradictis, quod Prior nominatio consanguinei fuit in substantia venditio, amisit vidua ipso facto emphyteusim per legem Regni suprà citatam *lib. 4. Ordinationis, tit. 38. §. 2.* quæ disponit quod emphyteuta, qui vendiderit emphyteusim inconsulto domino directo, ipso facto amittat omne ius quod habebat in emphyteusi: si ergo vidua per primam nominationem, quæ fuit venditio, amisit omne ius quod habebat in emphyteusi, iam non potuit dictam emphyteusim secundâ vice donare nepti, illam nominando, quia nemo dat quod non habet: & præterea, quia

donatio facta à non habente potestatem, est nulla, vt omnes concedunt.

Ad hoc argumentum respondetur solutione clarâ, & efficaci, quæ talis est. Demus enim quod vidua per primam nominationem, quæ fuit venditio, incurrerit pœnam legis ipso facto, & amiserit ius quod habebat in emphyteusi, adhuc tamen dictam emphyteusim poterat donare nepri, quia contra prædictâ viduam nondam erat lata sententia declaratoria, per quam declararetur illam incurrisse pœnam legis, & amissionem emphyteusis. Est autem communis omnium sententia, quod licet quis committat crimen propter quod lex imponit certam pœnam ipso facto incurrendam (exceptâ excommunicatione) talis transgressor legis non se debet reputare tali pœnâ iam ligatum, donec speciali sententia declaretur à iudice, quod pœnam incurrerit. De hoc multa dicit, & multos Doctores citat Sanchez *lib. 2. Decalogi*, à *num. 6.* maximè *num. 20.* vbi ait, quod licet lex imponat pœnam ipso iure, seu ipso facto, addens *absque vlla declaratione*; adhuc ad incurrendam talem pœnam est necessaria sententia iudicis declaratoria, quâ declaretur non pœna, sed crimen ob quod imposita est talis pœna. Idem tenet Bonacina *tomo 2. tit. de constitut. disput. 3. q. 8. puncto ultimo, num. 2.* vbi citat alios. Et est pulchrum exemplum quod tradit Bonacina *tom. 1. tit. de irregularitate, disp. 7. q. 1. puncto 4. num. 9.* citans ad hoc Sanchez, & quamdam decisionem Rotæ, cum quibus ait Bonacina, quod Clericus beneficiarius, qui commisit homicidium, propter quod fit irregularis, & incurrit ipso facto priuationem beneficii, non perdit de facto beneficium, donec per sententiam declaratoriam iudicis declaretur priuatus. Imò addit Bonacina, quod prædictus Clericus sic irregularis,

laris, ante sententiam declaratoriam iudicis, potest validè resignare beneficium in fauorem alicuius. Idem colligitur ex Zerola 1. p. *praxis, verbo, Priuatio*, §. *Ad primum*. Imò addit idem Zerola *eadem prima parte, verbo Renunciatio*, §. *sextum accusatus*, quod Clericus accusatus iam de delicto, potest validè renunciare beneficium antequam conclusum sit in causa: & citat pro se Boërium. Dato igitur quod dicta vidua per priorem nominationem consanguinei, quæ fuit venditio, incurrerit pœnam amissionis emphyteusis, cum tamen de hoc nunquam fuerit accusata, neque contra illam lata fuerit sententia declaratoria, licitè, & validè potuit pœnitere, & facere secundam donationem, vel nominationem neptr̃s. Secundò respondetur ad hoc argumentum, quod vt emphyteuta incurrat in pœnam commissi, & amissionem emphyteusis propter venditionem illius absque licentia domini directi, requiritur traditio realis rei emphyteuticæ, sicut docet Mantica *de tacitis & ambiguis conuention. lib. 2 §. tit. 2. num. 11. & lib. 22. tit. 28.* dicens, quod non sufficit ad hoc traditio rei per clausulam constituti. Et in hoc casu quando vidua primò nominauit consanguineum, quando dixit se in illum transferre omne ius, &c. non interuenit realis traditio rei emphyteuticæ. Et ex consequenti non incurrit pœnam commissi, neque mansit inhabilis ad nominandum secundâ vice: maximè quando emphyteuta reuocat priorem nominationem, vt vidua fecit antequam condemnaretur. Fauet quod tradit Mascardus *tomo 2. de probat. conclus. 609. num. 50.* vbi citatis textibus iuris ciuilibus probat quod res vendita nondum tradita manet in bonis venditoris.

Ad primum argumentum initio positum quatenus citat legem Regni dicentem, non posse emphyteutam
secundo

secundo loco nominare postquam aliquem prius nominauit transferendo statim in illum omne ius, dominium, ac possessionem, quam habet in re emphyteutica, responderetur prædictam legem intelligi quando emphyteuta prius nominauit modo licito, non contrario ipsi legi. Hæc autem vidua in prima nominatione nominauit illicitè, nominauit enim vendendo, vt manet probatum in præcedentibus, quod contrariatur alteri legi Regni supra citatæ, & sic nominatio fuit nulla; & proinde potuit illa iterum nominare vsque ad mortem, iuxta aliam legem Regni citatam *lib. 4. Ordinatio. tit. 37.* Imò in conscientia tenebatur prædicta vidua reuocare primam nominationem, & secundò nominare neptem descendantem, quam tenebatur prius nominare; & illâ nepte extante non potuit nominare consanguineum remotum transuersalem, sicut manet probatum in superioribus. Iuxta illud commune dictum: *In malè promissis rescinde fidem.* Et hinc manet responsum ad secundum argumentum initio positum, quo dicebatur non posse vnum contrahentem recedere à contractu, altero inuito; dicendum est enim id verum esse quando contractus fuit licitus, & legibus conformis: quando verò contractus est illicitus, & legi contrarius (vt fuit prima nominatio, seu venditio) non solum potest alter contrahens recedere à contractu altero inuito, sed potius tenetur recedere, vt si v.g. contractus fuit usurarius, tenetur recedere à contractu. Et in hoc casu prima nominatio consanguinei facta cum illis conditionibus quod nominatus daret nepti, & filiæ tot pecunias: & quod solueret debita, &c. fuit clara venditio emphyteusis reprobata à lege, & proinde à tali contractu tenebatur vidua recedere etiam inuito prius nominato.

Restat

Restat respondere ad quandam clausulam, quam posuit vidua in sua prima nominatione, quæ fuit hæc: *Dato autem casu, quod ista mea nominatio non sortiatur effectum, illique ego contradixerim, obligo me ad soluendam talem pecunia summam ipsi nominato.* Quæritur enim, an dato quod nominatio non est sortita effectum culpâ ipsius viduæ reuocantis nominationem, teneatur prædicta vidua soluere nominato prædictam pecuniam, ad quam soluendâ se obligauit? Respondeo ad id viduam non teneri. Probo ex Sanch. *lib. 1. de Matrim. disp. 7. n. 17.* vbi citat textus, & Doctores dicentes, quod quando contractus principalis non valet, nec pœna illi adiecta valebit: accessorium enim sequitur naturâ principalis. In hoc autem casu contractus principalis, id est prima nominatio fuit nulla, eo quod interuenit venditio: ergo pœna illi adiecta, quæ dici potest pœna conuentionalis, cum sit accessoria contractus, erit etiam nulla, & proinde viduam nõ obligabit. Addo ex eodem Sanchez *ibidem n. 18.* quod quando lex contractui resistit, nulla oritur naturalis obligatio, pro quo multa citat Sanch. *cit. loco n. 16.* præcedente. Et vt ibidem probat, mulier præsumitur ignorare suũ ius, & iura sibi competentia. Probatur secundò, nam vidua obligauit se ad solutionem talis pecuniæ in pœnam culpæ, quam putabat se committere contraueniendo primæ nominationi. At constat quod in reuocatione primæ nominationis non commisit culpam, cum potius teneretur reuocare vt patet ex dictis, imò laudabiliter egit, cum neptem nominauit: ergo cum in hoc non interuenerit culpa, nõ incurrit pœnam: vbi enim culpa non est, pœna locum non habet, vt dicitur in Regula 23. *de reg. iuris in 6.* & Doctores iuris ciuilibis in alia regula simili, quæ dicit: rem quæ culpâ caret in damnum vocare non conue

conuenit:& cap. *Sicut dignum, de homicidio*, pro quo amplius videri potest Sanchez *lib. 1. de matrim. disp. 36. n. 4.* Tertio probatur, quia illa clausula apposita à vidua, fuit pœna conuentionalis, quæ solet apponi in contractibus, maximè in contractibus venditionis (qualis iste fuit) vel in contractibus mutui, in quibus emptor, seu mutuarius se obligant ad talem pœnam, si non soluerint in termino assignato. At constat, quod venditio est illicita, & iniusta, si illi fuit pœna conuentionalis adiecta in pœnā morosæ solutionis, talis pœna non obligat, vt pater: ergo idem omnino dicendū est in isto casu nominationis, vel venditionis illicitæ. Tertio probatur, quia maior est obligatio iuramenti, quàm simplicis contractus, per quem homo obligatur homini, per iuramentum verò obligatur Deo. At constat quod iuramentum factū de implendo contractu nullo, non obligat; vt si quis alteri iurauerit quod occidet Petrū; imò peccabit si impleat tale iuramentum: ergo pœna apposita cōtractui nullo minus obligabit. Et proinde pœna soluendi talem pecuniam nominato adiecta per hanc viduam si contradiceret priori nominationi, cum fuerit apposita contractui, seu nominationi illicitæ, illam minimè obligabit. Quarto probatur ex traditis à Rabello *tomo de obligat. inst. 2. p. lib. 9. tit. de usuris, q. 9. n. 4.* vbi loquens de pœna conuentionali solita poni in contractibus (qualis fuit ista) probat quod talis pœna non debetur, quando apponitur contractui, qui iuxta dictamen rectæ rationis nequit impleri, vel si contractus sit contra leges rationi naturali nitentes. Prima verò nominatio consanguinei fuit contractus venditionis factus contra legem Regni fundatam in ratione naturali, dictante quod dominus directus emphyteusis non fraudetur suo laudemio per venditionem occultam emphyteusis:

phyteusis : ergo pœna conuentionalis adiecta primæ nominationi illicitæ non obligabit viduā. Vltimò probatur, quia si hæc vidua quando primò nominauit, sciret talem nominationem taliter factam esse nullam, & contra legem, nullo modo talem pœnam conuentionalem apponeret, nec admitteret, vt patet: & proinde constat quod in tali pœna consensit ignorans : qui autem consentit ignorans, non verè consentit, vt probat glossa *in Clementina 1. de procuratoribus, in verbo, scienter*, adducens multos textus vtriusque iuris, quos ibi videre poteris. Et confirmatur, quia nemo per votum, iuramentum, vel promissionem obligatur ultra id ad quod non se obligaret, si aduerteret dum promisit, vt docet Innoc. Panorm. Hostiens. Sylu. Angelus, Armilla, & alij citati à Sanchez *lib. 4. Decalogi cap. 2. num. 6. & seqq.* sub censura Ecclesiæ, & Doctorem.

CASVS LXVI.

De quodam Parocho non comitante defunctos ad sepulchrum.

Quidam Parochus indignatus, quod multi ex suis Parochianis eligebant sepulturam in quodam Conuentu Ordinis Minorum, eo quod inde defraudabatur emolumentis funeralibus, imprimis ipse nolebat comitari defunctum quando deferabatur ad monasterij sepulturam. Deinde iussit sacristæ vt non pulsaret campanas Ecclesiæ, sicut fieri consuevit pro mortuis quando defunctus esset deferendus ad monasterium. De quo Parochiani valdè conuesti, & molestati sunt. Et proinde quæsitum est, an Parochus hoc licitè posset facere?

1 Respondi

1 Respondi hunc Parochum in multis peccasse, primò, quia ipse ex officio tenetur suum Parochianū comitari ad sepulturam, eidemque ibi dicere orationes consuetas dici ab Ecclesia tēpore quo corpus sepulturæ traditur: sicut enim Parochus tenetur viuenti Parochiano sacramenta ministrare, ita tenetur eidem Parochiano defuncto facere illa, quæ tota Ecclesia consuevit, quale est defunctum comitari ad sepulturam, ibidemque pro illo preces fundere. Quale etiam est laudabilis consuetudo Ecclesiæ, vt pro defuncto viro ter, & pro fœmina bis campanæ pulsantur: de qua pulsatione defunctus reportat commodum, quia fideles ad talem pulsationem pro defuncto preces ad Deum fundunt: ad hoc enim Ecclesia campanas pulsari instituit in morte fidelium, vt pro defuncto fiant orationes, teste Durando in *Rationali diuinorum officior. lib. 1. c. de campanis.*

2 Secundò: Parochus iste impedit priuilegia fratrum Minorum, quibus Innocentius I V. in *compendio Mendicantium, verbo Sepultura §. 1.* concessit vt in Ecclesiis illorum sit libera sepultura ita quod nullus valeat impedimentum præstare, quominus possint omnes volentes ibidem liberè sepeliri. At iste Parochus suo illo facto, & mandato impedit ne liberè homines eligant sepulturā in Ecclesiis Minorum: impedit, inquam, saltem indirectè, quia per duas illas molestias non associandi, & non pulsandi campanas retrahit homines ab eligenda sepultura in Ecclesiis Minorum. Nam impediens media ad finē, dicitur impedire talem finem: sicut è contrà, concedens aliquem finem, dicitur concedere omnia media, per quæ potest acquiri talis finis. de quo Nauar. in *dist. 5. de pœnit. in gloss. summa n. 28. & 29.* citans multos. Media autem ad finem sepulturæ, sunt associare defunctum, & pro illo campanas pulsare.

3 Terriò:

3 Tertiò : Parochus iste facit contra ius canonicum, de quo constat *in titulo de sepulturis*, quod electio sepulturæ est quid liberum, adeò vt filius pubes possit eligere sepulturam inuito patre, vt ex *cap. de uxore*, §. 2. *eodem titulo*. Item ex eodem *tit. de sepulturis*, *cap. Fraternitatem*, iuncta ibi glossa, verbo, *Ad noua, & minus religiosa loca*, constat quod eligere sepulturam in loco magis religioso, est laudabilius. At Ecclesia fratrum Minorum, & cæterorum Monasteriorum sunt loca magis religiosa cæteris paribus, quàm Ecclesiæ Clericorum: nam in Ecclesiis Religiosorum, deuotius, & frequentius fit officium diuinum in publico, & particulares orationes pro defunctis ex statuto Ordinis funduntur certis diebus, quod non sic fit vt plurimum in aliis Ecclesiis non regularibus: ergo cum laudabilius sit eligere sepulturam in loco magis religioso, non potest hic Parochus hoc impedire, sicut impedit suo facto, & mandato contrariis. Si verò obiicias, hoc non esse impedire directè, sed indirectè. Respondeo sufficere si impediatur indirectè. Nam quando lex aliquid prohibet ne fiat, non solum prohibet oppositum fieri directè, sed etiam indirectè, vt habetur in lege, *non dubium*, *Cod. de legibus*. Cum ergo iste Parochus saltem indirectè contradicat concessionem factæ Minoribus pro libera sepultura in illorum Ecclesiis, iuxta *citatum Compendium*, verbo, *Sepultura*, sequitur quod si monitus à conseruatore Ordinis non desistat, poterit ab eodem conseruatore declarati excommunicatus: iuxta concessionem Leonis X. factam Patribus Eremitis D. Augustini in *compendio Mendicantium*, verbo, *Privilegia*, §. 21. vbi dictus Leo sic illis concessit: *Quod saculares si contraire mari magno, vel cuiquam concessionum fratrum Eremitarum*

tarum D. Augustini temerè ausi fuerint, pro excommunicatis publicentur. Si autem Clerici fuerint præter censuram supradictam dignitatibus, & beneficijs priuati sint. Sic ibi. Quo priuilegio gaudent etiam fratres Minores, vt est notissimum.

4 Hoc idem probatur nouissimè ex quodam Quinternione declarationum DD. Cardinalium, qui missus fuit anno 1627. ad Nuncium Collectorem Hispaniæ pro omnibus Religionibus, & eidem D. Collectori iniunctum fuit à DD. Cardinalibus, vt in omnibus Regnis Hispaniæ publicaretur. In quo Quinternione impresso Madriti anno 1626. fol. 34. in fine, sic habetur: *Declarando, y mandando la dicha sacra Congregacion que los Parochos, y Clero secular en los entierros, y acompañamientos de los difuntos de los fieles, que se an de enterrar en las Iglesias de los Regulares, los lleuen hasta las puertas de las Iglesias de los dichos Regulares, &c.* Ecce quomodo Parocho imponitur obligatio associandi parochianum suum defunctum vsque ad portas Ecclesiæ Religiosorum, si apud ipsos elegit sepeliri.

5 Vltimò, occasione illius, quod suprà dixi hunc Parochum suo facto, & mandato impedire ne homines eligant sepulturam in loco magis religioso, & fraudulentur sua deuotione, potest applicari illud quod dicitur 1. Reg. cap. 2. de puero Sacerdotis, qui tempore sacrificij veniebat ad immolantes, & vi auferebat carnem crudam, non enim volebat carnem coctam defetere, ex quo immolantes indignabantur, subdit ibi textus in hunc modum: *Erat ergo peccatum puorum grande nimis coram Domino, quia retrahabant homines à sacrificio Domini.* Hoc idem suo modo de hoc Parocho dici potest, qui non associans defunctum suum

Parochia

Parochianum vsque ad sepulturam electam in Monasteriis, nec sinens pro tali defuncto campanas pulsari, retrahit homines ab eligenda sepultura in loco magis religioso.

C A S V S L X V I I .*De donatione facta à quodam Religioso.*

Quidam Religiosus grauis ratione cuiusdam officij habebat licentiam dicendi Missas pro sua intentione ; & expendendi pecuniariam eleemosynam ex illis collectam in vsus , & necessitates proprias, licitas , & honestas. Hic Religiosus sine expressa licentia Prælati promisit cuidam nepti suæ filiæ ex sorore quinquaginta ducatos in adiutorium dotis : paulò post mortuus est Religiosus & dicti quinquaginta ducati manserunt apud virum quemdam , qui Missas dicto Religioso commendabat. Illo mortuo , dicta neptis probauit coram Prælato suo Ecclesiastico sæculari dictum Religiosum sibi promisisse illos quinquaginta ducatos. Prælatus sæcularis visâ probatione promissionis, iussit illos tradi prædictæ nepti. Prælatus Religiosus dicti fratris defuncti occurrit impedire volens ne traderentur nepti, eo quod illa pecunia acquisita per Religiosum intra Religionem, & mortuum intra Monasterium, pertinerent ad Monasterium : nec proinde de illis potuisse Religiosum illum, vel prælatum sæcularem alter disponere.

I Quæsitum est, an dictus Religiosus potuerit nepti tantam pecuniam promittere, & proinde v

donare ? Et videtur quod poruerit. Nam cum Religio illi Religioso concessisset, vt pecuniam collectam ex eleemosynis Missarum insumeret in subleuandis suis necessitatibus licitis, & honestis: illa necessitas succurrendi nepti consanguinea, & pauperis, erat necessitas ipsius Religiosi propria, licita, & honesta: & proinde Religio quæ illi licentiã dederat expendendi illam pecuniam in necessitates proprias, tacite eadem concessit licentiã vt prædictam pecuniam posset expendere in necessitatem neptis, cuius necessitas erat etiam necessitas ipsius Religiosi. Nam taciti, & expressi idem est iudicium, vt habetur *in lege, de quibus, in fine, ff. de legibus, & l. cum quid, ff. si certum petatur*. Et latè Euerardus loco ab expresso ad tacitum.

2. Quod tamen illa pecunia pertineat ad Monasterium, non verò ad neptem constat clarè ex illo dicto communi, & regula dicente, quod quidquid acquirit Monachus, acquirit Monasterium, vt habetur *in cap. Multos, & cap. Cum olim, de priuileg.* & latè probat Nauar. *in tractat. de reddit. Ecclesiast. q. 3. & q. 1. monit. 7.* Hanc autem pecuniam acquisiuit Monachus, & intra Monasterium: ergo ad Monasterium pertinet. Quod aded verum est, vt bona quæ Religiosus apostata acquisiuit in apostasia extra Ordinem existens, si reuertitur ad Ordinem, pertineant etiam ad Religionem, vt latè, & efficaciter probat Rodrig. *tom. 1. qq. q. 30. art. 10.* ad quod ibi adducit priuilegium Leonis X. id concedentis Minorum Religioni. Strictissimè profecto in hac materia locuta sunt iura antiqua: duo tantum referam magis spectantia ad intentum. Primum est, capitulum, *Non dicatis* 12. q. 1. vbi postquam dixit Religiosum nihil debere sibi proprium vocare, subiungit de Religiosis sic loquens:

loquens : *Certum est eos nihil habere , possidere , dare , vel accipere debere sine superioris licentia.* Secundum capitulum iuris canonici est in cap. 2. de statu Monach. ubi ex Concilio Lateranen. sic dicitur de Religioso moriente cum aliqua pecunia : *Et qui in extremis cum peculio inuentus fuerit , & dignè non pœnituerit , nec oblatio pro eo fiat , nec inter fratres accipiat sepulturam.* At iste Religiosus donauit quinquaginta ducatos sine expressa licentia Prælati , de tali enim licentia expressa non constat ; de tacita statim dicemus : ergo talis Religiosus non potuit licitè tantam pecuniam promittere , nec donare. Et quod talem licentiam Prælati expressam ad sic donandum non habuerit , signum clarum est quod ipse Prælati Religionis eo mortuo impedire voluerit traditionem pecuniæ : hoc enim non faceret si sciret Religiosum habuisse licentiam expressam Prælati ad tam magnam donationem faciendam.

3. Secundò idem probatur , quia nec ipse Prælati illi dare poterat licentiam tam amplam donationem faciendi. Verum quidem est , posse Religiosum de licentia Prælati aliquid donare , attentâ qualitate personæ , regulâ , & statutis Religionis , quæ semper consideranda sunt in donationibus factis à Religiosis. At quod Religiosus possit donare quinquaginta ducatos , neque ego audiui , neque puto in aliqua Religione practicari. Nam etiam Princeps sæcularis tam amplam eleemosynam facere non solet priuatæ personæ. Benè potest hoc colligi ex Bulla D. Papæ Clementis VIII. quæ incipit , *Religiosæ Congregationes* , in qua strictissimè prohibebat Religiosis largitionem munerum erga sæculares. In qua ut donatio Religiosi etiam de rebus ordinariis licitè fieri posset , requirebat Pa-

pa non solum licentiam expressam Prælati, sed etiam consensum capituli Conventualis. Et quod attinet ad quantitatem rei donandæ, dicebat Papa debere esse tantum leuia, seu leuiora, quam quantitatem Sorbo Capucinus in expositione eiusdem Bullæ apud compendium Mendicantium satis rigorosè explicat in suo cõmentario prædictæ Bullæ §. *Tamen contrarium*. Quia tamen ego scrupulos nolo iniicere, scio Sanchez *lib. 7. Decalogi cap. 19. num. 12.* asserere quod prædicta Bulla Clementis VIII. de largitione munerum cum illis rigoribus non fuit recepta in Hispania. Hoc tamè non tollit quin standum sit iuri canonico suprà citato, & regulæ ac statutis cuiusque Religionis, quas puto non solere consentire, vt suus Religiosus donet quinquaginta ducatos vna vice, sicut si esset Princeps sæcularis.

4 Ad argumentum in contrarium adductum in principio, dico malè colligere quòd ex eo quod Religio assignet huic Religioso pecuniam collectam ex Missarum celebratione pro suis necessitatibus, videatur eidem Religioso concedere vt totam illam pecuniam donet consanguineo pauperi. Nam quando Religio concedit alicui Religioso peculium aliquod pro suis necessitatibus, intelligit pro necessitatibus personalibus, quales sunt vestitus, cibus, medicinæ, emere libros, & similia. Et ad has necessitates non pertinet maritare puellas, etiam consanguineas: quia hoc non est necessitas propria personalis. Confirmatur hoc ex eo quod tradit Sanchez *lib. 7. Decalogi cap. 22.* vbi concedit posse Religionem concedere alicui Religioso peculium aliquod ob iustam causam. Explicans verò quæ sit hæc iusta causa concedendi peculium alicui Religioso, ait esse, pro victu, & vestitu Religiosi, quando illi monasterium non suppeditat necessaria:

cessaria: vel ad emendos libros, quibus discat. Et non facit mentionem de subuentione donando consanguineis. Denique hoc ego confirmo ex illa regula iuris in 6. quæ dicit: *In concessione generali non veniunt ea quæ quis in speciali non esset concessurus.* Sic eodem modo nulla concessione generali, qua Religio concessam pecuniam huic Religioso, non venit illi ius donandi quinquaginta ducatos consanguineæ, quia iste casus in speciali non esset concedendus à dicto Prælato iuxta praxim Religionum. Ad id verò quod addit argumentum, eandem esse rationem taciti, & expressi, dico id posse explicari, quando constat quod concedens expressum, non denegaret tacitum: secus quando colligitur, & scitur quod concedens expressum, non concederet illud tacitum ad quod recipiens vult donationem extendere: iuxta regulam proximè expressam.

CASVS LXVIII.

De filiofamilias eligente sepulturam.

Quidam filiusfamilias quindecim annorum in infirmitate constitutus, ex qua obiit, dixit coram testibus velle se sepeliri in quodam Conuentu Ordinis Diui P. Francisci. Hoc ipsum voluit antea pater ipsius, qui fortè id filio persuasit, vt idem eligeret, ac diceret coram testibus. Mortuo filio Parochus voluit impedire sepulturam in Monasterio, allegans quod pater non haberet sepulturam propriam, nec auorum, neque filium potuisse eligere sepulturam,

& proinde sepeliendum esse in propria Parochia. Quo, non obstante pater prædictum filium sepeliri fecit, in eodem Conuentu D. Francisci; & Religiosi eiusdem Conuentus funus comitati sunt.

Quælitum est primò, an dictus pater potuerit filium sepelire in Conuentu prædicto contradicente Parcho. Secundò, an Religiosi, qui dictum funus comitati sunt, incurrerint aliquam censuram?

1 Respondeo primò, quod si iste filius non habebat 14. annos completos, poterat pater illum sepelire ubicumque voluisset. Sic colligitur ex *cap. de uxore*, §. *Viriam autem, de sepulturis*: vbi dicitur, quod pater poterit eligere sepulturam filiis minoribus, dummodo non extet consuetudo in contrarium. Idem tenet Hostiensis ad titulum citati proximi capituli *num. 5.* vbi ait, patrem posse eligere sepulturam filio impuberi, nisi vigeat contraria consuetudo: & in hoc Regno Portugallia non credo vigere contrariam consuetudinem. Idem tenet Rodriguez *Addit. ad sum. tom. 4. cap. 130. conclus. 11. citans Sylvest.*

2 Dico secundò. Si iste filius excedebat annum decimumquartum pubertatis, vt dicitur in informatione, ipse per se sine patre potuit eligere sepulturam, etiam inuito patre; cum enim iam haberet annos pubertatis, & liberum arbitrium, in his rebus animæ non pender à patria potestate. Sic tenet clarè Hostiensis *citato loco num. 5.* & Rodriguez *citato loco cum Sylvest.* cumque iste filius haberet quindecim annos ætatis, & dixerit se velle sepeliri in Conuentu D. Francisci, frustra, & sine causa id voluit Parochus impedire. Et aduerto quod si esset filia, & haberet duodecim annos ætatis completos, poterat eodem modo eligere sepulturam inuito patre: quia
pubertas

pubertas in feminis contingit anno duodecimo ætatis completo. Sicut enim in tali anno potest contrahere validum matrimonium, ita & potest eligere sepulturam.

3 Tota dubitatio est: si filius erat iam pubes excedens annum 14. sed non elegit sepulturam, & vivebat sub patria potestate; an possit tunc pater illi eligere sepulturam, & sepelire ubi voluerit? Hoc dubium apud nullum inueni sic in speciali resolutum. Sed dico affirmatiuè posse patrem illi eligere sepulturam. Probo primò, quia in citato capitulo *de uxore, de sepulturis*, dicit Papa, quod non existente consuetudine in contrarium, potest pater eligere sepulturam filiis minoribus. Hic autem filius, de quo agimus, quamuis sit iam pubes, adhuc verè est minor. Nam filius degens sub patria potestate usque ad annum vigesimum quintum, dicitur minor. Et quando lex non distinguit, neque nos debemus distinguere, ut tenent communiter Iuristæ. Papa verò citato capite sine distinctione dicit, posse patrem eligere sepulturam filiis minoribus. Secundò probo, quia iste filius licet sit pubes, adhuc tamen est sub patria potestate, & patri subiectus; ergo sicut pater ratione patriæ potestatis poterat, & potest eligere sepulturam filio impuberi: sic etiam ratione patriæ potestatis poterit eligere sepulturam filio puberi, quando talis filius illam non elegit: talis enim filius sepulturam non eligens clarè se remisit ad electionem, ac dispositionem patris. Tertiò hoc ego probo exemplo theologo, & in simili materia. Constat apud omnes Theologos in materia de voto: quod pater potest irritare quodcumque votum filij ante annum decimum quartum. Votum

verò personale filij factum post annum decimum quartum non potest pater irritare. Cum quo tamen stat quod si filius fecit votum personale ante annum decimum quartum, & tale votum non ratificauit post annum decimum quartum, poterit tunc pater tale votum irritare, quia tale votum factum ante pubertatem, & non ratificatum, adhuc subiicitur patriæ potestati, etiam si filius sit viginti annorum. Sic tenet Nauarrus in *sum. Latina*, cap. 12. num. 71. cum Caetano ibi citato, & Sà in *Aphorism. verbo*, *Voti irritatio*, num. 5. citans Valentiam, & Ludouicum de Beia. Ergo si pater ratione patriæ potestatis potest irritare votum Religionis factum à filio ante annos pubertatis, & non ratificatum post pubertatem: bene poterit eligere sepulturam filio 20. annorum, qui illam non elegit, neque ante, neque post pubertatem. Minus enim est eligere sepulturam filio, quàm votum illius irritare. Et confirmatur, quoniam pater potest irritare omnia vota realia filij facta post pubertatem, etiam si sint vota realia mixta, vt sunt peregrinationes, & similia, vt tenet Sanchez cum multis lib. 4. *Decalogi*, cap. 35. à num. 21. cum communi Doctorum. Vltimò probatur, quia pater licet non possit annullare matrimonium contractum à filio, potest tamen, & tenetur dirigere filium in matrimonio eligendo, consulendo ne tale matrimonium contrahat eo quod sibi non conueniat, & in hoc tenetur filius patri obedire sub mortali, vt tradit Bellarm. tom. 2. de *Sacram. lib. 1. de Matrim. cap. 19. §. Tertia propositio*. Si ergo pater potest dirigere animam filij puberis in eligendo matrimonio: bene etiam poterit dirigere corpus filij puberis mortui in eligenda illi sepultura. Quod verò in præcedentibus dictum

est de patre in eligenda sepultura pro filio: idem dicendum est de matre, quod possit eligere sepulturam eidem filio deficiente patre, currit enim utrobique eadem ratio ut videtur. Scio tamen, quod Rodriguez *citata concl.* 11. tenet quod mater, vel auus non possunt eligere sepulturam filio, vel nepoti: nisi ubi hoc fuerit positum in consuetudine. Et ideo ad illam remitto.

4 Ex dictis patet responsio ad primum quæsitum in principio. Et dico potuisse hunc patrem sepelire filium in dicto Monasterio duabus ex causis, prima quia filius pubes erat, & illam elegerat, & poterat eligere. Secunda, quia etiam pater eandem elegit, & poterat illam eligere filio puberi viuenti sub patria potestate, iuxta dicta toto num. 3.

5 Ad secundum quæsitum respondeo Prælatus conuentus, & Religiosos comitantes defunctum ad sepulturam nullam pœnam incurrisse, cum talis defunctus legitime elegerit sepulturam, iuxta probata in præcedentibus: & præterea quia prædicti Religiosi sepelientes illum, habent priuilegia, per quæ possunt sepelire illos, qui in suis Ecclesiis eligunt sepulturam.

CASVS LXIX.

*De quodam Nouitio mortuo extra Conuentum
in domo patris.*

Quidam Nouitius habens patrem suscepit habitum in quodam conuentu certæ Religionis; post duos menses Nouitius incidit in grauem morbum, propter quem delatus est in domum patris sui cum

cum habitu Nouitij, & licentia Prælati, vt commodius curaretur in domo paterna. Inualuit morbus, & mortuus est in domo patris, in qua fuerat per tres menses. Ante mortem sæpius dixit se nolle esse Religiosum, nec rediturum ad Ordinem, eo quod careret salute, & viribus ad seruiendum in Religione, & hoc asseruit verbo, & firmavit scripto. Mater istius Nouitij erat iam mortua ante ingressum illius in Ordinem, & ad illum pertinebat portio legitima hæreditatis maternæ. Eo sic mortuo in domo patris, voluit illum pater sepelire in suo sepulchro paterno. Prælatus Religionis & conuentus, in quo fuit Nouitius, impediuit ne sepeliretur extra suum conuentum, sed sepeliendum esse in suo conuentu, & sic obtinuit à iudice Ecclesiastico, qui iussit illum sepeliri in conuentu vbi fuerat Nouitius, non absolute, sed sub custodia, & quasi in deposito donec liti finis poneretur.

Quæsitum est primò, an prædictus Prælatus, & Conuentus habuerint ius ad sepeliendum in suo Conuentu, non obstante quod ipse iam verbo, & scripto dixisset se nolle esse Religiosum?

Secundò quæsitum fuit, an dictus Conuentus habeat aliquod ius ad hæreditatem illam maternam, quæ Nouitio competebat ratione matris defunctæ?

1. Ad primum quæsitum dico: si per testes constituit clarè, prædictum Nouitium verbo, & scripto dixisse se nolle esse Nouitium, nec reuersurum esse ad Religionem, nullum ius habent Prælatus, & Conuentus sepeliendi illum apud suum Conuentum. Probat, quia licet Prælatus, & Conuentus habeant ius, & consuetudinem sepeliendi apud se suos Nouitios, iste tamen de quo agimus, cum iam sæpius in morbo dixerit, & scripserit se nolle esse Religiosum, nec ad Ordinem

reuerſi: ipſo facto deſiit eſſe Nouitius, & proin-
rælatus Religionis amiſit ius circa illum, nec
inde habet ius ad illius ſepulturam.

Oſtendit aliquis reſpondere, & probare, quod ille
deſiit eſſe Nouitius etiam ſi in domo patris di-
cet ſe nolle eſſe Religioſum: quia (dices) id de-
bet dicere coram Prælato Religionis, qui habitum
dedit, & tenebatur coram eodem habitum Reli-
gionis deponere, ad eum modum, quo renunciatio
officij, vel beneficij non poteſt fieri niſi coram eo, &
in manu illius, qui beneficium dederat: aliàs renun-
ciatio facta extra illum, ſeu coram alio non valet:
extra *capitulum* Admonet, *de renunciatione*, & cap. *De-*
que 6. q. 3. & cap. *Abbas* 18. q. 2. Ad hanc obiectionem
dico, verum quidem eſſe iuxta citatos textus, re-
nunciationem debere fieri coram illo, qui benefi-
cium dederat; ſed illud debet intelligi ſolum de re-
nunciatione officij, vel beneficij, vt textus illi lo-
quuntur. At renunciare Nouitiatum non eſt renun-
ciare officium, vel beneficium: quia Nouitiatum ne-
que eſt officium, nec beneficium, vt conſtat: & proin-
de non eſt neceſſarium quod illius renunciatio fiat in
manu Prælati. Hoc probo exemplo clariffimo. Si
Nouitius tempore Nouitiatuſ clam fugiat à Conuen-
tu, etiam cum habitu Religionis, clarum eſt illum
deſinere eſſe Nouitium cum per talem fugam ſigni-
ficet ſe nolle eſſe Nouitium, etiamſi deferat ſecum
habitum Religionis, vt illum ſtatim foris deponat.
Nam Nouitius eſſe quis non poteſt inuoluntarius.
Ergo cum iſte Nouitius extra Conuentum poſitus,
verbo, & ſcripto declarauerit ſe nolle eſſe Nouitium,
& in hoc propoſito mortuus fuerit, non eſt cenſen-
dus Nouitius, etiamſi id non dixerit coram Prælato,
neque

neque illi habitum Religionis restituerit. Si autem iam Nouitius non erat, non habet ius Prælatus Religionis ad illum sepeliendum: sed poterat ipse eligere sepulturam cum esset quindecim annorum, vel saltem pater potuit illi sepulturam eligere, vt clarè constat ex casu 66. proximè præcedente.

2 Ad secundum quæsitum dico, prædictum Conuentum nullum ius habere in bona istius Nouitij ad illum spectantia ex hæreditate materna. Quod sic ostendo per partes. Primò, quia Monasterium non succedit in bona Nouitij nisi factà professione, sicut est notissimum in iure; & succedit per professionem dummodo ipse professus aliud non disposuerit per testamentum, &c. At iste Nouitius non fecit professionem, vt constat, neque item fecit testamentum, vt suppono. Imò etiam si faceret testamentum in Nouitiatu, tale testamentum non fuit validum, quia non est secuta professio, quæ est mors civilis requisita ad validitatem testamenti: ergo prædictum Monasterium non succedit in bona materna Nouitij, cum non succedat ex vi professionis, neque ex vi testamenti. Imò addo ex *cap. licet pater, de sepult. in 6.* quod filius non potest facere testamentum in morte de bonis suis nisi fuerint castrensia, vel quasi castrensia, absque licentia patris, sicut in citato capite exponit glossa in verbo, *Iudicare.* Probantur hæc dicta ex *cap. quia ingredientibus 19. q. 3.* vbi Papa Gregorius dicit, quod bona ingredientis Religionem, nisi professus de illis aliter disponat, pertinent ad Monasterium; vbi per verbum *Ingredientibus*, non intelligitur ingressus per Nouitiatum, sed ingressus per professionem. Quod clarè probatur ex ratione ibi tradita à Papa: quia inquit, isti sic ingredièti, gratia vltèrius nulla sit testandi, in

in quibus verbis clarè innuit se loqui de ingressu Ordinis per professionem, non verò de illis qui intrant per solum Nouitiatum: nam Nouitius potest testari liberè, non verò id potest professus. Et quia Nouitius nondum est filius Monasterij: Monasterium verò non succedit nisi ratione filiationis. Et quod ille textus, & similes allegati ad probandum, quod Monasterium acquirit hæreditatem ratione Religiosi, intelligantur ratione professi, non ratione Nouitij, tenet Azor *tom. 1. lib. 12. cap. 8. quas. 1.* & Sanchez *lib. 7. Decalog. cap. 12. num. 4.* pro quo ibidem citant alios textus, & Doctores. Cumque hic Nouitius non manserit in Ordine per annum, sequitur quod non potuit testari: nec proinde potuit Monasterium in bona illius succedere.

3 Quod verò iste Nouitius non fecerit Monasterio donationem talium bonorum ad se pertinentium, suppono non constare de tali donatione. Et addo quod iuxta Concilium Trident. *sess. 25. de regular. c. 16.* Nouitius non potest facere vllam donationem nisi intra duos menses proximos ante professionem, & cum licentia Episcopi: & donatio aliter facta non est valida. Quinimo addit ibi Concilium, quod licet Nouitius faciat aliquam donationem cum prædicta solemnitate, si tamen professio non sequatur, talis donatio sit irrita, & nulla. In hoc verò casu non est secuta professio, vt patet: ergo licet Nouitius fecisset Monasterio donationē talium bonorum, donatio non valuit, quia non est secuta professio. Neque obstat quod mortuus sit cum habitu Nouitij, quia iam ille talem habitum renunciauerat, dicendo se nolle esse Religiosum. Et præterea, quia moriens in Nouitiatu non moritur Religiosus, neque professus, quia habitus

non

non facit Monachum, sed professio, vt dicitur *in cap. porrectum, de regular.* neque item ex eo quod sepultus fuerit in Monasterio, dictum Monasterium acquisiuit vllum ius super bona illius: quia Ecclesia apud quam aliquis sepelitur, non acquirit ius super bona sepulti.

4 Confirmatur hoc etiam ex eo quod iste Nouitius carebat salute, & viribus naturalibus ad subeundam vitam monasticam necessariis: id enim bene confirmat quod ille ex corde, & animo fecit protestationem illam de non redeundo ad Religionem; & quod illam non fecit persuasus ab alio, sed obligatus ab ipsa necessitate. Imò stante hoc defectu sanitatis, & imbecillitatis, ipsa Religio non debebat, nec poterat illum admittere ad professionem: cum ex praxi omnium Religionum ante receptionem ad habitum fiat inquisitio exacta de sanitate & viribus Nouitij.

Vltimò declaratur, quod si pater istius Nouitij aliquid iam dederat Monasterio intuitu professionis, totum illud restituendum est patri iuxta expressum decretum Concilij Trident. *sess. 25. cap. 16. de regular.* vbi id præcipit sub anathemate.

CASVS LXX.

Dubia circa quoddam testamentum.

Quidam Canonicus cuiusdam Ecclesiæ Cathedralis morti proximus sic disposuit in suo testamento. *Nomino, & declaro, quod executores mei testamenti, seu testamentarij mei erunt, D. Canonicus Fullanus,*

Fullanus, & domina Fullana soror mea: quibus committo ut in recuperandis, dispensandis, & expendendis meis bonis ambo simul, & quisque illorum per se possint disponere quod libuerit: ad quod illis concedo omne ius, & facultatem, quam possum secundum iura. Item illos libero a faciendo inventario quovis ordine iustitia secularis, vel Ecclesiastica: neque ab aliquo officiali iustitia possint circa hanc libertatem molestari. Item volo quod dicti testamentarii non sint obligati reddere rationem huius testamenti in aliquo certo, & limitato tempore, propter difficultatem, quam scio futuram in rebus aliquibus recuperandis, & negotiis expediendis: & quoniam confido de illorum amicitia, fidelitate, & zelo quod illud exequentur maximâ brevitatem possibili. Et quod attinet ad personam, quæ mea bona hereditate acceptura est, declaro quod sit Fullana nephis mea filia sororis meæ: sed talia bona illi non tradentur nisi tempore matrimonij contrahendi: & interim prædicta bona possidebit dicta soror mea. Et ex redditibus congregatis fiet aliquod cambium, vel negotiatio licita, & resultans ex dicto cambio dabitur patri, & matri eiusdem nephis meæ, ad illorum commodiorem sustentationem. Quo posito.

I Quæritur primò, an supposito quod testator liberat testamentarios à conficiendo inventario bonorum, possint ad illud faciendum cogi, maximè cum hæres instituta sit secularis, & minoris ætatis: Et an debeant gaudere dilatione temporis concessi à testatore pro testamenti complemento: viso quod in illo continentur negotia difficilia, quæ non possunt expediri tempore à lege statuto: cum sint negotia aliqua tractanda cum personis in India viventibus?

Quæritur secundo, si dicta soror testatoris gaude-

re debeat his bonis, & fructibus illorum: an verò teneatur reddere rationem omnium bonorum stabilium, & etiam utensilium domus quando hæres nepotis matrimonio iungenda sit?

Tertiò quæritur; quomodo intelligenda sit illa clausula (de redditibus congregatis continentur enim in testamento aliquæ obligationes, quibus satisfacere necesse est: & videtur quod hæ obligationes testatoris præferendæ sunt omnibus alijs legatis: illisque satisfactis curandum sit de redditibus dandis ad cambium pro sustentatione parentum neptis testatoris?

Ultra hæc extra testamentum, præcepit testator canonico testamentario, & cuidam famulo, de quo confidebat, ut ubi primum testator animam exhalasset, mitteret sororem ipsius testatoris scriniolum quoddam clausum, in quo continebantur res parvæ notabiles: & sic factum est per canonicum testamentarium.

Quæritur circa hoc scriniolum an fuerit voluntas testatoris illud donare absolute dictæ sorori suæ in possessionem perpetuam: & non includatur in bonis quæ dictæ nepti reddi iubentur pro tempore matrimonij. Nam præterquam quod id colligitur ex diligentia particulari, quâ curavit illud scriniolum statim post mortem tradi sorori, constat, quod idem existens olim in alia ægritudine gravi, in domo eiusdem suæ sororis, misit ad se è longinquo trahi dictum scriniolum, & illud tradidit sorori suæ cum omnibus quæ habebat nunc tempore mortis suæ. Quamvis tunc cum primùm de priore infirmitate convalescit, dictum scriniolum reassumpserit: & declaratur, quod ambo valde adinvicem se amabant.

Respon

Responsio ad 1. quæsitum.

2 Primum quæsitum continet duo dubia. Primum est an iste testator potuerit liberare suos testamentarios à faciendi inuentario, ita ut illi omittentes dicti inuentarij confectionem nullam pœnā incurrerēt. Et videtur quod iste testator non potuit dictos testamentarios liberare à confectione dicti inuentarij, nā lex ciuilis, maximè in *Ordinat. istius Regni lib. 1. Ordinac. tit. 87. in multis. §. §. mādāt, vt mortuo testatore statim fiat inuētariu, in quo describitur omnia bona relicta à defūcto. nemo autē particularis potest dispensare in lege superioris, vt constat apud omnes. Et præterea Iulius Clarus lib. 1. §. 66. n. 3. in §. Testamentum, citans Socinum, dicit esse opinionem communem, quod testator non possit remittere ne à testamentarijs inuentariū conficiatur, quando manet aliquis usufructuarius. Constat verò quod in hoc testamento pater, & mater istius neptis manent usufructuarij istorum bonorum: vt clare constat ex vltimis verbis ipsius testatoris, in quibus iubet vt bona sua tradantur parentibus neptis quoad vsque nubat, ad commodiorem illorum sustentationem.*

3 Hoc non obstante, dico quod iste testator de iure communi potuit liberare testamentarios, & hæredes à confectione inuentarij. Sic tenet clarè Molina *tomo 1. de iust. tract. 2. disp. 359. §. Ego sub aliorum*: & in eodē *tomo disp. 223. §. Vtrum autem tutori*, amplius dicit, videlicet, quod testator potest remittere tutori ne faciat inuentarium de bonis pupilli, vel minoris. Pro quo citat legem vltimam §. *Illo Cod. Arbitrium tutel.* & hoc ipsū, quod possit testator remittere tutori cōfectionem inuētarij, tenet Iulius Clarus *citac. §. 66. n. 4.*

Idem tenet Riccius *tom. 2. Decision. collect. 21.* vbi citat Guidon. Papam idem allèrentem Et idem Molina priori loco proxime citato *§. Hinc melius*, citans Pinellam, & Molinam legistam *lib. 1. de primogeniis*, dicit esse opinionem communem, quod pater usufructuarius in bonis aduentitiis filij, non tenetur conficere inuentarium solemne. Hic autem pater, & mater relictæ sunt usufructuarij in his bonis relictis à testatore, quæ sunt bona aduentitia filiar, vt constat: & ideo non tenentur facere inuentarium, maxime cum testator ipsos ab illo faciendo liberauerit. Addit nihilominus citato loco Molina quod si filius institutus hæres, petat à iudice vt iubeat fieri inuentarium, poterit iudex cogere ad illud faciendum. Quamuis autem iudex ad id non obliget, tenebuntur parentes in memoriali scripto scribere, quæ & quanta sint illa omnia bona aduentitia filio relictæ, vt sciant quæ bona filio tradere debent tempore, quo matrimonium contraxerit, vel quando fuerit sui iuris effectus. Nec potest Iulius Clarus hoc negare: si enim ille *citato num. 4.* ait posse testatorem remittere tutori confECTIONEM inuentarij de bonis orphano relictis, à fortiori poterit testator remittere patri usufructuario relictæ in bonis aduentitiis filij ne teneatur conficere inuentarium: plus enim timeri potest in tutore quod defraudabit bona pupilli non faciens inuentarium, quàm tiendum sit in patre erga filium, qui naturali inclinatione thesaurizat filio.

4 Hinc manet clara solutio ad argumentum suprà positum *num. 2.* fundatum in lege iubente facere inuentarium: inter alias enim solutiones, responderetur, legem illam in hoc casu non habere locum, solum
enim

enim loquitur in casu, in quo relinquuntur orphani; & in hoc casu non relinquuntur orphani, Nam neptis hæres instituta habet patrem, & matrem, & proinde lex illa in hoc casu non obligat facere inuentariū. Ad-
do quod quando Iulius Clarus dicit non posse testa-
torem remittere vsufructuario confectionem inuen-
tarij, id poterit intelligi de vsufructuario ordinario,
qui non est pater, vel mater pro bonis aduentitijs fi-
lij. Non verò quando iste vsufructuarius fuerit pater
filij instituti hæredis: nā in tali casu iste pater de iu-
re communi habet vsufructum bonorum aduenti-
tiorū quæ relicta sunt filio, & est obligatio illa bona
tradi patri; quoadvsque filius sit sui iuris effectus.

3 Addit Molina, & Iulius citatis locis, quod si credi-
tores defuncti instēt & petant à iudice vt faciat inue-
ntarium, tenebitur illud facere, non obstante quod te-
stator remiserit confectionem inuentarij. Nam (in-
quiunt) non potest testator remittere confectionem
inuentarij cum damno, vel periculo priorum credito-
rum, qui habent ius ad aliqua bona testatoris. In hoc
autem casu non datur aliquod damnum, vel pericu-
lum creditorum, quia non constat quod testator de-
bitis grauatus esset. Dixi supra dicta esse de iure com-
muni, nam de iure particulari, poterit in aliquo re-
gno aliter disponi, vel in aliqua diocesi circa perso-
nas Ecclesiasticas: & proinde consulendæ sunt con-
stitutiones particulares cuiusque Archiepiscopatus.
Puto enim me audisse quod in Archiepiscopatu
Eborenſi est quædam constitutio decernens, quod
mortuo quocunque Clerico, fiat inuentarium om-
nium bonorum quæ reliquit. Tunc enim currit obli-
gatio illud faciendi. Si verò quæras an existente tali
lege Ecclesiastica in aliqua diocesi præcipiēte fieri in-

uentariū de bonis Clerici defuncti, & lex nihil nouū addat, sed solum præcipiat vt fiat tale inuentarium. Queris inquam vtrum in tali casu locum etiam habeat id quod suprà diximus, videlicet, quod poterit Clericus testator remittere suo testamentario consecrationem inuentarij? Credo quod etiam ibidem locum habebit, quia eadem ratio quoad hoc, videtur esse in lege seculari. Sed declaro quod si lex alicuius Ecclesiæ dicat, vt fiat inuentarium, etiam si testator remittat consecrationem illius, tunc ita faciendum est iuxta legis decretum. Hoc vnū scio quod in Archiepiscopatu Eborensi, tit. 20. §. *Quanto a os Clerigos*, vbi agitur de testamento quod possunt facere Clerici, & de quibus possint testari, non ibi præcipitur, nec exprimitur aliquid de faciendo inuentario de bonis Clerici defuncti.

6 Secundum dabium contentū in primo quæsito est, vtrum si hoc testamētū nō poterit plenē executioni mādari tēpore à iure assignato, videlicet intra vnū annū, idq; propter distātiā Indiarū, in quibus tractāda sunt negotia pertinentia ad executionē testamenti, incurrant aliquā pœnam illi ad quos pertinet executio testamēti? Ad quod respondeo nullā pœnā illos incururos, viso impedimēto tam lōgæ distātiæ. Probatur ex eo quod Doctores dicunt cōmuniter, videlicet quod legitimē impeditus nō incurrit pœnam legis, seu alio modo: quod legitimē impedito nō currit tēpus assignatum à lege. Sic decernitur in cap. *Quia diuersitate de concessione prabendæ*, & in l. 1. C. de annali except. & tradit in simili materia Sanch. lib. 1. de matrim. disp. 53. n. 7. citās alios Doctores. Et probatur etiā exēplo illius qui fuit citatus vt cōpareret coram iudice certa die, & non comparuit quia non potuit, si postea

postea comparens prober iustum impedimētum, propter quod non potuit comparere, auditur postea, & sua mora illi non nocet: sicut dicit Mascardus *tom. 1. de probat. concl. 293.* citans textus, & Doctores. Et faciunt etiā alij textus quos citat glossa *in cap. His quibus de elect. in verbo, Currit.* Adire verò Indias pro executione istius testamenti cum nauigatione difficili, & prolongata, est satis clarum impedimentum ut non currat tempus assignatum in lege pro completionē testamenti.

Responsio ad secundum quesitum.

7 Ad secundum quesitum, dico primò, quod iuxta dicta in responsione ad primum quesitum præcedens ex Molina, ista mater tenetur scribere in memoriali omnia bona immobilia, & mobilia, quæ possunt seruari, ut postea constet, quæ bona reliquerit testator tradenda hæredi. Dixi, bona immobilia, quæ possunt seruari; quia magnum est dubium de illis bonis mobilibus, quæ non possunt seruari, ut sunt vinum, triticum, & similia quæ diu seruari non possunt sine periculo corruptionis: An inquam ista bona vendi debeant, & illorum pretium seruandum sit hæredi pro tempore matrimonij? vel an pretium istarum rerum venditarū applicandum sit ad cābiū imperatum à testatore pro sustentatione commodiore parentum: Vel an possint parentes hoc vinū, triticū, & similia quæ seruari nō possunt, insamere in sua sustentatione? Et quidem securius erit ut tales res non seruabiles vendātur, & pretium illarū applicetur ad dictum cābiū, quia verba testatoris id sonare videtur. Hoc ramen non obstat, credo quod si pater, & mater

consumpserunt in sua sustentatione hæc mobilia, quæ seruari non possunt, non tenentur illarum pretium applicare ad cambium, vel seruare filiæ pro tempore matrimonij. Moueor, quia testator satis bene affectus erat ad parentes puellæ, & sciebat post suam mortem manere triticum, vinum, & similia, quæ vèdi possunt ea tamen non iussit vendi, quod est clarum signū voluisse testatorem prædictas res relinquere ad sustentationem parentum hæredis, cuius mater erat soror ipsius testatoris. Confirmo hoc, quia quando constat de animo alicuius nimis propitio, & beneuolo erga aliquem, satis potest præsumi de tali bene affecto, quod habuerit mentē donādi illud, de quo dubitatur. Cōstat verò, quod testator tam affectus erat ad parentes puellæ, vt iusserit creari cambium, seu censum ad illorum commodiorem sustentationem. Facit ad hoc quod tradit Nauarrus in *principio commentarij de spoliis Clericorum* §. 2. n. 5. citans Bartholum, & quendam textum, vbi sic ait Nauar. *Quod cum intercedit iusta causa credendi quod dominus alicuius rei velle debeat, vt illa utatur, vel capiat illam, eo quod sit amicus, aut cognatus, vel de ipso benemeritus, præsumitur in dubio illum sic velle.* Hic verò testator erat amicus, cognatus, & affinis parentum istius hæredis: ergo satis probabiliter credendum est illum voluisse, quod soror ipsius, & maritus illius consumerent in sua sustentatione res illas mobiles. quæ seruari non poterant. Vltimò probò, quia minus est concedere alicui vsum simplicē, & nudum alicuius rei per quem res consumitur, quàm concedere illi vsumfructum eiusdem rei, per quem res non consumitur, vt patet in seruo, & in fratre Minore, quibus conceditur vsus simplex, & nudus rerum, non tamen vsusfructus: at hic testator
concel

concessit parentibus puellæ vsumfructum suorum bonorum immobilium vsque ad tempus matrimonij : ergo probabiliter credendum est quod eisdem reliquerit vsum simplicem, & nudum tritici, & vini, quæ vsu consumuntur.

Responsio ad tertium quesitum.

8 Ad tertium quesitum dico, quod ante omnia ex omnibus bonis relictis à testatore soluenda sunt debita creditoribus, si quæ extant : & deinde sunt exequenda alia legata pia voluntaria. Hæc est communis opinio Doctorum : & probatur, quia soluere debita, est obligatio de iustitia, quæ obligat sub peccato mortali, vt constat. At imperare legata pia est quid voluntarium : & proinde debita contracta prius soluenda sunt quàm legata pia. Et sic expresse iubet constitutio Archiepiscopatus Eborensis *in titulo 20. supra citato, in fine* : vbi loquens de modo, & ordine, quo obligationes testamenti debent executioni mandari, ponit hæc verba: *Et mandamus quod debita, & solutiones seruitorum prius extrahantur à monte maiori, iuxta generalem consuetudinem istius Archiepiscopatus, & cat.* Potest ad hoc videri Valerus Cartuxanus in suo libro de differentiis vtriusque fori, *verbo hæreditas differ. 6. num. 2.* vbi agit quomodo exoneranda sit conscientia defuncti.

Responsio ad quartum quesitum.

9 Ad quartum quesitum dico, quod ista soror testatoris securâ conscientia poterit sibi retinere in perpetuum scriniolum paruum, quod sibi dari iussit frater suus testator, cum circumstantiis dictis *suprà*

in informatione : & quod prædicta soror sibi ita retinere potest scriniolum illud absque eo quod illud tradat hæredi instituta in tempore matrimonij , ex circumstantiis enim prædictis clarè colligitur quod Clericus testator illud dederit donatione liberali sorori suæ non verò nepti. Probo hoc primò , quia quando iste testator primà vice in priore morbo dedit hoc scriniolum sorori suæ, dedit illud ipsi sorori, ut sibi proprium retineret , & non dedit ut daret filix: ergo in secunda vice tempore mortis credendum est , quod illud illi dederit sicut dederat prima vice. Præsumitur enim quis manere in sua priori bona voluntate, donec illam clarè reuocet. Ad hoc videatur Sanchez *lib. 5. de matrim. disp. 13. n. 4.* ubi citat duas leges iuris civilis dicentes, quod mutatio animi non præsumitur in donante, nisi facto declaretur. In hoc verò casu secunda donatio scrinioli non fuit reuocatio prioris donationis, sed potius fuit confirmatio prioris donationis, in qua priori donatione dederat illud sorori , non verò nepti. Probo secundò ex eo quod dicitur *in cap. Imprimis 2. q. 1. & ibidem q. 7. cap. Non potest*, ubi dicitur, quod ex præterito possumus præsumere circa præsens, &c. At in donatione præterita priori , testator iste dedit scriniolum sorori suæ tantum, non verò nepti: ergo ex præterita illa donatione possumus, ac debemus colligere animum, quem habuit in præsentis secunda donatione fuisse donare sicut donauerat in præterita. Terriò probatur ex coniecturis illis, per quas Doctores probant aliquem fecisse alicui veram donationem. Has coniecturas affert Mascardus *tom. 1. de probation. concl. 554.* quæ sunt istæ. Prima , quod donatio præsumitur inter coniunctos, & consanguineos ratione conjunctionis, &

consan

consanguinitatis. Secunda, quod sola consanguinitas sufficit ad inducendam præsumptionem donationis. Tertia quod donatio præsumitur, quando quis diceret: concedo tibi hanc rem, nullâ causâ expressâ. Et idē Mascardus *oom. 3. concl. 1417.* tractans quæ coniecturæ dentur ad cognoscendam voluntatem donatoris, ait quod voluntas testatoris colligi potest ex personis quibus relinquitur. Secundò, quod maxime colligitur ex factis geminatis. Terriò, quod colligitur voluntas testatoris ex factis ante, vel post testamentum. Quæ tres coniecturæ concurrerunt in ista donatione. Nam persona, cui dedit testator, erat soror, & amica. Secundò, intercessit donatio scrinioli geminata. Terriò, testator post factum testamentum iussit ut ubi primùm spiritum Deo redderet, scriniolum deferretur ad sororem: quæ omnes coniecturæ sunt clara signa absolutæ donationis. Ultimò probatur hoc ex eo quod in responsione ad secundum quesitum prope finem attulimus ex Nauarro *in commentario de spoliis Clericorum*, videlicet quod quando sunt coniecturæ amicitiae, vel consanguinitatis, ex quibus colligitur, quod amicus, vel consanguineus velit, quod amicus, vel consanguineus rem suam capiat, vel illa utatur, debemus credere, quod talis amicus, cuius res illa est, velit ut talis amicus rem illam capiat, vel illa utatur. Et in hoc casu sunt multæ coniecturæ suprâ citatæ, ob quas clarè credere possumus quod testator voluit ut sua soror, & valde amica sibi dictum scriniolum retineret sine obligatione dandi illud filiae.

CASVS LXXI.

De collatione sacrorum Ordinum sede vacante.

DE hoc fui interrogatus in quadam sede vacante Cathedralis Olysiptonenſis. Dubitatum fuit, vtrum capitulum ſede vacante poſſit dare licentiam cuidam Epifcopo titulari, vel etiam Epifcopo Aduenæ ibi hoſpitanti, vt conferant Ordines ſacros etiam extra tempora alicui Religioſo habenti aliàs priuilegium recipiendi Ordines ſacros vbicunque, etiam extra tempora, vt habent aliquæ Religiones? Et videtur quod id non poſſit facere capitulum ſede vacante. Nam in Concilio Tridentino *ſeſſ. 7. cap. 10.* circa hanc materiam ſic decretum eſt: *Non liceat capitulis Eccleſiarum ſede vacante infra annum à die vacationis, ordinandi licentiam aut litteras diſmiſſorias, ſeu reuerendas, vt aliqui vocant, & cat. concedere. Si ſecus fiat, capitulum contraueniens Eccleſiaſtico ſubiaceat interdicto.*

Quæ 7. Tridentini, ibi, *Licentiam ordinandi.* ſententur loqui de licentia ordinandi actiue, id eſt, non poſſit ullus Epifcopus ſede vacante aliquem Ordinem ſacrum conferre, niſi modo ibi præſcripto, articulo videlicet ratione beneficii. Secundò probatur, quia illud decretum eſt lex generalis, & generaliter eſt ſententia, & generaliter prohibet ordinari in ſede vacante, niſi arctatum ad recipiendum Ordines ratione beneficii, at Religioſus non arctatur ad recipiendos Ordines ratione beneficii, vt patet:

tet:ergo cū lex generaliter loquens generaliter sit intelligenda,per citata à Nauarro *cōsilio 2.de foro competente num.1.* & cū nos distinguere non possimus quando lex non distinguit l. *Non distinguemus ff. de recept. qui arbit.* Sequitur quod non possit capitulum sede vacante dare hanc licentiam vt Ordines possint recipere Religiosi. Exceptio enim illa de ordinandis solis arētatis ratione beneficij,firmat regulam,& alios omnes excludit.

1 Hoc non obstante,credo quod potest capitulum sede vacante dare licentiam Episcopo titulari , vel alteri Episcopo hospiti vt intra annum vacationis sedis , possit Ordines sacros conferre Religioso habenti licentiam sui prælati Regularis. Ante probationem suppono citatum locum Tridentini,contingere tria: videlicet,ne dictum capitulum det licentiam ordinandi dimissorias, seu Reuerendas.Et hæc tria significant vnā tantum rem, videlicet dare Dimissorias scriptas ad Ordines sacros recipiendos.Sic intelligit Azor *tomo 2.lib.3.cap.38.9.10.* & Zerola *1.p.praxis Episcop.verbo Capitulum n.1.* Henriquez *tomo 2.lib.10.cap.22.num.3.* vbi hi Doctores citantes dictum locum Tridentini, solum dicunt, quod capitulum sede vacante non potest dare litteras dimissorias ad Ordines recipiendos.

2 Hoc posito probatur conclusio,quod possit capitulum sede vacante dare licentiam cuius Episcopo in illa vrbe,vel diœcesi existenti , vt conferat Ordines sacros Religioso habenti priuilegium recipiendi Ordines extra tempora , & licentiam prælati regularis intra annum sedis vacantis.Probatur inquam primò , quia quando duæ res ita sunt distinctæ,vt vnā possit fieri sine alia;prohibitâ vnâ,non censetur prohibe

hiberi alia, vt facile erit exemplis declarare sed dare licentiam vt Episcopus titularis vel Episcopus hospes conferat Ordines in vna diœcesi, est res diuersa ab hac, quæ est dare Dimissorias ad Ordines, & illa prima sine hac secunda fieri potest: & hæc secunda sine illa prima etiam potest fieri, vt constat: ergo prohibito per Concilium ne dentur dimissoriæ intra annum vacationis, non prohibetur quin possit capitulum dare licentiam Episcopo titulari, vt intra illum annum det Ordines Religioso, cui Religioso capitulum non dat Dimissorias: sed talis Religiosus portat Dimissorias sui prælati regularis. Declaratur, & probatur amplius, quod sint res diuersæ. Nam capitulum sede vacante dans licentiâ Episcopo hospiti vt conferat Ordines in hac diœcesi dat illi facultatē, vt exerceat pontificalia in hac diœcesi, quod aliàs Episcopus facere non poterat. At capitulum dans Dimissorias ad Ordines concedit licentiam subdito Clerico, vt vadat extra diœcesim ordinari. Et Conciliū Tridentinum prohibens capitulo ne det Dimissorias intra annum, non prohibuit ne det licentiâ Episcopo hospiti faciendi pontificale in vrbe sedis vacantis: cum ergo hæc duæ res, dare licentiam vt conferantur Ordines Religioso, & dare Dimissorias, sint res distinctæ & vna sine alia possit existere; prohibita secundâ non censetur prohiberi prima. Secundò probatur conclusio, quia illa prohibitio Tridentini, ne capitulum sede vacante det Dimissorias, solùm intelligitur quoad Clericos subditos capituli. Hoc expressè tenet Henríquez cit. cap. 22. num. 3. vbi sic ait: *Capitulum sede vacante non potest secularibus clericis dare Reuerendas intra annum vacationis, &c.* Ecce quomodo clarè loquitur solum de capitulo erga Clericos sæculares,

nō verò erga Religiosos, qui nō sunt subditi capituli.

3 Consonat hoc cum quadam declaratione Cardinalium citatā à Marzilla in suo primo tomo impresso anno 1618. & citat illam Farinacius in suo tomo de clarat. & decisionū, & omnes eandem declarationem Cardinalium citāt ad caput 10. sess. 7. Tridentini. Declaratio sic habet: *Capitulum sede vacante potest concedere licentiam extero Episcopo exercendi pontificalia in eorum Ecclesia, & Ordines conferendi, tam Clericis illius diocesis, quam exteris habentibus dimissorias suorum Episcoporum, iuxta tamen formam huius decreti.* Sic ibi. Ecce quomodo prohibitio illa Tridentini, quoad Ordines conferendos intra annum vacationis solum loquitur, & exponitur de Clericis: nusquam verò per Clericos intelliguntur Religiosi. Et confirmatur ex ipso nomine, Dimissoria: nam dimissoria non dantur nisi subdito, ut vadat ad Episcopum alienum, ut ab ipso possit ordinari, ut suprà diximus: at Religiosi non sunt subditi capituli sede vacante: ergo prohibitio dandi dimissorias pro ordinibus sede vacante, non intelligitur de Religiosi. Hi enim si sede vacante voluerint ire ad aliū Episcopatū pro Ordinibus suscipiendis, nō deferūt dimissorias capituli, sed suorum praelatorum regularium, Ex quibus abundè constare videtur posse capitulum sede vacante dare licentiam Episcopo titulari, vel extero Episcopo, ut intra annum vacationis dent Ordines sacros Religiosis.

4. Circa hæc potest queri an si Episcopus, vel Archiepiscopus defunctus dum vivebat, dedit licentiam generalem Episcopo titulari, vel alteri Episcopo extero, ut posset celebrare ordines in sua diocesi, possit hic Episcopus titularis, vel Episcopus hospes cōferre Ordines absque nova licentia capituli sede vacante?

Respon

Respondeo duo. Primum est, capitulum posse reuocare licentiam datam ab Episcopo mortuo, & prohibere Episcopo titulari, vel extero, ne Ordines conferat, vel pōtificale exerceat in sua diocēsi. Probatur clarè, quia capitulum sede vacante succedit Episcopo mortuo in omni iurisdictione ordinaria, quam mortuus habebat, vt latè probat per multos textus *Azor tom. 2. lib. 3. ca. 37. q. 10.* ergo sicut Episcopus præcedens poterat, dum viueret licentiam à se datam reuocare, sic poterit eandem reuocare capitulum succedens mortuo quoad omnem iurisdictionem. Et confirmatur, quia capitulum sede vacante potest reuocare Vicarium generalem, quem Episcopus mortuus constituerat: ergo poterit etiam reuocare licentiam ab Episcopo mortuo datam.

5. Secundò dico, quod si capitulum non reuocauerit licentiam ab Episcopo mortuo datam Episcopo titulari ad Ordines conferendos, poterit Episcopus titularis eosdem Ordines conferre post mortem Episcopi quando Ordines celebrauerit. Probo, quia gratia facta non expirat morte concedentis, vt fusè probat Sanchez *lib. 8. de matrim. disp. 28. num. 64.* citans multos, & graues Doctores. Et *eadem disp. num. 83.* adducens aliqua exempla: idque intelligit, quando gratia, seu licentia facta est absolutè sine limitatione temporis. Sed in hoc casu gratia, seu licentia dandi Ordines in hac diocēsi est iam facta, & perfecta ab Episcopo, & data absolutè, vt suppono: ergo non expirat mortè concedentis: sed potest illà vti quamdiu capitulum non reuocauerit. Ponit Sanchez citato loco exempla, vt dixi. Quale est hoc. Si Episcopus alicui concessit licentiam ad suscipiendos Ordines, & post datam licentiam moriatur Episcopus,

scopus vel ad aliā diœcesim trāsferatur, talis licentia non expirat per mortem, vel translationem Episcopi. Alia exempla ponit Sanchez citato loco quæ possunt ibi videri. Et quamvis vt dixi, doctrina hæc feruiat etiam pro Episcopo extero existente in vrbe capituli sede vacante, cui mortuus Episcopus facultatem dederat celebrandi Ordines in sua diœcesi, clariùs tamen locum habet in Episcopo titulari morante in diœcesi capituli sede vacante: nam cùm Episcopus titularis non habeat diœcesim in actu, aequaliter dici potest quod habet diœcesim in hac vrbe sedis vacantis in qua habitat, & pro qua fuit creatus Episcopus titularis ad exercenda pontificalia. Et sic conferendo Ordines sede vacante alicui Religioso, absque licentia capituli, sed cum licentia Episcopi mortui, non dicitur propriè exercere pontificalia in aliena diœcesi sine licentia Episcopi.

6 Ad argumētum in principio positum in contrarium, dico primò, Verba illa Tridentini, *Dare licentiam ordinandi*, Non significare ne detur licentia Episcopo titulari, vt conferat Ordines in diœcesi vacante: sed hoc solum velle vt non dentur Dimissoriæ Clericis intra annum sede vacante. Vidimus enim supra, quod illa verba, *Licentia ordinandi*, nihil aliud significant quam dare Dimissorias ad ordines Et hæc prohibitio dandi Dimissorias, non prohibet quin capitulum intra annum vacationis possit dare licentiam Episcopo conferendi Ordines intra eundem annum, vt manet clarum ex dictis; & hoc quantum ad ordinandos Religiosos, qui non sunt subditi Capituli. Et proinde citata verba Tridentini, *Dare licentiam ordinandi*, non sumuntur actiue, id est vt ordinet Episcopus: sed sumuntur passiuè, id est ne ordinetur Clericus

subditus capituli. Ad secundum quod citatur in argumento, quod lex generaliter loquens, generaliter sit intelligenda: & quod lege non distinguente nos non debemus distinguere, respondeo legem Concilij non loqui generaliter, nec sine distinctione: iam enim diximus ex supra adducta declaratione Cardinalium super Tridentinum, quod Concilium solum prohibet intra annum vacationis ordinari Clericos subditos capituli, non verò Religiosos, qui non sunt subditi capituli. Dico præterea, ipsam legem Concilij distinguere: nam ipso facto quod solum prohibet dari Dimissorias Clericis, non prohibet dari licentiâ Episcopo, ut Ordines cõferat Religioso nõ subdito capituli.

7 Queris adhuc: an si capitulum sede vacante, post annum dederit Dimissorias alicui ad Ordines recipiendos, hæc licentia expiret electo, & ingresso nouo Episcopo illius eiusdem diocesis: Barbossa in *remissionibus ad Tridentinum sess. 7. cap. 10. num. 3. citat.* Gonzal. Petrum de Ledesma, Quaranta, & Gutier, qui omnes dicunt non expirare talem licentiam, Quod potest confirmari à simili: supra enim dixi cum Sanchez licentiam ad Ordines datam ab Episcopo non expirare per mortem Episcopi concedentis, vel per translationem illius ad alium Episcopatum. At capitulum sede vacante succedit Episcopo mortuo quoad omnem iurisdictionem ordinariam, quam mortuus Episcopus habebat ut sup. diximus cum Azorio: ac proinde eadem erit ratio ut non expiret licentia data à capitulo sede vacante pro Ordinibus recipiendis etiam post ingressum noui Episcopi.

CASVS LXXII.

*De quoddam apostata à Religione intuitu
succurrendi pauperi matri.*

Solent aliquando aliqui Religiosi inquietare prælatos, Ordinis, dicentes patrem vel matrem suam pati extremam necessitatem: & proinde volunt sibi dari licentiam manendi extra conuentum pro subuentione illorum: & ideo posui hic præsentem casum.

Quidam Religiosus habens matrem viduam, & pauperem, ter, vel quater fugit à conuentu allegans matris necessitatem, quam ipse dicebat extremam: sed factà vera diligentia, constitit quod necessitas matris, neque erat extrema, neque grauissima, sed solum grauis. Voluit Religio hunc Religiosum repudiare propter illas apostasias. Ille allegauit, quod non fuerit apostata, eo quod exiret à conuentu ad succurrendam matri extremè indigenti, in qua necessitate lex naturalis dicat teneri filium subuenire parenti sic indigenti.

Huius occasione quaeritur an Religiosus habens matrem, vel patrem constitutum in graui, vel grauissima necessitate, quæ non sit extrema, teneatur exire à conuentu pro tali necessitate parentum subleuanda: & proinde si prælatus ad sic exeundum neget licentiam, & ille exeat à conuentu absque licentia, iudicandus sit apostata?

Ante responsionem noto, quod extrema necessitas sic definitur communiter à Doctoribus

in qua aliquid ita est necessarium vitæ alicuius, vt ex signis quæ apparent, videatur quod sine illo mox, aut breui tempore finietur vita ipsius. Necessitas grauis, seu grauissima, est necessitas magna, & notabilis & quæ miserabilis dici potest, sed citra extremam, qualis est Mendicantium hostiatim, morbus aliquis incurabilis, & sic de cæteris.

2 hoc posito, dico: Si parentes Religiosi egeant extremè, obligatur si ius Religiosus sub mortali illis succurrere: Si verò id non possit facere nisi exeundo à conuentu, & prælatus neget licentiam, potest exire absque aliquo peccato, vel apostasia, ad succurrendum parentibus sic extreme indigentibus. De hac conclusione nemo dubitat. Si enim extremè indigenti vnusquisque proximis tenetur succurrere, etiam non consanguineus: id maiori iure tenetur facere filius, & Religiosus: & proinde non immoror in illa probanda.

3 Dico secundo: Si mater Religiosi, vel pater sint in necessitate graui, vel grauissima, non potest Religiosus filius exire à conuentu vt illis succurrat absque licentia expressâ sui prælati. Sic tenet, & probat fusè & efficaciter Sanchez *lib. 4. Decalogi, cap. 10. n. 17.* vbi dicit, quod numquam filius tenetur exire à monasterio vt succurrat parentibus absque licentia superioris. Et citat ad hoc Alexand. de Ales, D. Thomam, Caietanum, Gabriel. Abulensem, Henriquez, Antonin. & Rosellam, & alios. Probat Sanchez primò, quia obligatio filij ad succurrendum parentibus obligat illum quantum status Religiosi patiatur, & se extendit: sed status Religiosus pro sola subuentione necessitatis grauis circa parentes non commodè patitur, nec se extendit, vt illis subueniat habi-

tans extra conuentum cum illis: ergo non potest illis
 sic succurrere, absque licentia prælati. Probat Sanch.
 minorem exemplo clarissimo: Nam filius habens
 vxorem, & simul habens parentem in graui necessi-
 tate, non tenetur, imò nec potest relinquere domum
 vxoris vt habitet cum parente grauius indigente.
 Æquale verò vinculum, vel obligatio est (si non di-
 cam maius in aliquibus) sub licenti ad Religionem, at-
 que est viri ad vxorem. Et hoc argumentum convin-
 cit. Secundò probat, quia per professionem subditus
 traditur Religioni. seu prælato, sicut mortuus: at res
 vni tradita non potest illi auferri vt parentibus sub-
 ueniat quando necessitas non est extrema, vt si
 dedi Ecclesiæ centum aureos, post illos datos non
 possum reuocare donationem vt subueniam paren-
 tibus grauius indigentibus. Ergo à simili Religioso
 donato Religioni per professionem non est licitum
 se ab illa subtrahere absque voluntate prælati, vt
 succurrat graui necessitati parentum. Secundò prin-
 cipaliter videatur Nauarrus in *commentario de Regu-
 lar. ad caput Nullam*. 8. q. 2. num. 48. vbi dicit cum
 D. Thoma, Caiet. & alijs, quod si necessitas patris
 est solum grauis: & pater hanc necessitatem non
 habebat antequam filius professionem emitteret,
 sed superuenit patri post filij professionem; non te-
 netur filius exire à monasterio vt succurrat patri.
 Quod ibi probat ratione, quam dicit se posuisse in
 suo manuali latino: quod idem approbat Reginald.
tom. 2. lib. 20. cap. 2. de obligat. filiorum n. 13. §.
Tertia conditio. Vbi rem hanc curiosius, & clariùs
 disputans, dicit: quod vt filius professus licitè possit
 exire ad subueniendum patri, necessitas parentum de-
 ber esse verè extrema: nam licet illorum necessitas sit

ita grauis, vt non possint parentes viuere nisi mendicando, aut seruiendo alijs cum notabili sui status indecentia, non possunt parentes filium reuocare ad domum suam. Et addit, quod necessitas extrema rarissime contingit, sicut suprà diximus. Vnde infert non esse securum in conscientia filium professum, qui prætextus paupertatis parentum, egreditur à conuentu sine licentia superiorum. Addit vltimò Reginaldus quod dato quod filius exierit cum licentia, si post egressum iussus fuerit à prælato redire oblati necessarijs pro subuentione parentum, tenetur filius redire. Et citat Reginaldus ad hoc intentum illud exemplum Christi Domini, qui *Lnc. 9.* Adolescenti, qui iam cæperat sequi Christum Dominum, & petenti licentiam vt iret sepelire patrem suum mortuum, denegatà licentià, dixit illi Christus Dominus, *sinite mortuos sepelire mortuos suos.* Et quando Reginaldus *citato numero 13.* dicit, teneri prælatum dare licentiam filio Religioso vt exeat ad subueniendum parentibus, loquitur clare quando necessitas est extrema, non verò quando est grauis tantū, vel grauissima.

4 Circa illud verò particulare quod dicit Reginaldus, videlicet non teneri filium Religiosum exire ad subueniendum matri solū laboranti graui necessitate, etiam si propter illa cogatur mendicare ostiatim: Hoc inquam ego limitarem, nisi talis mater, vel pater ex mendicatione maximam paterentur vecundiam, & ignominiam: tunc enim credo, & Religiosum teneri exire, & prælatum teneri ad dandam licentiam, quia in tali casu illa necessitas reputatur extrema. Probo exemplo adducto ex ijs quæ Doctores tradunt in materia charitatis. Ibi enim dicunt, quod si homo nobilis deueniat ad talem paupertatem, quod

quod nihil habeat pro fame vitanda, & vita tuenda, nisi medicare ostiatim, non peccat talis homo sinere potius se mori, quàm mendicare ostiatim: quia, ut aiunt Doctores, non tenetur vitam sustentare cum tanto suo damno, quale est hominem nobilem mendicare ostiatim: & proinde hanc necessitatem reputant extremam. Quod bene potest applicari ad intentum, an filius debeat exire ad subueniendum patri laboranti solâ graui necessitate, quando pater, vel mater sunt nobiles, & non habent aliud remedium, nisi viuere ostiatim mendicando.

CASVS LXXIII.

De quoddam Rebaptizato.

Quidam baptizatus fuit à quodam Clerico descendente ex Hebræis (vulgo *Christiano nouo*) propter hoc solum inquietus vivebat, eo quod ut plurimum male suspicaretur de similibus personis in sacramentorum administratione propter multos casus in hac materia iam visos. Quæsiuit an propter hanc solam dubitationem potuerit rebaptizari sub conditione? Et videtur, quod id nullo modo possit fieri. Nam in *capite Rebaptizare de consecrat. dist. 4.* dicitur, quod rebaptizare hominem catholicum inhumanissimum scelus est. Et *eadem distinct. cap. Quis bis*, poena grauis imponitur rebaptizanti; & ex alijs textibus taliter rebaptizans fit irregularis. Secundò, quia in *cap. A quodam Iudæo eadem distinctione*

cum Bulgari quærerent à Papa Nicolao an rebaptizandi essent quidam homines, qui fuerant baptizati à quodam Iudæo de quo non constabat an esset paganus, an Christianus: Respondit Papa non esse rebaptizandos propter causam quam ibi assignat. Quod si illud Papa respondit de Baptismo collato ab homine tali Iudæo, multo magis idem responderet de Baptismo hoc collato à Clerico non Iudæo, sed solùm descendente ab Hebræis iam conuersis, & habitis pro Catholicis. Tertiò, quia si ob causam aliquam posset hic rebaptizari, esset quia de tali Clerico potest præsumi mala intentio in ministratone Baptismi: at de proximo bene præsumendum est, quamdiu non extant rationes vigentes in contrarium, quas vigentes rationes suppono non dari ad malè præsumendum de hoc Clerico in particulari: ergo illius Baptismus ab eo collatus, non potest iterari: alioqui iniicerentur Catholici multi in multos laqueos, qui à similibus Sacerdotibus sunt baptizati.

x Memor sum quod in meo primo tomo *Responsionum cast.* 28. disputauì casum istum de quodam simili baptismo dato à quodam Clerico descendente ab Hebræis, de quo tamen erant indicia vehementia, ob quæ credi poterat illum non habuisse intentionem baptizandi. Et duo ibi principaliter dixi. Primum fuit, Nullum peccatum commissurum illum, qui stante tali dubio se iterum faceret baptizari ad cautelam. Secundò ibi dixi, & defendi hunc baptizatum ab hoc Clerico non teneri, nec debere iterum baptizari ad cautelam, ob rationes efficaces ibi adductas. Et in his duobus adhuc persisto. Quia tamen tunc nondum videram Bullam Domini Papæ Pauli Quinti circa non promouendos ad officia habentia

bentia curam animarum, Clericos descendentes ab Hebræis conuersis de qua Bulla statim dicam. Nec videram quendam tractatum hac de re specialiter confectum a viro satis religioso, & docto; visum fuit temperare aliqua in parte a me dicta in illo citato casu 18.

2 Igitur Dominus Papa Paulus Quintus in quadam Bulla anno 1612. emanata, & Olyssippone impressa anno 1613. rigorosè prohibuit pro tota Hispania ne aliqua persona descendens ab Hebræis conuersis vsque ad septimum gradum inclusiue, posset promoueri ad aliquod officium, vel beneficium habens curam animarum, & quod secus factum sit irritum, & nullum. Dicit ibi Papa in proæmio Bullæ, se hoc facere, vt occurrat scandalis, & periculis animarum. In quo clarè innuit suspectos valde esse tales descendentes ab Hebræis circa curam animarum, & sacramentorum administrationem, à qua salus animarum dependet; & in quorum sacramentorum mala administratione, animæ fidelium scandala, & pericula incurrunt. Pro qua adhuc Bulla necessariam est notare, quod non descendentes ab Hebræis denique conuersis nondum sunt in septimo gradu: quod sic probatur. Constat ex historijs Regni quod Iudæi venerunt expulsi à Castella ad hoc Regnum anno 1481. & proinde intrarunt Portugalliam, in qua omnes baptizati sunt 155. abhinc annis: demus autem quod quis illorum in propria persona vixerit solum annis quinquaginta, quatuor personæ facientes quatuor gradus iam excedunt 155. annos: & sic hodie descendentes ab illis conuersis sunt descendentes in quarto gradu ad summū: Papa verò excludit illos, & nō præsumit de illis vsque ad septimū gradū. Quo posito.

3 Sit *prima conclusio*. Iste baptizatus à Clerico descendente ab Hebræis, potest quierari, & securus esse, nec tenetur baptismum iterare ad cautelam. Hæc satis efficaciter à me probata fuit suprâ citato *casu 28. mei libri Responsionum moralium* per multa quæ ibi adduxi in casu omnino simili, imò difficiliori, quæ non liber hîc repetere. Idque satis probat citatum suprâ capitulum à quodam Iudæo *distinctione 4. de consecratione*, ubi Papa clarè dicit quod baptizatus à Iudæo, si protulit veram formam Baptismi non est rebaptizandus. Videantur quæ dixi loco citato.

4 *Secunda conclusio*. Ille qui baptizatus à Clerico isto descendente ab Hebræis fecerit se rebaptizari ad cautelam pro tollendo magno suo dubio non peccabit, nec penas rebaptizantium, vel rebaptizatorum incurrer. Hanc etiam posui *cit. casu 28. num. 2.* quam tamen hoc loco amplius probo. Primò, quia quando quis aliquid operatur ex præsumptione iuris & de iure, non peccat, cùm operetur, & opinetur conformiter ad legem sic præsumentem: sed contra hos descendentes ab Hebræis in septimo gradu, per citatam Bullam D. Pauli V. est præsumptio iuris, & de iure quod non fideliter sacramenta ministrant, ideo enim illos à cura animarum excludit: ergo non est peccatum de illorum baptismo dubitare, illiusque iterationem procurare. Maior & consequentia sunt claræ. Minor declaratur, & probatur ex traditis à Sanch. *lib. 7. de matrim. disp. 37. num. 7. & 8.* ubi docet quod præsumptio iuris, & de iure tunc datur, quando ius suæ præsumptioni ita innititur, ut ex ea certum quid statuatur: quod clarè cernitur in hoc casu. Nam Papa Paulus V. præsumit de his descendencibus ab Hebræis, quod

non

non fideliter sacramenta ministrent, & innixus huic præsumptioni statuit, ne tales descendentes ab Hebræis habeant curam animarum: ergo in hoc datur præsumptio iuris, & de iure: & proinde operans iuxta illam in iteratione baptismi, non agit temerariè, nec proinde peccat. Secundò probatur ex eo quod Doctores tradunt circa iudicium temerarium, dicunt enim quod si cogito malum de proximo nulum habens indicium, vel friuolum indicium ad sic cogitandum, pecco mortaliter. Si verò habeo indicia vehementia ad sic suspicandum, non pecco, iuxta Azor. tom. 3. lib. 13. cap. 11. §. *Dubium tertium* & alios. At quod hi Clerici descendentes ab Hebræis, non rectè ministrent sacramenta, sunt indicia vehementia, id est quotidiani casus, in quibus multi illorū in actibus sancti Officij confessi sunt sæpius non habuisse intentionem conficiendi sacramenta quando illa ministrabant: ergo non iudicat temerariè qui hoc de illis iudicat, & secundum hoc iudicium procurat iterationem baptismi ab illis collati. Declaratur hoc ex eo quod docent dialectici, de demonstratione sensitiva; videlicet, hic ignis calefacit, & ille ignis calefacit, & sic de cæteris: ergo omnis ignis calefacit. Sic suo modo: talis, & talis, & talis horum hominum hoc confessus est circa sacramenta: ergo moraliter omnes sunt tales, quod argumentum in materia morali pondus habet.

§ Secundò principaliter probatur eadem conclusio: nam quod hic numero baptismus datus etiam ab homine non suspecto, fuerit verus baptismus, non est de fide, sed est opinio: solam enim est de fide, quod baptismus rite collatus sit sacramentum, & det gratiam, non verò de hoc numero baptismo, qui pender
ab

ab intentione nobis ignota ipsius baptizantis. Sit exemplum. Est de fide, quod hostia ritè consecrata est verum sacramentum: non tamen est de fide, quod hæc hostia in particulari consecrata à Petro sit verum sacramentum: nescimus enim de fide an sit verus sacerdos, & an habuerit veram intentionem consecrandi. Tunc sic. Non est de fide, sed est opinio, quod hic numero baptizatus collatus à Clerico etiam non suspecto, sit verum sacramentum: ergo multo minus erit de fide, neque erit certum quod baptizatus collatus à Clerico suspecto, sit sacramentum: sed erit solū opinio, contra quam potissimum opinari. At contra hunc baptismum datum ab hoc Clerico suspecto descendente ab Hebræis, unt multa, & magna indicia, quod non fuerit ritè collatus, sicut vidimus in primo argumento: ergo nullum est peccatum praticare contra hunc numero baptismum per iterationem alterius ad cautelam: quia licitum est agere contra opinionem dubiam, & minus probabilem, quando contra illam vrgent indicia. Et in materia animæ, seu in his, quæ spectant ad salutem animæ, tenenda est pars securior, vt patet per tres textus iuris canonici citatos à glossa in *Clementina* exiui de paradiso de verb. *significatione*, paulò post initium in verbo *Item quia*, & tradit Sanchez *lib. 2. de matrim. disput. 36. num. 8. & sequentibus*. Et hoc ipsum de opinione faciente securitati animæ, tenet Suarez *tom. de sacramentis, in materia de baptismo disputat. 22. sect. 2.* vbi citat Concilium Africanum, & Concilium Vormaciense, in quibus dicitur, quod ne homo subijciatur periculo damnationis ob carentiam baptismi, in dubio inclinandum est in fauorem baptizandi. In hoc verò nostro casu, satis est dubium de hoc baptismo, de quo
quæ

queritur : ergo fauendum est homini baptizando ad cautelam.

6 Tertiò probatur omnino ex ijs quæ tradit Sanchez lib. 2. de matrim. disp. 36. n. 8. ubi probat in substantia, quod quando datur periculi magni timor potest eligi opinio minus probabilis. Adducit Sanch ad hoc quædam verba Dominici Soto laudata, & commendata à Nauarro ibi citato. Verba Soti sunt hæc : *Licet quis habeat opinionem alicuius partis, & solam alterius formidinem : non tenetur sequi opinionem, si inde magnum inueniet alicui periculum, & formido alterius apparentem habeat probabilitatem. Quia periculum graue facit, ut in mortalibus formido præponderet opinioni.* Sic Sotus apud Sanchez. Quod dictum optimè facit ad intentum. Nam demus quod sit opinio probabilis, quod baptismus ab isto Clerico fuerit ritè collatus : quia tamen formido opposita apparentem habet probabilitatem, & simul habet timorem magni periculi, ne scilicet homo careat baptismo. Ista formido tanti periculi habens apparentem probabilitatem, præponderat illi opinioni, quid ille sit verè baptizatus.

7 Quartò probatur ex eo quod tradit Sanchez libro 2. de matrimonia disputatione 36. num. 4. & 5. ubi ex cap. *Quoniam*, §. *Porro*, ut licet non contest. & alijs textibus probat, quod mulier cuius maritus per longum tempus fecit absentiam, expectabit illum. donec de ipsius obitu verisimiliter præsumatur, cum sit crimen suspectum in fide contrahere secundum matrimonium durante primo: datur tamen licentia mulieri contrahendi secundum matrimonium si verisimiliter præsumatur de morte primi veri. Ergo à simili poterit recipi secundò baptismus, si verisimiliter credatur, quod prior baptismus fuit nullus. Denique

poteſt

potest ad hoc facere dictum Diui Augustini citatum in capite Si quis autem, de penitentia, distinctione. 7. vbi sic ait: Ergo tene certum, dimitte incertum. De quo multa ad propositum tractat Nauarrus ad citatum caput. Adhuc non omitto citare Henriquez, qui tomo primo, libro 2. de Baptismo numero 2. ponit hæc verba: *Ubi apud prudentes probabile dubium facti est circa Baptismum, aut est dubium iuris, iterum est baptizandus sub conditione.* In hoc verò nostro casu probabile dubium est apud prudentes de Baptismo isto collato à Clerico suspecto. Et eodem loco tenet Henriquez, quod in hoc casu stante tali dubio nec rebaptizantem ad cautelam, nec sic rebaptizatum peccare, neque incurrere aliquam penam.

8 Ad primum argumentum in oppositum adductum, dicendum est illos duos textus dicentes rebaptizationem esse scelus immane, & per illam incurri irregularitatem, intelligi quando fit rebaptizatio non extante dubio de valore baptismi, idque sit ex malitia, & absque vlla causa: si enim fiat extante dubio facti, vel iuris circa valorem baptismi, nullum est peccatum, neque pena, illum iterare sub conditione, sicut dixit Henriquez loco proxime citato; vbi glossa littera K, citat aliquos Doctores, & dicit esse opinionem communem. Idem tenet Bonacina tom. 1. disp. 7. de baptismo q. 3. puncto 3. num. 4. citans alios. Et addit quod non est necessarium vt sic rebaptizans ore dicat: *si non es baptizatus, ego te baptizo*: sed satis esse quod illam conditionem in mente retineat. Ad secundum argumentum dicendum est primò, quod quando Papa Nicolaus respondit non esse rebaptizandos baptizatos à Iudæo illo, dicere voluit, non esse baptizandos de obligatione, seu sub obligatione: per

per quod non videtur prohibuisse quin possent baptizari de consilio ad maiorem securitatem, & sub conditione, qualiter nos dicimus posse fieri. Secundò dico ad eundem textum, Papam sic respondisse, quia de illo Iudæo non dabantur grauius indicia quod esset malè affectus ad sacramenta Ecclesiæ, quemadmodum hodie dantur grauius indicia de descendentibus ab Hebræis circa res fidei, vt supra diximus constare ex tot casibus experimento probatis. Ad tertium argumentum respondeo præsumendum esse bene de proximo, nisi dentur sufficientia indicia ad præsumendum malè de illo, vt supra diximus *num. 4.* cum Azore, quod non est iudicium reuerentium iudicare malè de proximo quando ad sic iudicandum dantur indicia grauius, & sufficientia.

9 Sed insurgit non levis difficultas, an si iste sic rebaptizandus sit sacerdos, vel habeat Ordines sacros, post istam iterationem baptismi, debeat etiam iterare Ordines sacros, quos receperat: Et quidem si hæreticus, qui baptizauit, publicè per sententiam confessus est, se numquam vere baptizasse; taliter rebaptizatus tenebitur iterum illos sacros Ordines recipere. Cum enim baptismus sit ianua sacramentorum, ita vt sine illo nullum sacramentum alicui proficit: & constet certò ex confessione prius baptizantis, defuisse verum baptismum, Ordines sic ab illo recepti fuerunt irriti, & nulli. Si verò solum detur dubium de valore baptismi collati ob maculatam genealogiam baptizantis, & fuit secundò baptizatus ad cautelam, credo non teneri ad iterandos ordines iam susceptos, sed posse continuare in exercitio illorum. Tum quia non constat clarè de nullitate prioris baptismi: tum quia

quia non est eadem ratio de iterandis Ordinibus sacris, ac de iterando baptismo. Nam sacramentum Baptismi est magis necessarium ad salutem, quàm sit sacramentum Ordinis. Tum denique, quia sicut ego possum modò sequi vnâ opinionem probabilem, & paulò pòt sequi aliam contrariam opinionem probabilem: sic etiam in hoc casu videtur quod possit sequi opinionem probabilem in iteratione Baptismi, & illam non sequi in iteratione sacramentum Ordinum; & scio sic responsum fuisse Olyssipone in hoc casu à grauibus Theologis hac de re consultis.

C A S V S L X X I V .

*De electione cuiusdam prælati localis
facta per Prouincialem.*

IN quodam conuentu, qui habebat 14. vel quindecim Religiosos, mortuo prælato locali eiusdem conuentus, Prouincialis voluit eligere alium prælatum localem per suffragia Religiosorum eiusdem conuentus. Et paulò ante electionem, abstulit ab illo conuentu quatuor, vel quinque Religiosos, de quibus non confidebat, quod darent suffragium illi, quem Prouincialis prætendebat eligere, & hos quatuor vel quinque Religiosos misit ad alios conuentus, vt habitarent ibi. Et pro his quatuor, vel quinque quos abstulit, posuit de nouo alios octo Religiosos sibi propitios, & tunc præcepit omnibus vt procederent ad electionem. Vicarius, seu præsides illius conuentus appellauit à tali electione, Prouincialis dixit

dixit illum non posse appellare, neque illum esse partem ad appellandum quinimo illi præcepit cum censuris, vt daret suum suffragium in electione. Factâ sic electione, electus est vnus Religiosus quem Pro- uincialis confirmauit in prælatum localem conuentus. Et declaratur, quod statim finitâ electione, Pro- uincialis abstulit ab illo conuentu vnum ex illis oc- to Religiosis, quos paulò ante electionem adduxerat ad electionem adduxerat ad electionem celebrandam.

Quæsitum est primò, an dictus Vicarius, vel præ- ses conuentus potuerit validè appellare à tali electione?

Secundò, an dictus Vicarius incurrerit aliquam censuram non obediendo prælato mandati post ap- pellationem vt daret suffragium.

Tertiò, an talis electio facta cum illa noua trans- latione Religiosorum valida fuerit?

Responsio ad 1. quæsitum.

1 Ap primum quæsitum dico, prædictum Vicarium potuisse validè appellare à tali electione. Probatur primò ex *cap.* Non solent 2. *quæst.* 6. vbi dicitur, quod potest appellare omnis ille cuius aliquid interest. In- tereat vero Vicario bonam electionem conuentus fieri, tum quia erat pars præcipua illius conuentus, tum quia erat vnus ex suffragatoribus, siue de cor- pore capituli. Quinvis autem de corpore capituli ha- bet authoritatem appellandi ab electione non ritè celebrata, vt colligitur ex multis textibus in toto ri- tulo de electione, & in titulo de *appellatione in 6.* vbi constat quod à multis electionibus per electores fuit appellatum ad Papam. Habetur in particulari

in cap. Constitutis de appellatione, & alibi passim. Idem docet Hostiensis titulo de appellatione, §. Quis possit appellare, cum commento, dicens, quod quilibet de collegio potest appellare in materia electionis, videlicet pro bono communi. Idem tenet glossa in cap. cōsiderabimus de electione, verbo post appellationē: vbi ait posse aliquem appellare ne fiat electio nisi canonica, maximè si allegetur aliqua causa probabilis. Et Vicarius allegauit causam probabilem, esse videlicet hanc electionem furtiuam, & factam cum dolo propter nouitatem nunquam visam, auferendo scilicet à conuentu Religiosos aliquos, & ponendo alios novos ad finem eligendi quē vellet Prouincialis. Confirmatur adhuc quod potuerit Vicarius appellare ex exemplis adductis ab Hostiensē loco citato, videlicet quod pater appellare pro filio: & coniunctus pro coniuncto. Et quilibet de populo potest appellare pro illo qui ducitur ad patibulū. Et sic de alijs exemplis,

2. Ad secundum quæsitum dico, quod si Prouincialis hoc præcepit Vicario postquam iam appellauerat ad Generalem, non tenebatur obedire, & proinde non obediens non incurrit vllam censuram: quia interposita appellatione nihil est innouandum, vt mox dicemus in Responsione ad tertium. Et præterea quia appellatio habet duos effectus: vnus dicitur suspensiuus, alter deuolutiuus. Effectus suspensiuus facit vt iurisdictio iudicis à quo appellatur, maneat ita suspensa vt non possit amplius in causa procedere. Effectus deuolutiuus est quia per appellationem cognitio causæ deuoluitur ad iudicem superiorem ad quem appellatur. Ita tenent communiter Doctores cum glossa in cap. ad reprimendum de officio ordinarij. Cum ergo per appellationem Vicarij ad

Gene

Generalem, iurisdictione Prouincialis manserit suspensa, non potuit valide in eadem materia electionis preceptum, & censuras imponere Vicario appellanti.

3. Ad tertium quaeritum, dico, Hanc electionem fuisse nullam. Probo quia fuit facta post interpositam appellationem validam: facta autem post interpositam appellationem validam sunt irrita, & nulla. Sic habetur in *cap. dilectis de appellat.* Et pro maiore claritate istius appellationis, noto quod hic Vicarius non appellauit ab aliqua sententia lata per Prouincialem; sed appellauit a grauamine iniuncto, quod Prouincialis Religioni facere intentabat, celebrando nouam, & extraordinariam electionem, quod grauamen dici poterat irreparabile, quia post factam electionem vix poterat electio rescindi, nisi cum scandalo Religionis, & saecularium. Constat autem ex Concilio Tridentino *sess. 24. cap. 20.* quid a tali grauamine irreparabili potest appellari. Secundo probo fuisse electionem nullam, quia facta fuit cum suffragiis non legitimis, & cum fraude, & dolo: quod sic probo. Primo, quia ante electionem attulit illos novos Religiosos ad danda suffragia, qui in rigore non habebant domicilium in illo conuentu, & proinde non habebant suffragium in illo. Et quod in tali conuentu dicti Religiosi sic adducti non haberent domicilium; probatur ex eo quod Doctores communiter dicunt domicilium non acquiri nisi ab illis qui aliquid se confert cum animo ibi permanendi, de quo in particulari Sanchez *lib. 3. de matrim. disp. 23. n. 1. & 2.* citans multos. At aliqui ex illis Religiosis adductis ad suffragandum non habuerunt animum manendi in illo conuentu; cum vnus illorum statim finita electione ad suum antiquum redierit; alius antequam

adduceretur ad dictum conuentum electionis, scripsit epistolam ad quendam secularem, in qua dicebat se ire ad talem conuentum, (in quo scilicet electio celebranda erat) pro certo negotio expediendo, illòque finito statim reuersurum; per quod clarè ostenditur hos saltem duos non habuisse domicilium in illo conuentu, nec proinde suffragium, cum ad illum conuentum non iuerint animo permanendi. Hoc idem declaratur, & probatur ex eo quod tradit Mascardus *tomo 1. de probat. conclus. 533.* in qua supponens primò dictam commune Iuristarum dicentium, quod testis domesticus repellitur vt suspectus: statim *num. 14.* ait, quod si domesticus antequam vocaretur ad testificandum, exiuit à domo domini, & post paucos dies vocatus ad testificandum tulit testimonium coram iudice: & iterum paulò pòst secundò rediit ad domum antiquam domini, illius testimonium fuit nullum, quia vñs est fraude exiens à domo domini, vt posset ferre testimonium tanquam iam nò domesticus. Ad quod citat Mascardus leges iuris ciuilibis, & Tiraquellum; quæ omnia directè faciunt ad nostrum casum: in quo vengerunt Religiosi ex alio conuentu ad danda suffragia in alio conuentu: & finitè electione redierunt ad pristinum conuentum: & ex consequenti hìc interuenit fraus & dolus. Hoc probatur ex eo quod dicitur *cap. ultimo de verborum signific. in in 6.* vbi dicitur, quod quidam Papa concessisset cuidam Episcopo licentiam, vt ipse posset conferre beneficia vacantia Clericorum suorum domesticorum: subdit Papa in hunc modum: *Illos tuos Clericos volumus intelligi; qui per se non quæsiti propterea, vel recepti, sine fraude, & fìctione qualibet, verè tui clerici, & familiares existunt.* Quod optimè facit ad intentum.

Nam

Nam in hæc electione octo Religiosi electi sunt cum fraude, & fitione, vt venirent ad conuentum electionis tanquam domestici, & habitatores illius ad dandum suffragium in electione : qui octo Religiosi ad sic suffragandum adducti faciebant maiorem partem conuentus. Habebat enim conuentus solum quindecim Religiosos : & sic octo adducti faciebant maiorem partem conuentus : ac proinde clarè deprehenditur fraus, & subornatio in electione.

4 Faciunt ad idem intentum textus citati à glossa super *cap. citatum vltimum de verb. signif. in 6. Quæsi propterea.* Vltimò ad probandam nullitatem, & fraudem istius electionis, facit omnino, quod imminente electione, Prouincialis amouit conuentu quatuor, vel quinque Religiosos, in quibus non sperabat suffragia pro suo intento. In hoc verò facto violauit ius commune electionum, per quod decernitur, vt vocentur absentes, qui habent ius eligendi, ita vt vno absente non vocato, possit electio annullari. At Prouincialis ante electionem eiecit à conuentu quatuor, vel quinque Religiosos, qui erant præsentés, & quibus ob domicilium conueniebat ius eligendi: eosque in substantia priuauit suffragio eligendi. Cum ergo tam clarè constet quod in hac electione fraus, & dolus interuenerit: constat etiam, quod factum per dolum est inualidum, vt patet ex *cap. Quanto amplius de privilegiis.* Cui addendum est, quod fraus, & dolus nemini debent patrocinari; vt habetur in *cap. Sedes Apostolica de Rescriptis, & cap. Ex litteris de dolo, & contumacia.*

CASVS LXXV.

De presentatione cuiusdam capellanie.

Quidam nobilis habens administrationem cuiusdam capellaniæ tanquam patronus illam dedit cuidam Clerico honesto, & bene merito: & quando illam ei dedit scripto declaravit se illam illi date in perpetuum. Clericus prouisus acceptauit, & possedit, & per aliquod tempus inculpate seruauit. *Quæsitum* fuit, an prædictus dominus possit talem Clericum hodie amouere à capellania absque culpa vlla commissâ ab ipso Clerico. Et iterum si amoueat, teneatur Clerico ad vllam satisfactionem?

Responsio.

I Ante resolutionem præmitto duas esse species capellaniæ. Prima dicitur collatiua; quæ tunc datur, quando aliquis ex bonis suis segregat, & assignat certam portionem Clerico, qui pro se dicat singulis annis certas Missas in certa Ecclesia; & hoc instituitur statim à principio cum autoritate Episcopi, præsentante testatore statim à principio Clericum capellanum, & Episcopo confirmante. Et cum declaratione, quod successores patroni Clericum capellanum præsentabunt, & Episcopus confirmabit. Et hæc capellania dicitur collatiua, quia pender à collatione, & confirmatione Episcopi, tum in principio foundationis, tum in tempore succedente; quando patroni præsentant, & Episcopus confirmat. Et hæc

hæc capellania est beneficium Ecclesiasticum, ut patebit ex dicendis, vel citandis. Secunda capellania vocatur non collatiua, quia nec fundatur in principio authoritate Episcopi: nec postea quando futuri patroni capellanum præsentant, indiget confirmatione Episcopi, sed ipsi per se Cleticum eligunt qui dicat illas Missas relictas à testatore. Et hæc capellania non est beneficium Ecclesiasticum. Hæc distinctio, & doctrina est Nauarri in *consilio* 5. & 6. de *præbendis, & dignitatibus, prima impressionis*, & Rodriguez in *Additionibus ad Summam*, tomo 3. cap. 6. per totum. Et Suarez tomo 2. de *Religione*, libro 3. cap. 22. num. 10. & sequentibus, ubi citant alios Doctores; & tradit Zerola 3. parte *praxis Eccles.* verbo Capellania, §. 1. & 2. Hoc supposito, ad quæsitum.

2 Dico primò: Si ista capellania est primæ speciei, collatiua videlicet, confirmata scilicet per Episcopum cum cæteris suprà dictis, tunc patronus præsentans non potest hunc Clericum priuare capellania, nisi ob culpas graues. Hæc conclusio est omnium Doctorum, quos suprà citauimus. Et fundatur præcipuè in eo quod citati Doctores dicunt, videlicet, quod ista capellania est beneficium Ecclesiasticum, & beneficium Ecclesiasticum debet esse perpetuum, ut patet ex capite *Inuentum* 16. quæst. 7. & ex cap. *Saris peruersum*, distinct. 56. & hinc manauit consuetudo Ecclesiastica, quod scilicet beneficiarius non amittit beneficium nisi ob graua delicta. Et hoc amplius declaratur, vel probatur: nam licet patronus habeat ius præsentandi, imò possit variare in præsentando ante confirmationem Episcopi: post confirmationem tamen Episcopi non potest patronus variare, nec remouere præsentatum: alias seque-

rentur quotidie absurda grauiā , & multæ inquietationes.

5 Dico secundò : Si ista capellania non est collatiua , & patronus illam dedit Clerico non declarans quod illum præsentabat in perpetuum , potest Clericum amouere ad libitum quoties voluerit absque culpis ipsius Clerici. Hæc est Nauarri *citato consil. 6. n. 1. vbi* dicit talem capellaniam auferri posse sine culpa , & sine causæ cognitione. Et Rodriguez *citato c. 1. concl. 15. citans* Roquum , & Lambertinum , dicit posse primum fundatorem istius capellanix in suo testamento præcipere , ne Episcopus se intromittat in tali capellania non collatiua & quod alias patronus successor sibi applicet bona , & redditus capellanix. Et ratio est , quia cùm hæc capellania non sit collatiua , nec proinde beneficium Ecclesiasticum , sed solum sit quodam legatum pium institutum de bonis sui patrimonij , potest testator circa illud disponere sicut sibi placuerit. Addit Rodriguez *citato loco conclusione 21.* quod patronus successor non tenetur stare nominationi sui antecessoris : nisi quando antecessor fuerit primus fundator.

3 Respondendo verò directè ad dubium propositum in principio , dico , quod iste patronus , qui hanc capellaniam huic Clerico donauit in perpetuum , non potest eam illi auferre dum vixerit ipse patronus. Probatur clarè , quia hic patronus fecit huic Clerico donationem liberam , absolutam , & donatio fuit accepta à Clerico , apprehensâ possessione : at talis donatio libera , absoluta , & acceptata à donatario non potest reuocari , vt tenet communis opinio Doctorum : ergo non potest reuocari à patrono. Idem

no. Idem præcipitur in lege Portugallia *lib. 4. Ordinatio. tit. 63. in principio*, ubi dicitur quod donationes liberæ, & absolutæ, & acceptatæ, statim sunt firmæ, & perfectæ ita ut non possint amplius reuocari. Cum ergo hic patronus donationem fecerit istius capellani isti Clerico in perpetuum, non poterit istam donationem reuocare, maximè cum ex parte Clerici nulla culpa ingratitude interuenerit. Secundò probatur per regulam 33. *de Regul. iuris in 6. quæ dicit sic: Mutare consilium quis non potest in alterius detrimentum.* Et ad hoc adducit ibi glossa multa exempla, quæ confirmant nostrum casum. Si ergo non potest quis mutare consilium in præiudicium alterius, minus poterit mutare donationem iam acceptatam cum præiudicio graui alterius. Tertiò probatur per aliam regulam iuris *in 6. quæ est 21. & dicit, Quod semel placuit, amplius displicere non potest.* Huic autem patrono semel placuit dare hanc capellaniam in perpetuum, ergo amplius id non potest illi displicere. Et ad hoc citat ibi glossa multos textus, quibus idem probatur: maximè citat *cap. Pœnitente distinet. 55.* ex quo & aliis textibus colligitur ista conclusio inter Iuristas, videlicet, quod nemo potest venire contra factum suum. Quartò probatur, nam si est de iure gentium, & naturali seruare fidem in promissis: maior obligatio est seruare fidem in iam datis, & acceptis, & possessis. Nam aliàs si postquam Ioannes rem aliquam donauit Petro, quam possidet Petrus iam per annos, posset Ioannes rem illam à Petro auferre ad libitum, sequerentur quotidie multæ inquietationes, perturbationes, & scandala in Republica. Quintò id probo cum isto exemplo. Dedit Petrus Frâncisco viginti ducatos dona-

tione purâ, liberali, & absolutâ: acquisiuit Franciscus possessionem illorum viginti ducatorum, & fortè illos iam expendit: quis dicet posse hodie Petrum illos viginti ducatos repetere. Quod idem seruit in nostro casu. Aliud exemplum sic pono. Si Petrus locaret domum Francisco pro tota vita Francisci, teneretur Petrus stare cōtractui, nec posset locationem rescindere, nisi fortè Petrus tali domo indigeret ad habitandum, vel domus minaretur ruinam, vt Doctores explicant agentes de hoc contractu: ergo à simili non potest hic patronus auferre huic clerico capellaniam, quam illi dedit pro tota vita. Neque contradicunt huic conclusioni Nauarrus, & Rodriguez locis suprâ citatis dum dicunt posse patronum amouere Capellanum à capellania non collatiua ad libitum: loquuntur enim de capellania data modo ordinario, dependenter à voluntate patroni donantis: non verò loquuntur, quando patronus capellaniam daret in perpetuum, qualiter data est in nostro casu; tunc enim idem dicerent quod nos hic diximus propter rationes claras, & efficaces adductas.

Ad secundum quæsitum dico, quod si patronus nunc Clericum à capellania sic data sine culpis amoueret, teneretur restituere Clerico expensas, vel damnum datum ad arbitrium boni viri. Probatur hoc ex iis, quæ tradit Nauarr. in *sum. Latina* cap. 17. num. 69. usque ad num. 73. vbi probat per textus, rationes, & Doctores, quod qui impediuit aliquem ab assecutione alicuius officij vel beneficij, ad quod iam habebat ius acquisitum, siue hoc ius esset ius ad rem, siue ius in re, teneretur sic impediens restituere huic læso damnum quod dedit omni modo possibili. Si ergo teneretur restituere is qui impediuit Petrum ne assequere-

tur beneficium, ad quod solum habebat ius ad rem, multo magis obligabitur iste patronus restituere huic capellano damnum datum ex ablatione capellaniæ, in qua iam acquisuerat ius in re, & possessionem pacificam. Secundò id probo persistens in exemplo adducto in responsione ad primum quæsitum: videlicet, si Petrus dedit Francisco viginti ducatos in quibus Franciscus obtinuit possessionem, & dominium: & postea Petrus dictam pecuniam abstulit de bonis Francisci: clarum est, quod Petrus obligatur, vt Francisco reddat ablatos viginti ducatos: quod facile est ad nostrum casum applicare. Denique hoc ipsum expressè tradit Rabello *tom. de obligat. inst. 1. p. lib. 3. q. 2. num. 3.* vbi dicit esse opinionem communem, quod teneatur ad restitutionem impediens aliquem ab assécutione alicuius boni: siue iam haberet ius in re ad illud bonum per donationem inter viuos, aut vltimam voluntatem, collationem, confirmationem, aliumve legitimum titulum: siue haberet solum ius ad rem, per iustam promissionem, electionem, præsentationem, aliumve similem titulum. Sic ille, dicens esse opinionem communem. At iste Clericus habet ius ad capellaniam, non solum ad rem, sed etiam in re, per promissionem, collationem, præsentationem, & donationem, vt suprà vidimus: ergo si priueretur capellaniâ, debetur illi restitutio ad arbitrium prudentis viri.

§ Dixi in præcedentibus, hunc patronum, qui hanc capellaniam dedit in perpetuum isti Clerico, nõ posse eam illi auferre in vita ipsius patroni donatis. Quæris, quid, si moriatur ipse patronus, qui donauit in perpetuum, & superuiuat Clericus capellanas. Nunquid successor patronus, illius qui in perpetuum

petuum donauit, poterit amouere Clericum à capellania ad libitum, & sine culpis? Respondeo posse. Nam patronus antecessor non potest ligare manus patroni successoris, nisi patronus antecessor fuerit primus fundator: quod potest hoc exemplo declarari. Potest beneficiarius locare fructus sui beneficii Petro in perpetuum, id est per totam vitam ipsius beneficiarii, ita ut ipse beneficiarius non possit dum vixerit locationem rescindere. At mortuo beneficiario, successor illius in beneficio poterit amouere conductorem priorem, & fructus alteri locare, quia absolute loquendo non tenetur stare locationi factæ à suo antecessore. Eodem modo potest hic patronus dare capellaniâ huic Clerico in perpetuum, id est, pro tota vita ipsius patroni, ita ut patronus sic donans non possit illam auferre: non verò illâ potest dare Clerico in perpetuum, id est, pro tota vita Clerici, ita ut nō possit patronus successor illam ab eo auferre: hoc enim esset ligare manus successoris, & illi auferre ius quod habet ad præsentandum. Facit ad hoc decretum Concilij Tridentini *sess. 25. cap. 11. de reform.* vbi dicitur quod locationes fructuum beneficiorum, quæ sunt anticipatis solutionibus, non sunt validæ in præiudicium successorum.

C A S V S LXXVI.

De Abbatissa admittente seculares intra clausuram.

Quædam Abbatissa, vel Priorissa, petiuit à Provinciali licentiam in scriptis, ut posset intrare clau

clausuram aliqua persona ad curandam certam infirmitatem cuiusdam ancillæ, qui morbus etiam curari poterat à mulieribus peritis, vulgo, *Espinbella*, Prouincialis concessit licentiam non designans certam personam intraturam. Priorissa introduxit in clausuram feminam quandam nobilem, quæ sciebat illi morbo mederi. Intrauit mulier nobilis manens in clausuram, & mansit in illa vsque ad vesperam: quia dixit necessarium esse, vt post applicationem primæ medicinæ, expectaretur tempus, vt constaret de effectu prioris medicinæ, & an esset illa medicina utilis, vel non. Sciens hoc Prouincialis, qui residebat in eadem vrbe, ad vesperam illius diei scripsit ad Priorissam, vt feminam sæcularem eijceret à monasterio: Priorissa statim adduxit feminam ad ianuam conuentus, præcipiens vt exiret. Femina nobilis respondit se non habere ad manum ancillas, & famulos, quibus comitata decenter ad suum statum posset ire per plateas in domum suam: & ideo adhuc mansit in clausura per aliquod notabile spatium. Prouincialis volens punire Priorissam, prius illi exhibuit capitula culparum in hunc modum.

Primò quod feminam nobilem iniuste admisisset in clausuram: nam quando datur licentia vt intret aliqua persona clausuram ad medendum, intelligitur quod sit officialis illius officij, & quod illo vtatur, & viuat ex illo. At mulier illa nobilis non utebatur officio medici, nec vivebat ex eo.

Secundò, quod prælata, & mulier sæcularis incurrerant excommunicationem propter notabilem moram factam intra clausuram.

Tertiò, quod cum Prouincialis eidem prælata mandauerit vt statim feminam sæcularem à clausura eijce

eijceret, prælata distulit, & eam post spatium notabile intra clausuram detinuit.

Responsio ad primum.

1 *Ad primum* respondi dictam feminam sæcularem scientem bene mederi illi infirmitati, non intrasse iniuste, neque illicitè, sed licitè. Fundamentum cui innititur Provincialis quod scilicet data licentia ut intret persona clausuram ad medendum, intelligitur quod sit officialis illius officij, & quod illo utatur, & ex illo viuat, seu sustentetur: dico primo, id gratis dici, sine fundamento, & sine doctore, & sine lege dici. Nam Consilium Tridentinum *sess. 25. cap. 5. de Regular.* ad hoc ut possit quis licitè intrare clausuram Monialium, solum requirit ut intret cum licentia in scriptis, & detur iusta causa intrandi: & nihil dicit de qualitate intrantis quod sit officialis, utens officio, & viuens ex illo. Neque item Bulla Grégor. XII, agens de ingressu in clausuram Monialium requirit aliquam ex illis tribus circumstantijs: cum igitur lex Ecclesiastica illas non ponat, nec nos debemus illas superaddere. Et Collector priuilegiorum Mendicantium vir doctissimus in verbo, *Ingressus monast. Monialium* in casu 5. ex duodecim quos assignat, in quibus est licitus talis ingressus, loquens de medico, qui potest intrare, & citans concessionem Sixti. IV. per quam concessit ut medicus intraret, nullum verbum facit de aliqua ex illis tribus qualitatibus, ut viuat ex officio, & *ut*. Nec item fit mentio talium qualitatium in eodem compendio, & in eodem verbo §. 24. nec in §. 7. de barbitonsore ad venam scindendam intraturo. Neque item hæ duæ conditio-

nes,

nes, quod uiuat ex officio, & utatur officio posita sunt à tot, & tam grauibus Doctoribus recentioribus, qui tractarunt curiosè de clausura Monialium, & explicarunt Bullas Pôtificias ea de re publicatas, quales sunt Rodriguez tom. 1. qq. 9. 47. Suarez *romo de censuris, disp.* 22. Sanchez lib. 6. *Decalogi cap.* 1. ubi agit de medico, chirurgo, &c. & Bonacina omnium nouissimus 1. *romo tract. de clausura Monialium q. 4. puncto* 4. nihil tale specificant de medico intraturo quod uiuat ex officio, &c. Non verò credendum tot, ac tantos Doctores ignorasse illas qualitates in medico intraturo, si illæ essent necessariae.

2 Et in particulari, Bonacina *citato puncto* 4. *num.* 18. ubi hanc materiam tractat exactè, quærit an possit mulier nobilis intrare clausuram Monialium ad faciendum intus aliquod opus vile, quod Moniales non possunt, vel non solent facere, sed tamen dicta femina nobilis habet simul intentionem visitandi, & alloquendi Monialem suam consanguineam, vel amicam. Et responderet Bonacina, quod sic potest. Verba huius tanti Doctoris sunt hæc circa mulierem illam nobilem. Si verò ingrediatur animo reuera præstandi opus, quod moniales commodè præstare nequeunt, excusatur à peccato contra clausuram, quia ex iusta causa ingreditur cum licentia, modò ingrediatur tanquam operarius. &c. Sic ille. Idem tenet Sanchez lib. 6. *Decalogi cap.* 16. *num.* 49. loquens de femina nobili intrante cum animo faciendi opus vile, quam excusat à pœnis: & tamè illa femina nobilis, de qua loquitur Bonacina, & Sanchez intrans ad faciendum opus vile, neque est officialis illius vilis ministerij, neque illo utitur, neque ex illo uiuit: ergo hæ tres conditiones non requiruntur in intrante clausuram. Modò applico hanc doctrinam

doctrinam ad nostrum casum. Hæc mulier nobilis, de qua agimus, ingressa fuit clausuram cum animo re vera medendi, & illa sciebat re vera talem artem medendi, & de facto illam intus exercuit. Et ingressa est cum licentia speciali in scriptis. Nam licet Prouincialis in sua licentia hanc feminam particularem non expresserit proprio nomine, adhuc tamen dicitur intrasse cum licentia speciali, eo quod Prouincialis in scripto dixit vt intraret aliqua persona ad exercendam dictâ medicinam. Hæc enim licentia sic concessa licet fuerit generalis quoad personas, fuit tamen specialis quoad ingressum medendi huic morbo. Sic tenet Bonacina citata q. 4. punct. 3. n. 1. Facit etiam ad hoc intentum, quod dicit Collector priuilegiorum Mendicantium citato verbo, *Ingress. Monast. Monialium*, in casu 7. vbi ait. *Quod fratres Minores, qui assistunt obsequio Monialium, vt capellani, hi si fuerint artifices idonei, poterunt ingredi clausuram ad laborandum in tali opere, etiam si inuenirentur artifices seculares.* Et hoc ait, non obstante quod fratres Minores ex præcepto suæ Regulæ non possint ingredi monasteria Monialium: sed ait posse prædictos fratres intrare cum licentia sui prælati. Hæc autem femina nobilis æquè bene sciebat mederi illi morbo, ac medentur medici masculi: & addo quod cæteris paribus decentius fuit vt intraret femina ad curandum hunc morbum, quàm vt intraret masculus. Nam, vt Doctores dicunt, minor causa requiritur vt detur licentia, quod mulier intret clausuram Monialium, quàm vt vir intret eandem clausuram, propter maius periculum répertum in hoc ingressu viri quàm in primo ingressu feminae: ergo licet adesset Medicus, qui posset intrare ad medendum, & simul adesset

adesset femina, quæ æque bene eidem morbo mederetur, decentius, & se curius fuit vt intraret femina medica, quàm vir medicus.

3 Denique in speciali contra illas tres qualitates, vel circumstantias, quas requirit pars opposita ad ingressum, sic propono: Quod attinet ad primam quam requirit, vt ingrediens sic officialis illius officij: dico hanc feminam fuisse officialem illius officij: sciebat enim mederi illo morbo, vt constitit. Potest enim dari aliquis morbus, cui æquè bene medeatur femina, atque vir: maximè cum possit aliquando mulier habere gratiam curationem. Et in particulari, quod vt medicus intret ad curandum Moniales, non sit necessarium, quod talis medicus vratur officio, & viuat ex illo; probo clarè isto exemplo. Est in hac ciuitate quidam medicus antiquus iubilatus, qui præ senectute neminem curat ostiatim, & proinde neque officium medici exercet, nec viuit ex illo. Quis negabit posse hunc intrare clausuram ad medendum certæ graui infirmitati Monialis? Ergo vt intret medicus clausuram Monialium, non requiritur vt exerceat officium, nec requiritur vt viuat ex tali officio.

Responsio ad secundum capitulum.

4 *Ad secundum* capitulum de mora longa facta ab hac femina nobili intra clausuram, dico, quod præcisè ex longa mora intra conuentum facta, ista mulier non incurrit censuras Ecclesiæ contra indebitè ingredientem (quidquid sit fortè de peccato ibi commissio.) Hanc conclusionem in terminis tenet Bonacina cit. *somo 1. & tractatu de clausura q. 4. punct. 4. n. 22.*

fol. 540. vnde proponens nunc eundem numero casum: an incurrat pœnas Bullarum, is qui licitè intrauit clausuram, sed non exiuit statim finito opere: respondet non affici pœnis: *Quia, inquit, ista censura late contra ingredientem sine licentia, & sine iusta causa, solum ligant ingredientem sine causa, & sine licentia. Hic autem ingressus est cum licentia, & iusta causa, ut suppono.* Hæc autem femina nobilis, de qua quæritur, ingressa est cum licentia in scriptis, ut constat, & cum causa iusta, qualis fuit mederi infirmæ. Ait tamen citato loco Bonacina, potuisse hunc sic ingredientem peccare ob longam moram intus factam absque necessitate. Facit ad hoc omnino quod excommunicatio posita contra vnâ actionem, non extenditur ad aliam actionem diuersam, cum pœnæ sint restringendæ, & non extendendæ, ut latè inter alios probat Rodriguez tom. 1. qq. 9. 47. ar. 1. §. *Quod si obiciat*, loquens in materia de clausura Monialium, & citans Caietanum, & Nauar. Facit inquam illa Regula iuris, odia restringi, & cæ. Hæc autem lex posita contra illicitè ingredientem clausuram, est odiosa ut patet & solum exprimit illicitè ingredientem: ergo non debet extendi ad illicitè morantes intra clausuram. Secundò, quod hæc femina nobilis non incurreret censuras propter longam moram intus factam, probatur ex illo quod dictum est in propositione casus, videlicet fuisse necessariû expectare tempus, ut experientia sumeretur de prima medicina applicata an proderet, an noceret, & sciri posset quomodo applicarentur medicinæ in posterû. Durante verò hac causa manendi, non erat mora culpabilis, sed necessaria: & proinde si durauit necessitas manendi, nec proinde commissum est peccatum, etiam non est incurta pœna censura, quia

quia ubi non est culpa, non ponitur pœna. Et quod hæc mora intra clausuram, non fuerit culpabilis, nec insolita probatum est per Moniales eiusdem conventus, testificantes, quod in eundem conventum sæpius olim aliquæ feminæ ingressæ sunt propter eandem causam medicandi, & ingressæ sunt, & exierunt ad vesperam. Quod facit ad suspicandum etiam hic interuenisse bonam fidem. quæ etiam excusat à censura, maxime in feminis, quæ ignorant textus, & leges. Potest hoc probari exemplo artificum, vel operariorum qui ingrediuntur clausuram Monialium ad laborandum in opere requirente moram: hi enim ingressi manere non exeunt nisi ad solis occasum, quia durat necessitas morandi: quod habet similitudinem cum nostro casu.

§ Denique, quod hæc femina nobilis, non incurrit censuras motuum propriorum Papalium, probatur ex his quæ tradit Sanchez *lib. 6. Decalogi* loco supra citato, & eodem libro *cap. 5. num. 7.* cum hoc exemplo quod ibi adducit à contrario sensu. Exiit quædam Monialis à suo conventu cum causa iusta, & licentia prælati, ut verbi gratia, extra conventum curaretur à lepra. Et post sanitatem adeptam moram fecit notabilem extra conventum non rediens ad clausuram. Hæc talis peccauit quidem ob moram factam extra clausuram: sed ob prædictam moram non incurrit censuras Bullarum: nam Summi Pontifices solum excommunicant Moniales illicitè exeuntes à clausura: non verò excommunicant illas, quæ post licitum egressum moram faciunt extra clausuram. Quod exemplum est accommodatissimum ad nostrum casum. Nam hæc femina nobilis ingressa est clausuram, licitè, cum causa, & licentia; & licet aliquā

culpam cōmitter & in mora manendi, propter hanc moram non incurrit censuras Bullarum: quia tales Bullæ solum excommunicant illicitè intrantes clausuram Monialium, non verò excommunicant illum, qui post licitum ingressum moram notabilem facit in eadem clausura: & citat Sanchez in loco cit. Zerolam, qui similem doctrinam tradit in alio casu difficiliore,

Responsio ad tertium capitulum.

6 *Ad tertium* capitulum obiectum responderetur, hanc prælatam ubi primum accepit epistolam Provincialis adduxisse feminam sæcularem ad ianuam conuentus, illique dixisse, vt exiret à conuentu, vt constat ex testibus, maxime ex testimonio ianitiæ: quo quid amplius prælata debuit facere? Quæ Moniales testes asserunt prædictam feminam sæcularem non habuisse tunc ad manum ancillas, & famulos, quibus decenter ad suum statum irer ad domum suam. Defectus verò huius decentis comitatus tali feminæ concedebat id quod aliàs lex non permitteret. Pro quo sunt duo exempla clarissima. Primum est: Tempore interdicti, habet vir nobilis priuilegium, vt possit audire missam in Ecclesia. Hic pergit ad Ecclesiam comitatus tribus, vel quatuor famulis associatus iuxta suum statum. Dicunt omnes Doctores, quod talis nobilis potest secum introducere suos famulos ad Missam audiendam, licet tales famuli per se non possint missam audire: sed talis vir nobilis propter suum decentem comitatum potest illos introducere: & sic ratione decentis comitatus in viro nobili permittitur id quod aliàs non liceret. Secundum

dum exemplum sit Nauarri in *summa capite 21. numero 4.* Henriquez, Toleti Azoris & aliorum quos citat, & sequitur Bonacina *tomo primo disputatione 4. de sacramento Eucharistia, questione ultima, puncto ultimo, numero 8.* qui omnes dicunt, quod si femina honesta, & nobilis caret veste conueniente suæ personæ, aut socia, seu pedissequa sine quibus, aut irrideretur, aut pudore afficeretur, excusatur à præcepto Missæ audiendæ in die festo. Quod exemplum valde iuuat ad nostrum intentum. Nam plus obligat in Ecclesia Dei, vel saltem non minus obligat in Ecclesia præceptum audiendi Missam in die festo, quam obliget præceptum clausuræ Monialium: & tamen femina nobilis carens decenti comitatu ad Missam audiendam excusatur ab illius præcepto, iuxta tot graues Doctores: ergo hæc femina nobilis, de qua agimus excusata fuit à præcepto exeundi statim à clausura Monialium quam licitè intrauerat, propter defectum comitatus decentis vt posset exire, & redire ad domum suam: & proinde in eo tunc non peccauit, nec censuram incurrit. Si verò illa non incurrit, non peccauit, nec peccauit prælata illam pro tunc non eiciens comitatu carentem.

7 Obiicis, & probas, hanc prælatam post factam curationem, non eiecisse feminam sæcularem à clausura, sed potius cum illa communicasse, illique prandium exhibuisse, quod clarè est feminas sæculares intra clausuram admittere, seu detinere. Bulla verò Gregorij XII. excommunicat omnes Moniales introducentes, & admittentes personas sæculares intra clausuram. Respondeo primò, prælatam istam excusari ex eo quod iam supra dictum est, credidisse, videlicet ex dicto feminae medicantis necessariam esse

moram intra clausuram pro sumenda experientia primæ medicinæ applicatæ : quod maxime credere poterat prælata , tum quia perito in arte sua credendum est : tum quia sciebat iam antea sæpius alias feminas nobiles ingressas fuisse eandem clausuram pro eodem morbo curando , & similem moram fecisse. Ob quæ omnia facile credendum est prælatam, cum esset mulier, & ignara iuris, habuisse bonam fidem : & habens bonam fidem non incurrit censuras : quia Bullæ Pontificiæ in materia clausuræ, non excommunicant nisi præsumentes, id est facientes cum mala fide : & proinde si quis in hac materia clausuræ contraueniat Bullæ per ignorantiam crassam, & inuincibilem, excusatur à censura, ut communiter Doctores exponunt , maxime Bonacina *tomo 1. tract. de clausura q. 4. puncto 5. numero 8.* Secundò respondeo prædictam Bullam Gregorij solum excommunicare illas Moniales, quæ admittunt, alloquuntur, & comitantur sæculares iam ingressos clausuram, quando illi sæculares illicitè sunt ingressi, secus si licitè sunt ingressi, ut Doctores communiter exponunt. At ista femina nobilis non est ingressa clausuram illicitè, ut satis constat ex dictis.

Et constat quod hæc prælata accusata apud Tribunal D. Collectoris, non fuit priuata officio, sed libera dimissa, tanquam non incurfa censuras Apostolicas.

CASVS LXXVII.

*De quadam Nouicia iussa recipi ex
mandato Papæ.*

IN quodam conuentu Monialium recepta sunt
suffragia pro admitteuda quadam femina ad no-
uitiatum. Moniales omnes pro illa suffragium de-
derunt, cum declaratione, quod non intraret nisi
vacante loco per mortem alicuius Monialis; erat
enim tunc numerus taxæ Monialium completus.
Mortuâ primâ Moniali prælata cum conuentu no-
luit prædictam feminam iam per suffragia con-
uentus receptam, introducere ad nouitiatum in-
choandum, sed aliam receperunt. Pater istius fe-
minæ litem mouit Olysippone coram Nuncio Apo-
stolico per longum tempus contra conuentum; &
postea per appellationem causa deuoluta est ad Pa-
pam; & lis durauit per decem, vel vndecim annos,
intra quod spatium conuentus alias Nouitias rece-
pit. Tandem his annis decursis Romæ in Rota Ro-
mana sententia lata est, per quam prælata illa, &
conuentus iussus est sub pœnis grauissimis, vt præ-
dictam Nouitiam ad nouitiatum, & professionem
admitterent: & soluerent quinquaginta scuta au-
rea patri nouitiæ pro expensis factis in lite: & sic
Nouitia statim recepta est ad habitum. Et declara-
tur quod conuentus antea post suffragia illi data,
noluit illam recipere eo quod esset grandæuæ ætatis,
nec haberet vires, seu ætatem ad supportandam au-
steritatem, & rigorem Regulæ Ordinis illius.

1 Nouitia sic admissa ex mandato Papæ, orta sunt aliqua dubia propter aliqua verba Bullæ, quorum aliqua infra referentur. Primum, & principale dubium, oritur est: an conuentus in discursu nouitiatus posset illi negare suffragia ad professionem, si illam inueniret inhabilem, & defectuosam, & proinde potest illam ob defectus expellere. An verò teneatur illam admittere ad professionem, etiam si ne suffragiis, cum Papa in Bulla dicat vt admittatur ad nouitiatum, & professionem?

2 Secundò quæsitum est, an conuentus possit obligare patrem Nouitiæ, vt det conuentui dotem, vel eleemosynam, quam solent afferre certæ Nouitiæ pro sua sustentatione iuxta consuetudinem illius conuentus?

3 Tertiò, an incurret aliquam pœnam Monialis quæ alteri Moniali suaserit, vt illi Nouitiæ suffragium neget ad professionem: vel illa quæ eidem Nouitiæ, aliquam molestiam fecerit vt illa sic molestata velit exire à monasterio.

4 Cum dicat Papa in sententia, quod dicta Nouitia post professionem ponatur in possessione illius loci, ad quem primò recepta fuit. Quæritur an illa post professionem debeat habere priuilegium antiquitatis iuxta illud tempus, in quo primò admissa fuit per suffragia, & proinde præcedere debeat quoad locum omnes illas, quæ illis duodecim annis intrarunt post suam primam receptionem?

Responsio particularis ad primum quæsitum.

5 Quod attinet ad primum quæsitum, pro parte affirmatiua, quod scilicet conuentus teneatur illam
admit

admittere non solum ad nouitiatum, sed etiam ad professionem, etiam sine suffragiis Monialium: probatur ex aliquibus verbis Bullæ, quæ id videntur innuere. Primò enim dicit sententia sic: *Declaramus prædictam esse recipiendam in Monialem, & Nouitiam.* Vbi non solum dicit recipiendam esse in Nouitiam, sed etiam in Monialem: quæ duo verba simul iuncta videntur obligare ad vtrumque, id est ad nouitiatum, & professionem. Et infra in alio loco eiusdem sententiæ, sic dicitur: *Eamque sic receptam, & admissam pro tali retinendam, & conseruandam, & suis loco, & tempore ad professionem pariter recipiendam, & admittendam si voluerit profiteri.* Quæ verba aded clara sunt, vt omnem dubitationem videantur excludere: & obligare conuentum ad dandam illi professionem. Tertia clausula ponitur in fine eiusdem sententiæ: cum dicitur, quod mittatur in possessionem illius loci, qui ei primò fuit denegatus: *Et in eo manuteneatur, & iuribus illius gaudere possit, & valeat.* At constat, quod si illam iubet gaudere priuilegio, & iuribus illius loci, qui illi primò fuit denegatus, talis locus erat Monialis professæ, & hunc locum iubet Papa illi donari, quod fieri non potest nisi per professionem. Constat verò quod Papa potest præcipere vt alicui Nouitio fiat professio absque suffragiis conuentus.

6 Hoc non obstante, ego sentio, quod si ista Nouitia pro discursu nouitiatu inuenta esset inhabilis ad vitam Religiosam vtpote, quia haberet malos mores vel tam infirma esset valetudine, vt in lecto semper decumberet, possent Moniales illi negare suffragium ad professionem: & proinde deficientibus suffragiis possent illam à monasterio expellere. Ante huius cõclu-

sionis probationem suppono vt rem certissimam, quod iudex in sententia nunquam indicat, vel mandatar plus quàm illud, quod petitum fuit in libello, & initio litis. Imò reprehenditur in iure is qui petit plus quàm sibi debetur, vt patet in *cap. unico de plus petitionibus*. Et testis qui plus testificatur, quàm ab illo petatum est, reprobatur in iure, vt omnes admittunt. Hoc posito, Sic primò argumentor: Ista mulier à Papa solum petiuit vt obligaret conuentum vt se reciperet ad nouitiatum sicut conuentus promiserat per modum contractus: non verò petiit à Papa vt iuberet se admitti ad professionem, hoc enim conuentus nondum illi promiserat, cum illi nondum daret suffragia ad professionem, sed ad solum nouitiatum: ergo non est credendum quod Papa plus illi concesserit, quàm illa petierit: illa autem solum petiit receptionem ad nouitiatum; ergo hanc solam illi Papa concessit. Et hoc probatur ex verbis ipsius sententiæ, in cuius protémio, & narratione rei gestæ, dicit, *Quod Abbatissa, & Moniales tenentur recipere dictam oratricem pro Moniali iuxta acceptationem aliàs de ea legitimè factam*. Notetur hoc verbum, *iuxta acceptationem de ea factam*, id est iuxta antiquam, & primam receptionem ad habitum, & nouitiatum, quæ non est sortita effectum: & proinde iuxta hæc verba, solum iubet Papa, vt recipiatur ad nouitiatum: & vult validare antiquam receptionem ad habitum nouitiatus tantum. Idem colligitur ex eadem sententia Papæ paulò post, vbi referens quod Abbatissa, & Moniales eam recipere noluerint, & indebitè hoc fecerint post contractum receptionis, ponit hæc verba: *Super indebita denegatione receptionis huiusmodi, &c.* Itaque mulier solum conquesta est, quòd

quòd Moniales illam recipere ad habitum noluerint: & huius tantum restitutionem à Papa petiit. Et hoc solum illi Papa in sententia concessit, non verò professionem. Et hoc ipsum indicant illa alia verba sententiæ, quæ dicunt: *Recipiatur ad professionem si volueris profiteri, iuxta morem solitum aliarum Monialium, & regula dicti Ordinis.* In quo Papa clarè innuit, quod post absolutam receptionem nouitatus, ad quã obligat conuentum, deinde obseruetur consuetudo, & Regula dicti Ordinis. At consuetudo Monialium, & statutorum illius Ordinis est, vt conuentus post receptionem ad habitum, per annum experiatur mores Nouitij, & liberè per suffragia ad professionem admittat. Secundò principaliter probatur quia Concilium Tridentinum *sess. 25. c. 16. de Regular.* concedit vt prælati Religionum ante professionem possint eiicere inhabiles: imò ad hoc præcipit vt Nouitius persistat in nouitiatu anno integro, vt possit conuentus experiri mores Nouitij, ne aliàs recipiat ad Ordinem personam indignam, cum detrimento totius Religionis, sed Papa in hac sententia non dispensat in Concilio Tridentino, imò non solet in illo dispensare: ergo non prohibuit in hac sententia, quin posset conuentus vti libertate in Tridentino concessa ad eiicendos ante professionem, illos quos inhabiles inuenerint. Et confirmatur clarissimè: quia Papa in hac sententia, supponit clarè, & iubet, vt illa faciat annum nouitatus, & postea profiteatur, si voluerit. Ad quid ergo erit Nouitia vno anno nisi vt Religio mores illius experiatur; & vt possit eiicere si inhabilem inuenerit? Aliàs si Papa oppositum vellent, mandaret vtique, vt reciperetur ad habitum, & statim admitteretur ad professionem, quod non fecit.

7. Tertiò principaliter probatur : quia rescriptum contra ius commune, vel cum præiudicio tertij, non est seruandum, vt habetur expressè in *capite Rescripta* 25. q. 2. & habet glossa in *cap.* Nonnulli *de rescriptis*, in verbo *fecerint*, & *cap. Pastoralis de fide instrum.* & glossa *ibidem in verbo, Diffona*. At sit Papa in hac sententia absolute præciperet vt reciperetur ad professionem, non expectato consensu conuentus per suffragia, posset tale mandatum esse contra bonum commune Religionis & cum præiudicio illius particularis monasterij, recipiendo illam si aliàs esset inhabilis : quod de summo Pontifice non est credendum. Præterea foret illud mandatum contra ius commune, quia de iure communi creatio Monachi pertinet ad Abbatem, & conuentum, per consensum videlicet vtriusque, vt probat Rodriguez t. 3. *questionum, quest. 2. art. 7.* citans vnā glossam communiter receptam, & aliquos graues Doctores Iuristas. Vltimò probatur clarè per casum *capituli*, causam quæ, *de electione*, vbi dicitur quod vacante Abbatissa in aliquo conuentu Monialium: Moniales omnes compromiserunt se in Episcopum, vt ipse vnā designaret in Abbatissam, & quod hanc ab eo designatam, illæ omnes pro Abbatissa essent recepturæ. At paulò post Moniales pœnituerunt de facto, & voluerunt mutare compromissionem. Delatus est casus ad Papam. Et Papa respondit quod conuentus acceptaret Abbatissam ab Episcopo designatam : sed addit Papa hæc verba : *Si tamen existat idonea*. Vbi glossa, verbo, *Si tamen*, citans multos textus, ait, quod quando aliquid vt fiat committitur alicui, debet intelligi quod committitur vt fiat legitime, & seruato ordine iuris. Et glossa in *capite* Cum adeò *de rescriptis*, verbo,

verbo, *si dignus*, ait quod ista conditio, *Si digna existat*, habetur pro intellecta seu inclusa in omni electione, etiam si non exprimat. Qui casus habet multam similitudinem cum nostro. Nam in hoc nostro casu voluerunt Moniales rejicere illam, quam iam receperant per suffragia: iubet Papa ut illam recipiant, quod intelligendum est, *Si idonea existat*. Præterea iubet Papa ut hæc admittatur ad professionem suo tempore, intelligitur, *Si idonea existat, & seruato iuris ordine*, receptis prius suffragij Monialium: cum iuxta citatas glossas, quando aliquid faciendum committitur, semper intelligitur seruato iuris ordine, & præterea, si idoneus existat. Et ex hoc solo fundamento respondetur ad omnes obiectiones in oppositum supra adductas ex verbis ipsius sententiæ.

8 Quod ergo attinet ad priora verba citata ex ipsa sententia, quæ dicunt, *Recipiatur in Nouitiam, & Monialem*, dico intelligi, quod recipiatur in Monialem seruato iuris ordine, & præterea, si idonea existat, quas duas condiciones diximus supra esse intelligendas in omni commissione, & electione: non enim credendum est quod Papa velit ut ordo iuris non fertur, vel ut eligatur non idonea. At ordo iuris est ut admissio ad professionem fiat per suffragia libera conuentus. Et Concilium Tridentinum citatum concedit ut excludantur Nouitij inhabiles. Eodem modo respondetur ad omnia alia verba adducta ex sententia, per quæ Papa videtur præcipere ut admittatur ad professionem, & ad locum defunctæ, in cuius locum primò recepta fuit. Dico enim Papam iubere, ut admittatur ad professionem & locum, seruato ordine iuris, & præterea si idonea reperta fuerit. Ad id verò quod vltimò addit, posse Papam præcipere ut ali-

quis

quis admittatur ad professionem absque suffragijs, & consensu conuentus, concedo id posse Papam; sed id debet exprimere, cum sit contra ius commune, & praxim omnium Religionum: & propterea debet dicere quod dispensat. At in hoc casu id Papa non exprimit: sed potius specificat quod admittatur ad illa omnia, *Secundum solitum morem Monialium*. Mos autem omnium Monialium est ut ante professionem recipiantur suffragia conuentus cum libertate negandi vel dandi suffragium.

Responsio ad secundum quæsitum.

9 Ad secundum quæsitum dico posse conuentum obligare patrem Nouitiæ, ut sibi det dotem, vel elemosynam consuetam, quæ dari solet in ingressu aliarum Nouitiarum. Probatur ex praxi generali Ecclesiæ per quam omnes Nouitiæ afferunt secum aliquid pro sua futura sustentatione, & fauet ratio naturalis: nam si femina nubens dat dotem marito ad sustentanda onera matrimonij, & pro sua sustentatione. Eadem ratio dicat, ut Nouitia pro sui sustentatione aliquid donet monasterio, Cumq; monasterium habeat hoc ius petendi hanc dotem à Nouitia, Sumus Pontifex in hac sententia obligans monasterium ad illam recipiendam, non intendit tollere monasterio hoc ius quod habet ad petendam dotem pro sustentatione Nouitiæ. Probatur hoc clarè per multos textus adductos à glossa super *cap. Ecce in præfatione, distinctione 99.* præcipuus verò textus ibi citatus, est *capitulum* super eo *de off. deleg.* vbi Papa dicit: *Non est intentionis nostre alicui derogare per rescriptum nostrum.*
Quod

Quod verò sit licitum hanc dotem exigere à Nouitia intrante, vltra praxim Ecclesiæ tenet, & probat Rodriguez *tomo 2. qq. q. 48. per totam.* Idem tenet Zerola *in sua praxi Eccles. verbo* Moniales *1. p. §. Ad decimum octauum,* vbi citat alios.

Responsio ad tertium quæsitum.

10 Ad tertium quæsitum dico, quod si tempore nouitiatus Nouitia habuerit defectus notabiles, propter quos sit inhabilis ad Religionem, & possint ei negari suffragia, iuxta dicta in responsione ad primum nihil peccabit Monialis suadens alteri vt neget illi suffragium; quia sic suadens mouetur zelo boni communis, ne admittatur indigna ad Religionem. Si verò Nouitia non habuerit defectus, & culpas, peccabit mortaliter Monialis quæ suaserit alteri vt illi neget suffragium. Tunc enim saltem indirectè, violat mandatum Papæ, præcipienti in hac sententia, vt Moniales illam recipiant ad professionem, quod intelligitur iuxta prædicta, si illa non fuerit defectuosa. Probatio istius conclusionis quoad secundam partem pender ex eo quod dixi in meo 1. *tomo Dubiorum Regularium, verbo* Nouitius, *num. 54.* vbi dixi peccare mortaliter Religiosum, qui Nouitio habili negat suffragium ad libitum. Sic sentiunt Corduba, & Miranda, quos ibi citaui: & post illos vidi Suarez idem dicentem *tomo 3. de Relig. lib. 4. de voto cap. 3. num. 3.* Fundamenium quo id probaui citato meo *tom.* fuit quia Religio facit pactum virtuale cum Nouitio admissio, quod si rectè se gesserit tempore nouitiatus, illum admittet ad professionem, violat verò hoc pactum Religiosus qui postea Nouitio rectè
pro

procedenti negat suffragium ad libitum. Hæc mea olim opinio clarè confirmatur per decretum huius sententiæ papalis, in qua Papa obligat Abbatissam, & Moniales ut recipiant hanc Nouitiam ad habitum, & professionem propterea quod iam illam receperant per suffragia: quod in substantia fuit dicere, ut illam recipere propter contractum, & promissionem, quam illi fecerunt de illa recipienda. Eodem verò modo Religio recipiens Nouitium ad habitum facit cum illo pactum, quod illum recipiet ad professionem si rectè processerit, & proinde non poterit illi negare suffragium, si bene processerit. Facit ultimò quod dicunt Doctores communiter, & iam a nobis in præcedentibus adductum est, videlicet peccare illum, qui impedit aliquem ab æsecutione alicuius boni, ad quod habet ius ad rem. At Nouitius alias idoneus, & carens defectibus, habet ius ad professionem iuxta prædicta: & qui illi negat suffragium, impedit ex se professionem, ad quam ius habet: ergo peccat mortaliter.

Responsio ad quartum quesitum.

II Ad quartum quesitum dico, quod ista Nouitia post professionem debet habere locum, & præcedentias quas habebat illa in cuius locum recepta fuit: & proinde debet præcedere illas quæ ante se intrarunt his annis duodecim à die quo mortua est illa in cuius locum ista Nouitia primò per suffragia recepta fuit. Hæc habetur clarè, & verbis expressis in hac sententiæ Papæ: quæ in duobus, vel tribus locis dicit, *Quod dicta Nouitia recipiatur, & ponatur in possessione illius loci, ad quem primò recepta fuit per mortem sororis*

fororis Maria de Spiritu sancto. Et assignat sententia causam dicens, quod quando appellauit ad Papam, protestata fuit, ne frustraretur dictæ acceptionis, & fructibus rei iudicatæ. Et fructus illius loci, ad quem recepta fuit, quem Papa illi reddi iubet, est præcedentia loci, vt patet. Et probatur, nam qui habet ius ad aliquam rem, habet etiam ius ad omnia emolumenta eiusdem rei: verbi gratia habet Petrus ius ad beneficium ad quod fuit electus: ex consequenti habet ius ad omnia commoda, & emolumenta talis beneficij. Cum ergo hæc Nouitia habeat ius ad illum locum Monialis de mortuæ, in cuius locum ista recepta est, quem locum Papa præcipit sibi dari: ex consequenti habet etiam ius ad præcedentiam, quæ est annexa ad illum locum & commodam ipsius. Et tandem in eadem sententiâ prope finem dicitur, quod dicta Nouitia *Admittatur ad possessionem dicti loci, & iuribus illius gaudere possit, & valeat.* Quo nihil clarius ad intentum dici potuit.

CASVS LXXVIII.

*De quodam putante se bis contraxisse
matrimonium.*

Quidam matrimonio copulatus relictâ verâ vxore, secessit in partem longinquam eiusdem Regni, ibique commoratus, credens vxorem priorem adhuc viuere, matrimonium contraxit cum alia secunda. Sed postea constitit, quod quando matrimonium cum ista secunda contraxit, prima vxor erat iam mortua, quod ille ignorabat: & proinde quando

contraxit cum secunda neque intendit, neque credit se contrahere matrimonium, sed appetitu carnis hoc fecit.

Quæsitum est primò, an hoc secundum matrimonium fuerit validum, cum iam prior coniux reuera fuisset mortua, & ipse posset validè nubere secundæ?

Secundò quæsitum est, dato quod matrimonium secundum fuerit nullum, quo remedio poterit reuolidari, vt occurratur scandalo quod oriri potest ex separatione.

Tertiò quæsitum est an dato quod secundum matrimonium fuerit nullum possit hic homo secretè fugere, & relinquere secundam putatam vxorem.

Responsio ad primum.

I Ad primum quæsitum dico, secundum matrimonium fuisse irritum, & nullum. Probatio clara est, nam hic, vt dicitur in informatione, non intendit contrahere matrimonium cum secunda: cum enim esset Catholicus, & sciret non posse consistere matrimonium cum duabus simul viuentibus, & aliàs crederet suam primam vxorem viuere, non poterat consentire in secundam, tanquam in vxorem. Constat autem tanquam de fide quod ad verum matrimonium requiritur consensus liber, quo vir, & femina sibi adinuicem mutuo consentiunt, itavt deficiente hoc mutuo consensu matrimoniū sit nullum. Neque obstat, quod prior coniux istius viri iā à parte rei esset mortua, & proinde posset iam ille validè contrahere cum secunda: non obstat, quia licet à parte rei ille posset contrahere cum secunda, ille credens priorem viuere non intendit contrahere matrimonium

monium cum secunda, & proinde in secundam non consensit tanquam in vxorem. Quod autem de fide sit requiri mutuum consensum liberum vtriusque ad validitatem matrimonij, probat Sanchez *lib. 2. de matrim. disp. 25.* ex Concilio Florentino *in decreto de sacramento matrim.* & ex cap. *Sufficiat 27. qu. 2.* & cap. *Tuas*, de sponsa duorum, & aliis textibus ibidem.

2 Quod attinet ad secundum, de remedio reuolidandi, seu ratificandi hoc matrimonium; Dico primò in hoc casu non requiri aliquam dispensationem Episcopi. Potest quidem Episcopus dispensare in foro conscientiae cum aliquibus qui matrimonium inualidè contraxerunt propter impedimentum occultum dirimens, vt praxis quotidiana obseruat illos in hoc occultè dispensare, & Doctores communiter tradunt. At in nostro casu non interuenit dirimens aliquod impedimentum. Nam si aliquod impedimentum interueniret, maximè esset impedimentum ligaminis, id est ligati altero matrimonio: sed hoc non exstabat verè, cum prior vxor iam esset mortua tempore secundi matrimonij: ergo non exstabat impedimentum dirimens, neque hodie extat, vt denuo contrahant: & proinde non est necessaria dispensatio Episcopi. Neque obstat quod iste sic contrahens crediderit subesse tale impedimentum ligaminis, quia conscientia erronea ipsius non sufficiens ad inducendam, non est impedimentum dirimens. Nam impedimenta matrimonij non inducuntur per conscientiam erroneam cuiusque, sed per verum Ecclesiae decretum.

3 Dico secundò ad reuolidandum hoc secundum matrimonium necessarius omnino est cōsensus illius viri, quo consentiat denuò in matrimonium cum illa

muliere. Et res clara est : quia cùm consensus liber sit de essentia matrimonij, & in hoc de fuerit consensus ex parte viri, necessarium omnino est ad illius ratificationem, vt viri consensus denuo accedat. Tota dubitatio est, quomodo hic vir hodie præstare debeat hunc consensum : an scilicet vxor simul debeat cum illo consentire denuo; an verò sufficiat quod ipse solus apud se consentiat? Dubium hoc tractat Sanchez lib. 2. de matrim. disp. 32. num. 8. dicens duas esse opiniones, quarum prima asserit, quod quando contrahendo matrimonio alter coniux fictè consensit, postea vt tale matrimonium reualidetur, debet vterque denuo consentire. Sed ipse ibidem n. 9. & seqq. tenet & probat satis esse si postea solus ille consentiat, qui prius non legitimè consenserat : & citat pro hac opinione vltra viginti graues Doctores Theologos, & Canonistas. Et ratio est quia cùm iam consensus alterius legitimè datus sit, neque fuerit reuocatus, non est quod denuo requiratur. Probat eandem conclusionem cit. disp. num. 14. exemplo professionis monasticæ. Nam si Nouitius aliàs habilis quoad ætatem & annum integrum nouitiatus, & sic de ceteris requisitis, professionem emitrat exteriùs, sed interiùs non consensit, neque habuit animum proficendi; talis professio fuit nulla, vt pater. At vt talis professio postea ratificetur sufficit internus consensus ipsius professi, quo consentiat, & approbet professionem : nec requiritur nouus consensus Religionis, quia ista iam consensit in personam aliàs habilem, nec consensum reuocauit. Eodem modo in nostro casu, iam hæc secunda mulier consensit in hunc hominem aliàs habilem eò quòd prima vxor à parte rei esset iam mortua : neque illa suum consensum reuocauit : ergo ad validandum hoc matrimo-

nium sufficit vt accedat solus consensus istius viri, qui antea inualidè contenserat.

4 Ad tertium quæsitum videtur posse dici, quod iste non teneatur manere cum ista muliere, nec matrimonium cum illa ratificare: sed posse secretò fugere; cum enim matrimonium nullum fuerit, videtur quod nullam pariat obligationem: nam quod de se nullum est, nullum producit effectum. Hanc quæstionem tractat Sanchez *lib. 1. de matr. disp. 11.* & citat duas opiniones quarum prima docet, non teneri consentire in matrimonio illum qui prius fictè consensit pro qua citat multos, & graues Doctores. Probatur ista opinio exemplo à pluribus Doctoribus recepto in materia professionis monasticæ: nam ille qui fictè professionem emisit, non tenetur, secluso scandalo, verè profiteri, sed potest ad eum locum se recipere vbi cesser scandalum, vt tenent Sotus, Nauarrus, Angles, & Henriquez ibi citati à Sanchez: ergo etiam qui prius fictè consensit in matrimonium, non tenetur postea verè consentire. Videtur enim in vtroque eadem ratio. Nihilominus Sanch. *citata disp. n. 5.* tenet cum aliis, quos citat *ibid. n. 4.* hunc hominem teneri non discedere à tali muliere, sed obligari ad ratificandum matrimonium. Citat pro illa Sanchez decem graues Doctores. Probatur, quia hîc interfuit contractus. *Do, vt des;* & alter iam impleuit tradendo potestatem sui corporis titulo matrimonij: ergo fictor tenetur verè implere ex obligatione naturali contractus. Secundò, quia sequitur alteri grauissimum damnû: cum enim in foro Ecclesiæ probare nequeat fictum alterius consensum, non permitteretur inire alterum matrimonium, cogeturque continenter vivere: quæ rationes sunt efficaces. Tertiò illam probò

ex ijs , quæ tradit idem Sanchez *cit. lib. 1. disp. 10. n. 3.* vbi cum multis Doctoribus, & rationibus probat illum qui fictè promisit matrimonium alicui feminæ, & sub ea spe illam deflorauit, teneri sub peccato mortali illam ducere. Imò & ipse Sanchez *cit. disp. 11.* extendit hanc opinionem, vt vera sit, quamuis femina fictè ducta non sit virgo. Adhuc enim damnum grauissimum patietur cum continenter viuere compellatur. Pro quo citat Sotum, Banhez, Petrum de Ledesma. Extendit secundò, hoc verum esse, quamuis fictè contrahens minimè copulam habuerit, adhuc enim tenetur verè contrahere, quia adhuc damnum illud sentit decepta, vt compellatur abstinere ab alio matrimonio. Extendit tertio Sanchez hoc verum esse, etiam si fortè contrahentes matrimonium sint dispartes quoad nobilitatem, vel diuitias: adhuc enim tenetur fingens consensum verè contrahere. Sed iterum noto, ad præstandum hunc consensum non fuisse necesse quod hoc intimetur feminæ deceptæ, vt iam diximus, & proinde non est necessarium quod iste consensus præstetur coram parcho, & testibus, iam hæc solemnitas facta, est quando celebratum est primò matrimonium, & illa solemnitas sufficit ad satisfaciendum Ecclesiæ, & populo.

5 Ad argumentum suprà positum in contrarium nitens in exemplo fictè professi, qui non tenetur ratificare professionem, Respondetur primò cum Sanchez *cit. disp. 21. n. 11.* non esse eandem rationem de fictè professo, & de fictè contrahente matrimonio: nam fictè contrahens matrimonium, si non verè contrahat, irrogat grauem iniuriam feminæ, & matrimonium est in vtriusque fauorem: At si fictè professus non ratificet professionem, non irrogatur dam-

num

num notabile Religioni, & Religio potius ordinatur in bonum profitentis, quàm è contrà. Respondeo secundò communio rem, & verio rem sententiam tenere, quod fictè professus post quinquennium, in quo iam non potest reclamare, tenetur sub mortali ratificare professionem; sic tenet & probat Bonacina *tom. 1. tract. de clausura, q. 2. punct. 10. difficult. 2. §. Secunda sententia*, vbi illam probat efficacibus rationibus, quæ ibi videri possunt.

CASVS LXXIX.

De Ancilla cuiusdam Monialis.

QUædam Monialis ex licentia sum. Pontificis, quam habebat ad introducendam in clausuram vnam ancillam pro suo seruitio, virtute licentiæ prædictæ, introduxit vnam ancillam, quæ non sibi inseruit commodè sicut Monialis necessitatibus conueniens est. Inter conditiones à Papa assignata pro ancilla ingressura fuit hæc vna: vt si illa à conuentu exierit, non possit iterum in eundem intrare.

Quæsitum est, an possit ista Monialis hanc ancillam sibi inutilem expellere, & virtute dictæ concessionis pontificiæ, aliam ancillam vtilem introducere in clausuram?

Respondeo posse: probo exemplo claro. Quando Papa concedit alicui, vt possit eligere confessorem extra suum Parochum (vt concedit Papa per Bullam Cruciatæ) potest hic hodie eligere vnum

confessorem, quem si gratum, & utilem non inueniat, poterit eligere alterum, & alterum, vt praxis obseruat, & tradit Reginaldus *tom. 1. lib. 1. num. 96.* citans Nauarrum, & afferens rationes collectas ex textibus: ergo à simili, dante Papa huic Moniali licentiam ad eligendam sibi vnā ancillam gratam, & nullam in particulari assignans, si hæc iam electa euasit inutilis, poterit hac reiectā aliam introducere. Non enim maiori prohibitione prohibetur ingressus in clausuram Monialium, quam prohibeatur fieri confessionem extra suum parochum. Secundò, quia quando Papa concedit alicui Episcopo, vel alicui Religioso, vt possit facere testamentum, talis Episcopus postquam fecit vnum testamentum, potest illud rumpere, & facere aliud secundum, & tertium, reuocando priora virtute prædictæ licentiæ Papalis, sicut tenet communis opinio, & citat Sanchez *libro 8. de matrimonio disputat. 1. num. 18.* citans multos, & graues Doctores dicentes primam licentiam Papæ ad testandam non finiri per factionem primi testamenti. Ergo à simili, licentia Papæ data huic Moniali ad ancillam introducendam non amittitur per introductionem primæ ancillæ inutilis. Et confirmatur per quandam legem ibi adductam à Sanchez, quæ dicit. Quod quamuis sermo simpliciter prolatus intelligatur de prima vice; id tamen intelligitur nisi actus ille sit suapte natura reuocabilis. Hic autem actus admittendi ancillam est reuocabilis, vt constat. Quartò probatur, nam si hæc ancilla hodie iam recepta moreretur, clarum est posse Monialem aliam introducere, mens enim Papæ est vt succurratur istius Monialis necessitati: ergo si Monialis posset mortuā hac ancillā aliam eligere, idem poterit facere

eieclā

eic&ta hac ancillâ tanquam inutili. Vltimò, quia quando prælatus dispensat cum aliquo, vt, verbi gratia, manducet carnes in quadragesima, & alijs diebus ieiunij, talis dispensatio durat quandiu durat illius necessitas. Eodem modo, dispensauit Papa cum ista Moniali, vt propter suas necessitates possit habere vnâ ancillam; talis licentia, seu dispensatio durabit quandiu durauerat necessitatis Monialis.

2 Neque obstat, quod Papa dixit in sua licentia, quod si Ancilla ingressa in clausuram, inde exierit, non poterit iterum ad illam admitti. Hoc enim clarè intelligitur de ista particulari, quæ iam intrauit, & exiuit: & hoc quasi in pœnam suæ inconstantia, vel insufficientia: sed non dicit Papa, quod non possit intrare alia, siquidem durat necessitas Monialis, quæ necessitas Papam mouit ad concedendam talem licentiam eidem Moniali.

C A S V S L X X X.

*De quadam uxore, quæ occidit
maritum suum.*

QUædam mulier virgo nupsit cuidam viro viduo, qui habebat filiam ex alia prima vxore. Ante contractum matrimonium factus est contractus medietatis bonorum inter ambos; & declaratur quod illa nullam dotem attulit, & erat nobilior illo. Procedente sic matrimonio vir erat vxori valde infensus, & iniuriosus: & rem familiarem quasi totam prodige dissipabat. Cûmque ille quodam morbo grauatus

in lecto decumberet, illa ſecretò illi venenum propinauit, ex quo mortuus eſt. In cuius morte omnes ferè lætati ſunt. Per mortem illius manſit illa hæres medietatis bonorum mariti iuxta contractum prius initum, cùm ipſa nullam dotem attulerit.

Quæſitum eſt an hæc mulier ſecurâ conſcientiâ poſſit retinere medietatem illam bonorum mariti, quæ ſibi obuenerunt morte mariti, virtute contractus antea initi? Et pro parte negatiua, quod non poſſit illa retinere, ſed teneatur illa reſtituere conſanguineis mariti. Probatur primò, à ſimili per legem huius Regni *lib. 5. Ordinac. tit. 38. §. 3.* vbi dicitur, quod ſi maritus occiderit vxorem ſine cauſa, hæredes mulieris acquirant ſibi omnia bona mariti, in pœnam ſui delicti: ergo à ſimili, cùm hæc mulier occiderit maritum bona illius danda erunt hæredibus mariti, cùm ſit eadem omnino ratio in vtroque caſu. Confirmatur alio exemplo ſimili. Nam ſi maritus occidat vxorem contrahit impedimentum, (licet non ſit dirimens) vt cum nulla alia poſſit contrahere matrimonium, ſicut communiter Doctores tradunt hoc autem impedimentum, à paritate rationis extendunt etiam Doctores ad feminam, quæ occidit maritum, ne ſcilicet poſſit amplius alteri viro nubere, vt in particulari tenet Nauar. in ſum. cap. 22. num. 74. & alij. Secundò principaliter probatur, quia licet iſte maritus per contractum medietatis bonorum donauerit vxori mediam partem bonorum ſuorum illa perdidit hanc donationem, & bona donata per ingrati tudinem occidendo maritum. Nam quæcunque donatio liberalis reuocatur per ingrati tudinem donatarij, maximè ſi donatarius fecit aliquam grauem iniuriam donatori, ſicut hæc fecit. Sic decernitur in lege iſtius

Regni

Regni lib. 4. Ordinac. tit. 63. §. 4. & §. 20. & est opinio communis. Tertio probatur, quia iuxta *l. consensu* §. 1. *Cod. de repudijs*, & *l. unicam* §. *Taceat*, *Cod. de rei vxor. actione* : quando matrimonium dissoluitur causa mulieris, dos quam illa attulit, acquiritur marito: cum ergo culpa graui istius mulieris solutum sit matrimonium, dato quod illa aliquam dotem attulisset, adiudicanda esset hæredibus mariti: quanto magis cum illa dotem non attulerit, sed id quod habet, sit de bonis mariti. Confirmatur, quia aliàs sequeretur posse aliquem de peccato suo commodum reportare, contra capitulum *Ad nostram* de empt. & vendit. & cap. *tue* de Cleric. non resid. Reportaret enim ista commodum ex suo homicidio.

Responsio.

1 Nulla est lex, quæ priuet hanc mulierem hac medietate bonorum, quam acquisiuit ex contractu inito cum marito ante matrimonium, & acquisiuit per mortem illius, ex eo præcisè quod ipsum occiderit: & sic ex hoc capite non perdit medietatem bonorum, quam ipsi promisit. Probo, quia si aliqua lex illam his bonis priuaret, esset illa Portugallia suprà citata, per quam bona mariti occidentis vxorem sine causa, adiudicantur hæredibus vxoris: sed hæc lex ad hoc non cogit: ergo ista mulier non est ipso facto priuata his bonis. Probatur minor, nam lex illa est nimis pœnalis, vt constat, & proinde restringenda ad solos terminos, de quibus loquitur, id est, de marito occidente vxorem, nõ verò de vxore occidente maritum. Probatur ex illa regula iuris sæpius citata, & practicata: *Odia restringi fauores conuenit ampliari.*

Idem

Idemque docet communis Doctorum opinio, dicentium, quod lex pœnalis debet restringi, & non debet extendi de casu ad casum. Si verò aliqui Doctores dicunt posse extendi legem pœnalem de vno casu ad alium casum, quando in secundo casu inuenitur eadem ratio, quæ reperitur in primo casu expressa ab ipsa lege, sicut tenet Sanchez *lib. 3. de matrim. disp. 42. n. 4.* In hoc nostro casu de vxore occidente maritum, non datur eadem omnino ratio, quæ datur in priori casu quando maritus occidit vxorem. Nam *lex de marito occidente vxorem*, est propter causam adulterij: hæc autem non occidit maritum ratione adulterij sed ratione iniuriarum, & grauaminum sibi à marito illatorum. Et sic non repertâ eâdem ratione in casu quando vir occidit vxorem, & in casu quando mulier occidit maritum, non est extendenda pœna vnus casus ad alium. Ad exemplum adductum ex simili traditum à Nauarro, quod vxor occidens maritum manet impedita ne contrahat amplius cum villo viro, sicut maritus occidens vxorem, manet impeditus ne possit amplius cum aliqua contrahere. Sanchez *libro 7. de matrim. disp. 16. n. 6.* negat similitudinem: & probat cum multis textibus, & Doctoribus, vxorem occidentem maritum non manere impeditam à contrahendo secundo matrimonio, sicut manet impeditus maritus occidens vxorem, ne possit amplius contrahere cum alia. Et ratio quam assignat est, quia textus loquens de hac materia solum loquitur de marito occidente vxorem: nihil verò loquitur de vxore occidente maritum. Et præterea addit non concurrere eandem rationem in vxore occidente virum & in viro occidente vxorem: cuius rei causam, seu diuersitatem, videat qui voluerit apud eundem Sanchez

citato loco numero 6. quod nimis facit ad nostrum intentum, & confirmationem istius primi argumenti. Quod verò attinet ad legem Portugalliae citatam in primo argumento contrario, quæ videtur dicere huius feminae bona deberi marito, respondebimus *infra in solutione ad secundum.*

2 Secunda conclusio. Etiam si sit lex quæ priuet hanc mulierem dote, vel bonis illius medietatis propter mortem mariti, poterit hæc bona retinere, neque illa restituere hæredibus mariti, quoad usque non fuerit condemnata per sententiam iudicis, ut talia bona restituat hæredibus mariti. Hæc conclusio fundatur in communi Doctorum sententia dicentium, quod pœna imposita per aliquam legem, etiam si lex dicat, quod incurratur ipso facto seu ipso iure, vel quod incurratur absque vlla declaratione, hoc non obstante, is qui commisit delictum tali lege prohibitum, non tenetur statim dare illa bona sed potest, illa retinere, donec per sententiam iudicis condemnetur in amissione talium bonorum. Hæc inquam opinio est communis Doctorum, pro qua sufficiat videre Sanchez *lib. 2. Decalogi, cap. 22. num. 7.* ubi citat ultra triginta graues Doctores dicentes, hæreticum, cuius bona per tot leges ciuiles, & canonicas sunt confiscata, & adiudicata fisco, non teneti post commissam hæresim bona sua deferre fisco, sed posse illa retinere quoad condemnetur per sententiam publicam iudicis. Et addit ibi Sanchez *n. 12.* quod neque hæredes hæretici scientes de tali hæresi tenentur restituere fisco bona illa hæretici defuncti ante sententiam iudicis. Cum ergo delictum istius feminae sit minus graue, quàm crimen hæresis, & sit occultum, dato quod sit aliqua lex quæ priuet illam hæreditate ob tale homici

micidium, eâ lege non obstante cùm hæc mulier non sit accusata, neque condemnata, securâ conscientiam potest retinere illa bona sibi debita ex contractu medietatis inito cum marito. Imo iuxta Sanchez citato loco etiamsi daretur talis lex illam priuans, ea non obstante, ante condemnationem iudicis, posset hæc bona alienare pro sua sustentatione, absque eo quod peccaret in tali alienatione: pro quo videatur Sanch. cit. lib. 2. Decalogi c. 22. n. § 6. & § 9. Fundamētum autem Sanchez & cæterorum Doctorum ad hoc dicendum, est, quia hæreticus ante sententiam condemnatoriam retinet verum dominium bonorum suorum: & ideo dum non condemnatur, potest retinere, consumere, & alienare pro sua sustentatione sine peccato. Hinc potest formari secundum argumentum ad probandam hanc secundam conclusionem: quod tale est. Hæc mulier per contractum medietatis bonorum initum cum marito, acquisiuit statim dominium medietatis illius donatæ à marito: ergo dato quod sit lex illam priuans illis bonis propter homicidium, ea lege non obstante non perdidit illa medietatem illorum bonorum antequam per sententiam condemnaretur, neque ante sententiam tenetur illa restituere. Probatur antecedens, quod scilicet hæc mulier per solum contractum medietatis bonorum cum marito inito in principio, acquisiuerit dominium super medietatem illorum bonorum, probo inquam primò, quia est proprietas cuiusque contractus, ut statim transferat dominium rei in alium, ut probat Comitulus lib. de contractib. in communi p. 2. cap. 27. citans duas leges iuris ciuilib: ergo per illum contractum ista mulier statim acquisiuit dominium super illam medietatem bonorum. Secundò probatur idem antecedens;

recedens; nam hæc medietas bonorum quam vir isti mulieri promisit in substantia fuit, dare dotem huic mulieri: potest enim maritus dare dotem vxori pauperi, vt tenet Syluest. *verb. Dos, q. 6.* maximè quando vxor est nobilior viro, qualis erat ista. Iam verò dos cadit sub dominio vxoris, etiam constante matrimonio, quoad dominium directum, quamuis pertineat ad maritum quoad dominium vtile, vt tenet D. Thomas citatus à Rabello *lib. 5. de contractibus, seu de contractu dotali, q. 1. num. 18.* Item dos est patrimonium vxoris, iuxta eundem Rabello *cit. q. n. 9.* pro quo citat vnam legem, & Doctores. Cùm ergo hæc mulier acquisierit dominium super hanc medietatem bonorum, quæ illi tanquam dos relicta, & data fuit, & tanquam patrimonium non amisit dominium istius dotis, & proinde potest illam medietatem retinere, etiam si detur lex illam priuans talibus bonis ob tale homicidium, donec per sententiam non fuerit priuata.

3 Secundò principaliter probatur hoc ex illis, quæ tradit Rabello *lib. 2. de societate bonorum inter coniuges quest. 6. num. 10.* vt videlicet quod mulier adultera quæ nupsit cum cōtractu medietatis bonorum propter adulterium non amittit medietatem illam bonorum, quæ habet in bonis mariti post consummatum matrimoniū: & causam assignat, quia huius medietatis non habet mulier titulum lucratium, sed titulum onerosum: & ad hoc vt mulier amitrat sua bona, vel suam dotē, grauius delictū est adulterium, quàm homicidium mariti: nam quod propter adulterium mulier amitrat dotē ex lex expressa *lib. 5. Ordin. Portugallie tit. 38. §. 2.* & multi textus iuris ciuilis citati à Sanch. *lib. 10. de matr. disp. 8. n. 2.* Non verò datur lex clara priuans dote vxorem maritū occidētem,

ut patet ex dictis. Et præterea ista medietas bonorum promissa à marito huic mulieri, fuit promissa titulo oneroso, & quasi remuneratorio, ex eo scilicet, quod illa nobilior, sibi inferiori nuberet.

4 Ex alio capite poterit fortè ista mulier obligari ad aliquam restitutionem: ex homicidio videlicet. Nam homicidia obligatur ad multa restituenda iuxta Doctores communiter. De quo inter alios, videndus est Azor *tom. 3. lib. 5. cap. 3. §. Conuenit inter omnes, & Rebel. lib. 3. de oblig. ex delicto q. 3.* Primò enim homicida tenetur restituere expensas factas in medicinis. 2. tenetur restituere lucrum cessans, quod occisus habere poterat in vita, deductis expensis, iuxta qualitatem personæ, si erat exposita officio lucrandi. 3. tenetur restituere damnum illatum illis, qui sustentabantur ab occiso ex obligatione, ut sunt parentes, vxor, & filij. Et hæc omnia consideranda sunt ad arbitrium boni viri. Et quod attinet ad hæc tria, si verum est quod mihi dictum est extra informationem, quod iste occisus suâ morte nullum damnum intulit, eo quod prodigus esset, neque aliquid acquireret denuo, sed potius acquisita dissiparet: clarum est quod ista mulier ex hoc capite non tenebitur ad restitutionem, eo quod non fuit causa lucri cessantis ipsi marito; nec ex sua morte damnum resultauit familiæ, sed potius lucrum: & in curatione morbi pauca faciendæ fuerunt expensæ, quia venenum breuiter occidit. Denique, si constiterit, quod aliquod damnum intulit sua occisione, iuxta regulas suprapositas, id solum tenetur restituere non verò medietatem bonorum, de qua quæritur, propter efficaces rationes suprapositas.

5 Et præter illa tria, quæ suprà diximus teneri homicidam restituere: dubium est inter Doctores, an
hom

homicida teneatur aliquid restituere eo quod abtulerit vitam hominis, & in hoc iniuriam fecerit ipsi occiso? In hac quæst. alij negant, alij affirmant. Securior opinio est affirmatiua, quam sequitur Rabel. *loco proxime cit.* pro qua citat D. Thom. Scot. Adrian. Cord. & probat: nam si ex eo quod occidi bouem alicuius, teneor restituere aliquid pro vita bonis ablata: à fortiori tenebor restituere aliquid pro sola vita hominis ablata, ad arbitrium boni viri. Et proinde iuxta hanc opinionem tenebitur hæc mulier restituere aliquid filiae istius occisi, ex prima vxore, idque ad arbitrium viri prudentis.

6 Si tamen hæc mulier est pauper, illique valde onerosum sit restituere aliquid præcisè ex vita marito ablata, poterit quietari iuxta opinionem Nauarri, qui *in sum. c. 15. n. 19.* cū alijs dicit non teneri homicidam aliquid restituere ex eo præcisè quod vitam abstulit. Et potest quis securè sequi opinionem vnā quando illa tenetur à Nauarro, & Hostiensi, & Azore, quos citat Nauar. potest enim quis sequi vnā opinionem probabilem, pro qua est vnus Doctor classicus, relictā opinione probabiliore, pro qua sunt plures Doctores, vt tradi Azor *tomo. 1. lib. 2. cap. 13. iad finem. §. Quando igitur.* Et Sanch. *lib. 1. Decalogi c. 3. n. 7.*

Solutio argumentorum.

7 Ad primum argumentum in contrarium positum in principio ex lege Portugalliæ puniente maritum occidentem vxorem, & cæt. iam manet responsum ex dictis in prima conclusione n. 1. vbi probauimus quod illa lex contra maritum occidentem vxorem, non extenditur ad vxorem occidentem virum.

T t

Et

Et eodem modo respondetur ad confirmationem eiusdem argumenti, diximus enim *eodem n. 1.* cum Sanchez vxorem occidentem virum, non contrahere impedimentum ne amplius contrahere possit matrimonium, sicut contrahit vir occidens vxorem.

8 Ad secundum argumentum, dicens quod hæc mulier iuxta legem Portugalliæ amisit donationem factam à marito eo quod illi fuerit ingrata, & iniuriosa, Respondeo primò, quod dicta lex Portugalliæ ibi dicit, amitti quidem donationem per ingratitudinem donatarij: sed addit lex, quod si donator in vita non reuocauerit donationem, valida erit donatio. In hoc verò casu maritus non reuocauit donationem medietatis bonorum factam huic mulieri, & proinde valida mansit. Secundò respondeo ex eadem lege quæ in principio solum clarè loquitur de donatione pura, & simplici, & facta sine vlla cōditione, sed est purè liberalis. Donatio verò medietatis bonorum facta huic mulieri, non fuit simplex, nec purè liberalis, nec sine conditione: sed fuit donatio sub conditione, videlicet, *si nupservis mihi*, & præterea facta fuit cum onere, si consummaret matrimonium, quam conditionem, & onus mulier adimpleuit: & sic cum esset donatio cum onere, & conditione adimpletis, nec maritus reuocauit, nec potuit reuocare. Quia quando Doctores dicunt donationem posse reuocari ob ingratitudinem, intelligunt de simplici donatione, non verò de facta cum onere, & conditione, & per contractum matrimonij, qualis hæc fuit. Terriò respondetur, quod etiam donationes inter coniuges factæ in vita, & causa mortis confirmantur per mortem donantis, si ille non reuocauit in vita, iuxta communem opinionē, de quo Rabello

bello *lib.6.q.13.sect.3.* Et ista donatio mariti facta fuit causa mortis, ut pater, & proinde per mortem mariti mansit confirmata, cum ille viuens illam non reuocauerit.

9 Ad tertium dico, leges illas, quæ dicunt, quod si matrimonium dissoluatur culpa vxoris, bona ipsius pertinent ad maritum, clarè loquuntur, quando matrimonium propriè dissoluitur: quod tunc fit quando matrimonium soluitur solum quoad torum, & aliàs manet vinculum matrimonij, ut fit per diuortium. Sed in hoc casu non propriè solutum est matrimonium, sed desit esse, & fuit extinctum, & proinde illæ leges in hoc casu non militant. Respondeo secundo, quod neque etiam quando soluitur matrimonium per diuortium tantum, illæ leges locum habent. Nam aliquando ob rixosam mulierem fit diuortium quoad torum, & tamen non propterea iudex Ecclesiasticus applicat dotem, & bona vxoris marito. Tertio dico quod licet illæ leges hodie durarent, & valerent, non habent locum, & executionem nisi postquam accesserit sententia declaratoria iudicis, quæ in hoc casu lata non est, pro quo videantur suprà dicta in secundo numero. Ad confirmationem tertij argumenti, dico, quod ista mulier occidendo maritum, & retinendo suam medietatem, non dicitur reportare commodum ex suo peccato præcisè, sed reportat ex donatione præterita per quam acquisiuit verum dominium istorum bonorum; ut dixi in præcedentibus: & sic non reportauit commodum ex delicto, sed ex contractu, & donatione licita, & onerosa.

CASVS LXXXI.

*De quodam testamento cum clausula, quod
uxor non nubat.*

Quidam vir nobilis in suo testamento reliquit omnia bona sua (quæ erant multa) vxori suæ sub conditione quod iterum non nuberet: si verò nuberet, Confraternitas Misericordiæ Olyssipponensis omnia sua bona acquireret distribuenda pauperibus.

Quæsitum fuit, an illa conditio non nubendi, sit iusta, & licita, & ita obligatoria, quod si illa nupserit amittat omnia illa bona?

I Hanc quæstionem disputat Sanchez *lib. 1. de matrim. disp. 34. num. 3.* & resoluit absolutè, quod conditio non est licita: & quod illa non obstante, si talis mulier nupserit, non amittet legatum, seu hæreditatem. Probat hoc Sanchez per tres, vel quatuor leges iuris civilis, quarum vna ponit hanc rationem. Quia interest Reipublicæ vt multis ex legitimo matrimonio procreatis augeatur. Citat Sanchez pro hac opinione Costa, Antonium Gomez, Molinam Iuristam *lib. 2. de primogen.* & Molinam Theologum in duobus locis tomorum suorum de iustitia.

I Post Sanchez scripsit Rabel. qui in suo tomo *de oblig. iustit. lib. 18. q. 16. n. 1. & 2.* dicit quod illæ leges cit. à Sanchez sunt limitatæ, seu restrictæ per aliam legem posteriorem, videlicet, *Auth. Cui relictum, Cod. de inuita viduitate tollēda*, in qua decernitur, quod si alicui feminae relinquatur aliquod legatum, si non nubat, & talis mulier fuerit virgo, & nupserit prima vice:

vice: in tali casu, talis conditio non valet: nec talis mulier si nupserit, amittet legatum. Si verò illa fuerit vidua, tenet conditio, illaque nubente amitteretur legatum. Verba Rabelli sunt hæc: *Quo fit, ut si donatio, legatumve, alicui femina, vel viro antea coniugato, fieret sub conditione ne ad secundas nuptias transeat, & conditio non seruetur, ipso iure res, si tradita sit, restitui debet cum fructibus.* Sic ille. Non assignat Rabello aliquam rationem, sed solum citat illam legem cui inhæret. Ego huic secundæ opinioni magis adhæreo, & pro illa hanc rationem assigno. Nam secundæ nuptiæ, licet sint licitæ & contrahi possint absque peccato, etiam veniali, non tamen ita probantur, & fouentur ab Ecclesia sicut primæ. Constat ex D. Paulo 1. ad Corinth. 7. vbi postquam dixit, viduam posse nubere: addit quod beatior erit si sic permanlerit. Item secundæ nuptiæ non benedicuntur à parrocho, quando viduas iungit matrimonio, sed solum primæ nuptiæ, ut patet ex cap. 1. de secundis nuptiis, & ex praxi Ecclesiæ. Item certo modo Ecclesia punit virum qui contrahit matrimonium cum vidua, quia manet irregularis, nec potest ad sacros Ordines promoueri, ut patet ex materia de irregularitate. Dixi, certo modo nubentem viduæ puniri, nam in rigore illa irregularitas non est punitio, cum non sit orta ex delicto, sed solum ex indecentia, & ex defectu significationis, ut Doctores explicant in materia citata de irregularitate. Cum hac opinione Rabelli concordat Riccius *tomo 2. suarum decisionum, decisione 1927.* vbi pro se citat Franch. & Montero in Decision. Aragon. Item tenet Medin. *Cod. de restit. quest. 23. vers. Respondco salvo.* Et Gutier. 2. lib. 99. canon. cap. 25. num. 15. Fauet huic opinioni

Nauar. *consilio* 21. *de sponsal.* vbi ait nemini posse prohiberi primas nuptias. Et exprimens primas nuptias, videtur innuere quod possint prohiberi secundæ indirectè, videlicet quando relinquitur legatum ne vidua nubat.

2 Imò Sanchez *lib. 7. de matrim. disp. 91. n. 5.* hanc secundam opinionem absolutè tenet quod valet conditio appositæ in legato relicto viduæ, dummodo non nubat. Et idem tenet ipsemet Sanchez *lib. 7. de matrim. disp. 88. per totam*, vbi refert quatuordecim pœnas, quas ius commune irrogat viduis transeuntibus ad secundas nuptias.

CASVS LXXXII.

De quibusdam decimis petitis à quodam Commendatario.

QUædam femina nobilis cùm esset iuncta matrimonio cuidam commendatario cuiusdam Ordinis Militaris. cùm adhuc maritus viueret, litigatum fuit in iudicio, utrùm Commendatarius Militaris esset obligatus ad soluendas decimas. Durante lite, accessit tempus soluendi decimas tritici, quas maritus integrè soluit. Post tres dies solutionis factæ; lata est sententia declaratoria, per quam declaratum est prædictum commendatarium non debuisse decimas ex sua commenda. Maritus huius feminae mortuus est paulò post.

Quæsitum est primò, an possit hæc femina singulis annis defraudare decimas, quas de bonis suis debet quoadvsque sibi compenset pecuniam illam, quam

quam dederat antea pro decimis non debitis : hanc enim in iudicio non audet repetere ob fugiendas molestias & expensas.

Quæsitum est secundò : Maritus obiit in die proximè præcedente festum Annunciationis B. Mariæ, & decimas soluit plenè maritus suus, an possit facere computationem?

3 Quæritur : quidam filius maioratus istius feminae furto illi subtraxit certam copiam tritici cum pater illius adhuc viueret : quæritur an , viso quod media pars illius tritici erat istius feminae , & media pars mariti, & maritus huic feminae testamento reliquit omnia sua bona præter maioratû, possit hæc mulier tẽpore inuentarij occultare res aliquas , per quas sibi compenset valorem illius tritici à filio rapti?

Responsio.

1 Ad primum dico, quod si hæc mulier hodie potest viâ ordinariâ iustitiæ facilè recuperare valorem illarum decimarum, quas soluit, illas non debēs tunc in conscientia non potest in occulto facere cõpensationem illã, de qua quærit, propriâ auctoritate: & peccaret mortaliter sic faciendo. Debet enim tunc recurrere ad proprium iudicem: quia nemo potest esse iudex in propria causa. Hæc conclusio est communis Doctorum, maximè illorum quos mox citabo.

2 Secundò dico. Si hæc mulier hodie recuperare non possit valorem decimarum solutarum nisi cum magna sua iactura, vel si is contra quem litigare debet est vir nimis potens; & factura est graues expẽsas, vel huius occasione debet excidere à gratia, & amicitia alicuius viri notabilis : in tali casu poterit facere

compensationem secretam eo modo quo proponit, denegans alias decimas, quas ex aliis bonis debet Ecclesiæ dummodo non sit scandalum illorum qui viderint, vel sciuerint illam decimas non soluere: & dummodo nihil vltra de decimis subtrahat quàm sit illud quod antea soluit non debens. Hæc doctrina est communis Doctorum, maximè Medinæ, *Cod. de restit. q. 11. tit. de rebus per creditorem in recompensam ablati, §. Quibus non obstant.* Idem tenet Vasq. *tom. de opusc. tit. de restit. cap. 5. dubio 8.* & Reginald. *tom. 1. lib. 10. de restit. c. 18. n. 258. & seqq.* Lessius *lib. 2. c. 12. dub. 10. à n. 58. & seqq.* cum aliis multis, quos hi quatuor citant.

Principalis ratio istius conclusionis est, Nam ille qui suum recuperat, & facit compensationem cum omnibus supradictis circumstantiis, capiens in secreto sibi reuera debitum, quando alia via capere non potest modo supradicto, tunc non capit alienum, sed quod reuera est suum. Et proinde hæc mulier in secreto faciens istam compensationem cum supradictis debitis circumstantiis, capit quod est suum, & sibi fuit per iudicis sententiam virtualiter adiudicatum: eo quod sententia declarauerit maritum suum decimas non debuisse. Sententia verò iudicis, quando est declaratiua, retrahitur ad præterita, de quibus litigabatur. Et ideo cum mulier possit facere istam compensationem in secreto, non peccat, cessante scandalo, vt diximus. Secundò, hæc mulier sic faciens istam secretam compensationem, non facit iniuriam iudici: Nam iudex ordinarius non est iudex in foro secreto, sed in foro publico, in quo proceditur iudicè. At ista mulier capiens in secreto, quod sibi debetur per sententiam, non procedit in foro externo ordine iudiciario, sed in foro interno

terno capiendo quod suum est. Tertiò ista mulier sic faciendo istam compensationem secretam modo prædicto, non dat scandalum, vt suppono & admonui. Neque item sic compensans se facit iudicem in propria causa: non enim dat sententiam, sed accipit in secreto quod suum est: eo nempe modo, quo, si latro è domo Petri rem furaretur, & cum illa fugeret, si in via res caderet inscio latrone, & Petrus rem suã inueniret in via, pollèt rem suam capere inscio latrone. In confirmationem dictorum, dicunt Vasquez, & Reginaldus locis suprà citatis, quod si aliquis rem suam secretè recuperauerit per modum compensationis seruatis circumstantiis supradictis, & postea publicetur excommunicatio per quam præcipiatur denunciari de possessore rei illius, vel quod dicta res restituatur illi, qui talem excommunicationem petiit; in tali casu is qui suam rē recuperauit prædicto modo, non manet excommunicatus, nec tenetur restituere. Neque item tenetur de illo denunciare ille qui scit illum rem suam recuperasse per viam compensationis modo suprà dicto. Et in nostro casu hæc mulier per prædictam compensationem non retinet rem alienam, & proinde si publicetur excommunicatio, non tenetur restituere, neque tenentur de illa denunciare illi qui nouerint illam licitè per compensationem rem suam recuperasse.

4 Secundum quæsitum propositū fuit valde confusè; neq; ego ob loci longā distantia potui explicationē audire. Siquid verò etiā in confuso potest respōderi, est, quod si bona, quæ decimauit erant ex fructibus commédæ, in tali casu, siue decimaret antea, siue post mortē mariti, potest facere compensationem de illis modo supradicto in responsione ad primum. Si verò

bona quæ decimauit erant extra fructus commendæ, de his non potest facere compensationem, quia de his debebat decimas ante, & post mortem mariti.

§ Ad tertium dico, quod si detur dubium, an filius exhorreo dictum triticū furatus sit, stante dubio nō potest facere prædictā compensationem de bonis filij, neque occultare in inuētario res aliquas pro dicta cōpensatione. Omnes enim Doctores dicunt quod ad faciendā cōpensationē debita debēt esse clara, & certa: & proinde extante dubio de furto tritici, talis cōpēsatio fieri nequit. Si verò sit res certa quod ille dictum triticū furatus sit, potest facere dictā cōpensationē occultando in inuentario res quæ æquiualeant tritico ablato seruatis circumstantiis suprà positis in responsione ad primum. Et probatur hæc responsio eisdē argumentis quibus suprà in responsione ad primum probauimus potuisse fieri compensationem pro decimis solutis, & non debitis, datur enim utrobique eadem ratio. Imò in hoc casu matris erga filium datur maior ratio ad faciendam compensationem, si constet de furto, quàm in priori casu. Nam si mater voluerit triticum à filio repetere viâ iuridicā coram iudice, fortè non habebit testes, & infamabit filium de furto; & indecorum est, quod mater filio litē moueat: quæ omnia deerant, in casu quo vellet decimas solutas, & non debitas recuperare iuridicè. Sed aduerto, quod si in inuētario aliqua bona negauerit pro faciendā dictā compensatione tritici, de talibus bonis subtractis ab inuentario dare debet cæteris filiis extra maioratum portiones sibi debitas iuxta legem Regni, quæ agit de bonis relictis inter filios diuidendis. Si verò filius maioratus procuret publicari excommunicationē contra bona in inuentario negata, hæc

hæc mulier non tenebitur restituere, neque tenebuntur de illa denunciare scientes illam iuste per compensationem dicta bona retinere, sicut dictum est in responsione ad primum.

CASVS LXXXIII.

De reuocatione cuiusdam testamenti.

Vir, & vxor habentes vnum tantum filium, fecerunt commune testamentum, in quo de suis tertiis, & legitimis instituerunt maioratum filio cum his clausulis: quod testamentum confirmarunt autoritate Regis. Clausulæ fuerunt, quod vnusquisque parens viuus relictus possidebit totum maioratum cum fructibus illius dum vixerit, & solum dabit filio congrua alimenta. Secunda clausula fuit, quod pater, vel mater relictæ viuent semper castè, & honestè in statu viduitatis, & in casu quod sic non viuant, statim totus maioratus transeat ad filium.

Hoc posito mater pœnitens facti vult reuocare testamentum, dicens, quod poterit contingere, vt filius tempore suæ viduitatis, & moræ impatiens, sibi vitium incontinentiæ obiiciat, & probet falsis testibus, & sic illa spoliata maneat vsufructu maioratus, & omni remedio sustentationis. Maritus dicit se nolle vt testamentum à Rege confirmatum reuocetur. Et vxoris obiectioni respondens, ait: nunquam filium contra illam posse probare nisi crimen fuerit notorium.

Quæ

Quæritur primò, an possit vxor reuocare hoc testamentum, quoad suum consensum, ita vt talis clausula in futurum sibi non præiudicet? Secundò, an si ordine iudicis illa viuente maioratus filio tradatur, teneatur filius sibi dare alimenta? Tertiò, quod remedium adhiberi possit prædictæ clausulæ, vt in futuro sibi præiudicare non possit?

Responsio.

I Hæc materia potius pertinet ad peritos legis ciuilis, quàm ad Theologos: obligatus tamen respondere ex illis quæ Theologi à libris Iuristarum hauriunt, dico sequentia.

Primò, quod non obstante confirmatione testamenti facta per Regem, ista mulier potest reuocare testamentum prædictum: excepto si Rex in in sua confirmatione dixit, *Aliter non fiat*, vel quid simile apposuerit irritans reuocationem. Probo primò, quia iuxta omnes Doctores testamentum factum à coniugibus concorditer potest postea reuocari ab vnoquoque coniugum dum viuit, quoad partem sibi artem. Testamentum enim ante mortem testatoris validum non est, & proinde potest mutari, vt expresse dicit D. Paulus *ad Hebr. 9.* quod adeò verum est, vt dicant Doctores, quod si ego iuraui me non reuocaturum esse meum testamentum, & nihilominus postea reuocem peccabo peccato periurij, vt constat, a reuocatio testamenti valida erit. Hæc doctrina traditur ab Azor. *tom. 1. lib. 5. cap. 26. q. 15. & 16.* citando alios vtriusque iuris Doctores. Secundò probatur quia si ista institutio maioratus in substantia est donatio causâ mortis (sicut esse videtur) omnes Doctores dicunt

cunt donationem causâ mortis posse reuocari ante mortem, eo quod non sortiatur effectû nisi post mortem, donatoris. Et idê est de promissione causa mortis qualis facta est in hoc testamento. Et in donatione, vel promissione causâ mortis dominium non trãsit ad donatarium, vel promissarium, nisi post mortem donantis: de quo inter alios videatur Rabello *lib. 18. q. 12.* Secundò probò ex ijs, quæ tradit Rodriguez *tom. 1. qq. q. 68. ar. 1.* & Miranda *q. 29. art. 8.* & Azor *cit. q. 15.* & alij ab his citati, qui dicunt, quod si aliquod capitulum canonicorum, vel aliqua Religio, fecit aliquod statutum super certa materia, quod statutum postea Papa confirmauit, dicunt quod non obstante tali confirmatione Papæ, potest postea capitulum, vel Religio reuocare dictum statutum antea à se factum, pro vt expressè habetur in cap. *Cum accessissent*, de constitut. vbi refertur quod capitulum cathedralis per se solùm recessit à statuto facto per capitulum, & confirmato à Papa. Qui casus similis omnino est isti nostro de testamento confirmato à Rege: imò maiorem vim habet confirmatio Papæ circa statutum, quàm habeat confirmatio Regis ad testamentum. Et facit omnino ratio adducta à Miranda citato articulo dicente, quod confirmatio data à Papa circa statutum, vel Regis supra testamentum, solum fuit confirmatio facta in forma communi, & talis confirmatio non reddit rem firmatam irreuocabilem, sed est solùm quidam fauor, vel priuilegium. At vnusquisque potest renunciare fauori, & priuilegio sibi concesso, vt communis tenet opinio. Et proinde hæc mulier sentiens se læsam quoad consensum traditum in hoc testamento, poterit renunciare, seu reuocare dictum consensum & testamentum: & renunciare fauori, quo Rex illud confirmauit.

2. Seruit ad hoc regula 61. *de regul. iuris in 6.* quæ dicit: *Quod in gratiam alicuius conceditur, non est in eius dispendium retorquendum.* Ista vetò confirmatio Regis facta fuit in gratiam istorum coniugatorum, ac proinde non debet retorqueri in dispendium mulieris, ita vt non possit illa testamentum reuocare. Neque facit contra hanc mulierem regula 21. *de regul. iuris in 6.* dicens: *Quod semel placuit, amplius displicere non potuit.* At illi mulieri iam placuit illa clausula testamenti, & proinde videtur quod iam amplius sibi displicere non possit. Non obstat quia illa citata regula iuris patitur multas instantias, & exceptiones sicut ibi dicit glossa 2. Primò enim fallit in casibus, in quibus ius permittit pœnitere, & variare, de quo adducit multa exempla, etiam in contractibus: & ista institutio maioratus, vel pertinet ad testamentum vel ad donationem, vel ad contractum, qui contractus nondum est sortitus effectum. Nam filius nondum habet dominium maioratus: ergo mater illius hodie potest pœnitere, & proinde reuocare clausulã, quam sibi putat nocituram. Eo modo quo emptio, & venditio possunt rescindi ante pretium datum & receptũ, nam ante pretium datum non est perfecta venditio.

3. Dixi suprã: *Nisi Rex in confirmatione dixerit: Et aliter non fiat, vel expresse annullet reuocationem si fiat.* Nam si Rex hæc verba apponat, non poterit mulier reuocare. Nam Rex in maioratibus potest apponere clausulas, quas maluerit. Et proinde ad veram decisionem istius casus videnda est forma verborum, per quæ Rex confirmauit hoc testamentum: si enim in illa non ponit clausulam irritantem reuocationem dicti testamenti poterit mulier pœnitere, & mutare clausulam testamenti. Fuit enim confirmatio

in forma communi, quæ non addit robur particulare rei confirmatæ, sed est tantum fauor, & gratia concessa petenti confirmationem, cui potest renunciare is qui gratiam petijt iuxta prædicta.

3 Ad secundum quæsitum, quo quæritur, an possit in futurum præiudicare, huic mulieri non reuocasse hanc clausulam, dico, quod si illa non reuocauerit, & postea mortuo marito illa nupserit, vel inhonestè vixerit, amittet possessionem, & fructus maioratus, eo quod non seruauerit clausulas, & conditiones, in quibus consensit, & in hoc non est dubium. Quo dato filius tenebitur lege naturali dare matri alimenta, lex enim naturalis hoc dictat. Si enim per legem naturalem vnusquisque tenetur proximo indigenti succurrere, quanto magis matri indigenti? Et præterea ex praxi, & lege istius Regni, filius Maioratus tenetur alere fratres pauperes, & multo magis matrem, de quo inter alios videatur Riccius *tom. 1. suarum decisionum Collectan. 1793. & tomo 2. Collectan. 97. & 1162.* & alij ibi citati.

Ad tertium, de modo, quo ista mulier debeat facere hanc reuocationem iuridicè, ita vt valeat, respondeant legis ciuilis periti, ad quos pertinent hi Apices.

CASVS LXXXIV.

De quadam dote matrimonij, & obligatione denunciationis.

QUædam mulier nupsit viro putans se habere ætatem sufficientem ad matrimonium, vide

videlicet annos 12. completos, vixit cum illo, titulo vxoris. Discursu temporis illa commisit clarum adulterium: propter quod ille mortalibus vulneribus illam vulneravit. A quibus illa sanata, accusata fuit à marito de adulterio. Illa in foro Ecclesiastico absoluta est, eo quod probavit se non contraxisse verum matrimonium, eo quod quando nupsit non habebat duodecim annos completos, proinde matrimonium fuerit nullum: & si per sententiam Ecclesiæ declaratum est matrimonium prius fuisse nullum, ita ut vterque posset de se facere quod vellet.

Illa post sententiam accusavit illum coram iudice, eo quod iocalia, & res pretiosas, quas pro dote attulerat, prodigè dissipasset, & illarum valorem requirebat, allegans quod deberet exire cum sua dote soluto matrimonio: propter quod fecit illum carcera-ri in loco publici carceris.

Ille durante hac lite sumpsit res aliquas pretiosas, quæ præsumuntur fuisse allatæ ab illa pro dote (sed de hoc non constat clarè) & has res pretiosas dedit Petro sub pignore, ut sibi accommodaret ducentos ducatos, quos illi dedit Petrus, & Petrus retinet hodie prædictas res pretiosas sub pignore in secreto. Mulier impetrauit excommunicationem, per quam præcipiebatur ut quicumque sciret de prædictis rebus pretiosis feminae ablati, denunciaret iudici Ecclesiastico intra certum terminum dierum. Quo posito?

Quæsitum est primo, utrùm Petrus, qui res istas retinet pro pignore suæ pecuniæ accommodatæ, teneatur sub censura publicata denunciare de rebus, quas habet, sciens quia sibi auferendæ sunt cum
peri

periculo amittendæ pecuniæ mutuatæ: eo quod debitor suæ pecuniæ, est positus in carcere, neque habet unde soluat.

Quæsitum est secundò, an peccatum luxuriæ ab ista muliere commissum, fuerit verum adulterium, ut propter illud incurreret pœnas adulteræ?

Tertiò, an propter hoc delictum quod commisit stante matrimonio putatius, amisit dotem allatam tempore quo primò nupsit?

Quartò an dato quod dotem non amisit; & dato quo constet prædictas res pretiosas retentas à Petro sub pignore, esse de dote dictæ feminae: an possit Petrus illas reddere viro putatius petendo pecuniam mutuata sub illis; an verò teneatur illas reddere feminae cum periculo amittendi suam pecuniam mutuata?

Responsio.

I Ad primum quæsitum dico non teneri Petrum, qui res istas sub pignore accepit, denunciare iudici se illas habere sub pignore, si inde clarum sit periculum amittendæ suæ pecuniæ accommodatæ. Probat conclusio ex communi dicto Doctorum dicentium, quod nemo tenetur ire denunciare, quando ex sua denunciatione timet magnum damnum sibi euenturum. Sic tenet Corduba *in sum.* q. 63. & 64. Sayro *in Clavi Regia lib.* 12. *cap.* 14. *num.* 32. ubi citat multos alios. Idem tenet Riccius *tom.* 1. *decision.* Collect. 995. Villalobos *in sum.* 1. *p. tract.* 17. *d. difficult.* 18. *numero* 3. At constat quod si Petrus denunciauerit de his pignoribus, exponit si clarò periculo amittendi suam pecuniam, eo quod is qui illas res

sub pignore dedit, sit pauper, & carceratus, & difficillimè suam pecuniam recuperabit: ergo non tenetur ad denunciandum cum tanta sua iactura. Et est hoc ad eò verum, vt dicat Sayro. *cit. loco n. 33.* quod in hoc casu, & similibus, in quibus aliquis excusatur à denunciatione, si iudex huic exhibeat iuramentum vt dicat an sciat de tali re; potest negare, & dicere se nescire: sub intelligens in corde se nescire ad reuelandum. Nam iudex in tali casu non potest illum obligare ad reuelandum cum tanta sua iactura.

2 Ad secundum quæsitum dico, quod licet delictum istius feminae Theologicè non fuerit adulterium, eo quod constitit, quod à parte rei, illius matrimonium fuit nullum ob defectum ætatis: nihilominus in rigore legum, illius peccatum quoad malitiam reputatur adulterium, & merebatur pœnas corporales, quas leges ciuiles imponunt vxori adulteræ. Probo hoc imprimis per legem istius Regni *lib. 5. Ordinat. tit. 26. §. 1.* vbi Rex dicit, quod si aliquis dormierit cum aliqua femina coniugio copulata apud vulgus, & in facie Ecclesiæ, licet postea constet quod illius matrimonium fuit nullum, sed illa vivebat cum illo qui credebatur suus maritus, is qui cum tali femina concubuit, stante illâ opinione vulgi, ad mortem damnetur tanquam adulter. Nam (ait ibi lex) in hoc casu respexit ius ad intentionem, quam iste homo habuit peccandi cum muliere coniugata, credens illam esse vxorata, licet talis non esset. Ergo à simili, si incurrit pœnam adulterij dormiens cum femina, re vera non coniugata, sed credens illam esse vxorata: eandem pœnam incurrit hæc mulier peccans carnaliter cum alio, quia credebat se

vxorata, & pro tali habebatur in populo, licet à parte rei talis non esset. Idem probatur ex l. *Si vxor ff. de adult.* vbi dicitur, quod nec matrimonium, nec speciem matrimonij violare licet. Hanc legem citat Panorm. super *capitulum* plerumque de *donat. inter virum, & vxor.* ad probandum, quod mulier habita pro coniugata, si dormierit cum altero viro amisit dotem in pœnam sui delicti, licet aliàs probaretur nullitas matrimonij. Et addit Panorm. quod talis mulier ob prauam intentionem non debet dotem recuperare. Idem tenet expressè glossa citati capituli *plerumque*, in verbo, *Repetere non valebit*: vbi citat alios textus. Et ponit hanc conclusionem: *Quod crimina secundum intentionem iudicantur.* Et citat hanc conclusionem tres textus iuris canonici, & vnā legem iuris ciuilis. Et denique clarè colligitur ex *capitulo.* Cum voluntate de *sent. excommunic.* vbi ponuntur hæc verba: *Cum voluntate, ac proposito maleficia distinguuntur, & cat.* vbi glossa multa etiam citat. At constat, quod hæc mulier voluntate, & proposito intendit committere adulterium, cum se reputaret vxorata: er go incurrit pœnas adulterarum. Si verò dicas, quod Ecclesia non illi inflixit pœnam adulteræ in sententia, respondeo, quod Ecclesia non iudicauit criminaliter, sed solum ciuilitè, & solum curauit de valore matrimonij, de quo lis erat. Et Ecclesia non condemnat aliquem ad mortem.

3 Ad tertium quæsitum respondeo, quod iuxta legem istius Regni *lib. 5. Ordinac. tit. 38. §. 2.* videtur quod maritus non lucratur dotem vxoris adulteræ, nisi quando illam occidit repertam in actu adulterij: vel si postea ea de causa accusauerit, & eadem de causa fuerit ad mortem condemnata. Quæ non con-

tigerunt in isto casu, quamuis enim dicatur, quod adulterium fuerit publicum, maritus putatiuus illam non inuenit in illo actu, neque illam accusauit. Et ideo per legem Regni non videtur amisisse dotē. Sed stando in doctrina Canonistarum, & fundamento iuris canonici supra citato, dicendum videtur amisisse dotem si condemneretur. Sic sentit expressè glossa citati capitis *plerunque*, verbo *repetere*. vbi ponit casum in femina reputata pro vxorata, quæ peccauit cum alio extra maritum putatiuum: & post accusationem inuentum fuit, quod matrimonium fuerat nullum propter impedimentum consanguinitatis: qui casus fuit omnino nostro similis: & ait ibi glossa citans illos textus, quos supra tetigimus in respons. ad secundum, quod illa mulier amisit dotē iuxta ius canonicum. Idem tenet Panorm. ad idem caput prope finem, vbi pro eadem opinione citat Innoc. Hostiens. Gofed. & Ioan. Andr. qui sunt præcipui Canonistæ in Ecclesia. Et glossa marginalis in eodem capite *plerunque* dicit esse opinionem communem Canonistarum. Et videtur colligi ex ipso textu Papæ, vbi dicitur quod si mulier fornicationis causâ à viro separata fuerit, dotem amittat: non dicit ob adulterium, sed ob fornicationem: hæc vero clarè fornicata est. Et talis fornicatio fuit causa totalis, & principalis propter quam ista mulier separata est à viro suo.

4 Nec Ordinatio Portugalliæ supra citata videtur contraria huic opinioni Canonistarum dicentium hanc mulierem amisisse dotem: nam citata lex solum loquitur de muliere verè coniugata in qua ad amissionem dotis requiritur conditiones, quas ibi diximus: non verò loquitur de muliere, quæ à parte rei non erat vxorata, sed pro tali erat habita, & forni

fornicata est cum alio. De hac enim iam antea lex locuta fuerat in titulo 16. eique saltem consequenter imposuerat pœnam mortis, & proinde amissionem dotis, eo quod inlitterat virum cum ista peccantem, damnari ad mortem tanquam verum adulterum. Statutum verò in vno, etiam odioso, censetur etiam statutum in alio casu; cum datur prorsus rationis identitas per multa quæ citat glossa in Extrauag. *Execrabilis* de prab. & dignit. in verbo *persona*, & glossam in Extrauag. *Si fratrum*, ne sed. vacant. in verbo, *Vicarius*, quæ sunt ambæ Ioannis XXI.

§ Ad quartum quæsitum dico primò, quod si constiterit clarè, quod hæc pignora quæ habet Petrus sunt verè ipsius mariti putatiui, qui illa dedit Petro pro pignore pecuniæ, & illa habebat iam ante matrimonium, eidem marito restituenda sunt non alteri, quia res restituenda est domino suo. Secundò dico, quod si hæc pignora, & res pretiosæ acquisite sūt post contractū matrimonium putatiuum ex bonis cōmunibus in tali casu iubet lex istius Regni *cit. lib. 5. tit. 38.* quod maritus, qui accusauit mulierē de adulterio, in casu, quo illa dotem non amittat, amittet tamē illa res illas quæ fuerunt acquire de bonis cōmunibus, post initum matrimoniū. Et sic etiam in hoc secūdo casu, prædictæ res acquire post initu matrimonij restituendæ sunt marito putatiuo iuxta proximam legem Regni. Tertiò dico, quod si maritus has res pretiosas ante matrimonium dederat uxori, tanquam arrhas, sponsalitiā largitatē, seu dotalia, in tali casu etiam sunt restituenda marito putatiuo, quia donatio facta reuocatur propter ingratitudinem donatarij iuxta communem opinionem: & omnia

illa amittit sponsa propter fornicationem ante matrimonium.

6 Tota dubitatio principalis est, si in casu quod nec iustitia sæcularis, nec Ecclesiastica mulierem hæc condemnauit ad amissionem dotis, & Doctores dicerent quod stando in iure dotem non amisit (cuius oppositum nos suprà ostendimus) & in casu, quod constaret clarè has res pignoras, quas habet Petrus, esse istius mulieris, illasque adduxisse pro dote, possit Petrus hæc pignora dare marito putatio ut recuperet pecuniam, quam illi mutuo dedit. An verò teneatur Petrus res illas donare mulieri cuius sunt, etiam si Petrus amittat omnem pecuniam, quam marito mutuauerat? Iste casus resolui debet ex resolutione illius grauis difficultatis, quâ quæritur, an is qui rem emit à latrone, nesciens esse latronem, postea cognouit certo rem esse furto ablatam, & esse Francisci; quæritur inquam an emptor iste teneatur rem restituere Francisco vero domino, an possit illam reddere latroni, ut recuperet ab illo pecuniam quam illi dedit titulo emptionis? Ad hunc casum multi, & graues Doctores dicunt teneri emptorem rem restituere Francisco, qui est verus dominus illius, nec posse illam reddere latroni pro recuperanda sua pecunia. Ego in hoc casu sequor opinionem magis fauorabilem, & probabilem, quæ tenet oppositum, posse scilicet emptorem, talem rem reddere latroni, ut ab illo recuperet suam pecuniam, si aliter non possit recuperare. Hanc opinionem tenet Rabello 1. p. lib. 2. q. 9. num. 3. con. l. 1. pro qua citat Altiſiod. Alex. de Ales, Syluest. D. Ant. Nauar. Tabien. Toledo, Lop. & alios, cum quibus tot Doctoribus potest securè teneri dicta opinio.

opinio. Rationes pro ista sententia videri possunt cit. loco Rabel. Qui casus est omnino similis nostro, & iuxta illum dico posse Petrum hæc pignora reddere marito putatio, vt reddat sibi pecuniam suam: nam vt ait Rabello citato loco, neque ex lege charitatis, neque ex lege iustitiæ teneor seruare rem veri domini cum tanto meo damno, qualis est amissio tantæ pecuniæ, quam dedi pro illa re bona fide. Et hæc omnia procedunt etiam quando Petrus acceperit illa pignora bona fide, credens illa esse mariti: vel quod maritus posset illa pignorare pro expensis litis: in quo casu maritus pro sua defensione potest facere expensas de bonis vxoris, vt tenet Riccius tom. 1. *Decisionum Collect.* 1245. & tom. 2. *collect.* 1794. Sicut etiam quando vxor agit contra maritum debet habere expensas de bonis mariti. Dixi, dūmodo Petrus habuerit bonam fidem, quando recepit hæc pignora: nam si habuit malam fidem sciens res illas esse mulieris, quas ille pignori dare non poterat; tunc illi non proderunt supra dicta: tunc enim tenebitur tradere pignora mulieri, etiam cum iactura propriæ pecuniæ, sicut tradit Rabello cit. *quæst.* 9. *conclus.* 2. *num.* 61.

6 Sed quid? Demus quod iste maritus putatiuus carceratus hodie non habet pecuniam, quam soluat Petro sibi reddēti pignoratam poterit Petrus hæc pignora retinere pro compensatione suæ pecuniæ: an verò teneatur illa reddere mulieri quam scit esse dominam, etiam cum amissione pecuniæ mutuata? Idem dubium erit, si emi rem à latrone bonâ fide, & postea sciui rem esse Francisci, sed latro non apparet cui reddam rem emptam ad recuperandam meam pecuniam, an teneat rem reddere Francisco cū amissione

propriæ pecuniæ? Hunc casum apud nullum in terminis inueni. Solum scio tunc securius esse quod res reddenda est domino vero, & quod non poterit emptor illam sibi retinere pro compensatione propriæ pecuniæ. Videtur hoc probari hac vnicâ ratione. Nā compensatio non fit nisi contra verū debitore, a quo non possum rem meam recuperare: in casu verò latronis, Franciscus cuius est res propria, non est meus debitor: ergo contra illum non possum facere compensationem. Idem dicendum videtur de Petro habente pignora istius mariti, non enim poterit illa retinere pro compensatione suæ pecuniæ contra mulierem, quia mulier non est sibi debens, & proinde in dānum illius non poterit facere compensationem.

7 Ultimò aduerto, quod si sit æquale dubium, an hæ res pignorate sint mariti, aut vxoris, in tali casu sunt restituendæ marito putatiuo, siquidem ille eas sub pignore dedit, & habebat possessionem illarum, & in dubio melior est conditio possidentis. Videri potest ad hæc Sâ in *Aphor. verb.* Restitutio n. 36.

CASVS LXXXV.

De rebus pertinentibus ad vsum cuiusdam Monialis.

Quidam Prouincialis in scriptis concessit cuidam Moniali, vt res aliquas mobiles, & æstimabiles, quibus utebatur in vita, per mortē ipsius videretur & pretium illarū applicaretur totū pro Missis celebrandis pro anima ipsius Monialis, præcipiēs cū censuris ne Abbatiſſa de illis rebus aliter disponeret. Vo

ret. Voluit hæc Monialis licentiam illam Prouincialis confirmare per D. Collectorem Apostolicum. Ille recusauit confirmare licentiam; dicens quod hoc in substantia erat dare licentiam Moniali, vt posset facere testamentum, quod solus Papa potest concedere: vt decernitur *in cap. Quia ingredientibus* 19. q. 3. & *cap. 2. de testamentis.*

1 Ego respondi potuisse Prouincialem dare hanc licentiam, neque hoc esse dare licentiam ad testandum, neque per hoc dispensasse Prouincialem in voto paupertatis. Neque Abbatissam mortuâ illâ Moniali posse aliter de rebus defunctæ disponere. Sic tradit Sanchez *tom. 2. Decalogi loco mox citando*, à quo hauriam omnia sequentia, quæ dicam, eo quod ille sit tantus Doctor & Religiosus, exactissimè de statu Religioso disputans toto 1. tomo Decalogi.

Ante probationem istius conclusionis suppono cū eodem Patre Sanchez *tom. 2. Decalogi, lib. 7. c. 22. n. 11.* quod Moniales possunt habere peculium de licentia sui prælari ad vsus pios, dummodo tale peculium sit reuocabile ad nutum prælari. Hoc autem peculium non est prohibitum Religiosis per Concilium Tridentinum, sicut Sanchez efficaciter probat cit. capite cum Nauarro, Fuluio Paciano, Grassis, Sà, Vega. Et probatur ex praxi omnium Religionum in Hispania, in qua multæ Moniales habent peculia aliquando centum ducatorum, & ultra cum licentia prælatorum. Et hoc specialiter permittitur in conuentibus, in quibus communitas non suppeditat sufficienter omnia necessaria ad victum, & vestitum Monialium. Secundò suppono, quod has res æstimabiles auri, vel argenti, ad quas distrahendæ pro Missis, & anima sua Monialis licentiam petebat, non eas illi

dedit conuentus, sed seculares, consanguinei, vel amici, vel illa eas propriâ industriâ acquisiuit.

2 Hoc posito, probatur hæc opinio ex iis, quæ tradit Sanchez *citato lib. 7. Decalogi c. 28. n. 12.* vbi ait cum Nauarro, Graffis, & Rodriguez, quod potest Religiosus etiam si sit D. Francisci, scribere in papyro res pertinentes ad suum vsum, quibus vtitur, & petere in papyro à prælato, vt post suum obitum permittat, concedat, vt res illæ dentur certo, vel certis Religiosis: & quod prælatus potest concedere petitionem illam tali Religioso, non vt illud valeat sicut testamentum, vel codicillus; sed tanquam donatio causâ mortis cum licentia prælati. Eo nempe modo, quo idem Religiosus in vita donare posset donatione inter viuos alteri Religioso cum licentia prælati. Hoc enim (ait Sanchez) non est facere testamentum, neque codicillum; quia talis donatio non habet vim ex dispositione defuncti, vt patet, sed ex voluntate prælati, qui semper potest reuocare illam licentiam, ac donationem, etiam post mortem defuncti. Adde quod in hac donatione factâ per mortem ab isto Religioso cum prædicta licentia, non interuenit forma testamenti, testium, videlicet & Notarij, sed est pura donatio facta cum licentia prælati, sicut poterat illud donare in vita, cum licentia eiusdem prælati. Denique quod hoc non sit facere testamentum, probatur: nam ista Monialis petens hanc licentiam à Prouinciali, non disponit absolutè vt testatrix, sed solum rogat, & petit vt Prouincialis consentiat, & proinde non testatur. Si ergo Monachus, vel Monialis potest in morte sic donare alteri Religioso cum licentia prælati, etiam poterit cū eadem licentia donare sibi ipsi, vt scilicet res sui vsus distrahantur, & illarum pretium

tium insumatur in suffragiis pro anima sua faciendis, Maximè cum Monialium conuentus paucissima suffragia curet fieri pro suis Monialibus defunctis. Et proinde est causa nimis pia vt prælatus possit dare hanc licentiam : maximè cum hæc donatio non fiat erga sæculares, nec res istæ fuerint ex bonis Religionis.

3 Secundò principaliter idem probo ex eo casu, quem resoluit Sanchez *citato lib. 7. Decalogi c. 22. n. 16.* vbi ait cum Corduba, Lopez, Vega, & Rodriguez, quod si quidam sæcularis dedit vni Moniali centum ducatos, vt consumat illos in suis necessitatibus: & hæc Monialis det illam pecuniam ad negotiandum cum illa, & de lucro licito negotiationis detur eidem Moniali singulis annis certus cæsus, verbi gratiâ, decem ducatorum, & residuum maneat ipsi secundo sæculari, cui dedit pecuniam ad negotiandum : dicunt prædicti Doctores, quod poterit monasterium cum licentia Prouincialis post mortem illius Monialis donare illi sæculari, qui negotiatus est cum pecunia centum illos ducatos, quod erat capitale, vt illi maneant proprii in æternum. Ecce quomodo cōuentus cum licentia Prouincialis potest facere tam amplam donationem. Mobilia verò istius Monialis non debebant accedere ad summam centum ducatorum, & præterea non intendit dare illos sæcularibus. Addit verò Sanchez cit. loco duas condiciones requiri, vt ritè fiat hæc donatio; prima est vt fiat cum consensu ipsius conuentus Monialium, eo quod illa donatio in rigore est alienatio bonorum monasterij mobilium, & extra monasterium. Secunda conditio est, vt ille sæcularis, cui donari debent illi cærum ducati, sit persona benemerita ipsius cōuentus. Et quod attinet ad primam conditionem, non requiritur in hoc

in hoc nostro casu, quod conuentus consentiat: nam ista bona Monialis non alienantur extra conuentum, sed manent intra conuentum, id est in anima Monialis, quæ tota vita conuentui seruiuit. Et quod spectat ad secundam conditionem vt scilicet persona sit benemerita, satis benemerita persona conuentus est ipsa Monialis, quæ per totam vitam conuentui semper inseruiuit.

4 Tertiò facit ad hoc quod tradit Sanch. *lib. 7. cap. 19. n. 42.* vbi ait cum Corduba, & Lopez, quod prælatus localis potest suo subdito dare licentiam vt insumat decem ducatos in vsus pios sibi placitos & non vltra; quia dare licentiam vltra decem ducatos videtur pertinere ad Generalem Ordinis. Et hoc ait posse fieri attenta praxi, & statutis Religionis, & qualitate personæ donantis. Et hoc verius erit, & facilius in nostro casu, si constiterit quod ista Monialis has res acquisiuit labore manuum suarum, nam in tali casu ait Sanch. *cit. cap. 19.* quod sola Abbatissa potest dare licentiam Moniali, vt in suos vsus expendat acquisita labore manuum suarum, & cit. Gregorium Lopez, & Bartholam. Lædesnam, in numero 44. Nec contra hoc obstat Bulla D. Clementis VIII. in qua omnino prohibet prælatis ne dent licentiam subditis ad danda muneta, & dona sæcularibus: nam in hoc casu hæc Monialis nihil donat sæcularibus, sed applicat animæ suæ. Adde quod illa Bulla Clementis VIII. non fuit vsu recepta in Hispania, vt tenet Sanchez *cit. cap. 19. num. 42. & num. 100.*

Ad argumentum in contrarium initio positum, concedo non posse Religiosum condere testamentum, neque ad illud faciendum posse prælatum licentiam concedere: sed dico licentiam datam huic Mo-

niali

niali ad prædicta expendenda pro anima sua, non esse licentiam ad faciendum testamentum, vt clarè probauit suprà num. 3.

CASVS LXXXVI.

*De quodam furto, & consultatione diaboli
ad illud detegendum.*

Quidam Religiosus furto abstulit rem notabilem sacram, & de loco sacro. Quod cum esset omnino secretum, quidam sæcularis, cuius intererat, consuluit quandam maleficam diuinatricem, vt sibi reuelaret authorem furti. Illa consulto diabolo, dixit sæculari quærenti, authorem furti esse Fullanum Religiosum certæ Religionis. Iste sæcularis id intimauit prælato istius Religiosi. Qui vocauit subditum reum, & interrogauit de delicto an ita esset, idq; in secreto. Religiosus confessus est delictum. Et paulò pòst, delictum factum est publicum, & publicè dictus Religiosus de furto diffamatus est.

Quæsitum est, an hic Religiosus posset puniri supplicio publico ob tale delictum? Et videtur quod non: nam cum hoc delictum esset antea omnino secretum, iniustæ factum est publicum, mediante diabolo: iustitia verò non est exhibenda per media illicita & iniusta, neque delicta secreta possunt puniri pœnâ publica, vt tenet communis opinio, maxime Nauarrus in *Rubr. de iudiciis à numero 79.* citans D. Thomam.

Respon

Responsio.

1 Si prima conclusio. Si iste Religiosus confessus est delictum coram prælato iuridicè, id est, coram Notario, & prælato interrogante, non tanquam patre, sed tanquam iudice, potuit prælatus illum punire, etiam si delictum esset occultum. Sic decernitur in cap. 1. de accusat. in 6. vbi textus, & glossa in explicatione casus dicit, Quod stante crimine furti occulto, & reo non diffamato, si iudex inquirens fecit me vocari, & me interrogavit de furto, & ego confessus sum, potest me iudex punire in publico: nec possum iudici opponere me non esse diffamatum, nec mihi fuisse exhibita capitula culparum. Pro quo glossa ibi citat multos textus qui ibi possunt videri. Dixi, si confessus fuit delictum iuridicè, & coram notario, nam si confessus fuit sine notario, & solum tanquam patri, non tanquam iudici, non poterit illum punire publicè, sed solum secretò.

2 Licet iste Religiosus non confiteretur delictum, & licet tale delictum foret antea omnino secretum, dato tamen quod publicum factum est, etiam mediante diabolo, si adsint probationes sufficientes, poterit puniri supplicio etiam si culpabiliter fuerit publicatum. Hanc conclusionem tenet in terminis Nauar. in citata Rubrica de iudicijs num. 87. vbi loquens de teste qui in inquisitione generali illicitè coram iudice detexit aliquod delictum occultum proximi, quod detegere non valebat, ponit hæc verba: *Ex qua tamen bene, vel malè delicta deducta sunt in publicam iudicis notitiam, ille tenetur ad castigandum ea per inquisitionem particularem.* Sic ille. Quo nihil clarius dici potuit ad intentum. Et in huius confirmationem citat

tat ibi Nauarrus Sotum dicentem ad hoc intentum
 hoc intentum hoc modo. Sufficit notitia iudicialis ha-
 bita per confessionem malè torti ad hoc vt iudex
 aliàs à torto inquirat contra delictum. Idem colligi-
 tur ex capit. *Ecce autem*, 24. q. 3. vbi dicitur: *Quod cri-
 mina undecunque clauerint puniendi sunt ipsis crimino-
 sis confiteri nolentibus.* Et in hoc sensu, & ad hoc inten-
 tum citat hunc textum glos. *primi cap. de accusat. in 6.*
 in verbo *confessus*, vbi glossa ponit hæc verba: *Quid
 enim quæremus de infamia, vel capitulis, ex quo claret de
 crimine?* Confirmo hoc amplius exemplo communi-
 ter adducto. Videlicet: Petrus accusauit Franciscum
 de quodam crimine occulto: & probauit delictum
 per testes falsos & iudex, vt persona particularis, scit
 Franciscum esse innocentem; in tali casu, si iste iudex
 protulerit sententiam, debet ferre sententiam secun-
 dum allegata, & probata contra Franciscum iuxta
 communem opinionem. Et in hoc nostro casu id
 maiorem locum habet, in quo delictum verum est
 iam plenè probatum, vt suppono, & publicum iam
 factum, maximè ob confessionem delinquentis. Dixi
 ob confessionem delinquentis, quia sine hac intelli-
 ga non potuisse hoc delictum plenè probari per te-
 stes. Probo quia cum istud crimen omnino secretum
 fuerit, & sola malefica ope diaboli fuerit præcipuus
 testis (vt ita dicam) delicti, talis malefica non potuit
 adduci in testem: testimonium enim personæ infamis,
 non est validum, vt patet: & sic nullus testis occula-
 tus legitimus esse potuit istius delicti. Item per solam
 famam publicam non potuit damnari pœna ordinaria,
 tū quia sola fama nō sufficit ad irrogandā pœnā ordi-
 nariā, tū quia fama debet oriri a personis fide dignis,
 & non infamibus: hæc autē orta est malefica infami,
 & pro

& proinde si non esset confessio rei iuridica non posset puniri.

3 Ad argumentum oppositum in principio manet responsum ex illis, quæ diximus supra cum Nauarro *num. 2. ex citato capite, Ecce autem*, videlicet per accidens esse quod furtum publicatum sit per media illicita: sufficit enim quod iam sit factum publicum, siue bene, siue malè, vt dixit Nauarrus. Iura enim præcipientia, vt delictum publicum puniatur, non distinguunt an licitè, vel illicitè publicum factum sit: sed solum iubent quod delictum publicum puniatur ne crimina publica maneant impunita cum detrimento Reipublicæ. Neque ex hoc diceretur, quod prælatus iste fecit iustitiam per media illicita: cum enim præcellerit confessio rei, & vera publicitas delicti, iam facit iustitiam per media licita.

4 Quamuis autem à me quæsitum non fuerit, quam pœnam incurrerit sæcularis qui maleficam consulta-uit de authore furri, sciens illam esse maleficant, & responsa dare ex sola consultatione dæmonis; quia utile fuerit id pro aliquo casu puniendo scire. Dico primò peccatum esse grauissimum consulere maleficos ad scienda secreta. Nam hi malefici cum habeant pactum formale cum diabolo, sunt suspecti in fide, & proinde tanquam tales accusari possunt ad tribunal sanctæ Inquisitionis. Is verò qui consultat malefico, si est persona Ecclesiastica, in cap. *Si qui Episcopus. 26. q. 5.* incurrit suspensionem officij, vel beneficij, & iubetur recludi in monasterio ad faciendum ibi pœnitentiam. Et Sanchez *lib. 2. Decalogi cap. 38. num. 36.* citatis multis Doctõribus, citat etiam ex iure canonico *capitulum 2. de sortilegijs*, vbi quidam, ex eo solum quod sumpsit Astrolabium ad sci-

scien

sciendum de quodam furto occulto nullam habens intentionem alloquendi diabolum, damnatus est tanquam grauissime peccans, & suspensus est ab altaris ministerio per annum. Denique quam graue peccatum hoc sit satis obligatur ex illo responso, quod dedit Elias ad Nuncios Regis Ochosiæ, qui ex mandato Regis ibant ad consulendum Beelzebub circa ægitudinem Regis. Ad quos dicit Elias, 4. Reg. 9. *Nunquid non est Deus in Israel, ut eat ad consulendum Beelzebub deum Accaron? Quamobrem, & car.* Et ultra hoc commercium consulendi diabolum pro furto occulto sit aliud peccatum grauissimum, quod est infamare proximum de crimine, quod est omnino occultum, quod de ordinario non est licitum, nisi quando crimen est contra communitatem: & neque tunc licet consulere diabolum pro illo cognoscendo.

CASVS LXXXVII.

*De quadam dote, & donatione
omnium bonorum.*

Quidam vir cum vxore sua habebant vnicam filiam legitimam, quam matrimonio locarunt cuidam viro nobili: illique dotem constituerunt in hunc modum. Pro dote illi constituimus omnia nostra bona mobilia, & immobilia, præsentia, & futura quouis modo acquirenda etiam per donationes Regias; & manebat filia, & gener in domo paterna ex vno pane comedentes. Pater habebat aliam filiam illegitimam domi, quæ illi inseruiebat. Et pater cum sit officialis Regis habet ultra duos mille ducatos ex stipendio

pendio officij, ex quibus sumptus ordinarios domus sustentat, & residuum istius pecuniæ dat filiæ illegitimæ pro suo peculio, & pro suo seruitio.

Quæsitum est primò, an valida fuerit ista dotatio, siue donatio omnium bonorum præsentium, & futurorum. Videtur enim reprobara in iure eo quod per illam maneat homo impossibilitatus ad dandam eleemosynam: & ad testandum, & sic de alijs bonis actionibus quibus se priuat.

Secundò quæsitum est, an pater possit hodie donare filiæ illegitimæ illud residuum pecuniæ, eo quod filiæ legitimæ donauerit pro dote omnia bona sua mobilia, & immobilia, præsentia, & futura quouis modo acquirenda. Hoc enim posito, videtur non posse illud, residuum pecuniæ donare filiæ illegitimæ: cum hæc pecunia sit bonum mobile, & ille omnia bona etiam mobilia promiserit, & donauerit filiæ legitimæ. An verò non obstante illâ dotatione, & donatione omnium bonorum: intelligendum sit quod pater in vita habeat dominium omnium reddituum suorum, ita vt possit de illis donare, ac disponere sicut voluerit?

Responsio ad primum quæsitum.

I Antequam respondeam ad primum quæsitum, noto donationem omnium bonorum esse suspectam, vt dixi, & in legibus ciuilibus correctam, ob causas proximè assignatas. De quo per summam, & sufficienter agit Rabello *lib. 18. q. 7. de donat.* vbi in summa dicit, donationem omnium bonorum præsentium esse prohibitam, & irritam per leges Castellæ, quas ibi citat. Si verò sit donatio omnium bonorum tam præsentium, quam futurorum esse irritam, & illicitam, etiam

etiam per legem Portugalliæ 4. lib. *Ordinat. tit. 4. §. penultimo.* Et citat Doctores. Excipit tamen, quod si donatio omnium bonorum fiat Ecclesiæ, vel pauperibus propter Deum, erit donatio valida, iuxta illud Christi D. Math. 19. *Vade, vende omnia que habes, &c.* Excipit secundò, quod si donatio omnium bonorum fiat à patre erga filium, vel filiam ratione dotis pro matrimonio contrahendò, donatio erit valida; maxime si pater reseruauit sibi certam portionem de qua posset testari in morte, vt mihi constitit hunc patrem reseruasse vltra mille ducatos extra donationem, de quibus posset testari. Ex quibus omnibus constat donationem hanc fuisse validam; tum quia facta est à patre erga filiam pro dote, tum quia pater reseruauit sibi portionem, ex qua testari posset: & præterea quia victum, & cibum commune non abdicauit, sed simul cum filia, & genero mansit in eadem domo, sustentandus ex redditibus communibus.

2. Solum restat aduertere cum Iulio Claro lib. 4. §. *Donatio q. 19. n. 7.* vbi ait donationem omnium bonorum præsentium, & futurorum esse validam, si fiat causâ mortis. Vbi clarè innuit à contrario sensu, quod si sit, & fiat donatio inter viuos, non erit valida; cuius ratio est, quia donatio inter viuos statim sortitur suum effectum, & transfert dominium in donatarium. Donatio verò causâ mortis non sortitur effectum, nec transfert dominium in donatarium nisi post mortem donantis, vt communis opinio docet. An verò ista donatio fuerit inter viuos, vel causâ mortis, mihi constare non potuit, quia extra informationē mihi dictū est donatores in scriptura dixisse: *Quod ipsis donatores in vita sua frueretur bonis dotatis; & illa possidebūt: & post mortē illorū, filia & gener possidebūt liberè prædicta bona.*

Quæ verba si interuenerunt, clarè innuunt non fuisse illam donationem inter viuos, sed solum causâ mortis, cum in vita retinuerint sibi dominium bonorum, vel saltem vsumfructum illorum: quæ duo non se compatiuntur cum donatione inter viuos, quæ statim transfert dominium rei donatæ in donatarium.

3. Solutio secundi dubij tum pendet ex proximè dictis, videlicet, qualis fuerit præcedens donatio: pendet etiam à cognoscenda intentione quam habuit ipse donator, quando fecit hanc donationem: an scilicet habuerit intentionem priuandi se, & dominio rerum donatarum, & vsumfructu illarum, ita vt in illis rebus donatis solum sibi maneret simplex, & nudus vsus, sicut seruus, & frater Minorita solum habent in rebus quibus vtuntur, quarum non habent dominium, neque vsumfructum, sed solum simplicem vsum, & ideo res illas, quibus vtuntur donare non possunt. Ex cognitione inquam istius intentionis donatoris colligendum est, an pater iste possit donare filiæ illegitimæ pecuniam, de qua quærit, non obstante illa totali donatione facta filiæ legitimæ. Ad eum modum, quo Doctores dicunt, quod quando fui emissum votum à vouente & votum est dubium, ita vt non constet ex verbis quid fieri debeat: interrogandus est vouens, quam intentionem virtuales in vouendo habuerit: si verò ipse vouens dubius sit, & nesciat explicare mentem suam, interpretandum est votum vt obliget ad id quod minus est: quia fauendum est libertati voluntatis. Ita in terminis tenet Sanch. *lib. 2. de marrim. disp. 41. n. 3.* citans alios; & probat cum Panor. Syluest. & Angelo dicentibus quod iuramentum dubium interpretandum est strictè, vt minus obliget iurantem, quam fieri possit. Hinc iam constat quid

quid dicendum sit ad secundum quæsitum. Si enim hic parer in donatione facta filiae legitimæ habuit intentionem priuandi se dominio, & vsufructu rerum donatarum; & manendi cum solo vsu nudo cessat omnis quæstio, & non potest donare filiae illegitimæ illam pecuniam quia habens solum simplicem vsu, non potest donare, sicut Religiosus Minorita. Si verò prædictus donator non meminerit intentionis quam habuit, & de hoc dubius sit, interpretandum est in fauorem libertatis ipsius, vt obligetur ad id quod minus est, & vt donare possit illam pecuniam filiae illegitimæ saltem sicut vsufructuarius rerum donatarum.

Adhuc rem declaro alio exemplo Theologico. Fecit aliquis vir timoratus actionem aliquam, de qua dubitabat, an esse peccatum; sed deposuit dubium practicum, cogitans non esse peccatum: & postea constitit, quod à parte rei erat peccatum. Ille talis, si erat vir timoratus, & aliàs non esset facturus; si sciret esse peccatum, non peccauit quia non habuit intentionem peccandi, & standum est illi intentioni prioris id est, si esset peccatum non facerem. Eodem modo, si iste homo hodie dicat, quod si quando fecit illam donationem filiae legitimæ, sibi in mentem veniret priuandi se dominio & vsufructu; & potestate donandi; hodie dicat quod talem intentionem tunc non formaret: hodie credendum est ad illud se non intendisse obligare, & proinde posse dare prædictam pecuniam filiae illegitimæ. Non enim credendum est quod vir grauis, literatus, & diues in donatione sua voluerit se priuare dominio omnium rerum, vsufructu, & potestate dandi aliquid de redditibus, ita vt maneret sicut seruus captiuus. Adde quod ex verbis suprà positis in fine numeri secundi, quæ dicuntur

fuisse posita in scriptura dotis, constat, quod parentes in donatione dixerunt se ambos in vita fruituros bonis illis dotatis : filia verò, & gener per mortem dotantium illa bona possessuros esse post mortem dotantium : quod clarissimum signum est illos non se priuasse in vita dominio, nec usu fructu illorum bonorum, sed fuisse donationem causa mortis, & proinde posse patrem hunc donare huic filiae illegitimae pecuniam, de qua quæritur. Obligatur tamen hic pater in conscientia tempore mortis donare filiae legitimae omnia bona mobilia, & immobilia tunc extantia: nec poterit in vita aliquid donare in fraudem dictae filiae legitimae de industria, intendens illam ledere : quia hoc clarè est contra prædictam donationem.

§ Adhuc in fauorem illius filiae illegitimae, quod pater illi potuerit donare illam pecuniam : adduco id quod dicit, & probat Azor *tom. 2. lib. 7. cap. 10. q. 10.* ubi probat citans aliquos, quod licet ius commune prohibeat Clericis facere donationes de fructibus beneficij Ecclesiastici Hoc non obstante potest clericus de fructibus beneficij dare alimenta filio spurio, imò ad id obligari in conscientia. Imò addit posse eundem clericum de bonis beneficij dare filiae spuriae dote pro matrimonio, si aliunde non habeat. Et ad hoc citat Curtium, Syluest. Cardin. Palæortum. Si autem hoc potest pater clericus de bonis beneficij Ecclesiastici erga filiam spuriam : à fortiori id poterit hic pater facere suae filiae spuriae.

CASVS LXXXVIII.

De quodam diuortio in duos coniuges.

QUædam mulier secundi matrimonij propter graues molestias, & rixas, quas habebat cum suo marito, fecit diuortium ad inuicem, in quo manet quinque ab hinc mensibus, & obtinuit à marito per scriptum, consensum diuortij: in qua scriptura maritus illi dedit licentiam vt posset manere in aliquo receptaculo mulierum non professarum, vulgo, *Recolhimento*, illa amplius procedens, coram sacrosancta Eucharistia, votum vouit se futuram esse Monialem professam in quacunque Religione, quæ ipsam veller recipere.

Responsio.

Iste casus propositus est confusè: nam explicari oportuit, an hoc diuortium factum sit auctoritate iudicis Ecclesiastici: & an sit data sententia diuortij perpetui, an solum ad tempus: suppono enim vt rem certissimam coniuges non posse facere diuortium auctoritate propria, vt inter alios supponit Henriquez lib. 11. de matr. c. 8. n. 13. Tertiò declarandum fuit, an diuortium factum sit quoad thorum tantum, an quoad thorum, & cohabitationem simul. Quartò an hoc diuortium factum sit culpâ ipsius viri, qui erat scæuus, & iniuriosus mulieri, an è cōtra sit factū diuortium culpâ ipsius vxoris, quæ erat seuiēs in virū, insti-

dias illi parans, & car. omnia enim hæc diuersam postulant responsionem. Quia igitur casus è longinquo positus, venit obscurus, sumendo illum in sensu, & praxi communiore diuortij, respondeo cum sequentibus declarationibus, videlicet.

2 Si hoc diuortium factum est per sententiam iudicis Ecclesiastici: & factum est in perpetuum: Et factum est quoad thorum, & habitationem simul: & non est factum culpâ mulieris sed viri. Hæc mulier sic separata, potest esse Monialis professa inuito marito, & intrare Religionem. Ita conclusio asseritur in simili ferè casu à Doctõibus in materia de matrimonio, dum tractant, an si alter coniux fuerit adulter, & ideo lata sit sententia diuortij (intellige perpetui) possit coniux innocens Religionem intrare, & profiteri, vel Ordines sacros recipere, idque inuito coniuge culpato, & respondent omnes, quod potest inuito altero, & culpato manente in sæculo. Hæc conclusio est expressa in capite *constitutus*, & cap. *veniens*, de conuers. coniugatorum, & cap. *Agathosa* 27. q. 1. & ratio est, quia adulter omne ius coniugale amisit, quod solum obstaculo erat ingressui Religionis innocentis. Ultra citatos textus, ita tenet Sanchez lib. 10. de *matrim. disp. 11.* citans alios, & tenet Bonacina *tomo 1. tract. de pertinentibus ad vsum matrimonij*, q. 4. puncto 3. *num. 23.* & alij. Hæc autem ratio militat omnino in diuortio facto in perpetuum propter scuritiam, & futuram viri latâ sententiâ perperui diuortij quoad thorum & habitationem simul: tunc enim vir scæuus, & furens amittit omne ius coniugale per talem separationem. Imò maior causa separationis datur quando maritus est scæuus & crudelis, cum periculo occidendi vxorem, tunc enim potest illa per se facere diuor

diuortium fugiendo à marito ob periculum vitæ, vt tenet Reginaldus *tom. 2. libro 31. num. 316.* quod non potest propriâ autoritate facere in alijs causis diuortij. Si ergo in hoc casu vir iste nimis saeuus in vxorem, & cui non prodest dare cautionem, per sententiam iudicis priuetur thoro, & cohabitatione vxoris in perpetuum, clarum est quod per talem sententiam amittit omne ius coniugale: & proinde vxor illius innocens poterit profiteri Religionem eo inuito, & manente in sæculo, etiamsi ille relictus non voueat castitatem. Rationem hanc clariùs assignat Reginaldus *citato lib. 31. num. 330.* dicens quod diuortij sententia absoluit innocentem à debito coniugalis societatis, dissoluitque contractum matrimonij quoad ius thori, & cohabitationis: quæ eadem verba in terminis desumpsit ex Sanchez *lib. 10. de matrim. disp. 9. q. 3. num. 30.* Si ergo diuortij perpetui sententia quoad thorum, & cohabitationem priuat iure coniugali in perpetuum, bene poterit coniux innocens ingredi Religionem inuito coniuge nocente, ad cuius cohabitationem non est amplius reuersurus. Et nihil interest an hoc diuortium perpetuum sit factum propter adulterium, an propter sauitiam viri: cum vtriusque milite eadem omnino ratio, & vtrumque priuet nocentem iure coniugali in perpetuum.

XXV CASVS

CASVS LXXXIX.

*De quodam homicida professio in quadam
Religione.*

Quidam adolescens ex leui occasione, alium adolescentem, aliàs amicum verbis iniurijs lacessuit: & hoc non contentus, euaginato gladio illum imperijt: idque tam irato animo vt duo viri comitantes illum, detinere non potuerint. Cùmque iam propè accederet ad alium, gladio euaginato, is qui impetebatur protestatus est aggressori, vt desisteret, & retrocederet. Cùmque aggressor non desisteret, is qui impetebatur sciens aggressorem esse naturâ suâ audacem, rixosum, & iam aliàs homicidam, pro vitæ propriæ defensione archebusio aggressorem interfecit, credens aliàs vitam propriam esse positam in periculo. Hoc facto se absentauit, & in partibus remotis ingressus est quamdam Religionem, & in illa professus, iam ab annis quinque vel sex. Et vult hodie Ordines sacros recipere.

Quæritur primò: an illius professio valida fuerit non obstante motu proprio Sixti V. contra criminosos?

Secundò, an dato quod validè professus fuerit, possit hodie prælatus illius cum illo dispensare ad Ordines recipiendos per priuilegia Ordinum Mendicantium, quibus gaudet Religio istius professi: An verò indigeat speciali dispensatione Summi Pontificis?

Respon

Responsio ad primum.

i Ad primum quæsitum dico, professionem fuisse validam, si fuit facta post Bullam Clementis VIII. per quam reduxit Bullam Sixti V. ad terminos iuris communis, de qua statim dicam: prælatus verò istius professi incurrit pœnas positas in dicta Bulla Sixti V. si prælatus recipiens illum, sciebat illum esse homicidam. Prima pars probatur, quod scilicet professio valida fuerit. Nam licet Sixtus V. in illa sua Bulla annullauerit professionem factam ab homicida: postea tamen Clemens VIII. prædictam Bullam Sixti V. reduxit ad terminos iuris communis, decernens ut professio foret valida, licet non esset seruata forma præscripta à Sixto V. prælatus verò recipiens criminolum non seruata dictâ formâ Bullæ Sixtiæ incurrit pœnas positas à Sixto V. Hanc Bullam expedit Clemens VIII. anno 1602. die 2. Aprilis. Constat verò quod professio homicidæ non prohibetur, neque annullatur in iure communi, ut ego probaui in meo 1. tom. *Dubiorum Regular. verbo Nouitius, quo ad qualitates requisitas à Sixto V. num. 12.* Vbi attuli duo exēpla duorū homicidarū, qui fuerunt Religiosi, & id probaui ex vno textu iuris canonici. Dixi prælatum, qui hunc recepit incurrisse pœnas impositas à Sixto V. si sciebat illum esse homicidā: quia si prælatus fecit informationes à Sixto V. præscriptas, & per illas non constitit de tali homicidio; prælatus illum recipiens non incurrit prædictas pœnas. Quia Sixtus V. in sua Bulla solum punit prælatos, qui temerè recipiunt criminosos, id est non præmissâ informatione præcedente, ut clarè probat Rodrigue

tom. 3. qq. Regul. qu. 54. ar. 4. adducens verba ipsius Bullæ.

2. Quod attinet ad secundum quæsitum, responsio illius pendet ex resolutione alterius dubij maioris; an videlicet homicidium istius professi fuerit voluntarium, an casuale? Item si fuit notorium, an occultum? Nam in irregularitate homicidij voluntarij notorij non possunt prælati regulares dispensare cum suis subditis, ut suppono certissimum.

Dico ergo imprimis, quod attentis circumstantiis in informatione supra relatis, credo quod istud homicidium non fuit voluntarium. Probo ex iis, quæ tradit Suarez *tom. de censuris disp. 44. sect. 1. n. 5.* Vbi ait quod ad hoc ut incurrarur irregularitas homicidij voluntarij, est necessaria expressa, ac spontanea voluntas occidendi. Et ait quod per has particulas excluditur voluntas se defendendi. Nani voluntas se defendendi, est voluntas necessaria, non spontanea. Et proinde cum iste, de quo agimus, voluerit directè se defendere à viro potenti, rixoso, & se invadente cum gladio euaginato, & nolente retrocedere, cum occisor moneret ut desisteret, sequitur clarè, quod non habuit directam, ac spontaneam voluntatem occidendi, sed se defendendi, & proinde illius homicidium non fuit voluntarium, sed casuale. Addit Suarez cit. loco, quod si aliquis habeat voluntatem principaliter se defendendi, licet aliquantulum peccaminosè excedat, effectus ex illa secutus non est voluntarius. Imò probat ibidem Suarez *num. 2.* ex Doctoribus, & textibus, quod si aliquis directè, & spontaneè habuit intentionem infligendi vulnus, sed non occidendi; sed postea ex vulnere inflicto mors fuit secuta, iste talis non fuit homicida voluntarius, sed casualis.

Nam,

Nam, ut ait, homicidium voluntarium dicitur illud solum quod directè, & perfectè volitum est: Iste vero qui solum voluit vulnerare, & non occidere, directè non intendit homicidium. Et iste de quo agimus solum intendit se defendere.

3. Facit ad intentum quod tradit Comitulus *lib. 4. Respons. Moral. q. 10. n. 12.* ubi circa hanc materiam ponit hæc omnia verba sequentia: *Qui hominem paratum ad cedem intentâ sicâ, seu telo venientem, qui se conflictu casurum videt, potest antequam manus conferantur, cominus, vel eminus, aut discolo globulo, aut vibrans hastam interimere.* Sic ille. Quod clarissimè probat nostrum intentum. Facit etiam quod tradit Bonacina *tom. 2. tit. de restit. in particulari disp. 2. q. ultima sect. 1. puncto 8.* ubi agit quando iniustus possit licitè occidere iniuentem, de quo sic dicit: *Si iniustus probabiliter credat se graviter ledendum, vel occidendum, si vim non repellat, seu iniustorem non occidat, & cæ.* Et in hoc casu clarè docet Bonacina posse licitè iniustum occidere aggressorem: quod in terminis contingit in casu de quo agimus. Potuit enim iste de quo agimus probabiliter timere periculum vitæ, videns venientem ad se hominem cum gladio euaginato, naturâ suâ rixosum, & iam reum homicidij: cum de semel malo possit semper præsumi quod sit malus, iuxta regulam *iuris in sexto.* Facit etiam quod tradit Reginaldus *tomo 2. lib. 21. num. 57, §. Circa quam* ubi ait, quod si ego suspicor quod Petrus me vult occidere, & ego illum moneo, ut desistat, & ille non acquiescit; possum illum occidere tanquam iniustum aggressorem, si constet de periculo mortis, quod alia ratione vitare non possum. Denique facit quod tradit Azor *tom. 3. de quinto præcepto Decalo*

calogilib. 2. cap. 1. q. 2. vbi ait, quod inuasus potest occidere inuadentem, si probabiliter credit se grauiter lædendum, vel occidendum si vim non repellat: quod suprà iam retulimus ex Bonacina. Et in omnibus his 4 Doctõribus dicentibus posse sic inuasum licitè occidere inuadentem, videre licet quod inuasus sic occidens non peccat, cùm vim vi repellere liceat ex lumine naturali: si verò in tali occisione licita non interuenit peccatum, etiam non datur irregularitas orta ex homicidio voluntario: quia hæc irregularitas est pœna imposita propter peccatum: & vbi non est culpa, non est pœna, vt omnes Doctores fatentur. Quod verò ob licitam sui defensionem liceat occidere inuadentem, est communis Doctõrum opinio, de quo inter alios, Sayro *in clauis Regia lib. 7. cap. 10. num. 14.* citans multos: qui tamen limitat dummodo seruetur moderamen inculpatæ tutelæ.

4 Sed modò videndum est pro nostro casu, an hic de quo agimus seruauerit moderamen inculpatæ tutelæ? Pro quo sciendum est primò ex Sayro *cit. cap. 10. num. 18.* & ex Vega Minimo *1. p. sum. casu 12.* in fine, & aliis, quod si inuasus potest se defendere fugiendo, vel clamando, vel solum vulnerando absque occisione, tenetur vel fugere, vel clamare, vel solum vulnerare, aliàs non seruat moderamen inculpatæ tutelæ, nec vitat irregularitatem. Hic verò, de quo loquimur videtur quod potuerit facere aliquod ex illis tribus.

5 Ad huius rei notitiam respondeo cum Sayro *cit. loco*, qui postquam dixit teneri inuasum fugere, seu clamare si potest. subdit hæc verba: *Quod si dum hæc considerat possitne fugere, aut clamare, videat se exponi graui periculo inuasoris illum opprimentis, non est quod in his considerandis se occupet, sed se etiam cum inuasore*

vis occisione defendat, quia semper est melior ratio patientis iniuriam. Sic Sayro. Vega verò ponit hæc verba circa fugam inuali: *De quo sufficit aliqua probabilis coniectura: & non est necessarium examinare si alio modo possit vitare periculum: nam in similibus periculis deest ut plurimum sufficiens consideratio ad evadendum.* Sic ille. Nunc videat iste pater informans, quomodo se in isto casu gesserit, & quid cogitauerit, inde enim pēdet resolutio suę dubitationis, an scilicet seruauerit hoc moderamen inculpatæ tutelæ.

6 Secundò dico; si principale intentum quod habuit, fuit defendere vitam suam, quam credebat periclitari, si non occideret inuasorem, dato quod non seruauerit moderamen inculpatæ tutelæ fugiendo aut solum vulnerando, licet in eo peccasset mortaliter, eius tamen homicidium non fuit voluntarium propter causas suprâ in principio adductas ex Suar. quia scilicet non fuit volitum in se & spontaneum, sed necessarium. Et proinde cū non fuerit homicidium voluntarium, poterit cum isto Religioso ad suscipiendos Ordines sacros dispētare suus prælatus, etiamsi sit prælatus localis. Sic tenet Henriquez *l. 2. lib. 14. c. 10. §. 2. & eodē lib. c. 19. §. 3.* Idem tenet Riccius *4. p. decisio. collect. 930. in fine: & Barbosa in remission. ad Trident. ad sess. 14. cap. 7. de reformat. vbi citat alios multos Doctores.* Qui hoc colligunt clarè ex cit. c. 7. Tridentini: vbi Cōcilium imprimis dicit nullū prælatum posse dispensare cum homicida, qui per insidias, & industriam proximum occiderit: & hic est propriè homicida voluntarius, cum quo solus Papa dispensat, si est notorium. Sed addit statim Concilium Trident. in hunc modū: *Si verò homicidiū non est ex proposito, sed casu, vel vim repellendo, ut qui se à morte defenderet*
fuisse

fuisse commissum narret, &c. In hoc casu ait Concilium, poterit Episcopus dispensare. Si verò potest Episcopus cum suo subdito dispensare, etiam poterit prælatus regularis id facere cum suo subdito, per privilegia quæ ego citavi in meo primo tomo *Dubiorum Regular. verba Abbas num. 6. & verbo Dispensare num. 9.* Et sic in hoc nostro casu poterit prælatus istius Religiosi cum illo dispensare viſo quod illius homicidium factum, præcipuè ob defensionem vitæ non fuit voluntarium, sed casuale, etiamsi fuerit publicum, & notorium, vt dixi *citato num. 9.*

6. Nunc resumendo superius dicta, Dico primò, quod si iste homicida in occisione seruauit moderamen inculpatæ tutelæ occidendo præcise ad defensionem vitæ, ita vt non peccauerit, non indiget dispensatione aliquâ ad Ordines suscipiendos: cum enim in tali homicidio non peccauerit iuxta Doctores supra citatos *num. 3.* non incurrit irregularitatem, quia vbi non est culpa, non est poena irregularitatis. Dico secundò, quod si occidit principaliter ad tuendam propriam vitam, quam credebat aliàs periclitari, tunc licet non seruauerit moderamen inculpatæ tutelæ, & occidendo peccauerit, poterit cum illo dispensare suus prælatus per supradicta *num. 5.* quia illius homicidium non fuit voluntarium, sed casuale. Et sic ego consulo, quod pro maiori securitate obtineat à suo prælato dispensationem in irregularitate.

CASVS

CASVS XC.

*De quodam statuto certæ Religionis circa
non recipiendos descendentes à Iudeis.*

IN quadam Religione facta sunt duo statuta, vnum post aliud. Primum statutum sic habet: *Remouemus omnem facultatem à prioribus, & prouincialibus, ut de cætero non possint recipere ad habitum, vel professionem iuuenes trahentes originem à sanguine Iudeorum, vel Sarracenorum. Et ideo precipimus in virtute Spiritus sancti, & sanctæ obedientiæ sub formali præcepto, & sub pœna priuationis perpetuæ regiminis in Ordine, ut nullus recipiatur à prælatis prioribus, & prouincialibus in conuentibus nisi notoria, vel diligentissimo examine constet huiusmodi recipiendos ad habitum, vel professionem maculâ huiusmodi prorsus carere, Irritum decernentes quidquid secus factum fuerit, nisi verâ ignorantia id fieret. Fiat nihilominus ipsis recipiendis super hoc publica protestatio.*

Secundum statutum eiusdem Religionis posterius fuit hoc. *Præcipimus omnibus, & singulis prælatis huius prouinciæ in virtute Spiritus sancti, & sanctæ obedientiæ sub formali præcepto, & sub pœna absolutionis à suis officij, ut iuxta id quod alias in hac eadem prouinciâ à predecessoribus nostris ordinatum fuit, neminem descendente ex genere Iudeorum, Sarracenorum, vel Maurorum ad habitum nostri Ordinis recipiant: qua de re diligentem inquisitionem facere tenebuntur iuxta modum, & formam à patribus eiusdem prouinciæ matura deliberatione præfigendam, & publicandam. Ne*

his verò, qui ex genere, & sanguine, ac familia descendunt nobilem, qui Lusitano idionmate dicuntur, Fidalgos de solar, & eorum, qui titulo Ducis, Marchionis, Comitis, & supra sunt insigniti, nulla alia probatio seu examen requiratur, quam quod ex huiusmodi Baronibus originem ducant. Et quoniam parum prodesset huiusmodi sanguine notatos in hac prouincia ad habitum non recipere, si aliis in locis professos, ipsamet prouincia in filios reciperet: idcirco sub eodem formali precepto precipimus ne similes, seu tales in hac prouincia proficisci possint sub pretextu cuiuscumque facultatis, aut licentia obtenta, vel obtinenda. Irritum ex tunc decernentes quidquid secus factum fuerit.

His positis, quæritur primò, an secundum statutum limitet primum statutum, vel ipsum reuocet in totum, vel in parte: vel an simpliciter habeat vim obligandi tale primum statutum, sicut habebat antequam fieret secundum statutum?

Secundò quæritur, an si recipiatur in eadem prouincia aliquis iuuenis habitus pro christiano veteri, eo quod ante receptionem illius præmissæ sunt informationes solitæ fieri in prouincia, & nihil contra illum resultauit: postea tamen progressu temporis constitit illum descendere ex Iudæis post illius professionem, an inquam talis receptio, & professio validæ fuerint, vel inuolidæ, ita quod post professionem possit expelli à dicta Religione?

Responsio ad primum.

1 Ad primum dico, quod secundum statutum non reuocat, neque contrariatur primo statuto, licet illud primum extendat, & in parte limitet. Quod verò pri

rō primum non reuocetur per secundum, probo ex
 traditis per Suarez *tom. de legib. lib. 6. c. 27. num. 10.* vbi
 ponit hæc verba : *Lex posterior non habens clausulam*
derogantem, vel abrogantem priorem non reuocat illam
nisi quando illi directè opponitur, ita vt nisi priori de-
roget, fiat inutilis. Et ait hanc esse opinionem mul-
 torum Doctorum. Hoc autem secundum statutum
 non habet clausulam derogatoriam prioris statuti,
 neque est oppositum primò : neque secundum statu-
 tum erit inutile si primum non derogetur, vt patet.
 Ergo secundum non derogat primo. Secundò, idem
 probatur ex traditis à Nauar. *in consilio 1. de pænis n.*
1. vbi citans quandam legem iuris ciuilis, ait :
Quod à lege antiqua non est recedendum nisi quatenus
per nouam reperitur esse recessum. At in hoc ca-
 su statutum secundum non recedit à primo in
 principali intento, quod est excludere ab Or-
 dine Christianos nouos : imò quoad hoc primum
 statutum confirmatur per secundum, quatenus se-
 cundum excludens supradictos ait. *Iuxta id quod*
alias in hac eadem prouincia à prædecessoribus nostris or-
dinatum fuit. Idem probatur ex traditis à Nauarro
consilio 3. de adulterijs, vbi citans aliam legem iuris
 ciuilis, ait : *Lex noua remedium adducens, non cense-*
tur tollere aliud per alias leges iam inductum. Et in hoc
 casu secundum statutum affert vnum remedium ad
 arcendos Christianos nouos ab Ordine, quod est vt
 neque tales professi in alijs prouincijs, in corporentur
 in ista : ergo dando hoc secundum remedium
 positū à primo statuto de talibus nō recipiendis ad
 habitū. Vltimò probatur ex dicto cōmuni Iuristarum
 dicētiū, quod legū correctio, & cōtrarietas quoad fieri
 possit, vñda est : adeò, vt si necesse sit pro cōcordādis

duabus legibus, quæ videntur discordare, impropria-
re verba alterius legis, ita faciendum sit pro vitanda
legum correctione, sicut tradit Sanch. *lib. 1. de ma-
trim. disp. 1. n. 6* citans multos. At in hoc casu non est
necessarium impropriae verba alicuius statuti ex his
duobus ad correctionem alicuius.

2 Dico secundò, quod secundum statutum est ex-
tensivum, & ampliatiuum primi. Constat clarè, quia
primum solum prohibet ne ad habitum, vel profes-
sionem recipiantur denuo iuvenes; secundum verò
ampliat, ut neque tales professi in aliis prouinciis in-
corporentur in ita tanquam filij illius. Et sic secun-
dum statutum ampliat, & confirmat primum: tantum
abest ut reuocet.

3 Dico terriò. Secundum statutum in aliqua par-
te limitat primum, quatenus in secundo dicitur, in
facienda informatione pro recipiendis ad habitum
filiis, & descendantibus à nobilibus, & baronibus,
sufficere quod probetur ab illis descendere; innuens
quod de istis non necesse sit inquirere an descen-
dant à Iudæis, cum ut plurimum tales à nobilibus
descendentes non credantur à Iudæis descendere:
quæ limitatio non ponebatur in primo statuto. Li-
cet verò secundum statutum sic limiter primum,
non ideo derogat primo, quia limitare non est abro-
gare, ut patet: sed solum quoad partem modificare.
Imò per istam limitationem magis firmatur pri-
mum statutum quoad intentum principale de ex-
cludendis Christianis nouis, iuxta illam regulam Iu-
ristarum. *Exceptio firmat regulam.*

Responsio

Responsio ad secundum.

4 Responsio secundi quæ sit pendet à solutione alterius maioris dubij : an scilicet licitum, & validum sit statutum Religionis , per quod statuit ne ad professionem recipiantur tales descendentes à Iudæis (vulgo *Christianos novos*) & quod si recipiantur illorum professio nulla sit, & proinde possint expelli ab Ordine? Nauarrus in *consilio 5. de Regularib. primæ impressionis*, dicens in Religione Minimorum dari tale statutum, asserit nullam Religionem posse facere tale statutum : si verò fiat, fore statutum nullum, neque per illud posse expelli ab Ordine professum tali sanguine maculatu ex vi talis statuti, sed professionem fore validam. Probat Nauarrus, quia Religio non potest facere statutū contra ius commune ; ius verò commune admittit, id est non excludit à Religione descendentes hos à Iudæis. Ad quod citat Nauarrus quædam verba Pij in quadam Bulla loquente de hac materia, in qua dicit citatus Papa ad hoc intentum, quod non est distinctio Iudæi, & Græci, iuxta Divum Paulum Idem habet frater Hieronymus Rodriguez in *suis resolutionibus resolutione 101. num. 17. qui cum Rodriguez tomo 3. qq. quæst. 11. art. 1. equit* ut Nauarrum adducens eandem rationem Nauarrus. Et sic iuxta hanc opinionem respondeo ad primum quæsitum propositum: non potest hæc Religio facere, hoc statutum, neque virtute illius expellere professum, de quo est quæstio.

5 Hoc non obstante, mihi magis placet opinio Suarez, qui *tomo quarto de Relig. lib. 2. de ingressu in societatem cap. 2. à num. 10. usque ad finem capitis,*

dicit primò quod sua Religio habet hoc ipsum statutum in terminis. Et quod hoc statutum factum est à patribus grauibus, & doctissimis congregatis: idque in vrbe Roma : debuerant verò tales patres bene scire tale statutum esse licitum. Et præterea debuit Romæ Papa scire de tali statuto, cui tamen Papa non contradixit. Addit deinde quod Papa suæ Religionis concessit priuilegium ad faciendas constitutiones quaslibet; quas viderint esse vtilis bono communi Religionis: & præterea quod idem Papa confirmauit omnes constitutiones prædictæ Religionis factas, & faciendas. Quæ concessio cum sit priuilegium, communicatur cæteris Religionibus habentibus priuilegium communicationis. Et in cit. cap. num. 5. Respondet Suarez argumento Nauarri dicens, non posse Religionem facere statutum quod sit contrarium iuri communi positiuè bene tamen posse facere statutum contrarium iuri communi, negatiuè. Hoc est: Non potest Religio facere statutum contra ius, quando ius positiuè, & formaliter dicit, fiat hoc, vel non fiat hoc: nam lex inferioris non potest tollere legem superioris, sicut dicitur in *Clementina*. Ne Romani de elect. Sed tamen poterit Religio facere statutum contrarium iuri communi negatiuè, id est in materia, in qua ius commune se habuit negatiuè, id est, nihil disposuit in particulari. In hoc enim Religio nõ contrariatur in rigore iuri communi, sed disponit extra, vel præter ius commune. Et in casu nostri statuti, ius commune nullibi dicit positiuè, quod Christiani noui admittantur ad Religionem vel quod nõ arceantur ab illa: sed habuit se ius commune in hoc negatiuè, id est nihil de hoc determinauit in particulari: & ex cõsequenti Religio, quæ fecit tale statutum de excludendis

ab Or

ab Ordine descendentes à Iudæis, facit statutum contrarium iuri communi solum negatiuè, quod in rigore non est contradicere iuri communi. Et sic iuxta hanc opinionem Suarez, professio descendens à Iudæis, de quo quæritur, erit nulla ex vi statuti, poteritque proinde expelli ab Ordine, ubi constiterit de macula illius descendentiæ. Videatur Suarez *cit. loco* ubi fusiùs rem tractat, & respondet ad alia argumenta Nauarri. Et ponit Suarez hoc exemplum clarum; videlicet. Religio Minimorum habet statutum quod nullus ad professionem in illa admittatur nisi habuerit decem, & octo annos completos: quod statutum videtur contrarium Concilio Tridentino decernenti quod professio validè fiat in anno sexto decimo completo. Et tamen prædicta Religio hodie seruat suum statutum, & Tridentinum non illud annullauit. Ratio est, quia prædictum statutum Minimorum non contrariatur Tridentino positiuè. Nam Tridentinum non ait positiuè quod professio facta ante annum decimum octauum sit nulla; neque ait, quod nullus admittatur ad illam ante annum decimum octauum: solum ait quod sit nulla, si fiat ante annum decimum sextum: de professione verò facta in anno decimooctauo habuit se negatiuè, id est, nihil disposuit: & proinde tale statutum contrariatur Tridentino solum negatiuè: seu potius non est contra Tridentinum, sed præter Tridentinum.

6 Dico secundo, dato quod opinio Suarez non esset vera, & quod Religio non posset facere statutum de quo est quæstio, poterit adhuc Religio expellere talè professum, de quo quæritur in secundo quæsito, idque non ex vi statuti (dato quod esset nullum) sed ex eo quia in tali professione defuit cōsensus ex parte

Religionisillum admittentis ad professionē. Etenim Religio non illi dedit suffragia ad professionem nisi sub conditione, si careret maculâ talis sanguinis; & proinde cū talis conditio non sit sortita effectum, professio fuit nulla. Etenim professio est quidam cōtractus inter profitentē & Religionem admittētem. Est autem res certissima, quod contractus factus sub conditione, deficiente conditione, corruiť contractus. Hoc ipsum affirmat Nauar. Rodrig. & Hieronymus Rodriguez cit. locis: qui licet negent posse Religionem facere statutum, de quo loquimur, omnes tamen concedunt posse Religionem expellere professum contra tale statutum cognito postea defectu natalium: & adducunt rationem proximē positam de defectu consensus ex parte Religionis: & proinde professio sine consensu Religionis est nulla.

7 Dico tertio, quod vt possit expelli iste taliter inuentus maculatus post professionem, est omnino necessarium quod ante professionem fiat illi potestatio, quod expelletur ab Ordine quoties inuentus fuerit maculatus in natalibus. Sic tenet Nauar. cit. loco §. *Secundo quod*. Et ratio naturalis dicťat: nam in materia contractuum est de substantia contractus, quod conditio appositā contractui intimeretur vtrique contrahenti, vt sciat ad quid se obliget, alioqui non annullabitur contractus ex defectu conditionis non intimatę contrahentibus. Quod aded verum est, vt dicťat Reginaldus lib. 25. n. 59. quod in faciendo contractu conditionali, conditio debet esse expressa, & quod non sufficit tacita: pro quo citat Syluest. & vnam legem iuris ciuilis. Imo addit Reginald. quod talis conditio debet apponi in principio contractus iuxta Syluest. ibidem citatum. Ob quam causam dico in nostro

nostro casu, quod si huic professo non fuit facta prædicta protestatio ante professionem, quod scilicet illum admittebant sub prædicta conditione, non poterit Religio illum postea expellere. Contra hoc tamen non facit quod ait Nauarr. *citato* §. dicens, quod ad hoc sufficiet protestatio expressa, vel tacita: & non declarat qualis erit in hoc casu protestatio tacita. Ego, saluo meliori iudicio, credo per protestationem tacitam ibi intelligi, quando prædictum statutum Ordinis excludens à professione Christianos novos fuerit notum ipsi profitenti. Si enim illius habeat notitiam, ipsum statutum facit protestationem, & proinde licet prælatus in professione non faciat expressam protestationem, fit tamen profitenti tacita protestatio ab ipso statuto, quia lex semper loquitur, & profitens sciebat illam legem: & ideo in nostro Ordine Minorum statuta generalia bis in anno leguntur in communitate, ut nō possit quis illorum ignorantiam allegare. Et ideo si hoc statutum istius Religionis legitur singulis annis in communitate, dico quod huic professo fit protestatio tacita in professione, quæ sufficit secundum Nauarrum. Si verò tale statutum non legitur in communitate, nec profitens illius habet notitiam, neque illi in professione fit expressa protestatio, non poterit postea expelli iuxta prædicta ex Reginaldo, quia non fuit illi notificata conditio contractus professionis.

§ Aliud dubium potest hic oriri ex verbis positis in primo statuto istius Religionis: quatenus dicit: *Quod si secus factum fuerit, sit irritum, nisi vera ignorantia sit factum.* In quibus verbis clarè innuit, quod si aliquis inuenis ad professionem admissus fuerit, ante quam professionem facta fuit informatio de

illius progenie, & ex facta informatione nihil contra ipsius progeniem resultauit, & post factam professionem constitit de illius defectu in natalibus, in tali casu innuit primum statutum quod professio erit valida, eo quod sit admissus per ignorantiam, & sic non poterit expelli, etiamsi illi facta fuerit protestatio. Facit ad hoc quod ait Rodriguez *tom. 3. qq. Regular. quest. 54. art. 1.* ubi probat, quod etiam stante Bullâ Sixti V. in suo robore contra criminosos, per quam annullabat professionem illorum qui commiserant delicta grauiâ in sæculo, & quod talis expelleretur: ait Rodrig. quod illo non obstante, si tali tempore reciperetur aliquis ad habitum, & professionem factâ prius informatione, & ex tali informatione nihil contra ipsum resultauit: & post professionem constitit, quod in sæculo fuerat criminosus: in tali casu non poterat expelli: quia (ait Rodriguez) Sixtus V. non annullauit illius professionem, sed solum annullauit professionem illius criminosi, qui temerè fuit criminosi, qui temerè fuit admissus, vt dicitur in Bulla illius: id est, si fuit receptus sine diligentia prius facta, & sine informatione. Si verò tunc prælatus faceret prius informationem, ex qua nihil resultauit, & tamen à parte rei receptus erat criminosus, prælatus non recipiebat temerè, sed prudenter: & ideo tunc professio valida erat, nec prælatus sic recipiens incurrebat pœnas Bullæ Sixtiæ, iuxta Rodriguez. Quod idem applicari potest ad casum istius primi statuti: in quo dicitur quod irrita sit professio, nisi facta fuerit professio ex vera ignorantia: & tunc prælatus recipiens illum qui descendit à Iudeis, præmissâ tamen informatione & non constituto per informationem quod talis sit, recipit illum cum

vera ignorantia, & proinde professio illius valida erit ex vi talis primi statuti.

9 Ad quod inconueniens vitandum prudenter in Ordine P. N. Francisci titulo de Nouitijs ordinatur, quod non obstante, quod informationes factæ ante professionem fuerunt bonæ, & iudicatæ à prælato, & discretis: nihilominus in professione fiat protestatio profitenti, quod si aliquo tempore de opposito constiterit, expelleretur ab Ordine, & hanc protestationem scriptam, & subscriptam à prælato, discretis, & ab ipso professo iubet seruari in archiuo conuentus, vt de illa constet in quouis tempore. Quibus sic stantibus, dicam ego quod in Ordine prædicto P. N. Francisci poterit professus expelli quouis tempore, quo post professionem constiterit illum esse comprehensum in aliquo illorum, quæ illi proposita sunt in præmissa protestatione.

CASVS XCI.

De permutatione cuiusdam beneficij.

DVo priores parochiales volunt permutare sua beneficia ad inuicem: quorum duorum beneficiorum alterum erat pinguius altero. Habens beneficium minus pingne postquam ambo consenserunt liberè in permutatione, si Papa dispensaret, promisit liberaliter priori beneficij pinguioris, quod ob solam gratificationem liberaliter volebat soluere omnes expensas faciendas in obtinenda pontificia dispensatione: & præterea, quod eidem priori conce

concedebat pro vita illius certus domos ad habitādū, idque gratis sine pretio locationis. Et iterum declarauit idem prior beneficij tenuioris quod hæc omnia donabat liberaliter ob solam gratitudinem.

Quæritur primò, utrū peccauerint hi duo priores sic paciscendo antequam obtinerent beneplacitum Papæ, vel superioris prælati potentis dispensare in prædicta permutatione?

Secundò quæritur, an possit fieri prædicta permutatio beneficiorum præcedente tali circumstantiâ promissionis expensarum, & donationis domus?

Responsio ad primum.

1. Ad primum quæsitum dico, non esse peccatum simoniæ si duo beneficiarij inter se prius tractent de permutatione, vel resignatione sui beneficij, semper apponentes conditionem, si Papa dispensauerit: & dummodo in illo prius pacto, vel tractatu non apponant aliquam circumstantiam, vel conditionem clarè simoniacam. Hæc conclusio certa est, & asseritur ab Azorio *tom. 2. l. 7. c. p. 29. q. 18.* pro qua ibi citat Syluest. *verbo permutatio 1. q. 5.* qui Syluest. citat quandam glossam, & Goffredum, & Ioan. And. & Panorm. qui dicunt id posse fieri, dummodo in hoc tractatu de permutatione facienda se remittant ad voluntatem Papæ, vel superioris. Et ait Syluest. quod licet non faciant hanc protestationem verbis expressis, *Si Papa voluerit*, sufficit quod illam faciant virtualiter, illamque mente concipiant. Et ibi respondet Syluester duobus capitulis iuris canonici, in quibus videtur prohiberi iste tractatus præcedens de futura permutatione. Et ad eisdem textus respondet

Azor cit. loco. Ego hoc probo exemplo. Queritur in materia de matrimonio an si vir promittat fœminæ suæ consanguineæ, se illâ ducturum in matrimonium, si Papa dispensauerit, an taliter promittendo peccet eo quod promittat rem illicitam ducendo consanguineam: & an talis promissio obliget dispensante Papa? Omissis alijs, respondet Sanchez *lib. 5. de matrim.* talem promissionem esse licitam: imò obligare ad contrahendum matrimonium cum illa, si Papa dispensauerit. Ratio est, quia talis promissio non est de re illicita: non enim est illicitum ducere consanguineam dispensante Papa, Eodem modo, licet illicitum sit permutare beneficium inconsulto Papa, vel tractare de illius permutatione non se remittendo ad Papæ consensum: non tamen est illicitum tractare de permutatione beneficij, remittendo se ad consensum futurum Papæ.

2. Secundò dico. Si iste prior beneficij pinguioris in principio tractatus dixit: *permutabo tecum meum beneficium si soluas expensas dispensationis, & usum domus mihi dederis ad habitandum*, & alius acceptauit, & promisit, ambo commiserunt peccatum simoniæ. Hæc conclusio est certa, & clara, asseritur à Suarez *tom. 1. de Relig. cap. 45*, vbi duo dicit. Primum est: quod si post tractatum, vel pactum de permutatione licitum, sine vlla labe simoniaca, ego promitto solum ex gratitudine dare pecuniam, vel aliquid pretio æstimabile, talis promissio gratuita post contractum licitum non facit contractum simoniacum. Secundò dicit Suarez, quod si ego antequam consentiam in permutatione, vel resignatione beneficij feci promissionem dandi pecuniam, vel aliquid temporale, addendo quod illud dabo pro gratificatione, talis actus

lis actus est simoniacus ; quia iam iteruenit pactum simoniacum dandi temporale pro spirituali: est enim tunc contractus, qui dicitur, faciam si feceris: vel faciam si dederis. Et ponit Suarez hæc verba: *Signis à me peteret ut librum donarem liberaliter, & ego responderem: dabo tibi liberaliter si tu mihi simili liberalitate donaueris vas tale, aliàs non donabo: profectò verbis dicerem me velle donare liberaliter: re tamen verà illud esset permutare, aut vendere.* Sic ille. Et concludit Suarez quod in nostro casu promissio illa gratificationis prius postulata, & deducta in pactum, est pretio æstimabilis, & re ipsa extorquetur pro spirituali beneficio: vel e contrà per obsequium temporale extorquetur promissio beneficij quod est emere beneficium. Et magis se declarans Suarez *cit. loco num. 13.* sic dicit: Post receptum purè, & sine conditione obsequium vel domũ, ex quo nata est obligatio antidotalis, non est simonia dare spirituale, vel Ecclesiasticum beneficiũ, non solum intentione explendi talem obligationem, sed etiam verbis explicando talem intentionem. Modò videant hi duo priores quomodo se gesserint in isto præuio tractatu, & quam intentionem habuerint. Et per hoc, responsum etiam manet ad secundum quæsitum.

3 Et pro maiori præsentis casus resolutione, dico tertio, quod habens beneficium maius, & pinguius potest illud permutare cum alio minori, & minus pingui, cum declaratione, quod Papa imponat aliquam pensionem illi qui acceptat beneficium pinguius, soluedã illi, qui pinguius beneficium dimittit. Vel sub conditione, quod Papa det aliud beneficium paruum dimittenti illud pinguius vltra illud beneficiũ minus pingue, quod habebat is qui permutauit cum pinguiori. Hæc conclusio est Azorij *loca cit. q. 15.*

& Lessij in loco paulò post citando, & omnes in illa conueniunt, quia Papa in his potest dispensare.

4 Huius occasione propono breuiter hoc loco illud dubiũ, de quo Doctores in materia de beneficijs: vtrum scilicet possit vnum beneficium permutari cum alio compensando pecunia excessum fructuum vnus beneficij pinguioris: Ad quam quæstionem respondet Vasquez *tomo opusculorum tract. de beneficijs c. 2. §. 4. dubio 3.* dicendo talem permutationem esse simoniacam, & proinde fieri non posse. Et ait hanc opinionem esse Nauarri, Adriani, Angeli, & Couar. in locis qui apud Vasquez videri possunt.

5 Hoc non obstante oppositum tenet Lessius *lib. 2. de simoniaca cap. 2 §. dubio 16. num. 101.* vbi probat id posse fieri cum dispensatione Papæ. Pro qua opinione citat Sotum Cajetanum, Syluest. Panormitanum, Angelum. Probat hoc Lessius, quia illa pecunia non petitur neque accipitur pro excessu fructum manente annexo ipsi beneficio pinguiori: sed petitur pro incommode temporali, quod patitur is qui dimittit beneficium pinguius spoliando se illis fructibus beneficij. Et ob hanc causam poterit petere à Papa, vt faciat sibi compensationẽ reseruãdo sibi pensionẽ in beneficio pinguiori, quod dimittit, vel vt recipiẽs beneficiũ pinguius aliquid sibi soluat ex suo patrimonio pro sua læsione. Sic ibi Lessius addens alia, & respondens fundamento, cui nititur Vasquez. Qui voluerit hanc opinionem sequi, securẽ id poterit facere cum talibus Doctoribus: Ex hoc manet magis probatum id quod supra diximus numero 1. non peccasse hos duos priores prius inter se paciscendo de dando id quod in informatione dicitur, si expressẽ conuenerunt inter se quod id facerent de

con

consensu Summi Pontificis. Aduertit tamen bene Azor citato loco, solum Papam posse imponere hanc pensionem in permutatione beneficij pinguioris, non verò id posse facere Episcopum, vel alium prælatum inferiorem Papâ: id enim illi prohibetur in capite i. ne beneficia cum diminutione conferantur.

C A S V S X C I I .

*De quodam Religioso applicante se seruitio
Commissarij generalis sanctæ Cruciatæ.*

Commissarius generalis sanctæ Cruciatæ perijt licentiam à quodam prælato regulari certæ Religionis, vt quidam subditus eiusdem prælati posset ire ad certam ciuitatem pro faciendo certo negotio eiusdem Commissarij sanctæ Cruciatæ. Prælatus regularis negauit illi licentiam. Quo viso dictus Commissarius per epistolam vocauit dictum Religiosum, qui non petita licentiâ à suo prælato, adiuit prædictum Commissarium Cruciatæ. Qui dictum Religiosum mandauit in locum distantem per multas leucas, vt ibi certum negotiũ perageret. Prælatus istius Religiosi conquestus est apud D. Nunciũ Collectorẽ Apostolicum: qui proprio mandato in scriptis præcepit, vt vbicunque talis Religiosus inueniretur, tanquam apostata comprehenderetur, & de hoc eidem Collectori fieret intimatio. Hoc sciens Commissarius sanctæ Cruciatæ expediuit aliud mandatum in scriptis in oppositum, in quo declarauit prædictum Religiosum non fuisse apostatam, nec posse vt talem comprehendi, nec puniri: eo quod ipse Commissarius

Cru

Cruciata ex vi officij haberet potestatem ad applicandum, & occupandum in obsequio sanctæ Cruciatæ quemcunque veller Religiosum.

Quæsitum fuit, cuius mandato in hoc casu parendum fuerit: an D. Collectoris mandato, an verò Commissarij Cruciatæ mandato?

I Respondi obediendum esse mandato D. Collectoris, & proinde illum Religiosum habendum esse pro vero apostata. Ad huius probationem suppono, quod Concilium Tridentinum *sess. 25. cap. 4. de Regular.* circa Religiosos sic decernit: *Prohibet sancta Synodus ne quis regularis sine sui superioris licentia, predicationis, vel lectionis, aut cuiusvis pijs operis pretextu subiiciat se obsequio alicuius principis, vel communitalis, aut alterius cuiuscunque persone seu loci: neque ei aliquod privilegium, seu facultas ab alijs super ijs obtenta si iuratur: quod si contra fecerit, tanquam inobediens arbitrio superioris puniatur.* Sic Concilium citato loco, quo nihil Clarius ad intentum desiderari potest. Ex quibus verbis clare constat, quod neque Commissarius Cruciatæ, neque ullus Archiepiscopus potest applicare, vel occupare aliquem Religiosum in aliquo opere quantumcunque pio, & publico absque licentia expressa prælati talis Religiosi. Constat etiam quod Religiosus de quo agitur, peccavit mortaliter contra decretum Tridentini, & quod fuit verus apostata, eo quod à conuentu exierit sine licentia sui prælati: citat Concilium Tridentinum citato loco ad marginem capitulum quanto, de officio ordinarij, & Clementinam *Ne in agro s. quia vero*, de stat. Monachorum, ubi fit eadem prohibitio Religiosis: & proinde hæc prohibitio continetur in duobus capitibus iuris canonici, & in Concilio Tridentino.

2 Dico ergo primò , quod quando Commissarius Cruciatæ allegauerit se habere facultatem ad applicandum, & occupandum in obsequio Cruciatæ quemcumque Religiosum maluerit, potest Nuncius Apostolicus, imò prælatus Religiosi petere, vt ostendat, & exhibeat commissionem Papæ, quam ad id dicit habere. Probo primò ex eo quod tradit Mascardus *tomo 2. de probat. conclusione 945. & 946.* videlicet, quod iurisdictio extraordinaria, seu delegata non præsумitur, sed debet probari clarè, maximè quando talis iurisdictio est exorbitans, & correctiua iuris, pro quo multa citat Mascardus. At iurisdictio hæc quam publicat Commissarius Cruciatæ, est exorbitans, & correctiua iuris canonici, & Tridentini, imò illis contraria: ergo talem facultatem tenetur ostendere, & probare. Secundò probatur, quia Cardinali dicenti se habere aliquid in mandatis non creditur, nisi ostendat mandatum, vt tenet Mascardus *tomo 1. de probation. conclusione 491. numero 8.* citans Bartolum, Ioannem Adr. Albanum, & Cardinalem. Et hoc ait certius esse, quando Cardinalis dixerit, se habere aliquid in mandatis, quod est in præiudicium tertij, vt ibidem ait Mascardus *numero 11.* citans alios. At in nostro casu Commissarius Cruciatæ est minor Cardinale: ergo licet dicat se habere facultatem applicandi ad suum obsequium aliquem Religiosum, debet illam exhibere, alias non crederetur illi maximè cum ista applicatio sit clarè in præiudicium prælati regularis, à cuius obedientia subtrahitur talis Religiosus. Tertiò facit pro hoc quod ego vidi meis oculis in hac ciuitate Olyssipponis, vbi cum controuersia esset in quodam casu iurisditionis an scilicet posset Col-
lector

ctor Apostolicus recipere appellationem à Commissario Cruciatæ factam ad ipsum Collectorem, & ad hoc ipse Collector conuocaret multos Theologos, & Canonistas, illi Doctores dixerunt Collectori necessarium esse videre litteras Pontificias suæ commissionis, & delegationis Papalis, vt ex illis constaret an posset recipere appellationem illam factam à Commissario sanctæ Cruciatæ ad Collectorem. Qui dominus Collector statim iussit per secretarium suum legi Bullam suæ commissionis, ex qua constitit ipsum potuisse talem appellationem recipere. Et cum esset Nuncius Apostolicus non est dedignatus litteras suæ commissionis ostendere. Quod multo magis locum habebit in Commissario sanctæ Cruciatæ si dixerit se facultatem habere applicandi Religiosum ad suum obsequium absque licentia sui prælati, quod est contra Tridentinum, & canones citatos. Quartò facit quod tradit Sà *verbo* Excommunicatio *num. 10.* vbi dicit quod excommunicatio lata à delegato, qui copiam suæ commissionis parti perenti noluit dare, est nulla. Et citat Innocent. Pannorm. & Felinum, Facit denique, quod in *compendio Mendicantium verbo* Exemptio §. 32. Leo decimus exemit fratres Minores à iurisdictione Commissariorum Cruciatæ, & alijs consimilibus, præcipiens huiusmodi Commissarijs sub grauibus censuris, ne assumant fratres Minores prælatos, ad prædicandam Cruciatam. Idem habetur in *eodem compendio, verbo* Cruciatæ §. 4. cum grauibus pœnis ex eodem Leone X.

3 Dico secundò, quod si Commissarius Cruciatæ ostenderit facultatem papalem, per quam illi concedatur, quod possit applicare ad suum obsequium quemuis Religiosum etiã absque licentia sui prælati;

vel dicat quod possit illum applicare sibi, non obstante Concilio Tridentino, tunc cessabit omnis quæstio, & licitè id faciet, potest enim Papa derogare iuri, ac Tridentino. Si verò Bulla ipsius Commissarij has clausulas vel aliquam illarum non contineat, non poterit aliquem Religiosum suo obsequio applicare absque licentia sui prælati iuxta Tridentinum suprà citatum. Dato vero quod Bulla ipsius dicat quod poterit assumere ad suum obsequium quemvis Religiosum, nihil aliud addendo, non poterit illum assumere absque licentia sui prælati. Nam Papa in suis rescriptis, & priuilegiis non derogat iuri communi, nisi id exprimat, vt Doctores communiter docent *ad caput primum de consfit.* cum legum correctio maximè vitanda sit. Neque Commissarius sanctæ Cruciatæ in hoc casu allegare poterit, quod iam petierat licentiam à prælato locali prædicti Religiosi. Nam dictus prælatus localis licentiam denegauit: & sic licentia petita, & negata, non est licentia.

4. Dico tertio, quod quandiu Commissarius sanctæ Cruciatæ non ostenderit Bullam Papæ, per quam illi concedatur posse applicare ad suum obsequium Religiosum absque licentia sui prælati, credendum est eum talem facultatem non habere, neque Summum Pontificem id illi concessisse. Ad cuius probationem suppono quod si Papa Commissario Cruciatæ talem facultatem concessisset, id foret magnum priuilegium, vtpote, vt faceret contra ordinem iuris, & Tridentini: quo posito sic probò, primò: nam priuilegium non solet concedi cum præiudicio tertij, maximè si talis tertius habet iam quæsitum ius in re, nisi princeps illud exprimat: sic tenet Suarez *tomo de legibus*

bus libro 8. capite 27. num. 9. pro quo citat textus utriusque iuris, & multos Doctores; addens hoc esse verum, etiamsi privilegium concedatur motu proprio. At exire Religiosum a conventu, & subicere se servitio alicuius domini Ecclesiastici absque licentia prælati, à cuius obedientia subtrahitur, infert magnū præiudiciū eidem prælato: ergo non est credendum Papam tale privilegium concessisse, nisi ostendatur. Secundò quia argumentum a sequela absurditatis, est satis firmum: videlicet, si hoc fieret, sequeretur absurdum, ergo non est faciendum. Quod inquam hic modus argumentandi sit validus, constat ex *capite Dudum de præbend. & dignitat.* ubi glossa verbo *Abfurdum*, citat alium textum: quò posito, arguo sic: Si Commissarius Cruciatæ, vel aliquis prælatus Ecclesiasticus haberet facultatem applicandi ad suum obsequium aliquem Religiosum absque licentia sui prælati, sequerentur multa absurda: ergo non est credendum Papæ tale privilegium concedere. Probo sequentia. Primò enim posset contingere, quod Commissarius Cruciatæ per ignorantiā facti applicaret suo obsequio Religiosū malæ vitæ, & malis moribus imbutū, qui proinde extra conventum habens libertatem plurima daret scandala, cū præiudicio, & infamia suæ Religionis. Secundò posset applicare suo obsequio Religiosum valde necessariū conventui, videlicet lectorem actualē Theologiæ, idq; cum detrimento conventus in quo legit Theologiam. Quod idem detrimentū pateret conuētus si tēpore quadragesimæ applicare vellet ad suum obsequium insignem prædicatorem, qui prædicat in suo conventu. Tertiò posset non vnum tantum, sed tres vel quatuor prædicatores graues, vel Theologos simul assumere ad prædicandā Cruciatā,

in quadragesima, ex quo detrimentum pateretur conuentus. Cumque hæc sint absurda, amputanda est occasio illorum. Tertiò hoc probo ex Concilio Tridentino sess. 24. c. 20. de reform. vbi ponit hæc verba: *Legati quoque etiam de latere, Nuntij, gubernatores Ecclesiastici, & cat. in prædictis impedire non præsumant, aut eorum iurisdictionem præripere, vel turbare: sed nec etiam contra Clericos, aliasque personas Ecclesiasticas procedant nisi Episcopo prius requisito.* Si ergo Papa, seu Concilium non vult quod legatus à latere, vel Nuntius procedat contra aliquem Clericum nisi prius requisito Episcopo, quomodo credendum est velle Papam, vt Commissarius Cruciatæ applicet ad suum obsequium aliquem Religiosum irrequisito suo prælato regulari? Vltimò, quia Papa non debet velle vt Commissarius Cruciatæ abroget statuta generalia Religionum: at in Ordine istius Religiosi, de quo est quæstio, datur statutum generale decernens, quod si alicui Religioso, Generalis Ordinis, vel Prouincialis mittat aliquam licentiam eundi ad aliquod oppidum, vel urbem, dictus Religiosus non vadat nisi prius ostensâ licentiâ prælato locali, alias secus faciens puniatur vt apostata. Hic v. Religiosus neque ostendit prælato locali epistolam Commissarij Cruciatæ, per quam illum ad se vocauit.

§ Adhuc aduerto pro maiori confirmatione dictorū, quod prohibitio ne aliquis Religiosus applicet se obsequio alicuius prælati, vel domini sæcularis absque licentia sui prælati, est decreta in Concilio Trident. & in Concilio Viennensi in citata Clementina supra n. 1. At decreta Concilij generalis, maximè Tridentini, non reuocantur per reuocationes generales posteriorum Pontificum, nisi in illis exprimatur, & dicatur:

dicatur : *Non obstante Concilio Tridentino, vel quouis alio Concilio generali.* Idque propter rationes, & multos graues Doctores, quos ad hoc citat Sanch. *lib. 3. de matrim. disp. 26. n. 7.* & proinde licet Bulla Commissarij Cruciatæ illi concederet vt posset ad suum obsequium applicare Religiosum, & non diceret: *Non obstante Concilio Tridentino,* nihil suffragaretur, & dictum Concilij Tridentini decretum non maneret reuocatum. Et ex his omnibus supradictis constat, quod Religiosus, de quo agimus, fuit verus apostata.

CASVS XCIII.

De quodam Vicario generali excommunicante Religiosum exemptum.

Quidam Religiosus ex quodam Ordine non mendicante professus, transiit ad alium Ordinem mendicantem, & in illo professus fuit post annum Nouitiatus, & in secunda Religione mendicante vixit per annos quindecim sine vlla reclamatione habitus, vt verè professus secundæ Religionis : progressu temporis aliquas culpas graues commisit propter quas carceri mancipatus est à prælato secundæ Religionis. Ille vt se à carcere liberaret, per epistolam reclamauit coram Vicario generali Archiepiscopi, dicens se velle probare quod professio facta in secunda Religione fuerit nulla, eo quod quando exiit à sua prima Religione ad secundam non attulit licentiam prælati prioris Religionis. Vicarius

generalis ad instantiam reclamantis mandauit praelato locali ipsius carcerati, sub excommunicatione, ut illum de carcere eductum deponeret extra conuentum in quadam congregatione Clericorum, ut inde securus posset causam suam prosequi. Ad hoc mandatū respondit praelatus localis, prædictum Religiosum detineri in carcere propter culpas per sententiam in capitulo iudicatas: & præterea prædictum Religiosum non posse audiri circa nullitatem suæ professionis, eo quod iam transiissent anni quindecim post suam professionem: Tridentinum verò præcipere, ut professus post quinquennium non audiat circa nullitatem suæ professionis. Postea cum idem praelatus ex decreto sui prouincialis propter easdem culpas vellet illum in nauimponere portandum ad Insulas, tanquam in pœnam exilij, prædictus Vicarius generalis sub eadem pœna excommunicationis præcepit praelato locali, ne dictum Religiosum ad Insulas manderet. Cui mandato cum etiam praelatus localis non paruisset, Vicarius generalis speciali, & publico mandato declarauit excommunicatum prædictum praelatum, in quadam parochia in die festo, quæ parochia erat vicina illi conuentui, idque coram omni populo illius parochiæ.

Quæsitum fuit, an prædictus Vicarius generalis potuerit validè excommunicare dictum praelatum regularem ob causam prædictam?

1. Ante responsionem præmitto primò, Concilium Tridentinum *sess. 25. cap. 19. de regular.* præcipere, quod si aliquis professus voluerit probare se non esse professum, non admittatur ad id probandum nisi intra quinquennium a die professionis. Et addit quod causas nullitatis suæ professionis debet allegare, & proba

probare coram suo prælato regulari, & coram Ordinario. Secundò suppono, quod excommunicatio nulla non ligat, neque ullam parit obligationem, vt omnes fatentur, & patet ex illo dicto communi: Ex nihilo nihil fit.

2 Tertiò suppono iuxta communem opinionem Doctorum, quod excommunicatio potest esse iniusta, & nulla ob duas præcipuè causas: prima est ex parte ipsius excommunicantis, quia scilicet excommunicans caret iurisdictione ad excommunicandum. Secunda causa est ex parte ipsius causæ, ob quam mouetur, & fundatur ad excommunicandum, quia scilicet talis causa est iniusta, & illicita, & proinde excommunicatio in tali causa fundata, est nulla: vel etiam quia continet errorem intolerabilem, quod paulò post exemplo declarabitur. Ita Doctores communiter, maxime Nauarrus in *summa* cap. 27. numero 3. & 4. Reginaldus *tomo 1. libr. 9. à numero 104. & sequenti*, & Henriquez *lib. 13. cap. 15. & 16.* vbi citat multos alios. Hoc posito dico indubitanter hanc sententiam declaratoriam prælati regularis tanquam excommunicari, fuisse nullam clarissimè ob sequentes causas, seu nullitates.

3 Primà causa nullitatis fuit, nam Vicarius generalis, vel Ordinarius non potest excommunicare Religiosum exemptum habentem priuilegium ne possit excommunicari nisi de speciali licentia, & commissione sedis Apostolicæ, quale priuilegium habebat iste prælatus excommunicatus à Vicario generali. Constat hoc ex toto verbo *Exemptio* in compendio Mendicantium, maximè §. 8. 9. 22. & 24. & in particulari citato §. 9. concedit Papa Clemens I V. fratribus Minoribus, vt non possint excommunicari, suspèdi,

vel interdici per vllum legatum, vel subdelegatum, nisi sit legatus à latere, & nisi litteræ talis delegati Papæ, faciant plenam, & expressam mentionem de prædicto Ordine, & dicto indulto. Et in *cit. loco* §. 22. Sixtus I V. Idem in substantia concessit: & Ordinariis qui contrarium fecerint imponit pœnam interdicti ab ingressu Ecclesiæ, & suspensionis à regimine, & administratione Ecclesiarum. Cæteris verò prælatis, & Rectoribus imponit pœnam excommunicationis, & priuationis beneficiorum, & inhabilitatis ad futura. Et in §. 24. conceditur Patribus Carmelitis, quod nullus Ordinarius possit illos excommunicare absque speciali Sedis Apostolicæ commissione faciente plenam, & expressam mentionem prædicti indulti, & quod processus factus in contrarium sit nullus. Similis concessio continetur in omnibus supra citatis §§. citato verbo *exempti*. Idem priuilegium concessit Paulus III. Patribus Societatis Iesu, teste Sanchez *lib. 7. de matrim. disput. 33. n. 23.* ubi doctissimè probat non posse Episcopos excommunicare Religiosos exemptos nisi id illis expresse à Papa, vel à Concilio generali fuerit permissum. Pro quo ponit exemplum in Concilio Tridentino, quod in duobus locis commisit Episcopis, vt possint cogere Religiosos cum censuris: videlicet in *sess. 22. in decreto de vitandis, in celebratione Missæ, & in sess. 25. c. 16. de regular.* sicut ibi potest videri. Quando verò ibi Concilium loquitur de subiectione Religiosorum ad Episcopos, & concedit aliquid Episcopis circa Religiosos, si non exprimit, quod possint illos cogere per censuras, non poterunt illos excommunicare licet Episcopis concedat aliquam iurisdictionem circa Religiosos. Exemplum clarum est in
Triden

Tridentino *sess. 25. cap. 13. de regular.* vbi conceditur Episcopis quod possint compellere Religiosos, vt vadant ad processiones: & non exprimit quod possint eos compellere per censuras. Ac proinde ad citatum locum Tridentini dicunt Doctores posse Episcopos compellere Religiosos vt vadāt ad processiones priuando illos ne prædicent, vel ne confessiones audiant in sua diocesi: non verò poterunt cogere per censuras, quia id illis Concilium ibi non permittit, sic præter Sanchez tenet Barbosa *ad cit. cap. 13.* Tridentini, dicens sic sæpe fuisse declaratum à congregat. Cardinalium, & citat Quarantam, Sanchez, Rodriguez: & Sanchez citat alios multos. Et denique sic habetur in *cap. 1. de priuileg. in 6.* Vide tamen Salgadum *de regia protect. 2. p. cap. 9. num. 109.* Barbosam *de officio, & potestate Episc. alleg. 78. n. 25. secundum Lugdunens.*

4 Nec potest dicere Vicarius generalis hanc excommunicationem se fulminasse ex speciali commissione Sedis Apostolicæ, cum enim Tridentinum *citato cap. 19.* committat Episcopo vt sit iudex in causa nullitatis professionis, consequenter illi videretur committere vt possit excommunicare pro illa causa terminanda. Non obstat, quia ibi Concilium non concedit expressè Episcopo vt possit excommunicare Religiosum exemptum, & oportebat id expressè concedere iuxta exemplum paulò suprà positum. *De compulsionem ad processiones.* Vide Riccium *in praxi decis. 363. n. 6.* Secundo dico, quod imò potius Tridentinū ibi priuauit Episcopum iurisdictione excommunicandi quoad hunc casum particularem: nam cum ibi iubeat vt professus post quinquennium non audiat, & professus, de quo agitur reclamet post annos quindecim,

decim, non potest Vicarius generalis illum audire; quod si non potest in eius casu procedere, non poterat ex consequenti pro prædicto casu excommunicare.

5 Secunda nullitas clara huius excommunicationis est, quod audiuit reclamantem post quinquennium, imò post quindennium sine speciali rescripto Papæ. Cum enim Concilium expressè dicat quod non possit audiri, non potest Vicarius generalis dispensare in Concilio Tridentino, & factum contra dictum Concilium erit nullum, iuxta illam regulam iuris in 6. *Quæ contra ius fiunt, debent utique pro infestis haberi:* ubi glossa multos textus adducit. Probatur etiam ex cap. 2. *de testibus*, ubi dicitur quod facta contra legem non habent firmitatem. Si verò respondeas quod Tridentinum citato loco non ponit clausulam irritantem dicens: Si audiatur post quinquennium sit nullum, & proinde non erit actus nullus audire illum post quinquennium, cum multa fieri prohibeantur, quæ tamen facta valent. Respondeo, quod licet lex non ponat clausulam irritantem, actus factus contra illam erit nullus, si talis lex præscribat formam seruandam in actu faciendo, & talis forma omittatur à iudice delegato. Sic communiter tradunt Doctores maxime Reginaldus *ro. 1. lib. 13. q. 4. n. 184.* & Suarez *tom. de legibus lib. 5. cap. 31. n. 9.* ubi citat quatuor vel quinque textus, & quādam glossam. Præcipuus textus ad hoc est in cap. *Cum dilecta*, de rescriptis: ubi Papa sic dicit: *Quorum processus cassauimus, quia contra nostri mandati tenorem, & car.* In citato verò capite Tridentini præscribitur forma substantialis seruanda in reclamatione professi: & hanc formam. Vicarius generalis non seruauit, ut patet: ergo illius factum fuit nullum, etiam si

ibi Concilium non posuerit clausulam irritantem. Et quod reclamans post quinquennium non possit audiri sine rescripto speciali Papæ. Probatur ex ipsa praxi, pro qua cito duo exempla. Primum quod ego vidi. Nam cum ego essem Prouincialis, quædam Monialis meæ prouinciæ post quinquennium voluit probare nullitatem professionis, quæ tamen prius impetrauit rescriptum Papæ, quod ego meis oculis vidi. Secundum exemplum sit alterius Monialis conuentus de Odiuellas prope Olyssipponem, quæ ad reclamandum contra suam professionem post quinquennium, prius duo rescripta Papæ impetrauit, vt posset audiri. Quod potest etiam probari *ex cap. coram de in integrum restit.* in quo duo Episcopi litigantes, & iussi apparere Romæ in certo termino assignato, & illi nec per procuratores comparuerint, pronuntiauit Papa illos ius suum amisisse, sed eo non obstante, Papa per rescriptum particulare eos ad litigandum admisit. Quod facit directè ad istum casum. Et quauis aliqui Doctores, vt Rodrig. *tom. 3. qq. q. 17. art. 16.* & alij dicant, quod si durante quinquennio, durauit impedimentum professionis, ob quod non potuit reclamare in quinquennio, vt quia vivebat pater professi, ob cuius grauem metum est professus, & post quinquennium mortuus est pater, & cessauit metus, vel simile impedimentum: quamuis inquam in hoc casu Rodriguez, & alij dicant posse tunc professum audiri post quinquennium; melius tamen nouissimè Bonacina *tom. 1. rit. de clausura, q. 2. sub titulo, quo tempore facienda sit reclamatio n. q. §.* Ergo vero, absolute probat quatuor, vel quinque rationibus efficacibus, quod transacto quinquennio nō potest audiri professus reclamans, etiam si intra quinquennium impeditus fuerit

fuerit ad reclamandum. Er quod est maius, & tollit omne dubium, dicit Bonacina, quod Papa Gregor. XIII. ita declarauit ad instantiam congregationis Cardinalium quod scilicet non possit reclamari post quinquennium, etiam si allegetur vim, & metum semper durasse. Er citat Bonacina Parisium, & Cauillos testificantes de eadem declaratione Gregorij XIII. eandem declarationem citat Marsillat in suo tomo declarationum ad *citatum cap. 12. Tridentini de regul.* videatur modò quam sufficientem causam daturus sit iste reclamans eo quod non reclamauerit in quinquennio, sed post quindennium.

6 Tertia nullitas clara istius sententiæ fuit, quod Vicarius generalis ad audiendum istum reclamantem, & faciendum processum circa suam professionem, non vocauit prælatum regularem istius Religiosi, quia Concilio Trident. *cit. cap. 1.* constituitur iudex, & coniudex professionis simul, & æqualiter cum Ordinario, & proinde facta à solo Vicario generali fuerunt irrita, tanquam à iudice non competente, id est non totali. Probatur, quia quādo Papa committit aliquam causam simpliciter duobus iudicibus, & absque clausula vlla, non potest vnus eorum sine altero procedere, aliàs secus factum erit nullum. Habetur expressè in *cap. Causam matrimonij de officio, & potestate iudicis deleg.* vbi sic dicitur: *Quia cum causa duobus committitur, sententia vnius non tenet.* Idem dicitur in *c. Cum causa. & in c. vno delegatorum eodem titulo:* pro quo videatur copiosius glossa in *capite 2. de arbitris in 6. in verbo, Circa indices.* Ad Concilium Tridentinum committit causam nullitatis professionum duobus, prælato scilicet regulari, & ordinario: ergo Ordinarius non potest procedere in ille

illa sine prælato regularis, aliàs processus erit nullus. Neque sufficiet quod in hac causa Ordinarius faciat prius per se solum processum, & postea vocet prælatum regularem, vt ambo proferant sententiam: nā facere processum est actus iurisdictionis, vt patet, & debet fieri à iudice competēte, aliàs erit inualidus: ergo debet fieri ab vtroq; iudice si causa duobus simul commissa fuit. Sic tenet in hac particulari materia frater Ludouicus de Beia in *suis Respons. moralium 4. p. casu 18. post medium §. Aduertant*, vbi ait sic iudicatum fuisse per Nuncium Collectorem Olyssipone in quodam simili casu in quo Ordinarius voluit per se solū iudicare nullitatē professionis absq; prælato reclamantis. Et addit ibidem prædictus Beia sic postea fuisse declaratum, & iudicatum Romæ per illustriss. dominos Cardinales, quorum declarationem ipse asserit se vidisse. Ex quibus omnibus constat, quod non poterit dari praxis, vel consuetudo quod in hoc casu reclamationis possit Vicarius Episcopi solus facere processum sine prælato regulari: talis enim cōsuetudo non erit cōsuetudo, sed corruptela contra expressum Concilium generale Ecclesiæ. Denique Marzilla *cit. tomo declarat. Cardinalium ad cit. cap. 19. testatur*, quod dicti Cardinales sic declararunt decisione 69. *Congregatio Concilij censuit, regularem deducentem intra quinquennium nullitatem professionis, teneri eam probare coniunctim coram proprio superiore regulari, & coram Ordinario. Quo nihil clarius dici potuit.*

7 Quarta nullitas istius excommunicationis, est ex parte causæ ob quam prælatus iste localis fuit excommunicatus, videlicet quia noluit obedire Vicario generali depositando istum reclamantem extra conuentum, & extra carcerem vbi libere posset allegare

gare de sua professione. Et dico hanc causa fuisse iniustam, & nullam: quia excommunicauit talem prælatum eo quod noluit facere rem illicitam. Probo, & declaro ex Nauar. in sum. cap. 27. n. 4. vbi differens quando sit excommunicatio iniusta, & nulla, inter alia exempla ponit hæc verba: *Quartus casus est quando excommunicatio continet errorem intolerabilem, qualem habet illa, quæ datur contra aliquem, eo quod rectè aliquid fecit: aut quia non fecit aliquid illicitum.* Sic ille. Et idem docent Doctores supra citati num. 2. At in hoc casu Vicarius generalis excommunicauit hunc prælatum localem eo quod aliquid rectè fecit, & eo quod noluit aliquid illicitum facere. Nolens enim depositare carceratum extra conuentum, vt reclamaret de sua professione post quinquennium, & sine ordine prælati regularis, qui erat iudex, rectè fecit iuxta Tridentinum & proinde fuit excommunicatus, quia noluit facere aliquid illicitum. Illicitè enim faceret, & contra Tridentinum, si consentiret vt professus post quinquennium audiretur, & audiretur, à solo Ordinario non assistente prælato reclamantis. Et ex consequente cum fuerit excommunicatus eo quod noluit illicitum facere contra Tridentinum, excommunicatio fuit nulla, vtpote continens errorem intolerabilem, iuxta Nauar. & alios citatos num. 2. maxime Reginaldum ibi citatum num. 106. Et hinc etiam manet responsum ad aliam secundam causam excommunicationis, quia videlicet prælatus localis noluit obedire Vicario generali prohibenti ne dictus reclamans naui imponeretur ad Insulas adeundas loco exilij. Iam enim Vicarius generalis id non poterat mandare ultra quinquennium, & sine assistentiæ prælati regularis, qui erat coniudex in eadem causa professionis, iuxta supradicta.

8 Quinta nullitas huius excommunicationis fuit, quod cum Vicarius generalis esset iudex in hac causa professionis reclamatae simul cum Prælato regulari, & essent ambo iudices æquales per Tridentinum supræ citatum; Vicarius generalis excommunicauit Prælatum Religiosum suum coæqualem iudicem. Est autem res inaudita quod quando duo homines assignantur iudices super vnâ causam, vnus illorum possit alterum excommunicare circa tangentia eandem causam. Facit ad hoc expressè quod dicitur in cap. *Innotuit*, de *elect.* vbi Papa dicit, *Quod par in parem non habet potestatem.* Et habetur in *l. ille à quo*, §. *Tempestiuum*, ff. *ad Trebellianum*, & per alios textus adductos à glossa in cap. *Innotuit*, verbo *In parem*.

9 Sexta nullitas istius excommunicationis fuit, quod Vicarius generalis non citauit Guardianum ad audiendam prolationem sententiæ, sed illo non citato publicauerunt illum excommunicatum in sua Parochia in quodam die festo: cum tamen de iure necessarium sit vt ante publicationem sententiæ citetur reus ad illam audiendam, vt possit, si voluerit, appellare. Sic expressè tenet Camillus Borellus *tom. 1. suarum decisionum*, *decis. seu tit. 44. num. 233. & seqq.* pro quo citat duas leges iuris ciuilis, & decem Doctores, quod si sententia prolata fuerit sine citatione partis, erit nulla, etiam si sit sententia Papæ, vel Imperatoris. Et ait ibi *num. 236.* sic obseruari in Rota Romana. Et est hoc conforme iuri positiuo, & praxi. Nam si praxis Ecclesiæ & ciuilis obligat, & citat reum, vt sit præfens, & videat iurare testes, si fortè velit illis quidquam opponere, maior obligatio videtur vt citetur reus ad prolationem sententiæ latæ contra illum, vt possit appellare contra illam. Idem colligitur ex deci-

tionibus Rotæ Rom. Nam Farinacius *tomo 1. decisio-
num, decis. 90. num. 3.* dicit, quod ad certum casum cu-
iusdam declaratoriæ, præcessit mandatum iudicis San-
drini ad citandam partem, & quod fuit intimatum
procuratori partis, & affixum ad valuas cuiusdam Ec-
clesiæ. Et tandem sic decretum est in *Clementina* sæpe
contingit, *de verborum significatione, prope finem*, vbi sic
dicitur: *Sententiam verò diffinitivam, (citatis ad id, licet
non peremptoriè, partibus, & pro ut magis sibi placuerit)
stans, vel sedens proferat.* Quo nihil clarius dici potuit
ad probandum quod iudex debet citare partes ad au-
diendam prolationem sententiæ, circa quod dicit Ca-
millus Borellus *tomo 2. suarum decisionum, tit. 30. num.
181.* quod ad hanc citationem non sufficit, quod iu-
dex dicat, vt reus coram se compareat intra octo dies,
verbi gratia, vt alleget suam iustitiam: sed necessa-
riam esse specialem, & præcisam citationem ad au-
diendam sententiam. Et citat ad hoc quandam deci-
sionem Rotæ Rom. quam etiam citat Farinacius *to-
mo 2. decis. 486.* Addo hîc quod Vicarius generalis
non ostendit Guardiano processum à se factum, vt pos-
set contra illum allegare; vt videre est in eodem pro-
cessu, qui non fuit Guardiano ostensus. Pro quo vi-
deatur *capitulum Qualiter, & quando secundum, de ac-
cusationibus*, vbi mandatur quod reo ostendantur con-
tenta in processu.

10 Septima nullitas, quia Guardianus appellauit
statim à primo mandato, quo præcepit Vicarius ge-
neralis, vt carceratum Religiosum extra conuentum
deposicaret. Et non obstante hac appellatione, Vica-
rius generalis processit vsque ad sententiam: in quo
videtur nulliter processisse. Nam appellatio suspendit
excommunicationem: de quo multa tradit Bonacina

tom.1. diff. 1. de censuris, q. 2. puncto 2. probans cum multis quod appellatio præmissa excusat ab incurrenda censura subsequente. Et fauet in particulari capitulum præterea, de appellat. in 6. citatum, ubi Papa dicit, quod si iudex alicui mandauit in hunc modum : *Nisi Sempronio intra viginti dies satisfeceris, te excommunicatum esse cognoscas.* Et respondet Papa, quod si intra dictos viginti dies appellauit ille, cui impositum est mandatum, non incurrit excommunicationem, quia appellatio illam suspendit. Et in hoc casu, mandante Vicario generali vt Guardianus intra tres dies carceratum extra conuentum poneret : Guardianus statim à mandato appellauit, & ideo excommunicationem non incurrit : & ex consequenti illicitè postea Vicarius generalis declarauit Guardianum incurrisse excommunicationem. Tenebatur autem Vicarius acceptare appellationem iustam Guardiani, recusantis dictum carceratum ob culpas depositare extra conuentum : inde enim sequeretur scandalum sæcularium, & annullaretur sententia Religionis, quæ dictum Religiosum ob culpas ad carcerem iuste damnauerat.

CASVS XCIV.

De quadam donatione facta à quodam Episcopo suis consanguineis.

Quidam Episcopus solum titularis (vulgo de Anel) olim professus in quadam Religione Mendicante, inseruiebat cuidam Archiepiscopo in pontificalibus exercendis : & præterea erat deputatus in Tribunali S. Officij, & tam ab Archiepiscopo, quàm à Tri-

bunali sancti Officij recipiebat annuas pensiones pecuniarias pro sua sustentatione. Ex prædictis pensionibus pecuniariis ferè sibi subtrahens de congrua sustentatione, emit hortum, & certos redditus annuos tritici, & olei perpetuos, quos donavit scripturâ publicâ duobus nepotibus ex sorore pauperibus pro sua sustentatione, & vt litteras discerent in publica Academia, idem Episcopus emit aliquos bonos libros, quos voluit donare Religioni, de qua fuerat assumptus, cum aliis libris, quos in dicta Religione acquisierat, & quorum vsum Religio illi concesserat.

Quæsitum est primò, an dictus Episcopus potuerit in conscientia donare prædictis nepotibus dictos redditus annuos tritici, & olei: possitque illis aliquid amplius donare in redditibus annuis perpetuis?

Quæritur secundò, an post mortem istius Episcopi posset Fiscus pontificalis prædictos redditus perpetuos recuperare tanquam spolia pertinentia ad Cameram Apostolicam?

Quæritur tertio, an prædictos libros, quos emit in statu Episcopali, possit donare Religioni, de qua fuit assumptus: & quomodo, & quando possit facere prædictam donationem librorum?

Illud imprimis admoneo in Portugallia receptas non esse constitutiones Apostolicas de spoliis Episcoporum, & Clericorum agentes, imò antiquam consuetudinem contrarium obtinere. Nauarrus *de spolijs Clericorum*, §. 14. n. 4. Azor *instit. Moral.* 2. p. lib. 8. cap. 4. Gabriel Pereira *decis.* 95. a n. 10. Ideo semotâ Regni consuetudine ad casum propositum de iure respondemus.

Responsio ad primum.

Ad primum respondeo potuisse prædictum Episcopum

pum sine vlllo scrupulo conscientiae prædictos redditus annuales tritici emere, & donare dictis nepotibus, & eodem modo poterit eisdem amplius aliquid donare validè donatione inter vivos. Ad hoc probandum sufficiebat sententia lata in Rota Romana in casu omnino simili, quem casum refert Farinacius 2. parte suarum decisionum Rotaliū decis. 241. & decis. 306. vbi ponit hunc casum. Quidam Religiosus fuit electus Episcopus certi Episcopatus, & ex redditibus Episcopatus subtrahens de sua sustentatione emit quasdam domus magni pretij, illasque donauit duabus neptibus filiis sororis suæ. Mortuo Episcopo Capitulum sede vacante nomine Ecclesiæ suæ, litem mouit contra neptes Episcopi, volens annullare prædictam donationem domorum factam ab Episcopo, domosque prædictas recuperare pro Ecclesia. Delatus est casus ad Rotam Romanam, & in illa iudicatum fuit prædictam donationem factam in vita ab Episcopo fuisse validam. Assignat ibi Farinacius rationes, quas considerarunt iudices Rotæ ad talem sententiam ferendam. Prima est, quia Prælatus habens in vita administrationem reddituum æquiparatur vsufructuario, & proinde potest per actum inter vivos disponere de fructibus beneficij. Pro quo citat vnā glossam iuris canonici, & aliam decisionem Rotæ. Secunda ratio Farinacij est, quia beneficiarius potest dotare consanguineos pauperes: pro quo citat Abbatem, Alexandrum, Capellam Tolosanā, Boëtium, & alios multos graues Doctores, qui apud illum videri poterunt. Tertia ratio Farinacij est, quia ille Episcopus dictam pecuniam, quā domos emit subtraxit de sua commoda sustentatione parcè viuendo. Est autem communis opinio Doctorum, quod beneficiarius po-

test in vita donare illud quod in vita subtraxit de sua commoda sustentatione. Sic tenet inter alios Bonac. *tom. 2. disput. 3. de contract. punct. 5. num. 5. §. Sentiendum*, & Reginaldus *tom. 2. lib. 30. tract. 3. num. 39*. Quarta ratio est, quia Episcopus promiserat illam dotem neptibus, & ob talem promissionem tenebatur in conscientia domos illis donare. Denique concludit Farinacius hoc verum esse tam in Episcopo Clerico, quam in Episcopo Religioso: quia Episcopus Religiosus tam dominus est suorum reddituum quam Episcopus Clericus est dominus suorum. Pro quo citat Baldum, Cardinalem & Nauarrum, qui dicit hanc esse praxim istius orbis: quæ dicta à Farinacio habent maiorem locum in hoc nostro casu, quia hic Episcopus, de quo loquimur, non habebat propriè redditus beneficij Ecclesiastici, cum esset Episcopus solum titularis, sed solum habebat stipendia illa data sibi ab Archiepiscopo, & à Tribunali sancti officij, qui non sunt redditus beneficij: sicut erant redditus illius Episcopi, de quo loquitur Farinacius, qui erat Episcopus ordinarius.

Prædictis argumentis Farinacij possumus addere sequentia. Nam teste Reginaldo *cit. tract. num. 101*. & quinque Doctores, quos ibi citat, potest beneficiarius sororem, vel aliam consanguineam dotare de fructibus beneficij, ut commodè nubat. Potest item alere fratrem, vel cognatum in studiis litterarum, & illum ad gradus promouere. Pro quo citat Molinam, qui *tomo 1. de iustit. tract. 2. disput. 146*. dicit In hoc casu pauperes censerì, non solum illos qui indigent victu, & vestitu requisitis ad sustentationem naturæ; sed etiam illos qui egent rebus opportunis ad conuenientiam sui status. Et addit Reginaldus *ibidem num. 103*. §. *Ceterum*, cum Nauarro & Molina, Beneficiarium auctum

auctum in suo statu Ecclesiastico posse licitè cōsanguineis dare ; non quidem tantum quantum illi exigere solent ; nec quantum suaserit affectio inordinata erga consanguineos , sed moderatè arbitrio prudentis , & timorati viri, circumstantiis omnibus consideratis, & quantum requiri iudicabitur , vt dedecus merito non sit ipsi beneficiario propinquos sibi tam arctè coniunctos se adedò abiectos habere. Sic ille. Et quamuis omnia supradicta ordinariè intelligantur quod possint Beneficiarij donare consanguineis donatione inter viuos , non verò donatione causâ mortis , quæ æquiualeat testamento. Nihilominus ait Vasquez *tomo opusculorum, opusc. de reddit. Eccles. cap. 1. dub. 7. num. 70. & 71.* quod Beneficiarius constitutus in mortis articulo, potest facere donationem validam , si statim transferat dominium rei donatæ in donatarium, & non transferat illud dominium post mortem : tunc enim talis donatio cum dominio statim translato ante mortem, æquiualeat donationi inter viuos : pro quo citat Sarmientum, Syluest. & Nauar. Idem omnino sentit Bonacina *tom. 2. disput. 3. de contract. q. vlt. puncto 5. num. 1. §. Ego vero.* Hic verò Episcopus , de quo loquimur, donauit nepotibus donatione clarâ inter viuos. Vltimò confirmatur ex eo quod tradunt hodie Doctores ferè communiter dicentes quod saltem in Hispania consuetudine antiquâ, & toleratâ Beneficiarij possunt facere testamentum de superfluis ex residuo suorum reddituum Ecclesiasticorum, & illa donare ad libitum pro causis piis. Ita sentit Azor *tom. 2. lib. 8. q. 4. §. Vt hæc omnia*, citans Couar. & alios graues Doctores. Idem tenet Reginald. *cit. tract. 3. num. 121. §. Secundum est.* Et quamuis ex ibi à Reginaldo hoc non intelligatur de Episcopis , qui non possunt testamentum facere

sine licentia Papæ : neque item possit intelligi de Episcopo Religioso, qui non potest facere testamentum, hoc non obstat quin possit Episcopus Religiosus donare donatione inter vivos eo modo quo citati Authores dicunt, maximè Vasquez, cùm plenam administrationem habeat reddituum dum viuit, sicut habet usufructuarius ad expendendum in opera pia, quale opus pium fuit factum istius Episcopi in sustentandis nepotibus. Vide pro maiori complemento Villalobos *in summa tom. 2. tract. 35. dubio 40. num. 6.*

Responsio ad secundum quæsitum.

Ad secundum quæsitum dico, quod donatio iam facta nepotibus ab isto Episcopo, neque est spolium, nec pertinet ad Cameram Apostolicam, ac proinde non potest Ficalis Pontificius illa bona sic tradita à nepotibus auferre.

Pro fundamento istius dicti, pono hic definitionem spolij. Definitio ergo spolij ponitur à Nauarro *in Commentario de spolijs Clericorum num. 1. §. De spolijs autem*, vbi sic definit : *Spolia sunt bona ab Ecclesiastica persona immediatè quæsitæ, vel mediatè quæsitæ ex bonis Ecclesiasticis, vel redditibus eorum debitis, quæ non fuerunt ante mortem eius iustè impensa; nec facta iure patrimonialia, nec quæsitæ alteri, irrenocabiliter.* Sic ille : & Azor *tom. 2. lib. 8. cap. 1. quæst. 2.* breuius, & clariùs sic definit : *Spolia Clericorum sunt bona à Clericis quibuscumque etiam Religiosis ratione, & iure Ecclesiæ acquisita, vel ex negotiatione contra canones comparata, & post obitum relicta.* Ex sua definitione colligit Nauarrus aliqua corollaria : quorum vnum præcipuum est hoc, quod scilicet illa, quæ Beneficiarius donauit in vita iustè ad opera pia,

pia, non est spolium, quia non manet post mortem donantis, cum iam sit donatum iuste: spolium autem propriè dicitur illud quod est in possessione Beneficiati quando moritur. Idem colligitur ex definitione spolij tradita à Reginaldo in ultimis verbis, cum dicit, *Spolia esse bona post Clerici mortem relictà*. Quapropter bona quæ Beneficiarius licitè dedit in vita, nec iam habet in morte, non sunt spolia, nec pertinent ad spolia. Idem tenet Bonacina *disput. 3. de contractibus, quest. 22.* ubi ait quod spolia Clericorum intelliguntur illa quæ moriente Beneficiario inter ipsius bona reperiuntur, non pertinentia ad ipsius hæredes. At constat quod bona ab hoc Episcopo tradita nepotibus, iam illa non habet in se, neque per mortem suam inveniuntur in bonis illius: Ergo, &c. & confirmatur adhuc ex etymologia nominis spolij: nemo enim propriè dicitur spoliari rebus quas iam habuit, & actu non habet: sed solum dicitur spoliari rebus, quas actu habet, vel possidet. Secundò probatur exemplo omnino simili. Nam Fiscus Regius, vel Pontificius, non confiscat, neque reuocat donationes, quas fecit hæreticus ante delictum, quia tunc validè illas fecit eo quod suorum bonorum tunc erat verus dominus illorum, quæ habebat dominium; sed solum reuocat, & confiscat donationes hæretici, quas fecit post delictum, quia post delictum iam amiserat dominium bonorum. Sic tenet communis opinio Iuristarum, & Theologorum citata à Sanch. *lib. 2. Decal. cap. 22. n. 31.* eodem modo Fiscus Sum. Pontificis in materia spolij non reuocabit donationes factas à Beneficiario ante mortem in vita, quia tunc Beneficiarius habebat plenam administrationem, & dominium suorum bonorum, sed solum reuocabit, & confiscabit donatio-

nes factas post mortem videlicet factas per testamentum, vel donatione causâ mortis. At constat quod hic Episcopus donauit nepotibus multo ante mortem, & donatione inter viuos, translato dominio ad illos. Et in terminis, quod donatio beneficiarij facta inter viuos non sit spoliū, tenet Bonacina *tom. 2. disput. 3. de contractibus, quæst. ultima puncto 5. num. 10. §. Tertia causa*, vbi assignat causam iam sup. à nobis datam, videlicet quia spolia sunt tantum illa bona quæ manent post mortem, vel tempore mortis ipsius Beneficiarij.

Tertiò probatur alio exemplo simili. Nam distributiones quotidianæ assignatæ interessentibus horis canonicis non sunt spolia vt tenet, & probat fusè Bonacina *cit. q. ult. punct. 2. §. Secundo distributiones*, vbi citat multos, & graues Doctores. Idem tenet Zerol. *2. p. praxis Episcopalis, verbo Spoliū, num. 24.* & Azor *cit. lib. 8. cap. 3. q. 9.* & tamen pecunia data in his distributionibus quotidianis, manat, & nascitur directè ex redditibus Ecclesiasticis, seu redditibus beneficij, vt patet. Assignant ibi Doctores citati causam cur hæ distributiones quotidianæ non sunt spolia, licet nascantur ex redditibus Ecclesiasticis, quia (inquiunt) hæ distributiones sunt denarius diurnus, & dantur pro mercede ipsi beneficiario laboranti in choro; dignus est enim mercede sua. Pro quo etiam facit quod tradit Bonacina *cit. proximè loco, §. Primo spoliū*, vbi dicit, quod non cadit sub spolio illud quod persona Ecclesiastica proprio labore acquisiuit exercendo officium Magistri, Cantoris, Secretarij, & similium. Applicando ergo hæc casui præsentī, constat quod pensiones, seu stipendia quæ huic Episcopo dabantur singulis annis ab Archiepiscopo, & à Tribunali sancti Officij, non erant spolia, sed stipendia annualia,

& ferè denarius diurnus debitus suo labori, eo quod non haberet beneficium Ecclesiasticum unde sustentaretur, & idem magis adhuc declarat Bonacina *loco proxime cit. num. 2.* dicens quod redditus quibus Beneficiarius indiget ad congruam sustentationem, non sunt spolia, sed sunt quasi bona patrimonialia.

Ex dictis constat, quod sicut iste Episcopus non peccauit faciendo prædictam donationem nepotibus, neque talis donatio manet subiecta spolio, ita iudicandum erit de quacumque alia donatione, quam faciet in futurum si fuerit donatio inter viuos abdicato statim à se dominio rei donatæ, in illa nec peccabit, nec res donata pertinebit ad spoliū ob rationes suprapositas.

Responsio ad tertium quæsitum.

Ad tertium quæsitum dico imprimis, quod libri illi quos habebat iste Episcopus acquisitos in Religione antequam eligeretur ad episcopatum, pertinent ad suam Religionem. Tenebatur enim ubi primum electus fuit dictos libros tradere Religioni, ut constat ex *compendio Mendicantium*, §. *Bona*. In quo Alexander IV. in virtute sanctæ obedientiæ præcipit fratribus Minoribus, qui promoti fuerint ad Episcopatum, vel similem dignitatem, ut libros, & bona antea habita, tradant Prælati Ordinis. Hic autem Episcopus erat assumptus ex Ordine Minorum. Et Clemens IV. idem præcipit Religiosis B. Patris Domini, ut refert Rodrig. *tom. 2. qq. 9. 48. art. 6.* Imò de omnibus Religiosis hoc intelligitur. Si enim iuxta illud commune dictum, quidquid acquirit Monachus, acquirit Monasterium; libri acquisiti à Monacho

cho in Monasterio erunt ipsius Monasterij, nec poterit secum illos deferre ad Episcopatum. Episcopus verò de quo loquimur, quando fuit promotus ad Episcopatum petiit licentiam à Prælati Ordinis ut sibi in vita concederent solum usum librorum, quos in Religione acquisiuerat: & ita illos eidem concessit Religio: ac proinde post mortem debent ad Religionem redire, cum non sint bona huius Episcopi, sed Religionis, & proinde non sunt spoliū. Si verò quis prætendat hos libros pertinere ad spoliū, quia Gregor. XIII. in sua Bulla, quæ incipit, *Officij nostri*, declarauit, & præcepit, quod omnia bona Religiosi morientis extra Ordinem pertinerent ad spoliū Cameræ Apostolicæ. Respondetur ibi Papam solum loqui de bonis quæ Religiosus acquisiuit extra Ordinem, ut patet ex verbis Bullæ, ibi: *Extra claustra Monasteriorum acquisita*. At verò libri acquisiti sunt intra claustra Monasterij. Ergo, &c. Secundò respondetur ibi Papam loqui de Religiosis ordinariis, qui non sunt liberi ab obedientia Prælatorum, & tenentur ad obseruantias regulæ: hi enim solum de ordinario intelliguntur nomine Religiosorum. Non verò ibi loquitur Papa de Episcopis qui fuerunt Religiosi, hi enim communiter non appellantur Religiosi simpliciter: videatur Nauarrus *in consilio* 15. *titulo de regularibus primæ impressionis per totum titulum*.

Tota dubitatio est de libris quos iste Episcopus emit, seu acquisiuit in Episcopatu. Ad quod respondeo, quod si de his libris non disposuit in vita per donationem inter viuos, tales libri pertinent ad spoliū, ut patet ex supradictis. Si verò illos in vita donauit Religioni donatione inter viuos, pertinent ad Religionem, ut satis probatum fuit in præcedentibus.

bus. Potuit autem validè libros acquisitos in Episcopatu donare Religioni donatione inter vivos, reservato sibi usufructu talium librorum, & transferendo statim dominium librorum in Religionem. Potest enim quis validè donare rem aliquam Petro translato statim dominio rei donatæ in Petrum, sed reservato sibi in vita usufructu talis rei, vt expressè habetur in *lib. 4. Ordin. istius Regni, tit. 37. §. 2.* & sic etiam tradit Farinacius & Vasquez citato loco.

Adhuc potest dubitari, si quando iste Episcopus fuit electus petiit à Religione licentiam retinendi apud se libros acquisitos in Ordine, & Prælati id concesserunt sub conditione, quod libros, quos postea acquireret in Episcopatu relinqueret Religioni post mortem. Quæris (inquam) an in tali casu libri, quos acquisivit in Episcopatu pertineant ad Religionem? Credo quod si Episcopus consensit, & ita promisit, prædicti libri post acquisiti etiam pertinent ad Religionem. Probatur hoc ex dictis à Farinacio loco supra citato, vbi dicit Episcopum (de quo ibi loquitur) qui donavit domos neptibus fuisse obligatum facere talem donationem, quia neptibus antè promiserat se illis donaturum tales domos pro dote matrimonij, & ex ista promissione poterat Episcopus conveniri, id est obligari, quia scilicet promisit donare rem cuius habebat dominium, & administrationem. Pro quo citat Farinacius capitulum *quicunque suffragio* 12. q. 2. vbi dicitur, quod si Episcopus promisit alicui aliquid pro remuneratione laboris alicuius, potest Episcopus de iure compelli ad illud solvendum. Hic autem Episcopus (de quo loquimur) si promisit Religioni se illi donaturum etiam libros acquirendos in Episcopatu, clarum est quod id promisit

fit propter remunerationem boni operis in illum collati à Religione illi concedente vsum librorum, quos in Religione acquisiuit: & proinde poterit ad hoc obligari quod habet maiorem locum in hoc Episcopo titulari, quàm in Episcopo de quo loquitur Farinacius. Ille enim cùm esset Episcopus ordinarius habebat redditus Ecclesiasticos, ex quibus emit domos. Noster verò hic Episcopus non emit libros ex redditibus Ecclesiasticis, quia illos non habebat, & præterea illos libros, quos emit in Episcopatu poterat donare in vita donatione inter viuos, cùm illorum haberet dominium, & administrationem sicut manet probatum in præcedentibus. Sub censura Ecclesiæ, & Doctorem.

C A S V S X C V .

De professione cuiusdam Monialis, pro qua maior pars Conuentus non est suffragata.

IN quodam conuèntu Monialium ex mandato Prouincialis recepta sunt suffragia ad professionem cuiusdam Nouitiæ. Omnes Moniales Conuentus habentes suffragium erant viginti tres. Prouincialis ad hæc suffragia excipienda delegauit quemdam Religiosum, cui commisit vt nomine ipsius Prouincialis posset dare suffragium in illa receptione Nouitiæ ad professionem. Pro Nouitia suffragatæ sunt vndecim suffragia, & cum voto delegati fuerunt duodecim pro Nouitia, & contra illam suffragatæ sunt duodecim Moniales.

niales. Videns Prouincialis Nouitiam solum habere dimidiam partem suffragiorum, cum oporteret habere ultra dimidiam partem Conuentus pro se, accessit ad Conuentum, & in forma visitationis inquisiuit de moribus, & vita Nouitiæ, ex qua visitatione constitit Nouitiam nullam habuisse culpam, vel defectum, sed esse aptam, &abilem ad profitendum, & ex praua affectione, vel quasi coniuratione illi fuisse suffragia denegata: & aliquæ Moniales ex illis quæ pro Nouitia non sunt suffragatæ, iurarunt Nouitiam non habere defectus. Quo viso, Prouincialis iussit vt admitteretur ad professionem, non obstante quod pro illa non suffragata fuerit maior pars Conuentus: & non obstante quod in tali Religione sit statutum, quod Nouitius, pro quo maior pars Conuentus non fuerit suffragata, statim à Conuentu eiiciatur. Ab hoc mandato Prouincialis, & à professione sic facta appellauit ad Papam Abbatissa illius Conuentus, quam appellationem delegatus Prouincialis, qui Nouitiam ad professionem recepit, non admisit, eaque appellatione non obstante ad professionem admisit. His positis, quærentur sequentia.

Quæritur primò, an Prouincialis posset ferre suffragium in professione istius Nouitiæ, & ex consequenti, an potuerit committere illi Religioso, vt pro se daret suffragium ad illam professionem?

Secundò quæritur, an valida fuerit talis professio, non obstante quod pro Nouitia suffragata sit solum media pars Conuentus: & non obstante citato statuto Religionis iubente talem Nouitiam statim expelli.

Quæritur tertio, an teneretur Prouincialis acceptare appellationem Abbatissæ factam ad Papam nominatim, nominando D. Papam Urbanum VII.

Ad

Ad primum quæsitum.

Quod attinet ad primum quæsitum, videtur quod Prouincialis non possit ferre suffragium pro Nouitiæ professione. Sic videtur sentire Nauarrus *consil. 62. de regular. primæ impressionis*, vbi dicit quod Generalis certæ Religionis non potuit facere Monachum quemdam Nouitium, pro quo suffragata fuit sola media pars Conuentus, & altera media pars suffragia denegauit, & citat ad hoc Panormitanum dicentem non posse Generalem creare Monachum absque consensu Conuentus, id est absque consensu maioris partis Conuentus. Ad cuius probationem aliqui hanc rationem adducunt: nam Ecclesia præcepit vt Nouitij vno anno integro maneant in Nouitiatu. Huius verò mandati finis, & ratio est, vt Religiosi in illo anno possint experiri an Nouitius habeat partes, & conditiones ad statum Religiosum conuenientes: & præterea vt Nouitius in illo anno possit experiri leges, mores, & conditiones status religiosi an sibi conueniant, & possit cum illis in tota vita sua conformari. At Prouincialis qui discurrit per Prouinciam, & paruo tempore moratur in Conuentu vbi est Nouitius, non potest experimentum perfectum sumere de vita Nouitij, nec proinde pro illo sufficienter suffragari; & ex consequenti non poterit committere alicui Religioso vt in persona ipsius Prouincialis pro Nouitij professione ferat suffragium.

Hoc non obstante, dico posse Prouincialem validdè dare suffragium pro Nouitij, vel Nouitiæ professione. Hanc conclusionem probaui iam sufficienter meo primo tomo *Responsionum Moralium* 1. p. casu 11. num. 2. & seqq. & tom. 2. Dub. Regular. verbo *Nouitia*: & ex
ibi

ibi dictis adducam breuiter rationes pro isto casu probando, qui est omnino idem. Probatur ergo quod Prouincialis possit dare suffragium pro Nouitiæ professione, primò, quia si quælibet Monialis dat suffragium pro Nouitiâ, quia quælibet Monialis est pars illius Conuentus; à fortiori poterit Prouincialis idem ferre suffragium, quia non solum est pars illius Conuentus, sed etiam caput ipsius, quæ est pars præcipua. Secundò probatur, quia Prouincialis recipit Nouitiâ ad habitum & Nouitiatum, quod est maius, & recipit Abbatissam ad officium Abbatissæ, dando suffragium pro illius electione, quod est maius: ergo poterit dare suffragium pro Nouitiæ professione, quod est minus: valet consequentia ex illa reg. iuris in 6. de reg. iuris, quæ dicit: *Cui licet quod est plus, licet utique quod est minus.* Vbi glossa ponit exempla ad hoc conducentia. Quæ regula habet maiorem locum quando istud minus, & plus sunt connexa, & illud minus ordinatur ad illud maius, vel est pendens ab illo maiori: sicut receptio ad Nouitiatum est ordinata ad professionem, & professio est quid dependens à receptione ad habitum: ergo Prouincialis potens maius, quod est recipere ad habitum, poterit etiam dando suffragium recipere Nouitiâ ad professionem, quod est minus. Declaratur hæc regula ex eo quod tradit glossa in cap. Visis 16. q. 2. vbi citat vnum textum dicentem, quod si Episcopus gubernat animas, quod est plus, etiam gubernabit pecuniam Ecclesiæ, quod est minus. Et confirmatur adhuc, quia vt praxis obseruat, Prouincialis aliquando in suis manibus dat professionem Nouitiæ, nec proficitur Nouitiâ in manibus Abbatissæ, sed in manibus Prouincialis: ergo poterit Prouincialis dare suffragium ad istam professionem, quam per se ipsum

admittit, quod est quid minus, & ordinatum ad ipsam professionem. Facit ad hoc etiam textus *in cap. per venerabilem, qui filij sint legitimi*, ubi Papa sic ait: *Quod in maiori conceditur, licitum esse videtur & in minori*. Quo nihil clarius dici potuit ad intentum, & glossa ibidem *in verbo Minori*, citat aliquos textus ad intentum.

Ex his sequitur clara responsio, & probatio secundi dicti in hoc primo quæsito, potuisse videlicet Prouincialem committere illi Religioso, ut in receptione suffragiorum ad istam professionem daret suffragium in persona ipsius Prouincialis: probatur, inquam, quia id quod quis potest facere de potentia, seu iurisdictione ordinaria, benè potest alteri committere, seu delegare: ut habetur expresse *in cap. Cum Episcopus, de offic. ordinarij in 6.* & latè probat Sanch. *lib. 3. de Matrim. disp. 31. num. 1.* ergo cum probatum maneat posse Prouincialem potestate ordinariâ dare suffragium pro Nouitiæ professione, benè poterit delegare hanc potestatem alicui subdito, ut pro se suffragium ferat in eadem professione Nouitiæ. Probatur hoc ipsum clarè ex cap. *Quia propter, de elect.* ubi expresse dicitur quod canonicus absens, & non potens venire ad electionem Episcopi, potest absens committere uni de collegio ut pro se ferat suffragium in illa electione. Verba textus sunt hæc: *Et tunc si voluerit, uni committat de ipso collegio vicem suam.* Ecce quomodo potest quis committere alicui ut pro se suffragium ferat in electione Episcopi: quanto magis in electione, seu professione Nouitiæ. Confirmatur hoc ex praxi Religionis Franciscanæ, in qua contigit casus iste, nam licet per statuta generalia istius Ordinis, Commissarius ad celebrandum capitulum, in aliqua Prouincia, non possit in diffinitorio dare suffragiū in electione Guardianorum,

dianorum, attento solo officio Commissarij, potest tamen Prælatus generalis illum mittens ad celebrandum illud capitulum committere eidem vt pro se det suffragium in electione Guardianorum, & in omnibus aliis electionibus: vt probaui in 2. tom. Dub. Regul. verbo Commissarius Prouinciæ, num. 2. ex statuto generali Salmanticensi.

Ad argumenta contra hanc conclusionem posita, quod attinet ad dictum Nauarri, dico quod Nauarrus *cit. loco* non dicit, quod Generalis non possit dare suffragium pro Nouitio: sed solum dicit quod Generalis de potentia absoluta non possit facere Monachum sine maiori parte Conuentus, cuius suffragia tenetur audire. Nam iuxta Panorm. *cit.* creare Monachum pertinet ad Conuentum & Prælatum simul per suffragia: solum ergo vult Nauar. quod Generalis per se solum absque suffragiis Conuentus non potest facere Monachum: quod non tollit quin possit Generalis dare suum suffragium pro Nouitij professione, sicut vnus Religiosus eiusdem Conuentus, cuius Generalis est caput, vt ostendimus in præcedentibus. Ad aliud argumentum in oppositum dico, verum esse quod annus Nouitiatus datur ad sumendam experientiam de moribus, & vita Nouitij, sed dico quod Prouincialis poterit sufficienter experiri mores, & conditiones Nouitij, quamuis in Conuentu Nouitij non resideat de ordinario. Nam potest Prouincialis sumere informationem de moribus Nouitij à Religiosis fide dignis eiusdem Conuentus, & hæc informatio satis sufficiet vt Prouincialis det suffragium Nouitio. Hoc declaro, & confirmo tribus exemplis seqq. In capitulo generali Minorum, v. g. Romæ celebrato, Religiosus Lusitanus in electione Generalis dat suffragium Patri

Italo, vel Gallo, quem nunquam vidit, neque mores illius expertus est per conuersationem, sed ex sola bona informatione aliorum capitularium. Si ergo hæc sola informatio sufficit ad dandum suffragium in electione Generalis Ordinis, sufficiet etiam sola bona informatio ad dandum suffragium pro Nouitij, professione.

Secundum exemplum sit. Recipiuntur hodie suffragia, pro Nouitij professione in hoc Conuentu; quidam Religiosus quatuor tantum abhinc diebus est assignatus in hoc Conuentu vt habitaret. Iste absque dubio feret suffragium in ista receptione cum sit habitator Conuentus, & tamen per quatuor tantum dies non potuit ad oculum experiri mores Nouitij, sed solum per informationē aliorum Religiosorum: quam etiam informationem habuit Prouincialis de Nouitia nostri casus. Tertium exemplum adhuc est efficacius, & est tale. Sanchez *lib. 5. Decalogi cap. 4.* citans multos, & graues Doctores, quorum vnus est Nauar, *in consil. 42. de Regular.* dicit fuisse validam professionem cuiusdam Nouitij, qui solum per vnum mensem, & dimidium mensis stetit intra claustra Monasterij, & totum reliquum tempus Nouitiatus mansit extra Monasterium occupatus in quodam negotio, ad quod peragendum Prælati illum misit cum habitu Nouitij, quo negotio finito reuersus est ad Conuentum, & fecit validam professionem. In quo casu Religiosi Conuentus paruum experientiam sumere poterant de moribus Nouitij tanto tempore absentis à conuentu: nisi per solam bonam informationem.

Responsio ad secundum quesitum.

Quod attinet ad secundum quesitum videtur quod
ista

ista professio fuerit nulla. Primò, quia statutum generale istius Ordinis decernit vt si pro Nouitio non fuerit suffragata maior pars Conuentus, statim expellatur ab Ordine absque vllò recurſu. At pro ista Nouitia non est suffragata maior pars Conuentus, sed solum dimidia, idque admiſſo, & computato suffragio Religioſi delegati, qui nomine Provincialis dedit suffragium Nouitiæ. Secundò probatur ex praxi omnium Religionum; & ex communi Doctorum opinione dicentium, quod vt Nouitius poſſit validam professionem emittere, requiritur, vt pro illo suffragetur maior pars Conuentus: vbi enim maior pars alicuius communitatis non conſentit, non dicitur conſentire tota communitas, vt patet in electionibus. Hos Doctores citat, & ſequitur Sanchez *lib. 5. Decal. cap. 4. num. 65.* & citat 16. graues Doctores, qui pro ſuo dicto afferunt rationes, quas apud Sanchez videre licebit.

Hoc non obſtante dico, quod ista professio fuit valida, non obſtante quod pro nouitia non ſit ſuffragata maior pars conuentus; imò etiam eſſet valida ſi pro illa ſuffragata fuiſſet pars conuentus cum vno, vel duobus ſuffragiis infra dimidium. Fundamentum principale iſtius conſuſionis eſt, quoniam huic Nouitiæ denegata ſunt ſuffragia iniuſtè, & manifeſtè: conſtitit enim per viſitationem iuridicam conuentus, & per iuramentum Monialium, quod Nouitia non habebat culpas, nec defectus, ob quos poſſint illi ſuffragia denegari idque iurarunt etiam aliquæ, quæ ſuffragium non illi dederunt. Quo poſito, & conſtituto quod Nouitia eſſet benemerita, clarè conſtat quod iniuſtè illi ſunt denegata ſuffragia. Quando verò Nouitio iniuſtè denegantur ſuffragia, poteſt, imò tenetur

prælatus talem Nouitium ad professionem. Hoc sentit clarè Rodrig. *tom. 3. qq. 9. 17. art. 7. in fine*, & Villalob. *2. p. tract. 33. diff. 20. num. 4. in fine*, & Hieronymus Rodrig. *in suo tomo Resolutionum, resol. 101. concordat* & Turrecrem. apud Sanch. *lib. 6. cap. sup. cit. num. 65. prope finem*.

Ratio principalis horum Doctorum est, quia Religiosi suffragantes pro Nouitij professione obligantur ex iustitia illi dare suffragium, si culpas, & defectus non habuerit, & proinde peccant mortaliter si iniuste illi negent suffragium, & ex consequenti obligatur conuentus tali Nouitio benemerito dare professionem iniuste negatam. Hoc sentit Suar. *tom. 3. de Relig. lib. 4. de voto, cap. 4. num. 7. vbi dicit, quod Religiosus negans suffragium Nouitio iniuste, peccat mortaliter, & contra iustitiam, & contra charitatem, ob rationes, quas ibi assignat; & quod talis Religiosus peccet contra iustitiam probatur. Nam Nouitius per ingressum Religionis facit quasi virtualem contractum cum Religione, & Religio cum illo, per quem contractum Religio se obligat Nouitio ad illi dandam professionem, si benemeritus inueniatur. Et sic Nouitius ratione huius virtualis contractus acquirit ius ad professionem, si bene procedit: sicut ait Suar. eodem tomo 3. lib. 5. cap. 10. num. 9. Idem tenet Corduba super Regulam Minorum cap. 2. q. 2. & 11. & Miranda tom. 2. q. 25. art. 7. Peccante igitur Religioso contra iustitiam negando suffragium Nouitio iniuste, & cum Religio quasi ex iustitia teneatur Nouitio benemerito dare professionem, constat quod peccatum contra iustitiam inducit obligationem restituendi: & proinde Prælatus istius conuentus, de quo est quaestio, ex obligatione iustitiae tenebitur dare professionem isti*

Nouitiae,

Nouitiæ, contra iustitiam illi denegatam. Et confirmatur, seu declaratur exemplo. Nam qui habet ius ad rem, verbi gratia, ad beneficium, vel ad legatum sibi relictum, potest de iustitia illud in iudicio exigere. Cum ergo ista Nouitia non haberet culpas, nec defectus, acquisiuit ius ad professionem, & Religio tenetur eam illi dare. Nolente igitur conuentu illam ad professionem admittere; Prouincialis tenebitur ferè per viam restitutionis illam admittere. Quod sic declaro: Scit Prælatus quando subditus suus debet aliquid de iustitia, quod est obnoxium restitutioni, & subditus non vult restituere, potest, imò debet Prælatus obligare subditum vt restituat, eoque nolente, rem illam ab eo auferre, & dare creditori. Cum ergo iste conuentus teneretur quasi de iustitia Nouitiæ benemeritæ professionem dare, & nihilominus illam denegauit, poterit Prouincialis illam dare quasi per viam restitutionis. Sic in substantia tradit Bonacina *tom. 2. disp. 3. de contract. q. 1. puncto 1. num. 16. §. Secundò à legitimo*, citans Medinam, Sà, & Sanch.

2 Principaliter probatur prædicta conclusio: nam ille qui cum fraude, vel malitia, fuit causa ne aliquis intraret Religionem, vel fuit causa vt Nouitius à Religione exiret, tenetur restituere damnum, si fortè aliquod Religio ea de causa incurrit: & hoc debet restitui ad arbitrium boni viri, iuxta Bonacinam *tom. 2. disput. 2. de restit. quest. 1. proposit. 2. num. 4.* qui citat Molinam, Sayrum, Vasquez, Aragonem, & alios. At iste conuentus ex malitia voluit expellere hanc Nouitiam, imò quantum fuit in se illam expulit: ergo est obligatus illi facere restitutionem possibilem: & in defectum conuentus potest Prouincialis illam facere. Pro quo adhuc facit, quod illa est mulier, cuius fama

magis læditur in expulsiōe ab Ordine, quam fama Nouitij, ab Ordine expulsi. Rarissimè enim Nouitia expellitur à Nouitiatu, sicut sapius eiiciuntur Nouitij masculi. Vltimò facit adhuc pro valore huius professionis, quod multi, & graues Doctores dicunt, Prælaturum pro Nouitij professione, teneri recipere, & audire suffragia conuentus, sed non teneri sequi suffragia: quinimo si conuentus neget suffragia Nouitio, hoc non obstante posse Prælaturum dictum Nouitium ad professionem admittere. Hos multos, & graues Doctores citat Sanch. *lib. 5. Decalogi, cap. 4. num. 64.* & præter illos idem tenet Vega Minimus *in summa verbo Nouitius, casu 4. col. 587.* dicens absolutè quod professio facta per Prælaturum sine suffragiis conuentus est valida. Idem tenet Miranda super regulam Minorum *cap. 47. §. Cerca desto.* Et quamuis opinio contraria sit probabilior, & securior: hæc tamen ob multitudinem Doctorum non caret probabilitate. Et proinde Prouincialis qui illam sequeretur non esset condemnandus, maximè quando sciret, ac videret conuentum suffragia negasse absque vlla causa, & ex praua affectione erga Nouitium, vt contigit in isto casu.

Ad primum argumentum in oppositum adductum, dicendum est, statutum illud decernens eiiciendum statim esse Nouitium, pro quo maior pars conuentus non fuit suffragata, intelligendum esse quando conuentus iuste ob culpas suffragia negauit. Secus si iniuste sine culpis negauit, tunc enim non eiiciendus, sed retinendus erit propter causas efficaces à nobis supra adductas, cum in tali casu teneatur Religio quasi ex iustitia illum ad professionem admittere, vt dicunt multi Doctores pro hoc in præcedentibus citati. Addi potest pro ista solutione, quod constitit ex visitatio-

ne conuentus facta per Prouincialem, quod pro Nouitia suffragata sunt Moniales, quæ erant melioris vitæ, & magis obseruantes: & proinde erant pars sanior conuentus, quam erant illæ quæ suffragia negarunt. Et constat quod in electionibus habetur respectus ad partem sanio rem suffragantium, adeò vt aliquando standum sit paucioribus suffragantibus, si sint saniores, & melioris zeli, quàm sit standum pluribus suffragantibus si sint minoris zeli, & Religionis, vt habetur clarè in capite *Ecclesia vestra*, & in capite *In Genesi*, vbi glossa in verbo *Ad zelum*, ponit hæc verba: *Non semper standum est numero suffragiorum, sed illa pars maior, & sanior censetur, qua est iustior, & maiori nititur equitate.*

Eodem modo respondendum est ad secundum argumentum fundatum in praxi, & communi opinione, videlicet quod praxis, & communis opinio de non admittendo Nouitio ad professionem, si non habuerit maiorem partem suffragiorum conuentus, est intelligenda, dummodo suffragia iustè sint illi negata ob culpas. Et quod statutum illud Ordinis citatum de expellendo Nouitio, pro quo maior pars conuentus non sit suffragata, sic debeat intelligi, declaro hoc exemplo. Nam in alio statuto Ordinis decernitur, vt Religiosus, qui alium vulnerauerit, pœna carceris, & aliis grauissimis puniatur. Demus ergo quod aliquis Religiosus alium vulnerauit, vel occidit, iustè tamen, & in veram sui defensionem seruato moderamine inculpatae tutelæ; nunquid iste occidens punietur illa pœna? Non profectò, quia occidit iustè. Eodem modo in nostro casu attendendum est, an fuerint huic Nouitiæ suffragia iustè denegata, an iniustè? Et constituto quod negata sint in-

iuste, non habet locum citatum statutum Religionis.

Et propter has, & alias causas, sic fuit iudicatum in tribunali Illustrissimi domini Collectoris, fuisse scilicet validam prædictam professionem. Sub censura Ecclesiæ, & Doctorum.

Responsio ad tertium quæsitum.

Ad tertium quæsitum, videtur quod Abbatissa licite, ac valide appellauerit à tali professione, & quod illius appellatio debuit admitti: & ideo illâ appellante antequam professio fieret, subsequens professio fuerit nulla, iuxta id quod dicitur in iure, videlicet quod facta pendente appellatione, sunt nulla, ut in *cap. Dilectis filiis, de appellat.* Quod verò Abbatissa potuerit appellare à professione futura, si fieret: probatur, quia quilibet potest appellare pro bono communi, vel de illo quod iudicat sibi esse nocivum, ut patet *ex cap. Super eo, de off. & potest. iudicis delegati.* Abbatissa verò iudicabat illam professionem nocivam esse suo conventui, cuius bonum commune tenebatur procurare. Item quilibet de capitulo potest appellare ab electione, si illicitè fiat: & hoc maximè locum habet quando appellatur ad Papam, ad quem quilibet potest prouocare omisso medio, seu Prælato inferiori, ut patet ex tribus capitibus iuris canonici citatis à Miranda in lib. Ordinis iudiciarij, *q. 30. art. 10.* Abbatissa verò appellauit ad Papam immediatè, & nominatim.

Hoc non obstante, dico talem appellationem locum non habuisse, & illa non obstante professionem validam fuisse. Probo imprimis, quia appellatio fuit

frigola.

friuola. Est autem appellatio friuola illa quæ ponitur sine causa legitima: vt quando quis appellat non grauatus iniuste. Neque verò Abbatissa, nec Moniales grauabantur iniuste per professionem istius Nouitiæ, cum illa esset benemerita. Imò ipsa Abbatissa, cum Monialibus suffragia negantibus, Nouitiam grauauit iniuste, vt patet ex supradictis. Videatur *Rodrig. tomo 1. qq. q. 8. art. 13.* Iam verò appellatio friuola reiici debet; imò punitur in iure *cap. Pastoralis, de appell. & cap. cum appellationibus, de appell. in 6.* Secundò, hæc appellatio locum non habuit, quia Abbatissa appellauit à Guardiano, qui de mandato D. Collectoris Nouitiam ad professionem recepit: & sic dictus Guardianus dans professionem de mandato D. Collectoris, fuit merus executor: & à mero executore non licet appellare. *cap. Nouit. de appellat. cum gloss. ibidem, verbo Debuissent.* Tertiò, quia in rebus notoriis non admittitur appellatio, vt patet *ex cap. proposuit, de appellat. & ex multis Doctoribus, quos citat Camillus Borellus tom. 2. suarum decisionum, tit. 33. num. 173. & seqq.* At constat ex processu facto in ista causa fuisse notorium in conuentu hanc Nouitiam caruisse culpa, & contra illam aliquas Moniales maleuolè insurrexisse, & ferè coniurasse, de quo fuerunt iudicia vehementia.

Hinc patet responsio ad tres obiectiones in contrarium, quæ videbantur probare, potuisse Abbatissam appellare; & quod quando appellatur ad Papam, non possit appellatio impediri. Hæc enim omnia intelliguntur quando appellatio est iusta, & non friuola: & appellans est verè grauatus: quæ omnia huic appellationi defuerunt, vt dictum est in præcedentibus. Præterea, id quod dicitur, appellatione pendente nihil esse

esse innouandum, intelligitur de appellatione iusta & acceptata: non verò de appellatione iniusta, & reiecta, qualis ista fuit: & præterea intelligitur nisi appellatio fiat de notoriis: hæc enim omnia etiam habent locum in appellatione facta ad Papam.

Et adhuc ex superabundantia dico, professionem hanc non posse annullari, dato quod foret dubia (qualis non est) hoc probo argumento adducto à Patre Sanchez *lib.2. de Matrim. disput.35. num.19.* vbi dicit, quod stante dubio an matrimonium validum sit, entendum est vt actus valeat & non pereat: ad quod citat duos textus iuris ciuilis & iudicandum esse in fauorem matrimonij. Cuius ratio esse potest, quia dissoluendo tale matrimonium dubium, potest dari periculum dissoluendi matrimonium aliàs validum. Eodem modo, dato quod ista professio esset dubia, (qualis non est) cum professio sit quasi matrimonium spiritale, non est dissoluenda, sed curandum est, vt actus valeat in fauorem professionis, ne detur periculum dissoluendi professionem validam. Maxime cum iuxta Zerolam *1. parte prax. Episc. verbo, Professio 38.* si professio fiat non seruata regula Religionis, ligat saltem in foro conscientiae: pro quo citat Doctores. Sub censura Ecclesiae & Doctorum.

C A S V S X C V I.

De sponsalibus quibusdam, & matrimonio.

Quidam iurauit cuidam mulieri virgini se illam ducturum in uxorem, & sub hac spe, & promissione illam deflorauit, indeque prægnans mansit, & postea

postea coram quinque testibus illa sponsalia ratificauit. Hoc non obstante, postmodum contraxit sponsalia cum alia: & furtim impetrauit licentiam à Vicario generali, vt cum ista secunda contraheret matrimonium, omiſſis denunciationibus: & de facto contraxit. Sed ad hoc vocauit quemdam Sacerdotem non Parochum, neque cum licentia Parochi: & sic coram illo celebrauit matrimonium extra Ecclesiam Parochialem, in quadam parua Ecclesia.

Queritur an prima fœmina habeat ius ad illum reſolcendum in maritum: an verò debeat manere cum secunda, cum qua de facto contraxit?

Et quod debeat manere cum secunda, videtur primò, quia cùm celebrauerit matrimonium cum secunda, vinculum matrimonij est vinculum sacramenti, quod est fortius quàm vinculum iuramenti facti fœminæ priori: ac proinde vinculum sacramenti cum secunda debet præualere. Confirmatur, seu declaratur, quia Papa cum causa dispensat in vinculo iuramenti, non tamen dispensat in vinculo matrimonij consummati. Secundò probatur, quia res tradita vni per contractum indissolubilem, non potest amplius tradi alteri, cui solum promissa est: verbi gratia, promisit Petrus Ioanni dare gladium quemdam: postea eundem gladium vendidit Francisco: non tenetur postea dare gladium Ioanni, cui gladium solum promisit. Sic in isto casu. Promisit iste primæ mulieri matrimonium, postea matrimonium contraxit cum secunda: non poterit matrimonium iam contrahere cum priore. Tertiò, quia matrimonium subsequens dissoluit sponsalia præcedentia facta cum alia, vt praxis obseruat.

Hoc non obstante, dico hunc esse obligandum contrahere

trahere cum prima, relicta secunda. Ratio est, quia matrimonium cum secunda fuit omnino nullum, ut statim probabo: ergo non potuit annullare sponsalia præcedentia, iuxta regulam iuris in 6. dicentem: *Non præstat impedimentum quod de iure non sortitur effectum.* Et per illud commune dictum, *Quod nullum est, nihil potest operari.* Quod autem matrimonium cum secunda fuerit nullum, constat clarè, quia fuit celebratum sine Parocho, & sine licentia Parochi. Concilium verò Tridentinum *sessiōe 24. cap. 1. de reformatione*, definit esse nullum matrimonium celebratum sine Parocho, vel si per alio Clerico de licentia Parochi. Quod verò matrimonium subsequens, si sit nullum, non dissolvit sponsalia præcedentia, tenet, ac probat Sanchez *lib. 1. de Matrimon. disput. 48. num. 1.* citans octo Doctores grauissimos. & idem tenet Bonacina *tomo 1. tit. de sponsal. q. 1. puncto 7. num. 1.* citans alios. Vide glossam supra citatam de regul. iuris, ubi ponit alia exempla.

Maior dubitatio esse posset, quando hic homo, de quo loquimur, habitâ licentiâ ad contrahendum cum secunda, omissis denunciationibus contraheret verè cum secunda non obstante iuramento facto primæ, eiúsque defloratione? Ad quod respondendum est debuisse contrahere cum secunda: quia tunc matrimonium foret validum: & vinculum matrimonij est maius, quàm vinculum iuramenti facti priori fœminæ. Et hoc solum probant argumenta in principio in oppositum adducta. Neque obstarèt tunc iuramentum factum priori fœminæ, illiúsque defloratio, quia hæc duo sunt impedimentum solum impediens, & non dirimens, & proinde non annullarent subsequens matrimonium ritè celebratum. Hinc patet solutio

lucio argumentorum positorum in principio.

Ad primum dico quod in matrimonio facto cum secunda, non fuit vinculum sacramenti. Cum enim non fuerit validum matrimonium, non potuit esse sacramentum: & proinde tunc debebatur matrimonium primæ in conscientia, ac de iustitia, propter promissionem iurata, & propter deflorationem. Ad secundum concessâ maiore, neganda est minor, ac dicendum, quod iste non tradidit se fœminæ secundæ, quia cum illa non contraxit verum matrimonium. Traditio enim corporum inter coniuges non fit nisi per verum matrimonium, verumque sacramentum, quod in hoc casu non interuenit. Ad tertium dico illa capita iuris citata dicentia per subsequens matrimonium dissolui sponsalia præcedentia intelliguntur, quando matrimonium subsequens est verum, & validum. Hoc autem matrimonium, de quo agimus, non fuit validum, ut probatum est: & proinde citata capita hîc locum non habent: & sic respondet Bonacina *cit. loco.*

Quæris: an prædictus vir qui contraxit matrimonium cum secunda, sit obligandus ducere primam in uxorem, dato quod illa prima sit sibi valde inferior in nobilitate? Respondeo, quod non obstante tali inæqualitate, tenetur illam ducere propter iuramentum, & deflorationem. Sic tradit Sanchez *lib. 1. de Matrimon. disput. 11. num. 2.* citans alios graues Doctores. Et probat, quia sciens fœminam esse sibi inæqualem in nobilitate, & nihilominus illi promittens matrimonium cum iuramento, cedit iuri suo, seu iuri suæ nobilitatis, iuxta regulam iuris dicentem: *Scienti, & consentienti non fit iniuria.* Hoc idem tradit Molina *tomo 2. de iustitia tract. 2. disput. 271. §. Quod-*

dum

dam exemplum, vbi alias probationes adducit, quæ ibi poterunt videri.

CASVS XCVII.

De quadam muliere baptizante filium suum.

QUædam mulier sciens filium suum baptizatum fuisse à quodam Clerico descendente ex Iudæis vulgo *Christiano nouo*) eundem filium iterum domi baptizauit. Quæritur primò, vtrum hæc mulier sic baptizando filium incurrerit impedimentum petendi debitum à marito propter cognationem spirituales contractam cum marito ex baptismo filij?

Quæritur secundò, an ista mulier peccauerit in re-baptizando filium?

Responsio.

Ad primum potest responderi ex iis, quæ tradit Sanchez *lib. 7. de Matrim. disput. 62. num. 6. & 7.* vbi dicit, quod ex baptismo iterato sub conditione, eo quod dubitatur de prioris baptismi validitate, postquam constiterit priorem fuisse validum, non oritur cognatio spiritualis. Sed dum id non constat, præsumit Ecclesia cognationem. Quod ait Sanchez esse intelligendum, quando est merum dubium. Si enim sint variæ opiniones de valore prioris baptismi, subdit *num. 7.* quod si sint duæ opiniones, quarum altera negat valorem baptismi, altera verò affirmet, poterit quispiam tutâ conscientiâ alteram eligere, & tenendo baptismum

baptismum non fuisse validum, dicit consequenter non fuisse certam cognationem ex baptismo sic iterato. Contrarium verò dicit si illam opinionem amplectatur, quæ dicit esse validum. Et cum utraque opinio fuerit probabilis, poterit utramvis tuta conscientia amplecti. Sic Sanchez *cit. loco*.

Ex doctrina huius grauissimi Doctoris constat ad hunc casum non posse resolutè responderi, siquidem pendet ex hoc, ut sciamus an Baptismus illius Clerici fuerit validus vel nullus. Si enim fuit validus, & collatus cum debita intentione, Baptismus secundus matris fuit nullus: & proinde non contraxit ullam cognationem spirituales cum marito, sed poterit petere debitum, ut probat Sanchez *citato loco numero 4. & 5*. Secus dicendum si Baptismus talis Clerici fuerit nullus, eo quod collatus fuerit sine debita intentione. Et per hoc sufficienter manet responsum ad casum præsentem.

Tota dubitatio est in applicanda hac doctrina ad casum præsentem. Quod enim prior Baptismus Clerici fuerit validus, & proinde mulier secundò baptizans non contraxerit cognationem spirituales cum marito: probatur primò, quia secundum ius naturale, ac positium, præsumendum est bene de proximo: & sic præsumendum est de Clerico prius baptizante, quod baptizauerit cum debita intentione. Et præterea, quia in dubio debemus inclinare in partem benignam, ut dicitur in capite *Estote*, de regulis iuris. Præterea, quia enitendum est ut actus valeat potius quam ut pereat, ut dicitur in cap. *Abbatissa de sententia, & re iudicata*, in 6.

E contra verò quod Baptismus talis Clerici fuerit nullus ex defectu intentionis, & proinde Baptismus

ſceminæ fuerit validus, & ex conſequenti contraxerit cognationem: probatur, quia fortiffima præſumptio ſumitur ex conſuetis, & ex communiter accidentibus, vt latè & efficaciter probat Bonacina *tomo 2. fol. 181. §. Quando dubitatur*. At conſtat ex multis euentis apud Tribunal ſancti Officij, quod Clerici Chriſtiani noui ſæpius inuenti ſunt baptizare ſine intentione: & hac de cauſa Clemens VIII. & Paulus V. per proprias Bullas mandarunt ne vllus Clericus Chriſtianus nouus haberet officium Parochi cum cura animarum, eo quod ſæpius inuenti ſunt non facere verum Sacramentum. Ex quibus omnibus reſultat contra tales Clericos præſumptio iuris, & de iure; & ideo cùm ſit ſatis probabile, quod prior baptiſmus iſtius Clerici fuerit nullus, baptiſmus mulieris fuit validus, & proinde contraxit cognationem ſpiritualem cum marito, & ex conſequenti nullus adinui cem poteſt petere debitum coniugale. Ecce quomodo vtraque opinio de validitate iſtius baptiſmi ſit probabilis.

Descendendo nunc magis ad particulare, dico quod non errabit ſequens opinionem, quod baptiſmus Clerici validus fuerit, & quod mulier inualidè baptizauerit. Probatur primò, quia opinio de validitate baptiſmi dati à Clerico, eſt opinio probabilis, vt ſuprà vidimus, quia bene præſumendum eſt de proximo, &c. Præſumptio enim de valore actus fortior eſt omnibus aliis præſumptionibus, vt probat Maſcardus citans multos, *tom. 3. conſuſ. 1225. num. 20*. Secundò probatur *ex cap.* à quodam Iudæo, *de conſecrat. diſt. 4.* vbi Papa Nicolaus dicit non eſſe iterandum baptiſmum collatum à quodam Iudæo, de quo non conſtabat, an eſſet Chriſtianus, an paganus. Vbi ſupponit

supponit Papa fuisse verum baptismum collatum à Iudæo. Et sic idem possumus credere de hoc nostro baptismo : & proinde istam mulierem postea baptizantem non contulisse verum baptismum, & proinde non contraxisse cognationem cum marito. Et dato quod opinio de nullitate baptismi Clerici esset minus probabilis, & esset probabilior opinio de valore baptismi dati à muliere, adhuc tamen teneri potest securè prior opinio de valore baptismi dati à Clerico, & ex consequenti quod mulier non incurrerit cognationem. Quia quando instat aliqua magna difficultas, & periculum, bene potest teneri opinio minus probabilis, & minus secunda ad vitandum illud periculum : vt tenet, & probat efficaciter Sanchez *lib. 2. de Matrim. disp. 36. n. 80.* citans alios. At constat, quod ex eo quod dicamus mulierem validè baptizasse, & proinde contraxisse cognationem, sequitur magna difficultas, & magnum periculum incontinentiæ in petendo debito : ergo tunc teneri potest opinio minus probabilis, quod scilicet illius baptismus fuerit nullus.

Ad vltimum quæsitum dico, probabilius esse quod ista mulier non peccauit mortaliter rebaptizando filium, piè enim credi debet id fecisse bonâ fide, & ex zelo salutis spiritualis filij, & præterea quia erat mulier ignorans legem Ecclesiæ, & denique quia non baptizauit absolutè, sed sub conditione.

CASVS XCVIII.

De ieiunio Religiosorum.

IN gratiam Religiosorum resoluaui breuiter duo dubia, quibus vidi aliquando aliquos molestari.

Prius est, an ipsi teneantur ad ieiunia iniuncta per solum Episcopum, vel per solam consuetudinem, non verò per totam Ecclesiam? Scio enim varias de hoc esse opiniones. Ego omisâ longiori disputatione, resolutè dico cum Sanchez nouissimè *in suo tomo confessorum, siue opusculorum, lib. 5. cap. 1. dub. 3. num. 1.* Religiosos ad talia ieiunia indicta per Episcopos, vel per consuetudinem sæcularium, non obligari. Citat Sanchez ad hoc Medinam, Ledesmam, Anglez, Antoninum, Syluest. qui dicunt, quod consuetudo sæcularium non obligat Clericos, neque consuetudo loci vniuersitatem, neque è contra, quia sunt diuersi status, & diuersis statutis gubernatur. Et addit, quod aliquando Compluti ciues non comedunt carnes, & scho-
lastici illas comedunt.

Secundum est, an dato quod ferè communis opinio dicit septuagenarios excusari à ieiunio, nisi aliquis sit robustæ complexionis, cui ieiunium in illa ætate non noceat. Si aliquis septuagenarius sit robustæ complexionis cui ieiunium non noceat, teneatur nihilominus ad ieiunandum? Respondet Sanchez *citato dubio 4. num. 7.* non teneri. Assignat hanc vltimam, & claram rationem. Nam Ecclesia non obligat ad ieiunium ante vigesimum primum annum, quia ante illum pueri non habent vires, & robur ad supportandum ieiunium: & tamen si ante annum vigesimum primum sit aliquis iuuenis robustæ complexionis, cui ieiunium non noceat; nemo illum ad ieiunium dicit obligari. Ergo similiter, si deus septuagenarius qui sit robustæ complexionis, & cui post annum septuagesimum ieiunium non noceat, ad ieiunium non erit obligandus. Sic Sanchez citans Anglez *in floribus prima parte mat. de ieiunio,*

nio, quest. 6. dubio 6. fol. 401. Sub censura Ecclesiæ, & Doctorum.

CASVS XCIX.

De quadam dote promissa à patre Iudæo pro filia ingressa monasterium.

Quidam homo Iudæus habebat filiam, quam fecit recipi in monasterio Monialium. Pro dote promisit monasterio (inter alia) vnum modium magnum tritici perpetuum, quem non statim tradidit monasterio: sed singulis annis certam pecuniæ summam dabat conuentui, donec traderet conuentui possessionem quietam illius magni modij tritici. Et antequam illud traderet, filia professionem emisit. Post paucos annos iste comprehensus est à DD. Inquisitoribus, & carceribus sancti officij mancipatus. Deinde in actu publico fidei per sententiam declaratus fuit hæreticus: & proinde omnia bona illius fisco Regio adiudicata.

Quæsitum fuit, an confiscatis bonis illius, monasterium debeat amittere dotem promissam pro filia: an verò teneatur fiscus de bonis illis soluere monasterio dotem promissam pro filia?

Responsio.

Pro responsione suppono quod iste pater fecit contractum onerosum cum monasterio, vt patet. Promisit enim monasterio illos redditus tritici cum onere vt aleret filiam professam. Cùmque iam monasterium

fecerit,

fecerit, quod promissit, admittens filiam ad professionem, sequitur quod pater est debitor, & monasterium est creditor. Creditor enim iuxta Calepinum, est ille cui aliquid ex quacunque causa debetur: & huic conuentui debentur illi redditus tritici promissi per contractum onerosum.

Secundò suppono vt certissimum ex iure vtroque, & Doctoribus, quod hæreticus à die commissi criminis amittit omnia bona mobilia, & immobilia applicanda fisco: & quod quando per sententiam declaratur hæreticus, illiusque bona declarantur confiscata, talis sententia retrotrahitur, illumque priuat omnibus bonis à die commissi criminis. Pro quo sufficiat videre Sanchez *tomo 1. Decalogi lib. 2. toto cap. 23.* & Iulium Clarum *in praxi crimin. q. 78.* Quo supposito,

Sit prima conclusio.

Si quando pater cum fecit istum contractum cum Monasterio, nondum commiserat crimen hæresis, non potest Fiscus accipere pretium illius modij tritici promissi: imò tenetur illud soluere conuentui, quia est debitum contractum ante delictum. Hæc est communis opinio Doctorum, maximè Iulij Clari *cit. q. 78. num. 16.* vbi citat multos, dicens esse communem opinionem. Idem tenet Bonacina *tom. 2. tit. de contract. disput. 3. q. 8. puncto ult. §. 4.* vbi dicunt teneri Fiscum soluere debita contracta ab hæretico ante delictum. Cuius causa est, quia reus ante delictum erat verus dominus suorum bonorum, illorumque habebat verum dominium, & proinde poterat illa donare, obligare, vel alienare. Si autem quæras: & quomodo sciri poterit, an ista alienatio, vel dotis promissio facta fuerit

fuerit ante, vel post delictum? Respondet Bonacina *cit. loco*, quod stante hoc dubio, tenetur Fiscus probare, quod talia debita non fuerint contracta ante delictum, sed post illud. Et idem tenet Sanchez *cit. cap. 22. num. 77.*

Tota dubitatio est, si iste pater fecit istum contractum post iam commissum à se delictum hæresis: an fuerit validus contractus, & potuerit validè se obligare conuentui, ita vt Fiscus teneatur soluere hanc dotem ab illo promissam Monasterio?

Secunda conclusio.

Quamuis iste pater fecerit istum contractum cum Monasterio pro dote filiae, post delictum à se commissum, contractus nihilominus fuit validus, & proinde Fiscus non potest illum annullare; sed potius tenetur soluere prædictam dotem conuentui, ex bonis relictis à patre Iudæo. Hanc conclusionem videtur docere Iulius Clarus *cit. q. 78. num. 18.* vbi agens de Fisco, ponit hæc verba: *Ceterum post commissum delictum regulariter etiam valet alienatio ante sententiam facta titulo oneroso, neque reuocantur alienata, nisi appareat contrahentem fuisse participem fraudis.* Sic ille. Ista verò alienatio, vel promissio dotis fuit facta ante sententiam, cum titulo oneroso, vt diximus: neque constat quod hîc interuenerit fraus ex parte conuentus: & ait ibi Iulius Clarus hæc esse opinionem communem. Quamuis autem hic Doctor ibi limitet, hoc non intelligi vbi bona confiscantur ipso iure (quale est crimen hæresis) nihilominus manet hoc fixum ex alio capite; vt enim dicam, fuit hoc debitum contractum post delictum, cuius pretium, vel utilitas conuersa

est in bona, & vtilitatem patris: & tunc est obligatio dare satisfactionem creditori Monasterio. Secundo, videtur hæc opinio Farinacij *tomo de Accusation. & delictis quest. 24. num. 46. & 47.* vbi ait, quod dos data filiae à patre hæretico non confiscatur: ad quod probandum multa adducit. Et præcipua eius ratio est, quia dotare filias est de lumine naturali, vt pater: at contra lumen naturale non potest ius posituum disponere, siue sit Ecclesiasticum, siue ciuile, vt habetur in *Clementina pastoralis, de re iudicata.* Et confirmatur amplius hoc dictum Farinacij: quia si dotem pater hæreticus post delictum dedit filiae iam coniugatae, gener istius patris habet ius in tali dote acquisitum, quia fructus dotis dantur marito ad sustentanda onera matrimonij: & sic constante matrimonio, non potest à genero auferri. Quod etiam ob eandem causam militat in dote promissa Monasterio pro filia Moniali; datur enim talis dos ad sustentanda onera Monasterij pro alenda filia: ac proinde non poterit talis dos auferri à Monasterio. Quod adhuc probatur ex Nauarro *tomo consiliorum lib. 3. tit. de testament. consil. 9.* & ex Rodriguez *tomo 2. qq. quest. 127. art. 1.* cum aliis ibi citatis dicentibus, quod si cuidam puellae relinquatur legatum vt nubat, & illa eligat potius profiteri in Monasterio, non perdit legatum: quia (inquiunt) multo magis fauendum est Religioni, quàm matrimonio. Et proinde cum non possit Fiscus confiscare dotem datam filiae à patre hæretico pro matrimonio: sic non poterit confiscare hanc dotem promissam Monasterio à patre Iudæo pro dote filiae Monialis. Hæc verò opinio Farinacij dicentis non posse Fiscum auferre dotem datam filiae à patre hæretico, asseritur etiam à Baiardo in commento ad *Julium*

Iulium Clarum, *quest.* 78. ubi dicit, quod licet ob crimen læsæ Maiestatis omnia bona patris ita confiscentur, ut nulla portio reservetur filiis. Nihilominus filiaë fœminæ reservatur portio pro illa dotanda. Et idem Baiardus *eadem quest. num.* 109. citans alios, ait non posse Fiscum petere à patre alimenta filij banniti, quia sunt debita iure naturali.

Iam ergo ex prædictis conclusionibus constat non posse Fiscum hanc dotem auferre à Monasterio. Nunc amplius id confirmo ex communi illo dicto Doctorum in materia de Fisco dicentium, quod licet Fiscus non teneatur soluere debita creditoribus rei condemnati, si tamen constiterit, quod pretium, vel emolumentum fuerit datum condemnato ab ipso creditore, & hodie tale pretium, vel emolumentum reperitur inter bona condemnati: vel constat quod tale pretium conuersum fuit in bonum ipsius condemnati, tunc Fiscus tenetur hoc debitum soluere creditori. Sit exemplum: vendiderat hæreticus paulò antè quasdam domos Petro, pro quibus hæreticus recepit pretium, quod hodie extat inter bona hæretici. In hoc casu, si Fiscus velit confiscare prædictas domos, debet soluere Petro pretium illarum, quia pretium, & pecunia data à Petro pro illis hodie reperitur inter bona hæretici. Hæc opinio communis maximè asseritur à Sanchez *tom.* 1. *Decalogi, lib.* 2. *cap.* 22. à *num.* 68. vsque ad finem capituli, ubi citat multos, & graues Doctores explicantes quomodo cognosci possit pretiū datū hæretico à creditore extare hodie inter bona hæretici: vel fuisse conuersum in vtilitatē ipsius, tam hæretici, quàm Fisci, qui occupauit locupletiorē substantiam delinquentis. Et ait Sanchez hoc posse cognosci, si delinquens cum illo pretio aluit se, & suā familiam.

Secundò, si cum illa pecunia res suas meliores effecit: vt restaurando agros, oliueta, domos, &c. tunc enim illa pecunia dicitur extare inter bona delinquentis: & cum cedant in vtilitatem Fisci, tenetur Fiscus illam pecuniam soluere creditori. Quæ omnia applicantur nostro casui in hunc modum. Iste pater Monialis est debitor, & debet monasterio trecentos aureos pro dote promissa. Isti trecenti aurei hodie extant inter bona istius patris hæretici, siquidem illa nunquam dedit monasterio, & cum illis aluit familiam, & succurrit necessitatibus domus suæ, propter quod Fiscus confiscauit locupletiorém substantiam hæretici, vt patet, quàm confiscaret si hæreticus soluisset illos trecentos aureos monasterio. Licet verò conuentus non dederit pecuniam hæretico debitori, donauit tamen rem magno pretio æstimabilem, videlicet obligando se ad alendam filiam in tota vita: propter quod iste pater contraxit debitum trecentorum aureorum, quæ non soluit monasterio, sed illos conuertit in suam vtilitatem: ergo tenetur Fiscus illa soluere monasterio.

Facit adhuc pro ista sententia, quod tenet Iulius Clarus *quest. 78. in praxi crim. num. 31.* videlicet, quod licet Fiscus præferatur creditoribus ex contractu: id est, quando talis debitor se obligauit per contractum. In hoc verò casu iste pater se obligauit per contractum cum monasterio, idque ante sententiam condemnatoriam. Facit adhuc pro nobis quod tradit Sanch. *tom. 1. Decal. lib. 2. cap. 19.* citans Curtium, Speculatorem, Nellum, Gigas, & alios dicentes, alimenta debita filiis à parentibus, & singulis annis dari solita, non confiscari: & proinde videtur quod iste redditus tritici promissus monasterio ab isto patre

tre pro alimento filiae non sit confiscandus. Facit adhuc quod dicit Molina *tomo 1. de iust. tract. 2. disp. 95. col. 401.* & Baiardus *cit. q. 78. ad Iulium Clarum, n. 100.* cum Couar. ab utroque citato, qui omnes dicunt, quod si delinquens fecit aliquam alienationem ex causa necessaria, ut pro alimentis comparandis, tunc talis alienatio valida est, neque à Fisco poterit reuocari. At constat quod iste pater fecit hanc alienationem, vel promissionem monasterio ex causa necessaria, videlicet pro filia locanda matrimonio spirituali, & illa alenda in monasterio: ergo non poterit à Fisco reuocari. Tandem facit ad hoc quod tradit Rebello *tomo de obligat. instit. lib. 1. de contract. in genere, q. 7. sect. 2. num. 26.* citans Bartolum, videlicet, quod si socer det dotem filiae in fraudem creditoris, seu det dotem genero in fraudem creditorum: si gener non fuit conscius talis fraudis, non dabitur actio aduersus eum à prioribus creditoribus. Quod potest nostro casui sic applicari. Si pater istius Monialis quando promisit monasterio hanc dotem pro filia, iam erat haereticus, iam fecit hoc in fraudem Fisci, qui erat quasi creditor. Sed promisit, & dedit hanc dotem monasterio veluti genero pro sustentanda filia: ergo Fisco non competit actio pro ista dote, quia conuentus non fuit conscius fraudis istius patris, sed accepit illam dotem ab illo, sicut gener accipit dotem à socero pro alenda filia.

Et adhuc pro illo, quod suprà dixi ex Farinacio teneri patrem dare dotem filiae pro contrahendo matrimonio, idque ex iure naturali, ad maiorem dicti firmitatem addo, eandem obligationem habere patrem dandi dotem filiae pro ingressu monasterij. Sic tenet Sanchez *lib. 4. de Matrim. disp. 26. num. 7.* citans quinque

quinque graues Doctores. Imò addit plus obligari patrem ad dotem dandam filiae pro ingressu monasterij, si illa liberè eligat Monachatum, quàm pro matrimonio contrahendo. Quia fauorabilior est ingressus monasterij, quàm dos pro matrimonio carnali. Pro quo citat textum vnum iuris ciuilis. Ergo cùm hic pater dederit monasterio hanc dotem pro recipienda filia ad professionem, non potest Fiscus annullare hanc donationem, seu contractum onerosum factum cum monasterio. Et sunt valde notanda verba, quibus Sanchez concludit prædictam doctrinam, quæ talia sunt : *Et hac ratione possunt bona restitutioni subiecta distrahi pro dote descendens à testatore volentis ingredi monasterium, sicut pro dote ad matrimonium temporale, &c.* Et citat pro hoc Algazer, Antonium Gomez, & Menochium. Sub censura Ecclesiæ, & Doctorum.

C A S V S C.

*De quadam uxore Iudæi condemnati per
Dominos Inquisitores.*

QVædam mulier non descendens à Iudæis, nupsit cuidam viro descendenti à Iudæis, quod illa ignorabat. Cum quo nupta per aliquos annos cohabitauit. Post quos maritus carceri sancti Officij mancipatus est. Inde ad actum publicum adductus per dominos Inquisitores damnatus est, & declaratus hæreticus cum omnium bonorum confiscatione. Post sententiam, & per actam illius pœnitentiam vxor illius noluit cum illo cohabitare, sed mansit in sua domo

mo separata cum sua medietate bonorum. Iudex secularis obligauit vxorem ad cohabitandum cum marito, illúmque alendum, sicut nunc cohabitat. Et nupserant antea per contractus medietatis bonorum. Fiscus verò tulit medietatem bonorum mariti.

Quæritur, an possit hæc mulier tali marito cohabitans, de bonis suis, seu de sua illa medietate bonorum, quam maritus gubernat, aliquid clam subtrahere, & dare suis consanguineis, vel insumere in aliis sibi placitis? Et videtur quod non possit: nam maritus habet administrationem bonorum communium, sicut dicitur in iure: & hic maritus hodie habet administrationem istius domus, & bonorū vxoris. Vxor verò non potest donare de bonis communibus sine licentia mariti, iuxta communem Doctorum opinionem, & praxim. Neque obstat quod iste maritus admitteret iam suam medietatem bonorum; nam hoc contingit per casum fortuitum, de quo nemo tenetur: & quando duo coniuges per casum fortuitum amittunt magnam partem substantiæ, damnum hoc attingit vtrumque coniugem ex æquo, & pro rata.

Responsio.

Ante responsionem suppono primò, quod vbi primum aliquis ex coniugibus per sententiam Inquisitorum fuit declaratus hæreticus, coniux innocens absque alia sententia diuortij potest facere diuortium, & viuere sine alio coniuge damnato. Sic expressè tenet Sanchez *lib. 1. de Matrim. disput. 15. num. 20.* citans Castrum, Barbosam, Couar. Grassium, Ludouic. Lopez, Henriquez, Sotum. Idem tenet Repertorium Inquisitorum, verbo, *Fornicatio*, §. *Sed fornicatio*: vbi citat Abbatem,

batem, & alios. Idem tenet Rodriguez *tom. 3. Addit. ad summam, c. 182. concl. 4.* & Lessio *lib. 2. de statu Religioso c. 41. num. 29.* dicens quod ad faciendum hoc diuortium sufficit sententia declaratoria criminis. Et probat Sanchez *cit. loco*; quia cum hoc diuortium sit quædam pœna consequens hæresim, eo ipso quod coniux per sententiam declaratur hæreticus, damnatur etiam hac pœnâ diuortij, sicut damnatur amissione bonorum, & aliis pœnis hæreticorum.

Secundò suppono, quod iudex sæcularis non poterat obligare hanc mulierem ad recipiendam istum maritum, & cohabitandum cum illo: nam diuortium inter coniugatos est causa Ecclesiastica annexa sacramento ut patet: iudex verò sæcularis non potest se ingerere in causis Ecclesiasticis, ut est notissimum. Hoc probat efficaciter Sanchez *lib. 10. de Matrim. disput. 8. num. 15.* ubi probat cum multis Doctoribus, & textibus, quod iudex sæcularis non potest iudicare de diuortio faciendo ob crimen adulterij: sed quod id pertinet ad iudicem Ecclesiasticum. Quod à fortiori dicendum est in isto casu, in quo diuortium fit ob crimen hæresis, quod est clarè Ecclesiasticum. Cum ergo solus iudex Ecclesiasticus sit iudex diuortij, ipse solus, non verò iudex sæcularis poterit obligare coniugatos ut cohabitent sine eo quod faciant diuortium propter hæresim. Nam ad eundem iudicem spectat decernere quod non sit faciendum diuortium, ad quem spectat iudicare quod sit faciendum diuortium: iuxta illud commune dictum, contrariorum eadem est disciplina.

Hoc posito, ad quæsitum principale istius dubij, dico mulierem istam licitè posse in secreto surripere bona suæ medietatis, illaque dare consanguineis, vel quibus

quibus voluerit. Probo hoc, quia vxor potest donare licitè de suis bonis quorum habet administrationem, qualia sunt paraphernalia, vt dicunt communiter Doctores, maximè Lessius *lib. 2. de iniur.* Fortun. *c. 12. dubio 14. §. Si det ex suis.* At ista medietas bonorum, cum qua mansit ista mulier, est propria istius mulieris, illique assignata per Fiscum: & istius medietatis habet hæc mulier administrationem, non verò maritus: nam maritus fuit intrusus in domum illius post hæresim per iudicem sæcularem, vt aleretur ab illa, non verò vt sua bona administraret. Quod iudex sæcularis facere non poterat, iuxta prædicta in secundo supposito. Cùm ergo hoc dimidium bonorum sit istius vxoris etiam quoad administrationem, sequitur quod possit de ista medietate sicut voluerit, modo in præcedentibus explicato, disponere.

Secundò probatur, quia hæc mulier tenetur isti marito dare alimenta, cùm non habeat vnde sustentetur, vt probat Sanchez *lib. 9. de Matrim. disput. 4. num. 27.* pro quo citat vnam legem ciuilem, & Doctores iuris ciuilis. At constat, quod dans alimenta alicui donat de re sua: & de illa re, ex qua dat alimenta, potest cuilibet alteri ad libitum donare. Et sit exemplum in patre dante alimenta filio; potest enim de illis suis bonis quibus alit filium donare alteri sicut voluerit. Dando igitur hæc vxor alimenta marito de suis bonis, poterit etiam de eisdem bonis donare consanguineis, & aliis absque licentia mariti. Tertiò, quando aliqua mulier coniugata scit clarè maritum suum facultates communes prodigere, ludendo, luxuriosè viuendo, & donando prodigè, potest hæc mulier in secreto abscondere, & retinere bona illa mobilia per quæ suam medietatem conseruet illæsam, ne
sua

sua dos, vel medietas exhauriatur, vt communiter tradunt Doctores, maximè Lessius *cit. dubio* 14. §. 10. *si maritus*. At ista vxor scit quod maritus per suam hæresim prodegit medietatem bonorum suorum : & præterea potest timere quod iterum relabatur in hæresim iuxta regulam iuris; *Semel malus semper præsumitur malus*. Si verò relapsus fuerit, iterum Fiscus tollet medietatem medietatis vxoris : ergo potest hæc vxor abscondere, & clàm surripere quæ bona voluerit de sua medietate. Quartò, facit ad hoc lex Portugalliæ *lib. 4. Ordin. tit. 96.* vbi dicitur, quod quando pater, vel mater dederunt detem filio pro matrimonio, vel illi fecerunt donationem notabilem, quæ excedat legitimam sibi obuenturam ex morte parentum : in tali casu talis filius ic dotatus non poterit admitti ad collationem, vel hæreditatem cum aliis fratribus, quia iam talis filius abundè suscepit portionem suam : excipit ibi lex, si talis filius velit adducere ad collationem, id quod iam acceperat à parentibus. Et hoc ordinat ibi lex, ne talis filius tollat duas legitimas siue portiones. Hoc videtur applicandum ad nostrum casum : nam iste maritus iam tulit suam medietatem bonorum, vel illam amisit propter hæresim : iam ergo non poterit habere aliam medietatem in medietate bonorum, relictâ vxori : sed poterit vxor de sua medietate disponere ad libitum, dummodo det alimenta sufficientia marito. Vltimò facit ad hoc quod tradit Bonacina *tomo 2. disput. 5. circa quartum præceptum Decalogi q. unica, puncto 7. num. 8.* videlicet, quod si dos data vxori fuit confiscata ob aliquam culpam ipsius, maritus non tenetur illi dare alimenta : & citat ad hoc Sanchez, Surdum, & alios. Excipit, modò vxor à parentibus alimenta non possit obtinere : ergo à simili,

neque

neque ista vxor tenebitur alere maritum, qui sua culpa amisit medietatem suorum bonorum, nisi ipse careat parentibus, qui possint, ac velint illum alere, vel nisi ipse possit de labore suo victum quærere.

Ad primum argumentum in oppositum adductum in principio, negandum est hunc maritum habere hodie administrationem medietatis bonorum istius mulieris, iuxta dicta à nobis in secundo supposito, & in primo nostro argumento. Ratio est, quia iudex secularis, qui ipsum coëgit ad cohabitandum cum muliere, non potuit illam ad hoc obligare; maximè cum domini Inquisitores illam ad cohabitandum non obligauerint, ad quos id ex officio pertinebat. Ad secundum dico hunc maritum non amisisse suam medietatem bonorum per casum fortuitum, sed per suam culpam deliberatam. Nam casus fortuitus est ille, qui dicitur inopinatus rei euentus, quem humana diligentia præuidere non potuit, nec vitare, vt turbo, grando, & similes, vt definit Reginaldus *lib. 20. sum. n. 126.* At iste maritus potuit vitare, & debuit præuidere quod ob suam hæresim confiscanda esset sua medietas bonorum: & proinde amissio medietatis bonorum suorum non fuit casus fortuitus. Sub censura Ecclesiæ, & Doctorum.

C A S V S C I.

De quodam Clerico indebitè ordinato.

Quidam Clericus suscepit tres gradus tantum Ordinum Minorum, omisso quarto: nec meminit qualis fuerit ille gradus omissus, primusne, tertius,

vel quartus. Postea suscepit tres Ordines sacros, & sæpius Missam celebrauit, sciens, & aduertens malum quod faciebat. Quæritur primò, an incurreret irregularitatem sic celebrando? Secundò, quis possit cum illo dispensare? Tertiò, an debeat iterum recipere omnes quatuor gradus minores, non obstante quod iam tres receperit?

Responsio.

Dico primò, hunc Clericum grauiter peccasse, & incurrisse suspensionem, recipiens tres Ordines sacros non habendo omnes quatuor minores. Hæc conclusio colligitur clarè ex eo quod tradit Nauarrus *lib. 1. consiliorum, tit. de temporibus Ordinat. consilio 35.* ubi ait peccasse mortaliter quemdam Clericum, & incurrisse suspensionem eo quod receperit tres Ordines sacros non habens prius quatuor Ordines minores. Hic autem de quo loquimur, recepit tres Ordines sacros non habens nisi tres Ordines minores. Rationem ibi tangit Nauarrus, dicens quod iste talis fuit ordinatus per saltum: id est, recepit Ordinem superiorem, non habens Ordinem vel Ordines inferiores, vt definitur in capite vltimo de Clerico per saltum promot. Idem tenet Suarez *tomo de censuris, disput. 31. sect. 1. num. 41.* ubi ait cum Doctoribus, quod septem Ordines ita sunt subordinati inter se, vt per minorem ad proximè superiorem sit ascendendum. Hic verò Clericus recepit tres Ordines sacros, qui sunt superiores, non habens omnes quatuor minores, qui sunt inferiores: & sic mansit suspensus ne posset ministrare in Ordine superiori, nec potuit Missam celebrare sine dispensatione.

Dico

Dico secundò, quod iste Clericus celebrans Missam non habens quatuor Ordines minores, incurrit irregularitatem. Hæc est certissima: per id quod Doctores communiter dicunt, quod scilicet suspensus ab aliquo Ordine sacro, & in illo ministrans, fit irregularis, maximè si id faciat sciens, vt iste fecit. Sic tenet Nauarrus *in summa*, cap. 27. num. 244. citans Ostiensem, & Panormitanum. Idem dicunt multi alij Doctores, maximè Henriq. lib. 13. cap. 32. *prope finem*. Et iste Clericus celebrauit Missam, & sic ministravit in Ordine, in quo erat suspensus, idque fecit scienter, ac proinde clarè incurrit irregularitatem.

Tota dubitatio est, quisnam possit cum isto Clerico dispensare quoad irregularitatem, & absolvere illum à suspensione? Suar. citata disput. 31. *sectione eadem*, num. 12. ait Episcopum non posse dispensare cum illo, vt Missam celebret, neque vt recipiat gradum illum Minorum, quem omisit. Mouetur ex Concilio Trid. quod *sess. 23. cap. 14. de reform.* ait quod Episcopus possit dispensare cum promotis per saltum, si non ministraverint. Propter quod (ait Suarez) si taliter promotus ministravit (vt iste fecit) non poterit Episcopus cum illo dispensare, vt Missam celebret.

Quo non obstante, ego dico tertio, quod si iste casus est occultus, potest Episcopus in illo dispensare. Sic tenet expressè Henriquez *tom. 2. lib. 14. cap. 6. n. 3. in textu, & in margine*. Pro quo citat Nauarrum dicentem *in summa cap. 27. num. 250.* idem quod tenet Henriq. Idem tenet Rodrig. *in sum. cap. 17. de sacram. Ordinis, conclus. 9. prope finem*, citans Henriquez, & citat ad hoc Henriquez Concilium Tridentinum, quod *sess. 14. cap. 6. de reform.* concedit amplam potesta-

tem Episcopo ad absoluendum, & dispensandum in omnibus irregularitatibus, & suspensionibus prouenientibus ex delicto occulto, in quibuscunque casibus occultis, Sedi Apostolicæ reservatis. Hæc verò irregularitas, & suspensio, de quibus agimus, proueniunt ex delicto vt patet: & suppono quod iste casus est occultus. Quæ concessio est amplissima. Et quamuis aliqui Doctores dicant illam concessionem Tridentini factam Episcopis esse reuocatam per Bullam Cœnæ, quæ singulis annis publicatur; non dicunt esse reuocatam in totum, sed quoad solam absolutionem ab hæresi occulta ibi concessa à Tridentino. Non verò quoad alios casus, & quoad dispensationes. Imò Sanchez *tom. 1. Decalogi, lib. 2. cap. 11. num. 27.* citat vltra quindecim Doctores graues, & recentiores, dicentes prædictam concessionem Tridentini etiam quoad absolutionem ab hæresi, non esse reuocatam per Bullam Cœnæ. Et proinde à fortiori poterit hodie Episcopus dispensare cum irregularitate, & suspensione istius Clerici. Locus verò ille Tridentini citatus à Suarez, vbi Concilium innuit non posse Episcopum dispensare cum Clerico promotum per saltum si ministravit: intelligi debet, si delictum illius fuit publicum. Nam si fuit secretum, poterit dispensare iuxta amplam illam Tridentini concessionem modò citatam ex eodem Tridentino *sess. 14. cap. 6.*

Et noto pro maiori claritate, quod iste Clericus duo debet petere ab Episcopo; primum vt dispense cum illo vt possit recipere Ordinem illum minorem omissum modo statim explicando, iuxta Suarez *citata sect. 2. num. 48. in fine.* Secundò debet petere dispensationem, vt possit celebrare Missam, & in Ordine Diaconi, vel Subdiaconi ministrare, quia
in

in his omnibus erat suspensus per promotionem per saltum.

Uterius noto quod si iste Clericus existens in hoc statu cantauit solemniter Euangelium, vel Epistolam exercens officium Diaconi, vel Subdiaconi, hoc etiam debet Episcopo explicare ut illum absoluat à suspensionibus, & dispense in irregularitatibus ibi incurris: currit enim eadem ratio in diaconatu, & subdiaconatu ministratis in suspensione, atque in celebratione Missæ à suspensio, ut ex Nauarro, & Maiolo colligit Suarez *cit. sect. 1. num. 48.* Quamuis Suarez ibidem cum Syluestro dicat, quod ordinatus per saltum non incurrit irregularitatem ministrando in Ordine inferiore, quem legitimè suscepit. Opinio verò Nauarri probatur, quia iste suscepit diaconatum, & subdiaconatum per saltum; cum hi duo Ordines sint superiores Ordinibus minoribus: ergo in illis duobus per saltum susceptis mansit suspensus, & eget particulari dispensatione.

Dico quartò, quod iste Clericus debet iterum suscipere omnes quatuor Ordines minores, supposito quod non recordetur quem gradum minorum omiserit. Nam stante hoc dubio verè dubitatur de omnibus gradibus minorum Ordinum, & non dubitatur de omnibus minoribus in speciali. Iam verò Ordo sacer de quo meritò dubitatur, an fuerit ritè susceptus, debet iterum recipi sub conditione, ut habetur expressè *in cap. Veniens de Presbyr. non baptizato*, ubi Papa iubet, quod si aliquis in Presbyterum ordinatusprehenderit se non fuisse baptizatum, baptizetur, & iterum omnes Ordines suscipiat: quia Ordines priores non profuerunt homini non baptizato. Et ait Papa ibidem, quod ista secunda susceptio Ordinum non

est iterare sacramentum Ordinis : quia (ait Papa)
*Non intelligitur iteratum, quod ambigitur esse factum : nec
 male de sacramentis sentitur, cum illud non Religionis con-
 temptus, sed articulus necessitatis repetit.* Et in hoc casu
 suscipiendo omnes quatuor gradus minorum non ite-
 ratum sacramentum Ordinis, cum non constet in par-
 ticulari qui tres Ordines minores fuerint suscepti : &
 præterea ista secunda susceptio Ordinum Minorum
 non sit ex contemptu sacramenti, sed ex necessitate,
 eo quod de præcepto Ecclesiæ Sacerdos debet habe-
 re omnes quatuor Ordines minores. Sed aduerto,
 quod iste Clericus non debet iterum recipere tres Or-
 dines sacros, quia iam illos clarè, & ritè suscepit,
 id est, verè suscepit, & ipsorum characteres, quamvis
 in susceptione peccauerit. Et adhuc dico quod vt se-
 curius omnes quatuor Ordines minores possint reci-
 pi, seruit quod ait Papa *citato capite* Veniens, videli-
 cet, quod in isto casu : *Quod tutius eligentes seruemus
 in re dubia quod tutius est ; nam in dubijs securior pars est
 ligenda.* At in hoc casu satis dubium, imò omnino
 obscurum est quem gradum ex minoribus iste Cleri-
 cus omiserit : ac proinde tutius tenendum est, videli-
 cet omnes minores Ordines recipiendo ; vt satisfiat
 præcepto Ecclesiæ, quod Sacerdos recipiat omnes
 septem Ordines.

Neque obstat contra hoc caput *sicut semel*, dist. 68.
 ubi præcipitur quod semel consecratus, hoc est ordi-
 natus, in eodem iterum ordine non debet ordinari :
 & iste iam consecratus, & ordinatus est in tribus Or-
 dinibus minoribus : ergo in illis non debet iterum
 ordinari : iam enim bis ordinabitur in eodem Ordine.
 Responderetur enim citatum textum prohibentem ne-
 quis bis eundem Ordinem suscipiat, debere intelligi
 quando

quando clarè constat aliquem hoc particulari Ordine iam esse consecratum, vel ordinatum: secus si dubitetur, an verè fuerit ordinatus, tunc enim repetendus erit Ordo dubius, vt diximus cum alio textu *in cap. Veniens de Presbytero non baptizato.* In isto verò casu dubium, imò obscurum est quosnam Ordines minores iste receperit. Facit pro hoc exemplum adductum in proximè citato capite *sicut semel.* Ait enim non esse iterandum sacramentum Ordinis, sicut non debet iterari baptismus. At constat ex iure, Doctoribus, & praxi, quod quando est magnum dubium de valore baptismi collati, reperitur baptismus sub conditione. Et Ecclesia maiores pœnas imponit iteranti Baptismum, quàm iteranti sacros Ordines receptos. Ergo cum Baptismus dubius possit iterari sub conditione, poterit etiam iterari sub conditione Ordo sacret dubius. Sub censura Ecclesiæ, & Doctorum.

C A S V S C I I.

De alio Clerico malè ordinato.

Quidam Clericus ex quodam Episcopatu Insulario, & maritimo obtinuit licentiam à Capitulo suo, Sede vacante, vt posset Ordines tres sacros recipere de manu cuiuscumque Episcopi. Non tamen expressit licentia an posset Ordines illos recipere extra Tempora, vel absque interstitiis. Cum hac licentia venit in hanc urbem Olyssipponensem, vbi etiam tunc erat Capitulum Sede vacante propter mortem Archiepiscopi. Adiit in hac vrbe quemdam Episcopum titulare, qui illi dixit se habere priuilegium Papæ

ad conferendos Ordines extra Tempora. Hac de causa recepit tres Ordines sacros extra Tempora, & absque interstitiis. Quo facto vellens occurrere alicui scrupulo, absolui se fecit à quodam Theologo per Bullam Cruciatæ: ait tamen se prædictos Ordines recepiſſe bonâ fide: sic ordinatus rediens in Insulam, impetrauit à Capitulo Sede vacante licentiam ministrandi in prædictis Ordinibus, & Missam celebrandi, quod fecit bonâ fide. Post aliquod tempus gubernator eiusdem Episcopatus Sede vacante faciens peculiarem informationem de illis, qui Ordines susceperunt Sede vacante, declarauit per sententiam hunc Clericum incurriſſe irregularitatem.

Quæritur, an iste Clericus fuerit irregularis in receptione Ordinum extra Tempora, & sine interstitiis? Secundò quæritur, an dato quod incurrerit irregularitatem, potuerit dispensari per Bullam Cruciatæ?

Responsio.

Sit *prima conclusio*. Iste Clericus non incurrit suspensionem, neque irregularitatem suscipiendo tres sacros Ordines sine interstitiis, quidquid sit de peccato quando faceret malâ fide. Probatum, quia licet Concilium Tridentinum *sess. 23. cap. 13. & 14.* prohibeat ne Ordines sacri recipiantur nisi seruatis interstitiis, & proinde peccet mortaliter contrâ faciens, non tamen ibi Concilium vllam pœnam suspensionis, vel irregularitatis imponit contrâ facienti, vt cernere est in textu, & margine Concilij ibidem. Quando verò lex pœnam non imponit, non debemus nos illam imponere, vt Doctores communiter dicunt. Et quod is talis non incurrerit suspensionem ob non seruata

seruata interstitia, tenet Zerola 2.p.praxis Episc. verbo Ordo, §. *Octauo an qui*, ubi ait, quod licet Sixtus V. post Tridentinum imposuerit suspensionem contra recipientes Ordines nec seruatis interstitiis, postea Gregorius XIV. istam suspensionem abstulit. Idem tenet Suarez *tom.de censuris disput. 31. sect. 1. num. 43.* dicens suspensionem positam à Sixto V. esse sublatam. Idem tenet Reginald. *tom. 2. lib. 32. tract. 2. num. 71. §. Reducitur etiam alia.* & Riccio 3. p. *decisionum, decis. 576.* citans Sayrum, & specificat Riccio, quod neque incurritur irregularitas.

Secunda conclusio. Si iste Clericus recepit hos tres Ordines sacros extra Tempora bonâ fide putans se in hoc non peccasse, non incurrit suspensionem, neque irregularitatem celebrando. Ita expressè resoluit Suarez *cit. tomo de censuris disput. 31. num. 31.* & Comitulus *lib. 6. Respons. Moral q. 37. num. 1.* & probabitur clariùs conclusio ex dicendis in conclusione 3. sequenti. Cùm ergo ille de se dicat, quod fecerit hæc omnia bonâ fide, sequitur nullam pœnam incurrisse. Hoc solum aduerto quod licet iste Clericus dicat se post Ordines sic susceptos procurasse absolutionem sibi dari per Cruciatam, hæc procuratio absolutionis non probat quod habuerit malam fidem: id enim fecit ad cautelam, & maiorem securitatem. Potest autem bene contingere, ut aliquis aliquid faciat cum bonâ fide, & sine dubio practico, & nihilominus post factum ad cautelam, & securitatem quærat absolutionem, vel dispensationem.

Tertia conclusio. Iste Clericus recipiens Ordines extra Tempora credens Episcopo titulari dicenti posse se illos conferre extra Tempora, non peccauit, neque incurrit suspensionem. Hæc est certissima, tum ex

dictis Suarez *cit. supra disput. 31. num. 31.* tum ex communi dicto Doctorum dicentium, quod bona fides, & ignorantia inuincibilis excusat à pœnis, & censuris, & irregularitate, quando irregularitas imponitur ob delictum, de quo latè Sanch. *lib. 9. de Matrim. disput. 32. num. 15. & seqq.* citans multos. Hic verò Clericus fidens Episcopi dicenti se posse, habuit bonam fidem, & ignorantiam inuincibilem facti: qualem habet is, qui consuluit Doctorem. Secundò probatur ex eo quod Doctores dicunt in simili materia, videlicet quod recipiens Ordines credens bonâ fide se habere legitimam ætatem (cùm re verâ non haberet) fecit tamen ad id aliquam diligentiam, non incurrit suspensionem vel pœnam vllam, propter bonam fidem. Ita Suarez *tomo de censur. cit. disput. num. 26.* citans Nauarrum *in sum. Latina, cap. 27. num. 155.* Idem tenet Miranda *tom. 1. Manual. q. 39. art. 6.* citans alios: & Reginald. *cit. tract. 2. num. 70. §. Mouet super.* Hic autem Clericus fecit diligentiam sufficientem consulendo Episcopum titularem. Denique probatur ex illo dicto communi, quod, vbi non est culpa, non datur pœna. At iste fecit bonâ fide, & faciens bonâ fide non habet culpam: ergo non incurrit vllam pœnam suspensionis, vel irregularitatis.

Quarta conclusio. Iste Clericus ministrans, vel celebrans Missam post Ordines sic susceptos, non incurrit irregularitatem. Probatur, quia celebrauit bonâ fide, quæ bona fides excusat ab incurssione pœnarum & censurarum, vt copiosè manet probatum in tertia conclusione præcedente. Et præter ibi citatos idem tenet Syluest. *verbo Irregularitas, §. 13. vers. Quintum*, & Henriquez *lib. 14. de irregular. cap. 7. num. 1.* citans alios *in littera T.* Et probatur, quia iste priusquam

quam celebraret, impetrauit licentiam à Capitulo Sede vacante ad exercendos susceptos Ordines. Et Capitulum Sede vacante potest omne illud quod potest Episcopus viuens, vt tenet Barbosa in *suis remission. ad Tridentinum cit. cap. 6. ad Tridentinum*. Denique quod iste in celebrando bonâ fide, & cum eadem bona fide Ordines recipiendo, non incurreret irregularitatem, nec suspensionem, probatur per Extrauagantem *ex sacrorum* Pij II. qui imponens suspensionem, & irregularitatem ordinatis extra tempora, ponit hæc verba : *Si in eisdem Ordinibus ministrare præsumperunt*. Quando verò lex Pontificia ponit pœnam aliquam contra eos, qui præsumperint, non incurrit illam pœnam is, qui fecit bonâ fide, quamuis haberet ignorantiam inuincibilem, vel etiam vincibilem, vt tradit communis opinio, maxime Henriquez *lib. 13. de excommunic. cap. 23. num. 3.* citans multos *litera C. in gloss.* dummodo ignorantia non sit crassa, & temeraria.

Quinta conclusio. Datò, & non concessò, quod iste clericus incurreret irregularitatem aliquam, non posset dispensari ab illa per Bullam Cruciatæ. Hoc expressè tenet, & probat Suar. *tom. de censur. disp. 1. sect. 3. num. 5.* vbi cum Nauar. cit. ait, quod licet in Bulla Cruciatæ dicatur, quod illam habens, potest absolui à quibuscumque censuris & pœnis : ista irregularitas imprimis non est censura, vt patet. Deinde teste Nauar. iuxta consuetudinem & stylum Curiae in ea generali facultate absoluedi à pœnis, & censuris non comprehenditur irregularitas, iuxta reg. textus in *cap. ult. de officio Vicarij in 6.* vbi dicitur : *In generali concessione nequaquam illa veniunt quæ non esset quis verisimiliter concessurus in specie.* Cuius signum est : nam interdum in priuile

priuilegiis, seu Bullis Pontificiis post illa generalia verba additur facultas dispensandi in irregularitate, quando Pontifex vult illam concedere, vt ex Bulla Iubilæi concessi à Clemente VIII. anno 1593. notauit Vgolinus *lib. de censur. tabula 1. cap. 20. n. 2.*

Adhuc pro maiori probatione prædictorum, & pro maiori claritate, noto primò quod quando capitulum Sede vacante dedit licentiam isti Clerico ad tres Ordines sacros recipiendos, non fuit necessarium, vt in tali licentia diceretur, quod posset illos extra Tempora recipere. Nam imprimis Capitulum Sede vacante non potest talem licentiam concedere, iuxta capitulum *de eo*, de temporibus ordinationum. Et præterea sufficiebat quod Episcopus titularis haberet hoc priuilegium ordinandi extra Tempora. Pro quo facit exemplum: nam cum subditus habet peccatum reservatum, à quo suus Prælati non potest illum absolueret: sufficit quod subditus adeat Nuncium, vel alium superiorem potentem absolueret, quamuis non habeat licentiam Prælati inferioris vt possit absolui. Et quando in hoc casu esset necessaria expressa licentia Capituli vt posset Ordines istos suscipere extra Tempora, satis constat Capitulum in hoc consensisse tacitè: quia cum daret licentiam illos assumendi extra Insulam, & Olysippone, non debuit velle, vt ille Olysippone maneret tam longo tempore expectans tot interstitia.

Secundò noto, quod licet Concilium Tridentinum dicat quod Episcopi non dispensent in irregularitate, si iam fuit deducta ad forum contentiosum: & irregularitas istius Clerici fuit posita in foro contentioso, vt videtur. Dico quod dato, & non concessio quod incurrerit irregularitatem deductam ad fo-

rum contentiosum, si iam indicium illud finitum est, potest Episcopus cum illo dispensare. Ita tenet Reginaldus *lib. 30. cap. 3. sect. 4. num. 29. §. Sextum*, ubi ponit hæc verba : *Si delictum fuit deductum ad forum contentiosum, sed indicium iam est finitum, probabile est posse Episcopum dispensare in irregularitate ex illo secuta.* Et idem absolute tenet Sanchez *lib. 2. Decalogi cap. 11. num. 21.* citans alios.

Et quoniam vim magnam fecimus in hoc casu, quod iste Clericus ordinatus sit, & celebrauerit bonâ fide, addendum censui, quod ut probetur quemlibet habuisse bonam fidem, non sunt necessarij testes, vel contestes : sed sufficit hoc probare per iuramentum rei modo assignato per glossam *capitis 2. de constit. in 6. de quo videatur Nauar. lib. 1. consiliorum, titulo de constitut. consilio 1.* Sub censura Ecclesiæ, & Doctorum.

C A S V S C I I I.

*De donatione facta Monasterio pro ingressu,
& professione Nouitiæ.*

Ingressa est quædam scemina Monasterium Monialium ad profitendum. Mater illius promisit Monasterio, quod in ingressu datura erat prandium omnibus Monialibus in communi, & singulis illarum, & singulis ancillis Monasterij daret certas, & singulas portiones, quæ omnia cum prandio æstimarentur in centum quinquaginta ducatis : & hæc de facto donauit in die ingressus. Promisit etiam eadem mater mille aureos pro die professionis. Ingressa Nouitia post tres
menses

menes inuenta est habens defectus naturales, & non esse idoneam ad profitendum: & hac de causa à conuentu eiecta exiuit.

Quæritur an Abbatissa, & Monasterium teneantur restituere matri Nouitiæ valorem illius prandij, & portionum, quas singulis Monialibus, & ancillis donauit? Et pro parte affirmatiua, quod hæc omnia restituere debeat Abbatissa matri Nouitiæ, videtur probari ex Concilio Tridentino *sess. 25. cap. 16. de regular.* vbi loquens Concilium de Nouitiis masculis, & feminis, qui egrediuntur ante professionem, sic ait: *Præcipit sancta Synodus, ut abeuntibus ante professionem omnia restituantur quæ sua erant.* Quo nihil clarius dici potest ad intentum. Secundò probatur ex eo quod dicit idem Concilium *eodem cap. in principio*: vbi ait, quod nulla donatio, vel renunciatio, vel obligatio facta per Nouitium valeat, nisi facta fuerit per duos menses proximos ante professionem, idque de licentia Episcopi: & quod talis donatio non sortiatur vllum effectum, nisi secutâ professione. Et in hoc casu, hæc Nouitia prædicta donauit ante professionem imò ante ingressum. Tertiò probatur, quia illud prandium, & portiones parua ceræ, & similia data singulis Monialibus, & ancillis in rigore, & propriè sunt propinæ, quæ olim dabantur in professione, & ingressu Monialium: at constat, quod ex mandato Papæ in hoc Regno Portugalliæ non possunt donari tales propinæ in ingressu, vel professione Monialium. Sic enim publicatum, & mandatum est in hoc Regno per illustrissimum D. Accarambonum Collectorem anno 1616. die 8. Iulij. Cùm ergo hæc donationes, & propinæ sint factæ contra legem Ecclesiæ, sequitur quod non possint acceptari; & quod acceptæ sint resti

restituendæ. Et dico esse legem Ecclesiæ, quia idem D. Collector in suo mandato refert dominum Papam sic illi mandasse per Breue particulare. Et ideo Collectoris mandatum non expirauit extincto eius officio. Quartò, quia istæ propinæ fuerunt datæ Monialibus sub conditione tacita, & virtuali, si professio fuisset subsequuta, vel vt professio haberet effectum: non enim parentes, vel consanguinei taliter donarent, si scirent professionem non sortituram effectum: ergo cum professio non sit secuta, nec conditio tacita sit sortita effectum, donatio non valuit, & proinde donata sunt restituenda. Quod verò in contractibus dari possit conditio inhærens contractui, & obligans, licet non apponatur, patet ex glossa *in cap. quemadmodum, de iureiurando, in verbo, conditio*: vbi citans quandam legem civilem, ponit exemplum dicens, quod in iuramento quod fit ab aliquibus de aliqua re donanda, subintelligitur conditio, si nuptiæ fuerint secutæ. Sic etiam videtur, quod in ista donatione facta pro ista Nouitia, fuit intelligenda conditio: si professio fuerit secuta. Cúmque professio non sit secuta, videtur donatio non habuisse effectum.

His tamen non obstantibus dico nec Abbâtissam, nec Monasterium non teneri restituere illa, de quibus est quæstio ista proposita. Quæ conclusio satis manebit probata ex solutione argumentorum adductorum proximè in contrarium. Et ante responsionem ad illa, suppono duo: primum est diem in qua Nouitia intrat Monasterium, esse nimis diuersam à die, in qua professionem emittit. Nam diuersæ cæremoniæ fiunt in die ingressus ab illis, quæ fiunt in die professionis: & maius festum fit in die professionis, quàm in die ingressus. Secundò suppono, quod Nouitius

uitius potest facere donationes in temporibus diuersis. Primò, quando donat ante ingressum Monasterij, sicut mater istius Nouitiæ fecit, donans illas portiones, ceu propinas antequam filia intrasset. Secundum tempus est quando Nouitius iam intrauit, & est in anno nouitiatus, facit donationem, vel renunciationem alicuius rei. Et de hoc secundo modo donandi, quando iam est in nouitiatu præcipit Concilium Trident. *sess. 25. cap. 16. de regular.* quod Nouitius non faciat donationem aliquam, nisi per duos menses proximè antecedentes professionem, & cum licentia Episcopi: & quod existens in eodem nouitiatu non faciat donationem conuentui, propter rationes ibi assignatas.

Hoc supposito, ad primum argumentum in oppositum adductum, respondeo, verba illa Tridentini iubentis Nouitio abeunti omnia restitui quæ antea donauerat, non esse intelligenda de illis rebus, quas donauit ante ingressum, vel in ingressu Ordinis: sed de illis quas donauit iam existens in nouitiatu. Probat hoc clarè ex verbis eiusdem Concilij *cit. cap.* In medio namque dicti capituli iubet Concilium ne parentes Nouitiæ quoadiu illa fuerit in nouitiatu (illius temporis, quo in nouitiatu steterit) donent aliquid conuentui quocumque titulo, neque conuentus possit recipere sub pœna excommunicationis incurrendæ à dantibus, & recipiente: excepto vestitu, & victu Nouitij: & statim immediatè dicit Concilium: *Vt abeuntibus ante professionem, omnia restituantur quæ erant sua.* Quibus verbis apparet clarè non loqui Concilium, nisi de rebus, quas Nouitius, vel parentes donarunt Monasterio, existente iam Nouitio intra Ordinem in nouitiatu: idque adhuc constat ex aliis

aliis verbis eiusdem Tridentini : *Temporis quo in probatione est.* Hæc verò Nouitia, de qua agimus, vel parentes illius, donarunt res illas suprà citatas, antequam illa Monasterium intraret. Verba autem legis applicanda sunt ad casum præsentem, de quo lex loquitur, non ad casum diuersum de quo lex non loquitur. Concilium verò ibi loquitur de Nouitio donante, quando iam existit in nouitiatu; non verò de donante ante ingressum Monasterij. Hæc responsio, & solutio clarescet magis ex solutione secundi argumenti sequentis, quod similitudinem habet cum isto.

Ad secundum argumentum dico, quod licet ista donatio non fuerit facta cum licentia Episcopi, nec intra duos proximos menses ante professionem, fuit tamen valida: quia illa verba Concilij, & illæ modificationes, & conditiones positæ à Concilio pro validitate donationis faciendæ à Nouitio, intelliguntur solum, seu requiruntur pro donatione facta Nouitio postquam iam est in nouitiatu, vt probauimus in solutione præteriti argumenti ex verbis eiusdem Concilij; non verò de donatione facta ante ingressum Monasterij. Sic declararunt illustrissimi Cardinales Romæ assistentes pro dubiis Tridentini declarandis. Hæc declaratio ponitur in libro nouo declarationum Cardinaliū impresso Antuerpiæ anno 1635. Qui liber *ad cit. cap. 16. Tridentini* inter declarationes Cardinalium ponit hæc verba : *Congregatio Concilij censuit, decretum Concilij Tridentini, cap. 16. sess. 25. de regularibus non habere locum in donationibus, & renunciationibus factis ante susceptionem habitus.* Quo nil clarius dici potuit ad intentum. Et licet aliqui Doctores oppositum sentiant, dicentes dictum decretum Tridentini intelligi etiam de donationibus Nouitij factis

ante ingressum Ordinis : nihilominus opinio contraria , quam citauimus , & tuemur , quod non sit intelligendum de donationibus factis ante ingressum , defenditur à Sanch. tom. 2. Decal. lib. 7. cap. 5. num. 9. & seqq. & citat pro illo decem Doctores graues , & recentiores. Quod verò attinet ad declarationem Cardinalium proximè cit. pro ista opinione , licet aliqui Doctores de illa dubitent , Vega tamen Minimus in sua summa , verbo Donatio casu 3. dicit quod Pater Passarellus , qui fuit Generalis illius Ordinis , impetrauit prædictam declarationem , sicut idem Pater Passarellus affirmat in sua summa citata per ipsum Vegam.

Ad tertium argumentum concedo has donationes , de quibus agimus , in substantia fuisse propinas : quo non obstante , dico Monasterium illas potuisse recipere , quamuis illæ prohibitæ fuerint per mandatum citatum Illustriss. D. Collectoris , cum decreto domini Papæ. Ratio est , quia illud mandatum siue lex D. Collectoris non fuit recepta , neque est in usu , vt patet ex praxi totius Regni : in quo de ordinario in ingressu , & professione Nouitiæ dantur propinæ. Est autem opinio communis , quod quando lex à principio non fuit recepta , vel si non est in usu , talis lex non obligat. Sic tenet Sà in Aphorism. verbo Lex n. 1. & infra eodem verbo Lex num. 19. dicit , quod consuetudine decem annorum tollitur lex , etiam Ecclesiastica , saltem à principio suæ publicationis : & ista lex prohibens propinas publicata fuit vigesimo abhinc anno : & vsque ad hoc tempus non est seruata vt plurimum. Et videtur huius opinionis Villalobos in sua sum. tom. 2. tract. 2. difficultate 19. num. 15. vbi ponit hæc verba : *Mas ya en dia de oi tienen costumbre legitima-*
mente

*mente prescripta en muchos monasterios de llenar propinas de entrada, y cera, y donde la ubiere poderanlo hazer. Sic ille. Et potest dari exemplum in simili. Nam Papa Clemens VIII. maiori rigore prohibuit omnibus Religiosis peculiari Bullâ, ne facerent donationes, vel largitiones munerum, nisi modo in Bulla præscripto. Et tamen ista Bulla hodie non est in usu, neque pœnæ illius obligant in conscientia in Hispania, teste Sanch. 7. lib. Decalogi cap. 19. num. 12. quia non est recepta, nec practicata. Quod autem lex quæ non est in usu, obliget, probat Sayro in Clavi Regia, libro 3. cap. 5. num. 14. ubi multa ad hoc congerit: & maximè citat quamdam legem iuris ciuilis, in quia sic dicitur: *Leges nulla alia de causa nos tenent, quam quod iudicio populi receptæ sunt.**

Ad quartum argumentum dico primò has propinas non fuisse datas monasterio cum intentione principali, vt professio daretur Nouitiæ: sed vt illi daretur ingressus in Ordine, qui, vt suprâ diximus, est nimis diuersus à professione. Dos quidem datur cum conditione, vel quasi contractu, vt detur professio: sed propinæ in ingressu dantur vt recipiantur Nouitiæ in Ordine. In hoc verò casu receptio ad habitum sortita est effectû, vt patet. Dos verò promissa de mille aureis pro die professionis, caruit effectû, neque vnquam fuit recepta. Si autem dos foret recepta, professione non secutâ, teneretur Monasterium dotem restituere, quia dos clarè fuit data intuitu professionis. Dictæ verò propinæ sunt datæ intuitu ingressûs, qui ingressus habuit effectum, & proinde non sunt restituendæ. Secundò ad idem quartum argumentum respondeo negando, quod in donatione istarum propinarum interuenerit conditio, *Dummodo professio fa-*

cienda sit. Et dico quod hîc non potuit interuenire iste contractus conditionalis, videlicet, hoc tibi do cum conditione, quod dabis mihi professionem. Nam hoc redoleret simoniam, dando scilicet rem temporalem pro spiritali professione, quæ emi non potest. Interuenit ergo hîc ex parentum parte Nouitiæ, quædam gratitudo, seu gratificatio liberalis, per quam voluerunt gratis gratificare Monialibus beneficium in recipienda Nouitia ad suam societatem. Quod verò donatur, vel recipitur gratis, & liberaliter, non obligat, vt aliquid danti restituatur, quamuis donans aliquam obligationem imposuisset solum ex æquitate. Cùm igitur parentes Nouitiæ propinas illas dederint ex liberalitate, & Monasterium fecerit id quod postulatum fuit, admittendo illam ad ingressum, non manet Monasterium obligatum ad restitutionem, licet professio non fuerit secuta. Imò addo, quod licet Monasterium se obligasset ad dandam illi professionem propter donationem illarum propinarum, & illa exiret eiecta propter culpas, vel ægritudines, adhuc Monasterium non teneretur illi exeunti restituere illas datas propinas, eo quod Monasterium ibi culpam non habuit, & per ipsum non sterit, nec poterat illi donare professionem cum præiudicio Religionis. Facit ad hoc exemplum adductum à Doctoribus in materia de iuramento, maxime Reginaldus *tom. 2. lib. 18. num. 51.* & alij dicentes, quod si ego iuraui Petro me seruaturum secretum in certa materia, & postea ex obseruatione secreti redundat præiudicium in aliquem tertium, vel in aliquam communitatem, in tali casu non teneor seruare iuramentum, nec secretum. Sic etiam in hoc casu quamuis Monasterium esset obligatum ad dandam
professio

professionem isti Nouitiæ, ob receptas propinas (quod nego) adhuc hodie non obligaretur ad illas restituendas; cum enim illa sit indigna ob mores, & ægritudinem proueniret magnum damnum, & iactura Religionis. Sub censura Ecclesiæ, & Doctorum.

C A S V S C I V.

De quodam Religioso adeunte suum Generalem, sine licentia sui Provincialis.

Quidam Religiosus fuit accusatus apud suum Prælatum localem de quodam delicto, videlicet quod manus violentas grauitè in alium Religiosum iniecerit; & factum est delictum in secreto. Prælatus fecit inquisitionem de delicto, quam inquisitionem adduxit ad dominum Collectorem, seu Nuncium Apostolicum. Qui dominus Collector videns ex tali inquisitione nihil probari contra Religiosum, commisit illi Prælato vt aliam inquisitionem faceret, & ad se adduceret, vt ipse D. Collector per suum Auditorem sententiam in casu pronunciaret. Fecit Prælatus secundam informationem contra Religiosum, illamque D. Collectori præsentauit: qui nihil adhuc in illa inueniens probatum contra dictum Religiosum, per sententiam publicam illum absoluit, & declarauit illum esse liberum à tali culpa, & à pœna pro tali culpa impositâ, illumque iussit redire ad suum conuentum. Interea dum hæc agerentur, & ante sententiam D. Collectoris, Prælatus istius Religiosi scripsit ad suum Generalem, illi exponens quod ob inquisitionem à se factam, prædictus Religiosus præ-

E. E. e 3 dictum

dictum delictum commiserit. Quod videns Generalis misit litteras suas patentes, per quas iubebat dictum Religiosum exulare à dicto suo conuentu, & in alium transferri, dicens quod ob prædictum delictum hanc illi pœnam iniungebat. Post hoc publicata est sententia domini Collectoris absoluentis illum ab illa culpa, & pœna: iubentisque illum reuerti ad suum pristinum conuentum. Ad quem conuentum ille rediens, Prælatus illius conuentus noluit illum admittere, sed illi intimauit, vt iret ad alium conuentum, ad quem P. Generalis illum relegabat.

Quæritur primò, an Prælatus iste inferior possit, vel debeat non exequi mandatum Generalis transferebat illum ad alium conuentum: & possit dictum Religiosum sinere pacificè habitare in suo priori conuentu?

Secundò quæritur, an dictus Religiosus cum bona conscientia possit non obedire prædicto mandato Generalis.

Tertiò quæritur, an dato quod Prælatus inferior non admittat hunc Religiosum ad habitandum in priori conuentu, neque ille velit illi dare licentiam vt vadat ad Generalem pro recursu obtinendo: neque D. Collector velit in hoc particulari mutationis conuentus se ingerere. Quæritur inquam, an his omnibus concurrentibus possit iste Religiosus cum tuta conscientia, & sine crimine apostasiæ ad Generalem ire pro recursu obtinendo? Et declaro quod iste Religiosus, est Religiosus in Ordine, in quo singuli Religiosi habent filiationem per professionem, & inde particularia emolumenta participant, quæ non habent illi Religiosi, apud quos non est filiatio per professionem.

Responsio.

Responsio.

Dico primò, quod R. Pater Prouincialis, vel quicumque alius Prælatus Generali inferior, hodie non potest exequi sententiam Patris Generalis de transferrando hoc Religioso ad alium conuentum: sed debet desistere, & Patrem Generalem admonere de innocentia istius Religiosi per sententiam declarata: & quod Pater Generalis non potest illum punire prædictâ pœnâ. Et quod Prælatus inferior debeat abstinere ab executione mandati, probatur expressè *ex cap. si quando, de rescriptis*: in quo Papa scribit cuidam Archiepiscopo, quod si aliquando Papa illi mandet, vt aliquid faciat, ipse Archiepiscopus mandatum reuerenter adimpleat: vel si habet causam ob quam non deceat Papæ mandatum impleri, ad ipsum Papam rescribat causas non implendi exponens. Et addit Papa hæc verba: *Quia patienter sustinebimus si non feceris quod nobis praua insinuatione suggestum est.* Ecce ibi Papa mandat Episcopo inferiori, vt si causam habuerit, ob quam non deceat impleri mandatum Papæ, tale mandatum non impleat, sed per scriptum Papæ exponat causam ob quam mandatum non implet. Et glossa eiusdem Capituli, in verbo *quia patienter*, citat duos textus iuris canonici, in quibus dicitur, quod non tenemus Prælati mandatum admittere si causa reddatur. At in isto casu constat dari causam urgentem ob quam non debeat Patris Generalis mandatum admitti. Nam cum ille hunc Religiosum mutet ad alium conuentum in pœnam delicti sibi falsò impositi, & à tali delicto sit liber per sententiam domini Collectoris, puniretur Religiosus sine culpa, si Patris Generalis mandatum impleteretur: ergo

Prælatus inferior debet abstinere ab executione, & Generalem admonere. Eodémque modo P. Generalis admonitus tenetur desistere à tali mandato iuxta dicta in prædicto capitulo *si quando*, vbi Papa dicit patienter se latutum si non detur executioni id quod præceperat falsâ insinuatione informatus; sic enim in hoc casu debet Generalis patienter ferre non transferri hunc Religiosum ad alium conuentum, sicut mandauerat falsâ informatione informatus. Secundò, principaliter probatur conclusio, ex regula iuris in 6. vbi dicitur quod sine culpa non datur pœna. At constat hunc Religiosum non habere culpam sibi impositam: ergo pro illa non debet habere pœnam à Generali mandatam. Tertiò, quia lex fundata in præsumptione non obligat, si cessat præsumptio, vt docent communiter Doctores, maximè Rodriguez *tomo 3. qq. 9. 54. art. 6.* citans Nauarrum, & alios. Et Reginaldus *tomo 1. lib. 13. num. 177. & seqq.* Ergo etiam mandatum P. Generalis, quod est quasi quædam lex particularis, cessabit in hoc casu, cum cessauerit præsumptio culpæ huic Religioso impositæ. Quartò, quando aliquis iudex absoluit aliquem reum ab aliquo delicto, & declarat illum fuisse immunem ab illo, per consequens absoluit etiam illum à pœna debita tali delicto: sed D. Collector per sententiam absoluit hunc Religiosum à culpa ista sibi imposita, addens quod etiam illum absoluebat à quauis pœna ob illam imponenda: ergo non potest à Patre Generali aliquâ pœnâ ea de causa puniri.

Dico secundò prædictum Religiosum tutâ conscientia posse non obedire Patri Generali, vel cuius inferiori Prælato obliganti illum adire alium conuentum. Hæc satis constat ex præcedentibus: cum enim probatur

probatum sit non posse Generalem, vel alium Prælatum hunc Religiosum punire propter hanc culpam, de qua est absolutus per sententiam: constat etiam quod non tenetur obedire Prælatis obligantibus illum ad tolerandam pœnam, quam volunt infligere propter culpam falsam. Si enim Prælatus non potest præcipere, non tenetur subditus obedire.

Dico tertio. In casu, quo Prælatus inferior nolit desistere ab executione pœnæ exilij à P. Generali decreta: nec D. Collector in illa velit se intromittere, & Prælatus inferior illi denegat licentiam adeundi P. Generalem, potest hic Religiosus tutâ conscientiâ, & sine culpa apostasiæ adire P. Generalem, ad illum informandum, & recursum impetrandum. Sic expressè docet Nauar. *in consilijs, tit. de sent. & re iudic. consilio 1.* citans Panorm. Felin. & Decium. Et idem Nauar. *comment. 2. de regular. num. 61.* quem sequuntur communiter Doctores, maximè Rodrig. *tomo 1. qq. Regular. q. 3. art. 3.* citans Nauarrum, & Banhez. Idem tenet Sayro *in Clavi Regia, lib. 12. cap. 17. num. 4.* & Sanch. *lib. 6. Decalogi cap. 8. num. 17.* & omnino Diana *tract. 2. de dubijs Regular. resolut. 56.* & alij communiter. Huius ratio est iuxta Nauarrum, quia Religiosus vexatus grauitè, & iniustè à Prælato inferiori, & nolente inferiori desistere, si caret alio remedio, eundo ad superiorem pro remedio quærendo, per illam ar-reptionem itineris censetur appellare ad superiorem. Potest enim appellatio fieri verbo, vt dicendo, *appello*, & potest etiam appellatio fieri facto, eundo scilicet ad superiorem. Remedium verò appellationis non est denegandum Religiosis: de quo ego testificari possum. Nam paucis abhinc annis, Religiosus certæ Religionis in hoc Regno Portugalliæ me consuluit,

qui à Prælato suo grauatus erat in re graui, nec desistere volebat à grauamine, nec licentiam dare adeundi Superiores: cui ego respondi suprà citatos Doctores Nauar. Sanch. & Rodriguez asserere quod suprà dixi. Cui dictus Religiosus fidens Romam adiuit pro remedio quærendo nullâ obtentâ licentiâ adeundi à Prælati inferioribus. Et Romæ præsentatus officialibus Curix, non est iudicatus, nec reputatus apostata. Et hoc mihi affirmauit quidam officialis Curix D. Collectoris istius Regni consanguineus eiusdem Religiosi. At constat, quod hic Religiosus, de quo agitur, est notabiliter grauatus in re graui, eo quod illum velint punire sine culpa, mutando ad alium conuentum à suo conuentu, in quo habet filiationem: & præterea si vadat ad alium conuentum tanquam punitus à generali, perpetuò dicetur de illo quod commiserit impositum delictum, & sic viuet in perpetua infamia: ergo sic notabiliter grauatus, & non habens aliud remedium, poterit per viam appellationis adire Generalem, idque tutâ conscientîâ, & sine labe apostasiæ. Sub censura Ecclesiæ, & Doctorum.

C A S V S C V.

*De quadam puella præsentata à patrono
ut fiat Monialis.*

Patronus quidam monasterij Monialium, habens ius ad præsentandum in illo certas puellas, præsentauit prædicto Monasterio certam scæminam ut reciperetur ad habitum. Aliquæ Religiosæ non amicæ præsentatæ nolunt illi dare suffragium ad ingressum.

Quæsitum

Quæsitum fuit primò, utrùm obligatio sit prius recipere suffragia conuentus ad recipiendam illam quam patronus præsentat. An verò obligentur Moniales ad recipiendam illam, quam patronus præsentat, non receptis, nec expectatis votis, seu suffragiis Monialium.

Secundò quæsitum fuit, an supposito quod suffragia Monialium audita sunt, & maior pars Monialium suffragium neget: an possit Prælatus quærere à Monialibus singularibus, ob quas causas suffragium ad ingressum denegauerint.

Tertiò, si Prælatus inuenerit causam ob quam suffragia negata sunt, fuisse friuolam, & iniustam, an possit dictam puellam ad habitum recipere, & Moniales obligare, vt illam ad habitum, & professionem admittant?

Responsio.

Ad primum quæsitum dico, conuentum non tene-
ri admittere Nouitiam præsentatam à patrono sine
suffragiis Monialium prius auditis, sed posse, ac de-
bere audire suffragia Monialium pro ingressu, & pro
facienda professione. Probat, quia ius quod habet
patronus ad præsentandam feminam, non tollit ius,
quod habet conuentus examinandi illam per suffra-
gia conuentus, an sit idonea, & habeat partes requi-
sitæ ad seruitium conuentus, poterit enim contingere,
vt patronus præsentet vnā valde infirmam, vel
inhonestam, vel infamem, quod vergat in detrimen-
tum conuentus: & proinde necesse sit Monialium vo-
ta audire quæ zelent bonum commune conuentus.
Hoc probatur argumento omnino à simili sumpto à
Conci

Concilio Tridentino *sess. 25. cap. 9. de reformat.* ubi Concilium dicit, quod non obstante quod patronus præsentet Episcopo Clericum aliquem ut illi conferat beneficium, Episcopus possit ac debeat illum prius examinare, illóque reperto insufficienti, eundem reprobet. Qui est casus omnino similis: nam sicut patronus conuentus habet ius præsentandi Nouitiam: ita patronus beneficij habet ius ad præsentandum Clericum pro illo beneficio: ergo, sicut Episcopus potest reprobare Clericum non idoneum ad beneficium: ita Monasterium potest reprobare Nouitiam non idoneam præsentatam à patrono. Argumentum verò hoc à simili, est valde efficax, ut habetur in *cap. quiescit 2. q. 6. & cap. multi 2. q. 1.* Imò mihi casus iste in praxi oblatus est. Cùm enim ego essem Prouincialis meæ prouinciæ, quædam nobilis femina patrona cuiusdam conuentus Monialium mihi præsentauit puellam ut reciperetur in illo conuentu ad habitum, quam ego nolui recipere, ea sola de causa, quod esset clarè descendens ab utroque parente descendentibus à Iudæis. Patrona per petitionem querelam de me fecit domino tunc Collectori, qui mandans ut ego responderem quare illam noluerim recipere: ego respondi quod non erat idonea ob sanguinem maculatum, posséque me non idoneam reprobare. Dominus verò Collector meo responso quietus non me amplius obligauit ad illam recipiendam.

Dico secundò, si aliquæ Moniales publicè resistant, vel negent suffragium pro recipienda ista Nouitia, poterit Prouincialis singulas obligare ut dicant causas ob quas illi suffragium negauerint: & cognito quod sine vlla causa, sed ex malitia suffragium negarunt, poterit

poterit nihilominus illam ad habitum recipere. Hanc conclusionem in terminis apud nullum Doctorem inueni. Ego tamen illam clarè deduco ex iis, quæ Doctores dicunt. Et probatio præcipua est, quia vt ego dixi in primo meo tomo *Dubiorum Regularium*, verbo, Nouitij annus num. 54. Religiosus negans suffragium Nouitio idoneo, & benemerito, peccat mortaliter, vt asserunt graues Doctores recentiores ibi à me citati, & vltra illos tenet Suarez tom. 3. de Relig. lib. 4. de voto c. 3. num. 7. cuius ratio est, quia Nouitius facit quasi contractum cum conuentu, & acceptatur à conuentu, vt si Nouitius sufficiens sit, & culpa careat, acceptabitur ad professionem, & ex hoc quasi contractu tenetur conuentus professionem dare Nouitio idoneo, & habet ius ad professionem. Quia verò Religiosus negans suffragium Nouitio idoneo illi tollit hoc ius, dicunt citati Doctores, quod peccat mortaliter. Eodem modo ista Nouitia præsentata à patrono, si non habet culpas, & est idonea, habet ius vt recipiatur ad habitum, eo quod patronus habet ius præsentandi illam: ergo peccabit mortaliter Monialis, quæ huic puellæ idoneæ negauerit suffragium ad receptionem habitus, quia per hoc tollit ab illa ius quod habet, vt recipiatur. Et in pœnam huius suffragij indebitè negati, poterit Prælatus per modum restitutionis illam ad habitum recipere. Secundò, principaliter hoc probò à simili, nam in cap. *Pastoralis*, iubet Papa puniri certum Episcopum, qui noluit confirmare Clericum idoneum præsentatum à patrono. Et pœna imposita tali Episcopo fuit, vt Clerico sic reprobato donaret aliud beneficium. Eodem modo, vel suo modo, Monialis negans suffragium Nouitiæ idoneæ præsentatæ à patrono, poterit puniri, vel obligari, vt eidem

dem Nouitiæ idoneæ det suffragium in alia occasione.

Dico tertio : Quod si Moniales malè affectæ perseuerauerint in suo rancore , & tempore professionis maior pars conuentus suffragia neget isti Nouitiæ benemeritæ , idque ex odio , idque constiterit ex probatione clara , poterit Prouincialis illam admittere ad professionem cum solis suffragiis aliarum Monialium sine odio suffragantium , etiam si illæ sint pauciores numero , neque perueniant ad medietatem conuentus. Antequam hoc probem solitis probationibus adduco exemplum ad hoc singulare cuiusdam casus , qui contigit in mea Prouincia , & fuit talis. In quodam conuentu recepta sunt suffragia ad receptionem cuiusdam Nouitij ad professionem. Et cum Nouitius esset idoneus , nec haberet defectus , & maior pars conuentus illi suffragia negauit : & proinde Nouitius fuit expulsus. Nouitius sic expulsus adiuit Patrem Generalem , illique suam causam exposuit. Qui Pater Generalis valdè pius , & rectus , destinauit quemdam Patrem pium , & doctum , cui mandauit vt iret ad prædictum conuentum , à quo expulsus fuerat Nouitius , ipsūque conuentum visiteret , obligans singulos sub iuramento , vt indicarent culpas Nouitij , & causas expulsionis. Si verò illi constaret quod maleuolè , & sine culpis illi fuerint negata suffragia , prædictum Nouitium , nullo alio requisito ad professionem admitteret. Piè quidem , & satis iustè. Neque contra hoc facit opinio communis recentiorum dicentium non posse Prælatum admittere ad professionem Nouitium , cui maior pars conuentus negauit suffragium. Hæc enim opinio vera est quando maior pars conuentus iustè , & ob defectus suffragia denegauit. Se-

cus si maior pars conuentus iniustè, & maleuolè suffragia denegaret : tunc enim credo posse Prælatum cum illa minori parte conuentus, quæ sanior est, dictum Nouitium ad professionem admittere. Constat hoc exemplo ferè simili, quod habetur in capite *Ecclesia vestra*, de election. in quo Papa de duobus oppositis ad Episcopatum vacantem, quorum vnus habuit pro se 17. suffragia electorum, alius habuit quatuordecim, confirmauit Papa illum qui habuit 14. suffragia, relicto illo qui habuit 17. cuius causa fuit, quia licet maior numerus suffragatus fuerit illi qui habuit 17. suffragia, erant tamen illi 17. suffragatores impediti, & defectuosi, & minus perfecti quàm illi quatuordecim : & notat ibi glossa, quod notetur, ad electionem non semper attendi maiorem numerum eligentium, sed numerum saniores electorum. Et in cap. *Quia propter*, de electione, dicitur, quod eligatur ille in quem maior, & sanior pars consenserit. Quod multum facit ad casum præsentem. Nam licet maior numerus Monialium huic Nouitiæ suffragium negauerit ; iste tamen numerus non est sanior, quia suffragium negauerunt iniustè, sine causa & maleuolè, & proinde non videtur attendendus. Et proinde credo quod si admittatur ad professionem cum

solis suffragiis minoris partis, sed sanioris

conuentus, professio futura sit valida,

iuxta duos textus in exem-

plum adductos.

CASVS

CASVS CVI.

*De muliere intrante clausuram Monialium
pro vitanda morte.*

QUædam mulier coniugata commisit adulterium, propter quod maritus cum ministris iustitiæ illam quærebat ad mortem inferendam. Mulier metu mortis adiuit Monasterium Monialium, & cum porta clausuræ casu esset aperta, ingressa est parumper: & resistentibus Monialibus, illa clamans obnixè petiit ut sibi misererentur, quia erat in periculo mortis claro, eo quod maritus cum ministris iustitiæ illam à tergo insequiebantur, & quærebant ad mortem. Misertæ Moniales tanti periculi, illam introduxerunt ad clausuram. Sed statim consuluerunt suum Prælatum, qui erat Episcopus ordinarius existens in eadem vrbe, illique casum narrauerunt. Episcopus, seu Capitulum Sede vacante, resoluit, & mandauit, ut Moniales intra clausuram illam conseruarent, neque vllò modo illam foràs eiicerent. Peruenit hoc ad aures D. Collectoris Apostolici in eadem vrbe commorantis, qui statim monuit Capitulum prædictum, se Collectorem habere epistolam Missam sibi à quodâ Cardinale Romæ in qua sibi dicebat à domino Papa præsentem casum commissum fuisse Congregationi Cardinalium, qui vnanimiter resolverunt prædictam mulierem incurrissè excommunicationem: eandemque incurrissè Prælatam, cæterasque Moniales, quæ prædicto ingressui interfuerunt, & patrocinatæ sunt. Et extare hac de re prædictam declarationem, constat ex Bullario

Bullario Rodriguez fol. 1200. vbi inter Bullas D. Papæ Clementis VIII. adducens aliquas declarationes Cardinalium factas tempore prædicti Papæ, ponit hanc sequentem missam ad Episcopum Salmanticensem anno 1604. cuius hæc sunt verba : *Congregatio Concilij respondit non licere ullo modo Episcopis, vel permittere, vel licentiam concedere mulieribus, ut ex causis supra narratis (erat autem unus ex casibus ab Episcopo antea propositus apud Cardinales, lites matrimoniales adulteriorum, ac dissensionum inter viros, & uxores) Monialium monasteria ingrediantur : imò ingredienties incidere in excommunicationem. Quod si aliquis casus inciderit propter quem expedire videatur concedere talem licentiam, eam omnino obtinendam esse à Sede Apostolica.* Sic ibi.

Ob quam admonitionem factam Capitulo à D. Collectore, prædictum Capitulum Sede vacante præcepit Prælatæ dicti Monasterij, vt prædictam mulierem adulteram à Monasterio statim eiicerent.

E contra verò in libro declarationum Cardinalium nouissimè impresso Antuerpiæ anno 1633. fol. 522. post medium, inter declarationes Cardinalium ad cap. 5. sess. 25. de regular. ponuntur hæc tres Cardinalium declarationes. Prima: *Quod mulier coniugata, si sit in Monasterio Monialium, & constitit quod si inde exierit, versabitur in periculo mortis, in Monasterio relinqui debet. Sed siue ancillis, &c.*

Secunda : *Mulier quæ venit in suspicionem adulterij apud maritum, & ob id timet ne ab eo vis aliqua inferatur, permitti debet vt Monasterium ingreditur Monialium, si modò constitutiones Monasterij non repugnent, &c.*

Tertia sic habet : *Insuper mulieres quæ sunt in discordia cum maritis, & eorum sequitiam timent, si sunt extra culpam,*

culpam, quandiu iustam timendi causam habuerint, debent si sunt in Monasterijs tolerari.

Ecce vides duas declarationes Cardinalium omnino contrarias, imò & contradictorias: & vt desinas mirari, in eodem libro declarationum Cardinalium *ad cap. 16. sess. 25. de regular. fol. 558. in principio*, circa hoc dubium, videlicet, an Monialis, quæ dubitans de suo baptismo se fecit denuo baptizari, & iterum debebat professionem emittere, deberet expectare alium annum nouitiatus: an verò statim post iteratum baptismum posset professionem emittere? Circa hoc inquam quæsitum, duæ declarationes Cardinalium omnino contrariæ ibi citantur *num. 8. & 9.* quarum prima dicit debere illam emittere secundam professionem statim post baptismum, non expectato alio anno. Secunda declaratio statim *num. 9.* dicit, debere illam professionem emittere expectato, & peracto alio anno nouitiatus. Quid ergo dicemus ad hæc? Nunquid illi domini Cardinales notandi sunt de obliuione, vel de ignorantia? Absit. Ego in *meo secundo tomo Dubiorum Regularium, verbo Clausura Monialium. fol. 26. col. 1.* aliquid dixi de ista contrarietate declarationum Cardinalium pro isto casu. Et dixi ibi securius esse sequi partem negatiuam missam ad Episcopum Salmanticensem, non posse videlicet recipi intra clausuram Monialium mulierem positam in periculo vitæ ob adulterium. Postea tamen re maturius consideratâ, & quia casus grauissimus est, & potest euenire, visum mihi fuit, aliquid amplius in prædicto casu adnotare: omnia tamen in eo dicenda, subiicio pedibus, ac iudicio sanctæ Romanæ Ecclesiæ, contra quam nec volo sapere, neque quidquam facere.

Dico

Dico ergo primò. Cùm de hoc visæ sint duæ declarationes Cardinalium oppositæ, altera dicens posse admitti intra clausuram mulierem suspectam de adulterio, & positam in periculo vitæ; altera declaratio quæ illud omnino negat. Is qui in praxi quamvis istarum declarationum secutus fuerit, vel consulerit, non peccabit: probatur, quia ambæ declarationes citantur tanquam declarationes Cardinalium. Et vtraque illarum habet pro se Doctores, & citatur in libris Catholicis, & modernis siue recentioribus: ergo non erit condemnandus qui alteram secutus fuerit, alterâ reiectâ. Confirmatur hoc exemplo claro. Nam quando de aliqua quæstione sunt duæ opiniones æquè probabiles, licitè, ac sine scrupulo potest quis alteram illarum sequi, relictâ alterâ contrariâ. Sed in hoc casu dantur duæ declarationes Cardinalium, quæ sunt duæ opiniones diuersorum Cardinalium (non enim tales declarationes sunt lex, neque habent vim legis, vt omnes recentiores fatentur;) ergo qui ex his duabus declarationibus contrariis alteram secutus fuerit, neglectâ alterâ contrariâ, non erit condemnandus, neque operabitur contra conscientiam. Hoc solum aduerto, quod si constaret quænam ex his duabus declarationibus vltimo, seu posteriori loco resoluta fuerit, seu emanauerit, ista vltima, & non prima tenenda, & practicanda erit. Idque probatur ex eo quod Doctores dicunt in materia de legibus, quod scilicet lex posterior si est contraria legi priori, derogat priori. In hoc verò casu non constat quænam ex istis duabus declarationibus fuerit posterior. In Bullario enim Rodriguez de illa Salmanticensi Episcopo missa dicitur quod data fuerit anno 1604. de alia verò opposita in libro

declarationum citato , non dicitur quando data fuerit.

Dico secundò. Conformius est iuri naturali , & iuri positiuo , & dictis grauiorum Doctorum asserere, quod prædicta mulier cuius vita ob adulterium est in claro , & proximo periculo mortis , possit admitti ac tolerari intra clausuram Monialium , quando non datur aliqua occasio euadendi periculum : & proinde secundam declarationem Cardinalium , vel potius tres declarationes suprâ citatas , posse ac deberi teneri , & practicari. Hoc satis vt puto probabitur ex sequentibus. Et imprimis , quod hoc sit conformius iuri naturali : probatur , quia de iure naturali est quod vnusquisque propriam vitam conseruet , etiam non seruâtâ lege purè positiuâ contrariâ. Vnde extremè egens pane , potest surripere de pane proximi , non obstante lege de non furando , idque ob conseruationem vitæ propriæ. Item vnusquisque potest occidere inuasorem suum pro conseruanda propria vita , idque non obstante lege de non occidendo : & alia multa ad hoc exempla possent adduci. Cùm ergo mulier , de qua loquimur , insequentibus à tergo marito , & ministris iustitiæ , sit in claro & proximo periculo vitæ , neque habeat aliud remedium euadendi , licitè poterit admitti intra clausuram Monialium , non obstante lege positiuâ Ecclesiæ de non intranda clausura. Nam hæc lex Ecclesiæ prohibens ingressum clausuræ Monialium , est lex solum positiuâ , & non est de iure naturali , vt clarè , & efficaciter probat Bonacina *tomo 1. q. 1. de clausura Monialium , puncto 3.* Addo quod ex ingressu feminae in clausuram Monialium non periclitatur castitas Monialium , qui est finis legis prohibentis talem clausuram. Secundò principa-

liter

liter hoc probatur ex illa Maxima solemnī, & receptissima, quæ dicit: *Necessitas non habet legem*, quæ Maxima habetur in tribus vel quatuor capitibus iuris canonici, videlicet cap. *querelam*, de iureiurando, ubi glossa in verbo *non necessitate*, citat quatuor textus iuris canonici, & vnum iuris ciuīlis. Et ponit ibidem glossa hoc exemplum. Quidam Clericus sub iuramento promiserat se tali die soluturum certam pensionem: tali die adueniente Clericus non soluit pressus magna necessitate: iudicatum fuit quod non fuerit periurus, quia necessitas non habet legem. Ad idem probandum, quod scilicet necessitas non habet legem. Sebastianus Medices in suo libro de reg. iuris, in regula 2. num. 81. citat quatuor textus vtriusque iuris, & quinque graues Doctores Iuristas. At ista mulier de qua loquimur, cum circumstantiis narratis, habet necessitatem extremam conseruandi vitam, vt patet: ergo non habet legem, id est, non est subiecta legi clausuræ. Hæ duæ rationes videntur conuincere, non peccare hanc feminam, neque illam admittentes ad clausuram.

Fortius adhuc est argumentum, & exemplum adductum à Patre Sanchez. Qui lib. 6. Decalogi cap. 16. num. 59. loquens de casu difficiliore, an scilicet malefactor fugiens insequentes ministros iustitiæ, & inueniens apertam portam Monasterij Monialium, possit sine peccato dictam clausuram intrare? Respondet Sanchez posse licitè intrare: verba Sanchez volui adducere, quæ talia sunt: *At malefactor ille in eo discrimine constitutus non peccaret ingrediendo, si fores apertas reperiret: tum quia presentaneum periculum ansam maturioris deliberationis præcipit. Tum quia ius tuendi vitam, vel graue corporis damnum, vt si pœnâ mortis.*

aut flagellorum, aut triremium plectendus esset, ipsum excusat. Sic ille. At in hoc exemplo adducto à Sanchez duo maiora, ac duriora considero, quàm in nostro casu. Nam Sanchez id admittit in homine masculino intrante in Monasterium Monialium, ubi posset periclitari castitas Monialium. Nos verò loquimur de ingressu feminæ in clausuram Monialium, ex quo ingressu castitas non potest periclitari. Secundò, considero, quod Sanchez admittit talem ingressum malefactoris in clausuram etiam ob vitandam pœnam flagellorum, vel triremium. Hæc autem mulier erat in claro, & proximo periculo admittendi vitam, quod maius est. Quo verò ad Doctores, qui istius opinionis sunt defensores, potest pro illa citari Sanchez proximè citato loco, qui cum ibi aliam durioram defendat, ut vidimus, proculdubio hanc etiam defendit. Eandem in terminis docet Azor *tom. 1. lib. 13. cap. 8. ques. 4.* dicens sic declarasse Cardinales. Eandem tenent Nauar. Zerola, Campanill. Barbosa, & Miranda citati à Bonacina *tom. 1. q. 4. de clausura puncto 4. num. 17.*

Firmantur adhuc illa, quæ hactenus diximus per illud quod recentiores Theologi dicunt, videlicet declarationes Cardinalium non esse leges, neque esse peccatum mortale agere contra illas, si in oppositum dentur rationes probabiles. Hoc asserit imprimis Rodriguez *tom. 1. qq. q. 11. art. 2.* ubi duo dicit. Primum est, declarationes Cardinalium, quæ ad instantiam quorundam fiunt, non obligare in foro interiori, neque exteriori: & ita sentire viros doctissimos. Secundum est, neminem damnandum esse in iudicio propter has declarationes, si opposita sententia idoneo, & iuridico fundamento fulcita sit. Opinio verò, seu potius

tius declaratio Cardinalium secundo loco pro nobis adducta, habet firmissimum, seu firmissima fundamenta, ut vidimus. Idem etiam affirmat Bonacina *tomo 2. de leg. disp. 1. q. 1. puncto 8. num. 4.* ubi citans Molfezium, & alios, postquam dixit, prædictas declarationes non obligare tanquam leges, ait aliquos Doctores aliquibus opinionibus adhæsisse contra Cardinalium declarationes.

Iam ergo ex dictis constat responsio ad principale quæsitum positum in principio; dicendum est enim Prælatam istius Monasterij & Moniales illius non incurrisse ullam censuram admittendo hanc fœminam intra clausuram propter clarum periculum vitæ illius, & propter manifestam necessitatem, maximè cum consuluerint suum Prælatum, de cuius licentia illam retinuerunt, & proinde fecerunt bonâ fide.

C A S V S C V I I.

*An Episcopus possit obligare Recollectos,
seu Capucinos ut vadant ad
processiones.*

EPiscopus quidam vocauit ad processionem Corporis Christi quemdam conuentum Diui Francisci Recollectum, vulgo, *Capucho*, qui conuentus subiectus erat cuidam prouinciæ Ordinjs D. Francisci: quæ prouincia non est recollecta Capucha, sed vadit ad processiones vocante Episcopo. Quæsitum fuit an possit Episcopus hunc conuentum Recollectum, seu Capuchum obligare ut vadat ad processiones?

Et videtur quod possit. Primò, quia prædictus conuentus non est prouincia Recollecta, siue Capucha, sed est subiectus prouinciæ non Capuchæ, quæ vadit ad processiones: & proinde sicut ceteri conuentus eiusdem prouinciæ vadunt ad processiones; ita iste poterit obligari. Secundò probatur, quia in Hispania sunt aliquæ prouinciæ Ordinis D. Francisci, quæ sunt Recollectæ, & Capuchæ, & tamen (vt refer-
tur) vadunt ad processiones publicas, quando ab Episcopo vocantur.

Responsio.

Hoc non obstante, credo quod non possit Episcopus prædictum conuentum obligare vt vadat ad processiones. Pro quo suppono, quod quando Concilium Tridentinum *sess. 25. c. 13. de regular.* dicit posse Episcopum obligare Religiosos vt vadant ad processiones, excipit statim illos qui viuunt in strictiori clausura. Et iste conuentus, de quo agitur, viuunt in strictiori clausura, sicut viuunt illi conuentus prouinciarum Recollectarum quæ non vadunt ad processiones. Quo supposito, sic proba intentum. Domini Cardinales Romæ assistentes pro explicandis dubiis Concilij Tridentini, interroganti, qui essent Religiosi, qui dicendi sint viuere in strictiori clausura, responderunt in quadam sua declaratione, esse illos, qui neque cantant in choro, neque vadunt ad mortuos sepeliendos. At iste conuentus Capuchus, de quo agitur, habet hæc duo: non cantat in choro, neque vadit ad mortuos sepeliendos: ergo non potest obligari ad processiones. Hanc declarationem Cardinalium adducit Capucinus Sorbo ad compendium Mendicantium, verbo, *processiones,*

*cessiones, §. Ac tenentur cantare, ubi sic ait: Declaravit tamen sacra Congregatio Cardinalium super hoc decretum Concilij, hoc debere intelligi dummodo processiones sint eius generis, quod Bulla supradicta comprehendit. Et dummodo regulares non sint ex illis conuentibus, qui Collectanei nuncupantur, qui in eadem Bulla excipiuntur; videlicet in quibus fratres arctiori clausura degunt, ita ut nec in choro cantent, nec ad mortuos accedant. Sic ibi Capucinus ex declaratione Cardinalium. Cum ergo iste conuentus, de quo agitur, hæc duo habeat, quod non cantat in choro, nec ad mortuos accedit, sequitur quod non possit obligari ut ad processiones accedat. Secundò principaliter idem probatur, nam iste conuentus est in consuetudine, ac possessione à principio suæ foundationis, ut ad processiones non obligetur: cum ergo consuetudo faciat legem, vel declarat legem, hæc sola consuetudo illos à processionibus liberabit. Antequam adducam textus dicentes quod consuetudo facit legem, suppono quod datur consuetudo positiua, & negatiua, ut tradit Suarez *tomo de legibus lib. 7. c. 5. num. 14.* dicens quod consuetudo positiua est illa quæ consistit in exercitio alicuius actus, seu operis agendi. Consuetudo verò negatiua est illa quæ consistit in abstinendo ab aliquo opere, & ambæ istæ sunt veræ consuetudines. Hoc supposito ista consuetudo negatiua, in qua est iste conuentus non eundi ad processiones ab initio suæ foundationis, eum eximit ab onere illas adeundi: nam consuetudo potest inducere legem, ut habetur in cap. *Consuetudo*, dist. 1. & cap. *In his*, dist. 11. & præterea consuetudo interpretatur legem, ut habetur cap. *Cum dilectus*, de consuetudine. De quo vide Bonacinam *tomo 2. tit. de leg. disput. 1. q. 1. puncto ultimo §. 3.* Cum ergo iste conuentus sit in consue-*

tudine negatiua à sua fundatione non accedendi ad processiones sequitur quod Ordinarius illum non possit ad illas obligare. Tertiò potest probari à simili: nam maior obligatio est vt conuentus soluat quartam partem funeralium, quàm vt vadat ad processiones: vel saltem est eadem obligatio vtroque, cum vtrumque sit præceptum Religiosis per Concilium Tridentinum. Et præterea solutio quartæ est antiquior in Ecclesia, cap. *Dudum*, de sepult. & per alios textus ibi à glossa citatos: adire verò processiones quoad Religiosos est recens ex Tridentino. Et præterea solutio quartæ funeralis est debita Parocho tanquam præmium sui laboris, quorum neutrum cernitur in materia processionum. At constat ex Tridentino non teneri conuentum Religiosorum ad soluendam quartam funeralem, si sit in consuetudine non soluendi per quadraginta annos, vt patet in Tridentino *sess. 25. cap. 13. de reformat.* ergo à simili, cum iste conuentus ab annis 40. imò in sua fundatione ad processiones non accedat, sequitur quod ad illas non possit obligari. Et hæc conclusio magis probabitur ex dicendis in solutione argumentorum.

Ad primum igitur argumentum concedo quod ex hoc conuentu, de quo agitur, transeunt Religiosi ad alios conuentus eiusdem prouinciæ, qui vadunt ad processiones: sed nego consequentiam, videlicet quod cum isto transitu iste conuentus Capuchus, seu Recollectus amittat suum priuilegium non eundi ad processiones. Nam istud priuilegium istius conuentus non accedendi ad processiones concessum per Tridentinum, & per declarationem Cardinalium citatam, est priuilegium locale & reale; quod non amittitur per transitum duorum, vel trium Religiosorum transeun-

tium

tium ab illo ad alios conuentus carentes hoc priuilegio: vel ob transitum ex aliis conuentibus non priuilegiatis ad istum. Nam, vt dicunt Doctores, priuilegia localia, & realia non amittuntur ex eo quod aliquis habitator loci priuilegiati locum mutet. Declaro hoc à simili exemplo claro. Patres Societatis Iesu habent priuilegium non accedendi ad processiones, & ex dicta Religione transeunt multi ad alias Religiones carentes hoc priuilegio: & tamen per hunc transitum Religio Societatis non perdit dictum priuilegium, quia est locale, & reale. Eodem modo iste conuentus Capuchus, de quo agitur, habet priuilegium non accedendi ad processiones iuxta prædicta: quod proinde non amittet, licet aliqui Religiosi ex illo transeant ad alios conuentus carentes illo priuilegio.

Ad secundum argumentum dico, quod licet in Hispania dentur aliqui conuentus Recollecti, vel Capuchi, qui vadant ad processiones, non potest Episcopus obligare conuentus Recollectos, ceu Capuchos istos obligare vt vadant ad processiones. Probo, quia consuetudo vnius Regni, vel Ecclesiæ, vel Prouinciæ non obligat aliud Regnum, Ecclesiam, vel Prouinciã, nisi id Papa præcipiat. Nam Papa permittit vt vnaquæque Ecclesia suas consuetudines seruet, & retineat quando fuerint rationabiles. Habetur expressè in cap. *Illud* 12. distinct. cum glossa ibidem, verbo, *Contrario more*: vbi glossa multa pro hoc adducit. Quod aded verum est, vt neque consuetudines particulares vrbis Romæ obligent in aliis Ecclesiis extra Romam, si tales consuetudines Romæ non sint de iure communi. Pro quo citat multos textus glossa in cap. *Nolite* 11. distinct. in verbo, *Et docere*. Præcipuus
textus

textus ibi citatus est cap. *de Trina*, de consec. dist. 4. vbi Papa loquens de variis moribus seruatis in mersione infantis baptizati, innuit clarè se nolle obligare alias Ecclesias ad seruandam consuetudinem, quæ Romæ seruatur; intellige, modò seruetur materia, & forma sacramenti. Vltimò iuuat ad hoc dictum Nauarri *tomo de consilijs ad finem, in commentario de lege pœnali, num. 32.* vbi sic ait: *Consuetæ minimè sunt mutandæ, nisi clarè constet consuetudinem esse intolerabilem: cum legis variè intelligibilis consuetudo sit optima interpres.* At ista consuetudo, quod conuentus, & prouinciæ Capuchæ, seu Recollecti in Portugallia non vadant ad processiones, est consuetudo tolerabilis, & conformis Trident. & declarationi Cardinal. cit. ergo non est mutanda in hoc regno, licet mutata sit in aliis Regnis Hispaniæ.

CASVS CVIII.

De donatione facta per Episcopum pro maritandis consanguineis.

Quidam Episcopus habebat vnum nepotem, & neptem ex fratribus, qui ambo erant nobiles, & pauperes: cùmque propter consanguinitatem impediti essent adinuicem contrahendum matrimonium, Episcopus illis fecit donationem dotis pro matrimonio contrahendo inter se: & in scriptura dotis posuit verbum hoc de præsentis: *Donamus pro matrimonio illorum viginti mille aureos.* Postea supplicauit à Summo Pontifice dispensationem pro illis matrimonio copulandis ad inuicem: & in supplicatione pro dispensa

dispensatione exposuit Papæ quod ipse Episcopus ob paupertatem illorum illis constituebat pro dote viginti mille aureos. Dispensauit Papa in impedimento matrimonij : sed paulò post Episcopus mortuus est antequam actu traderet nepotibus dictos viginti mille aureos : cum tamen tempore mortis iam dicto Episcopo ex redditibus Episcopatus essent debiti prædicti viginti mille aurei.

Quæsitum fuit an Episcopus posset facere nepotibus tam amplam donationem pro dote matrimonij : & supposito quod posset , de quibus bonis Episcopi soluenda sit prædicta pecunia ?

Responsio.

Dico primò. Prædictum Episcopum validè potuisse facere illam donationem dotis soluendam ex redditibus Ecclesiasticis. Iste casus in substantia iam à nobis resolutus est in casu 93. quamuis ille ab hoc in multis sit diuersus. Quod igitur iste Episcopus potuerit de redditibus Ecclesiasticis promissam dotem donare , probatur ex Farinacio à nobis etiam citato in dicto casu 93. Qui Farinacius *tom.2. Decisionum Rota, decis. 241.* refert in Rota Romana decisum fuisse, potuisse quemdam Episcopum assumptum ex Ordine Carmelitarum , donare duabus neptibus ex sorore quasdam amplas domus , quas emerat ex redditibus Ecclesiasticis , quas illis donauit pro dote matrimonij : idque ibi probat Farinacius per multa quæ adducit , cuius rationem præcipuam mox adducam. Si ergo prædictus Episcopus cum esset Religiosus ex Ordine Mendicantium potuit validè prædictam donationem facere consanguineis , à fortiori id poterit iste

iste Episcopus, qui non fuerat Religiosus ex Mendicantibus.

Præcipua ratio cui innititur Farinacius, est, quod Prælatus habens administrationem bonorum in vita, æquiparatur usufructuario, qui potest disponere de fructibus beneficii per donationem inter vivos. Pro quo citat septem Doctores graues, & antiquos. Quod verbis clarioribus, est dicere, quod Episcopus, & beneficiarius habent dominium, & sunt verè domini reddituum suorum beneficiorum: & sic potest de illis liberè disponere per donationem, vel alium contractum: maximè ad pia opera, quale est maritare pauperes consanguineas. Et addit ibidem Farinacius *num. 4.* citans Nauarrum, & Sarmentum, nullum Doctorem hoc negare. Cùm ergo iste Episcopus haberet dominium liberum suorum reddituum Ecclesiasticorum, bene potuit ex illis dotem nepti, & nepoti constituere, maximè cum essent pauperes, & nobiles. Et notandum est, quod hanc dotem non solum promisit de futuro: sed de facto donauit dicens de præsentì, *Donamus, &c.* Facit etiam quod refert Azor *tom. 2. lib. 7. cap. 9. §.* *In hac questione*, videlicet quod in Hispania, & Gallia beneficiarij ex consuetudine faciunt testamentum de fructibus sui beneficii: quod est plusquam donare inter vivos: & licet ipse Azorius dicat, hoc non extendi ad Episcopos, qui nunquam possunt facere testamentum sine dispensatione Papæ. Nihilominus Nauarrus *consilio 14. de regul. num. 12.* dicit, quod quidam Archiepiscopus qui promiserat in vita quingenta scuta, licet non potuerit illa donare per testamentum: potuisse tamen illa donare in vita per contractum, quamuis esset Episcopus de Ordine Minorum: & quod post mortem ipsius habebant

habebant ius ad petendam illam pecuniam illi, cum quibus fecerat Episcopus contractum. Quod in terminis valde iuuat ad casum præsentem. Vnde per hanc doctrinam Nauarri nepos, & neptis istius Episcopi, cum quibus ipse fecit quasi contractum per donationem dotis, poterunt petere in iudicio pecuniam illam pro dote promissam, licet Episcopus mortuus sit. Secundò principaliter, quod dos ista fuerit valida, probatur, quia fuit facta de licentia Papæ. Nam, vt suprâ dictum fuit, quando iste Episcopus petiit à Papa dispensationem pro illorum matrimonio contrahendo, exposuit Papæ in supplicatione, quod ob paupertatem illorum, ipse Episcopus de bonis suis illis assignabat pro dote viginti mille ducatos: at visâ istâ supplicatione, & videns, & sciens Papa hunc Episcopum de redditibus Ecclesiasticis prædictam donationem facere, nihilominus cum illis dispensauit ad matrimonium. Ergo etiam tacite dispensauit cum Episcopo, vt posset prædictam dotem de redditibus Ecclesiasticis donare, dato (& non concesso) quod Episcopus aliàs prædictam donationem non posset facere: & dato quod in supplicatione ad Papam pro tollendo impedimento matrimonij non petierit dispensationem ad dotem dandam de redditibus Ecclesiasticis. Hoc sic declaro: Quando superior potens dispensare, videt in aliquo opere subesse impedimentum, quod illi non exponitur, & nihilominus ipse concedit licentiam vt fiat, censetur clarè dispensare, etiam si talis dispensatio expressè non petatur. Quotiescunque enim Princeps videt aliquid fieri contra legem, & nihilominus concedit vt fiat, censetur clarè dispensare, dispensatione tacitâ. Ita inter terminis tenet Nauarrus *consilio 1. de feudis*, citans

tans Felinum. Et probatur ex regula 43. iuris in 6. *Qui tacet consentire videtur.* Pro quo Suarez *tomo de legibus, lib. 6. cap. 23.* ponit exemplum: ut si concedatur à Papa aliquid subdito, quod sine dispensatione fieri non potest, censetur ipso facto dispensare. Item si Papa concedat beneficium alicui, quem scit esse irregularem, clarum est quod cum illo dispensat. Et ultra Doctores quos ibi citat Suarez, citat etiam legem, *Quidam, ff. de re iudicata*: ubi ponuntur hæc verba: *Princeps enim qui illi dignitatem dedit, omnia gerere decrevit.* Et idem habetur in lege *Barbarius ff. de officio prætoris.* Ergo cum Papa in hoc casu dispensans cum his nepotibus ad matrimonium, videret, & sciret Episcopum illos dotare de redditibus Ecclesiasticis, dato quod Episcopus talem dotem non posset facere, Papa tamen id videns, & sciens, censendus est dispensare cum Episcopo, ut id posset facere.

Tertiò id probari potest ex *cap. 2. de fideiussoribus*, in quo glossa cum textu referunt, quod duo Clerici receperunt certam copiam pecuniæ cuiusdam mercatoris, promittentes quod illam soluerent usque ad certum diem. Et pro se obtulerunt alium Clericum fideiussorem. Adueniente die assignato, duo Clerici non soluerunt pecuniam: qua de causa Clericus fideiussor soluit pro illis. Mandat ibi Papa ut duo Clerici statim soluant pecuniam Clerico fideiussori. Si verò non soluant, Episcopus illos obliget, ut de redditibus Ecclesiasticis soluant Clerico fideiussori. Ecce quomodo Papa vult ut de redditibus Ecclesiasticis debita Clericorum solvantur, etiam contracta per contractus ordinarios. Debitum verò dotis quod contraxit Episcopus, de quo loquimur, fuit contractum ex causa valde pia, qualis est dotare puellam nobilem,

& pauperem consanguineam. Ergo ex redditibus Ecclesiasticis huius Episcopi solui debet tale debitum.

Neque contra hætenus dicta obstat, quod præcipit Concilium Tridentinum *sess. 25. cap. 1. de reformat.* vbi de Episcopis loquens, ait: *Ommino eis interdicitur ne ex redditibus Ecclesia consanguineos, familiarésve suos augeant.* In quibus verbis illis prohibere videtur, ne possint consanguineos dotare pro matrimonio contrahendo, maximè cum tanta dote, quantam hic Episcopus his nepotibus assignauit, viginti scilicet mille ducatorum. Ad quod respondeo ibi Concilium non prohibere ne Episcopi possint dotare consanguineos pauperes, iuxta illorum statum. Sed solum velle Concilium ne Episcopi consanguineos ditent, vel augeant excessiuis dotibus, & donationibus prodigis. Non verò prohibere dotes moderatas attento statu consanguineorum, & nobilitate eorum. Sic tenet Reginaldus *tom. 2. lib. 30. tract. 3. n. 101. & seqq.* addens *eodem num.* quod beneficiarius potest fratrem suum de fructibus beneficij alere in scholis, & ad gradus honorificos scholarum promouere. Et ibidem *num. 102.* cum Nanar. & aliis, ait posse beneficiarium filiam suam spuriam dotare pro matrimonio contrahendo. Quæ omnia maiora sunt, ac difficiliora, quàm Episcopum nobilem dotare nepotes nobiles, & pauperes ad nubendum. Addit adhuc Reginaldus ibidem *n. 103.* quod beneficiarius dotans consanguineam ex redditibus Ecclesiæ potest excedere statum, quem consanguinei habebant in sæculo. Denique in fine istius numeri, ait Reginaldus, quod potest beneficiarius in dotanda consanguinea spectatis omnibus circumstantiis sic donare, vt non sit sibi dedecus propinquos sibi coniunctos ad id abiectos habere.

Dico secundò, hanc dotem promissam ab Episcopo soluendam esse primò de bonis patrimonialibus, si quæ Episcopus in vita habebat. Constat clarè, quia bona patrimonialia non sunt bona Ecclesiastica, ac proinde de illis liberè potest disponere beneficiarius, iuxta communem opinionem, sicut tradit Ludouicus de Beia *in suis Respons. moralibus*, 2. p. casu 25. Secundò soluenda est dos ista ex redditibus Ecclesiasticis, quos iste Episcopus iam reliquit acquisitos, & emeritos, etiam si actu illos non receperit: iam enim hi redditus sui erant, illòsque acquisiuerat, & proinde iam illorum dominium habebat, & proinde iam erant bona istius Episcopi. Et constat quod bona relictà à defuncto manent hypothecata, & obligata ad soluenda debita contracta à defuncto, ut praxis docet. Tertia, ista dos potest, ac debet solui ex supellectilibus, & mobilibus relictis, qualia sunt vasa aurea, vel argentea, tapetes, & similia. Hæc enim mobilia non sunt dicenda in hoc casu spolium pertinens ad cameram Apostolicam, vel Fiscum Apostolicum. Nam hæc bona manent obligata ad soluendum debitum dotis promissæ ab Episcopo. Pro quo notandum est, illud solum vocari spolium debitum cameræ Apostolicæ, quod relictum est à beneficiario, & superest de bonis ipsius seclusis prius debitis beneficiarij. Sic tenet Riccius *5. p. Decisionum, decisione* 2030. citans tres Doctores, dicens, quod camera Apostolica succedens beneficiario, tenetur ad eius debita soluenda. Ergo licet per mortem huius Episcopi transferint bona patrimonialia, mobilia, domus, & redditus Ecclesiastici iam sibi debiti, hæc non pertinent ad spolium Apostolicum, neque ad alium Fiscum, nisi prius debita Episcopi solvantur, qualis est ista dos promissa. Quod magis firmatur ex dictis, nam Fiscus tenetur
soluere

soluere debita, quæ contraxerat defunctus, cuius bona ad Fiscum perueniunt. Sic tenet expressè Sanch. *lib. i. Decalogi cap. 22. n. 74.* & citat legem ciuilem dicentem, quod bona quæ sunt obligata alicui creditori, non pertinent ad Fiscum: bona autem omnia relicta ab hoc Episcopo sunt obligata ad debitum istud istius dotis soluendum. Vide tamen suprà *casu 93. post initium, §. Illud imprimis*, ubi diximus constitutiones Apostolicas de spoliis Episcoporum, & Clericorum non habere locum in Portugallia.

Quæris an dato, quod Episcopus iste nulla omnino bona reliquerit, de quibus dos ista solui possit: teneatur Episcopus successor illam soluere? Scio quemdam Doctorem de hoc consultum respondisse affirmatiuè. Cui tamen ego non assentio. Licet enim Prælati successor teneatur soluere debita antecessoris contracta intuitu Ecclesiæ: non tamen tenetur soluere debita antecessoris facta alio intuitu. Aliàs sequeretur teneri successorem soluere debita antecessoris etiam illicitè, & prodigè contracta. Congruentius ergo ad intentum loquitur Comitoli. *lib. i. Respons. Moral.* dicēs, quod Prælati successor non tenetur ad soluenda debita antecessoris, nisi fuerint facta ab illo ut Prælati est. Sic Comitoli. *cit. tom. Resp. lib. i. q. 87.* & citat pro hoc vnam decretalem Alexandri V. sic de hac re dicentem: *Sicut filius debita patris soluere tenetur, ita Prælati sui prædecessoris pro Ecclesiæ necessitate contracta.* Et alia quæ ibi citat Comitoli ex quadam glossa pro exemplis. Et in hoc casu Episcopus mortuus non contraxit hoc debitum dotis soluendæ quatenus Episcopus, vel Prælati erat: sed quatenus consanguineus, neque contraxit hoc debitum pro Ecclesiæ necessitate, sed pro necessitate nepotum. Sub censura Ecclesiæ, & Doctorum.

CASVS CIX.

De quodam delicto facto de nocte.

IN quodam conuentu paruo Religiosorum, in noctis silentio quidam Religiosus intrauit cubiculum Prælati, & ostendit illi vulnus graue in facie recens, & accusans quod certus Fullanus eiusdem conuentus illum eodem tempore in facie percusserit: addens se illum clarè cognouisse, eo quod dictus Fullanus ad se percutiendum cum candela accensa venisset. Surgens Prælati adiuit cubiculum illius accusati, & illum inuenit in suo lecto quietum & absque vllò indicio illius delicti. Quo non obstante, Prælati dictum Religiosum accusatum ob solum dictum accusantis inclusit illum in arcta custodia, iniunctis illi aliquibus pœnitentiis abstinentiæ. Cùmque de delicto inquireret, nihil notabile contra accusatum inuenit, sed tamen à custodia non liberauit. Et declaratur quod Religiosus habebat bonam famam vitæ. Et hoc solum indicium contra illum repertum est, quod scilicet præcedente proximâ die dixerit certum verbum leue contra accusantem, cum quo non conuersabatur amicabiliter.

Quæritur, an potuerit Prælati ob solum dictum istius accusantis, non inuento alio indicio notabili, prædictum Religiosum accusatum punire aliquâ pœnâ notabili?

Responsio.

Respondeo omnino negatiuè. Hanc conclusionem tenet mordicùs Mascard. qui egregiè tractauit materiam de probationibus criminum. Iste ergo tantus Doctor in 3. tom. de probationibus, concl. 1129, efficaciter probat

bat cum multis Doctoribus, quod assertio sola vulnerati, non cōcurrente alio indicio notabili, non sufficit ut aliqua pœna detur illi quem culpauit, seu accusauit. Exaggerat Mascardus hoc dictum, dicens hoc verum esse, etiamsi accusator id asserat positus in articulo mortis habēs sacrosanctam Eucharistiam in manibus, vel illud affirmet cum iuramento. Ratio efficax istius conclusionis est, quia iste sic accusans, vel culpans aliū, eo ipso quod asserit se ab illo grauiter vulneratum, ostendit se illius capitalem inimicum: ex graui enim iniuria illata resultat capitalis inimicitia. At constat quod dictū testis inimici capitalis nihil omnino probat contra reum. Et hoc argumentum est insolubile, & ideo non sunt necessariae aliæ probationes. Et citat Mascardus plusquam duodecim Doctores legistas graues, & addit hanc esse opinionem communem.

Quod verò attinet ad id quod culpans, vel accusans ait, se bene cognouisse dictum Fullanum in hora percussionis, eo quod ille culpans secum afferret candelam accensam: omnino improbabile est, nec veritati consonum, sed fortè per tale delictum se prodit. Nullo enim modo credi potest, quod malefactor de nocte, & in conuentu paruo, vadens facere delictum portaret candelam: sed potius credi potuit, quod extingueret candelas conuentus ne posset agnosci, ac deprehendi. Colligitur hoc manifestè ex illo dicto Christi D. Ioan. cap. 3. *Qui male agit odit lucem, & non venit ad lucem, ut non arguantur opera eius.*

Quod item dicitur de solo indicio hīc reperto, quod scilicet iste Religiosus culpatus die præcedente, dixit illud verbum leue contra accusantem: id non obstat, quia, ut dicitur, ultra quàm quod fuerit verbum leue, non fuit comminatorium. Et præterea cum constet

istum Religiosum culpatum habere bonam famam in conuentu; ista bona fama liberat illum ab illa leui suspitione de verbo illo molesto antea dicto contra accusantem. Probatur hoc ex eo quod ait Riccius 2. *parte Decisionum, decis. 206.* dicens, quod probatio bonæ famæ absorbet famam contrariam. Facit vltimò pro hoc dicto, quod iste culpans, accusans ve istum Religiosum, est accusator, vt patet: est autem inauditum quod dictum solum accusatoris sine testibus, & sine iudiciis sufficiat ad condemnandum aliquem.

Sed quia hæc materia potest sæpius euenire circa crimina facta de nocte, in quibus dari non possunt testes oculati, ne crimina maneant impunita, ponam hîc breuiter, quæ Doctores dicunt circa probanda crimina facta de nocte. Et antequam illa dicam, suppono esse communem opinionem, quod crimina facta de nocte, seu in occulto indigent minori probatione, cum enim sint difficilis probationis, si ad illa probanda peteretur plena probatio, multa crimina graua manerent impunita.

Primum ergo quod se offert in hac materia, est quod disponit lex istius Regni Portugalliæ *lib. 5. Ordinatio- nis, tit. 83.* vbi dicit, quod si de nocte in platea publica aliquis clamans dicat: Fullanus me percutit: & ad talem clamorem aliqui Fullanum viderint stare iuxta ipsum clamantē, crimen manet probatum cōtra ipsum propè stantem, etiam si illum non viderint actu percutientem. Nam in tali casu contra illum propè stantem, insurgit violenta præsumptio, quod fuerit percussor, eo quod nullus alius ibi inuētus sit qui posset clamantem percutere. At in nostro casu Religiosus iste culpatus à culpante non est visus propè Religiosum percussum: sed inuentus est in suo cubiculo iacens, & quietus.

Secundò,

Secundò, si cum delicto facto de nocte concurrat fama vehemens contra aliquem, talis fama cum aliis indiciis grauibz sufficit ad cōdemnationem. Sic probat Baiardus *in comment. ad Iulium Clarum q. 21. n. 2.* citans alios. At contra istum Religiosum non fuit fama de tali delicto, vt constat, sed solum contra illum incepit infamia postquam illum accusator iste culpauit. Constat autem apud omnes, quod vt fama faciat aliquam probationem, debet hæc fama oriri à viris honestis, timoratis, & non suspectis: fama autem hæc contra istum Religiosum orta est solùm à suo accusatore, seu culpante, qui proinde est vir omnino suspectus.

Tertiò, potest contingere vt ante crimen factum de nocte, infamatus de crimine dixerit verba iniuriosa contra vulneratum, neque ambo se alloquerentur adinuicem, vel præcesserint minæ de vlciscendo: & tunc hoc graue indicium sufficit ad torturam, teste Mascardo *tom. 2. de probat. concl. 901.* vbi citas Speculatorem, dicit, quod si aliquis inuentus sit occisus, sitque probatum, Titium cum illo inimicitias gerere, & quod ab occiso iniuria sibi illata fuit, ex his indiciis solis poterit Titius torqueri. Et in hoc casu nihil tale repertum est contra istum culpatum Religiosum.

Quia verò suprà dixi, crimina facta de nocte, seu in abscondito indigere minori probatione, vt puniantur; cito ad hoc solum Mascardum, qui *tom. 1. de probat. circa hanc materiam sic scribit: Id enim præ oculis semper habendum est, vt ea quæ non possunt probari per certas probationes, in dubijs probentur per presumptiones, & coniecturas, vel indicia.* Et per hoc citat duos Doctores, & vnā glossam iuris ciuilis. Idem tenet Mascardus *tom. 1. de probat. concl. 461. n. 11.* citans alios. Quod si obiicias dictum illud commune, quod probationes ad condem-

nandum debent esse luce meridianâ clariores. Respon-
deo id intelligi quando agitur de probando crimine
claro, & in publico patrato; tunc enim claræ proba-
tiones requiruntur. Secus quando delictum fit de no-
cte, vel in occulto, tunc enim minores probationes
requiruntur, sicut dictū est: aliās multa crimina grauiā
impūnita remanerent, cum claro, & magno præiudicio
Reipublicæ. Sub censura Ecclesiæ, & Doctorem.

CASVS VLTIMVS.

Circa priuilegia viuæ vocis oraculo concessa.

IN meo primo tomo Responsionum moralium *casu*
ultimo, dixi quod priuilegia viuæ vocis oraculo, quæ
S.D.N. Vrbanus VIII. reuocauerat, esse hodie ab eodem
D. Papa reualidata, ac denuò concessa. Ad id dicendum
motus fui, quia vidi epistolam cuiusdam Prouincialis
certæ Religionis, & alterius Patris grauis missam ad
quemdam Religiosum grauē meæ prouinciæ, qui duo
id asserebant, esse scilicet dicta oracula viuæ vocis à
S.D.N. Urbano VIII. iterum concessa, & reualidata.
Hoc idem nouissime posset confirmari ex libro P. Fra-
tris Ludouici de Cruce de explicatione Bullæ Crucia-
tæ; in quo prædictus Pater *disp. 1. c. 6. dub. 2. n. 13. & 16.*
fol. 359. dicit posse hodie Confessores Religiosos de li-
centia Prælatorum dispensare ad petendū debitum cum
coniugatis, qui ante matrimonium fecerunt votum ca-
stitatis. Itē *n. 16.* ait posse eosdem Confessores de licen-
tia Prouincialium dispensare ad petendum debitū cum
illis coniugibus, qui intra quartum gradum ratione in-
cestus affinitatem contraxerunt. Citat ad hoc aliquos
recentiores, & præcipuè duo viuæ vocis oracula Pij V.
qui

qui id concessit. Et cum his viux vocis oraculis transit, supponens illa hodie esse valida, & in suo antiquo robore permanere. Scripsit autē hic Author nouiter Romæ anno 1632. postquam D. Vrbanus VIII. dicta oracula viux vocis reuocauerat, cuius Patris citatus liber fuit examinatus à Magistro sacri Palatij, & à quinque aliis Doctoribus Romę examinatus, & approbatus. Estque prædictus Pater officialis in sacra Pœnitentiaria D. Papæ quæ omnia satis cōprobant sciuisse dictos Doctores hodie priuilegia viux vocis oraculo valida esse, & in suo robore persistere, non obstante priore reuocatione illorū factā per dictum D. N. Vrban. VIII. Quod si ita esset, magna profectō foret Religionum quietatio, & animarū sæcularium remediū. Dixi verò suprā, hunc Authorē Romæ scripsisse post reuocationē oraculorum viux vocis factam per S. D. N. Vrban. VIII. quia eius reuocatio facta est anno 1631. die 20. Decemb. vt patet ex Bulla ipsius. Prædictus verò Pater scripsit hunc librum Romæ an. 1632. mense Maio quarto mense post dictā reuocationē. Ac proinde certō sciens hic Author dicta viux vocis oracula, fuisse reuocata, eoque non obstante citans duo viux vocis oracula tanquam valida, videtur supponere scire se eadem viux vocis oracula fuisse reualidata, & denuò concessa per S. D. N. Papam.

His non obstantibus, ego vehementer suspicor prædicta viux vocis oracula à D. N. reuocata, non fuisse ab illo reualidata, vel denuò concessa. Moueor primò, quia postquam ille meus primus tomus Respōsionum exiit in lucem, duo alij Patres eiusdem Religionis ad me venerunt innuentes se habere epistolam sibi missam à Patre quodam eiusdem Religionis Romæ existente, in qua dicebat prædicta viux vocis oracula non esse denuò reualidata, sicut ego olim in meo libro sine fun-

damento dicebam. Secundò principaliter moueor, quia non est credendum quod S.D.N. Vrbanus VIII. in tam breui tempore se mutaret. Reuocauerat enim viuæ vocis oracula anno 1631. mense Decembri, vt suprà vidimus, & postea anno sequenti 1632. mense Maio, iam eam reualidauerat, vt supponit hic Author. Quod non videtur credendū de tanto Pontifice, vt intra quatuor, vel quinque menses duas Bullas contrarias in re tam graui publicaret, cum magnæ leuitatis, & inconstantia nota. Tertiò moueor, quia illa reualidatio, & noua concessio priuilegiorum viuæ vocis oraculo nullo modo fuit publicata in Portugallia: quod erat necessarium, vt publicaretur, præcipuè in re tanti momenti, & tam necessaria. Ac proinde credo dicta priuilegia viuæ vocis oraculo hodie non esse reualidata. Nec proinde alicui illa posse prodesse.

Consonat hæc mea admonitio cum eo quod dicit Molina *tom. 4. de iust. disp. 63. n. 2.* vbi citans Nauarrum, qui in quodam cōsilio dixerat certum quid, quod erat contra quandam declarationem Gregor. XIII. eundemque Nauarrum secuti sunt postea alij recentiores, ait Molina, quod vel Nauarrus illud cōsiliū scripsit ante dictam declarationem Greg. XIII. vel eius notitiam non habuisse, vel denique illud ignorasse eos, qui post Nauarrum scripserūt. Quod suo modo dici potest de citato Patre Fratre Ludouico à Cruce, & de illis quos ille citat, quod scilicet, non viderint id quod citant, ac dicunt de reualidatione, vel reuocatione oraculorum viuæ vocis. Sub censura Ecclesiæ, & Doctorum.

*Omnia subijcio pedibus, ac iudicio, & censura
sanctæ Romanæ Ecclesiæ.*



INDEX



INDEX RERVM NOTABILIVM, QVÆ IN HOC LIBRO continentur.

*Prior numerus paginam, posterior eiusdem
pagina sectionem indigitat.*

A



BATISSA admittens sæculares
intra clausuram, incurrit pœnas,
etiamsi tales ingressos admittat
non vi licentiarum Papalium an-
nullatarum. pag. 211. n. 2. & seqq.

Absolvere possunt Prælati regulares
suos subditos à simonia in Ordine, & à casibus
Bullæ Cœnæ, exceptà hæresi. 360. 1. & seqq.

Absolvere potest confessarius suum complicem, cum
quo peccavit in peccato carnis, vel simili, si aliàs
non sit peccatum reservatum. 429. & seqq. & de
duobus clericis se percutientibus. 430

Actum nullum potest punire Ecclesia. 402. 5. & seqq.

Actus

INDEX RERVM.

- Actus factus contra legem prohibitivam quando sit
validus, lege illa non obstante. 540.4. & seq.
- Actus bonus cuiusque iusti quot gradus, & qualita-
tes habeat, meriti, satisfactionis, &c. 239. 1.
& seq.
- Accessorium quomodo dicatur sequi naturam princi-
palis: & quomodo destructo principali destruat
accessorium. 138. & seqq.
- Adulterium putatum, id est commissum à coniuge
solum habito pro coniuge, meretur pœnam veri
adulterij. 674.2
- Adulterij crimen qualiter probetur. 291.1. & seqq.
- Accusare se ipsum nemo tenetur coram iudice, nec
bona deferre fisco ante condemnationem. 511.7.
& seqq.
- Alienari quæ bona Ecclesiæ prohibeantur, & quo
modo. 109
- Ambitio clara cernitur in continuatione officiorum
procurata. 231. & seq.
- B. Anna mater Deiparæ semel tantum nupsit. Et reii-
citur historia quædam in oppositum. 582. & 583.
toto casu 63.
- Anima in purgatorio, an debeat ibi detineri quoad-
vsque testamentarius soluat debita illius. 343.5
- Annus datus ad sequendam appellationem non est de
substantia iuris, sed apex iuris. 44
- Apices iuris non tenentur servare Minoritæ ex priui-
legio. ibid. 273. & 274
- Apostata non est, Religiosus, qui carceratus iniuste,
vel patiens iniustas molestias notabiles, vel ti-
mens inferendas, fugit à conuentu, & vadit ad su-
perioiorem. 332. & 333. vbi de hoc multa. & 805. *toto*
casu 104.

Apostata

INDEX RERVM.

844

Apostata non est, fugiens ab Ordine, si non est verè
professus. 334.1

Appellans iniuste potest aliquando puniri. 296.

15

Appellare potest carceratus Religiosus ab indebita
carceratione, & quomodo. 16.2

Appellare potest quilibet validè ab electione si sibi
interest, ante illam celebratam, si videt non rectè
celebrari. 610.1

Appellatione interpositâ nihil est innouandum. Aliàs
facta sunt irrita. 611.2.& 3

Appellari non potest à mero executore.8. Neque ap-
pellatur à lege, neque à pœna legis. ibid.

Appellatio potest prohiberi per statutum Religionis
ne à suo statuto appelleretur. 9.& 10.

Appellationi friuolæ non deferendum.9.& 10.& om-
nino. 762. & seq.

Appellatio non dat ius ad futura nisi constet fuisse
iustam. 15

Appellatione interpositâ non potest iudex procede-
re, nisi viderit processum, & audierit iudicem à
quo. 19.& seq.

Archiepiscopus non potest dispensare in statuto Con-
cilij Prouincialis: & potest excommunicari à sy-
nodo Prouinciali. 494. & 495

Argumentum à simili validum est. 187. & 188

Argumentum à sequela absurdi, id est, quod aliàs da-
retur absurdum, validum est. 725

B

Baptizauit mulier filium suum eo quod fuit bap-
tizatus à Clerico Christiano nouo: an peccarit,
& an

INDEX RERV M.

- & an contraxit impedimentum cognationis ad petendum debitum à marito ? 768. *toto casu* 97.
- Baptizatus à Clerico descendente à Iudæis , an possit rebaptizari ad cautelam. 601. & 602. & seqq. *toto casu* 73. & *maximè* 607. & 608.
- Beneficium quomodo possit permutari absque simonia, præcedente promissione dandi aliquid post obtentam dispensationem. 716. & 717. *toto casu* 91.
- Beneficiarius de redditibus beneficij quomodo possit dotare consanguineas. 740. & potest facere testamentum de fructibus beneficij. 743. 744. & 694
- Beneficiarius carens Ordinibus sacris si non recipiat fructus beneficij, non tenetur ad horas canonicas. 126. 5
- Beneficium Ecclesiasticum quid sit. 36. & quod prælaturæ Religiosorum non sint beneficium Ecclesiasticum. 352. 1. & seqq.
- Beneficia duo , vel plura impetrans sine dispensatione, quomodo amittat ambo vel saltem prius beneficium. 515. & seqq.
- Beneficiorum pluralitas quæ causet inconuenientia. 518
- Beneficium quomodo vacet. 522. 8. & quod duo beneficia incompatibilia non possunt retineri. ibidem 10. in fine.
- Beneficiarius committens crimen , ob quod imponitur poena amissionis beneficij , non perdit illud ante sententiam declaratoriam criminis ; imò ante illam potest illud validè renunciare. 554. & 555
- Bullæ Cruciatæ priuilegia, & indulgentias non amittit ille qui in sexto mense anni non dat dimidiam eleemosynam pro secunda indulgentia illius. 95. 2. & seqq.

INDEX RERV.

845

Bulla Cruciatæ quoad casus referuatos cur non concedatur Religiosis. 55.1.

Per Bullam Cruciatæ non potest absolui Religiosus legens libros prohibitos: bene tamen potest absolui clericus regularis, & sæcularis. 57.4

Quid faciet Religiosus quem confessor bona fide absoluit à referuatis. 61.6. per tot.

In concessione Cruciatæ Papa non facit contractum onerosum cum Rege Hispaniæ. 63. & 64. An verò detur quasi contractus inter Papam, & recipientem Bullam. 73.8. & 92.5

Per Bullam Cruciatæ non potest irregularitas in Ordine dispensari. 795. & 796

Bulla Cruciatæ quomodo reuocet priuilegia, vel indulgentias Religiosorum. 78. & 79

Bullæ Cruciatæ Commissarius non potest explicare Bullam contra intentionem Papæ. 83.13. & 92.4

C

CApellania alia est collatiua, alia non collatiua. 614.1. & seq. Et quis possit illas dare, vel auferre. *toto casu* 75.

Capitulum Sede vacante potest omnia illa quæ poterat Episcopus mortuus per iurisdictionem ordinariam. 447. & 448

Capitulum Sede vacante non potest dare licentiam Episcopo titulari, vt conferat Ordines sacros Religiosis extra tempora. 589. 1. & seq. & de aliis quæ potest capitulum Sede vacante. 592.

Celebrans, vel exercens Ordinem sacrum existens in suspensione, vel irregularitate occulta, si timet magnam infamiam non celebrando, an peccet, vel pœnam incurrat. 319. & 320

Citatio

INDEX RERVM.

- Citatio rei potest aliquando omitti, & potest condemnari, quando crimen est notorium, nec reus habet ullam excusationem. 287
- Citatus ad locum non tutum non tenetur comparere. 337
- Clausura Monialium, an hodie seruetur si tempore concionis feminae intrent, vel egrediantur per portam claustrum, non per portam Ecclesiae. 156.13
- Commendatarius, & Beneficiarius possunt locare fructus suae commendae, vel beneficii, usque ad nouem, vel plures annos. 109.1. & seq.
- Communio Sanctorum in symbolo quid significet. 235. *toto casu* 23. & quotuplex sit communio Sanctorum. 240. & quomodo istius suam satisfactionem possit alteri iusto applicare. ibidem n. 1. & 3
- Compensatio circa debitum ob aliud debitum, quomodo fieri debeat. 679. 6. & 67.1. & seq. & de excommunicatione lata.
- Conatus ad crimen effectu non secuto quomodo sit puniendus. 278. & 279
- Concilij Tridentini decreta non reuocantur à Papa nisi exprimat, non obstante Tridentino. 726.5
- Conditio appposita contra legem nihil valet. 521.7
- Confiteri, an possit Religiosus cum clerico saeculari dum iter agit extra conuentum. 155.11
- Confessio nulla facta in Quadragesima, & communio in peccato facta in Paschate, an satisfaciant praecepto Ecclesiae, vt vitetur excommunicatio. 399.2. & seqq.
- Confessarius non tenetur admonere poenitentem habentem bonam fidem circa matrimonij impedimentum, vel circa restitutionem, si videt monitionem

INDEX RERVM.

84

- nem non profuturam : & pœnitentem rebellem futurum. 384.1.& seq.
- Confirmatio priuilegij ex certa scientia quid importer. 360.1
- Confirmatio statuti facta à Papa in forma communi quid sit : & hæc non impedit quin possit statutum postea reuocari in capitulo. 669
- Coniuratio , seu conspiratio potest esse bona si sit de re bona. 7.& 195.5
- Contractus celebratus sub conditione corrui non seruâtâ conditione. 185.3
- Correctio fraterna quomodo & quando seruanda sit circa maleficas, & hæreticos. 373.7
- Crimina occulta quomodo, & quando possit Prælati punire. 496. & 497. *toto casu* 58. secus si crimen occultum sit contra bonum commune , vt hæresis, & sodomia.
- Crimina secundum diuersas intentiones peccantis ad diuersas species reducuntur. 674.& 675
- Clausuram Monialium intrans femina nobilis ad curandum morbum, cui scit mederi, non incurrit excommunicationem. 622.1. & seqq. Idem si intret ad faciendum opus vile quod alia vilis femina factura erat. ibid.& 623
- Clausuram Monialium licitè intrare potest Capellanus Monialium ad faciendum illud opus ad quod debuit intrare artifex, si Capellanus illud æquè benè facere sciat, cum licentia Prælati. 621.& 622
- Clausuram Monialium intrans licitè, sed non statim exiens finito opere, peccat, sed non incurrit excommunicationem. 625.& 626
- Clausuram Monialium licitè intrare potest femina
H H h
adulte

INDEX RERVM.

adultera fugiens maritum insequentem vt illam occidat. 816. *toto casu* 106. & idem erit de viro fugiente ministros iustitiæ. 821. & 822

D

Decisiones Rotæ, an faciant legem obligantem. 523.9

Declarationes Cardinalium an faciant legem obligantem? 314.3. & 817.818.& seq.

Debitum remittere est idem quod donare. 236.2

Delictum occultum, & illicitè reuelatum potest puniri à Prælato. 284. 2. Tale est delictum quod tortus indebitè reuelauit in tortura. 685.686.& seq.

Denunciare nemo tenetur cum suo periculo notabili. 511.7

Denunciare de maleficis quomodo, quando, & apud quem debeamus. 372.1.& seq.

Dictio taxatiua *nisi, si, solum, dumtaxat*, non excludit casus omnino similes. 313.2

Descendentes ab Hebræis vel Iudæis in quarto gradu qui sint, & quomodo ab officiis excludantur. 601.2

Diuortium non possunt facere coniuges ex solo proprio consensu, sed per sententiam iudicis, & de pertinentibus ad hoc. 695. & seq. & 781. *toto casu* 100

Domicilium quomodo acquiratur in aliquo loco vel oppido. 611.& 612

Dominium rei, & vsusfructus in quo distinguantur. 221.2

Donatio quando det ius donatario vt rem donatam acquirat.

INDEX RERVM.

847

- acquirat. 195.2. & quando culpa donatoris res non
sortitur effectum. 200. Et ibi de donatione inter
sponfos. 4
- Donatio si fiat in Scriptura ob benemerita, debent
probari benemerita, vel debet clarè constare de il-
lis. 226.6
- Donare non præsumitur ille qui est pauper. 426. 3.
& 4
- Donationes quomodo possit facere Religiosus de li-
centia Prælati etiam in morte. 681. & seq. *maxi-
mè* 2. & 3
- Donatio omnium bonorum præsentium & futuro-
rum ut plurimum est irrita. 690.2. & seqq.
- Dotem vxoris quando acquirat maritus ob adulte-
rium, vel fornicationem vxoris? 676. & seq.
- Donatio grandis non præsumitur fieri liberè. 548
- Donatio facta in testamento ob bona opera donata-
rij debet esse æquiualens meritis donatarij, alias est
nulla. 551
- Donationem quandam notabilem non potuit fa-
cere quidam Religiosus nepti suæ. 564.2. & seq.
- Donationes factæ à Nouitio quomodo valeant.
576.2
- Donari aliquid ab aliquo quomodo præsumitur. 584.
& 587
- Donatio causâ mortis potest reuocari ante mortem.
668
- Donatio libera, absoluta, & acceptata non potest am-
plius reuocari à donatore. 616.3
- Donatio liberalis reuocatur ob ingratitude don-
natarij, vel iniuriam factam donatori. 650. Sed vi-
de 658

INDEX RERV.

Dos data viro ab vxore, durante matrimonio, pertinet ad vxorem quoad dominium directum: sed ad virum pertinet quoad dominium vtile. 655

Dispensatio.

Dispensare potest Episcopus in impedimento occulto dirimente matrimonium ob necessitatem vrgentem, si adsint certæ circumstantiæ. 390.7

Dispensationum materia latè tractatur, & traduntur varij modi quibus dispensationes Papæ redduntur validæ, vel nullæ. 410. *toro casu* 49.

Dispensatio valida est, etiamsi erretur in nomine impetrantis. *ibidem* 2. Et de dispensationibus circa matrimonium contrahendum. 2. & 4. Et de dispensatione in votis. 3. & quando narratur falsum, sed Papa dispensat motu proprio. 605.7

de Dispensatione pro matrimonio, tacitâ, vel narratâ copulâ præcedente. 417.9. & seqq.

Dispensatione obtentâ, si quis proponat illâ non vti, & litteras dispensationis laceret, adhuc potest vti dispensatione si illi non renunciauit coram Episcopo acceptante. 425. 22. cum limitatione, *ibidem* 23.

E

E Brifus Religiosus si sit nimis scandalosus Religioni, & sæcularibus cum aliis circumstantiis, potest ab Ordine expelli. 330.1. & 2

Ecclesiæ immunitas prodest illi qui peccauit prope Ecclesiam cum spe fugiendi ad illam. 431.2. in fine. Ecclesiæ

INDEX RERVM.

- Ecclisæ immunitas, an proſit peccanti in Eccleſia*
pro quo delicto? 469. & de aliis delictis patra-
toris intra Eccleſiam, quando priuent patratores im-
munitate. 469.1. & ſeqq.
Electio Prælatiſ localis quos electores debet habere.
611. & 612
Electio valida eſt etiamſi ad illam non fuerit vo-
catus vnus electus qui erat clarè impeditus. 288.
& 289
Eleemoſynam an poſſit facere Religioſus de illo quod
Religio illi dat pro ſtipe taxata, ſed ille ſubtrahit
sibi à cibo ſolito. 253. & ſeq.
Emphyteuſis ſi vendatur debet ſolui laudemium do-
mino directo. 549
Emphyteuta vt poſſit nominare, certas conditiones
debet ſeruare. ibid.
Emphyteuta quomodo, & quando poſſit nominare.
546. toto caſu 65. Non poteſt illam vendere, nec
alienare aſque licentia domini directi. 553. &
554
Emphyteuſis quomodo poſſit acquiri, & de no-
minatione in emphyteuſi, vide multa. 219. toto
caſu 20.
Emphyteuta quomodo poſſit poſt vnum nominatum
nominare alium. 223.3. & 4
Emphyteutica res quomodo, & quando poſſit adduci
in collationem inter hæredes, mortuo poſſeſſore
emphyteuſis. 226.7
Epicoſopus poteſt diſpenſare in impedimento occul-
to matrimonij, iſtante magna neceſſitate. 390.7
Epicoſopus poteſt commutare, vt de redditibus reli-
ctis poſt celebrationem Miſſarum emanant veſtes

INDEX RERV M.

sacra necessaria.

- Episcopus etiam Religiosus quomodo possit e.
in mortis articulo de redditibus Ecclesiasticis do-
nare consanguineis. 735. *toto casu* 94. & 828. *toto*
casu 108
- Episcopus ex Religione assumptus tenetur libros, &
res quibus utebatur dare Monasterio. 747. & 748.
& seq.
- Excommunicatio ob duas causas potest esse nulla.
729.2
- Excommunicare non potest Episcopus, vel Prælatus
sæcularis Religiosum exemptum. 729. 3. Neque
etiam ut vadant ad processiones. 731
- Excommunicare quomodo possit validè Prælatus
subditum non prolata sententiâ per scripturam. 154.
10. & seq.
- Expensas ad litem non tenetur Religio dare Reli-
gioso litiganti contra Religionem, si litigat propter
sua delicta. 298.18
- Expressum in lege facit cessare præsumptum. 311
- Expulsus à Religione propter culpas non tenetur ad
ieiunia Ordinis, & cæteras observantias eiusdem
Ordinis. 407.2. & seq.
- Eucharistiam possunt Religiosi ministrare sæculari-
bus in Oratoriis extra suos conventus. 131 2 & seq.
Et huic priuilegio non possunt derogare Episcopi.
136. Non tamen possunt illam deferre per plateas
cum pompa ad sæculares. 140

F

- Falsarius quomodo quis dicatur. 316.1. & 317
- Filiusfamilias si occidat, aut vulneret aliquem,
non

INDEX RERVM.

849

- non tenetur pater pro illo restituere. 482.12
- Filius Religiosus quomodo possit, vel teneatur exire ad subueniendum parentibus grauitè, vel extremè indigentibus. 596. & seq. *toto casu* 72
- Finis legis attendendus est potiùs quàm verba legis. 486. 4
- Fiscus Regiùs, an debeat confiscare dotem promissam à patre Iudæo, pro filia Nouitia, & professà quam dotem nondum soluit. 773. *toto casu* 99
- Forum quis sortitur ratione delicti. 179. & 180. & seq.
- Fraus, & dolus nulli debent patrocinari. 504. 3.
- Filius tenetur dare alimenta matri, & fratribus pauperibus. 671

H

- H**Æres, vel testamentarius non possunt minuere legatum relictum à testatore. 435.2. & seq.
- Homicida per ius commune non prohibetur intrare Religionem. 770
- Homicida quid, quando & quomodo teneatur restituere hæredibus defuncti. 473. *toto casu* 54
- Ab hæresi secreta non possunt Prælati regulares subditum absoluerè. 366.5. & 6
- Hostias non consecratas cum certis characteribus scriptas dare ægrotis pro febre tollenda, superstitio est, & non toleranda. 363.1. & seq.
- Hæreticus, vel eius hæredes non tenentur bona sua tradere fisco ante condemnationem. 653
- Homicidium quando dicatur casuale, & quando voluntarium. 700.2. *toto casu* 99

HHh 4

Homi

INDEX RERV.M.

Homicidium quomodo probetur. 272. Et quomodo probetur delictum factum de nocte, *in casu penultimo.*

I

Ieiunia indicta ab Episcopo, vel per consuetudinem non tenentur Religiosi seruare, & de ieiunio septuagenarij. 762

Incorrigibilis qualis dicatur Religiosus, & quot modis. 288.& 289.& seq. *vbi multa de hoc.*

Ignorantia iuris, vel facti quomodo excuset à peccato, & censuris. 306.5

Indicium proximum ad actum probatur vno teste. 280.9. in fine.

Inhibio iudicis quid operetur. 17.& 18

Indulgentiæ aliquæ concessæ Religiosis non reuocantur per Bullam D. Papæ Urbani VIII. reuocatoriam priuilegiorum viuæ vocis oraculo concessorum. 157.13

Indulgentiæ Chordigerorum P. Francisci explicantur fuse. 379.1.& seq.

Inimicus capitalis quis sit dicendus, vel non capitalis. 192. 2. Et quid valeat testimonium inimici. *ibid.*3

Inhabilitas posita in lege non impedit in foro externo nisi post sententiam declaratoriam. 266.3

Intentio bona excusat operantem à peccato in re aliâs mala. 693.4

Interruptio parua non facit discontinuationem: neque impedit continuitatem. 336.2

Iubilæus magnus quid sit. 86.& 87

Iubilæum

- Iubilæum particularem potest lucrari is qui non habet Bullam Cruciatæ. ibid. 1.
- Iubilæi tempore non suspenduntur priuilegia, & indulgentiæ Cruciatæ. 92. 6
- Iudex desistens ab aliquo actu, non potest amplius ad illum redire. 22. & 23
- Iudex qui fuit in vna causa, potest illâ finita per appellationem esse procurator in eadem causa. 28
- Iudex aliquando non potest iudicare iuxta opinionem probabilem. 350. 1
- Iudices cum plures dantur pro vna causa quando possit vnus sine alio procedere. 170. 2
- Si coniudex aliquis sit impeditus, alij iudices, vel coniudices possunt validè ferre sententiam illo coniudice non veniente. 288. 7
- Iuramentum an possit exhiberi reo ante principium litis. 285. 3
- Iurans se scire certò id quod scit solum per indicia iurat falsò. 507. 2
- Iurans falsò coram iudice in præiudicium tertij, quomodo se debeat retractare: & quid debeat restituere. 509. 4. & de inducente ad iurandum falsum. 512
- Iurisdictio per quos actus acquiratur. 522. 8
- Iurisdictio quando, & quomodo cesset in iudice, vel in delegato. 490. 1. & 2
- Iudex condemnans innocentem per testes falsos non peccat. 687
- Iuramentum de implendo contractu nullo non obligat. 558. & 559
- Iudicium temerarium quid sit? 316
- H H h 5 Impe

INDEX RERVM.

Impeditus legitimè non incurrit pœnam positam non
agenti. 583.6

S. Ioseph sponsus Deipatæ non habuit ante illam
uxorem aliquam. 525. & 526. *toto casu* 62. Et an
possit dici quod sit sanctior omnibus Sanctis, etiam
Apostolis. 530. & 531

Impediens aliquem ab assécutione alicuius beneficij;
vel officij ad quod habebat ius ad rem, tenetur illi
restituere ad arbitrium boni viri. 618.4

Interdicti tempore vir nobilis habens priuilegium
assistendi diuinis potest secum ferre suos famulos
consuetos. 65.6. & seq.

L

Legatum pium potest Papa commutare in aliud
opus magis pium. 439. & 440. *toto casu* 52. &
idem potest Episcopus in sua diœcesi. 446.4. idque
etiamsi testator id expressè prohibuerit.

Legatum relictum alicui Ecclesiæ potest Episco-
pus renunciare antequam Ecclesia acceptet. 452.
& 453

Legata relictæ pro certo vsu fratribus Minoribus non
possunt mutari in alium usum: quia talis mutatio
fuit illis concessa viuæ vocis oraculo, & hodie est
reuocata. 444. & 445

Legata pia facta in testamento facto in peccato mor-
tali non profunt animæ testatoris, si illa non ra-
tificauit existens in gratia. 341. 2. & alia de fructu
legatorum quoad animas purgatorij.

Legata pia, & non pia quæ sint: & quomodo sint
implenda si relinquantur in testamento nullo. 204.
toto casu 18.

INDEX RERV M.

851

Posterior quando deroget priori. 707. & ibidem
vitanda correctione legis. à n. 1

Lex prohibens aliquid ipso facto, vel sine declaracione quomodo sit intelligenda. 653

Facta contra legem non irritantem quando sit nulla. 732.5. Et quando sit validum factum contra legem vetantem. 539. & 540

Lex prohibens aliquid fieri, prohibet ne fiat directè, vel indirectè. 561. & 562.

Lex pœnalis quomodo extendi possit de vno casu ad alium. 258. & 259. Vide etiam fol. 302. & 303.

Illud pro lege habendū est quod legislator statuisset si cū legem faceret illi propositum fuisset. 89.2

Legis mens colligitur ex procœmio legis. 231.1. & lex non recepta à principio non obligat. 802

Licentia, seu gratia facta ab aliquo superiore non expirat morte concedentis. 592. & 593

Licentia Papæ, vel Regis pro aliqua re facienda quando diu duret. 647.1. & seq.

Licentia tacita vt possit prodesse quas condiciones habere debeat. 253

Locator non potest rem locatam repetere nondum finito locationis tempore. 111. & 112. Excipiuntur quatuor casus.

Locator non potest augere pretium rei locatæ propter fertilitatem nimiam insperatam. 114.5. & quibus ex causis possit angeri. ibid.6

Locatori qui locauit campum pro certo pretio, si magna sterilitas obueniât, non tenetur conductor soluere integrum pretium locationis. 126

Lucrum cessans non potest vsurarius sibi retinere si habuit malam fidem. 503.2. & 3

Maleficas

INDEX RERV M.

M

- M**aleficas apud quem denunciare debeamus. 372.
 1. & seq.
- Maleficas consulere pro furtis detegendis, vel pro simili-
 libus quæ pœna debeat. 688.4
- Mandati forma non seruata nihil valet factum con-
 tra formam. 184.2
- Maritus occidens vxorem iniustè perdit omnia sua
 bona, & danda sunt hæredibus vxoris. 650
- Matrimonium feminæ non habentis 12. annos com-
 pletos est nullum. 395.3
- Matrimonium clandestinum, sed nullum, contrahens
 non incurrit pœnas Tridentini. 399
- Matrimonium secundum quando possit mulier con-
 trahere post longam absentiam viri primi mariti.
 606.7
- Matrimonium quod fuit nullum ex defectu consensus
 quomodo possit reualidari. 643.2. & seqq.
- Matrimonium contractum sine præuiis tribus denun-
 ciationibus est validum si adsit Parochus. 538.
 & 539
- Matrimonium dubium non potest dissolui: idem dic
 de professione dubia. 763. & 764
- Matrimonium sine Parocho, vel eius licentia est nul-
 lum. 765
- Matrimonium debet vir nobilis contrahere cum fe-
 mina ignobili si illud promisit. 766
- Metus carceris causat metum cadentem in virum
 constantem. 334
- Metus qualis, & quantum excuset patrem cogentem
 filiam

INDEX RERVVM.

852

- filiam intrare in clausuram Monialium inuitam.
487. & ibi de precibus importunis.
- Missâ applicata à subdito pro tali intentione, est valida, licet Prælatus illam iusserit celebrare pro alia intentione. 237.3
- Missâ dictâ à Sacerdote in peccato mortali pro defuncto purgatorij prodest illi. 245.8. & seq.
- Moderamen inculpatæ tutelæ qualiter fieri debeat in homicidio. 702.4 & seqq.
- Monialis reclamans contra suam professionem debet extrahi à clausura vt liberè causam suam prosequatur. Idem de Religioso reclamante si petierit extrahi. 337. & 338
- Monialis quæ ante professionem poterat nominare successorem in emphyteusi, post professionem nominare non potest. 349.4
- Moniali potest Prouincialis validè concedere, vt res ad suum peculium pertinentes post suam mortem vendantur, & totum pretium applicetur pro Missis dicendis pro illius anima. 680. & 681. *1010 casu* 85.
- Monialis licitè egrediens à clausura curationis gratiâ, vel quid simile, licet extra illicitè moretur, peccat, sed non incurrit censuram. 627.5
- Mora parua non interrumpit continuationem temporis. 232.3
- Motus primò primus, & secundò primus qui sint? 119.1
- Mutuatarius, & mutuans quomodo possint apponere pœnam in suo contractu. 105
- Mutuatarius non tenetur soluere mercatori lucrum cessans ex pecunia mutuata nisi mercator id exprimat, & mutuatarius acceptet. 504. & 505
- Necessitas

INDEX RERV.M.

N

Necessitas extrema quæ sit , & quæ grauis?
596

Necessitas non habet legem. 811.812. & 819.820

Nominare non potest emphyteuta in emphyteusi consanguineum transuersalem , si habeat descendentes.
552. & 553

Nouitio aliàs idoneo negare suffragium ad professionem est peccatum mortale. 449.450. & 811.
812

Nouitius negans defectum prius protestante Prælato, quod aliàs , si illum habeat , expelletur , potest expelli si negauit. 268.7

Nouitius quomodo possit facere donationes , & quomodo illi abeunti reddenda sint quæ donauerat monasterio. 800. *toto casu* 103.

in Nouitiæ professione possunt dari propinæ singulis Monialibus. 802. §. *Ad tertium.*

Nouitia præsentata à patrono habente ius præsentandi debet recipi si caret defectibus : & quid si illos habeat : & quid in hoc possit facere Prouincialis?
810. & 811. *toto casu* 105.

Nouitius pro quo maior pars conuentus non dedit suffragia, an, & quomodo possit recipi ad professionem. 753. & 756. *toto casu* 95.

Nouitij mores quomodo possit Religiosus experiri vt det suffragium pro illius professione. 755. & seq.

Nouitius absens potest facere professionem per procuratorem. 336.3

in

INDEX RERVM.

853

in Nouitij suffragiis recipiendis ad professionem
vnum suffragium superabundans non nocet, si aliàs
habet suffragia sufficientia. 5

Nouitiatus annus quomodo debet esse continuus.
10

Nouitiatus annus debet esse integer, ita vt defectu
vnius diei sit nullus. Et debet fieri cum habitu Re-
ligionis, & sub obedientia Prælati. 12. 13. & 15

Nouitiatus debet esse continuus, & non interpolatus.
12. & seq.

de suffragiis Nouitio negatis, potest Prælatus in-
quirere an iuste negata sint. 21. & 811. *toto ca-
su* 105. & suffragiorum qualitas attendenda est.
25

statutum Ordinis iubens expelli Nouitium pro quo
duæ partes conuentus, ex tribus partibus, non de-
derunt illi suffragium, validum est. 30. & 31

Nouitium potest punire Prælatus ob culpas, etiamsi
ob culpas constet illum non posse professionem
emittere. 179.2. & seq.

O

Occulta crimina non potest Prælatus punire pu-
blicè. 497. 1. & seq. Excipe nisi crimen oc-
cultum sit contra bonum commune. ibidem eum
exemplis.

Officij possessio, per quos actus acquiratur. 522.8

Opera nostra bona quos fructus habeant in ratione
meriti. 340.1. & seqq.

Opera bona iusti quot gradus habeant meriti gratiæ,
satisfactionis, & congruitatis. 239. & quomoda illa
possimus

INDEX RERVM.

- possimus applicare. 244.& 245
- Opinionem æquè probabilem non potest aliquando iudex sequi in iudicando. 355.1
- Opinio non dicitur probabilior eo quod habet plures Doctores, sed ob rationes probabiliore. 394.2
- Opinio minus probabilis teneri potest quando adest timor magni periculi. 605.6.& 771
- Ordines sacros non potest licitè recipere infamis nisi post emendationem. 269.9
- Ordines sacros recipiens cum impedimento secreto, contra id quod Episcopus ordinans dicit, in communi tantum, se non intendere illum ordinare, manet nihilominus ordinatus. 270.1
- Ordinari possunt Religiosi tempore Capituli Sede vacante cum licentia Prælati. 589.1
- Ordines tres maiores suscipiens omisso aliquo gradu Minorum, incurrit suspensionem. 795. *toto casu* 101. & celebrans incurrit irregularitatem. *ibid.* 786.& 787. & quis possit cum illo dispensare. *ibid.* 788. & iste talis si ignorat quem gradum omiserit, debet recipere omnes quatuor minores. 789. & 790
- Ordines tres sacros recipiens sine interstitiis peccauit, sed non incurrit suspensionem, neque irregularitatem. 792.& 793
- Ordinatus extra Tempora bonâ fide non incurrit suspensionem, neque irregularitatem. *ibid.*& 794
- Ordinatus ante ætatem debitam bonâ fide credens se ætatem habere, non incurrit vllam censuram. *ibid.* 795. Neque illam incurrit etiam si ministret bonâ fide in Ordine sic suscepto. *ibid.*
- Pactum

INDEX RERVM.

854

P

PActum cum Diabolo quomodo faciant maleficæ.
378.2. & seq.

Papa, vel Princeps quomodo possint à subdito auferre ius ad rem quod habent, vel ius in re. 463.
& 464

Patroni monasteriorum Monialium, quam auctoritatem habeant in præsentandis puellis pro nouitiatu. 465. & seqq.

Pœna imposita à lege non incurritur nisi post latam sententiam declaratoriam; etiamsi lex dicat absque vlla declaratione. 553. & 554

Pœna apposita in contractu non obligat quando contractus est nullus. Et de pœna conuentionali. 558. & seq. & 102. & seq.

Parochus tenetur corpus parochiani defuncti comitari ad sepulturam electam in Ecclesia regularium. 559. 560. & 562

Pater an possit cogere filiam inuitam, vt intret monasterium Monialium solius educationis gratiâ, non ad profitendum. 482. *toto casu* 55

Perito in sua arte credendum est, etiamsi dicat sic sibi videri. 280

Patronus potest reuocare nominationem à se primò factam antequam præsentatus confirmetur. 188. & 189

Prælati Religionis admittens sæcularem vt sit frater Ordinis quid illi concedat admittendo ad participationem meritorum Ordinis. 247. 10

Pignus fructiferum possidens, quid debeat restituere. 106. & 107.

INDEX RERVM.

- Prælatuſ regularium, vt Prior, Guardianus, non ſunt beneficia Eccleſiaſtica. 518
- Prælatuſ admittens ad profeſſionem Nouitium, pro quo fecit antea informationes, ſed diminutas, & imperfectas, non eſt excommunicatus. 264. & 265
- Ad profeſſionem validè poteſt Nouitium admittere Prælatuſ qui eſt excommunicatus. 264. & 265. & ibidem quod Nouitiuſ excommunicatuſ validè poſſit profeſſionem emittere,
- Quæ crimina faciant profeſſionem eſſe nullam. 267.5
- vt Prælatuſ incipiat proceſſum contra ſubditum, non eſt neceſſe vt in principio proceſſuſ ponat probationem infamiæ, ſed ſatis eſt quod ſibi certo conſtet præceſſiſſe infamiam. 282. & ſeq.
- Potens id quod eſt maiuſ, quomodo poſſit illud quod eſt minus. 137. & 138
- Princeps poteſt reuocare priuilegium à ſe datum ſubdito ob cauſam iuſtam. 67
- Princeps etiam ſupremuſ, vel Papa, non poteſt auferre à ſubdito iuſ quod habet de facto in re aliqua. 215.4
- Princeps donans aliquid ſubdito quomodo poſſit illuſ obligare vt nubat certæ feminæ. 215.15
- Parochuſ admittens aliquoſ ad matrimoniuſ contra prohibitionem Episcopuſ, facit matrimoniuſ nulluſ. 18
- Præſumere poſſumuſ ex præterito circa præſens, & ex præſenti circa futurum. 586
- Præſumptio iuriſ, & de iure quid ſit, & quomodo liceat operari cum tali præſumptione. 603.4
- Priuile

- Privilegium non solet concedi cum præiudicio tertij,
nisi exprimatur. 724.4
- Privilegium, & indulgentia concessa vni Ecclesiæ, si
Ecclesiæ destruat, & alia ibidem reædificetur, Ec-
clesia reædificata gaudet eodem privilegio, & in-
dulgentiâ. 382.3
- Privilegium quomodo reuocetur. 69. & 70
- Privilegium per non usum quomodo possit amitti. 136
- Privilegium potest Papa concedere cum aliquo præ-
iudicio tertij. 137
- Privilegium interpretatum viuæ vocis oraculo, in quo
differat à privilegio scripto. 151.2
- Privilegio Papæ potest Religio Minorum renunciâ-
re. 14
- Probationes in criminalibus debent esse clariores lu-
ce meridianâ. 278.8. & quomodo hoc debet in-
telligi.
- Probari quomodo possit delictum factum de nocte.
latè 836. *toto casu* 109
- Promissio matrimonij inter consanguineos, addens
si Papa dispensauerit, est valida, & obligat obtentâ
dispensatione. 392. 393. & 716. 717. Et quomodo
sit obligatio procurandi dispensationem.
- Professus in aliquo Ordine quando possit post quin-
quennium reclamare contra professionem. 164.1.
& talis reclamatio non potest fieri sine rescripto
Papæ. *ibid.* 2. & seq.
- Circa reclamationem professionis non potest Epi-
scopus facere vllum processum sine Prælato regu-
lari, neque audire professum. 169.1
- Professio Nouitij purgat illius infamiam præceden-
tem. 270.9

INDEX RERVM.

- Professionis nullitas quando debeat ab Episcopo iudicari cum Prælato regulari. 47. & sequentib.
- Professum ad chorum potest Prælatus mutare ad statum laicorum. 409.3
- Professio hodie facta à Nouitio sine præuiis informationibus, est valida, si aliàs seruetur ius commune, quidquid sit de pœnis Prælati. 265. 2. & seq.
- Professionis reclamationem potest facere Religiosus per procuratorem non comparendo si timet grauamen. 336.3
- Professio ob debita Nouitij impeditur, & prohibetur, sed hodie non annullatur. 267.6
- Professio nulla ex defectu consensus quomodo ratificetur. 644.
- Professio cuiusdam homicidæ non voluntarij quomodo fuerit valida, 699.1. *toto casu* 89.
- Professus quomodo possit expelli ab Ordine ex defectu consensus Ordinis in professione. 711.6
- Professio Nouitiæ de qua Abbatissa non præmonuit Episcopum iuxta Tridentinum, est nihilominus valida. 538. & 539
- Protestatio nihil valet, si protestans recedit ab illa per actum contrarium. 520. & 521
- Protestari nemo potest contra legem, neque contra id quod consequitur ex lege. 520.6
- Prouincialis non potest dispensare in statuto Prouinciali facto à sua Prouincia. 494.1. & seq.
- Prouincialis potest transferre Monialem de vno conuentu ad alium, vt sit ibi Abbatissa absque licentia Papæ. 311. *vsque ad finem casus* 31.
- Prouincialis ob iustam causam potest prohibere ne Guardia

856

INDEX RERV. M.

- Guardianus Nouitium ad professionem admittat.
17. & 41
- Prælati, etiam Papæ, mandatum non obligat si de-
tur causa clara ad non implendum. 807. *toto casu*
104.
- ad Processiones publicas non tenentur ire conven-
tus Recollecti, siue Capuchi. 823. & 824. *toto*
casu 107.
- Priuilegium locale, & personale in quo differant, &
quomodo amittantur. 827. & 828
- Prouincialis potest dare suffragium pro Nouitiæ pro-
fessione: vel committere Religioso vt pro ipso
Prouinciali det suffragium. 753. *toto casu* 95.
- Prælati quando possit dispensare cum subdito homi-
cida ad Ordines suscipiendos. 703. 6
- Præsumptio quando ponitur in lege dicente, *si quis*
presumpserit, non incurrit pœnas faciens bonâ fide.
795
- Professionis reclamatio post quinquennium quomo-
do fieri possit. 728. *toto casu* 93.
- Professus reclamâs post quinquennium indiget rescri-
pto Papæ; etiam si durante quinquennio non po-
tuerit reclamare ob iustum impedimentum. 733. 1.
& seqq.
- Professionis quæ fuit nulla, non potest Episcopus cau-
sam iudicare sine Prælato regulari. 734. 6

R

- R** Eligio potest facere statutum validum, vt profes-
sio descendens à Iudæis sit nulla, & quod ta-
lis professus possit expelli. 709. 5. & seq.
- Religiosus non se potest applicare seruitio alicuius

INDEX RERV M.

- Prælati Ecclesiastici sine licentia sui superioris.
721.1. & seq.
- Religio quævis non potest facere statutum ut professio sit nulla, si ius commune talem professionem non annullet positiuè. 540. & 541
- Religiosus cui Religio peculium aliquod concessit, qualiter possit illud expendere. 566.3
- Religiosus quomodo teneatur, vel possit subuenire parentibus indigentibus grauiter, vel extremè. 596.
toto casu 72
- Religiosus quomodo possit in vita, vel in morte facere donationes cum licentia Prælati. 681.2. & seq.
- Renunciatio beneficij, vel officij debet fieri coram illo qui illud dedit. 572
- Renunciatio potest fieri absque verbis, sed cum facto contrario. 14.23. & 24
- Religiosus transiens de vna Religione ad aliam arctiorem sine licentia sui Prælati, an possit profiteri validè in arctiori. 174. & 175
- Religiosus potest restituere validè Religioni res per furtum ab illa ablatas abstinendo à cibo, veste, &c. quæ sibi conuentus dare debeat. 255.4
- Religiosi non tenentur seruare legem principis secularis, nisi aliàs sit approbata ab Ecclesia, vel contineat ius naturale. 274. & 275
- Rescriptum Papæ, vel alicuius superioris iubentis aliquid fieri, est intelligendum quod fiat seruato iure communi, & sine præiudicio tertij. 636. *maximè* 676. & 677
- Restituere quando quis possit, id quod lex iubet ante sententiam declaratoriam criminis. 653.2. & seq.
- Restituere quid teneatur homicida hæredibus defuncti.

INDEX RERV.

- functi. 473.656. & seq.
- Restituendumne sit latroni id quod quis ab illo bonâ fide emit putans esse latronis, an verò domino à quo latro furatus est. 678.6. & seq.
- Restituere quid debeat is qui possedit rem bonâ fide, postquam sciuit esse alienam. 105. & 106
- Restituere non tenentur prouocantes se ad pugnam, vel duellum. 474. 1. & de occidente cum modamine inculpatâ tutelæ. 2. & de homicida qui ob homicidium patibulo suspensus est. 475. 4. Et de homicida per casum fortuitum. ibid. 6
- Retractare se quomodo debeat testis falsus, & inducens ad iurandum falsum. 509.5. *vsque ad finem casus.*
- Restituere an teneatur monasterium propinas datas à matre Nouitiæ singulis Monialibus in ingressu Nouitiæ, professione non secutâ. 798. & seq.
- Restituere quid debeat mutilans, vel vulnerans. 473. *toto casu* 54
- Reuocatio viuæ vocis oraculorum, an reuocet declarationes Sum. Pontificum. 157. 13. Et an reuocet consuetudines ortas ex viuæ vocis oraculis. 159. 18. & an reuocet indulgentias concessas à Papa viuæ vocis oraculo. 161.9
- Reuelationes sanctæ Brigidæ quantam fidem habeant in Ecclesia. 345.7
- Reus non debet condemnari si habet pro se opinionem probabilem, & contra se solum habet opinionem probabilem. 356.2. Et ibidem quod in fauorem rei potest iudex sequi opinionem minus probabilem.
- Reus citari omnino debet ad audiendam sententiam. 737.9

INDEX RERVM.

Renocatio Concilij Tridentini quando, & quomodo
 fieri censendum sit. 71
 Reuocandi priuilegij causa iusta est læsio boni com-
 munitis ex illo proueniens. 81.92.& 93
 Reuocari potest nominatio facta in emphyteusi, &
 quomodo. 187.& 188

S

Sacerdos Missam celebrans pro stipe, seu eleemo-
 syna, non facit contractum cum dante stipem.
 74
 Secretum etiam iuratum non obligat si ex ipsius ob-
 seruatione resulet magnum præiudicium tertij. 804
 Sententia à qua appellatur, non dicitur transire in
 rem iudicatam. 39. & 40
 Sepulturam potest quis liberè eligere in Ecclesiis Mi-
 norum. 561.1
 Sepeliri in Ecclesia magis Religiosa, est laudabilius.
 ibid. & seq.
 Sepulturam potest eligere filius pubes etiam inuito
 patre. 561.3
 Sepulturam potest pater eligere filio impuberi. 568.1.
 & filius post annos 14. potest eligere sepulturam
 inuito patre. 569.1
 Sepulturam potest pater eligere filio puberi, si filius
 non elegit. ibid.3
 Simonia pœnæ, & censuræ non habent locum in ob-
 tentione prælaturarum regularium, vt Prouincia-
 lis, Prioris, Guardiani, & similium, quidquid sit
 de peccato, quia non sunt beneficia Ecclesiastica.
 35.1

Spolium

INDEX RERVM.

858

Spolium bonorum Clericorum circa fiscum Papæ
quid sit. 744. & seq.

Statutum contrarium iuri communi negativè, est li-
citur: & quid hoc sit. 710

an sit licitum Statutum Religionis, ne professio vali-
dè fiat ante annum decimum octavum. 711

Subornatio bona non est prohibita. 7

Subornantes ante electiones qui sint excommunicati.
353.2

Suffragium dans in aliqua electione, vel Nouritij pro-
fessione non est testis, neque iudex, & ideo non
potest repelli. 27.23

Suffragium suum potest aliquis committere alicui, ut
pro se det suffragium in electione. 29

Suffragia Ecclesiæ quæ sint. 243.6

T

Testator potest liberare in testamento suum testa-
mentarium, ne faciat inuentarium. 580.3. & seq.

Testator potest in testamento validè mandare ne Epi-
scopus se ingerat in providendâ sua Capellania non
collatiua, quam testator instituit. 616.3

Testamentum factum à coniugibus cum clausula, ut
non possit reuocari, an possit eo non obstante re-
uocari ab alio coniuge superuiuente. 668.1. & seq.

Relictum mihi in Testamento nullo, an possim clam
accipere. 209.7. & seq.

Testium recusatorum dicta iuncta cum dictis testium
non recusatorum adiuvant probationē. 195.6. & seq.

Testes debiliores sufficiunt ad probandum crimen so-
domiæ, & similia occulta nimis nociua bono com-
muni. 195

INDEX RERVM.

- Testium nomina non tenentur Prælati Religiosi dare
reo in processibus iudicialibus. 277.7
- Testes sæculares possunt esse testes contra Religio-
sos. 287.5
- Testamentum vt profit animæ, debet fieri à testatore
quando est in gratia. 341. 2. vel ratificari quando
est in gratia.
- Testis interrogatus tenetur reuelare personam occul-
tam si non sit spes emendæ, & timeatur periculum
Reipublicæ. 500.2. *in fine.*
- Testis falsus quomodo se debeat retractare, & quid
teneatur restituere. 509.4. & seq.
- Testamenti clausula, seu legatum relictum vxori sub
conditione, quod non nubat, an obliget, & priuet
legato si nupserit. 660.1
- Testis quando possit esse domesticus pro domino. 611.
& 612. *in fine*, & 613
- Testes non sunt necessarij ad probandam bonam fi-
dem, sed sufficit iuramentum eius qui bonam fidem
habuit. 797. & 798. *in fine casus* 102
- Transire de vna Religione ad aliam, etiam arctiorem,
non licet absque licentia Prælati. 176. 4. & seq. &
opinio opposita ibi examinatur.
- Testamentum factum ante professionem non potest
Religiosus iam professus reuocare: potest tamen
illud declarare. 349.4. & 5

V

VEnditor tenetur manifestare emptori vitium oc-
cultum rei venditæ, non verò vitium mani-
festum.

66
Vendi

INDEX RERVM.

- Venditor rei cui non est solum pretium, sed pars pretij, potest retinere rem venditam per annos, & partem pretij cum suis redditibus donec totum pretium solvatur. 99.4
- secus si Venditor iam rem tradidit emptori. 100
- Emptor qui soluit in principio partem pretij, si postea ob iustum impedimentum non potest soluere aliam partem pretij, potest dissolvere contractum, & non amittet partem pretij iam soluti. 102.7.
- & seq.
- pœnitere quando quis possit de Venditione, vel emptione. 103.3. ibid.3
- quomodo Venditor teneatur soluere partem pretij iam soluti, & fructus rei non traditæ non secutâ venditione. 105.8. & seq.
- Venditione factâ, & soluto pretio acquirit emptor dominium rei venditæ. 112.2. & seq. Nec potest ultra à venditione apponi vlla conditio. 115.4
- Vinæ vocis oracula diuersorum Pontificum quæ sint concessa Religionibus. 141. & seq. Sed hodie sunt reuocata.
- Votum factum per iracundiam, de quo pœnitens, seu vouens statim pœnitet, quando & quomodo sit validum. 118. & seq. latè: & de voto facto cum semiplena deliberatione. 121. 5. Et de iuramento facto per iracundiam. 122
- pœnitere de Voto quando sit peccatum. 123.7
- Votum definit obligare si post votum materia voti valde mutata est, ita vt si vouens id prauideret, non voueret. 127.4
- Votum Religionis, & alia vota facta à filio ante pubertatem, potest pater irritare etiam post pubertatem, 128.4

INDEX RERVM.

tem, si filius illa non ratificauit post pubertatem.
569.570.& 571

Votum, & iuramentum in dubio interpretanda sunt
secundum vouentis intentionem, vel saltem vt obli-
gent ad minus. 692.& 693

Vsurarius ex contractu nullo quem fecit, & quem iu-
betur restituere, non potest sibi retinere lucrum ces-
sans. 503. 2. & 3. *toto casu* 59.

Vsurarius nunquam acquirit dominium illorum, quæ
per vsuras accepit. 504

Vendi non potest emphyteusis, & quid sit venditio.
454. & 455

Vxor occidens maritum iniuste, non perdit bona sua
ex vi talis occisionis, sicut maritus occidens vxo-
rem. 651.1. & seq.

Vxor occidens maritum non manet impedita ad ite-
rum nubendum. 652

an Vxor adultera perdat dotem suam, vel medietatem
bonorum. 655.3

Vxor Iudæi condemnati in sancto Officio vinens
cum illo potest de sua medietate bonorum clam do-
nare sicut voluerit, illo inuito. 783.784. & seq.

Viæ vocis oracula reuocata à D. N. Urbano VIII.
non sunt reualidata ab illo. 840. *toto casu ultimo.*

F I N I S.



FINE

86^c

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

THE END OF THE WORLD

Digitized by Google

R. SALVAREZZA
RESTAURO

Via A. Cervi n. 5 101974
Tel. 88.87.67

